


Nuevo Testamento en
mixteco



New Testament in Mixtec, Atláhuca (MX:mib:Mixtec,
Atláhuca)

Nuevo Testamento en mixteco
New Testament in Mixtec, Atatláhuca (MX:mib:Mixtec, Atatláhuca)

copyright © 1973 Wycliffe Bible Translators, Inc.

Language: Mixtec, Atatláhuca

Translation by: Wycliffe Bible Translators, Inc.

Mixteco, Atatláhuca [mib], Mexico

Copyright Information

© 1973, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Atatláhuca

© 1973, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

Contents

SAN MATEO	1
SAN MARCOS	47
SAN LUCAS	75
SAN JUAN	122
HECHOS	157
ROMANOS	202
1 CORINTIOS	221
2 CORINTIOS	239
GÁLATAS	251
EFESIOS	258
FILIPENSES	264
COLOSENSES	269
1 TESALONICENSES	273
2 TESALONICENSES	277
1 TIMOTEO	279
2 TIMOTEO	284
TITO	288
FILEMÓN	291
HEBREOS	292
SANTIAGO	306
1 PEDRO	311
2 PEDRO	317
1 JUAN	320
2 JUAN	325
3 JUAN	326
JUDAS	327
APOCALIPSIS	329

JNUHUN VAHA NI TEE SAN MATEO

*Lista ñayuu yucūn jeē ní quiji Jesucristo
(Lc. 3.23-38)*

¹ Yāha cúu lista ñayuu yucūn jeē ní quiji Jesucristo. Te máá yá ni quiji nuū yucūn rey David, te David ni quiji nuū yucūn Abraham.

² Abraham ni cuu de tátá Isaac, te Isaac ni cuu de tátá Jacob, te Jacob ni cuu de tátá Judá jíin táca ñani i. ³ Te Judá ni cuu de tátá Fares jíin Zara, te náná ndindúú i ni cuu Tamar. Te Fares ni cuu de tátá Esrom, te Esrom ni cuu de tátá Aram. ⁴ Te Aram ni cuu de tátá Aminadab, te Aminadab ni cuu de tátá Naasón, te Naasón ni cuu de tátá Salmón. ⁵ Te Salmón ni cuu de tátá Booz, te náná i ni cuu Rahab. Te Booz ni cuu de tátá Obed, te náná i ni cuu Rut. Te Obed ni cuu de tátá Isaí. ⁶ Te Isaí ni cuu de tátá David, tēe ni cuu rey. Te rey David ni cuu de tátá Salomón, te náná i, xihna gā ni cuu ña ñasihí Urías.

⁷ Te Salomón ni cuu de tátá Roboam, te Roboam ni cuu de tátá Abías, te Abías ni cuu de tátá Asa. ⁸ Te Asa ni cuu de tátá Josafat, te Josafat ni cuu de tátá Joram, te Joram ni cuu de tátá Uzías. ⁹ Te Uzías ni cuu de tátá Jotam, te Jotam ni cuu de tátá Acaz, te Acaz ni cuu de tátá Ezequías. ¹⁰ Te Ezequías ni cuu de tátá Manasés, te Manasés ni cuu de tátá Amón, te Amón ni cuu de tátá Josías. ¹¹ Te Josías ni cuu de tátá Jeconías jíin táca ñani i, máá tiempo jeē cuángoo ñayuu Israel preso nde ñuu Babilonia.

¹² Te náa cáyucú i yūcuán, te Jeconías ni cuu de tátá Salatiel. Te Salatiel ni cuu de tátá Zorobabel. ¹³ Te Zorobabel ni cuu de tátá Abiud, te Abiud ni cuu de tátá Eliaquim, te Eliaquim ni cuu de tátá Azor. ¹⁴ Te Azor ni cuu de tátá Sadoc, te Sadoc ni cuu de tátá Aquim, te Aquim ni cuu de tátá Eliud. ¹⁵ Te Eliud ni cuu de tátá Eleazar, te Eleazar ni cuu de tátá Matán, te Matán ni cuu de tátá Jacob. ¹⁶ Te Jacob ni cuu de tátá José, tēe ni cuu yíi María. Te María ni cuu ña náná Jesús, Yaā naní Cristo.

¹⁷ Te nde Abraham te nde David ni iyo uxī cuūn yucūn. Te nde David te nde náa

cuangoo ñayuu Israel preso ñuu Babilonia ni iyo inga uxī cuūn yucūn. Te nde ná ni jengoo i preso te nde ni cacu Cristo, suni ni iyo inga uxī cuūn yucūn.

*Jeē ní cacu Jesucristo
(Lc. 2.1-7)*

¹⁸ Te jeē ní cacu Jesucristo, súcuan ni cuu: Náná yā María, je ni cundaā jeē quijnáhan ña jíin José. Te nde ná tu quijnáhan ña jíin de, te ni jecūhun séhe ña ni sáha Espíritu Santo. ¹⁹ Te José, tēe quijnáhan ña jíin, chí tēe ndaā cúu de. Te tu ní cúní de cuāha de jnūhun canu ña, chí sa cúní de jeē na jécuiñī sāhi jēe ma quijnáhan de jíin ña. ²⁰ Te níni súcuan nácani ni de, te jíin jéni ni quee-ni ñn ndajéhé maá Jítoho yō Yaā Dios nuū de, te ni cahān yā jíin de:

José, séhe yucūn David, ma yūhu ró cueca ró ñasihí ró María, chí séhe jeē scácu ña, vēji i nde nuū maá Espíritu Santo. ²¹ Te scácu ña ñn séhe yíi. Te snaní ró i Jesús, chí máá i cúu Yaā jnama ñayuu nuū cuéchi i, áchí ndajéhé.

²² Súcuan ni cuu tēcá jniñu yáha, návaha squícu jnūhun Jítoho yō Yaā Dios jeē ni cahān tēe ni nacani jnūhun ya nde jenahán. Te suhva ni cahān de:

²³ Coó ñn sūchi síhí, te nihīn séhe i, te scácu i ñn séhe yíi, te conaní sūchí un Emanuel. Achí tutu. Te síhví yáha cúní cahān: Yaā Dios ndeé yá jíin yó.

²⁴ Te ni natahū ni José, te ni sáha de nájñūhun ni cahān ndajéhé Jítoho yō jíin de. Te ni jeca de María ni cuu ña ñasihí de. ²⁵ Te tu ní quíxí de jíin ña, chí nde ni scácu ña séhe yíi núú ña. Te ni snaní de i Jesús.

Jeē ní quiijicoo tēe mago nuū yā

2

¹ Te ná ni cacu Jesús ini ñuu Belén ndañúu Judea, te tiempo un ndácu rey Herodes jniñu. Yūcuán na te jecu tēe ndíchí jēe cascuáha siquī quími, ni quiijicoo de nde jicá, ichi nuū cáne niāndii, te ni jinūcoo de ñuu Jerusalén. ² Te ni cacajñūhún de ñayuu:

¿Nde nuū íne sūchí jeē ní cacu jeē coo rey ñayuu hebreo? Chí ichi núú cáne niāndii ni cajito ná ñn quími cáhnu jeē cúu seña jeē ní cacu i. Te vējicoo ná chiñúhún ná i, áchí de.

³ Te rey Herodes, ná ni jini de jnūhun yáha, te ni cunéé ni de, nde jiín táca ñáyuu ñuu Jerusalén. ⁴ Te ni nastútú de táca sūtū cácujuhnu jiín téé cástéén tutu ley Yaā Dios nuū ñáyuu. Te ni cajnūhún de téé un ndé nuū cacu Cristo achí tutu. ⁵ Te ni cacachi nuū de:

Ini ñuu Belén ndañūū Judea. Chi suhva cáhán nuū tútu ni tee téé ni nacani jnūhun ya nde jenahán:

⁶ Te róhó ñáyuu ñuu Belén ndañūū Judá, cújuhnu ga ñuu rō vēsú táca gá jeé cujuhnu ini Judá.

Chi suu ini ñuu rō quenda ñn Yaā ndacu jniñu,

te coto ya ñayuu maá rí Israel, achí Yaā Dios. Achí tutu.

⁷ Yūcuán na te Herodes ni cana sáhi de táca téé ndíchí un jeé naní mago. Te ni cajnūhun yúcún de ndé quívi ní cane quími ún. ⁸ Te ni tají de téé un quíngoo de ñuu Belén. Te ni cahán de:

Cuángoo ní te cajnūhun yúcún ní ndé nuū íne sūchi lúlí un. Te núu ni nanihín ní i, te quijicoo ní castūhun ní nuū ná, návāha suni máá ná quichiñúhún ná i, achí rey.

⁹ Te jeé ní cajini de jnūhun ni cahán rey, te cuangoo de. Te máá quími cáhnu jeé ní cajito de ichi núu cáne niāndii, yósnúu núu de cuahán nde ni jinū nuū íne sūchi lúlí un, te yūcuán ní jecuiñi. ¹⁰ Te ná ni cajito de jeé ní jecuiñi quími ún, te yōhyo ni cacusiñi ni de. ¹¹ Te ni jinūcoo de ni quívicoo de ini vehe, te ni cajito de nuū sūchi lúlí un jiín náná i María. Te ni cajecuiñi yití de nuū i, te ni cachiñúhún de i. Te ni canune de yejnū de, te ni casocō de oro jiín súje cútú jiín súje uvuā nuū i. ¹² Yūcuán na te ni scóto jēni de, ni cachi nuū de jeé ma nuhún de nuū Herodes. Te inga ichi cuanuhun de ñuu de.

Jeé ní jinu José cuangoo de nación Egipto

¹³ Te náa cuánuhun táca téé mago, te ni scóto jēni José jeé ñn ndajéhé maá Jítoho yō Yaā Dios ni cahán yā jiín de:

Ndocuiñi te cunu ró quíngoo ró jiín sūchi lúlí jiín náná i nde nación Egipto. Te yūcuán coyūcu ró nde castūhun rí nuū rō. Chi Herodes je yajni nanducú de sūchi lúlí jíñā jeé cáhni de i. Achí yá.

¹⁴ Te ni natahū ni José. Te cuangoo de jiín sūchi lúlí jiín náná i, te ñuú ní cajica de

cuangoo de nación Egipto. ¹⁵ Te ni coyūcú de yūcuán ndé ni jihí Herodes. Te súcuán ni cuu návāha squícu jnūhun Jítoho yō Yaā Dios jeé ni cáhán téé ni nacani jnūhun ya nde jenahán: Nde nación Egipto ni cana rí Sēhe rí vēji i, achí Yaā Dios, achí tutu.

Jeé ní ndacu Herodes jniñu jeé na cúu táca sūchi yá lúlí

¹⁶ Yūcuán na te Herodes ni jini de jeé súcuán ni castáhú téé mago un de, te yōhyo ni quívi ni de. Te ni tají de soldado cuangoo, te ni cajehni táca sūchi yá lúlí jeé uú cuiyā jiín jeé yíquín gá jeé cáyūcú ini ñuu Belén jiín táca ñuu yajni. Chi je ni cajnūhun yúcún de táca téé mago un nasaa tiempo ni cuu jeé ní cacu Jesús. ¹⁷ Te súcuán ni squícu jnūhun ni cahán Jeremías, téé ni nacani jnūhun Yaā Dios nde jenahán, chi ni cahán de:

¹⁸ Ini región Ramá ni jini sōho rí

jeé cándahyū te cándahyū cohó.

Chi ñahan cácu yucūn Raquel, cándahyū ña jehē séhe ña,

te tu cácuñi ña ndusiñi ni ña, chi ni cajihí i.

Achí tutu.

¹⁹ Yūcuán na te ni jihí Herodes. Te ni scóto jēni José jeé ñn ndajéhé Jítoho yō Yaā Dios ni cahán yā jiín de nuū ndeé de nación Egipto. ²⁰ Te ni cahán yā jiín de:

Ndocuiñi te nuhun rō ñuu rō Israel jiín sūchi lúlí jiín náná i. Chi je ni cajihí téé cánducú cahni sūchi lúlí jíñā nuū. Achí ndajéhé.

²¹ Yūcuán na te ni ndocuiñi de, te cuanuhun de nación Israel jiín sūchi lúlí jiín náná i. ²² Te ni nihín de jnūhun jeé Arquelao ni nucuiñi de nuū tatá de Herodes, te máá de ndácu jniñu región Judea. Te ni yūhú de nuhun de yūcuán. Te ni scóto jēni de jeé na quíhín de región Galilea, te cuangoo de. ²³ Te ni jinū de yūcuán, te ni coyūcú de ñuu naní Nazaret. Súcuán ni cuu návāha squícu jnūhun ni cacahán téé ni canacani jnūhun Yaā Dios nde jenahán. Chi ni cacachi de jeé cahán ñayuu jeé téé ñuu Nazaret cúu Jesús.

Jnūhun Juan téé scuándute

(Mr. 1.1-8; Lc. 3.1-9, 15-17; Jn. 1.19-28)

3

¹ Te ni yāha tiempo, te ni jinū Juan tēe scuándute nde nuū ñúhun téhé ndañúū Judea, nácani de jñūhun suhva:

² Nacani ni rō jijnáhan ró jeē stóo ró cuéchi ró, chi je ni cuyajni Yaā ndeé andiví jeē ndacu ya jniñu nuū rō. Achí de.

³ Te Isaías, tēe ni nacani jñūhun Yaā Dios nde jenahán, suhva ni tee de jñūhun Juan nuū tútu:

Coo ñn tēe cana jee nde nuū ñúhun téhé:

Sátūhva ró máá ró jijnáhan ró, chi quee maá Jítoho yō.

Te sáha ró jniñu ndaā, chi vēji ya, achi de.

Achí Isaías.

⁴ Te sahma ñúhun Juan cúu ixí quiñi nání camello, te núhni ñn cinturón ññ chñi de. Te jeē técu de cúu tíca ndicuéhyí jíin ndúxi yocō. ⁵ Te ñayuu ñuu Jerusalén jíin táca ñáyuu región Judea jíin ñáyuu yúcu yajni yuyúte Jordán, ni quijicoo i nuū de. ⁶ Te ni canacani ndaā i cuéchi i nuū Yaā Dios, te ni scuándute de i ini yūte Jordán.

⁷ Te ná ni jito de jeē véjicoo cuehē tēe grupo fariseo jíin tēe grupo saduceo nuū scuándute de, te ni cahān de jíin:

Va sēhe coō cácuu ró, chi xeēn rō nájnūhun coō. ¿A cájeni ni rō jeē cuu cunu ró cācu ró núu castigo xeēn jeē quiñi? ⁸ Núu súcuan te sáha ró jniñu váha, te súcuan stéén rō jeē ní canacani ndije ni rō jeē stóo ró cuéchi ró. ⁹ Te ma cáni ni rō cahān rō jeē cuu cācu ró síquī jeē cácuu ró yúcūn Abraham. Chi cáhán rī jíin ró jeē cuu sáha Yaā Dios jeē tāca yúu yáha nduu sēhe Abraham jeē candíje váha, te núu cúni yā. ¹⁰ Te cácuu ró nájnūhun nundēhé jeē tu jéhe ndehē váha. Te vijna je íyó túhva Yaā Dios jeē cuáha ya castigo xeēn, nájnūhun je íyó túhva ñn cāa jeē cahnde nde yoho yujnu. Núu súcuan te sáha ya jíin ró nájnūhun jíin táca yujnu jeē tu cúun ndehē váha, jeē tahndé te cayū nuū ñuhún. ¹¹ Te ruhū chi jíin ndute scuándute rī rohó, te yūcuan cúu jeē steén rō jeē ní canacani ni rō jeē stóo ró cuéchi ró. Te Yaā jeē quiñi, chi nájnūhun scuándute ya rohó cúu jeē cuáha ya Espíritu Santo condee ini anuá rō, te poder yā cúu nájnūhun ñuhún. Te Yaā quiñi chi cújéñu ndasí yá. Chi tú na vé jéñu cuiñi cúu rī nuū yā, ni jeē cuajniñu rī nuū yā vésú ñn jniñu lúlí gá nájnūhun jeē quénehen

rī ndijēn yā. ¹² Te sáha ya nájnūhun sáha tēe scánda trigo, chi sásñn ya ñayuu váha jíin ñáyuu cuneeé, nájnūhun cúndoo trigo jeē quénda sñn paja. Te nastútú yá trigo yā ndiví ini yacā yā. Te paja chi jnaa yā nuū ñuhún jeē ma ndahvá cuiñi. Achí Juan.

Jeē ní jendute Jesús

(Mr. 1.9-11; Lc. 3.21-22)

¹³ Yūcuán na te ni quenda Jesús región Galilea, te ni quee yā yūte Jordán nuū íne Juan, návāha scuándute de ya. ¹⁴ Te tu ní cúni Juan scuándute de ya, chi ni cahān de jíin yá:

Sa suhva cánuú jeē scuándute máá ní sññá, ¿te ndese cúu jeē sa nuū ná vēji ní? áchí de.

¹⁵ Te ni cahān Jesús jíin de:

Tuú chi sáha ró, chi súcuan cánuú squícu yó táca jniñu ndácu Yaā Dios, achí yá.

Yūcuán na te ni scuándute de ya. ¹⁶ Te ná ni cuu ni jendute Jesús, te ni quenda ya nuū ndúte. Te ni nune-ni andiví, te ni jito ya jeē cúun Espíritu Yaā Dios vēji, te cāa nájnūhun ñn paloma, te ni quee xinī yā. ¹⁷ Te ichi ándiví ni cahān ñn jñūhun:

Yāha cúu Sēhe rī jeē maní ndasí rī jíin, te yōhyo cúsn ni rī jíin, áchí.

Jeē ní jito ndee jexeén Jesús

(Mr. 1.12-13; Lc. 4.1-13)

4

¹ Yūcuán na te ni jinū Jesús nde nuū ñúhun téhé ní sáha Espíritu Santo. Te yūcuán coto ndee jexeén yā, chi cúni jeē sáha ya cuéchi.

² Te ni íyo ndite ni yā uū xico nduú uū xico ñuú, sáa te jíi yā sōco. ³ Te ni quee maá jexeén jeē cóto ndee un yá, te ni cahān jíin yá:

Núu máá ró cúu Sēhe Yaā Dios, te cahān rō jeē yuú yúcu yáha na ndúu staā caji rō, achí.

⁴ Te ni cahān yā jíin:

Tuú chi yósó núu tútu ññ: Nasūu máni máá jíin stáa cátecu ñayuu, chi suni jíin táca jñūhun cáhán Yaā Dios, achí yá.

⁵ Yūcuán na te cuahān jexeén un jíin yá nde ñuu ññ Jerusalén. Te ni jeni ya xinī torre templo. ⁶ Te ni cahān jíin yá:

Te núu Sēhe Yaā Dios cúu ró, te síngava ró máá ró nde nuū ñúhun, chí jnama ya rohó. Chi yósó núu tútu:
Tejníñu ya ndajéhé yā quijicoo coto róhó.
Te cunundee yā rohó jíjnáhan ya, návāha ma cáchihi ró jéhē rō nuū yuú.
Achí tutu. Achí jexeén.

⁷ Te ni cahān Jesús:

Tuú chí suni yósó núu tútu jeē ma cóto ndee ñayuu Jitoho i Yaā Dios, núu jnama ya i chí tuú, áchí yá.

⁸ Te jexeén un ní jeca tucu ya cuahān jíin yá nde xinī ñn yucu súcún ndasí. Te ni steén tācá nación ní cáhnu ñayiví núu yā, te yōhyo luu cáa ndihí. ⁹ Te ni cahān jíin yá:

Tācá ñuu yáha cuáha ri nuū rō, te núu cuiñi yítí ró chiñúhún ró ruhū, achí.

¹⁰ Yūcuán na te ni cahān Jesús nuū jexeén:

Satanás, cujiyo quihīn rō, chí yósó núu tútu jeē chiñúhún ñayuu maá Jitoho i Yaā Dios, te nuū maá-ni ya cuajníñu i. Achí yá.

¹¹ Yūcuán na te ni cujiyo-ni jexeén un cuahān. Te ni quecoo ndajéhé Yaā Dios ni cajejníñu nuū yā.

Jeē ní quejéé Jesús nácani ya jñūhun región Galilea

(Mr. 1.14-15; Lc. 4.14-15)

¹² Te ná ni nihīn Jesús jñūhun jeē íne Juan vecāa, te cuanuhun yā región Galilea. ¹³ Te tu ní cóndee yā ñuu Nazaret, chí ni jehēn yā ni condee yā ñuu Capernaum. Te ñuu un íne yumar, máá región Zabulón jíin Neftalí.

¹⁴ Te súcuan ni squícu jñūhun ni tee Isaías, tēe ni nacani jñūhun Yaā Dios nde jenahán:

¹⁵ Región Zabulón jíin Neftalí, ichi jeē yíhi yumar, lado yūte Jordán nuū cáne niāndii,

jíin región Galilea nuū cáyūcú ñayuu tācá nación tu jíin jñūhun ya.

¹⁶ Ñayuu ún chí nájnūhun cáyūcú i nuū néē, te coto i nájnūhun ñn luz cáhnu.

Te ñayuu je yajni naa, nihīn i jñūhun váha ndasí,

suu jñūhun jeē jnama ya anuá i.

Achí Isaías.

¹⁷ Te nde quiví yúcuán ní quejéé Jesús nácani ya jñūhun, te ni cahān yā suhva:

Nacani ni rō jíjnáhan ró jēē stóo ró cuéchi ró, chí je ni cuyajni Yaā ndeé andiví jēē ndacu ya jniñu nuū rō, achí yá.

Jeē ní cana ya cuūn tēe jññ chācá

(Mr. 1.16-20; Lc. 5.1-11)

¹⁸ Te jica Jesús yumar Galilea cuahān yā. Te ni jito ya nuū uú jnáhan ñani. Te ñn de cúu Simón jeē suni nání Pedro, te ñnga de cúu Andrés. Te tēe cájññ chācá cácuu de, te cásinga de ñunu de ini mar. ¹⁹ Te ni cahān yā jíin de:

Condiquīn ruhū na quihín yō, te nasáha ri rohó tēe nihīn cuehē ñayuu candíje ruhū, nájnūhun cánihīn rō chācá, áchí yá.

²⁰ Yūcuán na te ni castóo-ni de ñunu de, te ni candiquīn de ya.

²¹ Te ni jica ya jecu gā, te ni jito ya nuū ñnga uú jnáhan ñani. Te cácuu de Jacobo jíin Juan, sēhe Zebedeo. Te cáyūcú de ini barco jíin tátá de Zebedeo, cánachijnñ de ñunu de. Te suni ni cana ya de jeē cóndiquīn de ya.

²² Te ni castóo-ni de tátá de jíin barco, te ni candiquīn de ya cuango de.

Jeē ní stéén yā nuū cuehē ñayuu

(Lc. 6.17-19)

²³ Te ni jica cuu Jesús ní región Galilea, ni steén yā jñūhun ini tācá vehe íi jeē cúu sinagoga. Te ni nacani ya jñūhun váha ndese ndácu Yaā Dios jniñu. Te ni nasávāha ya ñayuu cácuu tācá-ni cuehyí. ²⁴ Te ni jité núu jñūhun ya cuahān ní región Siria. Te nuū yā ni caquindeca i tāca ñayuu cácuu, ñayuu cándohó tijni nuū cuehyí, jíin jēē jetú, jíin jēē ñūhun tachī ini, jíin jēē jíhí yíhí, jíin jēē ní íjin. Te ni nasávāha ya i jíjnáhan i. ²⁵ Te cuehē ñayuu región Galilea jíin Decápolis, jíin ñayuu ñuu Jerusalén jíin región Judea, jíin táca ñuu ichi núu cáne niāndii yūte Jordán, ni cacondiquīn i ya.

Jeē ní nacani ya jñūhun nde nuū yúcu

5

¹ Te ni jito Jesús nuū ñayuu cuehē. Te ni caa ya yucu cuahān yā, te ni cucōo ya. Te tēe cáscuáha jíin yá, ni jinūcoo de nuū yā yūcuán. ² Te ni quejéé yá ni steén yā tāca jñūhun yáha nuū de:

Jñūhun yōhyo ndetū

(Lc. 6.20-23)

³ Yōhyo ndetū ñayuu jeē cánacuni i jeē tu íyó váha ánuá i siquī cuéchi i, chí je ni

quívicoo i ndaha Yaā andiví jéē ndácu ya jniñu nuū i.

⁴ 'Yōhyo ndetū ñayuu cáccucuíhyá ni, chi ndusiñ ni i sáha Yaā Dios.

⁵ 'Yōhyo ndetū ñayuu cáhīyo vītá suchí ini, chi ni jejnūhun ya jeē cutahū i ñayiví.

⁶ 'Yōhyo ndetū ñayuu jeē nájñūhun jeē cájiī i sōco cájichī i, súcuan jnāā i sáha i jniñu ndaā, chí máá yá chindéé ñáhán yá i jeē cuu sáha i.

⁷ 'Yōhyo ndetū ñayuu cáccundáhú ni jnáhan, chí suni cundáhú ni Yaā Dios i.

⁸ 'Yōhyo ndetū ñayuu cáhīyo ndoo ini anuá, chí coto i nuū Yaā Dios.

⁹ 'Yōhyo ndetū ñayuu cánasámanī jnáhan, chí cahān Yaā Dios jeē sēhe ya cáccu i.

¹⁰ 'Yōhyo ndetū ñayuu jeē cájito xeēn inga ñayuu i síquī jeē casáha i jniñu ndaā, chí je ni quívicoo i ndaha Yaā andiví jéē ndácu ya jniñu nuū i.

¹¹ 'Yōhyo ndetū maá ró jijnáhan ró núu cácahān neé i nuū rō jeē síquī ruhū, te coto xeēn i rōhó, te stáú yáhu i rōhó, vēsú tú cuēchi ró. ¹² Na cúsiñ ni rō jijnáhan ró núu súcuan, te sa víhyá gā cusīñ ni rō, chí cáhnu ndasí coo tahū rō nde andiví. Chí suni súcuan ni cajito xeēn i tāca téé ni canacani jñūhun Yaā Dios jeē ní quijicoo xīhna gā vēsú rohó.

*Jñūhun yátá síquī ññ jín síquī luz
(Mr. 9.50; Lc. 14.34-35)*

¹³ 'Máá ró jijnáhan ró cájejniñu ró ini ñayiví nájñūhun jéjniñu ññ nuū cúñu návāha tú tehyū. Te núu ññ ún na náā jeē uhvuá, ¿te ndese nduu uhvuā tucu? Tuá cuajniñu cuiñi gā, chí sa cate ñayuu te cueñu i síquī.

¹⁴ 'Máá ró cáccu nájñūhun luz jeē steén ini anuá ñayuu ñayiví. Te cáccu ró nájñūhun ññ ñuu íne xinī yúcu, jeē ma cúu quisāhí.

¹⁵ Te ni tu nástññ ñayuu ññ lámpara te chune i chíji cajón, chí sa suhva jéni i nuū sucún, návāha cundijin nuū tāca jéē cáyūcú ini vehe. ¹⁶ Te suni súcuan na steén rō luz maá ró nuū tāca ñayuu, te suu cúu jeē cúni i jniñu váha casáha ró, te cahān i jeē yóhyo vāha Yaā cúu Tátá rō jeē ndeé yá andiví.

Jeē ni steén yā síquī ley Yaā Dios

¹⁷ 'Ma cáni ni rō jijnáhan ró jéē véji rī snāā rī ley jeē ni jéhe Yaā Dios nuū Moisés, jín jéē snāā rī tāca jñūhun ni cacahān tēe ni

canacani jñūhun ya jenahán. Tú vēji rī jeē snāā rī, chí sa suhva jeē steén cají rī jñūhun ndíso. ¹⁸ Chí jendaá cahán rī jín ró jeē núu níní íyó andiví jín ñáyiví, te ma náā cuiñi ni ññ punto ni ññ letra nuū tútu ley yā, chí nde na squícu tācá ndihí jñūhun jeē cahán. ¹⁹ Núu súcuan te núu ññ ñayuu tu squícu i ññ jñūhun yáha jéē ndácu ley yā, vēsú ññ jñūhun lulí gá cúu, te núu steén i jeē suni súcuan sáha sava ga ñayuu, núu súcuan te cuu i ñayuu núu ga ichi andiví nuū ndácu Yaā Dios jniñu. Te núu ññ ñayuu squícu i te steén i jeē squícu ñayuu, yūcuán na te cujéñu i ichi andiví nuū ndácu Yaā Dios jniñu. ²⁰ Chí cáhán rī jín ró jeē núu tú coo ndaā gā jniñu casáha ró vēsú jniñu casáha tēe cásteén tutu ley yā jín téé grupo fariseo, te ma quívicoo cuiñi rō ndaha Yaā andiví jéē ndacu ya jniñu nuū rō.

*Jeē ni steén yā jeē ma quiñi ni yō
(Lc. 12.57-59)*

²¹ 'Je ni cajini ró jñūhun ni cacahān jín ñayuu jenahán, jeē ma cáhni i ndīyí, te na-ni ñayuu núu cahni i ndīyí, te cundaā cuēchi i nuū tāca tóhō, achí. ²² Te ruhū chí cáhán rī jín ró, vēsú núu máá jéē quiñi ni ññ ñayuu jito i jnáhan i, suni cundaā síquī cuēchi i ún. Te núu ññ ñayuu cahān neé i nuū jnáhan i, núu súcuan te cundaā cuēchi i un núu justicia cujéñu ga. Te núu ññ ñayuu cahān i nuū jnáhan i: Róhó jéē canéé íñ, achí i, núu súcuan te quíví i nuū ññuhún infierno te núu ma nácani ni i.

²³ 'Jeē yúcuán te núu ni jinū rō nuū altar jín jéē socó rō nuū Yaā Dios, te núu ni nucūhun ni rō jeē ni sáha ró cuēchi síquī jnáhan ró, ²⁴ núu súcuan te squéndōo ró jéē socó rō ún xiin altar, te xīhna gā quihñ rō ndumanī rō jín jnáhan ró. Yūcuán na te nandicó ró socó rō.

²⁵ 'Te núu ññ ñayuu quihñ i jín ró nuū tohó jeē cacān i cuēchi síquī rō, núu súcuan te níní cuáhān rō jín i ichi te sándaā maá ró jín i, návāha ma squíví i rōhó núu juez. Chí juez siáha de rōhó núu policía, te chune de rōhó vecāa. ²⁶ Te jendaá cahán rī jín ró jeē ma quénda cuiñi rō yūcuán, chí nde chunaa rō ndihí cuiñi xūhun jéē cájicān de.

Jeē ni steén yā jeē ma cósquí ndéē jnáhan

²⁷ 'Ni cajini ró jnúhun ni cacahān jenahán jeē ma cósiquí ndéē jnáhan ñayuu. ²⁸ Te ruhū chi cáhán rī jín ró jeē núu ñn tēe ndéhe de nuū ñn ñahan jeē ndiyo ni de ña, yūcuán na te je ni casíquí ndéē de ñahan ún ini anuá de.

²⁹ 'Núu súcuan te núu tinūu lado váha ró sáha jeē quívi ró cuéchi, váha ga quenehen ró te scáne ró, návāha tuá sáha ró cuéchi. Chi váha gā jeē nāā ñn tinūu ró vēsú jeē cóo ndihí yiqui cúñu rō te quihīn rō infierno. ³⁰ Te núu ndaha váha ró sáha jeē quívi ró cuéchi, váha ga cahnde rō te scáne ró, návāha tuá sáha ró cuéchi. Chi váha ga jeē nāā ñn ndaha ró vēsú jeē cóo ndihí yiqui cúñu rō te quihīn rō infierno.

*Jeē ni stéén yā jeē ma ndusñn jnáhan
(Mt. 19.9; Mr. 10.11-12; Lc. 16.18)*

³¹ 'Te suni ni cacahān nde jenahán: Núu ndé ñn cúní stóo ñasihí, te na cuáha acta nuū ña jeē ndusñn jín ña. ³² Te ruhū chi sa cáhán rī jín ró jeē núu ñn tēe stóo de ñasihí de, te núu nasūu jéē tíjni ni ña, núu súcuan te sáha de jeē casíquí ndéē ña de, chi condee ña jín inga tēe. Te núu ñn tēe condeca de ñahan ní ndusñn, suni casíquí ndéē de ña.

Jeē ni stéén yā siquí jnúhun jéjnūhun téyí

³³ 'Te suni ni cajini ró jnúhun jeē ni cáhān jín ñáyuu nde jenahán: Núu ni jejnūhun téyí ró jeē squícu ró, jito jínúu Yaā Dios, núu súcuan te cánuú squícu ró jéē ni cáhān téyí ró un, áchí. ³⁴ Te ruhū chi cáhán rī jín ró jijnáhan ró jeē ní ñn siquí jniñu ma cahán téyí ró nde jín síhví Yaā Dios, ni ma cahán téyí ró jeē jito jínúu yā. Te núu jéjnūhun téyí ró te tú váha jeē ndácunehen ró andiví ni ñayiví. Chi andiví cúu nuū ín mesa nuū ndácu Yaā Dios jniñu. ³⁵ Te ñayiví cúu nájñūhun téyū nuū ín jehē yā. Te ni ma ndácunehen ró ñuu Jerusalén, chi suu cúu ñuu maá Yáā cúu Rey kujénu. ³⁶ Ni ma cahán rō jeē na cóndee cuéchi siquí rō núu tu squícu ró. Ma cahán rō súcuan, chi ma cúu cuítí sáha ró jéē ni ñn ixí xíní rō nducujín chí ndujnúu. ³⁷ Chi suhva-ni cahán rō: Cúu, achi rō. Tuú, achi rō. Chi núu chisóó gá rō jñūhun cahán rō, te nuū jexeén vēji.

Jeē ni stéén yā jeē ma cuáha yó jéē ndútahū ñayuu

(Lc. 6.29-30)

³⁸ 'Ni cajini ró jnúhun jeē ni cáhān jín ñáyuu jenahán: Núu ñn tēe ndahva de tinūu jnáhan de, suni súcuan na ndáhva tinūu de. Te núu ñn tēe stáva de jñūhun jnáhan de, suni súcuan na stáva jñūhun de, áchí. ³⁹ Te ruhū chi sa cáhán rī jín ró: Ma nácuāha ró jéē ndútahū tēe sáha ndevāha jín ró. Chi sa núu ndé tēe cani de yiqui núu lado váha ró, te váha ga suni cuāha ró inga lado cani de, vēsú jeē nácuāha ró jéē ndútahū de. ⁴⁰ Te núu ndé tēe stáú yáhu de rōhó te quénde de camisa rō, suni cuāha ró jnúhun jeē na quihín de jín ndé ticāchi ró. ⁴¹ Te núu ndé tēe scāca de rōhó jéē condiso ró ndajniñu de ñn kilómetro, te caca ró úu kilómetro jín de. ⁴² Te na-ni ñayuu núu jícán i ndajniñu ró, te cuāha ró núu i. Te ñayuu jícán núu ndajniñu nuū rō, ma sasáhán ró cuāha ró núu i.

Jñūhun jeē cundáhú ni yō ñayuu cájito uhū yohó

(Lc. 6.27-28, 32-36)

⁴³ 'Te suni ni cajini ró jnúhun jeē ni cáhān nde jenahán: Cundáhú ni rō ñayuu cáhīyo maní jín ró, te coto uhū rō ñayuu cájito uhū rohó, áchí. ⁴⁴ Te ruhū chi sa cáhán rī jín ró: Cundáhú ni rō ñayuu cájito uhū rohó. Te cacān rō jeē váha coo ñayuu cácahān ndevāha siquí rō. Te sáha váha ró jín ñáyuu cáquití ni nuū rō. Te cacān tahú rō jehē ñáyuu cácahān neé núu rō te cájito xeēn i rōhó. ⁴⁵ Te súcuan stéén rō jeē cácuu ró séhe máá Tátá rō, Yaā ndeé andiví, chi máá yá jéhe niāndii cúndijin nuū ñáyuu cunéé jín ñáyuu váha. Te jéhe ya saū nuū ñáyuu casáha jniñu ndaā jín núu ñáyuu casáha jniñu néé. ⁴⁶ Chi núu íyó maní rō jín máá-ni ñayuu jeē maní jín ró, te tú na tahū nihīn rō nuū yā. Chi nde tēe cástútú xúhun renta jeē castáhú, suni súcuan casáha de. ⁴⁷ Te núu máni jnáhan ró cáhán yñúhún ró jín, ¿te na vé jeē váha ga sáha ró núu súcuan? Chi nde ñayuu tu cácandíje Yaā Dios, suni súcuan casáha i. ⁴⁸ Núu súcuan te ndaā na cóo ndihí jeē sáha ró, nájñūhun íyó ndaā ndihí jeē sáha Tátá rō, Yaā ndeé andiví.

Jeē ni stéén yā ndese sáha yó jniñu váha

6

¹ Te jeē sāha ró táca jniñu váha nuū Yaā Dios, coto ró jēē ma sāha ró máá síquī jeē cúni ñayuu te cuajnúhún i róhó. Chi núu súcuan sāha ró, te tú na tahū rō cuāha máá Tátá rō, Yaā ndeé andiví. ² Jeē yúcuan te jeē sāha ró caridad, te ma sāha ró jēē cúni tāca ñáyuu, nájnūhun cásáha tēe stáhú-ni, cáhīn de nuū cúchitú ñayuu ini tācá vehe iī sinagoga jíin núu yáhu. Chi súcuan cásáha de návāha cuajnúhún ñayuu de jeē váha cásáha de. Jendaá cahán rī jíin ró jeē tahū de cúu jeē jejnúhún ñayuu de. ³ Te róhó jíjnáhan ró, núu cásáha ró caridad, te sāha yuhu rō, návāha nde amigo vāha ró tú cuni jeē sāha ró. ⁴ Súcuan na sāha yuhu rō caridad. Te máá Tátá rō jeē jíto ya jeē sāha yuhu rō, ñn quiví te cuāha ya tahū cuu ró.

*Jeē ni stéenyā ndese cacān tahú yō
(Lc. 11.2-4)*

⁵ Te jeē cájicān tahú rō, te ma sāha ró nájnūhun cásáha tēe stáhú-ni. Chi cánujnahan ni de cuiñi de cacān tahú de nuū iyó chitú ñayuu ini tācá vehe iī sinagoga jíin táca yíqui yáhu, návāha cuni ñayuu te cuajnúhún i de. Jendaá cahán rī jíin ró jeē maá yúcuan-ni cúu tahū jeē nihín de, suu jeē jejnúhún ñayuu de. ⁶ Te róhó jíjnáhan ró, núu cájicān tahú rō, te ndiví ró ini vehe ró te casi rō yehyí. Te cacān tahú rō nuū maá Tátá rō, Yaā ndeé yuhu jíin ró. Yūcuán na te máá Tátá rō jeē jíto ya jeē súcuan sāha yuhu rō, sāha ya jeē jícan rō.

⁷ Te jeē cájicān tahú rō, te ma cahán saá-ni ró jnúhun jeē tu cájecūhun ni rō, nájnūhun cásáha ñayuu tu cájini jnūhun Yaā Dios. Chi cájeni ni i jeē núu cuehē jnūhun súcuan cahán i, te saá te cuni sōho ya, te tuú. ⁸ Núu súcuan te ma sāha ró nájnūhun cásáha máá i. Chi máá Tátá rō, je jíni yā na vé cájini ñúhún ró nde ná tu cacān rō nuū yā. ⁹ Núu súcuan te suhva cacān tahú rō: Tátá maá ná jíjnáhan ná jēē ndeé ní andiví, níní na cóo yíñúhún ná nuū ní, chi Yaā iī cúu ní.

¹⁰ Te ñúhún ni na jēē yachī quiji quiví ndacu ní jniñu ñí ñáyiví yáha.

Te na cóo tācá jniñu nújnahan ni ní, nájnūhun iyó ini andiví, súcuan na cóo ini ñayiví.

¹¹ Staā jeē cátecu na táca quiví, cuāha ní núu ná vijna.

¹² Te cone cahnu ni ni núu tāca cuéchi cásáha ná núu ní, nájnūhun cáhine cáhnu ni na núu ñáyuu casáha cuéchi nuū ná.

¹³ Te ma cuāha ni jnúhun jeē coto ndee jexeén sáña,

chi sa suhva jnama ní sáña núu tāca jēē neé. Chi máá ní cúu Yaā ndácu jniñu, te jnī ní poder,

te yōhyo luu cújéhnu ní ñí cáni. Súcuan na cóo. Amén.

Achi rō jíjnáhan ró.

¹⁴ Chi núu cone cáhnu ni rō nuū ñáyuu casáha cuéchi nuū rō, te suni súcuan cone cáhnu ni maá Tátá rō andiví nuū cuéchi ró.

¹⁵ Te núu ma cóne cáhnu ni rō nuū ñáyuu casáha cuéchi nuū rō, te suni súcuan ma cóne cáhnu ni maá Tátá rō nuū cuéchi ró jíjnáhan ró.

Jeē ni stéenyā síquī jnúhun condite ni

¹⁶ Te núu condite ni rō jeē chiñúhún ró Yaā Dios, te ma sāha ró nájnūhun cásáha tēe stáhú-ni. Chi cásáha de jeē coto xii de, te súcuan stéén de nuū ñayuu jeē iyó ndite ni de, návāha cuajnúhún i de. Jendaá cahán rī jíin ró jeē maá yúcuan-ni cúu tahū jeē nihín de, suu jeē jejnúhún ñayuu de. ¹⁷ Te máá ró jíjnáhan ró, núu iyó ndite ni rō, te sa chuhun vāha ró xíní rō te nandahá núu rō, ¹⁸ návāha ma cúni ñayuu jeē iyó ndite ni rō. Chi máá-ni Tátá rō jeē ndeé yuhu yā jíin ró, cuni yā, te ñn quiví te cuāha ya tahū cuu ró.

Ndese coo cúcá yó nde andiví

(Lc. 12.33-34)

¹⁹ Ma cóndihvī ni rō caya rō ndajniñu cúcá ini ñayiví yáha, chi quiví tiquíxin, te cáne xehyu, te tívi. Te suni quívicoo ñacuíhna te sácuíhna. ²⁰ Chi sa suhva sāha ró táca jniñu váha návāha cayā tahū rō nde andiví. Chi yúcuan má quiví tiquíxin ni ma cáne xehyu jeē tívi. Ni ma cúu quiví ñacuíhna sácuíhna. ²¹ Chi nde nuū nihín ró tahū váha ró, yúcuan cúu nuū cóndihvī ni rō síquī.

Tinūu cúu lámpara yiquí cúñu

(Lc. 11.34-36)

²² Tinūu ró cúu nájnūhun lámpara nuū yiquí cúñu rō. Núu súcuan te núu tinūu ró iyó ndijin, te ñí-ni yiquí cúñu rō cúndijin.

²³ Te núu tinūu ró tu íyó ndijin, te ní-ni yiqui cúñu rō iyó nee. Te suni súcuan cúu ánuá rō, chí núu máni jeē jéni néé ni rō, te nacā jeē nee gā iyó ini anuá rō núu súcuan.

Jeē ma cóndihvī ni yō siquī xúhun
(Lc. 16.13)

²⁴ Ni ñn mozo ma cúu cuajniñu de nuū uū patrón. Chí quitī ni de nuū ñn te coo manī de jíin inga, chí squícu vāha de nuū ñn te sájéé ni de nuū inga. Te suni súcuan ma cúu cuajniñu ró núu Yaā Dios te núu máni siquī xúhun ndíhvī ni rō.

Yaā Dios ndíto ya yohó
(Lc. 12.22-31)

²⁵ Núu súcuan te cáhán rī jíin ró jijnáhan ró: Ma nácani ndasí ni rō siquī jeē cótecu rō, núu ndese caji rō coho ró, ni siquī sahma, núu ndese cuhun ró. Chí Yaā Dios ni sáha ya jeē técu rō jíin yiqui cúñu rō, te nagā ni cuu jeē ma cuáha ya jeē caji rō jíin jéé cuhun ró. ²⁶ Condēhe ró ndese cátecu saa, chí tu cátaji tí, ni tu cánastútú tí jeē chívāha tí, ni tú yacā tí. Te vēsú súcuan te máá Tátá rō andiví scáji yā tí. Te cánuú ndasí gá rō jijnáhan ró vēsú tācá saa ún. ²⁷ ¿Te ndé ñn ró, á cuu scuéhnu ró máá ró sava metro gā, vēsú na nácani ndasí ni rō?

²⁸ ¿Te najehē cánacani ndasí ni rō jeē ma nihín rō sahma? Condēhe jíjnáhan ró ndese jéé ita tāca yúcū. Chí tu sájniñu, ni tu táu.

²⁹ Te cáhán rī jíin ró jeē ni rey Salomón, quivī ní ñúhun de sahma váha ndasí, tu ní ñúhun de sahma lúu súcuan nájñuhun ita ún.

³⁰ Te núu súcuan jéhe Yaā Dios sahma lúu ita un jéé jéé vijna te sajnē cayū nuū ñuhún, te nagā ni cuu róhó jíjnáhan ró jéé ma sáha ya jeē nihín rō sahma. ¿Te naun tu cácandíje nīhin ró jéé ndíto ya rohó? ³¹ Núu súcuan te ma nácani ndasí ni rō siquī jeē caji rō, jeē coho ró, jeē cuhun ró. ³² Chí tāca ñáyuu ñayiví jéé tu cácandíje cúu jeē máni siquī jeē yáha cándihvī ni i. Te máá ró jijnáhan ró, chí íyó Tátá rō andiví, te jíni yā jeē cájini ñuhún ró tāca jéé yáha. ³³ Te sa suhva cánuú gá jeē cóndihvī ni rō siquī jniñu jeē ndácu Yaā Dios nuū rō, jíin síquī jeē sáha ró jniñu ndaā jeē nújnahán ni yā. Yūcuán na te sáha ya jeē nihín rō tāca jéé yáha. ³⁴ Núu súcuan te ma nácani ni rō siquī jeē cóo sajnē, chí vijna cúu

vijna te sajnē cúu sajnē. Chí cani ni rō siquī jnúndóho jeē iyó ná ñn ná ñn-ni quivī.

Jeē ma cahán yō siquī cuéchi jnáhan yō
(Lc. 6.37-38, 41-42)

7

¹ Ma cahán rō siquī ñayuu ndese sáha i, návāha suni ma cahán Yaā Dios cuéchi siquī maá ró jeē casáha ró súcuan. ² Chí nájñuhun cácahán rō siquī cuéchi ñayuu, suni súcuan cahán yā siquī cuéchi ró. Te cūhva jeē cándihvī ni rō siquī i, suni cūhva yúcuan sáha ya jíin ró. ³ Chí cuéchi jnáhan ró cúu nájñuhun jeē íne ñn yāca lúlí tinūú i. ¿Te naun casáha ró cuenta jeē súcuan, te tu casáha ró cuenta cuéchi máá ró jeē cúu nájñuhun jeē íne ñn nduhu tinūu máá ró? ⁴ ¿Te naun cácahán rō jíin jnáhan ró: Na táva rī yāca íne tinūu ró, te tu cánacani ni rō jeē íne ñn nduhu tinūu máá ró? ⁵ Tēe stáhú-ni cácuu ró núu súcuan. Xīhna gā tinūu máá ró tava rō nduhu, te yūcuán na te cuu condēhe váha ró jéé táva rō yāca tinūu jnáhan ró.

⁶ Ma sáha fuerza rō ñayuu cunéé quívicoo i nuū jnúhun íi yā núu tu cúní i. Chí ndonda i siquī rō nájñuhun ina jeē cáyhi tí rohó. Te ma nácani ró jnúhun ya nuū ñáyuu jeē tu cúní cuítí cuajnúhún. Chí cándāa i nájñuhun quivī jeē jeñú tí siquī perla jeē ndeé yahu ga.

Cacān yō nuū yā te nihīn yō
(Lc. 11.9-13; 6.31)

⁷ Cacān rō nuū Yaā Dios, te cuāha ya nuū rō. Te nducú ró tāca jéé váha íyó núu yā, te nihīn rō sáha ya. Te cacān tahu rō nde nihīn rō, nájñuhun sáha ñayuu cahán yehyí ndé nune quiví i. ⁸ Chí tāca ñáyuu jicán, cuāha ya nuū i. Te ñayuu nducú, suni nihīn i. Te ñayuu cahán, nune ya ichi nihīn i jeē cuní i.

⁹ ¿Te ndé ñn róhó núu sēhe ró jicán i staā nuū rō, te á cuáha ró ñn yuū nuū i? ¹⁰ ¿Te núu jicán i ñn chācá, te á cuáha ró ñn coō nuū i? Tú cuítí súcuan. ¹¹ Núu súcuan te máá ró jijnáhan ró, vēsú ñayuu iyó cuéchi cácuu ró, te cájini rō cuāha ró jéé váha nuū séhe ró. Te nagā ni cuu máá Tátá rō andiví jéé ma cuáha ya jeé váha nuū ñáyuu jicán nuū yā.

¹² Te nájñuhun cúní rō jeé sáha váha ñayuu jíin ró, suni súcuan na sáha váha ró jíin i. Chí

tutu ley Moisés súcuan ndácu jniñu, jín táca tutu tē ni canacani jnūhun Yaā Dios.

Siquī jeē quívi yó yéhyí túū
(Lc. 13.24)

¹³ Condihvī ni rō quívicoo ró ndaha Yaā Dios. Chi cúu nájnūhun ñn yéhyí túū. Chi yéhyí jín ichi jeē cuahán nuū jnahnú ndetū ñayuu, jíté te cáhnu, te cuehē i quívicoo yūcuán. ¹⁴ Te yéhyí jín ichi jeē cuahán nuū nihín tahu i cotecu i, chi tuū yehyí te cuíñi ichi, te jecu-ni i cánihñ i.

Jín jniñu cásáha ñayuu te nácuni yō ndese ñayuu cácuu i
(Lc. 6.43-44)

¹⁵ Te ma cándije cuít i rō tē stáhú jē cácahán de jeē jnúhun Yaā Dios cánacani de. Chi nájnūhun lanchi, quít i tú xeēn, súcuan cásáha de vējicoo de nuū rō. Te ini anuá de chi cácuu de nájnūhun yihī, quít i xeén. ¹⁶ Jín jniñu cásáha de te nacuni rō de ndese tē cácuu de. Chi cúu nájnūhun jeē tu scóyo ró ndehē uva xinī iñu, ni tu scóyo ró higo xinī iñu yóquin. ¹⁷ Te táca yujnu váha chi jéhe ndehē váha, te yujnu neé chi cúun ndehē neé. ¹⁸ ñn yujnu váha ma cúun ndehē neé, te ni ñn yujnu neé ma cuáha ndehē váha. ¹⁹ Te táca yujnu jeē tu jéhe ndehē váha, chi tahndē te cayū nuū ñuhún. ²⁰ Te suni súcuan cácuu tē ún, chi jín jniñu cásáha de te nácuni rō ndese tē cácuu de.

Nasūú ndihī ñayuu quívicoo andiví
(Lc. 13.25-27)

²¹ Nasūú ndihī ñayuu jeē cahán i Jitoho i ruhū cúu jeē quívicoo nuū ndácu Tátá rī jniñu nde andiví. Chi quívicoo máa nene ñayuu jeē squícu jniñu cúní Tátá rī andiví. ²² Te quívi jeē sándaā rī jniñu ñayuu, te cuehē i cahán jín rí: Jitoho na jíjnáhan ná, ni canacani ná jnúhun jín síhví ní, te ni caquenehen ná táchī jín síhví ní, te ni casáha ná cuehē jniñu jéhnu jín síhví ní jeē náa ni ñayuu sáha. Achi i. ²³ Yūcuán na te cahán rī jín ñayuu ún: Tu jíní cuít i rī rohó. Cujjiyo quingoo ró, chi ñayuu casáha jniñu neé cácuu ró, achi rī.

Siquī úú vehe
(Lc. 6.47-49; Mr. 1.22)

²⁴ Núu súcuan te táca ñayuu jeē cájini sōho jnūhun cáhán rī te squícu i, cácuu i

nájñūhun ñn tē ni nacani vāha ni, te ni jeni de vehe de squí cáva. ²⁵ Te ni cuun saū, te ni ndaa yūte, te ni quee tachī xeén, te ni cachundahá vehe ún. Te tu ní cótúú, chi squí cáva ndéé. ²⁶ Te táca ñayuu jeē cájini sōho jnūhun cáhán rī te tu squícu i, cácuu i nájnūhun ñn tē cánéé jeē ní jeni de vehe de nuū ñíti. ²⁷ Te ni cuun saū, te ni quiji ndute ñuhún cuehē, te ni quee tachī xeén, te ni cachundahá vehe ún. Te ni cótúú-ni, te ni naa ñi-ni. Achi yá jín i jíjnáhan i.

²⁸ Te ná ni jñu ni cahán Jesús táca jnúhun yáha, te ñayuu cuehē un ní canaa ni i ni cajini i jnūhun ni steén yā. ²⁹ Chi ni steén vāha ya nuū i, chi máa yá cúu jeē ndíso jniñu squí ndihī. Te tē cástéén tutu ley Yaā Dios, tu súcuan cástéén de.

Jeē ní nasávāha ya ñn tē ndóho cuehyí stehyú
(Mr. 1.40-45; Lc. 5.12-16)

8

¹ Te ni nanuu Jesús yucu ún, te cuehē ñayuu cándiquñ i ya. ² Te ñn tē ndóho cuehyí stehyú, ni quee de nuū yā. Te ni jecuiñi yití de nuū yā, te ni cahán de jín yá: Jíní na jéé cuu sáha ní jéé nduvāha ná, te núu cúní ni, áchí de.

³ Te Jesús ni soó yá ndaha ya squí de, te ni cahán yā:

Cúní rī. Te na ndúvāha ró, áchí yá.

Te ná ni cahán yā súcuan, te ni nduvāha-ni tē ndóho cuehyí stehyú un.

⁴ Yūcuán na te ni cahán Jesús jín de:

Ma cáchi cuít i rō nuū ní ñn. Chi quisteén rō maá ró nuū sutú, te condahá ró jeē socó ró nuū Yaā Dios, nájnūhun ni ndacu Moisés jniñu jenahán, návāha cuni ñayuu jeē ní nduvāha ró. Achi yá.

Jeē ní nasávāha ya mozo capitán
(Lc. 7.1-10)

⁵ Te ni quívi Jesús ñuu Capernaum. Te ñn tē nación Roma jeē cúu capitán, ni quee de nuū yā, te ni cahán ndahú de jín yá:

⁶ Mozo na cátú i vehe ná, chi ni ñjin i te ndóho xeén i, áchí de.

⁷ Te ni cahán Jesús:

Quihñ rī nasávāha rī i núu súcuan, áchí yá.

⁸ Te ni cahán capitán jín yá:

Tu cújéhnú ná jéē quihín ni quívi ní vehe ná. Chi máá jéē cahán-ni ní, te na ndúvāha-ni mozo na. ⁹ Chi máá ná suni ndíso jniñu ná ní casáha tēe cácujuhnu ga. Te cújéhnú ná núū tācá soldado na. Te núu cáhán na jíin ñn de jeē na quihín de, te cuahán de. Te núu cáhán na jíin inga de jeē na quíji de, te quíji de. Te núu ndácu ná ñn jniñu nuū mozo na, te sáha i. Achí de.

¹⁰ Te jeē ní jini Jesús jnūhun yáha, te ni naa ni yā. Te ni cahán yā jíin ñáyuu cándiquín yā ún:

Jendaá cahán rī jíin ró jeē ni nación yō Israel tu ní níhín rī ni ñn ñáyuu cándíje níhin súcuan, nájñūhun cándíje tēe yáha, vésú tēe nación tu jíin jnūhun Yaā Dios cúu de. ¹¹ Te cáhán rī jíin ró jeē quíjicoo cuehē ñáyuu ichi núū cáne niāndii jíin ichi núū quéē niāndii. Te cucōo i caji i staā jíin Abraham jíin Isaac jíin Jacob nuū ndácu Yaā Dios jniñu nde andiví. ¹² Te sava ñáyuu nación Israel jeē maá i quívicoo núú, te sa quenehen ya i quihín i nuū néē, chi tu ní cácandíje i. Te yūcuan ndáhyū i te nacayihí yuhu i jeē ndoho xeēn i. Achí yá.

¹³ Yūcuán na te ni cahán yā jíin tēe cúu capitán:

Cuánuhun vehe ró, chi sáha ri nájñūhun cándíje ró jéē sáha ri.

Te mozo de un ní nduvāha-ni i máá hora un.

Jeē ní nasávāha ya naná chíso Pedro
(Mr. 1.29-31; Lc. 4.38-39)

¹⁴ Te ni jehēn Jesús vehe Pedro. Te ni jito ya naná chíso de jeē catú ña yáhi quíji ña. ¹⁵ Te ni jñi ya ndaha ña, te ni quenda-ni quíji ún ña. Te ni ndocuññi ña, te ni sáha ña jeē ní cayejí de jíin yá.

Jeē ní nasávāha ya cuehē ñáyuu
(Mr. 1.32-34; Lc. 4.40-41)

¹⁶ Te jeē ní cuaa ni quecoo ñáyuu jíin cuehē ñáyuu jeē ñūhun tachí ini i. Te ni quenehen ya tachí un cuángoo jíin jnūhun cáhán-ni ya. Te suni ni nasávāha ya tāca ñáyuu cácuñū. ¹⁷ Te súcuan ni cuu návāha cundaā jnūhun ni cahán Isaías, tēe ni nacani jnūhun Yaā Dios jenahán: Máá yá ni tejiyo ndínuū cuehyí cándoho yó, achí Isaías.

Siquí ñáyuu jeē cácuñi i condiquín i ya
(Lc. 9.57-62)

¹⁸ Te ni jito Jesús jeē ní ndicó ndúū cuehē ñáyuu yā. Te ni cahán yā jíin tēe cácuáha jíin yá jeē na yáha de jíin yá inga lado mar.

¹⁹ Te ñn tēe stéén tutu ley Yaā Dios, ni quee de nuū yā, te ni cahán de:

Maestro, condiquín na níhín quihín yō ndé-ni cúu-ni nuū quihín ni, achí de.

²⁰ Te ni cahán Jesús jíin de:

Tāca ñúcuui, íyó yāū cava cáñuhun tí. Te suni saa, iyó táca tí. Te ruhū, Yaā ní nduu tēe, tuú nuū cusú rī, achí yá.

²¹ Te inga tēe ni cahán de jíin yá, te tēe scuáha jíin yá cúu de:

Condetu ní ndé na quíchindūji ná tátá na xíhna gā. Yūcuán na te condiquín na níhín, achí de.

²² Te ni cahán Jesús jíin de:

Condiquín ruhū na quihín yō. Te stóo tāca ndíyí na chíndūji jnāhan ndíyí, chí ndíyí cácuu ñáyuu tu cácandíje. Achí yá.

Jeē ní jecuiññi tachí níhin jíin mar ni sáha ya
(Mr. 4.35-41; Lc. 8.22-25)

²³ Yūcuán na te ni quívi Jesús ini barco, te tēe cácuáha jíin yá ni quívicoo de cuahán de jíin yá. ²⁴ Te nuū mar ni jecuññi ñn tachí níhin, te ni stóna ndute mar, ni quívi ini barco un. Te Jesús chí quíxí yā. ²⁵ Te tēe cácuáha jíin yá ni castóna de ya, te ni cacahán de:

Jnama ní yóhó, chí je quéē yó chíji ndute, achí de.

²⁶ Te ni cahán yā jíin de:

¿Naun cáyūhú ndasí ró? Te tu cácandíje níhin ró jéē cácu ró sáha ri, achí yá.

Yūcuán na te ni ndocuññi yā, te ni cahán yā nuū tachí níhin un jíin núū mar. Te ni cuu nayúú í-ni. ²⁷ Te ni canaa ni de jíināhan de, te ni cacahán de:

¿Ndé ñn ga cúu tēe yáha, jéē ndé tachí níhin jíin mar cájetáhú jéē cahán de? achí de.

Tēe Gadara jeē cándoho tachí
(Mr. 5.1-20; Lc. 8.26-39)

²⁸ Te ni jinū yā inga lado mar, máá región ñáyuu Gadara. Te uū tēe ni quendacoo de nde nuū yíndūji ndíyí, ni quiñnahan de ya. Te cáñuhun tachí ini de, te siquí jeē yóhyo xeēn tachí ún, te ni ñn ñáyuu tu cúu yāha

i ichi yúcuan. ²⁹ Te ni cacana cóhó de ni casáha tachī:

¿Naun vēji ní núū ná, Jesús Sēhe Yaā Dios? ¿A vēji ní yáha jeē stóho ní sáña ndé ná tu quee maá quívī? áchí.

³⁰ Te nde jicá jecu cáhīin cuehē quīnī cájitu tī. ³¹ Te tachī jeē cáñuhun ini tēe un ní cacahān ndahú jíin yá:

Núu quenehen ní sáña, te cuāha ni jnúhun na quívīcoo ná ini quīnī cáhīin yūcuán, áchí.

³² Te ni cahān yā jíin:

Cuángoo núu súcuan.

Te ni quendacoo tachī ún ini tēe ún, te ni quívīcoo ini quīnī. Te quīnī un ní cajinu tī ni caningava tī ñn yucáva, te ni ndaquīhi tī ndute mar, ni cajihī tī.

³³ Te tēe cándito tī ni cajinu de cuangoo de jeē ní cayūhú de. Te ni najinūcoo de ñuu. Te ni cacastūhún de tēcá jñíñu yúcuan, jíin ndese ni cuu jeē ní quendacoo tachī ini ndindúú tēe ún. ³⁴ Yūcuán na te ndivī ñayuu ñuu un, ní quendacoo i cuacondēhé i Jesús. Te ná ni jínūcoo i nuū íne ya, te ni cacahān ndahú i jíin yá jeē na quēnda ya región yúcuan quīhīn yā.

Jeē ní nasávāha ya ñn tēe ndóho cuehyī ni íjin

(Mr. 2.1-12; Lc. 5.17-26)

9

¹ Yūcuán na te ni ndīvī Jesús ini barco. Te ni nayāha ya cuahān yā inga lado mar, te ni najinū yā ñuu maá yá. ² Te ni caquindeca ñayuu ñn tēe ndóho cuehyī ni íjin, cátú de nuū ñn camilla. Te ni jini Jesús jeē cácandíje i jeē cúu nasávāha ya tēe ní íjin ún. Te ni cahān yā jíin de:

Na ndúndeyí ni rō séhē, chi je íne cáhnu ni rī nuū tāca cuéchi ró, áchí yá.

³ Yūcuán na te jecu tēe cástéén tutu ley Yaā Dios, ni cajeni ni de siquī yā: Jeē cahán tēe yáha súcuan, chí cáhán de jnúhun ndevāha jeē quití ni Yaā Dios. ⁴ Te ni jini Jesús jeē súcuan cájeni ni de, te ni cahān yā jíin de:

¿Naun cájeni ni rō jeē cahán ndevāha ri? ⁵ Jeē uú jnúhun yáha, ¿ndé ñn yí gá cáa? ¿A jeē cahán rī jíin tēe cúhú: Je íne cáhnu ni rī nuū tāca cuéchi ró? ¿Chí yí gá jeē cahán rī: Ndocuīñī te caca ró, chí je ni nduvāha ró,

achi rī? ⁶ Te vijna te na stéén rī jeē maá rí, Yaā ní nduu tēe, ndíso jñíñu ri ini ñayīvī yáha jeē cóne cáhnu ni rī nuū cuéchi.

Yūcuán na te ni cahān yā jíin tēe ní íjin ún:

Ndocuīñī te naquihin ró camilla rō te quinhun rō vehe ró, áchí yá jíin de.

⁷ Yūcuán na te ni ndocuīñī-ni tēe ún, te cuanhun de vehe de. ⁸ Te ná ni cajito ñayuu un jéē súcuan ni sáha ya, te ni cayūhú i. Te ni cacahān i jeē yóhyo vāha Yaā cúu Yaā Dios jeē súcuan ni jēhe ya poder nuū ñn tēe jeē cúu nasávāha de ñayuu, achí i cájito i Jesús.

Jeē ní cana ya Mateo

(Mr. 2.13-17; Lc. 5.27-32)

⁹ Te ni quenda Jesús yūcuán cuahān yā. Te ni jito ya nuū ñn tēe nání Mateo, néne de nuū cutútú xúhun renta. Te ni cahān yā jíin de:

Condiquīn ruhū na quíhín yō.

Te ni ndocuīñī de, te cuahān de jíin yá.

¹⁰ Yūcuán na te ni jehēn yā ni yeji yā staā vehe de. Te cuehē tēe cástútú xúhun renta jíin inga tēe casáha cuéchi, suni cáyūcú de cáyeji de staā jíin Jesús jíin tēe cáscuáha jíin yá. ¹¹ Te tēe grupo fariseo, ni cajito de, te ni cacahān de jíin tēe cáscuáha jíin yá:

¿Naun yéji maestro rō jíin tēe cástútú xúhun renta jíin inga tēe casáha cuéchi? áchí de.

¹² Te ni jini Jesús, te ni cahān yatá yá jíin de:

Ñayuu cáhīyo vāha, tu jíni ñúhún i tēe tájná, chí ñayuu cácuñú cúu jeē jíni ñúhún.

¹³ Cuahán jíinahan ró núu súcuan, te nacani ni rō na vé cúu jeē cahán jnúhun yáha jéē yosó núu tútu íi: Cúni rī jeē na cúndáhú ni rō jnahan ró, nasūu jéē socó rō quití nuū rī, achí Yaā Dios nde jenahán. Te ruhū nasūu jéē vēji ri cana ri ñayuu tú cuéchi, jeē cúu i nájnūhun ñayuu cáhīyo vāha, chí sa suhva vēji ri cana ri ñayuu iyó cuéchi, jeē na nácani ni i te stóo i cuéchi i. Achí yá.

Jeē ní cacajnúhún de ya siquī jeē cóndite ni

(Mr. 2.18-22; Lc. 5.33-39)

¹⁴ Yūcuán na te tēe cáscuáha jíin Juan tēe scuándute, ni quecoo de nuū Jesús. Te ni cacahān de jíin yá:

Sáña jíin tēe grupo fariseo, tíjni jínu cáhīyo ndite ni na núu Yaā Dios. Te tēe

cáscuáha jíin máá ní, ¿naun tu cása ha de súcuan?

¹⁵ Te ni cahān Jesús jíin de:

¿A cuu condite ni de níni jéē iyó rí jíin de? ¿A cuu cucuíhyá ni ñayuu cáhīn vico nándāha, te núu níni néne tēe nándāha? Te quee quivī jeē cújiyo tēe nándāha, te quivī ún chí condite ni i.

¹⁶ Te ni cahān yā uū jnūhun yátá síquī jeē tu quíjnáhan jnūhun jeé jéē steén yā jíin táca jnúhun jenahán. Achí yá:

Ni ñn tu náchuhun ñn pedazo sahma jéé núū ñn sahma túhú. Chí núu súcuan te ndiyi pedazo jeé un, te tahndē gā jeé tuhú un, te nducáhnú ga nuū catáhdé un. ¹⁷ Te suni tu cáchuhun vino jeé ini ññi túhú. Chí núu súcuan te ndatā ññi ún, te naa vino jíin ññi. Chí cánuú jéē chūhun i vino jeé ini ññi jéé, te súcuan te quéndōo vāha ndindúú. Achí yá.

Jnūhun sēhe síhí Jairo jíin ñahan ní quehé yusáhmayá

(Mr. 5.21-43; Lc. 8.40-56)

¹⁸ Te níni cáhán Jesús táca jnúhun yáha, te ñn tēe cújéhnú nuū ñáyuu hebreo, ni quee de nuū yā. Te ni jecuíñi yití de nuū yā, te ni cahān de:

Sēhe síhí ná sá ní jihī i. Te núu na quíhín yō soó ní ndaha ní síquī i, te natecu i. Achí de.

¹⁹ Te ni ndocuíñi Jesús, te cuahān yā jíin de, te suni cuango tēe cáscuáha jíin yá.

²⁰ Te mēhñu ñáyuu cuango jíin yá ni quee ñn ñahan, te je ni cuu uxī uū cuiyā ndóho ña cuehyī niñi. Te ni quee ña ichi yátá yā, te ni quehé ña yusáhmayá. ²¹ Chí ni jeni ni ña: Vēsú máá sahma ya na níhín rī quehé rí, te nduvāha ri, jeni ni ña. ²² Te ni ndió cóto Jesús, te ni jito ya nuū ña, te ni cahān yā:

Na ndúndeyí ni rō, séhē. Ni candíje ró jéē cuu nasávāha ri rohó, te jeé yúcuan ní nduvāha ró, achí yá.

Te ni nduvāha ña máá hora un.

²³ Te ná ni jinū Jesús vehe tēe cújéhnú ún, te ni jito ya nuū tēe cácuu músico jeé quíchindūji de i, jíin núū ñáyuu cuehē, cásvāa i. ²⁴ Te ni cahān yā jíin i:

Cujiyo jíjnáhan ró, chí sūchi síhí yáha, tu ní jíhí i chí quixí-ni i, achí yá.

Te ni cajecū catá i jeē ni cahān yā. ²⁵ Te ni quenehen ya ñayuu cuehē ún, te ni quivī ya ini vehe. Te ni jñi ya ndaha sūchi síhí

ní jihī ún, te ni ndocuíñi-ni i. ²⁶ Te ní región yúcuan ní jitē núu jnūhun jniñu jéhnú ní sáha ya ún.

Jeē ní nasávāha ya uū tēe cuáá

²⁷ Te ni quenda Jesús yúcuan cuáhān yā. Te uū tēe cuáá cuángoo de yatā yā, cácana jee de:

Máá ní jeē cúu ní Sēhe yucūn David, cundáhú ni ní sáña víi, achí de.

²⁸ Te ná ni jinū yā vehe, te ni jinūcoo tēe cuáá un núū yā. Te ni cahān yā jíin de:

¿A cácandíje ró jéē cúu nanune ri tinūu ró? achí yá.

Te ni cacahān de:

Cácandíje ná, achí de.

²⁹ Yūcuán na te ni tee ya ndaha ya tinūu de, te ni cahān yā:

Na sáha ri nájnūhun cácandíje ró, achí yá.

³⁰ Te ni cananune-ni tinūu de. Te Jesús ni cahān níhin ya jíin de:

Ma cáchi cuiñi rō nuū ni ñn, achí yá.

³¹ Te máá de chí ni quendacoo de, te ni cajete-ni de jnūhun ní región yúcuan jéē súcuan ní sáha ya jíin de.

Jeē ní nasávāha ya ñn tēe ñhín

³² Te nuū ní quendacoo tēe un cuángoo de, te ni quecoo ñayuu jíin ñn tēe ñhín, jeē ñūhun tachī ini de. ³³ Te ni quenehen ya tachī un cuáhān. Te tēe ñhín un ní nacahān de. Te ni canaa ni ñayuu ni cajito i, te ni cacahān i:

Ná tu cuni cuiñi yō ni ñn jniñu súcuan ini ñuu Israel, achí i.

³⁴ Te tēe grupo fariseo chí ni cacahān de: Tēe yáha chí quenehen de tachī jíin fuerza máá jexeén jeē cújéhnú nuū tachī, achí de.

Jeē cundáhú ni yā ñayuu cuehē

³⁵ Te ni jica cuu Jesús táca ñuu jíin rancho, te ni steén yā jnūhun ini táca vehe iī sinagoga. Te ni nacani ya jnūhun vāha ndese ndácu Yaā Dios jniñu. Te ni nasávāha ya ñayuu cácuñu na-ni cuehyī cándoho i. ³⁶ Te cundáhú ni yā jito ya nuū ñáyuu cuehē ún. Chí cándoho i te cácuuíhyá ni i, chí cácuu i nájnūhun lanchi jeē tú jito ho tī, chí tu ndíquín i Yaā cúu Jito ho i. ³⁷ Yūcuán na te ni cahān yā jíin tēe cáscuáha jíin yá:

Ñayuu yáha cácuu i nájnūhun trigo jeē tahndé, te ndaā jeē cuehē cúu, te tēe cahnde

chi jecu-ni de cúu. ³⁸ Núu súcuan te cacān tahu rō nuū maá Jítoho rō Yaā Dios jeē na táji yá cuehē tēe na quíngoo de cahnde de trigo, cúu jeē nácani de jnūhun ya nuū ñáyuu. Achí yá.

*Jeē ní nacāji ya uxī uū tēe apóstol
(Mr 3.13-19; Lc. 6.12-16)*

10

¹ Yūcuán na te ni cana ya uxī uū tēe jeē scuáha de jíin yá. Te ni jēhe ya poder nuū de jeē quenehen de tachī ini ñayuu, jíin jēe nasávāha de ñayuu cácuu tēcá ndinuū cuehyī.

² Te yāha cúu síhvī ndihúxí uū tēe apóstol un: Tēe ñn cúu Simón jeē suni nání Pedro, jíin ñani de Andrés. Te uū gā de cácuu sēhe Zebedeo, te nání de Jacobo jíin Juan. ³ Yūcuán na te Felipe, Bartolomé, Tomás, Mateo tēe ni stútú xūhun renta, Jacobo sēhe Alfeo, jíin Lebeo jeē suni nání Tadeo, ⁴ jíin Simón tēe grupo cananista, jíin Judas Iscariote, tēe jeē ní nastúu de ya.

Jeē ní tají yá ndihúxí uū de quinacani de jnūhun

(Mr 6.7-13; Lc. 9.1-6)

⁵ Te ni tají Jesús ndihúxí uū tēe yāha jeē quíngoo de. Te ni ndacu ya jniñu nuū de ndese sáha de:

Ma quíngoo rō núu ñáyuu jeē násūu ñáyuu hebreo cácuu i, ni ma quívicoo rō táca ñuu ñayuu Samaria. ⁶ Chi nuū maá-ni ñayuu nación yō Israel quíngoo rō, chi cácuu i nájnūhun lanchi jeē ní sana. ⁷ Te jeē quíngoo rō te suhva nacani rō jnúhun: Je ni cuyajni Yaā ndeé andiví jeē ndacu ya jniñu nuū rō, achi rō. ⁸ Te nasávāha rō ñáyuu cándoho cuehyī stehyú jíin ñáyuu cándoho táca gā cuehyī, te nastécu rō ndīyī te quenehen rō táchī ini ñayuu. Te súcuan-ni ni jēhe ri poder nuū rō jeē sáha rō, te suni súcuan-ni sáha rō jíin i.

⁹ Te ma cóndiso rō xūhun oro, ni xūhun plata, ni centavo cuechí. ¹⁰ Ni ma cóndiso rō ñunu stáá caji rō ichi, ni inga camisa, ni ndijēn, ni vara. Chi síquī jniñu jeē nácani rō jnúhun nuū ñáyuu, te cánuú coto i róhó.

¹¹ Te na-ni ñuu chí rancho núu ni jinūcoo rō, te yūcuán nducú rō ñn ñayuu vāha, te coyūcu rō vehe i nde quíngoo tucu rō. ¹² Te

jeē quívi rō vehe ñayuu ún, te cahān rō jeē na quíji jnūhun ndeyí jnūhun sí ni nuū i. ¹³ Te núu ñayuu vāha cácuu i, te jnūhun ndeyí ní cahān rō quéndōo síquī i. Te núu násūu ñáyuu vāha cácuu i, te jnūhun ndeyí ní cahān rō ma quéndōo síquī i. ¹⁴ Te núu íyó ñáyuu jeē tu cájetáhú i róhó, ni tu cúní i cuni nahín i jnūhun cahān rō, yūcuán na te quendacoo rō vehe un chí ñuu ún, te scóyo rō tícachā jehē rō, te súcuan stéén rō jeē iyó cuéchi i jeē tu ní cájetáhú i. ¹⁵ Jendaá cahán rī jíin rō jeē quívi juicio te xeēn gā coo castigo síquī ñuu casáha súcuan vésú síquī ñuu Sodoma jíin ñuu Gomorra nuū ní casáha ndasí ñáyuu cuéchi.

Jeē coto xeēn ñayuu de jíināhan de

¹⁶ Cuni sōho rō, chi táji rí rohó quíngoo rō nájnūhun lanchi mēhñu yñī. Núu súcuan te coo listo rō nájnūhun coō, te coo vītá ni rō nájnūhun paloma. ¹⁷ Te condito rō máa rō nuū ñáyuu, chi quee quívi jeē quíndeca i róhó núu tohó, te cani i róhó ini tēcá vehe ñ sinagoga. ¹⁸ Te suni nde nuū tēcá gobernador jíin rey quíndeca i róhó jēe síquí ruhū. Te súcuan te nune ichi jeē nacani ndaā rō jnūhun ri nuū de jíin núu ñáyuu tēcá nación jeē tu jíin jnūhun Yaā Dios. ¹⁹ Te núu ni jendeca i róhó núu táca tēe ún, ma nácani ndasí ni rō ndese cahān rō. Chi máa hora un te máa yá steén nuū rō ndese cahān rō. ²⁰ Chi násūu máa rō cúu jeē cahán, chi Espíritu máa Tátá rō cúu jeē cahán jíin yuhu rō.

²¹ Te sava ñayuu tu cácadíje, nastúu i ñani i jeē na cúu. Te tátá nastúu sēhe. Te sēhe ndonda síquī tatá jíin náná jeē na cúu. ²² Te ndihí ñayuu quívi ni i nuū rō jeē síquí ruhū. Te ñayuu jeē cuiñi ñihin nde jeē jíin jnúndóho, ñayuu ún chi cācu ánuá i. ²³ Te núu cájito xeēn i róhó ñn ñuu, te cunu rō quíhñ rō inga ñuu. Chi jendaá cahán rī jíin rō jeē ma ndécāva rō caca cuu rō ndihí nación yō Israel te ndiji-ni máa rí, Yaā ní nduu tēe.

²⁴ ñn tēe scuáha, tu cújéhnu de nuū maestro de. Ni tēe cúu mozo, tu cújéhnu de nuū patrón de. ²⁵ Tēe scuáha chí nájnūhun ndóho maestro de suni súcuan ndoho nahín máa de, te tēe cúu mozo suni ndoho de nájnūhun ndóho patrón de. Núu súcuan te núu ruhū

cácahān i jeē Satanás cúu ri, te nagā ni cuu jeē ma cahán i jeē rohó cácuu Satanás.

*Jeē ní cachi yā ndé ñn cúu jeē yūhu yó
(Lc. 12.2-9)*

²⁶ 'Núu súcuan te ma yūhu ró coto ró ñáyuu. Chi tāca jnúhun cácahān sáhi i ma quéndōo sáhi cuiti, chi ndihi natūu ndijin, te cuni ñayuu. ²⁷ Jnúhun ní cahān rī jín ró jeē tu ní jíní ñayuu, na nácastūhun cájí ró nuū i. Te jnúhun ní nacani sáhi rí nuū rō, na nácani jee ró yátā tācá vehe. ²⁸ Te ma yūhu ró coto ró ñáyuu cahni yiquí cúñu rō, chi ma cúu cahni i ánuá rō. Chi sa suhva yūhu ró jéē ma stívi ró núu Yaā Dios, chi cuu snáhnú ndetū yā rohó jéē quívi ánuá rō jín yiquí cúñu rō infierno.

²⁹ Te tācá saa chi tú yahu ndéé tī, chi nde uū tī jeē ñn centavo lulí. Te ni ñn tī tu nánga nuū ñúhun te núu tu jéhe Tátá rō jnúhun, chi ndíto ya tī. ³⁰ Te nagā ni cuu róhó jijnáhan ró, chi nde ndihi xí xíní rō je ni cahu ya. ³¹ Núu súcuan te ma yūhu ró jijnáhan ró, chi cánuú ndasí gá rō nuū yā vésú cuehē tācá saa.

*Ñayuu jejnúhún Jesucristo nuū ñnga ñayuu
(Lc. 12.8-9)*

³² Te tāca ñáyuu jeē cuajnúhún rúhū nuū ñnga ñayuu, suni súcuan cuajnúhún rí i nuū Tatá rī, Yaā ndeé andívi. ³³ Te tāca ñáyuu jeē ma cuajnúhún rúhū nuū ñnga ñayuu, suni súcuan ma cuajnúhún rí i nuū Tatá rī, Yaā ndeé andívi.

*Jeē siquí Jesús te cusñn ini ñayuu
(Lc. 12.51-53; 14.26-27)*

³⁴ Ma cáni ni rō jijnáhan ró jéē véji ri jeē cóyūcu mání ñayuu ñayívi. Tú véji ri jeē cóyūcu mání ñayuu, chi sa suhva cuajnáhan i jeē siquí ruhū. ³⁵ Chi jeē siquí ruhū te cusñn ini sēhe yí jín tátá, te sēhe síhí jín náná, te sēhe jēnu jín náná chíso. ³⁶ Chi tāca ñáyuu candíje ruhū, chi jnáhan vehe i cúu jeē quitī ni nuū i.

³⁷ Te núu ndé ñn ñayuu manī gā i jín tátá i chí jín náná i vésú jín rúhū, nasūu ñáyuu vāha cúu i jeē cóndiquñ i ruhū. Te núu ndé ñn ñayuu manī gā i jín séhe yí i chí jín séhe síhí i vésú jín rúhū, te suni nasūu ñáyuu vāha cúu i jeē cóndiquñ i ruhū. ³⁸ Te na-ni ñayuu núu tu jéhe i jnúhun ndoho i jnúndóho vésú nde cuu i jeē siquí jeē cóndiquñ i

ruhū, nasūu ñáyuu vāha cúu i jeē cóndiquñ i ruhū. ³⁹ Te núu ndé ñáyuu cúní i cácu i nuū jnúndóho quiji nuū i jeē siquí ruhū, núu súcuan te jnahnū ndetū i ní cáni. Te núu ndé ñn ñayuu vésú na cúu i jeē siquí ruhū, te cotecu i ní cáni.

*Jeē iyó táhū yō nuū Yaā Dios
(Mr. 9.41)*

⁴⁰ Te ñayuu cuatáhú róhó jijnáhan ró, núu súcuan te ruhū cájetáhú i. Te ñayuu cájetáhú rúhū, cájetáhú i Yaā ní tají rúhū véji ri. ⁴¹ Núu na-ni ñayuu cuatáhú i ñn tēe nácani jnúhun Yaā Dios, siquí jeē jíca de jniñu Yaā Dios, núu súcuan te ñnuú-ni coo tahū de nuū Yaā Dios jín tēe nácani jnúhun Yaā Dios. Te núu na-ni ñayuu cuatáhú i ñn tēe ndaā, siquí jeē tēe ndaā cúu de, núu súcuan te ñnuú-ni coo tahū de nuū Yaā Dios jín tēe ndaā. ⁴² Te núu ndé ñáyuu cuāha i vésú ñn ñajin ndute míjin coho ñn sūchi yáha, siquí jeē cúu i sūchi cándíje ruhū, ndaā ndije cúu jeē nihín i tahū i. Achí yá.

*Jeē ní tají Juan uū tēe nuū yā
(Lc. 7.18-35)*

11

¹ Te ná ni jīnu ni ndacu Jesús jniñu nuū ndihúxí uū tēe cáscuáha jín yá, te ni quenda ya yūcuan cuáhān yā jeē steén yā te nacani ya jnúhun tācá ñnuu región yūcuán.

² Te íne Juan vecāa. Te ni nihín de jnúhun tācá jniñu sáha Cristo. Te ni tají de uū tēe cáscuáha jín de, ³ cuacajnúhún de ya:

¿A máá ní cúu Cristo jeē achí tutu jeē quíji, chí condetu yó ñnga tēe quiji? áchí de.

⁴ Te ni cahān yā jín de:

Cuángoo te castūhun ró nuū Juan tācá jniñu cájito ró jín jnúhun cájini ró. ⁵ Te cachi rō nuū de jeē ñáyuu cuaá cánanune tñnū i, te ñayuu yacuá cánacaca i, te ñayuu ndóho cuehyī stehyú cánduvāha i, te ñayuu sohó cánanune sōho i, te ñayuu jihí nátecu i sáha ri. Te suni nácani ri jnúhun nuū ñáyuu ndahú jéē jnama Yaā Dios i. ⁶ Te yōhyo ndetū tēe jeē ma nácani yátá ni de jeē ruhū cúu Cristo. Súcuan cachi rō nuū Juan. Achí yá jín de.

⁷ Te náa cuanuhun ndíndúú tēe ún, te ni quejéé Jesús cahān yā jnúhun Juan jín ñayuu:

¿Na vé ni jécondēhe ró jijnáhan ró nde nuū ñúhun téhé? ¿A ñn tēe jéni ñn jéni uū ni, nájnūhun ite jeē cánda sáha tachí? ⁸ Te núu tuú, ¿te na vé ni jécondēhe ró núu súcuan? ¿A ñn tēe cúni cujéhu jeē ñúhun sahma lúu? Tuú chi cájini rō jeē tēe cáñuhun sahma lúu, máni ini vehe rey cáyūcú de. ⁹ ¿Te na vé ni jécondēhe ró núu súcuan? ¿A ñn tēe nácani jnūhun Yaā Dios? Cáhán rī jín ró jeē suu ni jecondēhe ró, te cujéhu ga Juan yáha vēsú tāca gá tēe ni canacani jnūhun Yaā Dios. ¹⁰ Chi jnūhun Juan cúu jeē ni cáhán Yaā Dios jeē yosó núu tútu i:

Tají rí tēe nacani jnūhun rī cosnūu de ichi núu Cristo,

návāha coo tūhva ñayuu jeē jinú yā.

Achí Yaā Dios, achí tutu. ¹¹ Te jendaá cahán rī jín ró jeē ini ñayívi yáha cujéhu ga Juan tēe scuándute vēsú tāca gá tēe jeē ni íyo ini ñayívi. Te vēsú súcuan te tāca tēe núu ga ini ñuu nuū ndácu Yaā andívi jniñu, cujéhu ga de vēsú Juan.

¹² Te nde quívi ní quee Juan tēe scuándute, te nde vijna, chí cánducú ndéyi ñayuu quívicoo i ndaha Yaā andívi jéé ndácu ya jniñu nuū i. Te nde ñayuu xeēn cánducú ndéyi i síquī. ¹³ Chi nde ná tu quiji Juan, te ni íyo máá ley Moisés, te suni ni íyo tāca tēe ni canacani jnūhun Yaā Dios. Te ni cacastūhún de ndese coo jeē ndacu Yaā Dios jniñu. ¹⁴ Te ni cacahán de jeē ndíji Elías. Te núu cáconi rō cuatáhu ró jnūhun, te jíní rō jeē máá Juan cúu tēe jeē ní cachi tutu jeē quíji, chí cúu de nájnūhun Elías. ¹⁵ Tāca rōhó jéé jíní sōho, na chúsóhó ró.

¹⁶ Yāhá cachi rī ñn jnūhun yátá návāha na cúni rō ndese cúu ñayuu tiempo vijna. Cúu i nájnūhun sūchi lúlí cáhín nuū yáhu cácasíquí i. Te cácana ndee i xiní jnáhan i: ¹⁷ Ní catívi rī scuilí, te tu ní cájita jéhe ró. Te ni cajita rī yaa jeē cuihyá jíta, te tu ní cándahyū rō, achí i. Te nájnūhun cándāa sūchi lúlí un jéé tu ní nujnahan ni i ni ñn, súcuan cándāa ró. ¹⁸ Chí ni quiji Juan te cuehē jínu ni íyo ndite ni de, tu ní yéji de ni tu ní jíhi de. Te tu ní cánujnahan ni rō, chí ni cacahán rō jeē ñúhun tachí ini de. ¹⁹ Yūcuán na te ni quee máá rí, Yaā ní nduu tēe, te yéji rī jíhi ri, te tu cánujnahan ni rō, te chísóo jnūhun ró cacahán rō jeē máni máá jéé yéji

rī jíhi ri vino. Te quíjnáhan ri jín tēe cástútú xúhun renta jín táca gá tēe cásáha cuēchi, achí ró. Te núu cúndíchí ñn tēe jín jnūhun Yaā Dios, te jín jniñu sáha de te nátūu jeē tēe ndíchí cúu de. Achí yá.

Jeē ní cuxeēn yā nuū sava ñuu nñni ni (Lc. 10.13-15)

²⁰ Yūcuán na te ni quejéé yá cuxeēn yā nuū tāca ñuu nuū ni sáha ya cuehē jniñu jéhu, chí tu ní cánacani ni i jeē stóo i cuēchi i. Te ni cahán yā:

²¹ Nacā jeē xeēn ndoho ró, ñáyuu ñuu Corazín. Te nacā jeē xeēn ndoho ró, ñáyuu ñuu Betsaida. Chí núu ini ñuu Tiro jín ñuu Sidón ni sáha ri jniñu jéhu jeē ni sáha ri ini ñuu maá ró, te yachí nacani ni ñayuu ñuu un jéé stóo i cuēchi i núu. Te sáha i seña jeē steén jeē nácani ni i síquī cuéchi i, chí cuhun i sahma jnúu te chuhun i yaā xiní i núu. ²² Núu súcuan te cáhán rī jín ró jeē quívi coo juicio te xeēn gā coo castigo síquī rō jijnáhan ró vēsú jeē ni íyo síquī ñuu Tiro jín ñuu Sidón. ²³ Te rōhó ñáyuu ñuu Capernaum, ¿á cájeni ni rō jeē cujéhu ró nájnūhun ñn jeē cáca cuahán ichi andívi? Tuú chí sa nanuu ró ndé lugar nuū cáyūcu ánuá ndíyi. Chí núu ini ñuu Sodoma ni sáha ri jniñu jéhu jeē ni sáha ri nuū maá ró, te coo ñuu yúcuan ndé vijna núu. ²⁴ Núu súcuan te cáhán rī jín ró jeē quívi coo juicio te xeēn gā coo castigo síquī rō vēsú jeē ni íyo síquī ñáyuu ñuu Sodoma. Achí yá.

Nehen nuū rī ndetātu ró, achí yá (Lc. 10.21-22)

²⁵ Te suni quívi un ní cahán Jesús:

Na cútahū na núu ni Tátā, Jitoho andívi jín ñayívi. Chí ni jesi ní táca jnūhun ndíchí ní, jeē ma cúni ñayuu ndíchí jín ñayuu tūhva cuenta ñayívi yáha. Te ni steén ni núu ñayuu cácuu nájnūhun sūchi lúlí. ²⁶ Chí súcuan ni nujnahan ni ni Tátā, achí yá.

²⁷ Te ni cahán gā yā:

Ndívi ni jēhe Tátá rī nuū rī. Te tu cájini ñayuu ndé ñn cúu ruhū, Sēhe Yaā Dios, chí máá-ni Tátá rī cúu jeē jiní yā ruhū. Ni tu cájini ñayuu ndese Yaā cúu máá Tátá, chí máá-ni Sēhe cúu jeē jiní. Te íyó ñayuu jeē cuní máá Sēhe steén yā nuū i ndese Yaā cúu Tátá yā, te máá i suni cuni i. ²⁸ Tāca ró jéé ni

cuíta ró jín táca jniñu jín ley jeē yí sáha jín ró, nehen quivícoo ró ndaha ri, te ndetātu ró sáha ri. ²⁹ Quiví ró núu jniñu ndácu máá rí, te scuáha ró coo ró nájnūhun íyó máá rí. Chi vitá ni rī te suchí ni rī. Te súcuan te ndetātu ró jín ánuá rō sáha ri. ³⁰ Chi tú yí jēē cuandetū rō nuū rī, ni tú yí jēē squícu ró jniñu ndácu ri. Achí yá.

Jeē ní cataxín de yoco trigo quiví ndetātu (Mr. 2.23-28; Lc. 6.1-5)

12

¹ Te ñn quiví ndetātu ní yáha Jesús cuahān yā nuū cáa trigo. Te tēe cáscuáha jín yá, cájī de sōco. Te ni quejéé de cátaxín de yoco trigo cáyeji de. ² Te ni cajito tēe grupo fariseo, te ni cacahān de jín yá:

Condēhé, chi tēe cáscuáha jín ró casáha de jniñu jeē tu íyó váha sáha yó quiví ndetātu, áchí ley Moisés.

³ Te ni cahān maá yá jín de:

¿A tu ní cácahu ró tutu ndese ni sáha David, ñn quiví jeē ni jī de sōco jín tēe cáhīn jín de? ⁴ Te ni quiví de ini vehe Yaā Dios. Te ni yeji de pan ī jeē yosó ndijin nuū Yaā Dios. Te tú na ley jeē cáji de, ni tēe cáhīn jín de, chi máá-ni sutū cuu caji. Te vésú súcuan te tú na cuēchi ní íyo siquī de. ⁵ ¿Te á tu ní cácahu ró tutu ley Moisés, ndese cásajniñu sutū ini templo, vésú quiví ndetātu cúu? Te tú na cuēchi íyó siquī de, vésú quiví ndetātu cásajniñu de jniñu jeē cácuu de sutū. ⁶ Te cáhān rī jín ró jeē máá rí jeē iyó yáha, cújēhnu ga rī vésú templo. ⁷ Te tu cájecūhun ni rō jijnáhan ró jnūhun yáha jeē yosó núu tútu ī jeē ni cáhān Yaā Dios: Jeē cuní gā rī cúu jeē cundáhú ni rō jnáhan ró, vésú jeē socó rō quití nuū rī, achí yá. Te núu jeē ní cajecūhun ni rō jnūhun yáha, te ma cahán rō súcuan siquī tēe jeē tú na cuēchi núu. ⁸ Chi ruhū, Yaā ní nduu tēe, máá rí cúu jeē ndácu jniñu siquī ndese sáha ñayuu quiví ndetātu, áchí yá.

Jeē ní nduvāha tēe ni ichī ndaha (Mr. 3.1-6; Lc. 6.6-11)

⁹ Yūcuán na te cuahān Jesús, te ni quiví ya ini vehe ī sinagoga. ¹⁰ Te yūcuán íne ñn tēe ni ichī ñn ndaha de. Te cácuñi tēe grupo fariseo jeē nihīn de cuēchi siquī yā, te ni cacajnūhún de ya:

¿A íyó ley jeē cuu nasávāha yó ñayuu cuhú quiví ndetātu? áchí de.

¹¹ Te ni cahān yā jín de:

¿Ndé ñn rōhó, núu névāha ró ñn lanchi, te núu nánga ti ini ñn yaū quiví ndetātu, te á tu jéhén rō natava rō tī, chí naún? ¹² ¿Te á tu cánuú ndasí gá ñn tēe vésú ñn lanchi? Núu súcuan te vetū-ni sáha yó jniñu váha quiví ndetātu, áchí yá.

¹³ Yūcuán na te ni cahān yā jín tēe ni ichī ndaha ún:

Scáá ndaha ró.

Te ni scaá de, te ni nduvāha-ni nájnūhun íyó inga. ¹⁴ Yūcuán na te ni quendacoo tēe grupo fariseo, te ni candajnūhún de siquī Jesús, ndese cahni de ya.

Jnūhun Jesús jeē ni cáhān Isaías nde jenahán

¹⁵ Te ni jini Jesús jeē súcuan cájeni ni de, te ni quenda ya yūcuán cuáhān yā. Te cuehē ñayuu cándiquīn i ya. Te ni nasávāha ya ndihī ñayuu cuhú. ¹⁶ Te ni ndacu ya jniñu nuū i jeē ma stéen i ya. ¹⁷ Te súcuan ni cuu návāha squícu jnūhun ni cahān Yaā Dios siquī Jesús, te ni nacani Isaías jnūhun ya un ndé jenahán:

¹⁸ Yāha cúu mozo rī jeē ní nacāji ri, te manī rī jín yá, te cúshī ni rī jín yá.

Te cuāha ri Espíritu rī coo jín yá.

Te máá yá sándaa jniñu ñayuu tēcá nación.

¹⁹ Ma tejnáhan ya, ni ma cána jee ya,

te ni ma cahán jee ya ichi jeē cúni ñayuu.

²⁰ Ma sáha xeēn yā jín ñayuu ni cunīhin jnūndóho siquī,

ni ma snáa yā ñayuu jeē maá lulí-ni cácandíje.

Chi cújēhnu ya siquī ndihī, te ndaa ndacu ya jniñu.

²¹ Te ñayuu tēcá nación cocuhun ni i jeē jnáma ya i.

Achí Yaā Dios, achí Isaías nde jenahán.

Jeē ní cacahān de jeē jejniñu ya fuerza Satanás

(Mr. 3.19-30; Lc. 11.14-23; 12.10)

²² Yūcuán na te ni caquindeca i nuū yā ñn tēe cuáá ñhīn, chí ñūhun tachī ini de. Te ni nasávāha ya de. Te ni ndundijin tinūú de te ni nacahān de. ²³ Te ndihī ñayuu cuehē un ní canaa ni i cájito i, te ni cacahān i:

¿A tée yáha cúu jeē ni cáhān Yaā Dios jeē cacu nuū yucūn David? áchí i.

²⁴ Te tēe grupo fariseo, ni cajini de jeē súcuan cácahān i. Te ni cacahān de:

Tēe yáha ma cúu quenehen de tachī núu jeē tu sáha de jíin fuerza Satanás jeē cujéhnú nuū tachí, áchí de.

²⁵ Te Jesús ni jini yā jeē súcuan cájeni ni de, te ni cahān yā jíin de:

Tācá nación jeē casásín máa te cájejnáhan máa, núu súcuan te snāa jeē iyó váha máa. Te núu in ñuu chí in vehe casásín máa te cájejnáhan máa, te ma cúu ga coyūcu cáhnu.

²⁶ Te suni súcuan Satanás núu quenehen jnáhan tachī, núu súcuan te sásín máa. ¿Te ndese cuiñi nihin Satanás jeē ndácu jniñu núu súcuan? ²⁷ Chi cácahān rō jeē jíin fuerza Satanás quenehen ri tachī. Te núu súcuan cúu núu, te ñayuu cascuáha jíin máa ró jijnáhan ró, ¿na jíin fuerza cáquenehen máa i tachī, cájeni ni rō? Núu súcuan te máa i jijnáhan i cachi jeē ní castívi ndasí suhva ró ni cacahān rō jeē cáquenehen ri tachī jíin fuerza Satanás. ²⁸ Te tuú chi sa jíin Espíritu Yaā Dios cúu jeē quenehen ri tachī. Núu súcuan te je ndéé Yaā Dios mēhñu ró jeē ndácu ya jniñu.

²⁹ ¿Chi ndese cuu quívi in tēe ini vehe tēe ndacuí jeē quenehen de ndajniñu de? Chi cánuú jeē xíhna gā cuhni de tēe ndacuí ún, te yūcuán na te cuu quenehen de ndajniñu ún. Te suni súcuan cúu jeē jíhni rī Satanás te quenehen ri tachī.

³⁰ Te ñayuu tu iyó mání jíin rí, núu súcuan te jíto uhū i ruhū. Te ñayuu tu nástútú jíin rí, núu súcuan te sa jéte núu i ñayuu vējicoo nuū rī.

³¹ Jeē yúcuan cáhān rī jíin ró: Iyó modo coo jñūhun cáhnu ni nuū tāca cuéchi cása ha ñayuu, jíin núu tāca jñūhun néé cácahān i. Te núu cahān ndevāha i siquī Espíritu Santo, te ma cóne cáhnu ni Yaā Dios nuū i. ³² Te núu na-ni ñayuu cahān i siquī ruhū, Yaā ní nduu tēe, cuu cone cáhnu ni Yaā Dios nuū i. Te núu na-ni ñayuu cahān ndevāha i siquī Espíritu Santo, ma cóne cáhnu ni Yaā Dios nuū i, ni jeē iyó i ñayívi yáha, ni ní tiempo quíji.

*Jñūhun yujnu váha jíin yujnu néé
(Lc. 6.43-45)*

³³ Núu yujnu váha, te vāha ndehē, te núu yujnu néé, te cánéé ndehē. Chi jíin ndehē te jíin yō ndese yujnu cúu. Te suni súcuan ñayuu. ³⁴ Va sēhe coō cácuu ró, chi xeēn rō nájnūhun coō. ¿Ndese cuu cahān rō jñūhun vāha, chi ñayuu cása ha néé cácuu ró? Chi jniñu jeē jéni ni anuá ñayuu, máni yūcuan cáhān i. ³⁵ Tēe vāha cáhān de jñūhun vāha, chi iyó ndāa anuá de. Te tēe sáha néé cáhān de jñūhun néé, chi cánéé ánuá de. ³⁶ Te cáhān rī jíin ró jeē tācá na-ni jñūhun cácahān ñayuu, nacuāha i cuenta jñūhun un quívi coo juicio. ³⁷ Chi jíin jñūhun ni cahān rō sándaā yā siquī rō, núu jeē quéndōo ndāa rō chí jéé cóndee cuéchi siquī rō. Achí yá.

Jeē ní cajicān ñayuu tu cáca ndíje in jniñu jéhnú

(Mr. 8.12; Lc. 11.29-32)

³⁸ Yūcuán na te jecu tēe grupo fariseo jíin tēe cástéén tutu ley Yaā Dios, ni cacahān de jíin yá:

Maestro, cácu ni jéé sáha ní in jniñu jéhnú jeē steén núu máa ní cúu Yaā ní tají Yaā Dios, achí de.

³⁹ Te ni cahān yā jíin de:

Ñayuu yáha jeē casáha jniñu néé, tu cájetáhú cuíti i Yaā Dios. Te cájicān i in jniñu jéhnú jeē steén núu Yaā ní tají Yaā Dios cúu rī. Te tuá na inga jniñu jéhnú steén rī nuū i, chi máa-ni jniñu jéhnú nájnūhun ni cuu jíin Jonás, tēe ni nacani jñūhun Yaā Dios. ⁴⁰ Chi nájnūhun ni ine Jonás chíji chācá cáhnu unī nduú unī ñuú, suni súcuan ruhū, Yaā ní nduu tēe, cuu rī te cone rī chíji ñuhun unī nduú unī ñuú, te sáa te natecu rī. ⁴¹ Te tāca ñayuu ñuu Nínive nuū ní nacani Jonás jñūhun, natecu i jíin ñayuu tiempo yáha, quívi juicio jeē sándaā yā cuéchi, te cahān i cuéchi siquī ñayuu yáha. Chi máa i ni canacani ni i ni castóo i cuéchi i quívi ní nacani Jonás jñūhun nuū i. Te vijna chí cújéhnú ga ruhū Yaā íne yāhá vésú Jonás, te tu cáca ndíje ró rúhū. ⁴² Te reina jeē ní cujéhnú nación ichi sur, natecu ña jíin ñayuu tiempo yáha, quívi juicio jeē sándaā yā cuéchi, te cahān ña cuéchi siquī i. Chi nde jíca téyí ní quíji ña ni jini nahín ña jñūhun ndíchí ní cahān rey Salomón. Te vijna chí cújéhnú ga ruhū, Yaā íne yāhá vésú Salomón, te tu cáca ndíje ró rúhū.

*Tachī jeē nastútú jnáhan ndívi ini ñayuu
(Lc. 11.24-26)*

⁴³ Núu ni quenda ñn tachī ini ñn tēe tu cándíje, te jíca cuu nuū ñúhun téhé, ndúcú núu ndétátú, te tu níhín, yūcuán na te jéni ni maá: ⁴⁴ Na quínuhun rī vehe nuū ní quenda ri. Te núu ni ndee tucu, te jíto jeē tēe tu cándíje ún, cúu de nájnūhun ñn vehe íyú te ni ndundoo. ⁴⁵ Yūcuán na te jéquihin uxā gā tachī neé gā vēsú maá. Te quívicoo ini tēe un jéē cóyūcu yúcuan. Núu súcuan te xeēn gā ndoho tēe un jéē sándíhí vēsú jeē xíhna ñúhún. Te suni súcuan ndoho ñayuu tiempo yáha jeē casáha neé. Achí yá.

*Náná yā jíin ñani yā
(Mr. 3.31-35; Lc. 8.19-21)*

⁴⁶ Te níni súcuan cáhán yā jíin ñayuu ún, te ni quee naná yā jíin táca ñani yā, íin ña nuū quéhe, te cúní ña cahān ña jíin yá. ⁴⁷ Te ni cachí ñn tēe nuū yā:

Náná ni jíin táca ñani ni cáhín nuū quéhe, te cácuni cahān jíin ní, achí de.

⁴⁸ Te ni cahān yā jíin tēe ni cahān súcuan jíin yá:

¿Ndé ñn cúu náná rī, te ndé ñn cácuu ñani rī? Achí yá.

⁴⁹ Te ni steén ndaha yá nde nuū cáyūcu tēe cáscuáha jíin yá. Te ni cahān yā:

Suni náná rī jíin ñani rī cácuu táca jéē yáha.

⁵⁰ Chi táca ñayuu casquícu jniñu cúní maá Tátá rī, Yaā ndeé andívi, suu cácuu ñani rī, cuáha ri, náná rī. Achí yá.

*Jnūhun yátá síquī tēe jéte trigo
(Mr. 4.1-9; Lc. 8.4-8)*

13

¹ Te quívī un ní quenda Jesús vehe cuahān yā, te ni jinū yā ni cucōo ya yumar.

² Te ni cutútú cuéhē ndasí ñayuu nuū yā. Te ni quívī ya ini ñn barco, ni cucōo ya. Te táca ñayuu un cáyūcú i yumar. ³ Te jíin jnūhun yátá ni cahān yā cuehē jnūhun nuū i, te súcuan ni cahān yā:

Ñn tēe cate trigo, ni quenda de jeē cate de.

⁴ Te ná ni quejéé de jéte de, te jecu trigo ni jité yuhíchi. Te ni quecoo saa, ni cayeji tī.

⁵ Te jecu gā trigo ni jité nuū ñúhun yuū, nuū tú cuehē ñuhun. Te yachī-ni ni cane, chí tu cóquin ñuhun. ⁶ Te nuū ní cane niāndii, te ni íchī-ni, te ni casun, chí tu ní níhín nuū

quihín yoho. ⁷ Te jecu gā trigo ni jité nuū náne íñu. Te ni jehnu íñu ún, te ni jesi nuū.

⁸ Te jecu ni jité nuū ñúhun váha, te ni jēhe cuehē nunī. Sava ni jēhe ciento jeē ñn ñn, te sava ni jēhe unī xico, te sava ga ni jēhe ocō uxī. ⁹ Táca rōhó jéē jíni sōho, na chúsóhó ró. Achí yá.

*Najehē cahán yā máni jnūhun yátá
(Mr. 4.10-12; Lc. 8.9-10)*

¹⁰ Yūcuán na te tēe cáscuáha jíin yá un ní quecoo de nde nuū yā, te ni cacajnūhún de ya:

¿Najehē cúu jeē máni jnūhun yátá cáhán ni jíin ñayuu? achí de.

¹¹ Te ni cahān yā jíin de:

Róhó jíináhan ró chí sáha ya jeē cájecūhun ni rō jnūhun ni yisāhi yáha, ndese quívicoo ñayuu ndaha Yaā andívi jeē ndacu ya jniñu nuū i. Te ñayuu yáha jéē tu cácdíje, chí ma jécūhun ni i. ¹² Chí ñayuu je jécūhun ni, chí stéén gā yā nuū i, te víhyá gā cuni i. Te ñayuu tu cándíje, sa suhva naa jecu jeē je jíni i ún. ¹³ Jeē yúcuan cáhán rī jnūhun yátá jíin i. Chí vēsú cájito i, te quendōo i nájnūhun jeē tú na vé ni cájito i. Te vēsú cájini sōho i, te ma jécūhun ni i, te quendōo i nájnūhun jeē tú na vé ni cájini i. ¹⁴ Ñayuu yāhá chí squícu síquī i jnūhun ni cahān Yaā Dios jeē ní nacani Isaías, tēe ni nacani jnūhun nde jenahán:

Vēsú cuni nahín ró, te ma jécūhun ni rō, te vēsú coto ró, te ma nácuni rō.

¹⁵ Chí ñayuu yáha yōhyo ni nduníhni ni i,

te yōhyo uhū chusóhó i,

te nájnūhun cájesi i tinūú i,

návāha coo nájnūhun jeē tu cájito i,

ni tu cájini nahín i,

te ni ma jécūhun ni i,

ni ma násāma ini i quívicoo i nuū rī

jeē nasávāha ri anuá i nuū cuéchi i.

Achí Yaā Dios, achí tutu.

¹⁶ Te máá ró jíináhan ró, yōhyo ndetū rō, chí cájito ró jíin tñūú ró, te cájini nahín ró jíin sóho ró. ¹⁷ Chí jendaá cahán rī jíin ró jeē cuehē tēe ni canacani jnūhun Yaā Dios jíin cuéhē tēe ndaā, ni cacuni de coto de jeē cájito máá ró, te tu ní cájito de. Te suni ni cacuni de cuni sōho de jeē cájini sōho máá ró, te tu ní cájini de. Achí yá.

Jeē ní castūhun cájǐ yá jnūhun yátá tēe jēte trigo

(Mr. 4.13-20; Lc. 8.11-15)

¹⁸ Nūu súcuan te cuni nahín jǐjnáhan ró na vé cuní cahān jnūhun yátá tēe jēte trigo: Trigo un cúu jnūhun Yaā Dios. ¹⁹ Te ñayuu cájini sōho jnūhun ndese ndácu Yaā andiví jniñu, núu tu cájecūhun ni i te cácuu i nájnūhun trigo jeē ni jítē yuhíchi. Yūcuán na te quǐji jexeén te quénde-ni jnūhun ini anuá i. ²⁰ Te trigo jeē ni jítē nuū ñūhun yuū cúu nájnūhun ñayuu cájini sōho jnūhun, te yachī-ni cájetáhú i te cácusī ni i jíin. ²¹ Te tu cúcutú jnūhun ún ini anuá i, te jecu-ni quiví cájetáhú i. Te núu ni quejéé jnúndóho, chí jító xeēn ñayuu i síquī jnúhun ún, te quéjéé nácani yátá ni i. ²² Te jeē ni jítē nuū náne iñu cúu ñayuu cájini nahín jnúhun, te cándihvī ni i síquī jeē iyó ini ñayiví yáha, te cúní i cucúcá i, te stáhú un i cujneñu i jíin. Te ndihí jeē yáha jési nuū jnúhun ya, te tu íje i jíin jnúhun ya. ²³ Te trigo jeē ni jítē nuū ñūhun váha cúu nájnūhun ñayuu cájini nahín jnúhun, te cájecūhun ni i, te cáhije i jíin jnúhun ya. Te sava i cúu nájnūhun nunī jeē jéhe ciento jeē ñin ñin, te sava ga i jéhe unī xico, te sava ga i jéhe ocō uxī. Achí yá.

Jnūhun yátá síquī ite lasú

²⁴ Te ni cahān yā inga jnūhun yátá jíin de:

Jeē ndácu Yaā andiví jniñu cúu nájnūhun ñin tēe jeē ní jete de trigo váha nuū ñūhun de. ²⁵ Te íyó ñin tēe jító uhū de tēe chíi trigo. Te náa cáquixī tēe chíi trigo jíin táca jnáhan de, te ni jehēn ni jete ndiquin lású nuū trigo de, te cuahān. ²⁶ Te nuū ní cane trigo ún, te ni cane yoco i, te suni súcuan ni jehnu ite lasú un. ²⁷ Yūcuán na te ni jengoo mozo ni cacahān i jíin patrón i: ¿A násūu trigo váha ní jēte ní núu ñūhun ní? ¿Te ndese cúu jeē ní canecoo ite lasú nuū? ²⁸ Te ni cahān de jíin i: ñin tēe jító uhū ruhū ni sáha jeē yáha. Te ni cacahān mozo un jíin de: ¿Núu súcuan te á cúní ni jēe na quíngoo ná te jnuhun ná? áchí i. ²⁹ Te ni cahān de: Tuú, chí núu jnuhun ró lású un te sanaa te jnuhun ró ndé jíin trigo. ³⁰ Váha ga na cuéhnu máá ndé quiví tahndé. Te quiví un cáhān rī jíin tēe cahnde jeē xīhna gā ite lasú cahnde de, te chucú tútú de návāha cahmu yó. Yūcuán na

te trigo chí cahnde de ndiví ini yacā rī, achí de. Achí yá.

Jnūhun yátá síquī ndiquin mostaza
(Mr. 4.30-32; Lc. 13.18-19)

³¹ Te suni ni cahān yā inga jnūhun yátá jēe steén yā ndese ndúcuehē ñayuu ndácu Yaā andiví jniñu nuū:

Ndúcuehē i nájnūhun jéhnū ñin ndiquin mostaza jeē ní jequin ñin tēe nuū ñūhun de. ³² Te jendaá jeē ñin ndiquin lúli gá cúu vēsú táca gá ndiquin. Te núu ni jehnu, te cúu cáhnu ga vēsú táca gá yucū, chí ndúu nájnūhun ñin yujnu. Te quíjicoo saa, te cásáha ti tacā tī chíji ndaha ún. Achí yá.

Jnūhun yátá síquī levadura
(Lc. 13.20-21)

³³ Te inga jnūhun yátá ní cahān yā jíin de:

Jeē ndácu Yaā andiví jniñu nuū ñayuu cúu nájnūhun levadura jeē ní quihin ñin ñahan. Te ni saca ña jíin unī kilo harina, nde ni ndaa ndihí ñujen ni sáha. Achí yá.

Jeē máni jnūhun yátá cáhán yā jíin i
(Mr. 4.33-34)

³⁴ Táca jnúhun yáha ní cahān Jesús jíin ñayuu cuehē ún. Te táca jēe ni steén yā, máni jnūhun yátá ní cahān yā jíin i. ³⁵ Súcuan ni sáha ya návāha squícu jnūhun ni cahān tēe ni nacani jnūhun Yaā Dios nde jenahán: Cahān rī táca jnúhun yátá jíin ñayuu, te cachi rī táca jnúhun yísahí ndé quiví ní jecōo ñayiví. Achí tutu, achí yá.

Jeē ní castūhun cájǐ yá jnūhun ite lasú

³⁶ Yūcuán na te ni nacuatáhú Jesús nuū ñayuu. Te ni ndiví ya ini vehe. Te tēe cáscuáha un ní jinūcoo de nuū yā, te ni cacahān de jíin yá:

Nacani cájǐ ní jnūhun yátá ite lasú nuū ná, achí de.

³⁷ Te ni cahān yā jíin de:

Jeē jēte trigo váha un cúu máá rí, Yaā ní nduu tēe. ³⁸ Te ñūhun un cúu ñayiví. Te trigo váha un cúu ñayuu cáyihí ndaha Yaā Dios jeē ndácu ya jniñu nuū i. Te ite lasú un cúu ñayuu cáyihí ndaha jexeén. ³⁹ Te tēe jító uhū jeē ní jete lasú un cúu máá jéxeén. Te quiví tahndé cúu quiví jíinu ñayiví. Te tēe cahnde un cácuu ndajéhé Yaā Dios. ⁴⁰ Te nájnūhun tahndé ite lasú te cayū nuū

ñuhún, súcuan coo quiví jínu ñayiví. ⁴¹ Chi máá rí, Yaā ní nduu tēe, tají rí ndajéhé rí quingoo. Te nastútú yá tāca ñáyuu casquíví jnáhan nuū cuéchi, jíin ñáyuu casáha jniñu néé, quenehen ya i mēhñu ñáyuu ndácu ri jniñu nuū. ⁴² Te jnaa ya i cayū i nuū ñuhún. Te yūcuan ndáhyū i te nacayihí yuhu i jeē ndoho xeēn i. ⁴³ Yūcuán na te ñayuu squícu nuū yā chi ndindéé i nájnūhun niāndii, te coyūcú i nuū ndácu máá Tátá i jniñu. Tāca róhó jéē jíni sōho, na chúsóhó ró.

Jnūhun yátá síquī yejnū xūhún jeē yísāhi

⁴⁴ "Te jeē ndácu Yaā andiví jniñu nuū ñáyuu, suni cúu nájnūhun ñn yejnū xūhún jeē yísāhi chíji ñn ñuhun. Te ni nanihín ñn tēe, te ni nacasi tucu de síquī. Te jeē cúsiñ ni de jíin, te ni jehēn de ni xícó ndihí de jeē névāha de, te ni jeen de ñuhun ún.

Jnūhun yátá síquī perla jeē ndeé yahu

⁴⁵ "Te jeē ndácu Yaā andiví jniñu nuū ñáyuu, suni cúu nájnūhun ñn tēe jéen xíco, te ndúcú de perla váha. ⁴⁶ Te ni jini de ñn perla jeē yáhu ndasí, te ni jehēn de ni xícó ndihí de jeē névāha de, te ni jeen de perla un.

Jnūhun yátá síquī ñunu jn# chācá

⁴⁷ "Te jeē ndácu Yaā andiví jniñu nuū ñáyuu, suni cúu nájnūhun ñn ñunu jeē cásingava de ini mar, te quívicoo ndinuū chācá. ⁴⁸ Te núu ni chítú ñunu ún, te cánatava de yundúte. Te cácucoo de cánacāji de chācá. Te chācá váha cájnaa de ini jíca, te chācá tú váha cáscáne de. ⁴⁹ Te suni súcuan coo quiví jínu ñayiví. Chi quijicoo ndajéhé yā, te sásñn ya ñayuu casáha jniñu néé méhñu ñáyuu casáha jniñu váha. ⁵⁰ Te ñayuu cunéé chi jnaa ya i cayū i nuū ñuhún. Te yūcuan ndáhyū i te nacayihí yuhu i jeē ndoho xeēn i. Achí yá.

Jnūhun yátá síquī ndajniñu ndeé yahu

⁵¹ Te ni cajnūhun yá de jíjnáhan de:
¿A ní cajecūhun ni rō tāca jnūhun yáha, chí tuú? áchí yá.

Te ni cacahān de jíin yá:

Ni cajecūhun ni ná, áchí de.

⁵² Te ni cahān yā jíin de:

Iyó váha núu súcuan. Te ñn tēe stéén tutu ley Yaā Dios, núu je ni cutūhva de ndese ndácu Yaā andiví jniñu, te cuu stéén de tāca

jnūhun síquī ún. Chi cúu de nájnūhun ñn tēe chíí vehe. Te ini yejnū de táva de ndajniñu ndeé yahu, sava jeē jeē jíin sava jeē je ni cunahān iyó. Achí yá.

Jeē cuánuhun yā ñuu Nazaret

(Mr. 6.1-6; Lc. 4.16-30)

⁵³ Te ná ni ndihí ni cahān Jesús tāca jnūhun yátá yáha, te ni quenda ya yūcuan cuahān yā. ⁵⁴ Te ni najinū yā ñuu yā Nazaret. Te ni steén yā jnūhun ini vehe ñn sinagoga yūcuán. Te ni canaa ni ñayuu cájini nahín i, te ni cacahān i:

¿Ndé nuū ní cutūhva tēe yáha tāca jnūhun ndichí? ¿Te ndese cúu sáha de táca jniñu jéhnu yāhá? ⁵⁵ Chi sēhe carpintero cúu tēe yáha, te náná de cúu María, te ñani de cácuu Jacobo, José, Simón, jíin Judas. ⁵⁶ Te suni cáyūcu cuáha de jíin yó yāhá. ¿Te ndese jíin de tāca jnūhun yáha núu súcuan? Achí ñayuu.

⁵⁷ Te súcuan ni cacujéē ni i nuū Jesús. Te ni cahān yā jíin i:

Tāca tēe nácani jnūhun Yaā Dios, iyó yíñuhún ñayuu jíin de, te máni ñayuu ñuu maá de jíin ñáyuu vehe máá de cúu jeē tu iyó yíñuhún jíin de. Achí yá.

⁵⁸ Te tu ní sáha ya cuehē jniñu jéhnu yūcuán, chí tu cácandíje i ya.

Jeē ni jíhí Juan tēe scuándute

(Mr. 6.14-29; Lc. 9.7-9)

14

¹ Te tiempo yúcuán te Herodes, tēe ndácu jniñu región Galilea, ni jini jnūhun de jnūhun Jesús. ² Te ni cahān de jíin ñáyuu cáhíin jíin de:

Tēe yúcuán cúu Juan tēe ni scuándute, te ni natecu de. Jeē yúcuán iyó poder de sáha de jniñu jéhnu. Achí de.

³ Chi Herodes, je ni ndacu de jniñu jeē na quíví Juan vecāa, jíin jéē na cónuhñi de jíin cadena. Súcuan ni sáha de jeē síquí Herodías, ñasihí ñani de Felipe. ⁴ Chi Juan ni cahān de nuū Herodes:

Tu iyó ley condeca ró ña, áchí de.

⁵ Te jeē yúcuán ní cuni Herodes cahni de Juan. Te yúhú de jeē quítí ni ñayuu, chí ndihí i jéni ndije ni i jeē ñn tēe nácani jnūhun Yaā Dios cúu Juan. ⁶ Te ñn quiví ni sáha Herodes ñn víco quiví ní cacú de. Te sēhe síhí Herodías ni quíví i ni jita jéhé i nuū

ñáyuu ní cana de ún. Te ni cusī ni Herodes ni sáha i. ⁷ Te ni jejnūhun téyí de jeē cuáha de núu na vé cacān i nuū de. ⁸ Te ni jehēn i ni cajnūhún i náná i na vé cacān i. Te ni ndīvi i nuū Herodes, te ni cahān i:

Cuāha ní xīnī Juan tēe scuándute, cone nuū ñn cohō, achí i.

⁹ Yūcuán na te rey Herodes ni cucuíhyá ni de. Te siquī jeē ni jéjnūhun téyí de, jíin jéē ní cajini sōho tēe cáyeji staā jíin de, jeē yúcuan ní ndacu de jniñu jeē na cuáha nuū i. ¹⁰ Te ni tají de soldado jeē na quícahnde xīnī Juan ini vecāa. ¹¹ Te ni quee soldado un jíin xīnī Juan, íne nuū ñn cohō, te ni jēhe nuū súchi síhí un. Te máá i ni jendeca i nuū naná i.

¹² Yūcuán na te ni jengoo tēe cáscuáha jíin Juan, te ni candonehen de yiqui cúñu Juan, te ni cachindūji de. Yūcuán na te ni jengoo de ni cacastūhún de nuū Jesús.

Jeē ni scáji yā uhūn mil tēe

(Mr. 6.30-44; Lc. 9.10-17; Jn. 6.1-14)

¹³ Te ná ni jini Jesús jnūhun, te ni cujiyo ya yúcuan cuáhān yā jíin barco, jeē cóne sñn ya ñn lugar nuū tú ñayuu. Te ni cajini ñayuu jeē cuahān yā. Te tācá ñuu ni quendacoo i cájica jéhé i, cuajnahān i ya. ¹⁴ Te nuū ní quenda Jesús ini barco, te ni jito ya ñayuu cuehē ún. Te ni cundáhú ni yā i, te ni nasávāha ya tāca ñáyuu cácuñu jeē véjicoo i jíin. ¹⁵ Te nuū ní ini, te tēe cáscuáha jíin yá, ni quecoo de nuū yā, te ni cacahān de:

Je ni ini, te yāhá chi tú na ñayuu yúcu. Núu súcuan te tají ní ñayuu na quíngoo i tācá ñuu, te cuaan i jeē cáji i.

¹⁶ Te ni cahān Jesús jíin de:

Tu jíini ñúhún quíngoo i, chi cuāha máá ró jeē cáji i, achí yá.

¹⁷ Te ni cacahān de jíin yá:

Tú na vé cánevāha ná yáha, chi uhūn-ni staā jíin úu-ni chācá, achí de.

¹⁸ Te ni cahān yā jíin de:

Cuāha na quíji, achí yá.

¹⁹ Te ni cahān yā jíin ñáyuu un jéē na cúcōo i nuū íte. Te ni quihin ya ndihúhún staā jíin úu chācá un. Te ni ndacoto ya ichi ándiví, te ni nacuatáhú yá. Te ni tahú cuéchí yá staā ún, te ni jēhe ya nuū tēe cáscuáha jíin yá. Te máá de ní casaja de nuū ñáyuu cuehē ún. ²⁰ Te ndivii i ni cayeji, te ni candutú chíji i. Te ni canastútú de pedazo jeē ní quendōo,

te ni chitú úxī uū jīca. ²¹ Te tēe ni cayeji un cúu nájñūhun uhūn mil, te sñn ga cúu ñahan jíin súchi lúlí.

Jeē ní jica jéhé yá nuū mar

(Mr. 6.45-52; Jn. 6.16-21)

²² Yūcuán na te ni cahān-ni Jesús jíin tēe cáscuáha jíin yá jeē na quívicoo de barco, te cosnūú de quingoo de nde inga lado mar, níni jéē nátají yá ñayuu un quíngoo i. ²³ Te nuū ní cuu ni nacuatáhú yá nuū i, te máñúhún-ni ya ni caa ya yucu, cuacacān tahú yā. Te ni cuaa, te íne máñúhún yá yūcuán. ²⁴ Te barco un, je ni cuu sava nuū mar cuahān. Te ndute mar un nátundahá níhin barco, chí vēji tachī ichi núu de. ²⁵ Te jeē yínee gā ni quee Jesús nuū de, jīca jéhé yá nuū mar. ²⁶ Te tēe cáscuáha ún, ni cajito de ya jeē jīca ya nuū mar. Te ni candondava de, te ni cacana cóhó de jeē cáyūhú de.

Jíhná cúu, achí de.

²⁷ Te ni cahān-ni Jesús jíin de:

Ndeyí coo ni rō, te ma yūhu ró, chí máá rí cúu, achí yá.

²⁸ Yūcuán na te ni cahān Pedro jíin yá:

Núu máá ní cúu, te cahān ni jíin ná jéē na cáca jéhé ná nuū mar te jeē na núu ní, achí de.

²⁹ Te ni cahān yā:

Nehen núu súcuan, achí yá.

Te ni quenda Pedro ini barco, te ni jica de nuū ndúte cuahān de nuū Jesús. ³⁰ Te nuū ní jini de jeē níhin yíhi tachī, te ni yūhú de. Te ni quejéé de quee de chíji ndute. Te ni cana cóhó de:

Jnama ní sáña, achí de.

³¹ Te Jesús ni jññ-ni ya ndaha de. Te ni cahān yā jíin de:

Tēe tu cándíje níhin cúu ró. ¿Naun ni nayūhu ró? Achí yá.

³² Te ni quívi ya ini barco un jíin de, te ni jecuíññ-ni tachī. ³³ Yūcuán na te tēe cáhīn ini barco un, ni cajecuíññ yití de nuū yā. Te ni cacahān de:

Jendaá ndije jeē Sēhe Yaā Dios cúu ní, achí de.

Jeē ní nasávāha ya ñayuu cácuñu región Genesaret

(Mr. 6.53-56)

³⁴ Te ni quenda jíyo ya jíin de nuū mar un, ní jinū yā región Genesaret. ³⁵ Te ñayuu

yūcuan ní canacuni i ya. Te ni cascáca i jnūhun tācá ndañū yūcuan jēē ni jínū yā. Te ñayuu ni caquindeca i ñayuu cácuñū nuū yā. ³⁶ Te ni cacahān ndahú i jínū yá jeē na quéhé i vēsú yusáhma ya. Te tāca ñayuu jeē ní caquehé sahma ya, ni canduvāha i.

Siqui ndese cújnéhén ñáyuu
(Mr. 7.1-23)

15

¹ Yūcuán na te jecu tēe grupo fariseo jínū tēe cástéén tutu ley Yaā Dios, ni quendacoo de ñuu Jerusalén, te ni quecoo de nuū yā. Te ni cacahān de jínū yá:

² Tēe cáscuáha jínū ró, ¿naun cástívi de costumbre jeē ní cajequin ñayuu jenahán? Chi tu ní cáscuáca de costumbre jeē nándahá de nuū yā te caji de staā. Achí de.

³ Te Jesús ni cajñūhun yá de:

Te máá ró jijnáhan ró, ¿suni naun cástívi ró jniñū ní ndacu Yaā Dios nuū ró? Chi sa costumbre maá ró cúu jeē casquícu ró.

⁴ Chi ni cahān Yaā Dios: Coó yíñúhún ró jínū tátá ró jínū náná ró. Te núu ndé ñin cahān siquí tátá chí síquí naná, na cúu nahín, achí Yaā Dios.

⁵ Te máá ró chi cácahān ró jeē cuu cahān ñin tēe jínū tátá de jínū náná de: Ma cúu chindéé ñáhán ná níhín cuáha na jēē cáji ni jēē cūhun ní, chi ndíhi jeē névāha ná, je ni socō na núu Yaā Dios.

⁶ Te tēe cahān súcuan, tuá cánuú chindéé ñáhán de tátá de náná de, achí ró jijnáhan ró. Te súcuan cástívi ró jniñū ní ndacu Yaā Dios, jeē siquí costumbre ni cajequin máá ró.

⁷ Tēe stáhú-ni cácuu ró. Ndaā ni nacani Isaías jñūhun siquí ró nde jenahán, yósó núu tútu ñi jeē ní cáhān Yaā Dios:

⁸ Ñayuu yáha chi máá yuhu-ni i cájetáhú i ruhū,

te nasūu ndé jínū ini jínū ánuá i.

⁹ Te cáchiñúhún sáa-ni i ruhū, chi jñūhun cástéén i cúu jniñū ní candacu tēe,

te nasūu jēē ní ndacu máá rí cúu. Achí Yaā Dios. Achí yá.

¹⁰ Te ni cana ya ñayuu cuehē ún, te ni cahān yā jínū i:

Cuni sōho vāha jijnáhan ró, te chuhun ni ró: ¹¹ Nasūu jēē quívi ini yuhu ñayuu cújnéhén i sáha. Chi jñūhun jeē quéndá yuhu i, yūcuan cúu jeē cújnéhén i sáha, achí yá.

¹² Yūcuán na te tēe cáscuáha jínū yá, ni quecoo de nuū yā, te ni cacahān de:

¿A jínū ní jēē ní caquítí ni tēe fariseo jeē ní cajini sōho de jñūhun ni cahān ní? achí de.

¹³ Te ni cahān maá yá:

Cácuu de nájnūhun yujnu jeē tu ní náchuhun Tátá rí, Yaā ndeé andívi, te ñin quívi te jñūhun ya quihín. ¹⁴ Na quíngoo máá de. Chi cácuu de nájnūhun tēe cuáá cástéén ichi nuū inga tēe cuáá. Chi núu ñin tēe cuáá stéén de ichi nuū inga tēe cuáá, te ndíndúu de ñinga de xehvā. Achí yá.

¹⁵ Te ni cahān Pedro jínū yá:

Castūhun cáji ní jñūhun yátá yáha nuū na jijnáhan ná, achí de.

¹⁶ Te ni cahān Jesús:

¿Te á suni máá ró ná tu jecūhun ni ró chí naún? ¹⁷ ¿A tu cájecūhun ni ró jeē tāca jēē yéji ñayuu, chi quívi chíji i, te quéndá-ni cuahān?

¹⁸ Te jñūhun jeē quéndá yuhu ñayuu, chi nde ini anuá i vēji, te yūcuan cúu jeē cújnéhén i sáha.

¹⁹ Chi nde ini anuá ñayuu quéndá jeē jéni néé ni, jeē jéni ndívi, jeē casíquí ndéé jnáhan, jeē jíca jnéni, jeē sacuíhná, jeē cahān jñūhun stáhú, jeē cahān yā siquí jnáhan.

²⁰ Tāca jēē yáha cúu jeē cújnéhén ñayuu sáha. Te núu tu síquícu i costumbre jeē nándahá i te caji i staā, tu cúnéhén i sáha. Achí yá.

Ñahan inga nación jeē ní candíje ñihin
(Mr. 7.24-30)

²¹ Te ni quenda Jesús yūcuan cuahān yā región Tiro jínū Sidón. ²² Te ñin ñahan ñuu Canaán, néne ña región Tiro jínū Sidón, te ni quee ña nuū Jesús. Te ni cana jee ña:

Tátá, Sēhe yucūn David, cundáhú ni ní sáña víi. Chi sēhe síhí ná, ñūhun tachí ini i, te yōhyo xeēn ndóho i, achí ña jínū yá.

²³ Te tu ní cáhán cuítí yā jeē ní cáhán ña. Yūcuán na te ni quecoo tēe cáscuáha jínū yá, te ni cacahān de:

Cahān ni jínū ña na quihín ña, chi cána jee ña vēji ña yatā yō, achí de.

²⁴ Te ni cahān yā jínū ña:

Nuū maá-ni ñayuu nación Israel ni tají Yaā Dios sáña véji ná, chi cácuu i nájnūhun lanchi, quítí ní sana.

²⁵ Te ñahan ún chi ni quee ña, te ni jecuíñí yíti ña nuū yā, te ni cahān ña:

Tátá, chindéé ñáhán ní sáña víi, achí ña.

²⁶ Te ni cahān yatá yá jíin ña:

Tu íyó váha jeē quénde yō staā sēhe, te cuāha yó nuū ina, achí yá.

²⁷ Te ni cahān ña:

Jendaá cahān ni Tātā, te chindéé ñáhán ní sáña vēsú cúu ná nájnūhun ina. Chi suni máá tí cánihīn nahín tí pedazo staā cuechí jéē cóyo chíji mesa jitoho tí cáyeji tí, achí ña jíin yá.

²⁸ Yūcuán na te ni cahān Jesús:

Yōhyo váha jeē cándije níhin ní súcuan, nánā. Te na sáha ná jéē cuní ni, achí yá.

Te máá hora un ní nduvāha-ni sēhe síhí ña.

Jeē ní nasávāha ya cuehē ñayuu cácuhū

²⁹ Te ni quenda Jesús cuahān yā yūcuán, te ni yāha ya yumar Galilea. Te ni caa ya ñn yucu, te yūcuan ní cucōo ya. ³⁰ Te cuehē ñayuu ni quecoo i nuū yā, te cándeca i tāca jéē cájica chácua, jeē cuaá, jeē ñihín, jeē cacúhndú, jíin cuéhē gā ñayuu cácuhū. Te ni cajequin i nuū jehé Jesús. Te ni nasávāha ya i jíināhan i. ³¹ Te ni canaa ni ñayuu un cájito i jeē nácahān ñayuu ñihín, ndúvāha ñayuu cuhndú, nácaca váha ñayuu chacua, nánune tinū ñayuu cuaá. Te ni cacahān i jeē yóhyo váha Yāa cúu Yāa Dios ñuu i Israel.

Jeē ni scáji yā cuūn mil tēe

(Mr. 8.1-10)

³² Yūcuán na te ni cana Jesús tēe cáscuáha jíin yá, te ni cahān yā jíin de:

Cúndahú ni rī ñayuu cuehē yāhá, chi je ni cuu unī quivī cáyūcú i jíin rí, te tuá na vé caji i. Te tu cúní rī natajī rí i nuhun ndite i, chí núu súcuan te sava ichi te cuíta íi i. Achí yá.

³³ Te ni cacahān tēe cáscuáha jíin yá:

¿Te ndé nuū nihín yō staā caji ñayuu cuehē yāhá? Chi yāhá tú na ñayuu yúcu, achí de.

³⁴ Te ni cajnūhun yá de:

¿Nasaa staā cánevāha ró?

Te ni cacahān de:

Uxā-ni, jíin jecu chācá lúli, achí de.

³⁵ Yūcuán na te ni cahān yā jíin ñáyuu cuehē un jéē na cúcōo i. ³⁶ Te ni quihin ya ndihúxá staā jíin cháca ún, te ni nacuatáhú yá nuū Yāa Dios. Te ni tahu cuéchí yá, te ni jēhe ya nuū tēe cáscuáha jíin yá, te máá de ni casaja nuū ñáyuu. ³⁷ Te ndihi i ni cayeji, te

ni candutú chíji i. Yūcuán na te ni canastútú de pedazo jeē ní quendōo, te ni chitú úxā jíca. ³⁸ Te tēe ni cayeji ún, nde cuūn mil de cúu, te sín ga cúu ñahan jíin súchi lúli. ³⁹ Yūcuán na te ni nacuatáhú yá nuū ñáyuu ún, te cuanungoo i. Te ni ndiví ya ini barco, te cuahān yā región Magdala.

Jeē cájicān de ñn jniñu jénu nuū yā
(Mr. 8.11-13; Lc. 12.54-56)

16

¹ Te ni quecoo tēe grupo fariseo jíin tēe grupo saduceo nuū yā. Chi cácuñi de coto ndee de ya, te ni cajicān de jeē na sáha ya ñn jniñu jénu jeē coo ñn seña ichi ándiví. ² Te máá yá ni cahān yā jíin de:

Núu ni ini, te cácahān rō: Nandii, chi ni nasácuéhé i ándiví, achí ró. ³ Te jenéhen chí cácahān rō: Vijna te cuun saū, chí ni nasácuéhé i ándiví, achí ró. Tēe stáhú-ni cácuu ró. Chí cájecūhun ni rō ndese stéén seña ándiví, te tu cájecūhun ni rō ndese stéén tācá jniñu jénu sáha ri tiempo yāha.

⁴ Ñayuu yāha jeē casáha jniñu néé, tu cájetáhú cuítī i Yāa Dios. Te cájicān i jeē sáha ri ñn jniñu jénu jeē coo ñn seña ándiví. Te tuá na inga jniñu jénu stéén rī nuū i, chí máá-ni jniñu jénu nájnūhun ni cuu jíin Jonás, tēe ni nacaní jnūhun Yāa Dios nde jenahán. Achí yá.

Te ni stóo ya de jíināhan de, te cuahān yā.

Jnūhun levadura tēe fariseo

(Mr. 8.14-21)

⁵ Te tēe cáscuáha jíin yá ni canaa ni de condiso de staā náa cuangoo de jíin barco inga lado mar. ⁶ Te ni cahān Jesús jíin de:

Coto má cándije ró levadura tēe grupo fariseo jíin tēe grupo saduceo, achí yá.

⁷ Te tēe cáscuáha un ní cacahān maá de:

Va síquī jeē tú na staā ndíso yó, jeē yúcuñ cáhān yā súcuan, achí de.

⁸ Te ni jini Jesús, te ni cahān yā:

¿Najehē cácahān rō jeē ní cáhān rī súcuan síquī jeē tú na staā cándiso ró? Tēe tu cándije níhin cácuu ró. ⁹ ¿A ná tu jecūhun ni rō jeē tu ní cáhān rī súcuan síquī jeē tu ndíso ró stáá? ¿A tu cánučūhun ni rō jeē ní tahu cuéchí rí uhūn staā ni cayeji uhūn mil tēe, te nasaa jíca ni canastútú ró jeē ní quendōo? ¹⁰ ¿Te á tu cánučūhun ni rō jeē ní tahu cuéchí rí

uxā staā ni cayeji cuūn mil tēe, te nasaa jīca ni canastútú tucu ró? ¹¹ ¿Te najehē tu cájecūhun ni rō jeē násūu síquī staā ni cahān rī jīn ró jeē ni cáhān rī jeē coto má candíje ró levadura tēe fariseo jīn tēe saduceo? Achí yá jīn de.

¹² Yūcuán na te ni cajecūhun ni de jeē tu ní cáhān yā jeē coto de jeē ma cáji de pan jeē yīhi levadura, chí sa suhva ni cahān yatá yá jeē ma cándíje de jnūhun stáhú cástéén tēe fariseo jīn tēe saduceo.

Jeē ni cáhān Pedro jeē Jesús cúu Cristo
(Mr. 8.27-30; Lc. 9.18-21)

¹³ Te nuū ní jīnū Jesús región Cesarea Filipo jīn tēe cáscuáha jīn yá, te ni cajnūhun yá de:

Ruhū, Yaā ní nduu tēe, ¿ndé ĩn cúu ri cácahān ñayuu?

¹⁴ Te ni cacahān de:

Sava i cácahān jeē cúu ní Juan tēe ni scuándute. Te sava ga i cácahān jeē cúu ní Elías, tēe ni nacani jnūhun Yaā Dios nde jenahān. Te sava ga i cácahān jeē Jeremías chí inga tēe ni nacani jnūhun Yaā Dios cúu ní. Achí de.

¹⁵ Te ni cahān yā jīn de:

Te máá ró, ¿ndé ĩn cúu ri cácahān rō? achí yá.

¹⁶ Te ni cahān Simón Pedro:

Máá ní cúu Cristo, Yaā ní tají Yaā Dios. Te cúu ní Sēhe Yaā Dios, Yaā técu ní cáni, achí de.

¹⁷ Te ni cahān Jesús:

Yōhoyo ndetū rō, Simón sēhe Jonás, chí nasūú ĩn ñayuu ni steén jnūhun yáha nuū rō, chí sa suhva máá Tátá rī, Yaā ndeé andiví, ní steén yā nuū rō. ¹⁸ Te ruhū suni cáhān rī jīn ró jeē maá ró cúu Pedro, jeē cuní cahān: yuū. Te jnūhun ndaā jeē ni cáhān rō jeē maá rí cúu Cristo, suu cúu nájnūhun ĩn yuū cáhnu. Te síquī yuū cáhnu yáha sáha ri jeē quítuu vehe, te vehe un cúu ñayuu cácañíje ruhū. Te tu ndé vé cundeyí cuítí síquī i, ní jnūhun xeēn jeē cájihī i, tuá na vé cúu sáha jīn ánuá i. ¹⁹ Te máá ró condiso jníñu ró sáha ró jéé quívicoo ñayuu ndaha Yaā andiví jeē ndacu ya jniñu nuū i. Te tāca jéé cási rō jeē ma sáha ñayuu ini ñayiví yáha, suni casi jeē cáyūcú nde andiví. Te tāca jéé cuáha ró jnūhun sáha i ini ñayiví yáha, suni

jeē cáyūcú nde andiví cuáha jnūhun. Achí yá.

²⁰ Yūcuán na te ni ndacu ya jniñu nuū tēe cáscuáha jīn yá, jeē ma cáchi de nuū ní ĩn ñayuu jeē cúu ya Cristo.

Jeē ní castūhún Jesús jeē cúu yā
(Mr. 8.31-9.1; Lc. 9.22-27)

²¹ Te nde saá ní quejéé Jesús cástūhun cáji yá nuū tēe cáscuáha jīn yá jeē jīni ñūhún quihīn yā ñuu Jerusalén. Te tāca tēe jéhnu jīn sūtū cácujuhnu jīn tēe cástéén tutu ley, stóho ndasí de ya. Te cahni de ya, te nuū uní quiví te natecu yā, achí yá. ²² Yūcuán na te Pedro, ni cana máñūhún de ya, te ni quejéé de cáhān de nuū yā:

¿Naun cáhān ní súcuan? Chí tu cuní Yaā Dios jeē cuu súcuan. Tu jīni ñūhún cuítí ndoho ní jnúndóho yáha, achí de.

²³ Te ni ndió cóto ya nuū Pedro, te ni cahān yā jīn de:

Cujiyo quihīn rō, chí cáhān rō ná cáhān Satanás. Chí tēe ndúcú stíví ruhū cúu ró. Te tu jéni ní rō nájnūhun jéni ní Yaā Dios, chí sa suhva jéni ní rō nájnūhun cájeni ní ñayuu. Achí yá.

²⁴ Yūcuán na te ni cahān yā jīn tēe cáscuáha jīn yá:

Na-ni ñayuu núu cuní i condiquīn i ruhū, na cási i jeē cuní maá i, te na cóndiquīn i ruhū te cuáha i jnūhun ndoho i jnúndóho jeē síquī rī, vésú na cúu i. ²⁵ Chí núu ndé ñáyuu cuní i cácu i nuū jnúndóho quiji nuū i jeē síquī ruhū, núu súcuan te jnahnū ndetū i ní cáni. Te núu ndé ñáyuu, vésú na cúu i jeē síquī ruhū, te cotecu i ní cáni. ²⁶ ¿Chí ndé cuajniñu vésú na cundeyí ñáyuu nihīn i ní ñáyiví, te núu quiví i nuū jnahnú ndetū i? Chí tú na jīn cuítí chunaa ñayuu jeē cácu ánuá i. ²⁷ Chí ruhū, Yaā ní nduu tēe, ndiji rī jīn táca ndajéhé rī, te yōhoyo luu cujéhnu rī nájnūhun cújéhnu Tátá rī. Yūcuán na te cuáha ri tahū nuū ĩn ĩn ñayuu núu ndese jniñu ni casáha i. ²⁸ Te jendaá cahān rī jīn ró jeē sava tēe cáhīn yáhá, ma cúu de chí nde cuní de jeē maá rí, Yaā ní nduu tēe, ndacu ri jniñu jīn poder rī.

Jeē tucu ni nduu ya
(Mr. 9.2-13; Lc. 9.28-36)

17

¹ Yūcuán na te nuū iñú quiṽi te Jesús ni jeca ya Pedro jíin Jacobo jíin Juan ñani Jacobo, cuahān sīn ya jíin de ñn yucu súcún. ² Te yūcuán, tucu ni nduu ya nuū de. Chi ni ndindēe núū yā nájñūhun niāndii. Te sahma ya ni nducuíjín quiṽi ndasí, nájñūhun nduva luz. ³ Te ni cajito-ni de jeē Moisés jíin Elías, tēe ni cahīyo jehahán, cándajñūhún de jíin yá. ⁴ Te ni cahān Pedro jíin yá:

Nacā jeē váha jeē cáhīin ná yáha. Te núu cúní ni te na sáha ná únī vehe ramada, ñn cuu máá ní, inga cuu Moisés, te inga cuu Elías, achí de.

⁵ Te níni cáhán gā de, te ni quiṽi vicō nūhun jéē yaa ndasí, ni jesi-ni nuū de. Te nuū vicó un ní cahān ñn jñūhun:

Yáha cúu Sēhe ri jeē maní ndasí rí jíin, te cúsi ni rí jíin. Na cúni nahín ró jñūhun cáhán yā. Achí.

⁶ Te jeē súcuan ni cajini sōho tēe cáscuáha ún, te ni cajecava ndeyi de, chi yōhyo ni cayūhú de. ⁷ Yūcuán na te ni quee Jesús, te ni soó yá ndaha ya siquī de. Te ni cahān yā:

Ndocuiñi, te ma yūhu ró jijnáhan ró, achí yá.

⁸ Te ni candacoto de, te tuá tēe un ní cájito de, chi máá ñn na Jesús.

⁹ Te ni cananuu de jíin yá yucu ún. Te ni ndacu ya jniñu nuū de:

Ma cáchi rō nuū ní ñn jeē súcuan ni cajito ró, chi nde na nátecu maá rí, Yaā ní nduu tēe, achí yá.

¹⁰ Yūcuán na te tēe cáscuáha jíin yá, ni cacajñūhún de ya:

Núu súcuan te tēe cástéén tutu ley Yaā Dios, ¿najahē cácahān de jeē cánuú ndiji Elías xīhna gā, te sáá te quiṽi Yaā cúu Cristo? achí de.

¹¹ Te ni cahān Jesús jíin de:

Jendaá cúu jeē xīhna gā quiṽi ñn tēe cuu nájñūhun Elías, te sátūhva de ndihi, achí tutu. ¹² Te cáhán rí jíin ró jeē jé ni quiṽi tēe ni cuu nájñūhun Elías, te tu ní jíní ñayuu jeē suu de cúu. Te ni casáha ndevāha ñayuu jíin de ndihi jeē ní cacuu ni maá i. Te suni súcuan stóho i ruhū, Yaā ní nduu tēe. Achí yá.

¹³ Yūcuán na te tēe cáscuáha un, ní cajeçūhun ni de jeē cahān yā jeē Juan tēe scuándute, ni cuu de nájñūhun Elías.

Jeē ní nasávāha ya ñn sūchi jíhí yīhí
(Mr. 9.14-29; Lc. 9.37-43)

¹⁴ Te ni najinū yā jíin de nuū ñayuu cuehē ún. Te ni quee ñn tēe, ni jecuiñi yití de nuū yā, te ni cahān de:

¹⁵ Cundáhú ni ni séhe yí ná, chi yōhyo xeēn ndóho i cuehyi jíhí yíhí. Te je ni cuu cuehē jínu cótúú i nuū ñuhún jíin núu ndúte.

¹⁶ Te ni quindeca ná i nuū tēe cáscuáha jíin ní, te tu ní cúu sávāha de i, achí de.

¹⁷ Te ni cahān Jesús:

Ñayuu yōhyo ñihni ni cácuu ró chi tu cácdíje ró jéē cuu nduvāha i. ¿Nasaa ga quiṽi condee rí jíin ró? ¿Te nasaa ga quiṽi cuandeyi ni rí jíin ró? Cuáquihin sūchí un na quiṽi i, achí yá.

¹⁸ Te ni cahān yā nuū tachí, te ni quenda-ni ini sūchí un. Te ni nduvāha-ni i máá hora un.

¹⁹ Yūcuán na te tēe cáscuáha un, ní cacajñūhun sīn de ya:

¿Najahē tu ní cúu quenehen ná tachí un jíjnáhan ná? achí de.

²⁰ Te ni cahān yā:

Siquī jeē tu cácdíje ñihin ró jéē cuu sáha ró. Chi jendaá cahān rí jíin ró, jeē núu candíje ró vēsú ñn tíhlí-ni, cūhva nájñūhun ñn ndiquin mostaza, te cuu sáha ró táca-ni jniñu yí. Chi cuu cahān rō jeē na cújiyo yucu yáha quihīn inga lado, te cujiyo-ni. Te tēcá-ni jniñu chi cuu sáha ró, te núu candíje ñihin ró jéē cúu. ²¹ Te ñn tachí súcuan chi ma quénda cuiti quihīn, te núu tu cacān tahú rō te coo ndite ni rō. Achí yá.

Jeē ni cáhān tucu ya jeē cúu yā
(Mr. 9.30-32; Lc. 9.43-45)

²² Te jíca cuu Jesús jíin de jíjnáhan de región Galilea, te ni cahān yā jíin de:

Máá rí, Yaā ní nduu tēe, nastúu i ruhū nuū táca tēe xeēn. ²³ Te cahni de ruhū, te nuū uní quiṽi te natecu rí, achí yá.

Te ni canducuíhyá ndasí ni de jeē ni cáhān yā jñūhun yáha.

Siquī xūhun cuajniñu ini templo

²⁴ Te ni jinū yā ñuu Capernaum jíin tēe cáscuáha jíin yá. Te tēe cástútú xūhun templo ni quecoo de, te ni cacajñūhún de Pedro:

Te maestro maá ró jijnáhan ró, ¿á tú cuáha de xūhún cuajniñu ini templo, chí naún? áchí de.

²⁵ Te ni cahān Pedro:

Cuu, áchí de.

Te ná ni quívi de ini vehe, te xīhna gā Jesús ni cahān yā jín de:

¿Ndese jéni ni rō, Simón? Tāca tēe cácuu rey ini ñayívi yáha, ¿ndé núu cájicān de xūhun renta jín xūhun cuajniñu ñuu? ¿A núu séhe de chí núu ñayuu sín vehe? áchí yá.

²⁶ Te ni cahān Pedro:

Nuū ñayuu sín vehe, áchí de.

Te ni cahān Jesús:

Núu súcuan te tú na inga cujéhnú nuū séhe rey jeē cacán xūhún un núu i.

Súcuan ni cahān yā jeē cujéhnú ya cúu ya Sēhe Yaā Dios. Te ni cahān yā:

²⁷ Te na chúnaa yō, návāha tu squítí ni yō de. Núu súcuan te cuáhán ndé yumar, te scāne ró gancho jeē jnā chācá, te tava rō chācá jéē jnā xīhna gā. Te ndica rō yuhu ti, te yūcuan níhīn rō ñn xūhun jéē cánda chunaa rō jeē cájicān de. Te quindēca ró núu de jeē cúu ruhū jín rōhó. Achí yá.

*Ndé ñayuu cúu jeē cujéhnú ga
(Mr. 9.33-37; Lc. 9.46-48)*

18

¹ Te suni quívi un ní quecoo tēe cáscuáha un núu yā, te ni cacajñūhún de ya:

¿Ndé ñn cújéhnú ga nuū ñayuu jeē ndácu Yaā andívi jniñu nuū? achí de.

² Te ni cana ya ñn sūchi lúlí, te ni jeni ya i mēhñú de. ³ Te ni cahān yā:

Jendaá cahán rī jín ró, núu tú nandió cóo ni rō te cani ni rō nájñūhun ñn sūchi lúlí, ma quívi cuítí rō ndaha Yaā andívi jéē ndacu ya jniñu nuū rō. ⁴ Núu súcuan te ñayuu jeē jéni ni i jeē tu cújéhnú i, nájñūhun jéni ni sūchi lúlí yáha, suu i cújéhnú ga nuū ñayuu jeē ndácu Yaā andívi jniñu nuū. ⁵ Te na-ni ñayuu núu jeē siquí ruhū jetáhú i ñn sūchi lúlí nájñūhun sūchi yáha, te ruhū jetáhú i. Achí yá.

*Xeēn coo siquí ñayuu quívi nuū cuéchi
(Mr. 9.42-48; Lc. 17.1-2)*

⁶ Te núu ñn sūchi lúlí yáha cándije i ruhū, te núu quívi i cuéchi sáha na-ni ñayuu, te

vāha ga núu ni conuhnī ñn yōso cáhnu sucūn ñayuu ún, te quēe i chíji ndute mar nuū.

⁷ Nacā xeēn cúu jín ñayuu ñayívi, chí máni íyó jéē nducú squívi ñayuu nuū cuéchi. Te máni súcuan coo ini ñayívi. Te nacā xeēn ndoho ñayuu jeē squívi jnāhan nuū cuéchi.

⁸ Núu súcuan te núu ndaha ró chí jéhē rō sáha jeē quívi ró cuéchi, vāha ga cahnde rō te scāne ró na quíhín, návāha tuá sáha ró cuéchi. Chí vāha ga jeē coo chácua ró chí coo tícúhndu ró te quívi ró núu cotecu rō ní cáni, vēsú jeē cóndee ndindúú ndaha ró jéhē rō te quívi ró núu ñuhún jeē cayú ní cáni. ⁹ Te núu tinūu ró sáha jeē quívi ró cuéchi, vāha ga tava rō te scāne ró na quíhín, návāha tuá sáha ró cuéchi. Chí vāha ga jeē coo ñn-ni tinūu ró te quívi ró núu cotecu rō ní cáni, vēsú jeē cóndee ndindúú tinūu ró te quívi ró núu ñuhún infierno.

*Jñūhun yátá siquí lanchi jeē ní sana
(Lc. 15.3-7)*

¹⁰ Coto ma sájéē ni rō nuū ní ñn sūchi lúlí yáha. Chí cáhán rī jín ró jeē tēcá ndajéhé andívi jéē ndíto ya i, níni cáhīn ya nuū maá Tátá rī andívi. ¹¹ Chí ruhū, Yaā ní nduu tēe, vēji rī jeē jnáma rī ñayuu jeē ní sana i nuū Yaā Dios.

¹² ¿Te ndese cájeni ni rō? Núu ñn tēe ndéca de ñn ciento lanchi, te núu sana ñn ti, ¿á tu stóo de cuūn xico xahūn cuūn gā tī yucu, te ndicó de quinanducú de quítí ní sana ún? ¹³ Te núu ni nanihīn de ti, te ndaā jeē yóhyo ga cúsi ni de jín quítí ún vēsú jín cúūn xico xahūn cuūn gā quítí jeē tu ní sána. ¹⁴ Te suni súcuan máá Tátá rō, Yaā ndeé andívi, tu cúní yā jeē jnahnú ndetū ni ñn sūchi lúlí yáha.

*Siquí jeē cóne cáhnu ni yō nuū jnāhan yó
(Lc. 17.3)*

¹⁵ Te núu jnāhan ró ní sáha de cuéchi siquí rō, núu súcuan te castūhun ró nuū mañūhún-ni de jeē ní sáha de cuéchi siquí rō. Te núu ni jetáhú de jñūhun ni cahān rō jín de, núu súcuan te je ni ndumanī de jín ró ní sáha ró. ¹⁶ Te núu tu ní jétáhú de jñūhun cáhán rō, te quicāna ró ñn chí úū gā ñayuu quíhīn rō jín núu de, cuu i testigo jín ró, te cundaā cuéchi de te ndumanī de jín ró. ¹⁷ Te núu tu ní jétáhú tucu de jñūhun cácahān tēe ún, yūcuán na te castūhun ró

nuū ñáyuu cácan díje. Te núu tu ní jétáhú tucu de jnūhun cahān ñayuu cácan díje ún, te siáá rō de na cóo de nájñūhun ñn tēe tu cándíje nuū Yaā Dios chí tēe stútú xūhun renta.

¹⁸ Jendaá cahán rī jín rō jēē tāca jēē cásī rō jēē ma sáha ñayuu ini ñayīvi yáha, suni casī jēē cáyūcú nde andiví. Te tāca jēē cuáha rō jnūhun sáha i ini ñayīvi yáha, suni jēē cáyūcú nde andiví cuáha jnūhun.

¹⁹ Te suni cáhán rī jín rō, núu uū jnáhan rō ini ñayīvi yáha, inuú canī ni rō siquī ñn jēē cacán tahu rō, núu súcuan te máá Tátá rī andiví cuáha ya jēē cájicān rō. ²⁰ Chi núu ndé mí ndútútú úū chí únī ñayuu jēē cáchiñúhún i ruhū, te yūcuan íne rī jín i, áchí yá.

²¹ Yūcuán na te ni quee Pedro nuū yā, te ni cajñūhún de ya:

¿Nasaa jínu cone cáhnu ni na núu jnáhan ná jēē sáha de cuēchi siquī ná? ¿A ndé uxā jínu chí naún? áchí de.

²² Te ni cahān Jesús:

Tu cáhán rī jín rō jēē maá úxā jínu, chi nde uxā jínu jēē uní xico uxī.

Jnūhun yátá siquī mozo jēē tu ní íne cáhnu ni

²³ Núu súcuan te Yaā ndeé andiví, suhva cúu jēē íne cáhnu ni yā nuū ñáyuu ndácu ya jniñu nuū: Cúu nájñūhun ñn rey jēē cuní de sándaā de jín mozo de jēē cátaū nuū de.

²⁴ Te ni quejéé de sándaā de jín i. Te ni caquindecā i ñn mozo jēē taú tijni millón peso nuū de. ²⁵ Te tú na vé névāha mozo un chunaa nuū de. Te ni ndacu de jniñu jēē na cúyāhu mozo un jín ñasihí jín séhe jín táca ndajniñu, te nucūnaa xūhun táú. ²⁶ Yūcuán na te ni jecuiñī yití mozo un, te ni cahān ndahú de jín patrón de ún: Condetu ní, te na chúnaa ndihí ná xūhun ní, áchí de. ²⁷ Te máá patrón ni cundáhú ni de mozo de. Te ni íne cáhnu ni de jēē taú mozo de ún, te ni siaá de jēē ma chúnaa gā. ²⁸ Te ni quenda mozo un cuáhān de, te ni najnáhan-ni de jín ñn jnáhan mozo de jēē taú jecu peso nuū de. Te ni jni de tēe ún, te ni quitu de sucūn, te ni cahān de: Chunaa jēē taú rō nuū rī, áchí de. ²⁹ Te jnáhan mozo de un ní jecuiñī yití núu de, te ni cahān ndahú jín de: Condetu te na chúnaa ndihí rī xūhun rō,

achí. ³⁰ Te máá de tu ní cúni de, chi ni chune de tēe un vécāa nde quiiví nachunaa jēē taú nuū de. ³¹ Te tāca jnáhan mozo de ni cajito jēē súcuan ni sáha de, te ni cajnahuhū ndasí ni de. Te cuangoo de nuū patrón de, te ni cacachi de ndihí ndese ni cuu. ³² Yūcuán na te patrón un ní nacana de mozo un, te ni cahān de jín: Mozo ndevāha cúu rō. Chi ni íne cáhnu ni rī ndihí jēē taú rō nuū rī, chi ni cahān ndahú rō jín rí. ³³ Te nájñūhun ni cundáhú ni rī rohó, suni súcuan ni jini ñúhún cundáhú ni rō jnáhan mozo rō nuú, áchí de. ³⁴ Te ni quití ndasí ni patrón, te ni ndacu de jniñu jēē na quiiví vecāa nde nachunaa ndihí jēē taú nuū de.

³⁵ Te ni jínu ni cahān yā, te áchí yá:

Nájñūhun ni sáha rey un jín mozo de, suni súcuan sáha máá Tátá rī andiví jín táca rohó núu tu cone cáhnu ni rō nuū jnáhan rō nde jín ini jín ánuá rō, núu na-ni cuēchi sáha i nuū rō. Achí yá jín de jijnáhan de.

Siquī jēē ma stóo jnáhan tēe jín ñahan
(Mr. 10.1-12; Lc. 16.18)

19

¹ Te nuū ní ndihí ni cahān Jesús tāca jnūhun yáha, te ni quenda ya Galilea cuahān yā. Te ni jinū yā región Judea, inga lado yūte Jordán, ichi núu cáne niāndii. ² Te cuehē ñayuu ni candiquīn i ya, te yūcuan ní nasávāha ya ñayuu cácuñū.

³ Yūcuán na te ni quecoo jecu tēe grupo fariseo nuū yā, chi cácuñi de coto ndee de ya núu ndese cahān yā. Te ni cacajñūhún de ya:

¿A íyó ley jēē cuu ndusñn ñn tēe jín ñasihí de núu na-ni siquī cúu, chí naún? áchí de.

⁴ Te ni cahān yā:

¿A tu ní cácahu rō tutu ñn ndese ni sáha Yaā Dios ñayuu nde xīhna ñúhún? Chi tēe jín ñahan ni sáha ya, achí. ⁵ Te suni ni cahān Yaā Dios: Jēē yūcuan cúu jēē stóo tēe tátá de náná de, te quijnáhan de jín ñasihí de, te ñn na cuu ndindúú de, áchí Yaā Dios, achí tutu. ⁶ Núu súcuan te tuá cúu uū jnáhan de, chi ñn na cúu. Jēē yūcuan tu íyó váha jēē stóo jnáhan, chí jēē ni squijnáhan Yaā Dios cúu, achí yá.

⁷ Te ni cacajñūhún de ya:

Núu súcuan ¿te naun ni ndacu Moisés jniñu jenahán jeē núu stóo ñn tēe ñasihí de, te na cúvaha acta jeē ndusñn de jíin ña? áchí de.

⁸ Te ni cahān yā jíin de:

Siquí jeē níhni ni rō jijnáhan rō, jeē yúcuan ní jēhe Moisés jnūhun jeē stóo rō ñasihí rō. Te nde xihna ñúhún chí nasūu súcuan ní cuu. ⁹ Te ruhū chí cáhán rī jíin rō, núu ñn tēe stóo de ñasihí de, te núu nasūu jēe tíjni ni ña, te quijnáhan de jíin inga ñahan, núu súcuan te cásiquí ndéē de ña. Te núu ñn tēe condeca de ñahan ní ndusñn, suni cásiquí ndéē de ña, áchí yá.

¹⁰ Yūcuán na te ni cacahān tēe cáscuáha jíin yá:

Te núu ma cúu stóo tēe ñasihí de, núu súcuan te vāha ga ma cóndeca de ñahan, áchí de.

¹¹ Te ni cahān yā jíin de:

Jnūhun ni cahān rō yāhá, tu níhín jniñu nuū ndihí tēe, chí máá nene tēe jeē ní sáha Yaā Dios jeē nihín jniñu nuū. ¹² Chí íyó tíjni síquí jeē jési jeē ma cóndeca tēe ñahan. Chí sava tēe ni cacacu de jeē ma cúu condeca de ñahan. Te sava ga tēe ni sáha ñayuu jeē ma cúu condeca de ñahan. Te sava ga tēe ni cajeni ni maá de jeē ma cóndeca de ñahan síquí jeē ndihví ni de jíin jniñu jeē ndácu Yaā andiví nuū de. Tēe jeē cúu cuatáhú jnūhun jeē ma cóndeca de ñahan, na cuatáhú de núu súcuan. Achí yá.

*Jeē ni jíicān tahú Jesús jehē sūchi lúli
(Mr. 10.13-16; Lc. 18.15-17)*

¹³ Yūcuán na te ni quecoo ñayuu jíin sūchi lúli, jēe na sóo yá ndaha ya xinī i te cacān tahú yā jehē i. Te tēe cáscuáha jíin yá, ni cacahān de nuū ñayuu vējicoo jíin i. ¹⁴ Te ni cahān Jesús:

Cuāha jnūhun na quíjicoo sūchi lúli jíin nuū rī, te ma cási rō jeē quíjicoo i. Chí ñayuu jeē ndió cóo ni i caní ni i nájñūhun sūchi yáha, suu i quíví ndaha Yaā andiví jēe ndacu ya jniñu nuū i, áchí yá.

¹⁵ Te ni sóo yá ndaha ya xinī i jíijnáhan i. Te ni quenda ya yūcuan cuáhān yā.

*Jnūhun tēe cúcá
(Mr. 10.17-31; Lc. 18.18-30)*

¹⁶ Te ñn tēe suchí ní quee de nuū Jesús, te ni cajñūhún de ya:

Tēe vāha cúu ní Maestro. Te cachi ní, ¿na jniñu vāha sáha ná te nihín tahú na cotecu na ní cáni andiví? áchí de.

¹⁷ Te ni cahān yā jíin de:

¿Naun cáhán rō jeē tēe vāha cúu rí? Tú ni ñn tēe vāha íyó, chí máá ñn-ni Yaā Dios. Te núu cúu rō cotecu rō ní cáni, te squícu rō jniñu ní ndacu ya. Achí yá.

¹⁸ Te ni cahān de:

¿Ndé-ni jniñu cúu núu súcuan?

Te ni cahān yā:

Ma cáhni rō ndíyi. Ma cosíquí ndéē jnāhan rō. Ma sacuíhná rō. Ma sajnūhún rō.

¹⁹ Cuatáhú rō nuū tatá rō nuū naná rō. Te cundáhú ní rō jnāhan rō nájñūhun cundáhú ní rō maá rō, áchí yá.

²⁰ Te ni cahān tēe suchí un:

Tācá jniñu yáha je ni squícu ná ndé ná lulí ná. ¿Te na vé cúmanī gā sáha ná núu súcuan?

²¹ Te ni cahān Jesús:

Núu cúu rō squícu ndihí rō, cuáhán te xīco rō ndihí jeē névāha rō, te cuāha rō nuū ñayuu ndahú. Te nde andiví cuáha ya jeē ndetū ndasí coo rō. Yūcuán na te quiji rō condiquín rō ruhū quihín yō, áchí yá.

²² Te tēe suchí un, ná ni jini sōho de jnūhun yáha, te ni cucuíhyá ni de te cuahān de, chí cúcá ndasí de.

²³ Yūcuán na te ni cahān Jesús jíin tēe cáscuáha jíin yá:

Jendaá cahān rī jíin rō, tēe cúcá chí yōhyo yí quívicoo de ndaha Yaā andiví jēe ndacu ya jniñu nuū de. ²⁴ Te cáhán tucu rí jíin rō jeē yachí gā yāha ñn camello yaū yutícuí, vésú jeē quíví ñn ñayuu cucá ndaha Yaā Dios jeē ndacu ya jniñu nuū i, áchí yá.

²⁵ Te tēe cáscuáha jíin yá, yōhyo ni canaa ni de jeē ní cajini de jnūhun yáha, te ni cacajñūhun jnāhan de:

¿Ndé ñayuu cúu jeē cácu núu súcuan?

²⁶ Te ni ndacoto Jesús nuū de, te ni cahān yā:

Ñayuu chí ma cúu squíví i máá i ndaha Yaā Dios, te máá yá chí ndihí-ni cuu sáha ya, áchí yá.

²⁷ Yūcuán na te ni cahān Pedro:

Sāña jíijnáhan ná ní castóo ná ndihí jeē cánevāha ná, te cándiquín na níhín. ¿Te na vé nihín na núu súcuan? áchí de.

²⁸ Te ni cahān Jesús jíin de:

Ruhū, Yaā ní nduu tēe, jendaá cahán rī jín ró jijnáhan ró jéē ñn quivī conene rī mesa ndacu ri jniñu, te yōhyo luu cujéhu ri ini ñayivī jéē. Te quivī ún te máá ró jéē ní cacondiquin rō ruhū, suni coyūcu ró nuū uxí uū mesa ndacu ró jniñu. Te sándaā rō jniñu ndihúxí uū yucūn ñayuu Israel. ²⁹ Te tāca ñayuu jéē ni stóo vehe, chí ñani, chí cuáha, chí tátá, chí náná, chí ñasihí, chí séhe, chí ñuhun, siquī jéē cóndiquin i ruhū, te nanihin i ñn ciento gā jéē súcuan. Te suni nihin tahu i cotecu i ní cáni. ³⁰ Te cuehē ñayuu jéē vijna cácuu i nuū, nduu i sandihí. Te ñayuu jéē vijna cácuu i sandihí, nduu i nuū. Achí yá.

Jñuhun yátá siquī tēe casájniñu

20

¹ Te suhva cúu jéē ndácu Yaā andiví jniñu nuū ñayuu: Cúu nájnūhun ñn tēe chíí ñuhun. Te ñn nehen ni quenda de, ndúcú de tijni mozo jéē taxín ndéhē uva de. ² Te ni sándaā de jín mozo un jéē chúnaa de ñn denario jéē quiví. Te ni tají de tēe un cuángoo jéē taxín uva de. ³ Yūcuán na te ni quenda tucu de nájnūhun cahin. Te ni jito de nuū sava ga tēe cáyūcu sáa-ni de nuū yáhu. ⁴ Te ni cahán de jín: Róhó jijnáhan ró, cuángoo taxín ró uva rī, te chunaa vāha ri yāhu ró, achí de. Te tēe un cuángoo de. ⁵ Te ni quenda tucu de jéē cuácuu cahuxí uū jín jéē cuácuu cahunī, te suni súcuan ni nihin tucu de mozo. ⁶ Te jéē cuácuu cahuhūn ni quenda tucu de. Te ni nihin tucu de jecu gā tēe cáyūcu sáa-ni nuū yáhu. Te ni cahán de jín: ¿Najehē cáhin sáa-ni ró yáha ní ndiáca? achí de. ⁷ Te ni cacahán tēe ún: Siquī jéē tú ni ñn ní cána sáña jéē sájniñu ná. Te ni cahán de jín tēe ún: Núu súcuan te suni máá ró quingoo ró taxín ró ndehē uva rī, chí chunaa vāha ri yāhu ró, achí de. ⁸ Te nuū ní ini, te tēe chíí ñuhun ni cahán de jín tēe cújéhu nuū mozo de: Cana xinī tēe casájniñu te chunaa rō yāhu de, te xihna gā tēe ni quivícoo sandihí, te sáa te tēe ni quivícoo xihna ñuhún, achí de. ⁹ Te ni quecoo tēe jéē ni quivícoo cahuhūn. Te ñn denario ni caquihin ñn ñn de. ¹⁰ Yūcuán na te ni quecoo tēe jéē ni quivícoo xihna ñuhún. Te cájeni ni de jéē cuehē gā quiyāhu

de. Te ñn-ni denario ni caquihin ñn ñn de. ¹¹ Te nuū ní caquihin de, te ni caquejéē de cacahán sōo de siquī tēe chíí ñuhun, achí de: ¹² Máá ná jijnáhan ná, ndiáca ni casájniñu ná, te ni candoho ná jéē jihní. Te tēe yáha jéē ni quivícoo sandihí, chí máá ñn hora-ni ni casájniñu de. Te inuú-ni ni chiyāhu ní sáña jín de, achí de. ¹³ Te tēe chíí ñuhun ni cahán jín ñn de: Amigo, nasūu jéē tú vāha sáha ri jín ró. ¿A tu ní sándaā yō jéē ñn denario quiyāhu ró, chí naún? ¹⁴ Núu súcuan te quihin yāhu ró te quinhun rō. Chí cúní rī jéē tēe ni quivícoo sandihí yáha, inuú quiyāhu de jín máá ró. ¹⁵ ¿Te á tu cuu sáha ri ndese cúní rī jín xúhun máá rí? ¿Te chí cúcuésún ni rō jéē ní chiyāhu vāha ri de jijnáhan de siquī jéē vāha ni rī? achí de. ¹⁶ Te nájnūhun ni sáha tēe chíí ñuhun, suni súcuan sáha Yaā Dios. Chí ñayuu cácuu sandihí, nduu i nuū. Te ñayuu cácuu nuū, nduu i sandihí. Chí cuehē ñayuu cána ya jéē candije i ya. Te jecu-ni i cándije, te nácāji ya maá i jéē ndúu i séhe ya. Achí yá.

*Jéē ni cahán tucu Jesús jéē cúu yā
(Mr. 10.32-34; Lc. 18.31-34)*

¹⁷ Yūcuán na te ná ni quihin Jesús ichi cuahán yā ñuu Jerusalén, te ni cana sún ya ndihúxí uū tēe cáscuáha jín yá. Te ni cahán yā jín de:

¹⁸ Cuni sōho ró, chí je cuángoo yó ñuu Jerusalén vijna, te yūcuán nastúu ñayuu ruhū, Yaā ní nduu tēe, nuū sutú cácujuhū jín núu tēe cástéén tutu ley. Te ndonda de siquī rī jéē cúu rī. ¹⁹ Te squiví de ruhū nuū tēe nación Roma jéē cáyūcú Jerusalén cándacu jniñu. Te tāca tēe un sácatā de nuū rī. Te cani de ruhū, te sáa te cahni de ruhū jicā cruz. Te nuū uní quiví te natecu rī. Achí yá.

*Jéē ni jicān naná Jacobo jín Juan ñn favor nuū yā
(Mr. 10.35-45)*

²⁰ Yūcuán na te ni quee ñasihí Zebedeo nuū yā jín séhe ña Jacobo jín Juan. Te ni jecuiní yití ña nuū yā, jicān ña ñn favor nuū yā. ²¹ Te ni cajnūhun yá ña:

¿Na vé cuní rō?

Te ni cahán ña:

Cuāha ní jnúhun jeē quivī ndácu ní jniñu te conēne ndindúú séhe ná yáha xiin ní, ñn i lado váha ní, te inga i lado jecó ní, achí ña.

²² Yūcuán na te ni cahān Jesús jíin Jacobo jíin Juan:

Tu cájini rō na vé cúu jeē cájicān rō. ¿A cuu ndoho ró jnúndóho nájnūhun jeē quíji siquī rī? ¿Te á canda ró ndoho xeēn rō nájnūhun ndoho ri? Achí yá.

Te ni cacahān de:

Cuu sáha ná.

²³ Te ni cahān yā jíin de:

Jendaá jeē ndoho ró jnúndóho nájnūhun jeē quíji siquī rī, te ndoho xeēn rō nájnūhun ndoho ri. Te jeē cōnēne ró lado váha ri jíin lado jecó rī, nasūu rúhū cúu jeē cuáha jnūhun. Chi je íyó túhva cuu tāca tēe jeē ní nacāji Tátá rī, te tēe un níhīn. Achí yá.

²⁴ Te uxī gā tēe cáscuáha jíin yá ní cajini de jnūhun yáha. Te ni caquitī ni de nuū uú ñani ún. ²⁵ Te Jesús ni cana ya de, te ni cahān yā jíin de:

Cájini rō ndese cásáha tēe cácujuhnu nuū ñáyuu tācá nación. Chi cándacu níhin de jniñu nuū i, te máá de cáchí ndese coo. ²⁶ Te máá ró jijnáhan ró, chi ma sáha ró súcuan. Chi núu ndé ñn ró cúní cujéhnu, sa suhva cuajníñu ró núu jnáhan ró. ²⁷ Te núu ndé ñn ró cúní cuu nuū, sa suhva sáha ró máá ró mozo nuū jnáhan ró. ²⁸ Chi suni súcuan sáha ruhū, Yaā ní nduu tēe, chi nasūu jéē véji ri jeē cuajníñu ñayuu nuū rī, chi sa suhva véji ri jeē cuajníñu ri nuū ñáyuu. Te cuāha ri maá rí cuu rī návāha jnama ri cuehē ñayuu, achí yá.

Jeē ní nasávāha ya uū tēe cuáá

(Mr. 10.46-52; Lc. 18.35-43)

²⁹ Yūcuán na te ni quenda ya jíin de ñuu Jericó. Te cuehē ndasí ñáyuu ni candiquīn i ya. ³⁰ Te yuhíchi un cáyūcu uū tēe cuáá. Te ni cajini de jnūhun jeē yáha Jesús cuahān yā, te ni cacana jee de:

Máá ní jeē cúu ní Séhe yucūn David, cundáhú ni ni sáña, achí de.

³¹ Te ñayuu un ní cacahān i nuū de jeē na cási de yuhu de. Te víhyá gā ni cacana jee de:

Máá ní jeē cúu ní Séhe yucūn David, cundáhú ni ni sáña víi, achí de.

³² Te ni jecuiñī Jesús, te ni cana ya ndindúú tēe cuáá un, te ni cajnūhun yá de:

¿Na vé sáha ri jíin ró cácuñi rō?

³³ Te ni cacahān de jíin yá:

Jeē na ndúndijin tinūu ná cácuñi ná, achí de.

³⁴ Te ni cundáhú ni yā de. Te ni tee ya ndaha ya tinūú de. Te ni candundijin-ni tinūú de. Te ni candiquīn de ya cuango de jíin yá.

Jeē ni quivī Jesús ñuu Jerusalén

(Mr. 11.1-11; Lc. 19.28-40; Jn. 12.12-19)

21

¹ Te nuū cuácuyajni ya ñuu Jerusalén, te ni jinū yā jíin tēe cáscuáha jíin yá ñuu Betfagé, jeē íne jehē yucu Olivos. Te ni tají yá uū tēe cáscuáha jíin yá jeē quíngoo de. ² Te achí yá jíin de:

Cuáhán ñuu lulí íne ichi núú. Te yūcuan níhīn rō ñn burra, núhni tī jíin ñn burro lulí. Te ndají ró tī, quijicoo ró jíin tī nuū rī. ³ Te núu ndé ñn cahān jíin ró, te cachi rō nuū: Máá Jítoho yō jíni ñúhún yá tī, achí rō. Yūcuán na te siáá-ni i tī, quiji ró jíin tī, achí yá.

⁴ Te súcuan ni cuu tācá jniñu yáha návāha squícu jnūhun ni cahān tēe ni nacani jnūhun Yaā Dios nde jenahán, yósó núu tútu:

⁵ Cachi rō nuū ñáyuu ñuu Jerusalén jeē naní ñuu Sión:

Yāhá condēhe ró jeē véji Rey rō.

Tu sájéhnu ya maá yá, chi máá burra-ni yósó yá,

jíin burrito, séhe quitī ndíso.

Achí tutu.

⁶ Yūcuán na te tēe cáscuáha un cuángoo de, te ni casáha de nájnūhun ni ndacu Jesús jniñu nuū de. ⁷ Te ndéca de burra jíin séhe tī, ni ndecoo de nuū yā. Te ni casoó de sahma de siquī tī, te ni jecosō yā tī. ⁸ Te cáhīn cuehē ñayuu, te ni cascáa i sahma i ini ichi. Te sava ga i ni cajehnde ndaha ñúú, te ni cachucun i ini ichi. ⁹ Te ñayuu cuango ichi núú jíin ñáyuu cuango ichi yátá, cácana jee i:

Yōhyo cújéhnu Yaā cúu Séhe yucūn rey David. Yōhyo vāha Yaā cúu Yaā jeē véji jíin jniñu máá Jítoho yō Yaā Dios. Te yōhyo cújéhnu máá Yaā Dios. Achí i.

10 Te nuū ni quívi ya űuu Jerusalén, te ndíhi űayuu űuu un ní cacuvaā i, te cuehē i cájnūhun jnāhan:

¿Ndé tēe cúu tēe yáha? áchí i.

11 Te ni cacahān űayuu vējicoo jíin yá:

Yáha cúu Jesús jeē nácani jnūhun Yaā Dios, jeē véji nde űuu Nazaret ndańū Galilea. Achí i.

*Jeē ní quenehen ya űayuu ini templo
(Mr. 11.15-19; Lc. 19.45-48; Jn. 2.13-22)*

12 Yūcuán na te ni quívi Jesús ini templo cáhnu Yaā Dios. Te ni quenehen ya tāca űáyuu cájeen quiiti te cánaxīco núu űáyuu jeē socō i. Te ni scotúu ndeyi ya tāca mesa tēe cástáyí xūhún, jíin silla tēe cáxīcō paloma.

13 Te áchí yá jíin i:

Yósó núu tútu i jeē cahán Yaā Dios: Vehe ri chi vehe nuū cájicān tahu cúu, áchí Yaā Dios. Te máá ró jijnáhan ró, chí nájñūhun yaū cava űacuīhná ni canasáha ró. Achí yá.

14 Yūcuán na te sava űayuu cuaá jíin űáyuu chacuá ni quecoo i nuū yā ini templo un. Te ni nasávāha ya i. 15 Te sutū cácujeñnu jíin tēe cástéén tutu ley Yaā Dios, ni cajito de tācá jniñu jéñnu sáha ya, te ni cajini de jeē cácana jee sūchi lúli ini templo: Yōhyo cújéñnu Yaā cúu Sēhe yucūn rey David, achí i. Te ni caquiitī ni de. 16 Te ni cacahān de jíin yá:

¿A tu jíini ró jēe súcuan cácahān sūchi yáha? áchí de.

Te ni cahān Jesús jíin de:

Jíini ri. ¿Te á ná tu cahu ró jēe yosó núu tútu i jeē suhva cáhān ĩn tēe jíin Yaā Dios? Sáha ní jēe tāca sūchi lúli jíin sūchi cájexin, vāha ndasí cáhān i jeē Yaā cujéñnu cúu Cristo.

Achí.

17 Te ni stóo ya de. Te ni quenda ya űuu Jerusalén, cuahān yā nde űuu Betania. Te yūcuan ní ndōo ya jecuāā ún.

*Jeē ní cáhān yā nuū yújnu higo
(Mr. 11.12-14, 20-26)*

18 Te jenéhen inga quívi cuanuhun yā űuu Jerusalén, te jíi yā sóco. 19 Te ni jito ya ĩn nundēhe higo, ín yuhíchi. Te ni jehēn yā jehē. Te tú na ndehē ni níhín yā, chí máá ndaha-ni ín. Te ni cahān yā jíin:

Vijna te ma cúun cuiiti gā ndehē xinī rō, achí yá.

Te ni ichī-ni yujnu higo ún. 20 Te tēe cáscuáha jíin yá, ni canaa ni de cájito de. Te ni cacajnūhún de ya:

¿Ndese ni sáha ní jēe yachí-ni ni ichī yujnu higo? achí de.

21 Te ni cahān yā jíin de:

Jendaá cahán rī jíin ró, núu candíje ró te tú cani síquī ni rō, te cuu sáha ró jniñu jéñnu nájñūhun ni sáha ri jíin yujnu higo. Te nde jniñu jéñnu ga cuu sáha ró, chí nde cuu cahān rō jeē cújiyo yucu yáha, quihīn nuū mar, te sáha nájñūhun cahān rō. 22 Te tāca jēe cacán tahu rō jijnáhan ró, te núu candíje ró jēe nihín rō, te nihín rō. Achí yá.

*Siquī jeē ndíso jniñu Jesús
(Mr. 11.27-33; Lc. 20.1-8)*

23 Te ni quívi tucu ya ini templo cáhnu. Te níni stéén yā jnūhun, te sutū cácujeñnu jíin tāca tēe jéñnu jeē cándacu jniñu nuū űáyuu hebreo, ni quecoo de nuū yā. Te ni cacajnūhún de ya:

¿Ndé ní nihīn jniñu ró jēe sáha ró jniñu yáha? ¿Te ndé ĩn ni tee jniñu síquī rō jeē sáha ró súcuan? Achí de.

24 Te ni cahān Jesús:

Suni ruhū, cajñūhun rí rohó ĩn jnūhun jijnáhan ró, te núu cuu stío cuiñí rō, yūcuán na te cachi rī nuū rō ndé ní nihīn jniñu ri jeē sáha ri jniñu yáha. 25 ¿Ndé ĩn ni tee jniñu síquī Juan jeē ni scuándute de? ¿A Yaā Dios chí tāca tēe? áchí yá jíin de.

Yūcuán na te ni candajnūhun máá de:

Núu cahān yō jeē Yaā Dios ni tee ya jniñu un síquī Juan, te cahān de jíin yó: Núu súcuan ¿te najehē tu ní cáccandíje ró de? 26 Te núu cahān yō jeē űáyuu ni catee jniñu un síquī de, te cáyūhu yó űayuu, chí ndivii i cáccandíje i jeē tēe ni nacani jnūhun Yaā Dios ni cuu ndije Juan. Achí de cácahān maá de.

27 Te ni cacahān de jíin Jesús:

Tu cájini rī, achí de.

Yūcuán na te ni cahān yā jíin de:

Ni ruhū, suni ma cáchi rī nuū rō ndé ĩn ni tee jniñu síquī rī sáha ri jniñu yáha, áchí yá.

Jnūhun yátá síquī uú sēhe yí

28 Te ni cahān gā yā jíin de:

Cuni nahín ró jnūhun yátá yáha: ĩn tēe ni iyo uū sēhe yí de. Te ni cahān de jíin ĩn i: Séhē, quihīn rō taxín ró ndehē uva rī vijna,

áchí de. ²⁹ Te ni cahān i: Ma quihín na, áchí i. Te ni cunúu, te ni nacani ní i, te cuahān i nuū jniñu ún. ³⁰ Te tēe un ní jehēn de nuū inga sēhe de, te suni súcuan ní cahān de jíin i. Te ni cahān i: Cuu núu súcuan, te quihīn na, áchí i. Te tu ní jehén i. ³¹ ¿Te ndese cájeni ni rō? Jeē ndindúú i, ¿ndé ñn i ni squícu jniñu cúní tatá i? áchí yá.

Te ni cacahān de:

Sūchi jēē ní cahān de jíin xíhna gā, achí de.

Te ni cahān Jesús jíin de:

Súcuan cúu, te jendaá cahán rī jíin ró jeē tēe cástútú xúhun renta jíin ñahan cájica jnéni, yachī cánacani ní i jeē stóo i cuēchi i te quívicoo i ndaha Yaā Dios jeē ndacu ya jniñu nuū i, te máá ró jijnáhan ró chi ma quívi ró. ³² Chi ní quiji Juan, ní steén de ndese condiquīn rō jñuhun ndaā, te tu ní cá candíje ró jñuhun ní cahān de. Te sa suhva tēe cástútú xúhun renta jíin ñahan cájica jnéni, ní cacandíje i jñuhun ní cahān de. Te máá ró, vēsú ní cajito ró jēē ní cacandíje i, te tu ní cánacani cuítí ní rō jeē candíje ró. Achí yá.

Jñuhun yátá síquī tēe née cásájniñu nuū uva

(Mr. 12.1-12; Lc. 20.9-19)

³³ Cuni sōho inga jñuhun yátá jíin náhan ró: Ní iyo ñn tēe chíi ñuhun. Te ni nachuhun de cuehē ndehē uva. Te ni jesi de corral, te ni sáha de ñn nuū cúhun ndehē un táxīn. Te ni jeni de ñn vehe súcún návāha cuu coto de ní cáhnu.

Te ni stóo de nuū sava tēe sájniñu nuū, te cuu sava de ndehē jíin. Te ni tee de ichi cuahān jicá de. ³⁴ Te máá tiempo ndutútú uva, te ni tají de jecu mozo cuanuquīhin sava uva nuū tēe cásájniñu ún. ³⁵ Te tēe un ní cajñi de mozo un. Te ñn i ní cacani de, te inga i ní cajehni de, te inga i ní cajēhe de yuū xinī. ³⁶ Te tēe chíi uva ní tají tucu de jecu gā mozo cuango, cuehē gā vēsú jeē xíhna ñuhún. Te suni súcuan ní casáha tēe un jíin ndiñi mozo un.

³⁷ Te jeē sándihí na te ní tají de sēhe de cuahān. Te jéni ní de: Tēe ún chíi cuatáhú de jíin náhan de nuū séhe rī. ³⁸ Te tēe cásájniñu ún, núu ní cajito de nuū séhe tēe chíi uva, te ní cacahān maá: Tēe chíi táhū cúu jeē yáha. Na cáhni yō de, te ndōo tahū de cuu yó, áchí.

³⁹ Te ní cajñi de i, te ní caquenehen de i inga lado, te ní cajehni de i. Achí yá.

⁴⁰ Yūcuán na te ní cajñuhun yá de:

Núu súcuan te núu na quíji tēe chíi uva un, ¿te ndese sáha de jíin tēe cásájniñu ún? áchí yá.

⁴¹ Te ní cacahān de jíin yá:

Ma cundáhú cuítí ní de tāca tēe cásáha jniñu néē un, chíi cahni de. Te cuāha de ñuhun cáá uva un núu inga sava tēe sájniñu nuū, cuu sava de ndehē jíin. Te quívī ndutútú ndehē, te tēe ún nacuāha de sava ndehē nuū tēe chíi uva. Achí de.

⁴² Te ní cahān Jesús jíin de:

¿Te á ná tu cahu ró jñuhun yáha jeē yosó núu tútu íi, jeē ruhū cúu nájnūhun ñn yuū? Chí áchí tutu:

Yuū jeē ní casquéhichí tēe cájeni vehe,

yuū yáha nduu jeē quítuu vehe.

Máá Jítóho yō Yaā Dios ní sáha ya súcuan, te cánaa ní yō jító yó jniñu yáha.

Achí tutu. ⁴³ Núu súcuan te cahān rī jíin ró jeē cujiyo-ni jeē ndácu Yaā Dios jniñu nuū rō jijnáhan ró, te nacuāha ya jniñu un núu inga ñayuu jeē squícu váha i jniñu ndácu ya nájnūhun cúní yā. ⁴⁴ Te ñayuu tu cá candíje, ndoho i nájnūhun ndóho ñayuu jeē cotúú síquī yuú te jnáhnú i. Te quívī sándaā Yaā Dios cuēchi, te ñayuu tu cá candíje, ndoho i nájnūhun ndóho ñayuu jeē níngā yuū síquī i te cundihí i sáha. Achí yá.

⁴⁵ Te sutū cácujuhnu jíin tēe grupo fariseo ní cajini sōho de tāca jñuhun yátá ní cahān yā. Te ní cajecūhun ní de jeē síquī maá de cúu jñuhun yátá ní cahān yā síquī tēe cásájniñu nuū uva jíin tēe cájeni vehe. ⁴⁶ Te ní canducú de modo jñi de ya. Te cáyūhú de jeē quítí ní ñayuu, chíi cájeni ní i jeē tēe nácani jñuhun Yaā Dios cúu ya.

Jñuhun yátá síquī vico nándāha

22

¹ Yūcuán na te ní cahān tucu Jesús inga jñuhun yátá jíin de jíin náhan de:

² Súcuan cúu jeē ndácu Yaā andiví jniñu nuū ñayuu: Cúu nájnūhun ñn rey jeē sáha de ñn vico jeē nándāha sēhe yí de. ³ Te ní tají de tāca mozo de cuacana ñayuu jeē ní cahān de jíin jēē quíjicoo. Te ñayuu ún tu ní cá cuni i quíjicoo i. ⁴ Te ní tají tucu de jecu

gā mozo quingoo, te áchí de jíin: Cahān jíin ñáyuu ní cana ri un jéé iyó túhva ndeyu. Chi je ni jehni rī stiquī rī jíin táca gá quitī ní nduu, te ndihi je iyó túhva. Nehen jijnáhan ró vico nándāha. Achí rō jíin i. Achí de. ⁵ Te ñayuu ní cana de ún tu ní cásáha i cuenta. Chi ñn i cuahān nuū ítu i, te inga i cuahān nuū jnínū sáha i. ⁶ Te sava ga i ni cajñi i táca mozo rey, te ni casácatā i nuū, te ni cajehni i. ⁷ Yūcuán na te yōhyo ni quitī ni rey. Te ni tají de soldado de ni jengoo, ni cajehni de ñayuu ní cajehni ndīyí ún, te ni cajehmu de ñuu i. ⁸ Yūcuán na te ni cahān de jíin sava ga mozo de: Ndihi je iyó túhva jeé cóo vico nándāha. Te ñayuu ní cana ri ún, tu iyó váha jeé quíjicoo i chi nasūu ñáyuu váha cácuu i. ⁹ Núu súcuan te cuáhán jijnáhan ró táca núu náquijnáhan calle. Te cana ró núu nasaa ñayuu nihīn rō, na quíjicoo i vico nándāha. Achí de. ¹⁰ Te ni quendacoo mozo un cuángoo táca ichi. Te ni castútú de ndihi ñayuu ní canihīn de, cúu ñayuu cunéé, cúu ñayuu váha. Te súcuan te ni chitú ñáyuu ini vehe nuū iyó vico nándāha.

¹¹ Te ni quiví rey ini vehe jeé cahán de jíin ñáyuu ni cutútú. Te ni jito de nuū ñn tēe jeé tu ñúhun sahma jeé ni jéhe de cuhun ñayuu quijicoo vico nándāha. ¹² Te ni cahān de jíin tēe ún: Amigo, ¿ndese ni quiví ró yáha jéé tu ñúhun ró sahma vico nándāha? áchí de. Te máá tēe ún tu ní cáhán cuítī de. ¹³ Yūcuán na te ni cahān rey jíin tēe cájeni cohō: Jñi de te cuhni rō ndaha de jehē de, te quenehen ró de na quíhín de nuū quéhe nuū néé. Te yūcuán ndáhyū de te nacayihí yuhu de jeé ndóho xeēn de. Achí rey. ¹⁴ Chi cána Yaā Dios cuehē ñayuu jeé na cándíje i. Te jecu-ni i cándíje, te máá i nácāji ya jeé ndúu i sēhe ya. Achí Jesús.

Siquī xúhun renta

(Mr. 12.13-17; Lc. 20.20-26)

¹⁵ Yūcuán na te cuangoo tēe grupo fariseo. Te ni candajnūhún de núu ndese sáha de návāha cahān yā ñn jnūhun jeé nihín de cuēchi siquī yā. ¹⁶ Te ni catajī de jecu tēe cáscuáha jíin máá de jíin tēe grupo Herodes cuangoo de. Te ni cacahān de jíin yá:

Maestro, cájini na jéé tēe cáhán ndaā cúu ní, te stéén ndaā ní ndese squícu ñayuu nuū Yaā Dios. Te tu yúhú ní jeé cahán ni ñn

ñayuu siquī ní, chi tu sáha ní cuenta ndese cúu ñn ñn i, chi inuú-ni sáha ní jíin i. ¹⁷ Núu súcuan te cahān ní ndese jéni ní ní: ¿A iyó váha jeé chúnaa yō renta nuū rey nación Roma jeé jñi nación yō, chí tuú? áchí de.

¹⁸ Te ni jini Jesús jeé cájito ndee de ya. Te ni cahān yā jíin de:

Tēe stáhú-ni cácuu ró. ¿Najehē cájito ndee rō ruhū? ¹⁹ Stéén xūhun jéé jéconaā renta na cóto ri, achí yá.

Te ni castéén de ñn denario nuū yā. ²⁰ Te ni jito ya, te ni cajnūhun yá de:

¿Ndé ñn nuū cúu jeé ndeé nuū xúhun yáha, te ndé síhví cúu jeé ndeé yāhá?

²¹ Te ni cacahān de jíin yá:

Nuū jíin síhví rey un cúu, áchí de.

Yūcuán na te ni cahān yā jíin de:

Núu súcuan te nacuāha ró núu rey un jéé yñi cuenta nuū de, te nacuāha ró núu Yaā Dios táca jéé yñi cuenta nuū maá yá, achí yá.

²² Te nuū ní cajini de jeé ndichí ní cahān yā jnūhun yáha, te ni canaa ni de, te ni castóo de ya, te cuangoo de.

Jeé ní cacajnūhún de siquī jeé nátecu ndīyí *(Mr. 12.18-27; Lc. 20.27-40)*

²³ Te suni quiví un ní quecoo jecu tēe grupo saduceo nuū yā. Te tēe un cacahān jeé tu nátecu cuítī ndīyí. Te ni cacahān de jíin yá siquī ñn jnūhun, áchí de:

²⁴ Maestro, Moisés ni cahān de jeé núu ñn tēe cuu de, te ndōo ñasihí de, te núu tú sēhe de ní íyo jíin ña, núu súcuan te cánuú jeé ñani de naquihin ñasihí de, te sēhe de jeé cácu jíin ña nucuñi nuū ndīyí ñani de. Achí Moisés.

²⁵ Te ñuu na ní íyo uxā ñani. Te tēe núu ní quijnáhan de jíin ñahan. Te ni jihī de. Te jeé tú sēhe de ní íyo, te ni ndōo ñasihí de nuū ñani de. ²⁶ Te tēe ún suni ni jihī de, te tú na sēhe de ní íyo tucu. Te suni súcuan tēe unī, nde jíin ndihúxá de. ²⁷ Te nuū ní ndihi de ni cajihī, te suni ni jihī ñahan ún. ²⁸ Núu súcuan te quiví nátecu ndīyí, ¿ndé ñn de cuu ña ñasihí de? Chi ndihúxá de ni condeca de ña. Achí de jíin yá.

²⁹ Yūcuán na te ni cahān yā jíin de:

Yōhyo cástíví ró jnūhun siquī jeé tu cájecūhun ni rō jeé cahán tutu iī, ni tu cájini rō jeé iyó poder Yaā Dios jeé nastécu yā ndīyí. ³⁰ Chi quiví nátecu ndīyí, te tuá na

jnūhun quijnáhan tēe jíin ñahan coo. Chi coo i nájnūhun ndajéhé Yaā Dios andiví. ³¹ Te siquī jeē nátecu ndiyi, ¿á tu ní cácahu ró tutu jnūhun jeē cahán Yaā Dios jíin ró? ³² Máá rí cúu Yaā Dios Abraham jíin Isaac jíin Jacob, achí Yaā Dios. Chi vēsú je ni cajihī de, te cátecu de nuū iyó máá yá, chi cúu ya Yaā sáha jeē técu ñayuu ní cáni. Achí yá jíin de.

³³ Te ñayuu un ní canaa ni i cájini nahín i jnūhun stéén yā.

Jniñu cánuú ndasí gá jeē ní ndacu Yaā Dios
(Mr. 12.28-34)

³⁴ Yūcuán na te tēe grupo fariseo ni cajini de jeē ní cajesi tēe saduceo yuhu de ni sáha ya. Te ni candutútú de nuū yā. ³⁵ Te ñin de jeē cúu tēe stéén tutu ley Yaā Dios, ni cajnūhún de ya, chi coto ndee de ya cuní de:

³⁶ Maestro, ¿ndé ñin cúu jnūhun ndácu jniñu cánuú ndasí gá nuū tútu ley? achí de.

³⁷ Te ni cahán Jesús jíin de:

Coo manī ndasí ró jíin máá Jítóho rō Yaā Dios, nde jnáā ndasí ró sáha ró ndihī jeē cúsiñ ni yā, nde jíin ini jíin ánuá rō, jíin ní jéé níjnūní rō, achí tutu. ³⁸ Yāha cúu jniñu ndácu ya jeē cujéhu ga te cánuú ndasí gá. ³⁹ Te jniñu uū jeē ní ndacu ya, suni súcuan cáhán: Cundáhú ni rō jnáhan ró nájnūhun cundáhú ni rō maá ró. ⁴⁰ Te chíji ndindúú jnúhun yáha ní quenda ndihī ley jeē ní tee Moisés, jíin ndihī jeē ní castéén tēe ni canacani jnūhun Yaā Dios, achí yá.

Siquī jeē cúu Cristo sēhe yucūn David
(Mr. 12.35-37; Lc. 20.41-44)

⁴¹ Te níni cáyūcu tútú gá tēe fariseo un, te Jesús ni cajnūhun yá de:

⁴² ¿Ndese cájeni ni rō siquī Cristo? ¿Sēhe ndé yúcūn cúu ya?

Te ni cacahán de:

Sēhe yucūn David, achí de.

⁴³ Te ni cahán yā jíin de:

Núu súcuan ¿te ndese cúu jeē David ni cahán de Jítóho de ya, ni sáha Espíritu Santo nde jenahán? Chi ni cahán de:

⁴⁴ Máá Jítóho yō Yaā Dios ni cahán yā jíin Jítóho rī, Yaā quiiji:

Cucōo ró lado váha ri nuū cujéhu ró,

te na sáha ri jeē quende rō poder táca jéé cájito uhū rohó.

Achí Yaā Dios. Achí David. ⁴⁵ Te núu sēhe yucūn David cúu Cristo, ¿te ndese cúu jeē ni cahán de jeē Jítóho de cúu ya? achí yá.

⁴⁶ Te ni ñin de tu ní cúu stió cuñí cuiti de jnūhun nuū yā. Te nde quivī ún tuá ni ñin de ní chúndeyí ni de cajnūhún de ya.

Jeē ni cahán yā jeē iyó cuéchi de jíjnáhan de
(Mr. 12.38-40; Lc. 11.37-54; 20.45-47)

23

¹ Yūcuán na te ni cahán Jesús jíin ñayuu jíin tēe cáscuáha jíin yá:

² Tēe cástéén tutu ley Yaā Dios jíin tēe grupo fariseo, cájeni ni de jeē ndiso jniñu de jeē steén de ley jeē ni jéhe ya nuū Moisés.

³ Núu súcuan te cuatáhú ró te squícu ró táca jéé cándacu de nuū rō. Te ma sáha ró nájnūhun cásáha máá de. Chi cácahán-ni de, te tu cásquícu de. ⁴ Chi suni cástéén de táca ley ní catava maá de jeē yí sáha, te cátee de siquī ñayuu, te tu cácuñdeyí i squícu i. Te máá de jíjnáhan de, chi ni ñin xinī ndáha de tu cáscánda de jeē squícu de.

⁵ Te máni siquī jeē na cuájnuhún ñayuu de cúu ndihī jeē casáha de. Chi cánujnahan ni de cuhni de cuehē jnūhun tutu ñi jneē de jíin ndaha de. Te suni cásacáni ga de yuhvā yusáhma de jeē steén jeē cácuñdeyí ga de vēsú ñinga ñayuu. ⁶ Te cánujnahan ni de cucōo de nuū silla yíñuhún gá nuū cáyeji ñayuu vico, jíin silla yíñuhún gá ini vehe ñi sinagoga. ⁷ Te suni cánujnahan ni de jeē cahán yíñuhún ñayuu jíin de nuū calle, jíin jéé cahán i maestro jíin de.

⁸ Te máá ró jíjnáhan ró, ma cuáha ró jnúhun jeē cahán ñayuu maestro jíin ró. Chi ñnuú cácuu ndihī ró jéé cácuu ró hermano, te íyó ñin-ni Maestro rō jeē cúu ruhū, Cristo.

⁹ Te ma chíñuhún ró ni ñin tēe ñayiví yáha jeē cahán rō padre jíin de. Chi íyó ñin-ni Tátá rō jíjnáhan ró, Yaā ndeé andiví. ¹⁰ Te suni ma cuáha ró jnúhun jeē cahán i jítóho jíin ró. Chi íyó ñin-ni Jítóho rō, te suu cúu ruhū, Cristo. ¹¹ Te tēe mēhñu ró jíjnáhan ró jeē jejniñu nuū jnáhan, suu de cúu jeē cujéhu ga. ¹² Chi tēe jeē sajhéhu de máá de, sa ndululí de. Te tēe jeē sálulí de máá de, sa ndujéhu de.

¹³ Nacā xeñ ndoho róhó tēe cástéén tutu ley jíin róhó tēe fariseo, chi tēe stáhú-ni

cácuu ró. Chi cájesi rō jeē quívi ñayuu ndaha Yaā andívi jée ndacu ya jniñu nuū i. Chi tu quívicoo máá ró, ni tu cájēhe ro jnúhun quívicoo ñayuu nducú quívi.

14 'Nacā xeēn ndoho rōhó tēe cástéén tutu ley jíin rōhó tēe fariseo, chi tēe stáhú-ni cácuu ró. Chi cáquende rō vehe ñahan ní caquendōo ndáhú. Yūcuán na te cájicān tahu nahán ró návāha cani ni ñayuu jeē tú na cuēchi ró. Jeē yúcuan xeēn gā ndoho ró castigo.

15 'Nacā xeēn ndoho rōhó tēe cástéén tutu ley jíin rōhó tēe fariseo, chi tēe stáhú-ni cácuu ró. Chi ní ñuhun íchi jíin ní mar cájica cuu ró cánducú ró ñin ñayuu scandíje ró sáhān maá ró. Te núu ni candíje i, te cásáha ró jée vihyá gā cúu cuēchi i jeē quihín i infierno vēsú maá ró.

16 'Nacā xeēn ndoho ró, chi cácuu ró nájnūhun tēe cuáá jée steén ichi nuū ñayuu. Chi cácahān rō: Núu ndé tēe jéjnūhun téyí de, te núu cahān de jeē Yaā Dios jeē ndeé ini templo na cuáha ya castigo núu ma squícu de, yūcuán na te tu cánuú squícu de. Te núu cahān de jeē Yaā Dios jeē chíi oro jeē iyó ini templo, na cuáha ya castigo núu ma squícu de, yūcuán na te cánuú squícu nahín de, cácahān rō. 17 Tēe cánéé tēe cuáá cácuu ró jée castívi ró jnūhun cácahān rō. ¿Ndé ñin cúu jeē cujéhnú ga, á oro un chí Yaā Dios jeē ndeé ini templo jeē sáhií oro un? 18 Te suni cácahān rō: Núu ndé tēe jéjnūhun téyí de, te núu cahān de jeē Yaā Dios jeē chíi altar na cuáha ya castigo núu ma squícu de, yūcuán na te tu cánuú squícu de. Te núu cahān de jeē Yaā Dios jeē chíi ndajníñu jeē cásocō nuū altar, na cuáha ya castigo núu ma squícu de, yūcuán na te cánuú squícu nahín de, cácahān rō. 19 Tēe cánéé tēe cuáá cácuu ró jée castívi ró jnūhun cácahān rō. ¿Ndé ñin cúu jeē cujéhnú ga, á ndajníñu yúcu nuū altar, chí Yaā Dios jeē sáhií yā ndajníñu ún? 20 Núu súcuan te tēe jéjnūhun téyí, te núu ndácunehen de Yaā Dios jeē chíi altar, núu súcuan te nde jíin ndajníñu yúcu nuū altar ndácunehen de. 21 Te tēe jeē jéjnūhun téyí, te núu ndácunehen de templo, núu súcuan te nde jíin Yaā Dios jeē ndeé ini templo ndácunehen de. 22 Te tēe jéjnūhun téyí, te núu ndácunehen de andívi, núu súcuan te suni

ndácunehen de mesa Yaā Dios te nde jíin máá Yaā Dios jeē ndeé nuū mesa un.

23 'Nacā xeēn ndoho rōhó tēe cástéén tutu ley jíin rōhó tēe fariseo, chi tēe stáhú-ni cácuu ró. Chi cásáha ró úxí uxí nuhní tamínú jíin yucū anís jíin yucū comino, te cásocō rō ñin ñin siquí tāca úxí un núu Yaā Dios. Te cástóo ró jnúhun cánuú ndasí gá nuū ley, suu jeē cáca ndaā rō, jíin jée cundáhú ni rō jnáhan ró, jíin jée candíje ró. Tāca jée yáha cánuú sáha ró núu, te suni ma stóo ró jée socó rō tāca yucū ún. 24 Cácuu ró nájnūhun tēe cuáá jée steén ichi nuū ñayuu. Chi cásquícu ró ñin jeē lulí gá un, te cástóo ró jée cánuú gá. Te suu cúu nájnūhun jeē cātava rō chūcún ndíhí jeē ñúhun nuū ndúxi, te cácocó ró ñin quiti cáhnu jeē naní camello.

25 'Nacā xeēn ndoho rōhó tēe cástéén tutu ley jíin rōhó tēe fariseo, chi tēe stáhú-ni cácuu ró. Chi nájnūhun jeē cánacate ró yátā vaso jíin yátā cohó. Te ichi íni rō chi ñúhun máni máá jnúhun cuíhná jíin jnúhun ndíyo ni. 26 Tēe cuáá cácuu ró, fariseo. Xihna gā sáha ró jée coo ndoo ini anuá rō, te yūcuán na te suni coo ndoo tāca jée casáha ró jée cájito ñayuu nuū.

27 'Nacā xeēn ndoho rōhó tēe cástéén tutu ley jíin rōhó tēe fariseo, chi tēe stáhú-ni cácuu ró. Chi cándāa ró nájnūhun vehe ndíyí nuū panteón jeē cáyaa. Chi ichi yátá jíto luu, te ichi íni ñúhun chitú yiqui ndíyí jíin tāca jée tehyú. 28 Te súcuan cácuu máá ró, chi ichi yátá rō casáha ró jeē tēe ndaā cácuu ró núu ñayuu. Te ichi íni rō ñúhun chitú jnúhun stáhú-ni jíin jnúhun néé.

29 'Nacā xeēn ndoho rōhó tēe cástéén tutu ley jíin rōhó tēe fariseo, chi tēe stáhú-ni cácuu ró. Chi cásáha ró vehe siquí nuū yíndūji ndíyí jíi rō, tēe ni canacani jnūhun Yaā Dios nde jenahán. Te cásáha luu ró vehe siquí nuū yíndūji tāca tēe ni iyo ndaā. 30 Te cácahān rō: Núu jeē suni yúcu yó tiempo jeē ní cotecu ndíyí jíi yō, te ma squívi nduu yō jíin de jeē cáhni yō tēe ni canacani jnūhun Yaā Dios, achí ró. 31 Te súcuan cácahān ndaā rō jeē maá ró cácuu yucūn ñayuu ni cajehni tēe ni canacani jnūhun ya. 32 Núu súcuan te tāca cuéchi jeē ní casquéjéé ndíyí jíi rō, máni un cásáha ga maá ró.

³³ 'Va sēhe coō cácuu ró, chi xeēn rō nájñūhun coō. ¿Ndesē cācu ró jēē ma jñahnú ndetū rō quingoo ró infierno? ³⁴ Núu súcuan te tají rí tāca téē nacani jñūhun Yaā Dios nuū rō, jín tāca téē ndíchí jēē castéēn jñūhun ya. Te sava de cahni rō, te sava de cata caa ró jicā cruz. Te sava ga de cani ró de ini tācá vehe iī sinagoga, te scúnu ró de quingoo de tācá ñuu. ³⁵ Te súcuan te condee cuēchi siquī maá ró jeē ní cajehni jí rō tāca téē ndaā, xihna gā nde Abel téē ndaā, te nde Zacarías sēhe Berequías, téē ní cajehni de ini templo sava mēñū cuarto iī jín altar. ³⁶ Jendaá cahán rí jín ró jeē tāca cuēchi yáha condee siquī ñayuu iyó vijna.

*Jeē cucúhyá ni yā jító ya ñuu Jerusalén
(Lc. 13.34-35)*

³⁷ 'Róhó ñuu Jerusalén, jéñi rō téē cánacani jñūhun Yaā Dios, te jéhe ro yūu xiní téē tájī Yaā Dios vējicoo nuū rō. Te cuehē jínu ní cuni rí nastútú rí sēhe ró, nájñūhun ndují jēē nastútú tí sēhe tí chíjī ndijēn tī, te tu ní cúní rō. ³⁸ Núu súcuan te vijna te stóo uun na ri rohó jín séhe ró. ³⁹ Chi cáhán rí jín ró jēē ndé vijna te ma cóto cuiti gā rō nuū rí, chi nde quiji quiví jeē cahán sēhe ró: Yōhyo vāha Yaā cúu Yaā véndiji jín jñiñū máá Jítóho yō Yaā Dios, achi i. Achí yá.

*Jeē ní cachi yā jeē náā templo
(Mr. 13.1-2; Lc. 21.5-6)*

24

¹ Te ni quenda Jesús ini templo cáhnu cuahān yā. Te ni quecoo téē cáscuáha jín yá, te ni cacahān de jín yá siquī tācá vehe jeē ndejnáhan jeē cúu máá templo un. ² Te ni cahān yā jín de:

Tāca jēē cájito ró yáha, jendaá cahán rí jín ró jeē quiji quiví jeē ma cóso jñáhan ga ní ññ yuū, chi ndíhi jñanū. Achí yá.

*Na seña coo nuū cuácuyajni ndíhi ñayiví
(Mr. 13.3-23; Lc. 21.7-24; 17.22-24)*

³ Te ni jehēn yā jín téē cáscuáha jín yá nde yucu Olivos, te ni cucōo ya yūcuán. Te ni quecoo de nuū yā, te ni cacajñūhun sñn de ya:

Castūhun ní ndé quiví coo tāca jēē ní cachi ní jēē coo. ¿Te na seña coo núu ní cuyajni quiví ndíji ní jín jēē jínu ñayiví? áchí de.

⁴ Te ni cahān Jesús:

Coto ró jēē ma stahú ní ññ de róhó. ⁵ Chi quijicoo cuehē téē jeē stahú jín síhví rí. Máá rí cúu Cristo, achi de. Te súcuan stahú de cuehē ñayuu. ⁶ Te nihñ rō jñūhun jeē tāca lado iyó guerra, chí je yajni coo guerra. Te ma yūhu ró, chi cánuú coo súcuan. Te ní ná tu jinū quiví ndíhi ñayiví. ⁷ Chi ndonda nación siquī ñnga nación, te ndonda ñuu siquī ñnga ñuu jeē cuajnáhan. Te coo jnamā jín cuéhyí xeēn. Te cháha chúcuan jñāa. ⁸ Te tāca jēē yáha cácuu jñūndóho quejéé xihna ñúhún gá.

⁹ 'Yūcuán na te nastúu i róhó jínáhan ró jēē stóho i róhó te cahni i róhó. Te ndíhi ñayuu quítí ní i nuū rō jeē siquí ruhū. ¹⁰ Te quiví ún chi cuehē ñayuu candíje caca yátá i, te quítí ní i nuū jñáhan i, te nastúu jñáhan i. ¹¹ Te canecoo cuehē téē stahú, te cahān de jeē jñūhun Yaā Dios cánacani de, te stahú de cuehē ñayuu. ¹² Te nducuehē jñiñū néé, te jeē yúcuan cuehē i ma cóo maní gā i. ¹³ Te ñayuu cuiñi ññin jín jñūhun rí nde quiví jínu, ñayuu ún chí cācu. ¹⁴ Te jñūhun yáha siquī ndese ndácu Yaā Dios jñiñū, cuitē núu ní cáhnu ñayiví, návāha cuni ñayuu tācá nación. Yūcuán na te jínu ñayiví.

¹⁵ 'Te Daniel, téē ní nacani jñūhun Yaā Dios, ní tee de jñūhun ññ téē néé jēē quíji. Te róhó jēē cácahu tutu ún, na jécūhun ní rō. Chi ññ quiví te cuni rō jeē sáha ndevāha de jeē stíví de tācá ndajñiñū iī ini templo, te cuiñi de ini lugar iī. ¹⁶ Te núu cuni rō jeē súcuan cúu, te ñayuu cáyūcú región Judea, na cúnu i caa i yucu quingoo i. ¹⁷ Te ñayuu cáyūcu núu quéhe, ma ndívi i ini vehe jeē quénehen i ndajñiñū i, chí cánuú cunu yachí i návāha cācu i. ¹⁸ Te ñayuu cáhñ nuū ítu, ma ndíji i vehe jeē quíhin i sahma i. ¹⁹ Te quiví ún nacā jeē ndahú ññahán cáñuhun sēhe jín ññahán cándeca yiquín, chí ma cúnihñ ññ cunu yachí ññ. ²⁰ Te cacān tahú rō jeē ma quíji jñūndóho un jēē cunu ró máá tiempo cúun yuhvā ní quiví ndétátú. ²¹ Chi jeē quejéé un te coo cuehē jñūndóho xeēn, jeē ná tu coo súcuan nde quiví ní jecōo ñayiví te nde vijna. Te jeē ndíhi jñūndóho ún te ní ma cóo ga jeē súcuan. ²² Te núu tú nastíyi Yaā Dios tiempo jñūndóho ún, te ní ññ ñayuu ma cácu cuiti i. Te jeē siquí ñayuu cáncandíje jeē ní nacāji ya, jeē yúcuan nastíyi ya tiempo

un.

²³ 'Núu súcuan te núu ññayuu cahān jín ró: Yāhá condēhe ró íne Cristo, chí: Yūcuán condēhe ró íne ya, achi i, te ma candíje ró jēe cahán i. ²⁴ Chi canecoo tēe cástáhú jēe achi de jeē Cristo cúu de, chí achi de jeē tēe nácani jñūhun Yaā Dios cúu de. Te sáha de jñiñu jéhu jeē naa ni ññayuu coto i, návāha stáhú de nde maá ññayuu ní nacāji ya, te núu na cúu. ²⁵ Je ni castūhun rí nuū rō vijna nde ná tu coo. ²⁶ Núu súcuan te núu cahān ññayuu jín ró: Cuácondēhe ró, chi nde nuū ññūhun téhé íne ya, achi i, te ma quihín rō condēhe ró. Chí núu cahān i: Nehen condēhe ró, chí ini vehe yāha íne ya, achi i, te ma candíje ró jínáhan rō. ²⁷ Chi nájnūhun jeē ndíndēe sáha taja te cúndijin nde ichi núu cáne niāndii jín ndé ichi núu quée niāndii, suni súcuan coo quiví ndiji ruhū, Yaā ní nduu tēe, chí ndihí ññayuu coto. ²⁸ Te nájnūhun jeē cutútú téji ndé-ni cúu nuū catú quiti ní jíhí, suni súcuan coo tāca jēe ni cáhān rī ndé-ni cúu-ni nuū cáhīyo ññayuu.

Ndese coo quiví ndiji Yaā ní nduu tēe

(Mr. 13.24-37; Lc. 21.25-33; 17.26-30, 34-36)

²⁹ 'Yūcuán na te núu ni ndihí tāca jñúndóho quiví ún, te cojnúú niāndii, te yoō ma ndí gā. Te ñngoo quimi andiví. Te tāca jēe ín andiví chí quisi i. ³⁰ Yūcuán na te coto ññayuu nuū maá rí, Yaā ní nduu tēe, ndiji ri ichi ándiví. Te ndahyū ññayuu tācá nación ní cáhnu ññayiví. Te coto i nuū ruhū, Yaā ní nduu tēe, ndiji ri jín vícō andiví, te condiso ri cuehē poder, te yōhyo luu kujéhu ri. ³¹ Te tají rí ndajéhé rī quingoo, te tiví ññihin ya trompeta. Te quinastútú yá ññayuu ní nacāji ri ndicúún lado ññayiví, nde ññ lado ññayiví jín ndé inga lado.

³² 'Vijna te scuáha ró ndese sáha nundēhe higo: Núu je ni nane numa, te ni najee ndaha, te cájini rō jeē jé ni cuyajni tiempo jihní. ³³ Te suni súcuan núu ni cajini rō jeē ní quejéé cúu tācá jñiñu jeē ni cáhān rī, yūcuán na te na jécūhun ni rō jeē ní cuyajni quiví ndiji ri, te yachí coo. ³⁴ Jendaá cahán rī jín rō jeē ma cúu ndihí ññayuu jeē cóto jñúndóho ún, chí nde squícu ndihí jñiñu ún. ³⁵ Andiví jín ññayiví chí naa, te tāca jñūhun cáhān rī chí ma náā, chí ndihí squícu.

³⁶ 'Te quiví jín hora jeē ndíji ri, tú ni ññ ññayuu jiní, ni máá ndajéhé cáhīyo andiví, ni máá rí, Sēhe Yaā Dios. Chí máá ññ ni Tátá rī Yaā Dios cúu jeē jiní.

³⁷ 'Chi nájnūhun ni cuu quiví ni íyo Noé, suni súcuan coo quiví ndiji ruhū, Yaā ní nduu tēe. ³⁸ Chi quiví ún, nde ná tu cuun saū xeén, te cáyeji i cájhi i, cánandāha i, te cájēhe i sēhe síhí i jeē nándāha, nde ni jinū quiví jeē ni quiví Noé ini barco cáhnu jeē naní arca. ³⁹ Te tu ní cácandíje ññayuu jeē cuun saū xeén, te ni cuun, te ni ndaa ndute ni cajihí ndihí i. Te suni súcuan coo núu na ndíji ruhū, Yaā ní nduu tēe. ⁴⁰ Te quiví ún cone uū tēe sájñiñu nuū ítu. Te ññ de naquihin ri, te inga de ndōo. ⁴¹ Te coo uū ññahan jeē ndíco cáhnu, te ññ ñña naquihin ri, te inga ñña ndōo. Súcuan cuu jeē sava ññayuu naquihin ri te sava i quendōo, chí tu ní cácandíje i.

⁴² 'Núu súcuan te ndito na cóo ni rō, chí tu cájini rō na quiví ndiji Jitoho rō. ⁴³ Te na chúhun ni rō jeē cahán jñūhun yátá yáha: Tēe chíí vehe, núu jeē jiní de na hora quiji ññacuíhná, te condito de, te ma cuáha de jñūhun sácuíhná ndajñiñu vehe de núu. ⁴⁴ Te rōhó jínáhan rō, suni súcuan coo tūhva rō, chí máá hora jeē tú na vé cájini ni rō, te ndiji ruhū, Yaā ní nduu tēe.

Jñūhun yátá síquī mozo

(Lc. 12.41-48)

⁴⁵ 'Núu súcuan te coo ró nájnūhun ññ mozo jeē ndíto xiní te squícu vāha. Te máá patrón ni jeni de mozo un jēe cóto i ññayuu vehe de, návāha scáji i máá hora. ⁴⁶ Te yōhyo ndetū mozo un jēe núu ni ndee patrón, te cuni de jeē súcuan squícu vāha i. ⁴⁷ Jendaá cahán rī jín rō jeē caní de mozo un jēe cóto i ndihí ndajñiñu de. ⁴⁸ Te núu mozo sáha néé cúu i, te jéni ni i jeē ma ndíji yachí patrón i, ⁴⁹ te quejéé i caní i jñáhan mozo i, te caji i coho i jín tēe cánajini, ⁵⁰ núu súcuan te ndee-ni patrón quiví jeē tu ndétu i jín hora jeē tú na vé jéni ni i. ⁵¹ Te stóho xeén de i, te squiví de i nuū cáhīn tēe stáhú-ni. Te yūcuán ndahyū i te nacayihí yuhu i jeē ndoho xeén i. Achí yá.

Jñūhun yátá síquī uxí sūchi síhí

25

¹ Te suhva cúu jeē ndácu Yaā andiví jniñu nuū ñáyuu: Cúu nájnūhun ñn vico nándāha. Te ni iyo uxī sūchi síhí jeē ní caquihin i linterna cándaha i, te ni quendacoo i cua-nahan i ñn tēe nandāha. ² Te uhūn i chi tú ndito xinī i, te uhūn i chi ndito xinī i. ³ Te sūchi tú ndito xinī, cándaha i linterna i, te tu cándaha i petróleo jeē náchuhun i. ⁴ Te sūchí ndito xinī, chi cándaha i botella petróleo jíin linterna i. ⁵ Te níní cúcuéé quiji tēe nandāha ún, te ni quee māhná, te ni caquixī ndihí i. ⁶ Te nuū ní cuu sava ñuú, te ni cajini i jeē cácana jee: Je vēji tēe nandāha. Cuángoo quijnahan rō de jíjnáhan rō, áchí. ⁷ Yūcuán na te táca sūchi síhí un ní candonda i, te ni casátūhva i linterna i. ⁸ Te sūchi tú ndito xinī, ni cacahān i jíin sūchi ndito xinī: Cuāha jecu petróleo nuū rī jíjnáhan rō, chi cuandahvā linterna rī, achí i. ⁹ Te ni cacahān sūchí ndito xinī: Ma cúu, chi ma cánda jeē cúu máá rí jíin máá rō. Vāha ga quingoo rō núu cúyāhu, te cuaan rō jēe cúu máá rō. Achí i. ¹⁰ Te níní cuángoo i cuaan i, te ni quee-ni tēe nandāha. Te sūchi cáhīyo tūhva un, ní quivícoo i jíin de vico nándāha de. Te ni ndihyū yehyí. ¹¹ Te ni cunúu, te ni quecoo uhūn gā sūchi síhí un. Te ni cacahān i jíin tēe nándāha: Nune ní yéhyí na quivícoo ná, áchí i. ¹² Te ni cahān maá de: ¿Ndé nuū véjicoo rō? Chi tu jíin rī rohó, áchí de. Achí yá.

¹³ Yūcuán na te ni cahān yā:

Núu súcuan te ndito coo ni rō, chi tu cájini rō na quiví na hora ndiji ruhū, Yaā ní nduu tēe. Achí yá.

Jnūhun yátá síquī tēe ní jēhe núu xūhun núu táca mozo

¹⁴ Te suhva cúu jeē ndácu Yaā andiví jniñu nuū ñáyuu: Cúu nájnūhun ñn tēe jeē quihīn jicá de inga ñuu. Te nde ná tu quihīn de te ni cana de mozo de jíjnáhan, te ni jēhe núu de xūhún de nuū i, jeē na sájniñu i jíin návāha nducuehē.

¹⁵ Te nuū ñn i ni jēhe de uhūn mil xūhun cáa. Te nuū inga i ni jēhe de uū mil. Te nuū inga i ni jēhe de ñn mil. Súcuan ni jēhe de, chi jíin de nasaa canda ñn ñn i sájniñu i jíin. Yūcuán na te ni quihin de ichi cuahān jicá de. ¹⁶ Te mozo jeē ní quihin uhūn mil xūhún, ni sájniñu de jíin. Te ni

nihīn de uhūn gā mil síquī. ¹⁷ Te mozo jeē ní quihin uū mil xūhún, suni ni nihīn de uū gā mil síquī. ¹⁸ Te mozo jeē ní quihin ñn mil xūhún, ni jehēn de ni jete de yaū, te ni chisāhí de xūhún patrón de.

¹⁹ Te ni yāha cuehē tiempo, te ni ndee patrón mozo un jíjnáhan. Te ni nandacān de cuenta nuū i. ²⁰ Te ni quee mozo jeē ní quihin uhūn mil xūhún un, te ni nacuāha de xūhún un núu patrón de jíin uhūn gā mil jeē ni nihīn de síquī. Te ni cahān de: Ni jēhe ní uhūn mil nuū ná, te yāha íyó uhūn gā mil jeē ni nihīn na síquī. Achí de. ²¹ Te ni cahān patrón jíin de: Iyó váha núu súcuan. Yōhyo vāha mozo cúu rō jēe squícu vāha rō. Chi vāha ni squícu rō ñn jniñu lúli-ni, te vijna te cuāha ri jniñu jéhnu ndacu rō. Te quiví rō núu cusī ni rō jíin rí. Achí de. ²² Yūcuán na te ni quee mozo jeē ní quihin uū mil xūhún un. Te ni cahān de: Ni jēhe ní uū mil nuū ná, te yāha íyó uū gā mil jeē ni nihīn na síquī. Achí de. ²³ Te ni cahān patrón jíin de: Iyó váha núu súcuan. Yōhyo vāha mozo cúu rō jēe squícu vāha rō. Chi vāha ni squícu rō ñn jniñu lúli-ni, te vijna te cuāha ri jniñu jéhnu ndacu rō. Te quiví rō núu cusī ni rō jíin rí. Achí de. ²⁴ Te ni quee mozo jeē ní quihin ñn mil xūhún un, te ni cahān de jíin patrón: Je jíin na nihín jēe tēe xeēn cúu ní. Chi cuehē gā cuní ni vēsú jeē cúu sáha mozo ni, te cuehē gā nándacān ní vēsú jeē ni jēhe ní. ²⁵ Te jeē yúcuán ní yūhu ná, te ni jehēn na ní chisāhi ná xūhun ní chíji ñuhun. Te yāhá na nacuāha na xūhun ní. Achí de. ²⁶ Te ni cahān patrón jíin de: Mozo cuxí cúu rō te máni jniñu néé sáha rō. Chi jéni ni rō jeē cuehē gā cuní rī vēsú jeē cuu sáha mozo rī, te cuehē gā nándacān rī vēsú jeē ni jēhe rí. ²⁷ Núu jeē ni chúne rō xūhun rí nuū banco nuú, te jeē ní ndee rī te naquihin ri xūhun rí nde jíin séhe xūhun núu. Achí de jíin i. ²⁸ Te ni cahān de jíin táca gá mozo de: Núu súcuan te quende rō mil xūhun jíin nuū i, te cuāha ro núu mozo névāha uxī mil. ²⁹ Chi ñayuu jeē névāha, sa quiji ga nuū i, te conevāha cuehē i. Te ñayuu jeē tu névāha, sa cujiyo-ni vēsú jecu jeē névāha i. ³⁰ Te mozo yāha jēe tu sájniñu vāha, quenehen rō i na quihín i nuū quéhe nuū néē. Te yūcuán ndáhyū i te nacayihí yuhu i jeē ndoho xeēn i. Achí

patrón un.

Siqui jeē cóo juicio tācá nación

³¹ Te ni cahān gā yā:

Īn quiṽi te ndiji máa Yaā ní nduu tēe, te cuu ya Rey nuū ñayuu. Te tācá ndajéhé yā cuiñi ní xiin ya. Te cucōo ya mesa nuū ndácu ya jniñu, te yōhyo luu kujénu ya.

³² Te ndutútú ñayuu tācá nación nuū yā. Te sásān ya i jínáhan i, nájnūhun cúsān lanchi jín ndixúhú sáha tēe ndító ti. ³³ Te ñayuu váha jeē cúu nájnūhun lanchi, chucú yá i lado váha ya. Te ñayuu neé jeē cúu nájnūhun ndixúhú, chucú yá i lado jecó yá. ³⁴ Yūcuán na te cahān Rey jín ñayuu cáhīn lado váha ya: Nacā ndetū rō jeē ní sáha Tátá rī jín ró. Nehen quiṽicoo ró núu ndácu ró jniñu. Chi nde quiṽi ní jecōo ñayṽi te je ni sátūhva ya nuū ndacu ró jniñu. ³⁵ Chi ni jī rī sōco, te ni cajēhe ro jēe ní yeji rī. Ni jichī rī ndute, te ni cajēhe ró jēe ní jihī rī. Ni quiji ri nde ñuu jicá, te ni cajēhe núu ró vehe ni ndōo rī. ³⁶ Ni cumanī sahma ri, te ni cajēhe ró. Ni cocuhū rī, te ni jecondēhe ró ruhū. Ni ine ri vecāa, te suni ni jecondēhe ró ruhū. Súcuān cahān yā jín ñayuu cáhīn lado váha ya. ³⁷ Yūcuán na te cahān ñayuu váha un jín yá: ¿Na quiṽi ní cajito ná níhín jēe jī ní sóco, te ni cajēhe na jēe ní yeji ní, chí jēe jichí ní ndute, te ni cajēhe ná ní jihī ní? ³⁸ ¿Te na quiṽi ní cajito ná jēe ní quiji ní ndé ñuu jicá, te ni cajēhe núu ná vehe ni ndōo ní, chí jēe cúmanī sahma ní, te ni cajēhe ná? ³⁹ ¿Te na quiṽi ní cajito ná jēe cuhú ni, chí jēe íne ní vecāa, te ni jecondēhe ná níhín? achi i. ⁴⁰ Yūcuán na te cahān Rey jín i: Jendaá cahán rī jín ró jēe ná ni casáha ró súcuān jín ĩn tācá hermano rī jeē cácandíje, vēsú ñayuu núu ga cúu i, te nuū maá rí ní casáha ró.

⁴¹ Yūcuán na te suni cahān Rey jín ñayuu cáhīn lado jecó yá: Ñayuu jnahnū ndetū cácuo ró. Cuiyo quingoo ró núu ñuhún jeē cayú ní cáni, nuū iyó túhva cone jexeén jín táca táchī jeē cájejniñu nuū. ⁴² Chi ni jī rī sōco, te tu ní cajēhe ro jēe cáji rī. Ni jichī rī ndute, te tu ní cajēhe ro jēe coho rī. ⁴³ Ni quiji ri nde ñuu jicá, te tu ní cajēhe núu ró vehe ndōo rī. Ni cumanī sahma ri, te tu ní cajēhe ró. Ni cocuhū rī, ni ine ri vecāa, te tu ní jecondēhe ró ruhū. Súcuān cahān

yā jín ñayuu cáhīn lado jecó yá. ⁴⁴ Yūcuán na te cahān ñayuu un jín yá: ¿Na quiṽi ní cajito na níhín jēe jī ní sóco, chí jēe jichí ní ndute, chí jēe ní quiji ní ndé ñuu jicá, chí jēe cúmanī sahma ní, chí jēe cuhú ni, chí jēe íne ní vecāa, te tu ní cajēhe na jēe cúmanī nuū ní? Achi i. ⁴⁵ Yūcuán na te cahān yā jín i: Jendaá cahán rī jín ró, jeē tu ní casáha ró súcuān jín ni ĩn tācá hermano rī jeē cácandíje, vēsú ñayuu núu ga cúu i. Núu súcuān te suni nuū maá rí cúu jeē tu ní casáha ró, achi yā. ⁴⁶ Yūcuán na te quingoo ñayuu un núu ndóho i ní cáni. Te ñayuu váha un quiṽicoo i nuū cótecu i ní cáni. Achi Jesús.

Jeē ní casquijnáhan de jnūhun jeē jnī de Jesús

(Mr. 14.1-2; Lc. 22.1-2; Jn. 11.45-53)

26

¹ Te nuū ní ndihī ni cahān Jesús tāca jnūhun yáha, te ni cahān yā jín tēe cáscuáha jín yá:

² Je cájini rō jeē uū na quiṽi te coo vico pascua. Te ruhū, Yaā ní nduu tēe, nastúu i ruhū jeē cúu rī jicá cruz, achi yá.

³ Yūcuán na te sutū cácuajénu, jín tēe cástéén tutu ley, jín táca tēe jénu jeē cándacu jniñu nuū ñayuu hebreo, ni candutútú de ini patio vehe palacio maá sūtū kujénu ga jeē naní Caifás. ⁴ Te ni canda-jnūhún de ndese jnī de Jesús jín jnūhun stáhú, te cahni de ya. ⁵ Te ni cacahān de:

Ma jnī yó de máa quiṽi vico, chi ndonda ñayuu siquī yō, achi de.

Jnūhun ñahan jeē ní chuhun perfume xinī yā

(Mr. 14.3-9; Jn. 12.1-8)

⁶ Te íne Jesús ñuu Betania vehe Simón, tēe ni ndoho cuehyī stehyú. ⁷ Te ni quee ĩn ñahan nuū yā, ndáhá ña ĩn frasco yuū luu jeē ñuhún aceite perfume jeē yóhyo yahu ndéé. Te ni chuhun ña xinī yā níni jēe yéji yā staā. ⁸ Te ni cajito tēe cáscuáha jín yá, te ni caquitī ni de, te ni cacahān de:

¿Najehē cúu jeē náa saá-ni perfume jiñā? ⁹ Chi cuu xícó yahu yó núu, te cuāha yo xúhun núu ñayuu ndahú. Achi de.

¹⁰ Te ni jini Jesús jnūhun cácahān de. Te ni cahān yā jín de:

¿Naun cásáha ró jéē nácani uhū ni ñahan yáha? Chi ñin jniñu váha cúu jeē ni sáha ña jíin rí. ¹¹ Chi níni coyūcu ñáyuu ndahú jíin ró, te ruhū chi tuá condee rí jíin ró. ¹² Chi jeē ní chuhun ña perfume yáha ruhū, suu cúu jeē ni sátūhva ña ruhū nde quiví quíndūji ri. ¹³ Jendaá cahán rí jíin ró jeē ní cáhnu ñayiví ndé-ni cúu nuū cuité jnūhun yáha jéē jnáma ri ñayuu, suni nacani i jnūhun jeē ni sáha ñahan yáha, návaha cocuhun ni ñayuu ña, áchí yá.

Jeē ní nastúu Judas yā
(Mr. 14.10-11; Lc. 22.3-6)

¹⁴ Yūcuán na te ñin jeē ndihúxí uū tēe cáscuáha ún, nání de Judas Iscariote, ni jehēn de nuū sutú cáscujéhnū. ¹⁵ Te ni cahān de jíin:

¿Nasaa cuāha ní nuū ná, te na nástúu ná de nuū ní? áchí de.

Te ni cajēhe ocō uxí xūhun plata nuū de.

¹⁶ Yūcuán na te nde quiví un ní quejéé de ndúcú de modo ndese nastúu de ya nuū sutú jijnáhan.

Jeē ní jequin yā Cena yā
(Mr. 14.12-25; Lc. 22.7-23; Jn. 13.21-30; 1 Co. 11.23-26)

¹⁷ Te máa quiví jeē quejéé vico jeē cáyeji ñayuu pan jeē tú na levadura yíhi, te ni quijicoo tēe cáscuáha un nuū Jesús. Te ni cacahān de jíin yá:

¿Ndé nuū cuní ni jéē quísatūhva ná cuxíni ní vico pascua? áchí de.

¹⁸ Te ni cahān yā:

Cuángoo nde ñuu, vehe tēe jeē jé ni cacahān yō, te cahān rō jíin de: Achí máa Maestro jeē ní cuyajni quiví cuu yā. Te vijna te caji yā vico pascua ini vehe ní jíin tēe cáscuáha jíin yá, achí rō. Achí yá.

¹⁹ Te tēe cáscuáha jíin yá, ni casáha de nájñūhun ni ndacu Jesús jniñu nuū de, te ni casátūhva de jeē cuxíni ya vico pascua.

²⁰ Te jeē cuácuaa, te ni quee yā, te ni cucōo ya mesa jíin ndihúxí uū tēe cáscuáha jíin yá.

²¹ Te níni yéji yā jíin de te ni cahān yā:

Jendaá cahán rí jíin ró jeē ñin rōhó nastúu ruhū vijna, áchí yá.

²² Te ni cacucuíhyá ndasí ni de. Te ná ñin ná ñin de ni cacajnūhún de ya:

¿A sáña cúu? áchí de.

²³ Te ni cahān yā:

ñin rōhó jéē cáyeji cáhnu jíin rí ñin cohō, suu ró nastúu ruhū. ²⁴ Te ruhū, Yaā ní nduu tēe, jendaá cúu jeē quihín rí cuu rí, nájñūhun yósó jnūhun rí nuū tútu iī. Te nacā xeēn ndoho tēe nastúu ruhū. Váha ga núu tu ní cácu tēe un núu, áchí yá.

²⁵ Yūcuán na te ni cahān Judas, tēe nastúu ya:

¿A sáña cúu, Maestro? achí de.

Te ni cahān yā jíin de:

Suu ró cúu, áchí yá.

²⁶ Te níni jéē cáyeji de jíin yá, te ni quihin ya pan, te ni nacuatáhú yá, te ni tahú cuéchi yá, te ni jēhe ya nuū tēe cáscuáha jíin yá. Te ni cahān yā:

Caji rō jijnáhan ró, chi yáha cúu yiqui cúñu rí, achí yá.

²⁷ Yūcuán na te ni quihin ya ñin copa ndūxi uva, te ni nacuatáhú yá, te ni jēhe ya nuū de. Te ni cahān yā:

Coho jijnáhan ró. ²⁸ Chi yáha cúu niñí rí jeē cuáha ri jeē cúu contrato jeé, te cati jeē ndundoo cuéchi cuehē ñayuu, te coo jnūhun cáhnu ni nuū cuéchi i. ²⁹ Te cahán rí jíin ró jeē ndé vijna te ma cóho ga rí ndūxi ndehē uva yáhá, chi nde quiji quiví ndacu Tátá rí jniñu ní ñayiví, te sáa te coho tucu ri jíin ró jijnáhan ró. Achí yá.

Jeē ní cachi yā jeē yūhu Pedro cahān de jeē jini de ya

(Mr. 14.26-31; Lc. 22.31-34; Jn. 13.36-38)

³⁰ Te ni jita ya ñin yaa iī jíin de jijnáhan de. Te ni quenda ya cuahān yā jíin de nde yucu Olivos. ³¹ Yūcuán na te ni cahān yā:

Ndivii rō nayūhu ró jeē siquí ruhū jecuāa vijna. Chi suhva je yósó jnūhun rí nuū tútu iī, ni cahān Yaā Dios: Cuāha ri jnūhun jeē cáhni ñayuu tēe ndíto lanchi, te lanchi un cuitē núu ti jeē yūhu tí, achí. ³² Te jeē nátecu rí, te xihna ruhū cosnūu rí quihín rí región Galilea, te sáa te najinūcoo ró, áchí yá.

³³ Yūcuán na te ni cahān Pedro:

Vēsú ndihí de na náyūhú de, te máa ná chi ma náyūhú cuiti ná, áchí de jíin yá.

³⁴ Te ni cahān yā jíin de:

Jendaá cahán rí jíin ró jeē jecuāa vijna, nde ná tu cana líhli, te yūhu ró jeē jniñ ñayuu rohó, te uní jínu cahān rō jeē tu jíin rō ruhū, achí yá.

³⁵ Te ni cahān Pedro jíin yá:

Vēsú núu cuu na jíin ní, te ma cahán cuiti na jéē tu jíiní na níhín, áchí de.

Te suni súcuan ni cacahán ndihi tēe cáscuáha jíin yá.

Jeē ni jicān tahú yā nuū huerto Getsemani
(Mr. 14.32-42; Lc. 22.39-46)

³⁶ Yūcuán na te ni jinū Jesús jíin tēe cáscuáha jíin yá ñn lugar nuū naní Getsemani. Te ni cahán yā jíin de:

Yáhá-ni cucōo ró, te na quihín rī yūcuan cáscān tahú rī, achí yá.

³⁷ Te ni jeca ya Pedro jíin ndindúú séhe Zebedeo cuahán yā jíin de. Te ni quejéé yá cucuíhyá ndasí ni yā te cúxií ni yā jeē quíji jnūndóho siquí yā. ³⁸ Yūcuán na te ni cahán yā jíin de:

Yōhyo cucuíhyá ni rī, te ndúcú sáha jeē cúu rī. Yáhá condetu ró te condito ró jíin rī.

³⁹ Te ni jica ya jecu gā, te ni jecuiñi yití yá ni jequin ya nuū yā nuū ñúhun, te ni jicān tahú yā suhva nuū Yaā Dios:

Tátá maá ná, núu cuu te tejiyo ní jnūndóho yáha jéē ma quíji siquí ná. Te nasūu jéē cuní maá ná, chí jeē cuní maá ní na cóo, áchí yá.

⁴⁰ Yūcuán na te ni ndee yā nuū ndinúni tēe cáscuáha jíin yá, te ni jito ya jeē cáquixí de. Te ni cahán yā jíin Pedro:

¿A tu ní cánda ró condito ró jíin rī vēsú ñn hora? ⁴¹ Coo ndito ni rō te cacān tahú rō jeē chindéé ñáhán yá rohó jéē ma sáha ró cuéchi jeē coto ndee jeneé rohó. Chí cuní ndije ánuá rō squícu vāha ró, te yiquí cúñu rō chí tu fuerza, achí yá.

⁴² Te ni jehēn tucu ya vuelta uū, te suhva ni jicān tahú yā:

Tátá maá ná, te núu ma cúu cujiyo jnūndóho yáha jeē ma ndóho ná, te na cóo jeē cuní maá ní núu súcuan, achí yá.

⁴³ Te ni ndee tucu ya nuū de, te ni jito ya jeē cáquixí tucu de, chí yōhyo cájií de máhná. ⁴⁴ Te ni stóo ya de, te cuahán tucu ya cuacacān tahú yā vuelta unī. Te suni jnūhun yūcuan ní cahán yā. ⁴⁵ Yūcuán na te ni ndee tucu ya nuū de jíin de, te ni cahán yā jíin de:

Vijna te cusū rō te ndetātu ró. Te je ni quee hora, te ruhū, Yaā ní nduu tēe, natūu rī te jñi tēe cáhiyo cuéchi ruhū. ⁴⁶ Ndocuiñi

jijnáhan ró, chí je vēji tēe nastúu ruhū, te quihín yō jíin de, áchí yá.

Jeē ní cajñi de Jesús

(Mr. 14.43-50; Lc. 22.47-53; Jn. 18.2-11)

⁴⁷ Te sá cáhán gā yā súcuan, te ni quee-ni Judas, ñn jnáhan jeē uxí uū tēe cáscuáha jíin yá. Te vējicoo cuehē tēe jíin de, cándaha de espada jíin yujnu. Chí sutū cácujeñnu jíin táca tēe jéñnu cándacu jniñu nuū ñáyuu hebreo, ni catají tēe ún. ⁴⁸ Te Judas, tēe nastúu ya ún, je ni jēhe de ñn seña nuū tēe un jíin de, chí ni achi de:

Tēe jeē téchūhu rí un cúu. Te jñi ró jíin de, achí de.

⁴⁹ Te ni quee-ni de nuū Jesús, te ni cahán de:

Ta ni cuaa, Maestro, achí de.

Te ni techūhú de ya. ⁵⁰ Te ni cahán Jesús jíin de:

Amigo, ¿na jniñu vēji ró? áchí yá.

Yūcuán na te ni jinūcoo táca gā tēe ún, te ni cajñi de Jesús.

⁵¹ Te ñn tēe jeē cáhiin jíin Jesús, ni tava de espada de, te ni jehnde de sōho ñn mozo maá sūtū cujéñnu ga. ⁵² Yūcuán na te ni cahán Jesús jíin de:

Nachuvāha espada rō, chí táca jéē cájeñáhan jíin espada, suni jíin espada cuu.

⁵³ ¿Te á tu cájini rō jeē cuu cacān tahú rī nuū Tatá rī, te vijna ñúhún tají yá víhyá gā uxí uū mil ndajéhé andiví jeē jnama ruhū? ⁵⁴ Te núu súcuan, ¿te ndese cuu squícu jnūhun cáhán tutu ñi jeē cánuú ndoho rí súcuan? áchí yá.

⁵⁵ Yūcuán na te ni cahán yā jíin ñáyuu cuehē ún:

¿Te va tēe cuíhná cúu rí jeē vējicoo ró jíin espada jíin yujnu jeē jñi ró rúhū jeē súcuan. Táca quívī ni cucōo rí jíin ró jijnáhan ró ñni templo cáhnu, ni steén rī jnūhun, te tu ní cájñi ró rúhū. ⁵⁶ Te súcuan cáháha ró návāha na squícu jeē cáhán tutu ñi jeē ní catee tēe ni canacani jnūhun Yaā Dios, achí yá.

Yūcuán na te ndihi tēe cáscuáha jíin yá, ni castóo de ya, ni cajinu de cuango de.

Jeē ní indichi Jesús nuū junta tēe cácujeñnu ga

(Mr. 14.53-65; Lc. 22.54-55, 63-71; Jn. 18.12-14, 19-24)

57 Te tēe ni cajni Jesús, cuango de jín yá nuū Caiás, tēe cúu sutū kujénu ga. Te yūcuan cáhīn tūtú tēe cástēen tutu ley jín táca tēe jénu cándacu jniñu. 58 Te Pedro chi jíca-ni ndíquín de ya, te ni jinū de patio sutū kujénu ga. Te ni quívi de ini patio, te ni cucōo de jín táca policía, návāha coto de ndese coo siquī yā.

59 Te sutū cácujeñu jín táca tēe jénu jín ndíhi tēe cásaha junta kujénu ga, ni canducú de tēe cahān jnūhun yáá síquī Jesús, chi cahni de ya cácuni de. 60 Te vēsú ni quecoo cuehē ñayuu cácahān yaá, te tu ní cánihīn de cuēchi siquī yā jeē cáhni de ya. Te jeē sándihí te ni quecoo uū testigo jeē cahān yaá síquī yā. 61 Te áchí:

Tēe yáha ní cahān de jeē cuu canu de templo Yaā Dios, te nuū uní-ni quívi te nucondichi sáha de, áchí.

62 Yūcuán na te ni ndocuiñi maá sūtū kujénu ga, te ni cahān de jín yá:

¿Naun tu cáhān cuíti rō? ¿A íyó ndáa jeē cácahān tēe yáha síquī rō? Achí de.

63 Te Jesús tu ní cáhān cuíti yā. Te ni cahān maá sūtū kujénu ga:

Ndácu ri jniñu nuū rō jeē cahān ndaā rō cuni nahín maá Yaā Dios, Yaā técu. Cachi cají te núu máá ró cúu Cristo, Sēhe Yaā Dios, achí de jín yá.

64 Te ni cahān yā:

Suu ri cúu, nájnūhun cáhān rō. Te na cástūhun rí nuū rō jijnáhan ró jēe táca quívi jeē quíji te coto ró rúhū, Yaā ní nduu tēe, condee rí lado váha Yaā íyó poder. Te coto ró jēe ndíji ri ichi ándiví jín vícō. Achí yá.

65 Yūcuán na te sutū kujénu ga ni jehnde de sahma de jeē quití ndasí ni de, te ni cahān de:

Tēe yáha chi cáhān de jnūhun ndevāha jeē quití ni Yaā Dios, chi sáha de máá de Sēhe Yaā Dios. ¿Ndé jini ñúhún gá yō testigo núu súcuan? Chi je ni cajini ró jnūhun ndevāha cáhān de. 66 ¿Te ndese cájeni ni rō? achí de.

Te ni cacahān tēe cuehē ún:

Cuēchi cúu jeē cahān de súcuan, te jini ñúhún cuu de, áchí.

67 Yūcuán na te ni catesihí de nuū yā, te ni cacani de ya. Te sava ga de ni cacatu de nuū yā. 68 Te ni cacahān de:

Te núu Cristo cúu ró, te cachi rō ndé ñi cúu jeē ní cani rōhó, áchí de.

Jeē ní cachi Pedro jeē tu jín de ya
(Mr. 14.66-72; Lc. 22.56-62; Jn. 18.15-18, 25-27)

69 Te níni jēe súcuan cúu, te Pedro néne de nuū quehe ini patio. Te ni quee ñi ñahan jéjniñu vehe ún, te ni cahān ña jín de:

Róhó chi suni ni jica ró jín Jesús tēe Galilea, achí ña.

70 Te máá de tu ní cáchi de, chi ni cahān de ni cajini ndíhi ñayuu:

Tu jín rí na jnūhun cáhān rō, achí de.

71 Te ni quenda de yéhyí núu quehe, te ni jito ñga ñahan nuū de. Te ni cahān ña jín ñayuu cáhīn yūcuán:

Tēe yáha chi suni ni jica de jín Jesús, tēe ñuu Nazaret, achí ña.

72 Te ñga jínu tu ní cáchi tucu de, chi sa ni cahān teyí de:

Tu jín rí tēe ún, áchí de.

73 Te ni cunúu jecu gā, te ñayuu cáhīn yūcuan ní quecoo i nuū Pedro, te ni cacahān i:

Jendaá ndije jeē suni jnáhan tēe un cúu ró, chi ndijin cahān rō jeē tēe Galilea cúu ró, áchí i.

74 Yūcuán na te ni quejé de cáhān teyí de jeē na cóndee cuēchi siquī de núu tu cáhān ndaā de:

Tu jín cuíti rí tēe ún, áchí de.

Te ni cana-ni líhli. 75 Te ni nucūhun ni de jnūhun ni cahān Jesús jín de: Nde ná tu cana líhli, te yūhu ró te cahān rō uní jínu jeē tu jín rō ruhū. Te ni quenda de cuahān de, te yōhyo ni ndahyū de jeē ní cachi de jeē tu jín de ya.

Jeē cuango de jín yá nuū Pilato
(Mr. 15.1; Lc. 23.1-2; Jn. 18.28-32)

27

1 Yūcuán na te ni cundijin. Te táca sūtū cácujeñu jín táca tēe jénu jeē cándacu jniñu nuū ñayuu hebreo, ni casquíjnahān de jnūhun ndese sáha de jeē cuu Jesús. 2 Te ni cajihni de ya, te cuango de jín yá nuū Poncio Pilato, tēe cúu gobernador.

Jeē ni jhī Judas

3 Yūcuán na te Judas, tēe ni nastúu ya un, ní jito de jeē ní cunīhin siquī yā jeē cúu yā. Te ni jnahuhū ni de, te ní nacuāha de ocō uxī xūhun plata jeē ní níhīn de nuū sutū

cácujéhnu jíin núū tāca téé jéhnu. ⁴ Te ni cahān de jíin:

Cuēchi ni sāha ná jēē ní nastúu ná ĩn tēe cuu de, te tú na cuēchi de.

Te máá sūtū un ní cacahān de:

¿Vé jítú ni ruhū? Cuēchi máá ró cúu. Achí de.

⁵ Te ni scāne Judas xūhún un ini templo. Te ni quenda de cuahān de, te ni scuéhne de máá de.

⁶ Te sutū CÁCUJÉHNU ni canastútú de xūhún un, te ni cacahān de:

Ma cúu chuhun yó xūhun yáha ini yejnú nuū cásocō ñayuu, chí xūhun jēē ni jéconaa jēē cúu ĩn tēe cúu, áchí de.

⁷ Yūcuán na te ni casándaā de jēē xūhun yúcuán cuaan de ñuhun jēē naní Lugar Ñuhun Quíxin, návāha yūcuán quindūji ñayuu ñuu jicá. ⁸ Jēē yúcuán cúu jēē ndé vijna nání ñuhun ún Lugar Ñuhun Niñi. ⁹ Te sūcuán ni squícu jnūhun ni cahān Jeremías, tēe ni nacani jnūhun Yaā Dios nde jenahán: Ni caquihin de ndihóco uxī xūhun plata, te sūcuán-ni cúu ĩn yāhu jēē ní casáha ñayuu Israel cuenta jēē ndeé yā nuū i. ¹⁰ Te jíin xūhun un ní cajeen de ñuhun quíxin, nájnūhun ni ndacu máá Jítóho yō Yaā Dios jniñu nuū rī. Achí Jeremías.

Jeē ní indichi Jesús nuū Pilato

(Mr. 15.2-5; Lc. 23.3-5; Jn. 18.33-38)

¹¹ Te nuū ní jinūcoo de jíin Jesús nuū gobernador, tēe cúu Pilato, te ni cajnūhún de ya:

¿A máá ró cúu Rey ñayuu hebreo? achí de.

Te ni cahān Jesús:

Suu rī cúu, nájnūhun cáhán rō.

¹² Te sutū CÁCUJÉHNU jíin téé jéhnu cándacu jniñu, ni cacahān de cuēchi siquī yā. Te tú na vé ni cáhán cuíti yā. ¹³ Yūcuán na te ni cahān Pilato jíin yá:

¿A tu jíini ró jēē cacahān de cuehē cuēchi siquī rō? achí de.

¹⁴ Te tu ní cáhán cuíti yā ni ĩn jnūhun jíin de. Te nahán ní naa ni gobernador jēē tú na vé ni cáhán yā jíin de.

Jeē ní cundaā jēē cúu yā

(Mr. 15.6-20; Lc. 23.13-25; Jn. 18.38-19.16)

¹⁵ Te íyó costumbre gobernador jēē quivī víco un siaá de ĩn tēe íne vecāa, núu na-ni tēe cáconi ñayuu. ¹⁶ Te suu quivī un íyó ĩn

tēe íne vecāa, nání de Barrabás, te je ni jité núu jnūhun jēē ni sāha de cuēchi xeēn. ¹⁷ Te nuū ní candutútú ñayuu, te ni cahān Pilato jíin i:

¿Ndé téé cáconi rō jēē siaá rī vijna: á Barrabás, chí Jesús jēē cúu Cristo, Yaā ní tají Yaā Dios? achí de.

¹⁸ Sūcuán ni cahān de chí cúní de siaá de Jesús. Chí je ni jecūhun ni de jēē ní cacucuésún ni tāca sūtū un cájito de ya, te jēē yúcuán ní quiijicoo jíin yá nuū de.

¹⁹ Te níni jēē néne Pilato silla nuū sándaā de jniñu, te ñasihí de ni tají ña jnūhun nuū de: Ma quivī nduu rō jíin ñayuu siquī téé ndaā jiñā, chí yōhyo ni siūhu jéni ruhū cuni jēē siquī de, áchí ña.

²⁰ Te sutū CÁCUJÉHNU jíin táca téé jéhnu, ni cascáhán de ñayuu jēē na cácan i jēē siaá de Barrabás, te na cúu Jesús. ²¹ Yūcuán na te ni cajnūhún tucu gobernador:

Jeē uú de, ¿ndé ĩn de cáconi rō jēē siaá rī? achí de.

Te ni cacahān i:

Siaá ni Barrabás, achí i.

²² Te ni cajnūhún Pilato:

Núu sūcuán te ¿ndese cáconi rō jēē sāha rī jíin Jesús, tēe cúu Cristo? achí de.

Te ni cacahān ndihi i:

Cata caa ní de jicā cruz, na cúu de, áchí i.

²³ Yūcuán na te ni cahān Pilato:

¿Na cuēchi ni sāha de núu sūcuán? achí de.

Te ñayuu un ní cacana jee ndasí i:

Cata caa ní de jicā cruz, na cúu de, áchí i.

²⁴ Te ni jini Pilato jēē tu cūndeyí de jíin ñayuu, chí sa víhyá gā cácuvaā i. Te ni ndacu de jniñu jēē na quíji ndute, te ni nandahá de nuū ñayuu cuehē ún. Te ni cahān de:

Jeē nándahá rí yāha cúu seña jēē tú na cuēchi condee siquī rī jēē cúu tēe vāha yāhá. Chí siquī máá ró jijnáhan ró na cóndee. Achí de.

²⁵ Te ni cacahān ndihi ñayuu:

Suu siquī máá ná jíin siquī séhe ná na cóndee cuēchi jēē cúu de, áchí i.

²⁶ Yūcuán na te ni siaá de Barrabás. Te ni ndacu de jniñu jēē na cáni táca soldado un Jesús, jíin jēē cáta caa de ya jicā cruz.

²⁷ Yūcuán na te soldado un cuango de jíin Jesús ini palacio. Te ni cacana de ndihi jnāhan de ni candutútú núu yā. ²⁸ Te ni caquenehen de sahama ya, te ni cachuhun

de ya ñin sahma cuehé jeē cúu sahma rey. ²⁹ Te ni casáha de ñin corona ñnu, ni cachuhun de xinī yā. Te ni cachihī de ndaha váha ya ñin yujnu jeē nájñuhun bastón. Te ni casácatā de nuū yā, chí ni cajecuiñī yití de, cásáha de jeē chíñúhún de ya.

Nacā jeē váha rey cúu Rey ñayuu hebreo, achí de.

³⁰ Te ni cateshí de nuū yā. Te ni caquihin de yujnu jeē ní cachihī de ndaha ya, te ni cacani de xinī yā. ³¹ Te nuū ní cuu ni casácatā de nuū yā, te ni catava de sahma cuehé un, te ni canachuhun de ya sahma máá yá. Te cuangoo de jíin yá jeē cata caa de ya jicā cruz.

Jeē ní cacata caa de ya jicā cruz

(Mr. 15.21-32; Lc. 23.26-43; Jn. 19.17-27)

³² Te nuū ní quendacoo soldado un jíin yá, te ni canajnáhan de jíin ñin tēe ñuu Cirene, naní de Simón. Te ni catejñíñu de tēe un jēe cóndiso de cruz yā.

³³ Te ni jinūcoo de ñin lugar nuū naní Gólgota, jeē cuní cahān Lugar Yiquí Xiní. ³⁴ Te ni cajēhe de vino jeē ní sácā núu jíin ñin jeē uvuá jeē cóho ya. Te nuū ní jito ndee ya, te tu ní cuní yā coho ya.

³⁵ Te nuū ní cuu ni cacata caa de ya jicā cruz, te ni casáha de sorteo jeē siquí ndese nihīn ñin ñin de sahma ya. Te súcuan ni squícu jñuhun ni tee tēe ni nacani jñuhun Yaā Dios jenahán: Ni casáha de sorteo siquí ndese nihīn ñin ñin de sahma ri, achi yā, achí tutu. ³⁶ Yūcuán na te ni cacucōo de yūcuan jēe cóto de nde cuu yā. ³⁷ Te ni catee de ñin jñuhun xinī cruz yā jeē cahán na siquí ni jíhī yā: Yāha cúu Jesús, Rey ñayuu hebreo, achí.

³⁸ Te suni ni cacata caa de uū tēe cuíhná núu uū gā cruz, ñin de lado váha ya, te inga de lado jecó yá. ³⁹ Te ñayuu cáyāha yūcuan cáscuicó i xinī i, te cácahān neé i:

⁴⁰ Róhó chí cáhán rō jeē cánu rō templo cáhnu, te nuū uní quivī te nacani ró. Núu súcuan te jnama ró máá ró vijna. Te núu Sēhe Yaā Dios cúu ró, te nuu ró jicā cruz vii, achí i.

⁴¹ Te sutū cácujuhnu, jíin tēe cástéén tutu ley, jíin tēe grupo fariseo, jíin tēe jéhnu jíjñáhan de, suni súcuan ni cacahān catá de, te achí de cácahān máá de:

⁴² Núu inga ñayuu ni jnama de, ¿te naun tu cúu jnama de máá de vijna? Núu Rey ñayuu Israel cúu de, te na núu de jicā cruz, návāha candíje yó de. ⁴³ Ni candíje de Yaā Dios, te na jnáma ya de vijna te núu cúndáhú ni yā de, chí ni cahān de jeē cúu de Sēhe ya. Achí de jíjñáhan de.

⁴⁴ Te tēe cuíhná jeē cándita caa xiin ya, suni súcuan ni cacahān neé de.

Jeē ni jíhī Jesús

(Mr. 15.33-41; Lc. 23.44-49; Jn. 19.28-30)

⁴⁵ Te nuū ní cuu cahuxī uū, te ni cunee ní cáhnu nde cahunī. ⁴⁶ Te nájñuhun cahunī, te ni cana jee Jesús:

Elí, Elí, ¿lama sabactani? achí yá. Te jñuhun un cuní cahān: Yaā Dios maá ná, Yaā Dios maá ná, ¿naun ni stóo ní sáña?

⁴⁷ Te sava ñayuu cáhīn yūcuan ní cajini i jñuhun ún, te ni cacahān i:

Tēe yáha cána de xinī Elías, tēe ni nacani jñuhun Yaā Dios jenahán, achí i.

⁴⁸ Te ni jinu-ni ñin tēe, ni jequihin de ñin cachī, te ni chundaji de nuū vinagre iyá. Te ni tee de xinī ñin yujnu, te ni tee de yuhu ya jeē coho ya. ⁴⁹ Te sava ga de ni cacahān:

Condetu ró, na cóndēhe yó núu quiji Elías jnama de chí tuú, achí de.

⁵⁰ Te Jesús ni cana jee ya inga jínu, te ni jihī-ni ya. ⁵¹ Te sahma ndíta caa jeē ndihyú cuarto iñi ini templo cáhnu, ni ndatā-ni sava sava nde xinī te nde nuū jehé. Te ni jñāa, te ni catahū sáva toto. ⁵² Te ni cananune yaū nuū yíndūji ndīyī. Te cuehē ndīyī jeē ní cacandíje i Yaā Dios, ni canatecu i. ⁵³ Te nuū ní natecu Jesús, te ni quendacoo i nuū yíndūji i. Te ni ndīvicoo i ini ñuu iñi Jerusalén, te cuehē ñayuu ni cajito nuū i.

⁵⁴ Te ná ni jihī Jesús, te tēe cúu capitán jíin tēe cáhīn jíin de jeē cándito de nde cuu yā, ni cajini de jeē ni jñāa, jíin táca gá jñiñu ní cuu. Te yōhyo ni cayūhú de, te ni cacahān de:

Jendaá ndije jeē Sēhe Yaā Dios cúu tēe yáha, achí de.

⁵⁵ Te yūcuan cáhīn cuehē ñahan, cándēhe jíca ña. Te suu ñahan un ní candiquīn ña Jesús nde Galilea, vējicoo ña cájeñíñu ña nuū yā. ⁵⁶ Te unī ñahan un cácuu María ñuu Magdala, jíin María naná Jacobo jíin José, jíin náná ndíndúú séhe Zebedeo.

*Jeē ní quindūji Jesús**(Mr. 15.42-47; Lc. 23.50-56; Jn. 19.38-42)*

⁵⁷ Te nuū ní ini quivī ún, te ni quee ñn tēe cúcá, nání de José, te tēe ñuu Arimatea cúu de. Te suni tēe ni scuáha jíin Jesús cúu de. ⁵⁸ Tēe un ní jehēn de nuū Pilato, te ni jicān de yiqui cúñu Jesús. Te ni ndacu Pilato jniñu jeē na cuáha nuū de. ⁵⁹ Te José ni quihin de yiqui cúñu yā, te ni chusúcun de ñn sahma cuitá íyó ndoo. ⁶⁰ Te névaha de ñn yaū jeē ní caan jeē jíicā ñn cava, nuū ná tu quindūji ndiyi. Te yūcuan ní chindūji de ya. Te ni jesi de ñn yuū cáhnu yuhu yáú un, te cuahān de. ⁶¹ Te María ñuu Magdala, jíin ñnga María, cáyūcú ña ichi núu nuū yindūji ya.

Jeē ní cacondito soldado nuū yindūji ya

⁶² Te ni cuu tācá jniñu yáha máa quivī jeē casátuhva ñayuu jeē quiji quivī ndétátú. Yūcuán na te ni cundijin maá quivī ndétátú. Te sutū cácujuhnu jíin tēe grupo fariseo ni jengoo de nuū Pilato. ⁶³ Te ni cacahān de:

Cánucūhun ni na jēe nde na técu tēe stáhú néé un te ni cahān de jeē nátecu de nuū uní quivī. ⁶⁴ Núu súcuan te ndacu ní jniñu na coto vāha tācá soldado yuhu yáú un nde núu ni yāha uní quivī. Chi núu tuú te sanaa te quijicoo tēe ni cascuáha jíin de, te tava cuīhná de ndiyi ún jecuáa, quingoo de jíin. Yūcuán na te cachi de nuū ñayuu jeē ní natecu tēe ún. Te cáhú gá cuu jnūhun stáhú yūcuan vēsú jeē xihna ñūhún. Achí de.

⁶⁵ Te ni cahān Pilato:

Yāha cáhīyo soldado. Cuángoo jíin de, te sácutú vāha ró yuhu yáú un, te coto vāha ró, núu ndese vāha ga cuu sáha ró. Achí de.

⁶⁶ Te cuangoo de, te ni casácutú de yuū jeē ndihyú yuhu yáú nuū yindūji ya, te ni castūn ñihin de. Te ni castóo de tācá soldado un cándito.

*Jeē ní natecu Jesús**(Mr. 16.1-8; Lc. 24.1-12; Jn. 20.1-10)***28**

¹ Te ni yāha quivī ndétátú un, te ni cundijin quivī domingo. Te María ñuu Magdala jíin ñnga María un, ní jecondēhé ña nuū ní yindūji Jesús. ² Yūcuán na te ñn sanaa-ni te ni jnāa ñihin ndasí. Chi ñn ndajéhé maá Jítóho yō Yaā Dios ni cuun ya ichi ándiví,

ni quee ya nuū ní yindūji Jesús. Te ni stāa ya yuū ndihyú yuhu yáú un, te ni cucōo ya siquī. ³ Te ndíndēe nuū yā nájñūhun taja, te sahma ñūhun ya yaa quiyi nájñūhun yuhvā volcán. ⁴ Te soldado cándito yūcuan ní quisi i de jeē cáyūhú de cájito de ya. Te ni cacuu ndiyi de. ⁵ Te ni cahān ndajéhé jíin ndíndúú ñahan ún:

Ma yūhu ró, chi jíin rī jeē vécondēhe ró Jesús, Yaā ni jíhī jíicā cruz. ⁶ Tuá yā yāhá, chi je ni natecu yā, nájñūhun ni cahān yā. Nehen condēhe ró nuū ní cachindūji de ya. ⁷ Te yachī quingoo ró, te cachi rō nuū tēe cáscuáha jíin yá jeē ní natecu yā. Te xihna gā maá yá jinū Galilea, te sáa te najinūcoo de. Te yūcuán coto de nuū yā. Achí rō na cúni de. Je ni castūhun rí nuū rō, achí ndajéhé.

⁸ Te ni quendacoo ña nuū ní yindūji ya, te yachī cuangoo ña. Te cáyūhú ña, te suni yōhyo cácusī ña. Te ni cajinu ña cuacastūhún ña nuū tēe cáscuáha jíin yá. ⁹ Te níiní cuángoo ña, te ni quee-ni Jesús nuū ña, te ni cahān yā jíin ña. Te ni quecoo ña nde nuū yā, te ni canundee ña jehē yā, te ni cachiñūhún ña ya. ¹⁰ Te ni cahān yā jíin ña:

Ma yūhu ró jijnáhan ró. Cuángoo te castūhun ró nuū tācá hermano rī, tēe ni cascuáha jíin rí, jeē na núngoo de nde Galilea, te yūcuán coto de nuū rī. Achí yá.

Jnūhun ní cacahān soldado

¹¹ Te níiní cuángoo ña, te sava soldado jeē ní condito ún, cuánungoo de nde ñuu. Te ni cacastūhún de nuū sutú cácujuhnu tācá jniñu jeē ní cuu. ¹² Te sutū cácujuhnu ni candutútú de nuū táca tēe jéhu cándacu jniñu, te ni casquijnáhan de jnūhun. Yūcuán na te ni cajēhe de cuehē xūhun núu soldado jijnáhan. ¹³ Te ni cacahān de jíin:

Cahān rō jijnáhan ró jēe tēe cáscuáha jíin de ni quijicoo jecuáa, te ni catava cuīhna ndiyi un níiní cáquixī rō, achí rō. ¹⁴ Te núu na cúni gobernador jnūhun yāha, te máa rí quiscahān rī de, návāha tú ñihīn rō castigo jijnáhan ró. Achí de.

¹⁵ Te soldado un ní caquihin de xūhún un, te ni cacachi de nájñūhun ni cacahān jíin de. Te nde vijna chi súcuan cacahān ñayuu hebreo nájñūhun ni cacahān soldado un.

Jeē ní tejníñu ya de nacani de jnūhun
(Mr. 16.14-18; Lc. 24.36-49; Jn. 20.19-23)

¹⁶ Te ndihúxí ñn tēe ni cascuáha un cuánungoo de nde Galilea, nde yucu nuū ní cachi Jesús jeē quíngoo de. ¹⁷ Te nuū ní cajito de nuū yā, te ni cachiñúhún de ya. Te sava de tu cáandíje vāha de jeē maá yá cúu. ¹⁸ Te ni quee ya nde nuū de, ni cahān yā jíin de:

Je ni jēhe Tátá rī ndihí poder nuū rī jeē ndácu ri jniñu andiví jíin ñáyiví. ¹⁹ Núu súcuan te cuángoo nuū ñáyuu tācá nación, te stéén rō jnūhun ri nuū i návāha na cándíje i. Te scuándute ró i jeē ní cacandíje i máá Tátá jíin Séhe jíin Espíritu Santo. ²⁰ Te stéén rō nuū i jeē na cuátáhú i tācá jniñu ní ndacu ri nuū rō. Te cocuhun ni rō jeē maá rí íne ri jíin ró ní cáni nde quiví jíinu ñayiví. Achí yá. Te ni cuu. Amén.

JNUHUN VAHA NI TEE SAN MARCOS

Jnūhun Juan tēe scuándute

(Mt. 3.1-12; Lc. 3.1-9, 15-17; Jn. 1.19-28)

¹ Yāha quėjéé jnūhun vāha máá Jesucristo Sēhe Yaā Dios, jeē ní quiji ya jeē jnama ya yohó.

² Isaías, tēe ni nacani jnūhun Yaā Dios nde jenahán, súcuan ni tee de jnūhun Juan nuū tútu:

Tají rí tēe nacani jnūhun ri cosnūú de ichi núú rō, nāvāha coo tūhva ñayuu jeē jinú rō, achí Yaā Dios jíin Cristo.

³ Te tēe ún cana jee de nde nuū ñūhun téhé: Sátūhva ró máá ró jíjnáhan ró, chi quee maá Jítóho yō.

Te sáha ró jniñu ndaā, chi vēji ya, achi de. Achí Isaías. ⁴ Te Juan ni jinū de nde nuū ñūhun téhé, scuándute de ñayuu. Te cáhán de jíin i jeē na nácani ni i jeē stóo i cuēchi i te cuandute i, nāvāha cone cáhnu ni Yaā Dios nuū cuéchi i. ⁵ Te tāca ñáyuu región Judea jíin ñáyuu ñuu Jerusalén, ni quijicoo i nuū de. Te ni canacani ndaā i cuēchi i nuū Yaā Dios, te ni scuándute de i ini yūte Jordán.

⁶ Te sahma ñūhun Juan cúu ixi camello, te núhni ñn cinturón ññ chīji de. Te jeē técu de cúu tíca ndicuéhyí jíin ndúxi yocō. ⁷ Te suhva ni nacani de jnūhun:

Quiji máá Yaā cujéhnu ndasí. Chi tú na vé jéhnu cuíti cúu ri nuū yā, ni jeē cuajniñu ri nuū yā vésú ñn jniñu lúli gá nájñuhun jeē cuíta ndeyi ri ndají rí correa ndijēn yā. ⁸ Te ruhū chi jíin ndute scuándute ri rohó jíjnáhan ró, te Yaā ún chi nájñuhun jeē scuándute ya rohó cúu jeē cuáha ya Espíritu Santo condee ini anuá rō, achí Juan.

Jeē ní jendute Jesús

(Mt. 3.13-17; Lc. 3.21-22)

⁹ Te ni cuu jecu quiví, te Jesús ni quenda ya ñuu Nazaret ndañú Galilea, te Juan ni scuándute de ya ini yūte Jordán. ¹⁰ Te ná ni quenda ya nuū ndúte, te ni jito ya jeē ní nune-ni andiví, te ni cuun Espíritu Santo ni quee xiní yā, te cáa nájñuhun ñn paloma.

¹¹ Te ichi ándiví ní cahān ñn jnūhun:

Máá ró cúu Sēhe ri jeē maní ndasí rí jíin, te yōhyo cúsiñ ni rí jíin ró, achí.

Jeē ní jito ndee jexeén Jesús

(Mt. 4.1-11; Lc. 4.1-13)

¹² Yūcuán na te ni jinū Jesús nde nuū ñūhun téhé ní sáha Espíritu Santo. ¹³ Te uū xico quiví ni condee yā nuū ñūhun téhé un núú ín quiti yúcú. Te ni jito ndee Satanás yā, chi cúní jeē sáha ya cuēchi. Te nuū ní cujiyo Satanás cuahān, te ni quecoo ndajéhe Yaā Dios, ni cajejniñu nuū yā.

Jeē ní quejéé Jesús nácani ya jnūhun

(Mt. 4.12-17; Lc. 4.14-15)

¹⁴ Yūcuán na te ná ni cachune de Juan vecāa, te ni jinū Jesús región Galilea, nácani ya jnūhun vāha ndese ndácu Yaā Dios jniñu.

¹⁵ Te ni cahān yā:

Je ni jinū quiví, te je ni cuyajni jeē ndácu Yaā Dios jniñu nuū rō. Nacani ni rō jeē stóo ró cuéchi ró jíjnáhan ró, te candíje ró jnūhun jeē jnama ya rohó. Achí yá.

Jeē ní cana ya cuūn tēe jññ chācá

(Mt. 4.18-22; Lc. 5.1-11)

¹⁶ Te jica Jesús yumar Galilea cuahān yā. Te ni jito ya nuū Simón jíin ñani de Andrés. Te tēe cájniñ chācá cácuu de, te cásinga de ñunu de ini mar. ¹⁷ Te ni cahān yā jíin de:

Condiquñ ruhū na quíhín yō, te nasáha ri rohó tée nihñ cuehē ñayuu candíje ruhū, nájñuhun cániññ rō chācá, áchí yá.

¹⁸ Yūcuán na te ni castóo-ni de ñunu de, te ni candiquñ de ya.

¹⁹ Te ni jica ya jecu gā, te ni jito ya nuū Jacobo jíin ñani de Juan, sēhe Zebedeo, suni cáyúcú de ini barco de, cánachijnñ de ñunu de. ²⁰ Te suni ni cana ya de jeē cóndiquñ de ya. Te ni castóo-ni de tátá de Zebedeo ini barco un jíin mozo de, te ni candiquñ de ya cuango de.

Jeē ní quenehen ya tachí ini ñn tēe

(Lc. 4.31-37)

²¹ Te ni jinū yā jíin de ñuu Capernaum. Te quiví ndétatu ní quiví ya ini vehe ññ sinagoga, te ni steén yā jnūhun. ²² Te ni canaa ni ñayuu ni cajini i jnūhun steén yā. Chi ni steén vāha ya nuū i, chi máá yá cúu jeē ndíso jniñu siquí ndíhi. Te tēe cástéén tutu ley Yaā Dios, tu súcuan cástéén de. ²³ Te ini vehe ññ

sinagoga ñuu un íne ñn tēe jeē ñúhun tachī ini. Te ni cana cóhó de:

²⁴ ¿Naun vēji ní núū na jíjnáhan ná, Jesús ñuu Nazaret? ¿A vēji ní jēē snāā ni sáña, chí naún? Je jíni na ndé ñn cúu ní, chí Sēhe iī Yaā Dios cúu ní. Achí de.

²⁵ Te Jesús ni cahān xeēn yā jíin táchī ún:

Casi yuhu ró te quenda ró ini de, áchí yá.

²⁶ Te tachī ún xeēn ni jehni yīhí tēe ún. Te ni cana cóhó, te ni quenda ini de cuahān.

²⁷ Te ndíhi ñayuu ni cayūhú i, te cácajnūhun jnāhan i:

¿Na vé cúu jeē yáha? ¿A ñn jnūhun jéé cúu jeē yáha? Chí tēe yáha cújéhu de jeē ndácu de jniñu nde nuū tachī te quéndacoo, áchí i.

²⁸ Te yachī ni jitē núu jnūhun Jesús cuahān ñí cáhnu región Galilea.

Jeē ní nasávāha ya naná chīsó Simón Pedro

(Mt. 8.14-15; Lc. 4.38-39)

²⁹ Te ni quenda ya jíin de jíjnáhan de ini vehe iī sinagoga. Te Jesús ni jehēn yā jíin Jacobo jíin Juan nde vehe Simón jíin Andrés. ³⁰ Te naná chīsó Simón, catú ña yīhi quīji ña. Te ni cacastūhún de nuū yā jeē kuhú ña. ³¹ Yūcuán na te ni quindehe ya nuū catú ña, te ni jniñi ya ndaha ña, te ni ndonehen ya ña. Te ni quenda-ni quīji ún ña, te ni sáha ña jeē ní cayejí de jíin yá.

Jeē ní nasávāha ya cuehē ñayuu

(Mt. 8.16-17; Lc. 4.40-41)

³² Te ni queē niāndii te ni cuaa. Te ni quecoo ñayuu jíin táca ñáyuu cácuñu jíin jéē ñúhun tachī ini. ³³ Te táca ñáyuu ñuu un ní cacutútú i yéhyí un. ³⁴ Te ní nasávāha ya cuehē ñayuu cácuñu tijni nuū cuehyí, te ni quenehen ya cuehē tachī un cuángoo. Te tachī chí je cájini un yá, te tu ní jéhe ya jnūhun jeē cástūhun ndé ñn cúu ya.

Jeē ní nacani ya jnūhun región Galilea

(Lc. 4.42-44)

³⁵ Te nehen ndasí ní ndonda ya, nde yínee gā. Te ni quenda ya cuahān sīn ya yatā ñúū nuū tú ñayuu, te yūcuán ní jíicān tahú yā. ³⁶ Te Simón jíin tēe cáhīn jíin de, ni jenanducú de ya. ³⁷ Te ni cananihīn de ya, te ni cacahān de jíin yá:

Tāca ñáyuu cánanducú i níhín, áchí de.

³⁸ Te máá yá ni cahān yā:

Sa suhva na quíhín yō tāca gá ñuu íne yajni, návāha suni nacani ri jnūhun nuū i, chí jeē yúcuán ní quee rī. Achí yá.

³⁹ Te súcuán te ni jica cuu ya ñí región Galilea, ni nacani ya jnūhun ini vehe iī sinagoga táca ñuu, te ni quenehen ya tachī ini ñayuu.

Jeē ní nasávāha ya ñn tēe ndóho cuehyí stehyú

(Mt. 8.1-4; Lc. 5.12-16)

⁴⁰ Te ñn tēe ndóho cuehyí stehyú, ni quee de ni jecuiñí yití de nuū yā, te ni cahān de jíin yá:

Jíni na jeē cuu sáha ní jéē nduvāha ná, te núu cúní ni, áchí de.

⁴¹ Te Jesús ni cundáhú ni yā de, te ni soó yá ndaha ya siquī de, te ni cahān yā:

Cúní rī. Te na ndúvāha ró, áchí yá.

⁴² Te ná ni cahān yā súcuán, te ni nduvāha-ni tēe ndóho cuehyí stehyú un.

⁴³ Yūcuán na te nátají yá de quinhun de, te ni cahān níhin ya jíin de:

⁴⁴ Ma cáchi cuiti rō nuū ní ñn. Chí quis-téén rō maá ró nuū sutú, te condahá ró jeē socó rō nuū Yaā Dios siquī jeē ndúndoo ró núu yā, nájnūhun ni ndacu Moisés jniñu jenahán. Te súcuán te cuni ñayuu jeē ní nduvāha ró. Achí yá.

⁴⁵ Te ni quenda de cuahān de, te ni quejéé de nácani de jnūhun nuū ndíhi ñayuu ndese ni nduvāha de. Te siquī yúcuán tuá ni cúu quívi Jesús táca ñuu, chí cúchitú ndasí ñáyuu nuū yā. Te ni jica ya yatā táca ñuu nuū tu cúchitú ñáyuu. Te táca lado ni quijicoo ñayuu nuū yā.

Jeē ní nasávāha ya ñn tēe ndóho cuehyí ni íjin

(Mt. 9.1-8; Lc. 5.17-26)

2

¹ Te ni cuu jecu quívi, te ni quívi tucu Jesús ñuu Capernaum. Te ni cajini ñayuu jeē néne ya vehe. ² Te ni cacutútú-ni cuehē ñayuu, te ni chitú vehe jeē ndé yehyí tuá núne. Te ni nacani ya jnūhun Yaā Dios nuū i. ³ Yūcuán na te ni quecoo cuñ tēe nuū yā, cándiso de ñn tēe ndóho cuehyí ni íjin. ⁴ Te tu ní cúu quívicoo de nuū yā siquī jeē chitú ñáyuu. Te ni cacao de siquī véhe, te ni canune de ndaā nuū ín ya, te yaū un

ní cascúun de tēe cúhú, cátú de nuū ñn camilla. ⁵ Te ni jini Jesús jeē cácanđije de jeē cúu nasávāha ya tēe cúhú un. Te ni cahān yā jín tēe cúhú un:

Séhē, je íne cáhnu ni rī nuū tāca cuēchi ró, áchí yá.

⁶ Te yūcuan cáyūcú jecu tēe cástéén tutu ley Yaā Dios, te tēe un ní cajeni ni de síquī yā: ⁷ ¿Naun cáhān tēe yāha súcuan? Cáhān de jnūhun ndevāha jeē quití ni Yaā Dios, chí nasūu Yāā Dios cúu de jeē cóne cáhnu ni de nuū cuēchi. ⁸ Te ni jini Jesús jeē súcuan cájeni ni de, te ni cahān yā jín de:

¿Naun cájeni ni rō jeē cahān ndevāha ri? ⁹ Jeē uú jnūhun yāha, ¿ndé ñn yí gá cáa? ¿A jeē cahān rī jín tēe cúhú: Je íne cáhnu ni rī nuū tāca cuēchi ró? ¿Chí yí gá jeē cahān rī: Ndocuñī te naquihin ró camilla rō, te caca ró, achi rī? ¹⁰ Te vijna te na stéén rī jeē maá rí, Yaā ní nduu tēe, ndíso jniñu ri ini ñayīvi yāha jeē cóne cáhnu ni rī nuū cuēchi.

Yūcuán na te ni cahān yā jín tēe ni íjin ún:

¹¹ Cáhān rī jín ró, ndocuñī te naquihin ró camilla rō, te quinhun rō vehe ró, áchí yá jín de.

¹² Yūcuán na te ni ndocuñī-ni tēe ún, te ni naquihin de camilla de, te ni quenda de cuahān de, jito jínúu ndihí ñayuu. Te ndivii i ni canaa ni i cájito i, te ni cacahān i jeē yóhyo vāha Yaā cúu Yaā Dios. Te áchí i:

Ná tu coto cui ti yō ni ñn jniñu súcuan, áchí i.

Jeē ní cana ya Leví

(Mt. 9.9-13; Lc. 5.27-32)

¹³ Te ni quenda tucu ya cuahān yā nde yumar. Te tāca ñáyuu ni jinūcoo i nuū yā, te ni steén yā jnūhun nuū i. ¹⁴ Yūcuán na te ni yāha ya cuahān yā, te ni jito ya nuū Leví sēhe Alfeo, néne de nuū cutútú xúhun renta. Te ni cahān yā jín de:

Condiquñ ruhū na quíhín yō.

Te ni ndocuñī de, te cuahān de jín yá.

¹⁵ Yūcuán na te ni jehēn yā ni yeji yā staā vehe de. Te cuehē tēe cástútú xúhun renta jín inga tēe casáha cuēchi, suni cáyūcú de cáyeji de staā jín Jesús jín tēe cáscuáha jín yá, chí íyó cuehē de jeē cándiquñ de ya. ¹⁶ Te tēe cástéén tutu ley Yaā Dios jín tēe grupo fariseo, ni cajito de jeē yeji yā staā

jín ndihí tāca tēe ún. Te ni cacahān de jín tēe cáscuáha jín yá:

¿Naun yeji maestro rō jín tēe cástútú xúhun renta jín inga tēe casáha cuēchi? áchí de.

¹⁷ Te ni jini Jesús, te ni cahān yā jín de:

Ñayuu cáhīyo vāha, tu jini ñúhún i tēe tájné, chí ñayuu cácuñú cúu jeē jini ñúhún. Te ruhū nasūu jeē véji ri cana ri ñayuu tú cuēchi, jeē cúu i nájnūhun ñayuu cáhīyo vāha. Chí sa suhva véji ri cana ri ñayuu cáhīyo cuēchi, jeē na nácani ni i te stóo i cuēchi i. Áchí yá.

Jeē ní cacajñúhún de ya síquī jeē cóndite ni *(Mt. 9.14-17; Lc. 5.33-39)*

¹⁸ Te ni cuu ñn quivī jeē cáhīyo ndite ni tēe cáscuáha jín Juan, jín tēe cáscuáha jín grupo fariseo. Te ni quecoo jecu tēe, ni cacahān de jín Jesús:

Tēe cáscuáha jín Juan jín jeē cascuáha jín grupo fariseo, tijni jínu cáhīyo ndite ni de. Te tēe cáscuáha jín máá ní, ¿naun tu casáha de súcuan?

¹⁹ Te ni cahān Jesús jín de:

¿A cuu condite ni de níni jéé iyó rí jín de? ¿A cuu condite ni ñayuu cáhīn vico nándāha, te núu níni néne tēe nándāha? Chí núu néne tēe nándāha, te ma cúu condite ni i. ²⁰ Te quee quivī jeē cújiyo tēe nándāha, te quivī ún chí condite ni i.

²¹ Te ni cahān yā uū jnūhun yátá síquī jeē tu quíjnāhan jnūhun jeé jéé steén yā jín táca jnūhun jenahán. Áchí yá:

Ni ñn tu náchuhun ñn pedazo sahma jéé núu ñn sahma túhú. Chí núu súcuan te ndiyi pedazo jeé un, te tahndē gā jeē tuhú un, te nducáhnu ga nuū cááhndé un. ²² Te suni tu cáchuhun vino jeé ini ññ túhú. Chí núu súcuan te vino jeé un ndatá ññ ún, te naa vino jín ññ. Jeē yūcuan cánuú jéé chúhun i vino jeé ini ññ jéé.

Jeē ní cataxín de yoco trigo quivī ndétātu *(Mt. 12.1-8; Lc. 6.1-5)*

²³ Te ñn quivī ndétātu ní yāha Jesús cuahān yā mēhñú nuū cáa trigo. Te tēe cáscuáha jín yá, cájica de cuahān de, te ni quejéé de cátaxín de yoco trigo cáyeji de. ²⁴ Yūcuán na te tēe grupo fariseo ni cacahān de jín yá:

Condēhé. ¿Najehē casáha tēe cáscuáha jíin ró súcuan? Chí áchí ley Moisés jeē ma cúu sáha yó ni ñn jniñu quivī ndétátú. Achí de.

²⁵ Te ni cahān maá yá jíin de:

¿A tu ní cácahu cuiṭi rō tutu ndese ni sáha David, ñn quivī ní cumani jeē cáji de, te ni jíi de sōco jíin tēe cáhīn jíin de? ²⁶ Te ni quivī de ini vehe Yaā Dios. Te Abiatar ni cuu sutū cujéñu ga. Te ni yeji de pan i jeē yosó ndijin nuū Yaā Dios. Te tú na ley jeē cáji ni ñn tēe, chí máa-ni sutū cuu caji. Te suni ni jēhe de ni cayeji tēe cáhīn jíin de. Te tú na cuēchi ní íyo siquī de. Achí yá.

²⁷ Te suni ni cahān yá jíin de jíinahan de:

Tu ní jéconaā ñayuu jeē ndóho i nuū quivī ndétátú, chí ni jeconaā quivī un jéē ndétátú i. ²⁸ Núu súcuan te ruhū, Yaā ní nduu tēe, máá rí cúu jeē ndácu jniñu siquī ndese sáha ñayuu quivī ndétátú, áchí yá.

Jeē ní nduvāha tēe ni ichī ndaha
(Mt. 12.9-14; Lc. 6.6-11)

3

¹ Te ni quivī tucu Jesús ini vehe i sinagoga. Te yūcuan íne ñn tēe ni ichī ñn ndaha de. ² Te tēe grupo fariseo cájito yuhu de ya núu nasávāha ya tēe un quivī ndétátú, návāha nihīn de cuēchi siquī yá. ³ Yūcuán na te ni cahān yá jíin tēe ni ichī ndaha ún:

Ndocuiñi te condichi rō mēhñu yáha, áchí yá.

⁴ Te ni cajñuhun yá de jíinahan de:

¿Ndese cáhán ley siquī quivī ndétátú? ¿A jéē sáha vāha yó, chí sáha néé yó? ¿A jéē nasávāha yó ñayuu je yajni cuu, chí sáha yó jéē cúu i? áchí yá.

Te máá de tú na vé ni cacahān de. ⁵ Te ni quitī ni yá ni jito ya nuū de jíinahan de, te ni cucuíhyá ni yá jeē níhni ni de. Te ni cahān yá jíin tēe ni ichī ndaha:

Scáá ndaha ró.

Te ni scaá de, te ni nduvāha-ni ndaha de. ⁶ Yūcuán na te ni quendacoo tēe grupo fariseo, te ni casquijnahan de jñuhun jíin tēe grupo Herodes siquī yá, ndese cahni de ya.

Jeē ní quecoo cuehē ñayuu nuū yá yumar

⁷ Te Jesús cuahān yá nde yumar jíin tēe cáscuáha jíin yá. Te cuehē ñayuu región Galilea ni candiquin i ya. ⁸ Te suni ñayuu región Judea, jíin ñayuu ñuu Jerusalén, jíin

ñayuu Idumea, jíin ñayuu ichi núu cáne niāndii yūte Jordán, jíin ñayuu región Tiro jíin Sidón, cuehē ndasí ñayuu ni cajini jñuhun i jniñu jéñu ni sáha ya, te ni quecoo i nuū yá. ⁹ Te ni cahān yá jíin tēe cáscuáha jíin yá jeē na cóo tūhva ñn barco quivī ya, návāha ma chitú níhin ñayuu cuehē ún xiin ya. ¹⁰ Chi cuehē ñayuu je ni nasávāha ya, te jeē yúcuan vējicoo cuehē gā ñayuu cándoho tāca núu cuehyī, te chitú níhin i xiin ya jeē quehé i ya cácuni i. ¹¹ Te ñayuu cáñuhun tachī ini, núu ni cajito nuū yá, te cájecuiñi yití núu yá, te cácana cóhó:

Máá ní cúu Sēhe Yaā Dios, achí.

¹² Te ni ndacu níhin ya nuū tachí un jéē ma cáhán gā jeē cúu ya Sēhe Yaā Dios.

Jeē ní nacāji ya uxī uū tēe apóstol
(Mt. 10.1-4; Lc. 6.12-16)

¹³ Yūcuán na te ni caa ya cuahān yá ñn yucu. Te ni cana ya tāca tēe jeē cuní maá yá caca jíin yá, te ni quecoo de nuū yá. ¹⁴ Te ni jeni ya uxī uū de jeē cuiñi de jíin yá, te tají yá de quingoo de nacani de jñuhun. ¹⁵ Te ni sáha ya jeē cóndiso jniñu de nasávāha de ñayuu cuhú te quenehen de tachī ini ñayuu. ¹⁶ Te yāha cúu ndihúxí uū tēe jeē ní nacāji ya: Simón jeē ní nasnání yá de Pedro. ¹⁷ Te Jacobo jíin ñani de Juan, sēhe Zebedeo. Te ni nasnání yá ndindúu de Boanerges, jeē cuní cahān: Tēe yíhi fuerza nacani jñuhun, nájñuhun yíhi fuerza taja. ¹⁸ Te sava ga de nání de Andrés, Felipe, Bartolomé, Mateo, Tomás, Jacobo sēhe Alfeo, Tadeo, Simón tēe grupo cananista, ¹⁹ jíin Judas Iscariote, tēe jeē ní nastúu de ya.

Jeē ní cacahān ñayuu jeē jejniñu ya fuerza Satanás

(Mt. 12.22-32; Lc. 11.14-23; 12.10)

Yūcuán na te ni quivī ya ñn vehe jíin tēe cáscuáha jíin yá un. ²⁰ Te ni ndutútú tucu cuehē ñayuu, te ni tuá ni cúu caji yá staā jíin de. ²¹ Te tāca jñahan vehe ya ni cajini jñuhun jeē súcuan cúu. Te ni quecoo de venūquihin de ya. Chí cacahān de jeē ní sana xinī yá.

²² Te suni tēe cástéén tutu ley Yaā Dios jeē ní quijicoo nde ñuu Jerusalén, ni cacahān de:

Tēe yáha ñuhun Satanás ini de, jeē cujéñu nuū tachí. Te jíin fuerza un quenehen de tachí, achí de.

²³ Te ni cana ya de jíjnáhan de, te ni cahān yā ñn jñūhun yátá jíin de:

¿Ndese cuu quenehen Satanás maá?

²⁴ Chi núu ñn nación sásñn máá te cuajnáhan máá, nación un má cúu ga coyūcu cáhnu. ²⁵ Te núu ñayuu ñn vehe sásñn máá te cuajnáhan máá, ñayuu un má cúu ga coyūcu cáhnu. ²⁶ Te suni súcuan Satanás jíin jñáhan tachī, chi núu sásñn máá te cuajnáhan máá, núu súcuan te ma cóo ga, chi sa suhva naa.

²⁷ Te ni ñn tēe ma cúu quívi de ini vehe tēe ndacuī jeē quenehen de ndajniñu de. Chi cánuú jeē xíhna gā cuhni de tēe ndacuī ún. Te suni súcuan cúu jeē jíhni rī Satanás te quēnehen ri tachī.

²⁸ Te jendaá cahán rī jíin ró jeē iyó modo coo jñūhun cáhnu ni nuū tāca cuéchi cáśaha ñayuu, te suni nuū tāca jñūhun néé cácahān i. ²⁹ Te núu cahān ndevāha i siquī Espiritu Santo, te ma cóne cáhnu ni Yaā Dios nuū i, chi sa suhva condee cuéchi siquī i ní cáni, áchí yá.

³⁰ Súcuan ni cahān yā, chi ni cacahān i jeē quēnehen ya tachī jíin fuerza Satanás.

Náná yā jíin ñani yā

(Mt. 12.46-50; Lc. 8.19-21)

³¹ Yūcuán na te ni quee naná yā jíin táca ñani yā. Te íin ña nuū quéhe, te ni tají ña jñūhun cuahān nuū yā jeē cána ña ya. ³² Te ñayuu cáyūcu ní xiin ya, ni cacahān i jíin yá:

Náná ni jíin táca ñani ni cáhñn nuū quéhe, te cácuñi cahān jíin ní, áchí i.

³³ Te ni cahān maá yá:

¿Ndé ñn cúu náná rī jíin ñani rī? achí yá.

³⁴ Yūcuán na te ni ndacoto ya nuū ñayuu cáyūcú xiin ya ún, te ni cahān yā:

Suni náná rī jíin ñani rī cácuu tāca ñayuu yáha. ³⁵ Chi tāca ñayuu casquícu jniñu cúní Yaā Dios, suu cácuu ñani rī, cuāha ri, náná rī, achí yá.

Jñūhun yátá siquī tēe jéte trigo

(Mt. 13.1-9; Lc. 8.4-8)

4

¹ Te yumar ni quejéé tucu Jesús steén yā jñūhun. Te ni cutútú cuéhē ndasí ñayuu nuū yā, te jeē yúcuan ní quívi ya ni cucōo ya ini ñn barco nuū mar. Te tāca ñayuu un cáyūcú i yumar. ² Te jíin jñūhun yátá ni steén yā cuéhē jñūhun nuū i, te súcuan ni cahān yā:

³ Cuni nahín jíjnáhan ró: ñn tēe cate trigo, ni quenda de jeē cáte de. ⁴ Te ná ni quejéé de jéte de, te jecu trigo ni jité yuhíchi. Te ni quecoo saa, ni cayeji tī. ⁵ Te jecu gā trigo ni jité nuū ñūhun yuū, nuū tú cuehē ñuhun. Te yachī-ni ni cane, chi tu cóquin ñuhun. ⁶ Te nuū ní cane niāndii, te ni ichī-ni, te ni casun, chi tu ní níhñn nuū quihín yoho. ⁷ Te jecu gā trigo ni jité nuū náne iñu. Te ni jehnu iñu ún, te ni jesi nuū, te tu ní jéhe nunī. ⁸ Te jecu ni jité nuū ñūhun váha. Te ni cane, te ni jehnu, te ni jéhe cuehē nunī. Sava ni jéhe ocō uxī jeē ñn ñn nunī, te sava ga ni jéhe unī xico, te sava ga ni jéhe ciento. Achí yá.

⁹ Yūcuán na te ni cahān yā jíin de:

Tāca róhó jéé jíni sōho, na chúsóhó ró. Achí yá.

Najehē cahán yā máni jñūhun yátá

(Mt. 13.10-17; Lc. 8.9-10)

¹⁰ Yūcuán na te ni quendōo máa na yā, jíin ndihúxí uū tēe cáscuáha jíin yá, jíin jecu gā ñayuu cáhñn jíin de. Te ni cacajñūhñn de ya na vé cuní cahān jñūhun yátá un. ¹¹ Te ni cahān yā jíin de:

Róhó, chi sáha Yaā Dios jeē cájecūhun ni rō jñūhun ni yisāhi yáha, ndese quívicoo ñayuu ndaha ya ndacu ya jniñu nuū i. Te ñayuu jeē cáhñn sñn siquī, chi máni jíin jñūhun yátá cáhán rī tāca jñūhun jíin i. ¹² Súcuan cáhán rī návāha vésú cájito i, te quendōo i nájnūhun jeē tú na vé ni cájito i. Te vésú cájini sōho i, te ma jécūhun ní i, te ma násāma ini i quívicoo i nuū rī, te ma cóo jñūhun cáhnu ni nuū cuéchi i, áchí yá.

Jeē ní castūhun cájí yá jñūhun yátá tēe jéte trigo

(Mt. 13.18-23; Lc. 8.11-15)

¹³ Te ni cahān gā yā jíin de jíjnáhan de:

Núu tu cájecūhun ni rō jñūhun yátá yáha, ¿te ndese jecūhun ni rō tāca gā jñūhun yátá núu súcuan? ¹⁴ Tēe jéte trigo cúu tēe scuíté núu jñūhun Yaā Dios. ¹⁵ Te trigo jeē ni jité yuhíchi cúu nájnūhun ánuá sava ñayuu. Chi cájini nahín i jñūhun ya, te ná ni cajini i, te quíji-ni Satanás te quénde-ni jñūhun ini anuá i. ¹⁶ Te trigo jeē ni jité nuū ñūhun yuū, chi cúu nájnūhun ánuá sava ñayuu cájini nahín jñūhun, te yachī-ni cájetáhú i te

cácusī ni i jíin. ¹⁷ Te tu cúcutú jnúhun ún ini anuá i, te jecu-ni quivī cájethú i. Te núu ni quejéé jnúndóho, chí jíto xeēn ñayuu i síquī jnúhun ún, te quejéé nácani yátá ni i. ¹⁸ Te jeē ni jítē nuū náne iñu cúu nájñuhun jecu gā ñayuu. Chi vēsú ni cajini sōho i, ¹⁹ te cándihvī ni i síquī jeē iyó ini ñayivī yáha. Te cácuni i cucúcá i, te stáhú un i jeē cutóó ni i síquī tǎcá ndajñiñu. Te ndihi jeē yáha cácuñéñu i jíin, te jési nuū jnúhun ya, te tu íje i jíin jnúhun ya. ²⁰ Te trigo jeē ni jítē nuū ñuhun váha cúu nájñuhun ñayuu cájini nahín jnúhun, te cájethú i, te cáhije i jíin jnúhun ya. Te sava i cúu nájñuhun nunī jeē jéhe ocō uxī jeē ñn ñn, te sava i jéhe unī xico, te sava ga i jéhe ciento. Achí yá.

*Jnúhun yátá síquī lámpara
(Lc. 8.16-18)*

²¹ Suni ni cahān yā jíin de:

Núu nástñn ñayuu ñn lámpara, ¿a chúne i chíji ñn cajón chí chíji jíto? Tuú, chí jéni i nuū sucún návāha cundijin. ²² Te suni súcuan, tu íyó ni ñn jnúhun sāhi jéē ma cúni ñayuu, chí ndihi tǎca jnúhun natūu ndijin te cuni ñayuu. ²³ Tǎca róhó jéē jíni sōho, na chúsohó ró, áchí yá.

²⁴ Te suni ni cahān yā jíin i:

Cuni sōho vāha ró. Chí cūhva jeē chusóhó ró jnúhun Yaā Dios, suni cūhva un cuáha ya nuū rō, te víhyá gā cuáha ya nuū maá ró jeē chusóhó vāha ró. ²⁵ Chí ñayuu je jécūhun ni, stéén gā yā nuū i. Te ñayuu tu cándíje, máá jecu jeē jíin i ún, sa suhva naa. Achí yá.

Jnúhun yátá síquī trigo jeē jéhu

²⁶ Te ni cahān gā yā:

Súcuan cúu jeē ndácu Yaā Dios jniñu nuū ñáyuu: Cúu nájñuhun trigo jeē ní jete ñn tēe. ²⁷ Yūcuán na te quíxí de te ndóna de, te súcuan jíca quivī cuahān. Te trigo un cáne te jéhu. Te máá de tu jíin de ndese cúu jeē jéhu. ²⁸ Chí máá ñuhun sáha jeē jéhu trigo, xīhna gā yucū, sáa te cáne yoco, yūcuán na te íje máá núni. ²⁹ Te núu ni cuaan trigo un, te quejéé ñayuu cájehnde i, chí je ni jíin quivī tahndé. Achí yá.

*Jnúhun yátá síquī ndiquin mostaza
(Mt. 13.31-32; Lc. 13.18-19)*

³⁰ Te suni ni cahān yā:

Na cáhán rī ñn jnúhun yátá návāha cuni rō ndese ndúcuehē ñayuu jeē ndácu Yaā Dios jniñu nuū. ³¹ Ndúcuehē i nájñuhun jéhu ñn ndiquin mostaza jeē jéquin i nuū ñuhun. Te yūcuan cúu ñn ndiquin lúli gá vēsú tǎcá ndiquin jeē iyó. ³² Te ná ni jequin i, te cáne te jéhu ga vēsú tǎca gá yucū, te cúnáhu ndaha. Te tǎcá saa chí sáha tí tacā tí nuū cuándahū xinī ún. Achí yá.

*Jeē máni jnúhun yátá cáhán yā jíin i
(Mt. 13.34-35)*

³³ Te cuehē jnúhun yátá súcuan ni cahān yā jíin ñáyuu, núu nasaa cánda i jecūhun ni i. ³⁴ Te tǎca jéē ni stéén yā, máni máá jnúhun yátá ní cahān yā jíin i. Te nuū tēe cáscuáha jíin yá chí ni nacastūhun cájí yá jnúhun ún.

*Jeē ní jecuiñī tachī níhin jíin mar ni sáha ya
(Mt. 8.23-27; Lc. 8.22-25)*

³⁵ Te jeē cuácuaa quivī ún, te ni cahān yā jíin tēe cáscuáha jíin yá:

Na yáha yó quíhñ yō inga lado mar, achí yá.

³⁶ Te ni casquéndōo de ñayuu cuehē ún, te ni quivícoo de ini barco nuū je íne Jesús, cuango de jíin yá. Te suni cuango jecu gā barco jíin de jíináhan de. ³⁷ Te ni jequíhi ñn tachī níhin, te ni stóna ndute mar, te ni quiví ini barco. Te je yajni chítú ndute ini barco. ³⁸ Te Jesús catú yá yatā de ini barco, quíxí yā te yíhi ñn sahma cástíhi xinī yā. Te ni castóna de ya, te ni cacahān de:

Maestro, ¿a tu sáha ní cuenta jeē quēe yó chíji ndute te cuu yō? achí de.

³⁹ Te ni ndocuiñī yā, te ni cahān yā nuū tachí níhin un jíin núu mar:

Jecuiñī te nayúú-ni coo ró, áchí yá.

Te ni jecuiñī tachī, te ni cuu nayúú íi-ni.

⁴⁰ Te ni cahān yā jíin de jíináhan de:

¿Naun cáyūhú ndasí ró? ¿Naun tu cácañíje ró jéē cācu ró sáha rí?

⁴¹ Te yōhyo ni cayūhú de, te ni cacahān de jíin jnáhan de:

¿Ndé ñn ga cúu tēe yáha jéē nde tachí níhin jíin mar cájethú jéē cahān de? áchí de.

*Tēe Gadara jeē ndóho tachī
(Mt. 8.28-34; Lc. 8.26-39)*

5

¹ Te ni jinū Jesús jín de jíjnáhan de inga lado mar, región Gadara. ² Te ná ni quenda ya ini barco un, te ñn tēe ñúhun tachī ini, ni quenda de nde nuū yíndūji ndīyi, te ni quee de nuū yā. ³ Tēe un ndéé de nuū yíndūji ndīyi. Te tu jéjníñu jeē jíhni ñayuu de, ni jín cadena. ⁴ Chi cuehē jínu ni conuhnī jehē de ndaha de jín cadena. Te tāca jínu jéhnde de, te sácuéché de. Te tú ni ñn cúndeyí jín de. ⁵ Te nduú ñuú jíca de yucu jín nuū yíndūji ndīyi, te cána cóhó de, te stújí de máá de jín yúu. ⁶ Te náa jíca gá vēji Jesús, te ni jito de ya. Te jínu de ni quee de nuū yā, te ni jecuiñī yití de nuū yā. ⁷ Te ni cana cóhó de:

¿Naun vēji ní nuū ná, Jesús Sēhe Yaā Dios, Yaā kujéhu téyí? Cáhán ndahú ná jín ní, jíní nahín Yaā Dios, ma stóho ní sáña, áchí de.

⁸ Súcuan ni cahān de, chi je ni cahān Jesús: Táchī, quenda ini tēe yáha quíhín rō.

⁹ Te ni cajñūhun yá de:

¿Na vé naní ró?

Te ni cahān de:

Legión naní ná, chi cuehē tachī ñúhun ini ná, áchí de.

¹⁰ Te ni cahān ndahú ndasí de jín yá jeē ma tájí yá tachī quendacoo región ún. ¹¹ Te yajni yucu yúcuan cáhīn cuehē quínī cájitu tí. ¹² Te tachī jeē ñúhun ini tēe un ní cacahān ndahú jín yá:

Núu tají ní sáñá, te cuāha ní jnúhun quívicoo ná ini quínī yūcuán, áchí.

¹³ Te Jesús ni jēhe ya jñūhun. Te ni quendacoo tachī ún ini tēe ún, te ni quívicoo ini quínī, te íyó nájnūhun uū míl tí. Te quínī un ní cajinu tí ni ñngoo tí ñn yucáva, ni quívicoo tí nuū mar. Te ni ndaquíhi tí ndute, ni cajihī tí.

¹⁴ Te tēe cándito tí, ni cajinu de cuangoo de jeē ní cayūhú de. Te ni jinūcoo de ni cacastūhún de nuū ñáyuu ñuu un jín ñáyuu tāca rancho. Te cuangoo ñayuu un cuácondēhé i na vé ni cuu. ¹⁵ Te ni jinūcoo i nuū íne Jesús, te ni cajito i nuū tēe ni ñuhun cuehē tachī ini. Te néne de, te ñúhun de sahma, te je ni nducájí xínī de. Te ni cayūhú ñáyuu ún. ¹⁶ Te tēe ní cajito, ni canacani de jñūhun nuū ñáyuu, ndese ni nduvāha tēe ni ñuhun tachī ini, jín ndese ni candoho quínī ún. ¹⁷ Yūcuán na te ni caquejéé i cacahān

ndahú i jín yá jeē na cújiyo ya región yūcuan quíhín yā.

¹⁸ Te ni ndīvi ya ini barco. Te tēe ni ñuhun tachī ini un ní cahān ndahú de jín yá jeē na cuáha ya jñūhun quíhín de jín yá. ¹⁹ Te Jesús tu ní jēhe ya jñūhun, chi ni cahān yā jín de:

Cuánuhun vehe ró núu jnáhan ró, te nacani ró jñūhun nuū i ndese yōhyo jéhu jniñu ni sáha máá Jítóho rō jín ró, te ndese ni cundáhú ni yā rohó, áchí yá.

²⁰ Te ni quenda de cuahān de, te ni quejéé de nacani de jñūhun tāca ñuu Decápolis ndese yōhyo jéhu jniñu ni sáha Jesús jín de. Te ndīvii ñayuu un ní canaa ni i cájini nahín i.

Jñūhun sēhe síhí Jairo jín ñahan ní quehé yusáhma ya

(Mt. 9.18-26; Lc. 8.40-56)

²¹ Te ni nayāha tucu Jesús cuanuhun yā inga lado mar jín barco. Te ni quecoo cuehē ñayuu nuū yā, nuū íne ya yumar.

²² Te ni quee ñn tēe cújéhu ini vehe íi sinagoga, naní de Jairo. Te ná ni jito de nuū yā, te ni jecuiñī yití de nuū jehé yā. ²³ Te ni cahān ndahú ndasí de jín yá:

Sēhe síhí ná je yajni cuu i. Na quíhín yō vehe ná te soó ní ndaha ní síquī i návāha na ndúvāha i te cotecu i, áchí de.

²⁴ Yūcuán na te cuahān yā jín de. Te cuehē ñayuu cándiquín i ya, te ni chitú níhin i xiin ya cuangoo i. ²⁵ Te mēhñu ñáyuu un cuahān ñn ñahan cúhú, jeē ní cuu uxī uū cuiyā ndóho ña cuehyī niñī. ²⁶ Te yōhyo ni ndoho ña, chi ni jexin ña tāca jēé névāha ña jín cuéhē tēe tájna, te tu ní jéjníñu jeē ndúvāha ña, chi sa suhva víhyá gá sáha. ²⁷ Te ñahan yáha ná ni nihín ña jñūhun Jesús, te ni quee ña ichi yátá yā mēhñu ñáyuu cuehē ún, te ni quehé ña yusáhma ya. ²⁸ Chi ni jeni ni ña: Vēsú maá sahma ya na níhín rī quehé rí, te nduvāha rí, jeni ni ña. ²⁹ Te ni jecuiñī-ni niñī ña, te ni jini ña jeē ní nduvāha ña cuehyī ún. ³⁰ Te Jesús ni jini yā jeē ní nduvāha ñn ñayuu jín fuerza yā. Te ni ndió cóto ya nuū ñáyuu cuehē, te ni cahān yā:

¿Ndé ñn ni quehé sahma rí? Achí yá.

³¹ Te tēe cáscuáha jín yá, ni cacahān de:

Jító ní jéé ñáyuu cuehē yáha ní chitú níhin i xiin ní te cáquíhi i níhín ní cáni ichi, te cájnūhun ní ndé ñn ni quehé sahma ní.

³² Te máá yá jíto ya cháha chúcuan, cúní yā jeē na cáchi ñayuu ni sáha. ³³ Te ñahan un yúhú ña te quísi i ña, te je jíni ña jeē ní nduvāha ña. Te ni quee ña, te ni jecuiñi yití ña nuū yā, te ni cachi ña ndiñi ndese ni cuu jíni ña. ³⁴ Te ni cahān yā jíni ña:

Séhē, ni candíje ró jéē cuu nasávāha ri rohó, te jeē yúcuan ní nduvāha ró. Cuáhán te na ndúsiñi ni rō, chi je ni nduvāha ró cuéhyi ní ndoho ró, áchí yá.

³⁵ Te níni cáhán gā yā súcuan, te ni quecoo ñayuu cáyūcú vehe tēe cújénu ini vehe iī sinagoga, te ni cacahān i jíni de:

Je ni jihí sēhe síhí ní. Te ma sajnēñu ga ní Maestro, achí i.

³⁶ Te Jesús tu ní sáha ya cuenta jeē súcuan cácahān i, te ni cahān yā jíni tēe cújénu ini vehe iī sinagoga:

Ma yūhu ró, chi candíje ró jéē nastécu rī i, áchí yá.

³⁷ Te tu ní jéhe ga yā jnūhun condiquin ñayuu yā, chi máá-ni Pedro jíni Jacobo, jíni Juan ñani Jacobo. ³⁸ Te ni jinū yā vehe tēe cújénu ini vehe iī sinagoga, te ni jíto ya ñayuu, cácuvaā i, te cándahyū i, te cácana cóhó i. ³⁹ Te ni quívi ya, te ni cahān yā:

¿Najehē yōhyo cásavaā rō te cándahyū rō? Sūchi síhí yáha, tu ní jíhí i, chi quíxi-ni i, áchí yá.

⁴⁰ Te ni cajecū catá i jeē ni cáhān yā. Te ni quenehen ndiñi ya i cuahān i nuū quéhe. Te ni cana ya máá-ni tátá jíni náná sūchi síhí un, jíni tēe cáhān jíni yá, te ni quívi ya jíni de nuū catú sūchi síhí ní jihí ún. ⁴¹ Te ni jniñi ya ndaha i, te ni cahān yā jíni i:

Talita cumi, achí yá. Te jnūhun un cúní cahān: Síhí, cáhán rī jíni ró, ndocuiñi, achí yá.

⁴² Te ni ndocuiñi-ni sūchi síhí un, te ni nacaca i, chi je iyó i uxí uū cuiyā. Te yōhyo ni cana ni ñayuu cájito i. ⁴³ Te ni ndacu nihin ya jniñu nuū i jíniñan i jeē ma cáchi cuiñi i nuū ni ñn. Te ni cahān yā jeē na cuáha ña jeē cáji sūchi síhí.

*Jeē cuánuhun yā ñuu Nazaret
(Mt. 13.53-58; Lc. 4.16-30)*

6

¹ Te ni quenda Jesús yūcuán, te cuanuhun yā ñuu yā. Te tēe cáscuáha jíni yá cuangoo

de jíni yá. ² Te máá quívi ndétātu ní steén yā jnūhun ini vehe iī sinagoga. Te cuehē ñayuu ni cana ni i cájini nahín i, te ni cacahān i:

¿Ndé nuū ní cutūhva tēe yáha tāca jnūhun yáha? ¿Te ndese cúu jeē cahán de jnūhun ndíchí yáha jíni jéē sáha de jniñu jénu yáha?

³ Chi tēe yáha cúu carpintero, te sēhe María cúu de, te ñani Jacobo jíni José jíni Judas jíni Simón cúu de. Te suni cáyūcu cuáha de jíni yó yāhá. Achí i.

Te súcuan ni cacujéē ni i nuū Jesús. ⁴ Te ni cahān yā jíni i:

Tāca tēe nácani jnūhun Yaā Dios, iyó yíñuhún ñayuu jíni de, chi máni ñayuu ñuu maá de, jíni jnāhan de, jíni ñayuu vehe de cúu jeē tu iyó yíñuhún jíni de. Achí yá.

⁵ Te tu ní cúu sáha ya cuehē jniñu jénu yūcuán. Chi jecu-ni ñayuu cácuñu ni soó yá ndaha ya síquī i, te ni nasávāha ya i. ⁶ Te náā ni yā jíto ya jeē tu cácañi ñayuu jiniñan i. Yūcuán na te ni jica cuu ya táca ñuu yajni, ni steén yā jnūhun.

*Jeē ní tají yá ndihúxi uū de cuanacani de jnūhun
(Mt. 10.5-15; Lc. 9.1-6)*

⁷ Te ni cana ya ndihúxi uū tēe cáscuáha jíni yá, te ni tají yá ndihuū ndihuū de quingoo de. Te ni sáha ya jeē cóndiso jniñu de quenehen de tachí ini ñayuu. ⁸ Te ni ndacu ya jeē tú na vé condiso de jeē cuajniñu de ichi, ni ñunu, ni staā, ni xūhún. Chi máá vara-ni condahá de. ⁹ Te quihí de ndijēn, te ma quihín de jíni úu sahma, áchí yá. ¹⁰ Te suni ni cahān yā jíni de:

Na-ni vehe núu ni quívicoo ró, te yūcuán coyūcu ró ndé quenda tucu ró quihín rō inga ñuu. ¹¹ Te núu ñn ñuu tu cájetáhú i rōhó, ni tu cúní i cuni nahín i jnūhun cahān rō, na quéndacoo ró yúcuan, te scóyo ró tícachā jehē rō, te súcuan steén rō jeē iyó cuéchi i jeē tu ní cájetáhú i. Jendaá cahán rī jíni ró jeē quívi coo juicio te xeēn gā coo castigo síquī ñuu cásaha súcuan vésú síquī ñuu Sodoma jíni ñuu Gomorra nuū ní casáha ndasí ñayuu cuéchi.

¹² Te ni quendacoo de cuahān de, te ni canacani de jnūhun jeē na nácani ni ñayuu jeē stóo i cuéchi i. ¹³ Te suni ni caquenehen de cuehē tachí ini ñayuu. Te ni cachihí de

aceite cuehē ñayuu cácuñu, te ni canduvāha i.

*Jeē ni jīhī Juan tēe scuándute
(Mt. 14.1-12; Lc. 9.7-9)*

¹⁴ Te rey Herodes ni jini jnūhun de jnūhun Jesús, chi ni jitē núu jnūhun ya ní cáhnu. Te ni cahān de:

Tēe yúcuñu cūu Juan tēe ni scuándute, te ni natecu de. Jeē yúcuñu íyó poder de sáha de jniñu jéñnu. Achí de.

¹⁵ Te sava ga ñayuu ni cacahān i:

Tēe un cūu Elías jeē ní nacani jnūhun jenahán.

Te sava ga i ni cacahān:

Tuú chi ñn tēe nácani jnūhun Yaā Dios cūu de, nájñūhun tēe ni canacani jnūhun ya nde jenahán, achí i.

¹⁶ Te ná ni jini Herodes, te ni cahān de:

Tuú chi yúcuñu cūu Juan jeē ní ndacu ri jniñu ni tahndē xinī, te ni natecu de núu súcuñu, achí de.

¹⁷ Chi máá Herodes ni ndacu de jniñu jeē na quívi Juan vecāa, jíin jeē na cónuñi de jíin cadena. Súcuñu ni sáha de jeē siquí Herodías, ñasihí ñani de Felipe. Chi Herodes ni quihin de ña jeē cūu tucu ña ñasihí de.

¹⁸ Te Juan ni cahān de nuū Herodes:

Tu íyó ley jeē cóndeca ró ñasihí ñani rō, achí de.

¹⁹ Te jeē yúcuñu Herodías ni jito uhū ña Juan, te cúní ña jeē na cūu de, te tu ní níhín ña modo. ²⁰ Chi Herodes yúhú de cahni de Juan, chi jíin de jeē tēe ndaā tēe ndoo cūu Juan. Te jeē yúcuñu ní jesí de jeē nducú ña jeē cūu Juan. Te nújnahan ni de jíin nahín de jnūhun cáhán Juan, vēsú tu jécūhun vāha ni de. ²¹ Te ni quee ñn quívi jeē ní cundeyí Herodías. Chi ni sáha Herodes ñn vico quívi ní cacu de, te ni jēhe de jeē ní cacuxíni tēe cándiso jniñu nuū de, jíin tēe cácuñu capitán, jíin tēe cácuñu región Galilea. ²² Te ni quívi sēhe síhí máá Herodías, ni jita jéhe i nuū chitú un. Te ni cacusí ni rey Herodes jíin tēe cácuñu jíin de. Te ni cahān de jíin súchi síhí un:

Cacān na vé cuní rō, te cuāha ri nuū rō, achí de.

²³ Te ni cahān teyí de jeē cuāha de núu na vé cuní i cacān i, vēsú nde sava región jeē yíhi ndaha de. ²⁴ Te ni quenda i, ni jecajñūhún i náná i:

¿Na vé cacān na núu de? achí i.

Te ni cahān ña:

Xinī Juan tēe scuándute cacān rō nuū de, achí ña.

²⁵ Yúcuñu na te ni ndívi-ni i nuū rey, te ni cahān i:

Cúní na jēe vijna ñūhún-ni cuāha ní xíní Juan tēe scuándute, cone nuū ñn cohō, achí i jíin de.

²⁶ Yúcuñu na te ni cucuíhyá ndasí ni rey un jeē ní cundeyí Herodías jeē cūu Juan. Te siquí jeē ni jéjnūhun téyí de, jíin jeē ní cajini sōho tēe cáyeji staā jíin de, jeē yúcuñu tu ní cúní de sásáhán de jeē ni jícān i. ²⁷ Te ni tají-ni de ñn soldado jeē quíquihin de xinī Juan. ²⁸ Te ni jehēn soldado un vecāa, te ni jehnde de xinī Juan. Te ni quee de jíin xíní Juan, íne nuū ñn cohō. Te ni jēhe de nuū súchi síhí un, te máá i ni jēhe i nuū naná i.

²⁹ Te tēe cácuāha jíin Juan ni canihín de jnūhun, te ni jengoo de, ni candonehen de yíqui cúñu Juan, te ni cachindūji de.

*Jeē ni scáji yā uhūn mil tēe
(Mt. 14.13-21; Lc. 9.10-17; Jn. 6.1-14)*

³⁰ Yúcuñu na te tēe cácuñu apóstol jeē ní tají yá cuangoo nacani jnūhun, ni ndecoo de nuū Jesús. Te ni canacani de nuū yā tēcá jniñu ni casáha de, jíin jnūhun ni castéén de.

³¹ Te ni cahān yā jíin de:

Na quíngoo yó ñn lugar nuū tú ñayuu, te ndetātu yó jecu, achí yá.

Chi cuehē ñayuu cuahān i vēji i nuū yā, te ni tu ní núne ya jeē cáji yā staā jíin de.

³² Yúcuñu na te ni quívi ya ñn barco jíin táca tēe apóstol un, te cuangoo síin ya jíin de ñn lugar nuū tú ñayuu. ³³ Te cuehē ñayuu ni cajito i jeē cuahán yā jíin de, te ni canacuni i jeē maá yá cūu. Te nde tēcá ñuu ni quendacoo i, te yachí cuangoo i, te xíhna gā i ni jinūcoo vēsú maá yá. ³⁴ Te nuū ní quenda Jesús ini barco, te ni jito ya ñayuu cuehē ún. Te ni cundáhú ni yā i, chi cūu i nájñūhun lanchi jeē tú jitoho tī. Te ni steén yā cuehē jnūhun nuū i. ³⁵ Te nuū ní ini, te tēe cácuāha jíin yá, ni quecoo de nuū yā, te ni cacahān de:

Je ni ini, te yāhá chi tú na ñayuu yúcu.

³⁶ Núu súcuñu te tají ní ñayuu na quíngoo i tēcá rancho jíin ñuu yajni, te cuaan i staā caji i, chi tú na vé cándiso i caji i, achí de.

³⁷ Te ni cahān Jesús jín de:
Cuāha máá ró jeē caji i, áchí yá.

Te ni cacahān de:

¿Te ndese cuu? Chi ni ma cúu vésú núu quicuaan ná ndé uū ciento denario staā caji ñayuu, achí de.

³⁸ Te ni cahān yā jín de:

¿Nasaa staā cánevāha ró? Cuacondēhe, áchí yá.

Te nuū ní cajini de, te ni cacahān de:

Uhūn-ni staā jín úū chācá íyó, áchí de.

³⁹ Yūcuán na te ni cahān yā jín ñayuu jeē na cúcōo sán i cuenta grupo nuū íte. ⁴⁰ Te ni cacucōo sán ciento ciento i, jín cincuenta cincuenta i. ⁴¹ Te ni quihín ya ndihúhún staā jín úū chācá un, te ni ndacoto ya ichi ándiví, te ni nacuatáhú yá. Te ni tahu cuéché yá staā ún, te ni jēhe ya nuū tée cáscuáha jín yá, te máá de ní casaja de nuū ñayuu cuehē ún. Te suni ni jēhe ya ndindúú chācá, ni casaja de nuū i. ⁴² Te ndivii i ni cayeji, te ni candutú chíji i. ⁴³ Yūcuán na te ni canastútú de pedazo staā jín cháca jéē ní quendōo, te ni chitú úxī uū jīca. ⁴⁴ Te tēe ni cayeji, chi uhūn mil de cúu.

Jeē ní jīca jéhé yá nuū mar
(Mt. 14.22-27; Jn. 6.16-21)

⁴⁵ Yūcuán na te ni cahān-ni Jesús jín tée cáscuáha jín yá jeē na quívicoo de barco, te cosnúú de yāha de inga lado mar ñuu Betsaida. Te máá yá chí natajái yá ñayuu quinhun i, te sáá te suni quihín yā. ⁴⁶ Te nuū ní cuu ni natajái yá i, te ni caa ya yucu cuacacān tahu yā. ⁴⁷ Te jeē ní cuaa, te barco un je ni cuu sava nuū mar cuahān, te máñuhún-ni ya ni quendōo nuū ñuhun íchi. ⁴⁸ Te ni jito ya jeē yóhyo jnūndóho cáscaca de barco, chí nihín vēji tachī ichi núú de. Te jeē yínee gā ni quee ya nuū de, jīca jéhé yá nuū mar. Te yāha ya nuū de quihín yā nuú. ⁴⁹ Te ni cajito de jeē jīca ya nuū mar, te ni cajeni ni de jeē jihná cúu, te ni cacana cóhó de. ⁵⁰ Chi ndihí de ní cajito nuū yā, te ni cayūhú ndasí de. Te ni cahān-ni ya jín de:

Ndeyí coo ni rō, te ma yūhu ró, chí máá rí cúu, áchí yá.

⁵¹ Te ni quíví ya ini barco un, te ni jecuiñi-ni tachī. Te yóhyo ni canaa ni de cájito de. ⁵² Chi cándāa néé gá jeē níjnūní de, chí ni jín jniñu jéhu jeē ní nducuehē staā,

tu ní cájecūhun ni de jeē maá yá cúu Yaā ní tají Yaā Dios.

Jeē ní nasávāha ya ñayuu cácuñu región Genesaret
(Mt. 14.34-36)

⁵³ Te ni quenda jíyo ya jín de nuū mar ún, ní jinū yā región Genesaret. Te yundúte un ní cajihni de barco. ⁵⁴ Te nuū ní quenda ya jín de ini barco, te ñayuu yúcuān ni canacuni-ni i ya. ⁵⁵ Te yachī ni jengoo i tācá ndañūū yūcuān, te ni caquindeca i ñayuu cácuñu, cáyosó i nuū camilla, vējicoo ñayuu nuū ní jito i íne ya. ⁵⁶ Te ndé-ni cúu-ni núu ni quíví ya, núu ñuu lulí, chí ñuu cáhnu, chí rancho, te cájequin i ñayuu cácuñu yuhíchi, te cácahān ndahú i jín yá jeē na quéhé i vésú yusáhma ya. Te tāca ñayuu jeē ní caquehé sahma ya, ni canduvāha-ni i.

Siquí ndese cújnéhén ñayuu
(Mt. 15.1-20)

7

¹ Yūcuán na te tēe grupo fariseo jín jecu tēe cástéén tutu ley Yaā Dios, ni quendacoo de ñuu Jerusalén, te ni quecoo de nuū Jesús. ² Te tēe un ní cajito de jeē sava tēe cáscuáha jín Jesús, ni cayeji jnehén de staā, chí tu ní cáscuáha de costumbre jeē nándahá de nuū Yaā Dios. Te ni cacahān siquí de. ³ Chi tēe fariseo jín ndihí ñayuu hebreo, névāha i costumbre jenahán jéē ma caji i staā núu tu nandahá váha i xīhna gā. ⁴ Te núu ni ndecoo i jeē ni jengoo i nuū yáhu, te tu cáyeji i te núu tu nandahá i. Te íyó cuéhē gā costumbre jenahán jeē casquícu i, nájñuhun jeē ndúndoo taza, tándohō, cohō cáa, jín jito. ⁵ Te tēe fariseo jín tée cástéén tutu ley Yaā Dios, ni cacajñuhún de ya:

Tēe cáscuáha jín ró, ¿naun tu cáscuáha de costumbre ñayuu jenahán? Chí sa cáyeji jnehén de staā, achí de.

⁶ Te ni cahān yā jín de:

Ndaā ni nacani Isaías jñuhun siquí rō jijnáhan ró jéē tēe stáhú-ni cácuu ró. Chí súcuān ni tee de jñuhun ni cahān Yaā Dios nde jenahán:

Ñayuu yáha chí máá yuhu-ni i cájetáhú i ruhū,

te nasūu ndé jín ini jín ánuá i.

⁷ Te cáchiñuhún sáa-ni i ruhū,

chi jnūhun cástéén i cúu jniñu ní candacu tēe,

te nasūu jēē ní ndacu máá rí cúu.

Achí Yaā Dios. Achí Isaías. ⁸ Súcuan cácuu ró, chí ni casiáá ró jniñu ní ndacu Yaā Dios nuū ró, te cáscuicu ró costumbre jeē ní cajequin ñayuu, jeē ndúndoo tindohō jíin taza. Te cuehē gā costumbre súcuan cáscuicu ró, áchí yá.

⁹ Te suni ni cahān yā:

Cásiáá ró jniñu ní ndacu Yaā Dios, návāha squícu ró costumbre ni cajequin máá ró. ¹⁰ Chi Moisés ni cahān de: Coó yíñuhún ró jíin tátá ró jíin náná ró. Te núu ndé ñin cahān síquī tátá chí síquī naná, na cúu nahín. Achí Moisés. ¹¹ Te máá ró chí cácahān ró jeē cuu cahān ñin tēe jíin tátá de náná de: Ma cúu chindéé ñáhán ná níhín cuáha na jēe cáji ni jēe chúhun ní, chí ndíhi jeē névāha ná, chí Corbán cúu, áchí ró. (Te jnūhun Corbán cuní cahān jeē ni sócō nuū Yaā Dios.) ¹² Te cácahān ró jeē núu súcuan cahān ñin tēe, te tuá cánuú chindéé ñáhán de tátá de náná de. ¹³ Te súcuan cástívi ró jniñu ní ndacu Yaā Dios, jeē síquī costumbre ni cajequin ñayuu jenahán vēji. Te cuehē gā jniñu súcuan cásaáha ró, áchí yá.

¹⁴ Te ni cana tucu ya ñayuu cuehē ún, te ni cahān yā jíin i:

Cuní sōho vāha ró jíjnáhan ró, te chuhun ni ró: ¹⁵ Tāca jēē iyó, te núu ni quívi yuhu ñayuu te tu cújnehén i sáha. Chí jeē quéndá ini anuá ñayuu, yūcuan cúu jeē cújnehén i sáha. ¹⁶ Tāca rōhó jēē jíini sōho, na chúsóhó ró, áchí yá.

¹⁷ Te ni stóo ya ñayuu cuehē ún, te ni quívi ya ini vehe. Te tēe cáscuáha ún, ni cacajnūhún de ya síquī jnūhun yátá yáha jēe ni cahān yā. ¹⁸ Te ni cahān yā jíin de:

¿A máá ró suni ná tu jecūhun ni ró, chí naún? ¿A tu cájini ró jeē tāca jēē quívi ini ñayuu, ma cúu cújnehén i sáha? ¹⁹ Chí tu quívi ini anuá i, chí chíji i quívi, te quéndá-ni cuahān, achí yá.

Súcuan ni steén yā jeē tāca jēē yéji ñayuu, tu cújnehén ánuá i sáha. ²⁰ Te ni cahān gā yā:

Jeē quéndá ini anuá ñayuu, yūcuan cúu jeē cújnehén i sáha. ²¹ Chí nde ini anuá ñayuu quéndá jeē jéni néé ni, jeē casíquī ndéē jnáhan, jeē jíca jnéni, jeē jéhni ndíyi, ²² jeē

sacuíhná, jeē ndíyo ni ndajniñu jnáhan, jeē sáha néé, jeē stahú jnáhan, jeē máni cuēchi sáha, jeē cucuésún ni, jeē cahán yāa síquī jnáhan, jeē sandúxí máá, jeē canéé xínī. ²³ Tāca jniñu néé yáha, máni ini anuá ñayuu quéndá, te cújnehén i sáha, áchí yá.

Ñahan inga nación jeē ní candíje ñihin (Mt. 15.21-28)

²⁴ Te ni quenda ya yūcuan cuáhān yā región Tiro jíin Sidón. Te ni quívi ya ñin vehe, te cúni yā jeē tú ni ñin ñayuu cuní jeē íne ya yūcuán. Te vēsú súcuan, te tu ní cúu cone sáhi yá. ²⁵ Te ñin ñahan íyó séhe síhí ña jeē ñūhun tachī ini i, ni nihín-ni ña jnūhun jeē íne ya. Te ni quee ña, te ni jecuíñi yití ña nuū jehé yā. ²⁶ Te ñahan ñuu jíca cúu ña, chí nde Sirofénicia cúu nación ña. Te ni cahān ndahú ña jíin yá jeē na quénehen ya tachī ini séhe síhí ña. ²⁷ Te ni cahān Jesús jíin ña:

Nasūu núu máá ní vēji ná, chí máni nuū ñayuu cácuu séhe Israel. Chí tu íyó váha jeē quénde yō staā séhe te cuáha yó núu ina, achí yá.

²⁸ Te ni cahān ña:

Jendaá cahán ní Tátā, te chindéé ñáhán ní sáña vēsú cúu ná nájñūhun ina. Chí suni máá tí cáhīin tí chíji mesa, cánihín tí staā cuechí jēē cóyo yuhu sūchi lúli cáyeji tí, achí ña.

²⁹ Yūcuán na te ni cahān yā jíin ña:

Vāha ni cahān ní. Cuáhán ní núu súcuan, chí je ni quenda tachī ún ini séhe síhí ní, achí yá.

³⁰ Te ni najinū ña vehe ña, te ni jito ña jeē catú séhe síhí ña nuū jíto, te je ni quenda tachī ún ini i.

Jeē ní nasávāha ya ñin tēe sóhó cástéte

³¹ Te ni quenda tucu ya región Tiro, ni yāha ya Sidón jíin táca ñuu Decápolis, te ni jinū yā mar Galilea. ³² Te ni caquindeca i ñin tēe sóhó cástéte nuū yā, te ni cacahān ndahú i jíin yá jeē na sóo yá ndaha ya síquī de. ³³ Te ni quenehen sūn ya de nuū ñayuu cuehē ún, te ni chune ya xinī ndáha ya sōho de, te ni tesíhi yá, te ni quehé yá yaá de. ³⁴ Te ni ndacoto ya ichi ándiví, te ni jítu ni yā, te ni cahān yā:

Efata, achí yá, jeē cuní cahān: Nanune.

³⁵ Te ni nanune-ni sōho de, te ni nduvāha yáa de, te ni nacañān vāha de. ³⁶ Te ni

ndacu ya jniñu nuū ñáyuu un jéē ma cáchi i nuū ní ñn. Te vésú ni cahān nīhin ya jíin i, te víhyá gā ni cajete i jnūhun. ³⁷ Te yōhyo ni canaa ni i cájito i, te ni cacahān i:

Vāha sáha ya tǎcá jniñu, chi nde tēe cásóhó, cánacuni sōho de, te tēe cándāa ññhín, cánacahān vāha de sáha ya, achí i.

*Jeē ni scáji yā cuūn mil ñayuu
(Mt. 15.32-39)*

8

¹ Te tiempo un ní candutútú cuéhē ndasí ñáyuu, te tuá na vé caji i. Te ni cana Jesús tēe cáscuáha jíin yá, te ni cahān yā:

² Cúndáhú ni rī ñayuu yāhá, chi je ni cuu unī quivī cáyūcú i jíin rí, te tuá na vé caji i.

³ Te núu natajī rí i quinhun ndite i vehe i, te cuíta íi i sava ichi, chi íyó sava i jeē jicá véjicoo i, achí yá.

⁴ Te tēe cáscuáha un ní cacahān de:

¿Te ndé nuū nihín yō staā caji i jíināhan i? Chi yāhá tú na ñayuu yūcu, achí de.

⁵ Te ni cajñūhun yá de:

¿Nasaa staā cánevāha ró?

Te ni cacahān de:

Uxā-ni, achí de.

⁶ Yūcuán na te ni cahān yā jíin ñáyuu cuehē un jéē na cúcōo i. Te ni quihin ya ndihúxá staā ún, te ni nacuatáhú yá nuū Yaā Dios. Te ni tahú cuéchí yá, te ni jēhe ya nuū tēe cáscuáha jíin yá. Te máa de ni casaja de nuū ñáyuu cuehē ún. ⁷ Te suni cándiso de jecu chācá lúlí. Te ni nacuatáhú yá siquī, te ni cahān yā jeē suni saja de jíināhan de.

⁸ Te ndihi i ni cayejí, te ni candutú chíji i. Yūcuán na te ni canastútú de pedazo jeē ní quendōo, te ni chitú úxā jīca. ⁹ Te tēe ni cayejí un, íyó nájnūhun cuūn mil de. Te ni nacuatáhú yá nuū ñáyuu ún, te cuanungoo i. ¹⁰ Yūcuán na te ni ndīvi-ni ya ini barco jíin tēe cáscuáha jíin yá, te cuahān yā región Dalmanuta.

*Jeē ní cajicān de ñn jniñu jéhnu nuū yā
(Mt. 16.1-4; Lc. 12.54-56)*

¹¹ Yūcuán na te ni quecoo tēe grupo fariseo, te ni caquejéé de stíchí de Jesús. Te cácuni de coto ndee de ya, te ni cajicān de jeē sáha ya ñn jniñu jéhnu jeē coo ñn seña ichi ándiví. ¹² Te ni jitū ni yā siquī jeē tu cáscandíje de jíināhan de, te ni cahān yā:

¿Naun cájicān ñayuu yáha ñn jniñu jéhnu nuū rī? Jendaá cahān rī jeē ma stéén rī ni ñn jniñu jéhnu nuū ñáyuu yāhá.

¹³ Te ni squéndōo ya de jíināhan de, te ni ndīvi tucu ya ini barco, te cuahān yā inga lado mar.

*Jñūhun levadura tēe fariseo
(Mt. 16.5-12)*

¹⁴ Te tēe cáscuáha jíin yá ni canaa ni de condiso de jeē cáji de, chi ñn-ni pan cánevāha de ini barco. ¹⁵ Te ni ndacu ya jniñu nuū de:

Coto má candíje ró levadura tēe grupo fariseo jíin levadura Herodes, achí yá.

¹⁶ Te ni cacahān tēe cáscuáha un jíin táca jnāhan de:

Va siquī jeē tú na staā ndíso yó, jeē yúcuán cáhān yā súcuán, achí de.

¹⁷ Te ni jini Jesús, te ni cahān yā:

¿Najehē cándajnūhun ró jeē ni cáhān rī súcuán siquī jeē tú na staā cándiso ró? ¿A ná tu cuni rō, á ná tu jecūhun ni rō jeē tu ní cáhān rī súcuán siquī jeē tu cándiso ró stáā? ¿A yóhyo uun ni rō candíje ró? ¹⁸ Iyó tñūu ró ¿te á tu cájito ró? Iyó sóho ró ¿te á tu cájini ró? ¿Te á tu cánucūhun ni rō? ¹⁹ Chi ná ni tahú cuéchí rí uhūn staā ni cayejí uhūn mil tēe, ¿te nasaa jīca ni chitú pedazo staā jeē ní canastútú ró? Achí yá.

Te ni cacahān de:

Uxī uū jīca, achí de.

²⁰ Te suni súcuán ná ni tahú cuéchí rí uxā staā ni cayejí cuūn mil tēe, ¿te nasaa jīca ni chitú pedazo staā jeē ní canastútú ró? Achí yá.

Te ni cacahān de:

Uxā jīca, achí de.

²¹ Te ni cahān yā jíin de:

Te nde vijna ¿á ná tu jecūhun ni rō jíināhan ró?

Súcuán ni cahān yatá yá jeē ma cándíje de jñūhun stáhú cástéén tēe ún.

Jeē ní nasávāha ya tēe cuáá ñuu Betsaida

²² Yūcuán na te ni jinū yā jíin de ñuu Betsaida. Te ni caquindeca ñayuu ñn tēe cuáá núu yā, te ni cacahān ndahú i jíin yá jeē na tēe ya ndaha ya nuū de. ²³ Yūcuán na te ni jñi ya ndaha tēe cuáá un, te ni quenehen ya de yatā ñūú ún. Te ni tee ya tesíhi yá tñūú de, te ni tee ya ndaha ya

siqui. Te ni cajñuhun yá de núu cuu coto de jecu. ²⁴ Te ni ndacoto de, te ni cahān de:

Jíto ná ñayuu jeē cájica i, te tu jíto cájí ná, chí ná cáa yujnu cáa i, áchí de.

²⁵ Yūcuán na te ni tee tucu ya ndaha ya siquī tinūú de. Te ni ndacoto vāha de, te ni nduvāha-ni tinūú de, te ni jito cájí de ndihi-ni. ²⁶ Te ni natají yá de quinhun de vehe de, te áchí yá:

Ma quiví ró ñuu, ni ma cáchi cuiti rō nuū ní ñn, áchí yá.

Jeē ni cahān Pedro jeē Jesús cúu Cristo
(Mt. 16.13-20; Lc. 9.18-21)

²⁷ Yūcuán na te Jesús jíin tēe cáscuáha jíin yá, cuahān yā tācá ndañūú Cesarea Filipo. Te ichi un ní cajñuhun yá de:

Ruhū, ¿ndé ñn cúu ri cácahān ñayuu?

²⁸ Te ni cacahān de:

Sava i cácahān jeē cúu ní Juan tēe ni scuándute. Te sava ga i cácahān jeē cúu ní Elías, tēe ni nacani jñuhun Yaā Dios nde jenahān. Te sava ga i cácahān jeē inga tēe ni nacani jñuhun Yaā Dios cúu ní.

²⁹ Yūcuán na te ni cajñuhun yá de:

Te máá ró, ¿ndé ñn cúu ri cácahān rō?

Te ni cahān Pedro:

Máá ní cúu Cristo, Yaā ní tají Yaā Dios, achí de.

³⁰ Te ni ndacu ya jniñu nuū de jíjnáhan de jeē ma cáchi de jñuhun yáha nuū ní ñn ñayuu.

Jeē ní castūhún Jesús jeē cúu yā
(Mt. 16.21-28; Lc. 9.22-27)

³¹ Te ni quejéé yá steén yā nuū de:

Máá rí, Yaā ní nduu tēe, cánuú ndoho xeēn rī. Te tāca tēe jéhu jíin sūtū cácujuhū jíin tēe cástéén tutu ley, squéhichī de ruhū, te cahni de ruhū. Te nuū uní quiví te natecu rī, achí yá.

³² Te cájí ní cahān yā jñuhun yáha. Yūcuán na te Pedro, ni cana máñuhūn de ya, te ni quejéé de cáhān de nuū yā jeē ma cuáha ya jñuhun coo súcuan. ³³ Te máá yá ni ndió cóto ya ni jito ya nuū tēe cáscuáha jíin yá. Te ni cahān yā nuū Pedro:

Cujiyo quihīn rō, chí cáhān rō ná cáhān Satanás. Chí tu jéni ní rō nájnūhun jéni ní Yaā Dios, chí sa suhva jéni ní rō nájnūhun cájéni ní ñayuu, achí yá.

³⁴ Te ni cana ya tēe cáscuáha jíin yá jíin ñayuu cuehē ún, te ni cahān yā:

Na-ni ñayuu núu cúní i condiquīn i ruhū, na cási i jeē cuní maá i, te na cóndiquīn i ruhū te cuāha i jñuhun ndoho i jñúndóho jeē siquí rī, vēsú na cúu i. ³⁵ Chí núu ndé ñayuu cuní i cácu i nuū jñúndóho quiiji nuū i jeē siquí ruhū, núu súcuan te jnahnū ndetū i ní cáni. Te núu ndé ñayuu, vēsú na cúu i jeē siquí ruhū jíin siquī jeē scáca i jñuhun jeē jnáma ri ñayuu, núu súcuan te cotecu i ní cáni. ³⁶ ¿Chí ndé cuajniñu vēsú na cúndeyí ñayuu nihīn i ní ñayiví, te núu quiví i nuū jnahnū ndetū i? ³⁷ Chí tú na jíin cuiti chunaa ñayuu jeē cácu ánuá i. ³⁸ Te ñayuu yáha tu cácañdije cuiti i, te máni máá cuéchi cása i. Te núu na-ni ñayuu cúcanu i nuū ñayuu yáha jeē siquí ruhū, Yaā ní nduu tēe, jíin siquī jñuhun cáhān rī, suni súcuan cucanu rī jeē siquí máá i, quiví ndíji ri jíin táca ndajéhé ndoo ri. Te quiví ún chí yōhyo luu cujéhu ri nájnūhun cújéhu Tátá rī. Achí yá.

9

¹ Te suni ni cahān yā jíin de jíjnáhan de:

Jendaá cahān rī jíin ró jeē sava tēe cáhīn yāhá, ma cúu de chí nde cuni de jeē ndácu Yaā Dios jniñu jíin poder yā, achí yá.

Jeē tucu ni nduu ya
(Mt. 17.1-13; Lc. 9.28-36)

² Yūcuán na te nuū iñú quiví te Jesús ni jeca ya Pedro jíin Jacobo jíin Juan, cuahān sñn ya jíin de ñn yucu súcún. Te yūcuán, tucu ni nduu ya nuū de. ³ Te sahma ya ni ndindēé, te ni nducujín quiyi, nájnūhun yuhvā volcán. Te tú ni ñn ñayuu ñayiví yáha cuu nacate jeē ndúquiyi ndasí súcuan. ⁴ Te ni cajito de jeē Elías jíin Moisés cándajnūhūn de jíin yá. ⁵ Yūcuán na te ni cahān Pedro jíin Jesús:

Maestro, nacā jeē váha jeē cáhīn na yáha. Te na sáha ná úní vehe ramada, ñn cuu máá ní, inga cuu Moisés, te inga cuu Elías, achí de.

⁶ Chí yōhyo ni cayūhu tēe cáscuáha ún, te Pedro tu ní sáha de cuenta na vé cúu jeē cahān de. ⁷ Te ni quiiji vicō nūhun ní jesí-ni nuū de. Te nuū vicó un ní cahān ñn jñuhun:

Yāha cúu Sēhe ri jeē maní ndasí rí jíin. Te na cúni nahín ró jnūhun cáhán yā. Achí.

⁸ Te ni candacoto-ni de, te tuá tēe un ní cájito de, chi máá ñn na Jesús.

⁹ Te ni cananuu de jíin yá yucu ún. Te ni ndacu nihin ya jniñu nuū de jeē ma cáchi de nuū ní ñn jeē súcuan ni cajito de, chi nde na nátecu maá yá, Yaā ní nduu tēe, áchí yá. ¹⁰ Jeē yúcuan ní cachuvāha de tāca jēe ní cuu ún, te cácajnūhun jnāhan de na jnūhun cúu jeē nátecu yā. ¹¹ Te ni cacajnūhún de ya:

Te tēe cástéén tutu ley Yaā Dios, ¿najehe cácahān de jeē cánuú ndiji Elías xīhna gā, te sáa te quiji Yaā cúu Cristo? achí de.

¹² Te ni cahān yā:

Jendaá cúu jeē xīhna gā quiji ñn tēe cúu nájñūhun Elías, te sātūhva de ndihi, áchí tutu. ¿Te ndese cáhán tucu tutu i siquī ruhū, Yaā ní nduu tēe? Cáhán jeē ndoho xeēn rī, te sájéē ni i nuū rī. ¹³ Te cáhán rī jíin ró jeē jé ni quiji tēe ni cuu nájñūhun Elías, te ni casáha ndevāha ñayuu jíin de tāca jēe ní cacuu ni maá i, nájñūhun cáhán jnūhun de nuū tútu, áchí yá.

Jeē ní nasávāha ya ñn sūchi ñūhun tachī ini (Mt. 17.14-21; Lc. 9.37-43)

¹⁴ Te ni najinū yā jíin de nuū sava ga tēe cáscuáha jíin yá, te ni cajito ya ñayuu cuehē ndasí, ni cajicó ndūū i de. Te suni cáhān tēe cástéén tutu ley Yaā Dios, cátejnāhan jíin de. ¹⁵ Te nuū ní cajito tāca ñáyuu un jēe véji ya, te ni canaa ni i. Te cájinu i cuango i nuū yā jeē cahān i jíin yá. ¹⁶ Te ni cajñūhun yá i:

¿Na siquī cátejnāhan ró jíin de jíjnāhan de? áchí yá.

¹⁷ Te ni cahān ñn tēe íne yūcuán:

Maestro, vendeca ná séhe ná núū ní, chi ñūhun ñn tachī ini i, te ni cuñhín i ni sáha. ¹⁸ Te ndé-ni cúu nuū íne i, te tachī un scótúú i, te jéni yíhí-ni i. Te jéé tiñū yuhu i, te squíhñi jnúhun i. Te cuacuxí ndasí i sáha. Te ni cahān ndahú ná jíin tēe cáscuáha jíin ní jeē na quēnehen de tachī ún, te tu ní cúu sáha de, áchí de.

¹⁹ Te ni cahān yā jíin de jíjnāhan de:

Ñayuu tu cándije cuiti cácuu ró. ¿Nasaa ga quiví condee rī jíin ró? ¿Te nasaa ga quiví cuandeyí ni rī jíin ró? Cuáquihin sūchí un, na quíji i, áchí yá.

²⁰ Te ni caquindeca de i nuū yā. Te nuū ní jito tachī un núū yā, te ni jehni yíhí-ni i. Te ni cotúú i, te cónéhén cócāni i, te jéé tiñū yuhu i. ²¹ Te Jesús ni cajñūhun yá tatá i:

¿Nasaa cuiyā ni cuu jeē sáha súcuan jíin i?

Te ni cahān de:

Nde lulí i. ²² Te ni cuu cuehē jíinu scótúú táchí ún i nuū ñuhún nuū ndúte, jeē cáhni i cúni. Te núu cuu sáha ní, te cundáhú ni ní chindéé ñáhán ní sāña jēe ndúvāha sēhe ná, áchí de.

²³ Te ni cahān Jesús jíin de:

Núu cuu cándije ró jēe sáha ri, chi ñayuu cándije te cuu tāca jēe cuní i, áchí yá.

²⁴ Te máá tátá sūchí un ní cahān jee de:

Cándije ná, te chindéé ñáhán ní sāña jēe cándije nihin ga ná, áchí de.

²⁵ Te ni jito Jesús jeē ní cutútú cuéhē ñayuu nuū yā. Te ni cahān yā nuū tachí:

Tachí jeē sañhín sásóhó, ruhū ndácu ri jniñu jeē na quénda ró ini sūchi yáha, te ma ndívi ga rō ini i, áchí yá.

²⁶ Yūcuán na te ni cana cóhó táchí ún, te ni jehni yíhí tucu i, te ni quenda cuahān. Te sūchí un ní cuu i nájñūhun ndívi. Te ni cacahān cuehē ñayuu jeē jé ni jihí i. ²⁷ Te Jesús ni jñi ya ndaha i, te ni ndonehen ya i, te ni nucuiñi-ni i.

²⁸ Yūcuán na te ni quiví ya ini ñn vehe, te tēe cáscuáha jíin yá, ni cacajnūhun sūn de ya:

¿Najehe tu ní cúu quenehen ná tachí un jíjnāhan ná? áchí de.

²⁹ Te ni cahān yā:

Ñn tachí súcuan chi ma quénda cuiti te núu tú cacān tahú rō te coo ndite ni rō, achí yá.

Jeē ni cahān tucu ya jeē cúu yā (Mt. 17.22-23; Lc. 9.43-45)

³⁰ Te ni quenda ya yūcuan jíin de jíjnāhan de, te ni yāha ya ndañúú Galilea cuahān yā. Te tu ní cúni yā jeē cúni ni ñn ñayuu. ³¹ Chi stéén yā nuū tēe cáscuáha jíin yá, te áchí yá:

Máá rí, Yaā ní nduu tēe, nastúu i ruhū nuū tāca tēe xeēn. Te cahni de ruhū, te núu ni jihí rī, te nuū uní quiví te natecu rī, achí yá.

³² Te tu ní cájecūhun ni de jnūhun yáha, te cáyūhú de cajñūhún de ya siquī jnúhun ni cahān yā.

*Ndé ñáyuu cúu jeē cujéhu ga
(Mt. 18.1-5; Lc. 9.46-48)*

³³ Te ni jinū yā jíin de ñuu Capernaum, te nuū ni quívi ya ini vehe, te ni cajnúhun yá de:

¿Na jnúhun ni candajnúhun ró ichi véji yó? áchí yá.

³⁴ Te tu ní cacahān cuiti de, chi ichi un ní cacahān de siquī núu ndé ñn de cujéhu ga.

³⁵ Yūcuán na te ni cucōo ya, te ni cana ya ndihúxí uū de, te ni cahān yā:

Núu ndé ñn ró cúní cujéhu ga, na cúu ró téé núu ga nuū tāca jnáhan ró, te cuajníñu ró núu jnáhan ró.

³⁶ Yūcuán na te ni jñi ya ndaha ñn sūchi lúli, te ni jeni ya i mēhñú de jíjnáhan de. Te ni nundee yā í, te ni cahān yā jíin de:

³⁷ Na-ni ñayuu núu jeē siquí ruhū jetáhú i ñn sūchi lúli nájnūhun sūchi yáha, te ruhū jetáhú i. Te ñayuu jetáhú rúhū, nasūu máá ñn-ni ruhū, chí suni Yaā ní tají rúhū jetáhú i, áchí yá.

*Ñayuu tu cáhán siquī yā, ín i jíin yá
(Mt. 10.42; Lc. 9.49-50)*

³⁸ Yūcuán na te ni cahān Juan jíin yá:

Maestro, ni cajito ná ñn tēe jeē jíin síhví ní quénehen de tachí ini ñayuu. Te ni cajesi ná jēé sáha de, chi tu jíca de jíin yó, achí de.

³⁹ Te ni cahān Jesús jíin de:

Ma cási ró jeē sáha de. Chi ni ñn tēe jeē jíin síhví rí sáha de jñiñu jéhu, ma cúu nacahān de siquī rí. ⁴⁰ Chi tēe tu cáhán siquī yō, ín de jíin yó. ⁴¹ Te na-ni ñayuu núu jeē siquí ruhū cuāha i vēsú ñn ñajin ndute coho ró, siquī jeē cá candíje ró ruhū, ndaā ndije cúu jeē nihín i tahū i. Achí yá.

*Xeēn coo siquī ñáyuu quívi nuū cuéchi
(Mt. 18.6-9; Lc. 17.1-2)*

⁴² Te núu ñn sūchi lúli yáha cándíje i ruhū, te núu quívi i cuéchi sáha na-ni ñayuu, te vāha ga núu ni conuhnī ñn yōso cáhnu sucūn ñayuu ún, te quēe i chíji ndute mar nuú.

⁴³ Te núu ndaha ró sáha jeē quívi ró cuéchi, vāha ga cahnde ró na quíhín, návāha tuá sáha ró cuéchi. Chi vāha ga jeē cóndee ñn-ni ndaha ró te quívi ró núu cotecu ró ní cáni, vēsú jeē cóndee ndíndúú ndaha ró te quívi ró infierno, nuū cayú ñuhūn jeē ma ndahvá cuiti. ⁴⁴ Te yūcuán chi tu cájihī tīndacú, te tu

ndahvá cuiti ñuhūn. ⁴⁵ Te núu jehē ró sáha jeē quívi ró cuéchi, suni vāha ga cahnde ró na quíhín, návāha tuá sáha ró cuéchi. Chi vāha ga jeē cóo cúhndu ró te quívi ró núu cotecu ró ní cáni, vēsú jeē cóndee ndíndúú jehē ró te quívi ró infierno, nuū cayú ñuhūn jeē ma ndahvá cuiti. ⁴⁶ Te yūcuán chi tu cájihī tīndacú, te tu ndahvá cuiti ñuhūn. ⁴⁷ Te núu tīnūu ró sáha jeē quívi ró cuéchi, vāha ga tava ró na quíhín, návāha tuá sáha ró cuéchi. Chi vāha ga jeē quívi ró ñuu nuū ndácu Yaā Dios jñiñu jíin ñn na tīnūu ró, vēsú jeē cóndee ndíndúú tīnūu ró te quívi ró infierno. ⁴⁸ Te yūcuán chi tu cájihī tīndacú, te tu ndahvá cuiti ñuhūn.

⁴⁹ Chi nájnūhun quénda vāha oro sáha ñuhūn, súcuan quénda vāha ñayuu sáha jñúndóho. Te tāca cúñu jeē socó ñayuu nuū yā, cúhuvuā sáha ññ. ⁵⁰ Vāha íyó ññ, te núu ññ ún na náā jeē uhvuá, ¿te ndese nduu uhvuá tucu sáha ró? Núu súcuan te cuu ró ñayuu vāha, nájnūhun íyó vāha ññ. Te na cóyūcu vāha ró jíin jnáhan ró. Achí yá jíin de.

*Siquī jeē ma stóo jnáhan tēe jíin ñahan
(Mt. 19.1-12; Lc. 16.18)*

10

¹ Te ni quenda ya ñuu Capernaum, te ni jinū yā región Judea, inga lado yūte Jordán, ichi nuū cáne niāndii. Te yūcuan ní cutútú tucu ñayuu nuū yā, te ni steén tucu ya jnúhun nuū i, nájnūhun sáha ya. ² Yūcuán na te jecu tēe grupo fariseo ni quecoo de nuū yā, chí cácuni de coto ndee de ya núu ndese cahān yā. Te ni cacajnúhún de ya núu íyó ley jeē cuu ndusín ñn tēe jíin ñasihí de. ³ Te ni cahān yā jíin de:

¿Na jñiñu ni ndacu Moisés nuū ró nde jenahán?

⁴ Te ni cacahān de:

Moisés ni jēhe de jnúhun jeē cúvāha ñn acta jeē ndusín de jíin ña, te ndōo ña, áchí de.

⁵ Te ni cahān Jesús jíin de:

Siquī jeē níhni ní ró jíjnáhan ró, jeē yúcuán ní ndacu de jñiñu yáha nuū ró. ⁶ Te nde xihna ñuhún, ná ní sáha Yaā Dios ndihí, chí tēe jíin ñahan ní sáha ya. ⁷ Jeē yúcuán cúu jeē stóo tēe tátá de náná de, te quíjnáhan de jíin ñasihí de. ⁸ Te ñn na cuu ndíndúú de, áchí

Yaā Dios. Núu súcuan te tuá cúu uū jnáhan de, chí ñn na cúu. ⁹Jeē yúcuán tu íyó váha jeē stóo jnáhan, chí jeē ní squíjnéhan Yaā Dios cúu, áchí yá.

¹⁰Te tēe cáscuáha ún nuū ní quívicoo de vehe, te ní cacajnūhún tucu de ya siquī jnúhun ún. ¹¹Te ní cahān yā jíin de:

Núu ndé tēe stóo de ñasihí de te condeca de inga ñahan, núu súcuan te cásiquí ndé de ñasihí de. ¹²Te núu ñn ñahan stóo ña yí ña te condeca ña inga tēe, suni cásiquí ndé ña de. Achí yá.

Jeē ní jicān tahu Jesús jehē sūchi lúli
(Mt. 19.13-15; Lc. 18.15-17)

¹³Yūcuán na te ní quecoo ñayuu jíin sūchi lúli, jēe na sóo yá ndaha ya xinī i. Te tēe cáscuáha jíin yá, ní cacahān de nuū ñáyuu vējicoo jíin i. ¹⁴Te ní jito Jesús, te ní quitī ní yā, te ní cahān yā jíin de:

Cuāha jnúhun na quíjicoo sūchi lúli jíñā nuū rī, te ma cási rō jeē quíjicoo i. Chí ñayuu jeē ndió cóo ní i caní ní i nájñuhun sūchi yáha, suu i quíví ndaha Yaā andiví jeē ndacu ya jniñu nuū i. ¹⁵Te jendaá cahán rī jíin ró, núu ñn ñayuu tú cuatáhú i jeē ndacu Yaā Dios jniñu nuū i, nájñuhun jétáhú ñn sūchi lúli, ma quíví cuiti i ndaha ya, achí yá.

¹⁶Te ní nundee ya i, te ní soó yá ndaha ya xinī i, te ní jicān tahu yā jehē i jíjnéhan i.

Jnúhun tēe cúca
(Mt. 19.16-30; Lc. 18.18-30)

¹⁷Yūcuán na te ní quihín tucu ya ichi cuahān yā. Te jínu ñn tēe ní quee de, te ní jecuiñi yití de nuū yā, ní cajñuhún de ya:

Tēe vāha cúu ní Maestro. Te cachi ní, ¿na jniñu váha sáha ná te nihín tahu na cotecu na ní cáni andiví? áchí de.

¹⁸Te ní cahān yā jíin de:

¿Naun cáhán rō jeē tēe vāha cúu rī? Tú ní ñn tēe vāha íyó, chí máá ñn-ni Yaā Dios. ¹⁹Je jíni rō táca jniñu ní ndacu Yaā Dios: Ma cosíquí ndé jnéhan ró. Ma cáhni rō ndíyí. Ma sacuíhná ró. Ma sajnūhún ró. Ma stahú ró jnéhan ró. Cuatáhú ró nuū tatá rō nuū naná rō. Achí yá.

²⁰Te ní cahān tēe un jíin yá:

Táca jniñu yáha je ní squícu ná ndé ná lúli ná, Maestro, achí de.

²¹Yūcuán na te ndáhú jito ya nuū de jeē cúsi ní yā jíin de. Te ní cahān yā:

ñn na jniñu cúmanī sáha ró núu súcuan. Cuáhán te xīco ró ndíhi jeē névāha ró, te cuāha ró núu ñáyuu ndahú. Te nde andiví cuāha ya jeē váha ndasí núu rō. Yūcuán na te quiji ró condiquín rō ruhū, te cuāha ró jnúhun ndoho ró jnúndóho jeē siquí rī, achí yá.

²²Te ná ní jini sōho de jnúhun yáha, te ní jnahuhū ní de, te cúcuíhyá ní de cuahān de, chí cúca ndasí de.

²³Yūcuán na te Jesús ní ndacoto ya ní xiin ya, te ní cahān yā jíin tēe cáscuáha jíin yá:

Tēe cúca chí yōhyo yí quívicoo de ndaha Yaā Dios jeē ndacu ya jniñu nuū de, áchí yá.

²⁴Te tēe cáscuáha jíin yá, yōhyo ní canaa ní de jeē ní cajini de jnúhun ní cahān yā. Te ní cahān tucu ya jíin de:

Séhē, ñayuu tēnuū xūhún, yōhyo yí quívicoo i ndaha Yaā Dios jeē ndacu ya jniñu nuū i. ²⁵Yachí gā yāha ñn camello yaū yutícuí, vésú jeē quíví ñn ñayuu cúca ndaha Yaā Dios jeē ndacu ya jniñu nuū i, áchí yá.

²⁶Te víhyá gā ní canaa ní de cájini de, te ní cacajnūhun jnéhan de:

¿Ndé ñáyuu cúu jeē cácu núu súcuan?

²⁷Te ní ndacoto ya nuū de, te ní cahān yā:

Ñayuu chí ma cúu squíví i máá i ndaha Yaā Dios, te máá yá chí cuu sáha ya, chí ndíhi-ni jniñu cuu sáha ya, achí yá.

²⁸Yūcuán na te ní cahān Pedro jíin yá:

Sāña jíjnéhan ná, ní castóo ná ndíhi jeē cánevāha ná, te cándiquín na níhín, áchí de.

²⁹Te ní cahān Jesús:

Jendaá cahán rī jíin ró jíjnéhan ró, núu na-ni ñayuu stóo i vehe, chí ñani, chí cuāha, chí tátá, chí náná, chí ñasihí, chí séhe, chí ñuhun, jeē siquí ruhū jíin síquī jeē scáca i jnúhun jeē jnáma rī ñayuu, ³⁰núu súcuan te nanihín i ñn ciento gā jeē súcuan vijna, cúu vehe, cúu ñani, cúu cuāha, cúu náná, cúu séhe, cúu ñuhun, te nde jíin jēe cóto xeē ñayuu i. Te nde inga vida quiji te cotecu i ní cáni. ³¹Te cuehē ñayuu jeē vijna cácujuhnu, nduu i ñayuu núu ga. Te ñayuu jeē núu ga vijna, chí ndujéhnu i, áchí yá.

Jeē ní cahān tucu ya jeē cúu yā
(Mt. 20.17-19; Lc. 18.31-34)

³²Te cáñuhun de ichi jeē cáca cuahān ñuu Jerusalén. Te Jesús yósnúu yá nuū tēe

cáscuáha ún. Te cánaa ni de ni cajini sōho de jnūhun ni cahān yā. Te cáyūhú de cuángoo de jíin yá. Yūcuán na te ni cana sūn tucu ya ndihúxí uū tēe cáscuáha, te ni quejéé yá cástūhún tucu ya nuū de tāca jéē quíji siquī yā. ³³ Achí yá:

Cuni sōho ró, chi je cuángoo yó ñuu Jerusalén vijna, te yūcuán nastúu ñayuu ruhū, Yaā ní nduu tēe, nuū sutú cácujuhnu jíin núū tēe cástéén tutu ley. Te ndonda de siquī rī jeē cúu rī, te squívi de ruhū nuū tēe nación Roma jeē cáyūcú Jerusalén cándacu jniñu. ³⁴ Te tāca tēe un sácatā de nuū rī, te caní de ruhū, te tesihí de nuū rī, te sáá te cahni de ruhū. Te nuū uní quívi te natecu rī, achí yá.

Jeē ni jíicān Jacobo jíin Juan ñn favor nuū yā
(Mt. 20.20-28)

³⁵ Yūcuán na te Jacobo jíin Juan, ndíndúú séhe Zebedeo, ni quecoo de nuū Jesús, te ni cacahān de:

Maestro, cácuñi na jéē sáha ní ñn jeē cacán na núū ní, achí de.

³⁶ Te ni cahān yā jíin de:

¿Ndese cácuñi rō jeē sáha ri jíin ró? achí yá.

³⁷ Te ni cacahān de:

Cuāha ní jnūhun jeē cónēne ná xiin ní quívi ndujéhnu ní, ñn ná lado váha ní, te ñnga ná lado jecó ní, achí de.

³⁸ Yūcuán na te ni cahān Jesús jíin de:

Tu cájini rō na vé cúu jeē cájicān rō. ¿A cuu ndoho ró jnúndóho nájnūhun jeē quíji siquī rī? ¿Te á canda ró ndoho xeēn rō nájnūhun ndoho rī? achí yá.

³⁹ Te ni cacahān de:

Cuu sáha ná.

Te ni cahān yā jíin de:

Jendaá jeē ndoho ró jnúndóho nájnūhun jeē quíji siquī rī, te ndoho xeēn rō nájnūhun ndoho rī. ⁴⁰ Te jeē cónēne ró lado váha ri jíin lado jecó rí, nasūu rúhū cúu jeē cuáha jnūhun. Chi je íyó túhva cuu tāca tēe jeē ní nacāji Tátá rī, te tēe un níhīn, achí yá.

⁴¹ Te uxī gā tēe cáscuáha un, ní cajini de jnūhun yáha, te ni caquítī ni de nuū Jacobo jíin Juan. ⁴² Te Jesús ni cana ya de, te ni cahān yā jíin de:

Cájini rō ndese cásáha tēe cácujuhnu nuū ñáyuu tācá nación. Chi cándacu níhin de jniñu nuū i, te máá de cáhí ndese coo.

⁴³ Te máá ró jijnáhan ró, chi ma sáha ró súcuan. Chi núu ndé ñn ró cúní cujéhnu, sa suhva cuajniñu ró núū jnáhan ró. ⁴⁴ Te núu ndé ñn ró cúní cuu nuū, sa suhva sáha ró máá ró mozo nuū tāca jnáhan ró. ⁴⁵ Chi suni súcuan sáha ruhū, Yaā ní nduu tēe, chi nasūu jéē véji ri jeē cuajniñu ñayuu nuū rī, chi sa suhva véji ri jeē cuajniñu ri nuū ñáyuu. Te cuāha ri máá rí cuu rī návāha jnama ri cuehē ñayuu, achí yá.

Jeē ní nasávāha ya Bartimeo tēe cuáá
(Mt. 20.29-34; Lc. 18.35-43)

⁴⁶ Yūcuán na te ni jinū yā ñuu Jericó jíin tēe cáscuáha jíin yá. Te sáá te ni quenda ya yūcuan jíin de jíin ñáyuu cuehē ndasí. Te Bartimeo tēe cuáá, séhe Timeo, néne de yuhíchi, jíicān de caridad. ⁴⁷ Te ni jini de jnūhun jeē Jesús ñuu Nazaret véji ya. Te ni quejéé de cána jee de:

Jesús Séhe yucūn David, cundáhú ni ni sáña, achí de.

⁴⁸ Te cuehē ñayuu ni cacahān i nuū de jeē na cási de yuhu de. Te máá de víhyá gā ní cana jee de:

Máá ní jeē cúu ní Séhe yucūn David, cundáhú ni ni sáña víi, achí de.

⁴⁹ Yūcuán na te ni jecuiñī Jesús, te ni cahān yā:

Cana de na quíji de.

Te ni cacana i tēe cuáá un:

Ndeyí coo ni rō. Ndocuiñī, na quíhín yō, chí cána ya rohó, achí i jíin de.

⁵⁰ Yūcuán na te ni scáne de ticāhí de, te yachī ni ndocuiñī de, te ni jinū de nuū Jesús.

⁵¹ Te ni cahān yā jíin de:

¿Na vé cuní rō jeē sáha ri jíin ró?

Te máá de ni cahān de:

Maestro, jeē na ndúndijin tinūu ná cuní na, achí de.

⁵² Te ni cahān Jesús jíin de:

Cuáhán núu súcuan. Ni candíje ró jeē cuu nasávāha ri rohó, te jeē yúcuan ní nduvāha ró, achí yá.

Te ni ndundijin-ni tinūú de, te ni ndiquīn de Jesús cuahān de jíin yá ichi ún.

Jeē ni quívi Jesús ñuu Jerusalén
(Mt. 21.1-11; Lc. 19.28-40; Jn. 12.12-19)

11

¹ Te ni cuyajni ya ñuu Jerusalén, vēji ya ñuu Betfagé jín ñuu Betania, jeē íne jehē yucu Olivos. Te ni tají yá uū tēe cáscuáha jín yá jeē quíngoo de. ² Te áchí yá jín de:

Cuángoo ñuu lulí íne ichi núú. Te núu ni quívi-ni ró yúcuán, te nihín rō ñn burro núhni tī, jeē ní ñn tēe ná tu coso de tī. Te ndají ró tī, quijicoo ró jín tí. ³ Te núu ndé ñn cajnúhún naun cándají ró tī, te cachi rō: Máa Jítoho yō jíní ñúhún yá tī, te yachí natají yá tī ndiji tī, achi rō. Achí yá jín de.

⁴ Te cuangoo de, te ni canihín de burro un núhni tī yehyí núú quéhe nuū náquijnáhan ichi. Te ni candají de tī. ⁵ Te sava ñayuu cáhín yúcuán ní cacahán jín de:

¿Na vé cúu jeē casáha ró jeē cándají ró burro jínā? achí i.

⁶ Yúcuán na te ni cacahán de nájnūhun ni cachi Jesús. Te ni casiáá i tī vējicoo de jín tí. ⁷ Te ni ndecoo de jín tí nuū Jesús, te ni casoó de sahma de siquī tī, te ni jecosō yā tī. ⁸ Te cuehē ñayuu ni cascáá i sahma i ini ichi. Te sava ga i ni cajehnde i ndaha núú, te ni cachucun i ini ichi ún.

⁹ Te ñayuu cuangoo ichi núú jín ñayuu cuangoo ichi yátá, cácana jee i:

Yōhyo cújéhnú ya. Yōhyo vāha Yaā cúu Yaā jeē vēji jín jniñu máa Jítoho yō Yaā Dios. ¹⁰ Te yōhyo luu coo, chí je yajni ndacu ya jniñu nájnūhun ni ndacu jí yō rey David. Te yōhyo cújéhnú máa Yaā Dios. Achí i.

¹¹ Te ni quívi Jesús ñuu Jerusalén, jín ini templo cáhnu. Te ni jito ya nuū táca ndajniñu yúcu ní yúcuán. Te ni quenda ya cuahán yā ñuu Betania jín ndihúxí uū de, chí je ni ini.

Jeē ni cáhán yā nuū yújnu higo
(Mt. 21.18-19)

¹² Te inga quívi ún, nuū ní quenda ya ñuu Betania cuahán yā jín de, te jí yā sōco. ¹³ Te nde jicá ni jito ya ñn nundēhe higo jeē ín ndaha. Te ni jecondēhe yá núu sanaa te nihín yā ndehē caji yā. Te tú na vé ni níhín yā, chí máa ndaha-ni ín. Chí nasūu tiempo ndehē cúu. ¹⁴ Yúcuán na te ni cahán yā nuū yujnu ún:

Tuá na ndehē cuun cuítí xinī rō jeē cáji ñayuu, achí yá.

Te tēe cáscuáha jín yá ni cajini de jeē súcuán ni cahán yā.

Jeē ní quenehen ya ñayuu ini templo
(Mt. 21.12-17; Lc. 19.45-48; Jn. 2.13-22)

¹⁵ Te ni najinū yā jín de ñuu Jerusalén. Te ni quívi ya ini templo cáhnu, te ni quenehen ya ñayuu cájeen quití te cánaxico núú ñayuu jeē socō i. Te ni scotúú ndeyí ya táca mesa tēe cástáyí xūhún, jín silla tēe cáxícó paloma. ¹⁶ Te tu ní jéhe ya jnūhun jeē yáha ñayuu ini templo jín ndajniñu ndíso i. ¹⁷ Te ni steén yā jnūhun nuū i, achí yá:

Yósó núú tútu íi jeē cahán Yaā Dios: Vehe ri chí vehe nuū cájicán tahuñayuu táca nación cúu, achí yá. Te máa ró jijnáhan ró chí nájnūhun yaū cava ñacuñna ní canasáha ró, achí yá.

¹⁸ Te tēe cástéén tutu ley Yaā Dios jín sútú cácujeñnu, ni cajini de jnūhun yáha, te ni quejéé de cánducú de modo ndese cahni de ya. Chí cáyūhú de jeē ndujéhnú ga maá yá vésú maá de, chí táca ñayuu yōhyo cácusí ni i cájini i jnūhun stéén yā. ¹⁹ Te jeē cuácuaa, te ni quenda ya ñuu Jerusalén cuahán yā.

Jeē ni íchí nundēhe higo
(Mt. 21.20-22)

²⁰ Te jenéhen inga quívi ni nayāha ya jín de cuahán yā. Te ni cajito de jeē nundēhe higo un je ni íchí nde yoho. ²¹ Yúcuán na te ni nucūhun ni Pedro, te ni cahán de jín yá:

Maestro, cundēhe ní nundēhe higo jeē ni cáhán ni núú, te vijna je ni íchí caján, achí de.

²² Te ni cahán Jesús jín de:

Candíje ró jéé sáha Yaā Dios jeē jicán rō. ²³ Chí jendaá cahán rī jín ró, núu ndé ñayuu cahán i jeē cújiyo yucu yáha quihín nde nuū mar, te núu tú nacani siquí ní i, chí sa suhva candíje i jeē cóo nájnūhun ni cahán i, yúcuán na te cundaā jeē ní jicán i. ²⁴ Jeē yúcuán cáhán rī jín ró, táca jéé cacán tahuñ rō, te núu candíje ró jéé nihín rō, te nihín rō. ²⁵ Te jeē cájicán tahuñ rō, te cone cáhnu ni rō nuū ñayuu casáha cuēchi siquí rō, návāha máa Tátá rō jeē ndeé yá andiví, suni cone cáhnu ni yā nuū cuéchi ró. ²⁶ Chí núu tú cone cáhnu ni rō nuū jnáhan ró, te suni máa Tátá rō jeē ndeé yá andiví, ma cóne cáhnu ni yā nuū cuéchi ró, achí yá.

*Siqui jeē ndíso jniñu Jesús
(Mt. 21.23-27; Lc. 20.1-8)*

²⁷ Yūcuán na te ni najinū tucu ya ñuu Jerusalén. Te jica cuu ya ini templo cáhnu. Te sutū cácujeñnu jíin téé cástéén tutu ley Yaā Dios jíin téé jéñnu cándacu jniñu, ni quecoo de nuū yā. ²⁸ Te ni cacajñuhún de ya:

¿Ndé ní nihīn jniñu ró jéē sāha ró jniñu yáha? ¿Te ndé ñn ni tee jniñu siquī rō jeē sāha ró súcuán? áchí de.

²⁹ Te ni cahān Jesús:

Suni ruhū, cajñuhun rí rohó ñn jñuhun jíjnáhan ró. Te núu cuu stío cuñí rō, yūcuán na te cachi rī nuū rō ndé ní nihīn jniñu ri jeē sāha ri jniñu yáha. ³⁰ ¿Ndé ñn ni tee jniñu siquī Juan jeē ni scuándute de? ¿A Yaā Dios chí táca téé? Cachi nuū rī, achí yá.

³¹ Yūcuán na te ni candajñuhun máá de:

Núu cahān yō jeē Yaā Dios ni tee ya jniñu un siquī Juan, te cahān de jíin yó: Núu súcuán ¿te najehē tu ní cá candíje ró de? ³² Te núu cahān yō jeē ñáyuu ni catee jniñu un siquī de, te quitī ni ñayuu nuū yō, achí de cácahān maá de.

Chi cáyūhú de jeē quitī ni ñayuu, chi ndivii i cá candíje i jeē téé ni nacani jñuhun Yaā Dios ni cuu ndije Juan. ³³ Jeē yúcuán ní cacahān de jíin yá:

Tu cájini rī, achí de.

Yūcuán na te ni cahān Jesús:

Ni ruhū, suni ma cáchi rī nuū rō ndé ñn ni tee jniñu siquī rī sāha ri jniñu yáha, achí yá.

*Jñuhun yátá siquī téé néé cá sájniñu nuū uva
(Mt. 21.33-46; Lc. 20.9-19)*

12

¹ Te ni quejéé yá cahán yā jñuhun yátá jíin de jíjnáhan de:

Ñn téé ni nachuhun de cuehē uva, te ni jesi de corral, te ni sāha de ñn nuū cūhun ndehē un táxīn. Te ni sāha de ñn vehe súcún návāha cuu coto de ñí cáhnu.

Te ni stóo de nuū sava téé sájniñu nuū, te cuu sava de ndehē jíin. Te ni tee de ichi cuahān jicá de. ² Te máá tiempo ndutútú uva, te ni tají de ñn mozo de cuanuquīhin sava uva nuū téé cá sájniñu ún. ³ Te téé un ní cajñi de mozo un, te ni cacani de

i, te ni canatají de i cuanuhun i súcuán-ni. ⁴ Yūcuán na te téé chíí uva un ní tají tucu de inga mozo cuahān. Te téé cá sájniñu un ní cajēhe de yuū xinī mozo un, te ni castújí de, te ni cacahān ndevāha de nuū. ⁵ Te téé chíí uva ni tají tucu de inga mozo cuahān. Te ni cajehni de i. Te suni súcuán ni tají de cuehē gā mozo cuahān, te sava i ni cacani de, te sava i ni cajehni de.

⁶ Te téé chíí uva, íyó ñn sēhe de jeē maní ndasí de jíin. Te jeē sándīhí na ni tají de sēhe de un cuahān nuū téé cá sájniñu. Te jéni ni de: Téé ún chi cuatáhú de jíjnáhan de nuū séhe ri. ⁷ Te téé cá sájniñu un ní cacahān maá: Téé chíí táhū cúu jeē yáha. Na cáhni yō de, te ndōo tahū de cuu máá yó, achí. ⁸ Te ni cajñi de i, ni cajehni de i, te ni cascāne de i inga lado. Achí yá.

⁹ Yūcuán na te ni cajñuhun yá de:

Núu súcuán ¿te ndese sāha téé chíí uva un? Ndiñi de te cahni de téé cá sájniñu ún, te cuāha de ñuhun cáá uva un núu inga sava téé sájniñu nuū.

¹⁰ ¿Te á ná tu cahu ró jñuhun yáha jéé yosó núu tútu íi, jeē ruhū cúu nájnūhun ñn yuū? Chi achí tutu:

Yuū jeē ní casquéhichí téé cájeni vehe, yuū yáha nduu jeē quitū vehe.

¹¹ Máá Jítoho yō Yaā Dios ni sāha ya súcuán, te cánaa ni yō jíto yó jniñu yáha. Achí tutu, achí yá.

¹² Yūcuán na te ni canducú de modo jñi de ya. Chi ni cajecūhun ni de jeē siquī maá de cúu jñuhun yátá ní cahān yā siquī téé cá sájniñu nuū uva jíin téé cájeni vehe. Te siquī jeē cáyūhú de jeē quitī ni ñayuu, te ni castóo de ya te cuangoo de.

Siqui xūhun renta

(Mt. 22.15-22; Lc. 20.20-26)

¹³ Yūcuán na te ni catají de sava téé grupo fariseo jíin téé grupo Herodes cuangoo de nuū yā, ndúcú de ndese sāha de návāha cahān yā ñn jñuhun jeē nihín de cuēchi siquī yā. ¹⁴ Te ni quecoo de, te ni cacahān de jíin yá:

Maestro, cájini na jéé téé cáhán ndaā cúu ní, te tu yúhú ní jeē cahán ni ñn ñayuu siquī ní. Chi tu sāha ní cuenta ndese cúu ñn ñn i, chi inuú-ni sāha ní jíin i. Te stéén ndaā ní ndese squícu ñayuu nuū Yaā Dios. ¿Te á

íyó váha jeē chúnāa yō renta nuū rey nación Roma jeē jnīi nación yō, chí tuú? ¿A chúnāa yō, chí má chúnāa yō? Achí de jín yá.

¹⁵ Te máá yá jiní yā jeē stahú-ni de, te ni cahān yā jín de:

¿Najehē cájito ndee rō ruhū? Cuāha ñn xūhún na cóto ri, achí yá.

¹⁶ Te ni cajēhe de xūhún. Te ni jito ya, te ni cajnūhun yá de:

¿Ndé ñn nuū cúu jeē ndeé nuū xūhun yáha, te ndé síhví cúu jeē ndeé yāhá?

Te ni cacahān de jín yá:

Nuū jín síhví rey un cúu, áchí de.

¹⁷ Yūcuán na te ni cahān yā jín de:

Núu súcuan te nacuāha ró núu rey un jéé yíhi cuenta nuū de, te nacuāha ró núu Yaā Dios tāca jéé yíhi cuenta nuū maá yá, achí yá.

Te ni canaa ni de ni cajini de jeē ndichí ní cahān yā.

Jeē ní cacajnūhún de siquī jeē nátecu ndīyi (Mt. 22.23-33; Lc. 20.27-40)

¹⁸ Yūcuán na te jecu tēe grupo saduceo ni quecoo de nuū yā. Te tēe un cácahān jeē tu nátecu cuii ndīyi. Te ni cacahān de jín yá siquī ñn jnūhun, áchí de:

¹⁹ Maestro, Moisés ni tee de nuū tútu jeē cánevāha yó: Núu ñn tēe cuu de, te ndōo ñasihí de, te núu tu ní íyo sēhe de jín ña, núu súcuan te cánuú jeē ñani de naquihin ñasihí de, te sēhe de jeē cácu jín ña nucuñí i nuū ndīyi ñani de, áchí tutu. ²⁰ Núu súcuan te ni íyo uxā ñani. Te tēe núu ní quijnāhan de jín ñahan. Te ni jihí de, te tú sēhe de ní íyo. ²¹ Te tēe uū ni naquihin de ña, te suni ní jihí de, te tú sēhe de ní íyo. Te suni súcuan tēe unī.

²² Te ndihúxá de ni condeca de ña, te ni ñn de tú sēhe de ní íyo. Te jeē sándihí te suni ní jihí ñahan ún. ²³ Núu súcuan te núu na nátecu de jijnāhan de quiví nátecu ndīyi, ¿te ndé ñn de cuu ña ñasihí de? Chi ndihúxá de ni condeca de ña. Achí de jín yá.

²⁴ Yūcuán na te ni cahān yā jín de:

Yōhyo cástívi ró jnūhun siquī jeē tu cájecūhun ni rō jeē cahán tutu ñi, ni tu cájini rō jeē iyó poder Yaā Dios jeē nastécu yā ndīyi. ²⁵ Chi quiví nátecu ndīyi, te tuá na jnūhun quijnāhan tēe jín ñahan coo. Chi coo i nájnūhun ndajéhé Yaā Dios andívi. ²⁶ Te siquī jeē nátecu ndīyi, ¿á tu ní cácahu ró tutu

ni tee Moisés, ndese ni cahān Yaā Dios jín de mēhñu yúcū jeē cayú yáñuhūn? Máá rí cúu Yaā Dios Abraham jín Isaac jín Jacob, achí yá jín Moisés. ²⁷ Chi vésú je ni cajihí de, te cátecu de nuū iyó máá yá, chí cúu ya Yaā sáha jeē técu ñayuu ní cáni. Yōhyo cástívi ró jnūhun núu súcuan. Achí yá jín de.

Jniñu cánuú ndasí gá jeē ní ndacu Yaā Dios (Mt. 22.34-40)

²⁸ Te ni quee ñn tēe stéén tutu ley Yaā Dios, te ni jini de jeē castíchí jnāhan tēe un jín Jesús. Te ni jini de jeē váha ni nastió cuiñí yā jnūhun. Te ni cajnūhún de ya:

¿Ndé ñn cúu jnūhun ndácu jniñu cánuú ndasí gá nuū tāca gá jniñu ni ndacu ya jenahán? áchí de.

²⁹ Te ni cahān Jesús jín de:

Yāha cúu jniñu jeē cánuú ndasí gá nuū tāca gá. Achí tutu: Ñayuu Israel, cuni nahín ró. Máá Jítóho yō Yaā Dios, maá ñn-ni ya iyó. ³⁰ Núu súcuan te coo maní ndasí ró jín máá Jítóho rō Yaā Dios, nde jnāā ndasí ró sáha ró ndihí jeē cúsi ni yā, nde jín ini jín ánuá rō, jín ní jeē níjnūní rō, jín ní fuerza rō. Yāha cúu jniñu ndácu ya jeē cánuú ndasí gá. ³¹ Te jniñu uū jeē ní ndacu ya, suni súcuan cáhán: Cundáhú ni rō jnāhan ró nájnūhun cundáhú ni rō maá ró. Tuá ñga jnūhun ndácu jniñu cánuú gá iyó, chí suu máá jéé yáha-ni. Achí yá jín de.

³² Yūcuán na te ni cahān tēe stéén tutu ley jín yá:

Vāha ni cahān ní, Maestro. Chi ndaā chí iyó ñn-ni Yaā Dios, te tuá na ñga yā iyó. ³³ Te cánuú jéé coo maní ndasí yó jín yá nde jín ini jín ánuá yō, jín ní jeē níjnūní yō, jín ní fuerza yō, te cundáhú ni yō jnāhan yó nájnūhun cundáhú ni yō maá yó. Te cánuú ndasí gá jeē yáha vésú jeē cáhmu yó quiñi jín táca gá jeē socó yō nuū yā. Achí de jín yá.

³⁴ Yūcuán na te ni jini Jesús jeē váha ni stió cuiñí de, te ni cahān yā jín de:

Je yajni cuu quiví ró ndaha Yaā Dios jeē ndacu ya jniñu nuū rō, achí yá.

Yūcuán na te ni ñn ga de, tuá ni chundeyí ni de cajnūhún de ya.

Siquī jeē cúu Cristo sēhe yucūn David (Mt. 22.41-46; Lc. 20.41-44)

³⁵ Te stéén Jesús jnūhun ini templo, te ni cahān yā:

¿Ndese cúu jeē cácahān tēe cástéén tutu ley Yaā Dios jeē Cristo cúu sēhe yucūn David?

³⁶ Chi máá David suhva ni cahān de jnūhun ya ni sáha Espíritu Santo nde jenahán:

Máá Jítóho yō Yaā Dios ni cahān yā jiín Jítóho rī, Yaā quiji:

Cucōo ró lado váha ri nuū cujéhnū ró, te na sáha ri jeē quende rō poder tāca jéé cájito uhū rohó.

Achí Yaā Dios. Achí David. ³⁷ Te núu sēhe yucūn David cúu Cristo, ¿te ndese cúu jeē ni cáhān de jeē Jítóho de cúu ya? áchí yá.

Te ñayuu cuehē, cánujnahan ni i cájini nahín i tāca jnúhun cáhān yā.

Jeē ni cáhān yā jeē iyó cuéchi de jínáhan de (Mt. 23.1-36; Lc. 11.37-54; 20.45-47)

³⁸ Te stéén yā jnūhun, te ni cahān yā jiín i:

Coto má candíje ró tāca tēe cástéén tutu ley. Chi cácusī ni de cáñuhun de sahma cáni jeē steén jeē cujéhnū de, cájica cuu de jiín. Te cánujnahan ni de jeē cahán yíñuhún ñayuu jiín de ini calle. ³⁹ Te cánujnahan ni de cucōo de nuū silla yíñuhún gá ini vehe i sinagoga, jiín silla yíñuhún gá nuū víco cáyeji ñayuu.

⁴⁰ Te cáquende de vehe ñahan ní caquendōo ndáhú. Te nahán cájicān tahú de návāha caní ni ñayuu jeē tú na cuéchi de. Tēe yáha jínáhan de chí xeēn gā ndoho de castigo. Achí yá.

Jeē ni sócō ñahan viuda xūhún (Lc. 21.1-4)

⁴¹ Te iñ quivī néne Jesús ini templo ichi núu tāca yéjnū nuū cásocō i xūhún. Te jító ya ndese cáchuhun ñayuu xūhún ini yejnū ún. Te cuehē ñayuu cucá ní cachuhun i cuehē xūhún. ⁴² Te ni quee iñ ñahan viuda jeē ndóho ndáhú. Te ni chuhun ña uū centavo lulí ini yejnū ún. ⁴³ Yūcuán na te ni cana ya tēe cáscuáha jiín yá, te ni cahān yā jiín de:

Jendaá cahán rī jiín ró jeē cuehē gā cúu jeē ni sócō ñahan viuda ndahú yáha, vēsú jeē ní casocō tāca ñayuu cucá. ⁴⁴ Chi tāca i ni casocō i jeē ni ndóo siquī xūhun cuéhē i. Te ñahan yáha, vēsú ndahú ndóho ña, te ni chuhun ndihí ña jeē cótecu ña. Achí yá jiín de.

Jeē ní cachi yā jeē náa templo (Mt. 24.1-2; Lc. 21.5-6)

13

¹ Te ni quenda Jesús ini templo cáhnu, te iñ tēe scuáha jiín yá ni cahān de:

Maestro, condēhe ní ná luu jító tāca vehe yáha jéé cúu templo, jiín tāca yūu jeē ní cuvāha, áchí de.

² Te ni cahān yā jiín de:

Tāca vehe náhnu yáha jéé cájito ró, chí ma cóso jnáhan ga ni iñ yuū, chí ndihí jnanū. Achí yá.

Na seña coo nuū cuacuyajni ndihí ñayiví (Mt. 24.3-28; Lc. 21.7-24; 17.22-24)

³ Te ni jehēn yā jiín de yucu Olivos jeē ine ichi núu templo cáhnu. Te ni cucōo ya yūcuán. Te Pedro jiín Jacobo jiín Juan jiín Andrés ni cacajnúhun sīn de ya:

⁴ Castūhun ní nuū ná, ¿ndé quivī coo tāca jéé ní cachi ní jéé coo? ¿Te na seña coo núu cuacuyajni squícu tāca jéé ni cáhān ní? áchí de.

⁵ Te ni cahān yā jiín de:

Coto ró jéé ma stahú ni iñ de róhó. ⁶ Chi quiijicoo cuehē tēe jeē stahú jiín síhví rí. Máá rí cúu Cristo, achi de. Te súcuan stahú de cuehē ñayuu.

⁷ Te nihín rō jnūhun jeē tāca lado iyó guerra, chí je yajni coo guerra. Te ma yūhu ró, chí cánúu coo súcuan. Te ni ná tu jinū quivī ndihí ñayiví. ⁸ Chi ndonda nación siquī inga nación, te ndonda ñuu siquī inga ñuu jeē cuajnáhan. Te cháha chúcuan jnáa, te coo jnamā, te ndonda ñayuu siquī jnáhan i. Te tāca jéé yáha cácuu jnūndóho quejéé xíhna ñuhún gá.

⁹ Te condito ró máá ró, chí nastúu i róhó núu tāca tóhō, te ini tāca vehe i sinagoga caní i róhó. Te quindecia i sava ró núu tāca gobernador jiín núu tāca rey, te cahān i cuéchi siquī rō siquī jeē cácandíje ró rúhū. Te súcuan te cuu nacani ró jnúhun ri nuū de. ¹⁰ Te jini ñuhún jéé xíhna gā cuitē núu jnūhun nuū tāca nación ndese jnáma ri i, te sáa te ndihí quiví. ¹¹ Te núu ni cajni de róhó cuángoo de jiín ró nuū tāca tóhō, te ma nacani ni rō xíhna gā ndese stío cuíñí rō nuū de te cācu ró. Chi máá hora un te máá Yaā Dios cuāha ya jnūhun nuū rō ndese cahān rō, te jnūhun ún cahān rō. Chi nasūu máá

ró cúu jeē cahān, chi Espíritu Santo cúu jeē cahān. ¹² Te ñani jín ñani nastúu jnáhan jeē na cúu. Te tátá nastúu sēhe jeē cúu. Te sēhe ndonda siquī tátá jín náná jeē cahni. ¹³ Te tāca ñáyuu quiṽ ní i nuū rō jeē siquī ruhū. Te ñayuu cuiñi ñihin jín jnúhun ri nde quiṽ jínu, chi cācu i.

¹⁴ 'Te Daniel, tēe ni nacani jnúhun Yaā Dios, ni tee de jnúhun ñn tēe néé jēe quiṽ. Te rōhó jēe cácahu tutu ún, na jécūhun ni rō. Chi ñn quiṽ te cuni rō jeē sáha ndevāha de jeē stívi de tācá ndajníñu ñi ini templo, te cuiñi de nuū tú na ley cuiñi de. Te núu cuni rō jeē súcuan cúu, te ñayuu cáyūcú región Judea, na cúnu i caa i yucu quingoo i. ¹⁵ Te ñayuu cáyūcu núu quéhe, ma ndívi i ini vehe jeē quénehen i ndajníñu i, chi cánuú cunu yachī i návāha cācu i. ¹⁶ Te ñayuu cáhīn nuū ítu, ma ndíji i vehe jeē quiñin i sahma i. ¹⁷ Te quiṽ ún nacā jeē ndahú ñahan cáñuhun sēhe jín ñahan cándeca yiquín, chi ma cúnihin ña cunu yachī ña. ¹⁸ Te cacān tahú rō jeē ma quiṽ jnúndóho un jēe cunu ró máá tiempo cúun yuhvā. ¹⁹ Chi jeē quejéé un te coo cuehē jnúndóho xeēn, jeē ná tu coo súcuan nde quiṽ ní sáha Yaā Dios ñayívi te nde vijna. Te jeē ndíhi jnúndóho ún te ni ma cóo ga jeē súcuan. ²⁰ Te núu tú nastívi máá Jítoho yō Yaā Dios tiempo jnúndóho ún, te ni ñn ñayuu ma cácu cuiṽ i. Te jeē siquī ñáyuu cácañdije jeē ní nacāji ya, jeē yúcuan nastívi ya tiempo un.

²¹ 'Núu súcuan te núu ñn ñayuu cahān jín ró: Yáhá condēhe ró íne Cristo, chí: Yūcuán condēhe ró íne ya, achi i, te ma candíje ró jēe cahān i. ²² Chi canecoo tēe cástáhú te cahān de jeē Cristo cúu de, chí cahān de jeē tēe nácani jnúhun Yaā Dios cúu de. Te sáha de jniñu jéhu jeē naa ni ñayuu coto i, návāha stáhú de nde maá ñáyuu ní nacāji ya, te núu na cúu. ²³ Te ndito na cóo ni rō, chi je ni castūhun rí nuū rō vijna nde ná tu coo.

Ndese coo quiṽ ndiji Yaā ní nduu tēe
(Mt. 24.29-35, 42-44; Lc. 21.25-36)

²⁴ 'Te quiṽ ún, núu je ni ndíhi jnúndóho ún, te cújnúú níandii, te yoō ma ndíi gā. ²⁵ Te ñngoo quīmī íin andívi. Te tāca jēe íin andívi chí quiṽ i. ²⁶ Yūcuán na te coto ñayuu nuū maá rí, Yaā ní nduu tēe, ndiji ri jín vícō, te condiso ri cuehē poder, te yōhyo luu

cujéhu ri. ²⁷ Yūcuán na te tají rí ndajéhe rí quinastútú yá ñayuu ní nacāji ri ndicúún lado ñayívi, nde nuū ndíhi ñayívi te nde nuū ndíhi andívi.

²⁸ 'Vijna te scuáha ró ndese sáha nundēhe higo: Núu je ni nane numa, te ni najee ndaha, te cájini rō jeē jé ni cuyajni tiempo jihní. ²⁹ Te suni súcuan núu ni cajini rō jeē ní quejéé cúu tācá jniñu jeē ní cahān rí, yūcuán na te na jécūhun ni rō jeē ní cuyajni quiṽ ndíji ri, te yachī coo. ³⁰ Jendaá cahān rí jín ró jeē ma cúu ndíhi ñayuu jeē cóto jnúndóho ún, chi nde squícu ndíhi jniñu ún. ³¹ Andívi jín ñayívi chí naa, te tāca jnúhun cahān rí chí ma náā, chí ndíhi squícu.

³² 'Te quiṽ jín hora jeē ndíji ri, tú ni ñn ñayuu jiní, ni máá ndajéhe cáhīyo andívi, ni máá rí, Sēhe Yaā Dios. Chi máá ñn ni Tátá rí cúu jeē jiní.

³³ 'Núu súcuan te na cócuhun ni rō tāca jnúhun yáha, te ndito na cóo ni rō, te cacān tahú rō, chí tu cájini rō na quiṽ ndiji ri. ³⁴ Chi coo nájnūhun ñn tēe jeē quihín jicá de, te nde ná tu quenda de vehe de, te ni ndacu de jniñu nuū tāca mozo de ndese sáha ñn ñn de. Te ni ndacu de jniñu nuū tēe ndíto yéhyí jēe na cóndito de. ³⁵ Te suni súcuan rōhó jínáhan ró, ndito na cóo ni rō. Chi cúu ri nájnūhun jitohe vehe ún, te tu cájini rō na hora ndiji ri, á jēe cuácuaa, chí ñuú, chí jēe cána líhli, chí jénéhen. ³⁶ Chi ñn sanaa-ni te ndiji ri, te coto ró jēe ma nánihīn rí rohó jēe tu ndíto ró. ³⁷ Te jnúhun cahān rí jín ró jijnáhan ró, suni cahān rí jín ndívi ñayuu: Ndito na cóo ni rō jijnáhan ró. Achí yá.

Jeē ní casquíjnáhan de jnúhun jeē jñi de Jesús
(Mt. 26.1-5; Lc. 22.1-2; Jn. 11.45-53)

14

¹ Te cúmanī uū gā quiṽ te quejéé vico pascua jeē cáyeji ñayuu hebreo pan jeē tú na levadura yíhi. Te sutū cácujeñu jín tēe cástéén tutu ley, ni canducú de modo ndese jñi de Jesús jín jnúhun stáhú, te cahni de ya. ² Te ni cacahān de:

Ma jñi yó de máá quiṽ vico, chí ndonda ñayuu siquī yō, achí de.

Jnūhun ñahan jeē ní chuhun perfume xinī yā

(Mt. 26.6-13; Jn. 12.1-8)

³ Te íne Jesús ñuu Betania vehe Simón, tēe ni ndoho cuehyī stehyú. Te níní yéji yā staā, te ni quee ñn ñahan nuū yā, ndáhá ña ñn frasco yuū luu jeē ñúhun aceite perfume, jeē máni ita nardo cúu, te yōhyo yahu ndéé. Te ni tahu ña frasco un, te ni chuhun ña xinī yā. ⁴ Te sava tēe cáhīn yūcuan ní caquīti ni de, te ni cacahān de:

¿Najehē cúu jeē náā saá-ni perfume jiñā?

⁵ Chi cuu xīcō yahu yó víhyá gā unī ciento denario, te cuāha yo núū ñáyuu ndahú núú, áchí de.

Te ni cacahān sōo de jíin ña.

⁶ Te ni cahān Jesús:

Ma stáhān rō ña. ¿Naun cásáha ró jéé nácani uhū ni ña? Chi ñn jniñu váha cúu jeē ni sáha ña jíin rí. ⁷ Chi níní coyūcu ñáyuu ndahú jíin ró, te núu cácu ni rō te cuu sáha vāha ró jíin i. Te ruhū chi tuá condee rī jíin ró. ⁸ Chi ni sáha ña ndihī jeē cuu sáha ña jeē maní ña jíin rí. Chi nde ná tu quindūji ri te je ni sátūhva ña ruhū jeē ní chuhun ña perfume ruhū. ⁹ Jendaá cahán rī jíin ró jeē ní cáhnu ñayīvi ndé-ni cúu nuū cuité núu jnūhun jeē jnáma ri ñayuu, suni nacani i jnūhun jeē ní sáha ñahan yáha, návāha cocuhun ni ñayuu ña, áchí yá.

Jeē ní nastúu Judas yā

(Mt. 26.14-16; Lc. 22.3-6)

¹⁰ Yūcuán na te Judas Iscariote, ñn jeē ndihúxí uū tēe cáscuáha un, ní jehēn de nuū sutú cácu jéhnu, ni sándaā de jíin jéé nastúu de Jesús nuū jijnáhan. ¹¹ Te nuū ní cajini sōho sutū un jéé cahán de, te ni cacusiñ ni, te ni cajejnūhun jeē cuáha xūhun núu de. Te nde quivī un ní nducú de modo ndese nastúu de ya.

Jeē ní jequin yā Cena yā

(Mt. 26.17-29; Lc. 22.7-23; Jn. 13.21-30; 1 Co. 11.23-26)

¹² Te ni quee máá quivī jeē quejéé vico pascua jeē cáyeji ñayuu pan jeē tú na levadura yīhi, te suni quivī un cájehni i londe nájñūhun ni ndacu Yaā Dios jniñu jeē sáha i vico pascua un. Te tēe cáscuáha un ní cacajñūhún de ya:

¿Nde nuū cuní ni jéé quísátūhva ná cuxíni ní vico pascua? achí de.

¹³ Te ni taji yá uū tēe cáscuáha ún quingoo de, te áchí yá jíin de:

Cuángoo nde ñuu, te yūcuán najnáhan ró jíin ñn tēe ndíso quiyi ndute. Te condiquīn rō de quihīn rō jíin de. ¹⁴ Te vehe jeē ndívī de, yūcuan cáhān rō jíin tēe chíi vehe: Achí máá Maestro: ¿Nde ñn cúu cuarto vehe ní cuāha núú ní núu cuxíni ya vico pascua jíin tēe cáscuáha jíin yá? achí rō. ¹⁵ Te máá de stéén de ñn cuarto cáhnu nde xinī véhe jeē je íyó túhva. Te yūcuan sátūhva ró jéé cuxíni yó, áchí yá jíin de.

¹⁶ Te cuangoo tēe cáscuáha ún, te ni jinūcoo de ñuu, te ni canihīn de nájñūhun ni cahān yā jíin de. Te ni casátūhva de jeē cuxíni ya vico pascua.

¹⁷ Te jeē cuácuaa, te ni quee ya jíin ndihúxí uū de. ¹⁸ Te ni cacucōo de mesa cáyeji de staā, te ni cahān yā:

Jendaá cahán rī jíin ró jeē ñn rōhó jéé yéji jíin rí, nastúu ro ruhū, achí yá.

¹⁹ Yūcuán na te ni cacucuíhyá ni de, te ná ñn ná ñn de ni cacajñūhún de ya:

¿A sáña cúu? áchí ñn de.

Te suni súcuan inga de:

¿A sáña cúu? áchí ñn ñn de.

²⁰ Te ni cahān yā jíin de:

Ñn jeē uxí uū rō jeē cáyeji cáhnu jíin rí ñn cohō, suu nastúu ruhū. ²¹ Te ruhū, Yaā ní nduu tēe, jendaá cúu jeē quihín rī cuu rī, nájñūhun yósó jnúhun ri nuū tútu iī. Te nacā xeēn ndoho tēe nastúu ruhū. Vāha ga núu tu ní cácu tēe un núú, áchí yá.

²² Te níní cáyeji de jíin yá, te ni quihin ya pan, te ni nacuatáhú yá, te ni tahu cuéchí yá, te ni jēhe ya nuū tēe cáscuáha jíin yá. Te ni cahān yā:

Caji rō jijnáhan ró, chi yāha cúu yiqui cúñu rī, achí yá.

²³ Yūcuán na te ni quihin ya ñn copa ndūxi uva, te ni nacuatáhú yá, te ni jēhe ya ni cajihī ndihī de. ²⁴ Te ni cahān yā jíin de:

Yāha cúu niñī rī jeē cuáha ri jeē cúu contrato jeé, te cati jeē ndundoo cuēchi cuehē ñayuu. ²⁵ Te jendaá cahán rī jíin ró jeē ndé vijna te ma cóho ga rī ndūxi ndehē uva yāhá, chi nde quiji quivī ndacu Yaā Dios

jniñu nái ñayāví, te sáa te coho tucu ri jíin ró jijnáhan ró. Achí yá.

Jeē ní cachi yā jeē yūhu Pedro cahān de jeē jini de ya

(Mt. 26.30-35; Lc. 22.31-34; Jn. 13.36-38)

²⁶ Te ni jita ya ñin yaa iñ jíin de jijnáhan de. Te ni quenda ya cuahān yā jíin de nde yucu Olivos. ²⁷ Yūcuán na te ni cahān yā:

Ndivii rō nayūhu ró jeē siquí ruhū jecuáa vijna. Chi suhva je yósó jnūhun ri nuū tútu iñ, ni cahān Yaā Dios: Cuāha ri jnūhun jeē cáhni ñayuu tēe ndito lanchi, te lanchi un cuítē núu ti jeē yūhu tí, achí. ²⁸ Te jeē nátecu rī, te xīhna ruhū cosnūu rí quihīn rī región Galilea, te sáa te najinūcoo ró, achí yá.

²⁹ Yūcuán na te ni cahān Pedro:

Vēsú ndihī de na náyūhú de, te máa ná chi ma náyūhú cuítē ná, achí de jíin yá.

³⁰ Te ni cahān yā jíin de:

Jendaá cahān rī jíin ró jeē jecuáa vijna, nde ná tu cana líhli uū jíinu, te yūhu ró jeē jniñ ñayuu rohó, te unī jíinu cahān ró jeē tu jíiní rō ruhū, achí yá.

³¹ Te ni cahān teyí de jíin yá:

Vēsú núu cuu na jíin ní, te ma cahān cuítē na jéé tu jíiní na níhín, achí de.

Te suni súcuan ni cacahān ndihī de.

Jeē ní jicān tahú yā nuū huerto Getsemaní

(Mt. 26.36-46; Lc. 22.39-46)

³² Yūcuán na te ni jinū Jesús jíin tēe cáscuáha jíin yá ñin lugar nuū naní Getsemaní. Te ni cahān yā jíin de:

Yāhá-ni cucōo ró, te na quihín rī cacān tahú rī, achí yá.

³³ Te ni jeca ya Pedro jíin Jacobo jíin Juan, cuahān yā jíin de. Te ni quejéé yá cucuíhyá ndasí ni yā te cúxií ni yā jeē quiñi jnūndóho siquí yā. ³⁴ Te ni cahān yā jíin de:

Yōhyo cucuíhyá ni rī, te ndúcú sáha jeē cúu rī. Yāhá condetu ró te condito ró, achí yá.

³⁵ Te ni jica ya jecu gā, te ni jecuiñi yití yá ni jequin ya nuū yā nuū ñūhun. Te ni jicān tahú yā nuū Yaā Dios jeē núu cuu te ma ndóho ya jnūndóho jeē quejéé quiñi siquí yā. ³⁶ Te suhva ni cahān yā:

Tátá maá ná, ndihī-ni jniñu cuu sáha máa ní. Te tejiyo ní jnūndóho yáha jéé ma quiñi siquí ná. Te nasūu jéé cuní maá ná, chí jeē cuní maá ní na cóo, achí yá.

³⁷ Te ni ndee yā nuū ndinúní tēe cáscuáha jíin yá, te ni jito ya jeē cáquixi de. Te ni cahān yā jíin Pedro:

Simón, ¿á quiñi rō? ¿A tu ní cánda ró condito ró jíin rí vēsú ñin hora? ³⁸ Coo ndito ni rō te cacān tahú rō jeē chindéé ñáhán yá rohó jeē ma sáha ró cuéchi jeē coto ndee jeneé rōhó. Chí cuní ndije ánuá rō squícu vāha ró, te yiqui cúñu rō chí tu fuerza, achí yá.

³⁹ Te ni jehēn tucu ya, ni jicān tahú yā, te suni jnūhun yúcuan ní cahān yā. ⁴⁰ Te ni ndee ya nuū de, te ni jito ya jeē cáquixi tucu de, chí yōhyo cájiñ de máhná. Te tuá ni cániñ de jnūhun stió cuiñi de nuū yā. ⁴¹ Te ni ndee yā jeē vuelta unī, te ni cahān yā jíin de:

Vijna te cusū rō te ndetātu ró. Te tuú chí je ni cuu, chí je ni quee hora, te ruhū, Yaā ní nduu tēe, natūu rí te jniñ tēe cáhiyo cuéchi ruhū. ⁴² Ndocuiñi jijnáhan ró, chí je vēji tēe nastúu ruhū, te quihīn yō jíin de. Achí yá.

Jeē ní cajñi de Jesús

(Mt. 26.47-56; Lc. 22.47-53; Jn. 18.2-11)

⁴³ Te sá cáhán gā yā súcuan, te ni quee-ni Judas, ñin jnáhan jeē uxí uū tēe cáscuáha jíin yá. Te vējicoo cuehē tēe jíin de, cándaha de espada jíin yujnu. Chí sutū cácujuhnu jíin tēe cástéén tutu ley jíin tēe jénu cándacu jniñu, ni catajé de tēe ún. ⁴⁴ Te Judas, tēe nastúu ya ún, je ni jēhe de ñin seña nuū tēe un jijnáhan, chí ni cachi de:

Tēe jeē téchūhu rí un cúu. Te jniñ ró jijnáhan ró quihīn ró jíin, te ma siaá cuítē rō, achí de.

⁴⁵ Te ni quee de nde nuū Jesús, te ni cahān de jíin yá:

Maestro, Maestro, achí de.

Te ni techūhú de ya. ⁴⁶ Te tāca gá tēe un ní cajñi de ya, te cuango de jíin yá.

⁴⁷ Te ñin tēe íne jíin yá ni tava de espada de, te ni jehnde de sōho ñin mozo maá sūtū cujuhnu ga. ⁴⁸ Te ni cahān Jesús jíin ñayuu cuehē ún:

¿Te va tēe cuiñá cúu ri jeē véjicoo ró jíin espada jíin yujnu jniñ ró rúhū jeē súcuan? ⁴⁹ Tāca quívī ni íne ri jíin ró jijnáhan ró ini templo cáhnu, ni steén rī jnūhun, te tu ní cájñi ró rúhū. Te súcuan cása ha ró návāha na squícu jeē cahān tutu iñ, achí yá.

⁵⁰ Yūcuán na te ndihí tēe cáscuáha jíin yá, ni castóo de ya, ni cajinu de cuango de.

Tēe suchí jeē ní jinu

⁵¹ Te ñin tēe suchí, ndíquín de ya cuahān de jíin yá. Te ndíi de máá ñin sahma cuitá. Te ni cajni tēe ún de. ⁵² Te máá sahma cuitá un ní canihín. Te ni jinu máá ñi-ni de cuahān de.

Jeē ní indichi Jesús nuū junta tēe cácujeñnu ga

(Mt. 26.57-68; Lc. 22.54-55, 63-71; Jn. 18.12-14, 19-24)

⁵³ Yūcuán na te ni jinūcoo de jíin Jesús nuū sutū cujeñnu ga. Te tāca sūtū cácujeñnu jíin tēe jéñnu cándacu jniñu jíin tēe cástéén tutu ley, ni candutútú de. ⁵⁴ Te Pedro chi jíicá-ni ndíquín de ya, te ni jinū de nde ini patio sutū cujeñnu ga. Te ni cucōo de jíin táca policia, násaā de ñuhūn.

⁵⁵ Te sutū cácujeñnu jíin ndihí tēe cásaña junta cujeñnu ga, ni canducú de cuēchi síquī Jesús, chi cahni de ya cácuni de. Te tu ní canihín de. ⁵⁶ Chi cuehē de ni cacahān yaá síquī yā, te tu ní quíjnāhan jñuhun ni cacahān de. ⁵⁷ Yūcuán na te ni candocuiñi sava de, te ni catee de cuēchi síquī yā, achí de:

⁵⁸ Máá ná ni cajini ná cáhān de jeē canu de templo yáha jēe ní cuvāha ni casáha tēe, te nuū uní quiví te nacani de inga jeē násūu jíin ndaha tēe cuvāha, achí de. Achí jíjnāhan.

⁵⁹ Te ni jñuhun yáha tu ní quíjnāhan tucu jeē cácahān de síquī yā.

⁶⁰ Yūcuán na te sutū cujeñnu ga ni ndocuiñi de nuū ñayuu cuehē ún, te ni cajnūhún de Jesús:

¿Naun tu cáhān cuiti rō? ¿A íyó ndāā jeē cácahān tēe yáha síquī rō? achí de.

⁶¹ Te máá yá tu ní cáhān cuiti yā, chi tú na vé ni stío cuiñi yā. Te sutū cujeñnu ga ni cajnūhún tucu de ya:

¿A máá ró cúu Cristo, Sēhe Yaā vāha jeē cujeñnu? achí de jíin yá.

⁶² Te ni cahān yā:

Suu ri cúu. Te coto ró jēe ruhū, Yaā ní nduu tēe, condee rī lado vāha Yaā iyó poder, te ndiji ri ichi ándiví jíin vícō, achí yá.

⁶³ Yūcuán na te sutū cujeñnu ga ni jehnde de sahma de jeē quití ndasí ni de, te ni cahān de:

¿Ndé jíni ñuhún gá yō testigo núu súcuan? ⁶⁴ Chi je ni cajini ró jēe cahān de jñuhun ndevāha jeē quití ni Yaā Dios, chi sáha de máá de Sēhe Yaā Dios. ¿Te ndese cájeni ni rō? Achí de.

Te ndihí de ni cacahān jeē na cúu yā.

⁶⁵ Te sava de ni catesihí de nuū yā, te ni cajesí de sahma nuū yā, te ni cacani de ya. Te cácahān de jíin yá:

Cachi ndé ñin cúu jeē ní cani rōhó, achí de. Te tāca tēe policia ni cacani de nuū yā.

Jeē ní cachi Pedro jeē tu jíin de ya

(Mt. 26.69-75; Lc. 22.56-62; Jn. 18.15-18, 25-29)

⁶⁶ Te íne Pedro ini patio ichi chíji nuū cáhān de jíin Jesús. Te ni quee ñin ñahan jéjníñu vehe sutū cujeñnu ga ún. ⁶⁷ Te ni jito ña nuū de jeē néne de násaā de yuñuhún. Te ni jito vāha ña nuū de, te ni cahān ña:

Róhó chi suni ni jica ró jíin Jesús, tēe ñuu Nazaret, achí ña.

⁶⁸ Te máá de tu ní cáchi de, chi ni cahān de:

Tu jíin rī de, ni tu jíin rī na jñuhun cáhān rō, achí de.

Te ni quenda de yéhyí núu quéhe. Te ni cana-ni líhli. ⁶⁹ Te ñahan jéjníñu un ní jito tucu ña nuū de, te ni quejéé ña cáhān ña jíin ñayuu cáhān yūcuán:

Tēe yáha suni jñahan tāca tēe un cúu, achí ña.

⁷⁰ Te máá de tu ní cáchi tucu de. Te ni cunúu jecu gā, te ñayuu cáhān yūcuan ní cacahān tucu i jíin Pedro:

Jendaá ndije jeē suni jñahan de cúu ró, chi tēe Galilea cúu ró, te ñnuú-ni cáhān rō jíin de jíjnāhan de. Achí i.

⁷¹ Yūcuán na te ni quejéé de cáhān teyí de jeē na cóndee cuēchi síquī de núu tu cáhān ndaā de:

Tu jíin rī tēe un jēe cácahān rō jñuhun de, achí de.

⁷² Yūcuán na te ni cana-ni líhli vuelta uū. Te ni nucūhun ni de jñuhun ni cahān Jesús jíin de: Nde ná tu cana líhli uū jínu, te yūhu ró te cahān rō uní jínu jeē tu jíin rō ruhū. Te ni nacani ni de síquī jñuhun ún, te ni ndahyū de.

Jeē ní indichi Jesús nuū Pilato

(Mt. 27.1-2, 11-14; Lc. 23.1-5; Jn. 18.28-38)

15

¹ Te jeē ní cundijin, te sutū cácujeñhu ni candutútú de jíin tée jéñhu cándacu jniñu, jíin tée cástéén tutu ley, jíin ndihi tée cásaña junta cujeñhu ga, te ni casquijnáhan de jñuhun. Te ni cajihni de Jesús, te cuango de jíin yá nuū Pilato, tēe cúu gobernador.

² Te Pilato ni cajñuhún de ya:

¿A máá ró cúu Rey ñayuu hebreo? achí de.

Te ni cahān yā:

Suu ri cúu, náñuhun cáhān rō.

³ Te sutū cácujeñhu un ní cacahān de cuehē cuēchi siquī yā. ⁴ Te Pilato ni cajñuhún tucu de ya:

¿Naun tu cáhān cuiti rō? ¿A tu jíni ró jéē cuehē cuēchi cácahān de siquī rō? achí de.

⁵ Te tu ní cáhān cuiti yā ni ññ jñuhun jíin de. Te nahán ní naa ni Pilato ndéhé de nuū yā.

Jeē ní cundaā jeē cúu yā

(Mt. 27.15-31; Lc. 23.13-25; Jn. 18.38-19.16)

⁶ Te íyó costumbre Pilato jeē quivī víco un siaá de ññ tēe íne vecāa, núu na-ni tēe cácuñi ñayuu. ⁷ Te íyó ññ tēe nání Barrabás, íne de vecāa jíin táca jñáhan de siquī jeē ní candonda de siquī tohō te ni cajehni de ndīyi. ⁸ Te ni quecoo ñayuu cuehē, te ni cacahān i jíin Pilato jeē na sáha de náñuhun íyó costumbre de. ⁹ Te ni cahān Pilato jíin i:

¿A tu cácuñi rō jeē siaá rī tēe cúu Rey rohó ñayuu hebreo? achí de.

¹⁰ Súcuñ ni cahān de, chí cúní de siaá de Jesús. Chí je ni jecūhun ni de jeē ní cacucuéśún ni tāca sūtū un cájito de ya, te jeē yúcuñ ní quijicoo jíin yá nuū de. ¹¹ Te sutū cácujeñhu un ní cascáhān de ñayuu cuehē un jéē váha ga na cácan i jeē siaá Pilato Barrabás. ¹² Yūcuán na te ni cajñuhún tucu Pilato:

Núu súcuñ ¿te ndese cácuñi rō jeē sáha ri jíin tēe jeē cácahān rō jeē cúu de Rey rohó ñayuu hebreo? achí de jíin i.

¹³ Te ni cacana jee i:

Cata caa ní de jicā cruz, na cúu de, achí i.

¹⁴ Te ni cahān Pilato:

¿Na cuēchi ni sáha de núu súcuñ?

Te ñayuu un ní cacana jee tucu i:

Cata caa ní de jicā cruz, na cúu de, achí i.

¹⁵ Te Pilato cuní de jeē na cúśñ ni ñayuu jíin de, te ni siaá de Barrabás. Yūcuán na te

ni ndacu de jniñu jeē na cáni tēcá soldado Jesús, jíin jéē cata caa de ya jicā cruz.

¹⁶ Yūcuán na te soldado un cuángoo de jíin yá ini patio palacio, jeē sácata de nuū yā. Te ni canastútú de ndihi jñáhan de. ¹⁷ Te ni cachuhun de ya ññ sahma cuehé ndihí jéē cúu sahma rey. Te ni casáha de ññ corona iñu, ni cachuhun de xinī yā. ¹⁸ Yūcuán na te ni cacana de:

Nacā jeē váha rey cúu Rey ñayuu hebreo, achí de.

¹⁹ Te ni cacani de yujnu xinī yā, te ni catesihí de nuū yā, te ni cajecuiñi yití de nuū yā, casáha de jeē chiñuhún de ya. ²⁰ Te nuū ní cuu ni casácata de nuū yā, te ni catava de sahma cuehé ndihí un, te ni canachuhun de ya sahma máá yá. Te ni caquenehen de ya jeē cata caa de ya jicā cruz.

Jeē ní cacata caa de ya jicā cruz

(Mt. 27.32-44; Lc. 23.26-43; Jn. 19.17-27)

²¹ Te ññ tēe nání Simón ñuu Cirene, tēe cúu tátá Alejandro jíin Rufo, vendiji de jeē ni jéhēn de rancho. Te ni yāha de yūcuán, te ni catejniñu soldado un de jeē cóndiso de cruz yā.

²² Te cuango de jíin yá ññ lugar nuū naní Gólgota, jeē cuní cahān Lugar Yiqui Xíní.

²³ Te ni cajēhe de vino jeē ni sácā núu jíin súje uvuā jeē cóho ya, te tu ní jíhi ya. ²⁴ Te ni cacata caa de ya jicā cruz. Te ni casáha de sorteo jeē siquí ndese nihñ ññ ññ de sahma ya.

²⁵ Te cahññ ni cacata caa de ya. ²⁶ Te jñuhun ni catee de xinī cruz cahān na siquī ni jihī yā: Yāha cúu Rey ñayuu hebreo, achí.

²⁷ Te suni ni cacata caa de uū tēe cuihná núu uū gā cruz, ññ de lado váha ya, te ñnga de lado jecó yá. ²⁸ Te ni squícu jñuhun cáhān tutu íi: Ni casquijnáhan de ya jíin tēe cásaña néé, achí.

²⁹ Te ñayuu cáyāha yūcuán cáscuícó i xinī i, te cácahān neé i:

Jājañ. Róhó chí cáhān rō jeē cánu rō templo cáhnu, te nuū uní quivī te nucondichi sáha ró. ³⁰ Núu súcuñ te jnama ró máá ró, te nuu ró jicā cruz vii, achí i.

³¹ Te suni súcuñ ni cacahān catá sutū cácujeñhu jíin tēe cástéén tutu ley, te achí de cácahān maá de:

Núu inga ñayuu ni jnama de, ¿te naun tu cúu jnama de máá de vijna? ³² Núu na cúni yō jeē Cristo, Rey ñayuu Israel, nuu de jicā cruz vijna, yūcuán na te candíje yó, áchí de jíjnáhan de.

Te tēe cándita caa jíin yá, suni súcuan ni cacahān neé de.

Jeē ni jíhī Jesús

(Mt. 27.45-56; Lc. 23.44-49; Jn. 19.28-30)

³³ Te nuū ní cuu cahuxī uū, te ni cunee ní cáhnu nde cahunī. ³⁴ Te nuū ní cuu cahunī, te ni cana jee Jesús:

Eloi, Eloi, ¿lama sabactani? achí yá. Te jnūhun un cúni cahān: Yaā Dios maá ná, Yaā Dios maá ná, ¿naun ni stóo ní sáña?

³⁵ Te sava ñayuu cáhīin yūcuan, ní cajini i jnūhun ún, te ni cacahān i:

Cuni nahín, chi cána de xinī Elías, tēe ni nacani jnūhun Yaā Dios jenahán, achí i.

³⁶ Te ni jinu ñn tēe, ni jechundaji de cachī nuū vinagre iyá. Te ni tee de xinī ñn yujnu, te ni tee de yuhu ya jeē cóho ya. Te ni cahān de:

Na cóndēhe yó núu quiiji Elías nasnúu de, áchí de.

³⁷ Te máá Jesús ni cana jee ya, te ni jíhī-ni ya. ³⁸ Yūcuán na te sahma ndíta caa jeē ndihyú cuarto iini templo cáhnu, ni ndatā sava sava nde xinī te nde nuū jehé. ³⁹ Te tēe ñuu Roma jeē cúu capitán, índichi de nuū yā, te ni jini de jeē ní cana jee ya te ni jíhī yā. Te ni cahān de:

Jendaá ndije jeē Séhe Yaā Dios cúu tēe yáha, áchí de.

⁴⁰ Te suni cáhīin sava ñahan, cándēhe jíca ña. Te unī ña cácuu María ñuu Magdala, jíin María naná José jíin Jacobo suchí, jíin ñahan nání Salomé. ⁴¹ Te ñahan yáha ní candiquīn ña ya, ni cajejníñu ña nuū yā nde náa jíca ya Galilea. Te suni cáhīin cuehē gā ñahan jeē ni jéngoo jíin yá ñuu Jerusalén.

Jeē ní quindūji Jesús

(Mt. 27.57-61; Lc. 23.50-56; Jn. 19.38-42)

⁴² Te ni ini quivī ún. Te quivī sátūhva cúu, chi sajnē cúu quivī ndétátú. ⁴³ Te ni quee José, tēe ñuu Arimatea. Te cúu de ñn tēe cújéhnu nuū junta cújéhnu ga. Te suni ñūhun ni de jeē quiiji quivī jeē ndacu Yaā Dios jniñu. Te tu yúhú de chi ni quivī de nuū Pilato, ni jicān de yiqui cúñu Jesús. ⁴⁴ Te

Pilato chi náa ni de jeē yachí ni jíhī yā. Te ni cana de capitán, te ni cajnūhún de tēe un núu je ni jíhī yā. ⁴⁵ Yūcuán na te ni cucáhnu ni de jeē ni cáhān capitán jíin de, te ni jēhe de jnūhun jeē quihin José yiqui cúñu yā. ⁴⁶ Te José ni jeen de ñn sahma cuitá váha. Te ni snúu de yiqui cúñu yā, te ni chusúcún de sahma ún. Te ni chindūji de ya ini ñn yaū jeē quindūji ndiyi, jeē ní caan jíca ñn cava. Te ni jesi de ñn yuū yuhu yáú un. ⁴⁷ Te María ñuu Magdala, jíin María naná José, ni cajito ña nuū ní cachindūji de ya.

Jeē ní natecu Jesús

(Mt. 28.1-10; Lc. 24.1-12; Jn. 20.1-10)

16

¹ Te ni ini quivī ndétátú, te María ñuu Magdala, jíin María naná Jacobo, jíin Salomé, ni cajeen ña táca perfume jeē quíchuhun ña yiqui cúñu yā. ² Te jenéhen quivī domingo, jeē ní cane niāndii, te ni jinūcoo ña nuū ní yindūji ya. ³ Te cácahān ña:

¿Ndé níhīn yō tēe tejiyo yuū ndihyú yuhu yáú? achí ña.

⁴ Te ni candacoto ña, te ni cajito ña jeē jé ni cujiyo yuū cáhnu un cuáhān. ⁵ Te ni quivīcoo ña ini yaū ndiyi. Te ni cajito ña ñn ndajéhé Yaā Dios jeē cáa nájñūhun tēe suchí, néne ya ichi lado váha, ñūhun ya ñn sahma cuijín cáni. Te ni cayūhú ña. ⁶ Te ni cahān yā jíin ña:

Ma yūhu ró jijnáhan ró. Chi vecondēhe ró Jesús ñuu Nazaret, Yaā ni jíhī jíca cruz. Tuá yā yáhá, chi je ni natecu yā. Yáhá condéhé ró nuū ní cachindūji de ya. ⁷ Cuánungoo te cachi rō nuū tée cáscuáha jíin yá, jíin núu Pedro, jeē xihna gā maá yá jinū Galilea, te sáa te najinūcoo de. Te yūcuán coto de nuū yā, nájñūhun ni cahān yā jíin de nde saá, achí yá jíin ña.

⁸ Yūcuán na te ñahan un ní quendacoo ña nuū ní yindūji ya, te cájino ña cuangoo ña. Chi quisi i ña jeē cáyūhú ña. Te tu ní cácachi cuiti ña nuū ní ñn, chi cáyūhú ña.

Jeē ní nane Jesús nuū María ñuu Magdala *(Jn. 20. 11-18)*

⁹ Te Jesús ni natecu yā jenéhen quivī domingo. Te xihna gā ni nane ndijin yā nuū María ñuu Magdala, ñahan jeē ní quenehen

ya uxā tachī ini. ¹⁰ Te cuahān ña cuacastūhún ña nuū tāca tēe ni cajica jíin yá jeē ní nane ya nuū ña. Te cáccucuíhyá ni de te cándahyū de. ¹¹ Te nuū ní cajini de jnūhun jeē ní jito ña nuū yā jeē técu yā, te tu ní cáccandíje de jnūhun cáhán ña.

*Jeē ní nane ya nuū uū tēe cáscuáha jíin yá
(Lc. 24.13-35)*

¹² Yūcuán na te ni quendacoo uū jnáhan tēe ún, cájica de cuahān de ichi rancho, te síin modo ni nane ndijin yā nuū de. ¹³ Te ni canandicó de, ni cacastūhún de nuū tāca gá jnáhan de. Te ni tu ní cáccandíje tucu jnáhan de jeē cácahān ndindúú de.

*Jeē ní tejníñu ya de nacani de jnūhun
(Mt. 28.16-20; Lc. 24.36-49; Jn. 20.19-23)*

¹⁴ Te cúcuéé gá te ni nane ndijin yā nuū ndihúxí ñn de jeē cáyūcú de mesa cáyeji de staā. Te ni cahān yā nuū de, chi nīhni ni de jeē tu cáccandíje de jeē cácahān jnáhan de un, jēe ní natecu yā ni cajito de ya. ¹⁵ Te ni cahān yā jíin de:

Cuángoo jíjnáhan ró ní ñayíví, te nacani ró jnūhun ri nuū tāca ñayuu ndese jnáma ri i. ¹⁶ Te ñayuu candíje te cuandute i, chi cācu i. Te ñayuu tú candíje, chi jnahnū ndetū i. ¹⁷ Te ñayuu candíje, sáha i tācá jniñu jéhnu yáha jeē steén jeē iyó rí jíin i: Jíin síhví rí quenehen i tachī ini ñayuu. Te cahān i tijni yuhu jéé. ¹⁸ Te núu ni jniñi sanaa i coō, chí núu ni jihí i veneno, te ma sáha daño jíin i. Te suní soó i ndaha i síquī ñayuu cácuñu, te nduvāha. Achí yá jíin de.

*Jeē ní ndaa ya cuanuhun yā andiví
(Lc. 24.50-53)*

¹⁹ Yūcuán na te nuū ní ndihí ni cahān maá Jítóho yō jíin de jíjnáhan de, te ni ndaa ya cuanuhun yā andiví, te ni cucōo ya lado váha Yāā Díos nuū cujéhnu ya. ²⁰ Te máa de ni quendacoo de, ni canacani de jnūhun ya tāca lado ndese jnáma ya ñayuu. Te máa Jítóho yō ni chindéé ñáhán yá de. Te ni jēhe ya fuerza jeē sáha de tācá jniñu jéhnu jeē steén jeē iyó ndáá jnūhun cánacani de. Te ni cuu. Amén.

JNUHUN VAHA NI TEE SAN LUCAS

¹ Cuehē tēe ni cajicu de ni catee yúcun de historia Jesús, tãcá jniñu jeē ni sáha ya ni cajito yó. ² Te ni catee de tãca jnúhun jeē ní cacastúhun ñáyuu nuū yō, jeē ní cajito i jniñu yúcuan nde ná ni quejéé, te ni canacani i jnúhun ya. ³ Te máá ná, suni ni nanducú yúcun ná tãca jnúhun ya, nde nuū ní quejéé. Te ni jeni ni na jéē suni iyó váha jeē tēe cájí ná tãca jnúhun yáha núu ní, amigo Teófilo. ⁴ Te súcuan te cuni ni jéē iyó ndáá tãca jnúhun jeē ní cacastúhún i nuū ní.

Jeē ní cachi ndajéhé jeē cacu Juan tēe scuándute

⁵ Tiempo jeē ní cuu Herodes rey región Judea, te ni iyo ñn sutū ñayuu hebreo, naní de Zacarías, te grupo Abías cúu de. Te ñasihí de nání ña Elisabet, te suni sēhe yucūn maá sūtū Aarón cúu ña. ⁶ Te ndindúú de cahīyo ndaā de nuū Yaā Dios, te ndaā váha cásquicu de jniñu ndácu ley maá Jítóho yō Yaā Dios, cájito tãca ñáyuu. ⁷ Te tú sēhe de iyó, chi ñahan númá cúu Elisabet, te je jéhu ndindúú de.

⁸ Te ñn quiví te jéjníñu Zacarías nuū jniñu jeē cúu de sutū nuū Yaā Dios, chi ni quee quiví jeē ndívi grupo de. ⁹ Te ni casáha de sorteo, nájnūhun iyó costumbre sutū. Te ni sáha tocar Zacarías jeē quiví de ini cuarto ñi templo Jítóho yō Yaā Dios, te cahmu de sūje cútú. ¹⁰ Te hora jeē cayú sūje cútú, te tãca ñáyuu cuehē cáhīn i fuera, cájicān tahu i. ¹¹ Te ni cane ñn ndajéhé maá Jítóho yō nuū de, ñn ya lado váha altar nuū jéhu de sūje cútú. ¹² Te ni cunéé ni Zacarías ni jito de nuū yā, te yōhyo ni yūhú de. ¹³ Te ni cahān ndajéhé un jíin de:

Zacarías, ma yūhu ró, chi je ni chihi Yaā Dios cuenta jeē ni jícān tahu ró. Te ñasihí ró Elisabet, scácu ña ñn sēhe yí, te snání ró i Juan. ¹⁴ Te yōhyo cusí ni ró. Te cuehē ñayuu cusí ni jeē cácu i. ¹⁵ Chi cujéhu sēhe ró sáha máá Yaā Dios. Te ma cóho i vino ni ndixi cuí. Te cunuú máá Espiritu Santo jíin i, nde ná tu cacu i. ¹⁶ Te sáha i jeē cuehē ñayuu nación ró Israel ndívicoo

i nuū Jítóho i Yaā Dios. ¹⁷ Te xīhna gā Juan quiji nacani jnúhun Jítóho yō Jesús, te sáá te quiji ya. Te sáha i nájnūhun ni sáha Elías, tēe ni nacani jnúhun Yaā Dios jenahán, te coneváha i poder jeē nácani i jnúhun, nájnūhun ni coneváha Elías. Te sáha i jeē tãca tátá ndumaní de jíin sēhe de. Te suni sáha i jeē ñáyuu ñhni ni cuatáhú i nuū Yaā Dios, nduu i ñayuu ndaā. Súcuan sātúhva i ñayuu náváha candíje i máá Jítóho yō jeē quíji ya. Achí ndajéhé.

¹⁸ Te Zacarías ni cajnúhún de ya:

¿Ndese cucáhu ni na núu jendaá cúu? Chi tēe jéhu cúu ná, te suni jéhu ñasihí ná, áchí de.

¹⁹ Te ni cahān ndajéhé un jíin de:

Máá rí cúu Gabriel, te íne ri nuū Yaā Dios, jejniñu ri nuū yā. Te ni tají yá ruhū vēji ri cahān rí jíin ró, te nácani ri jnúhun váha yáha núu ró. ²⁰ Te jeē tu ní cándíje ró jnúhun ni cahān rí, te cuñhín ró, te ma cúu cahān ró, chi nde na cácu sēhe ró. Te squícu nahín jnúhun cáhān rí yáhá, na quee quiví, achí ndajéhé.

²¹ Te ñayuu cáhīn ichi fuera, cándetu i Zacarías, te cájeni ni i na vé ni cuu jeē cucuéé de ini cuarto ñi templo. ²² Te nuū ní quenda de, te tuá ni cúu cahān de jíin i. Te ni cajecūhun ni i jeē ini templo ni jito ndijin de ñn jeē ni stéén yā nuū de. Te máá seña na ni sáha de nuū i, chi ni cuñhín de.

²³ Te nuū ni jínu quiví ni jejniñu de ini templo, te cuanuhun de vehe de. ²⁴ Te ni cuu jecu quiví, te ñasihí de Elisabet ni jecūhun sēhe ña. Te ni iyo ña vehe ña uhūn yoō jeē tuá nde ní jéhén ña. Te jéni ni ña: ²⁵ Súcuan ni sáha máá Jítóho yō jíin rí, te ni tejiyo ya jnúhun jeē cúcanu rí nuū ñáyuu jeē tú sēhe ri, jéni ni ña.

Jeē ní cachi ndajéhé jeē cacu Jesús

²⁶ Te nuū iñú yoō, te ni tají Yaā Dios ndajéhé yā Gabriel, ni jehēn yā ñn ñuu naní Nazaret, ndañú Galilea. ²⁷ Te ni jehēn yā nuū ñn sūchi síhí nání María. Te je ni cundaā jeē quijnáhan ña jíin ñn tēe nání José, te sēhe yucūn rey David cúu de. ²⁸ Te ni quiví ndajéhé un núu ndeé ña, te ni cahān yā:

Tandii, nacā ndetū cúu ró. Chi máá Jítóho yō Yaā Dios iyó yá jíin ró, te ni sáha ya jeē

yóhoyo ndetū gā cúu ró núū tāca gá ñahan, áchí yá.

²⁹ Te nuū ni jíto ña nuū yā, te ni cunéé ni ña jeē súcuan cáhán yā, te jéni ni ña naun cáhán yā súcuan jíin ña. ³⁰ Te ni cahān gā ndajéhé un jíin ña:

Ma yūhu ró María, chi ni sáha Yaā Dios jeē váha jíin ró. ³¹ Te jecūhun sēhe ró te scácu ró ñin sēhe yíí, te snání ró i Jesús. ³² Te kujéhu i, te conaní i Sēhe Yaā kujéhu téyí. Te máá yá jeē cúu ya Jitoho yō Yaā Dios, sáha ya jeē cuu i rey, nájñūhun jíi i David ni cuu de rey. ³³ Te ñí cáni ndacu i jniñu nuū ñáyuu naciōn Israel. Te ma ndíhi cuiñi jeē ndácu i jniñu. Achí ndajéhé.

³⁴ Yūcuán na te ni cajñūhún María:

¿Ndese coo jeē ni cáhán ní? Chi ná tu coo yíí ná, áchí ña.

³⁵ Te ni cahān ndajéhé un:

Máá Espíritu Santo quiñi siquī rō, te poder máá Yaā kujéhu téyí sáha ñin jniñu jéhu jíin ró. Te jeē yúcuan máá súchi lí jeē cácu, quiñi cuenta i nuū Yaā Dios, te cahān ñayuu jeē Séhe Yaā Dios cúu i. ³⁶ Te suni cástūhun rí nuū rō jeē jnáhan ró Elisabet, suni scácu ña ñin sēhe vésú je jéhu ña. Te vijna íyó íñū yoō jeē tuá cacahān ñayuu jeē cúu ña ñahan númá. ³⁷ Chi ndíhi-ni cuu sáha Yaā Dios, te tu íyó ni ñin jeē ma cúu sáha ya, achí ndajéhé un.

³⁸ Yūcuán na te ni cahān María:

Cuu núu súcuan, chí sáha ná táca jniñu ndácu Jitoho yō Yaā Dios, te na cóo jíin ná nájñūhun ni cachi ní, áchí ña.

Te máá ndajéhé un cuáhān-ni ya.

Jeē ni jécondēhé María Elisabet

³⁹ Te ni cuu jecu quiñi, te yachí cuahān María, ni caa ña yucu cuahān ña ñin ñuu región Judea. ⁴⁰ Te ni jinū ña vehe Zacarías, te ni cahān ña jíin Elisabet. ⁴¹ Te nuū ní jini Elisabet jeē cahán María jíin ña, te sūchi ñūhun chíji ña ni canda-ni i. Te ni cunuú Espíritu Santo ini anuá ña. ⁴² Te ni cahān jee ña:

Ni sáha Yaā Dios jeē yóhoyo ndetū gā cúu ró núū tāca gá ñahan, jíin jéé yóhoyo ndetū sēhe ró. ⁴³ ¿Te ndese cúu jeē ní quee naná máá Jitoho rī nuū rī? Chí tu kujéhu cuiñi rī. ⁴⁴ Chí jeē ní jini-ni ri jñūhun ni cahān rō jíin rí, te sūchi ñūhun chíji ri ni canda i jeē cúsiñ

ni i. ⁴⁵ Te nacā ndetū rō jeē ní candíje ró, chí squícu nahín tāca jñūhun ni cahān máá Jitoho yō jíin ró. Achí Elisabet.

⁴⁶ Yūcuán na te ni cahān María:

Cáhán rī jeē kujéhu ndasí máá Jitoho yō Yaā Dios,

⁴⁷ te cúsiñ ni rī jíin Yaā Dios, Yaā jnáma ruhū.

⁴⁸ Chí ni sáha ya cuenta ruhū, vésú tu kujéhu rí.

Te na squícu ri jniñu ndácu ya.

Te nde vijna te táca ñáyuu jeē nácacu, cahān i jeē yóhoyo ndetū rī.

⁴⁹ Chí Yaā jñí ndíhi poder, ni sáha ya jniñu jéhu jíin rí.

Te Yaā íi ndoo cúu ya.

⁵⁰ Te ñí cáni cundáhú ni yā táca ñáyuu ndíso íyo nuū yā.

⁵¹ Ni sáha ya jniñu jéhu jíin poder yā,

chí ni scúnu ya ñáyuu casándúxí máá,

⁵² te ñayuu cácujeñu, ni quende ya jeē kujéhu i.

Te ñayuu ndahú chí ni sajeñu ya i,

⁵³ te ñayuu cájií sōco ni jēhe ya jeē cáji vāha i.

Te ñayuu cucá ní natajé yá i súcuan-ni.

⁵⁴ Te ni chindéé ñáhán yá yohó, ñáyuu naciōn Israel, jeē cácuu yó mozo yā,

te tu náa ni yā jeē cundáhú ni yā yohó.

⁵⁵ Chí súcuan ni jeññūhun ya nuū táca jíi yō, nuū Abraham jíin táca yúcūn de jeē cóo ñí

cáni.

Achí María.

⁵⁶ Te ni condee ña jíin Elisabet nájñūhun unī yoō. Yūcuán na te cuanuhun ña vehe ña.

Jeē ní cacu Juan tēe scuándute

⁵⁷ Te ni jinū quiñi jeē scácu Elisabet sēhe ña, te ni scácu ña ñin sēhe yíí. ⁵⁸ Te táca ñáyuu ndeé yajni jíin ña jíin táca jnáhan ña, ni cajini i jeē yóhoyo ni cundáhú ni Yaā Dios ña, te ni jengoo i ni cacahān i jñūhun siñ ni jíin ña. ⁵⁹ Yūcuán na te nuū uná quiñi jeē ní cacu i, te ni jengoo ñayuu ni sáha i circuncidar sūchi yíquín un. (Te yúcuan cúu ñin jñunī nuū yíqui cúñu táca súchi yíí hebreo jeē steén jeē cácuu i ñayuu Yaā Dios.) Te snání i sūchí un síhví tátá i Zacarías nuú.

⁶⁰ Te ni cahān naná i:

Ma cúu, chí Juan conaní i, áchí ña.

⁶¹ Te ni cacahān i jíin ña:

¿Te naun? Chi tú ni ñn jnáhan ró nání súcuan, áchí i.

⁶² Yūcuán na te jíin seña ni cacajñūhún i tátá sūchí un ndese cúní de jeē cónaní i. ⁶³ Te máá de ni jicān ñn tutu, te ni tee de: Juan conaní i. Te tāca ñáyuu un ní canaa ni i cájito i. ⁶⁴ Te ni nduvāha Zacarías jeē ní cuñíhín de, te ni quejéé de cáhán de jeē yóhoyo vāha Yaā cúu Yaā Dios. ⁶⁵ Te tāca ñáyuu ndeé yajni jíin de, yóhoyo ni canaa ni i. Te ní yucu región Judea ni jitē núu tāca jñūhun yáha jeē súcuan ni cuu. ⁶⁶ Te tāca ñáyuu jeē ní cajini jñūhun, ni quejéé i cánacani ni i, te cacajñūhun jnáhan í:

¿Ndeese coo na cuéhnu sūchi yáha? áchí i.

Chi máá Jítóho yō yóhoyo ni sáha ya jeē vāha jíin i.

Jñūhun luu jeē ní nacani Zacarías

⁶⁷ Te tátá i Zacarías ni cunuú Espíritu Santo jíin de, te ni nacani de jñūhun ni steén Yaā Dios nuū de:

⁶⁸ Yóhoyo vāha Yaā cúu máá Jítóho yō, Yaā Dios yohó ñáyuu Israel, chi ni quiji ya nuū yō jeē cácuu yó ñáyuu yā, te ni jnama ya yohó.

⁶⁹ Te ni jeni ya ñn Yaā iyó poder jeē jnáma ya yohó,

te Yaā ún cacu yucūn mozo yā rey David.

⁷⁰ Chi súcuan ni jejnūhun ya, ni cacahān tāca té ndoo ánuá jeē ní canacani de jñūhun ya jenahán.

⁷¹ Chi ni cacahān de jeē jnáma ya yohó núu jeē cájito uhū yohó, jíin núu jeē cáquití ni nuū yō.

⁷² Chi ni cundáhú ni yā tāca jíi yō jijnáhan, te tu ní náa ni yā contrato íi yā.

⁷³ Chi suu un ní jejnūhun téyí yá nuū jíi yō Abraham,

⁷⁴ suu jeē jnáma ya yohó núu ñáyuu cájito uhū yohó,

návāha cuajníñu yó núu yā, te ma yūhu yó i.

⁷⁵ Te coo ndaā coo ndoo ánuá yō, cuajníñu yó núu yā tāca quívi jeē cótecu yō.

⁷⁶ Te róhó sūchi lúli, cuu ró téé nacani jñūhun Yaā cujéhnu téyí.

Chi cosnūu ró ichi núu máá Jítóho yō, návāha sátūhva ró ñáyuu, te sáa te quiji ya.

⁷⁷ Te castūhun ró nuū ñáyuu máá yá jeē jnáma ya i,

jíin jeē cóne cáhnu ni yā nuū tāca cuéchi i.

⁷⁸ Chi Yaā Dios máá yó, vāha ni yā te cundáhú ni yā yohó.

Jeē yúcuan tají yá máá Yaā jeē sáha jeē cundijin ini anuá yō, quiji ya nde andívi,

⁷⁹ návāha jecūhun ni yohó jeē cáyūcu nájñūhun nuū nēé nuū je yajni cuu yō.

Te chuhun ya yohó ichi nuū cóo ndeyí coo síi ni yō.

Achí Zacarías.

⁸⁰ Te sūchi lúli un ní jehnu i te ni ije i jíin jñūhun ya. Te ni condee i nde nuū ñūhun téhé ndé quívi ní quenda ndijin i nuū ñáyuu Israel.

Jeē ní cacu Jesús

(Mt. 1.18-25)

2

¹ Te ni cuu jecu quívi, te Augusto, tēe cúu rey, ni ndacu de jniñu jeē coo censo jeē núcosō síhvi ndíviñi ñáyuu ní cáhnu nuū ndácu de jniñu. ² Yāha cúu censo xīhna ñūhún jeē ní casáha de ná ni cuu Cirenio gobernador nación Siria. ³ Te ndíviñi ñáyuu cuanungoo i ná ñuu ná ñuu máá i jeē nácuāha i síhvi i. ⁴ Te suni José ni quenda de ñuu Nazaret, ndañúu Galilea. Te cuanuhun de región Judea, te ni najinū de ñuu Belén, jeē cúu ñuu nuū ní cacu rey David jenahán. Chi sēhe yucūn David cúu de. ⁵ Te ni jehēn de návāha nacuāha de síhvi de jíin María, chi je yajni quijnáhan ña jíin de. Te ñūhun sēhe ña ni sáha Espíritu Santo. ⁶ Te níni cáhīn de yūcuán te ni jinū quívi jeē cácu sēhe ña. ⁷ Te ni scácu ña sēhe yí núu ña, te ni chusúcún ña i sahma cuitá, te ni jequin ña i ini ñn nundōo núu yéji quití, chi tuá núne mesón condee ña.

Jeē ní canecoo ndajéhé yā nuū pastor

⁸ Te yajni ñuu Belén cáhīn tēe cácuu pastor, te cándito de lanchi de ní niñu jecuáa nde yucu ún. ⁹ Te ñn sanaa-ni te ni cane ñn ndajéhé máá Jítóho yō nuū de, te nduva máá Jítóho yō ni ndindēe ní núu cáhīn de. Te yóhoyo ni cayūhú de. ¹⁰ Te ni cahān ndajéhé un jíin de:

Ma yūhu ró jijnáhan ró, chi vēji ri castūhun rí jñūhun vāha nuū rō, te sáha jeē

cúsī ndasí ni tāca ñáyuu: ¹¹ Chi vijna nde ini ñuu David ni cacu ñn Yaā jnama róhó, te máá Jítóho yō Cristo cúu ya. ¹² Te súcuan nacuni rō sūchi yíquín un, chi ñúsúcún i sahma cuitá te cátú i ini ñn nundōo núu yéji quití. Achí yá.

¹³ Te ñn sanaa-ni te ni canecoo cuehē gā ndajéhé andiví, cáhīn ya jíin ndajéhé un, te cácahān yā jeē yóhyo vāha Yaā cúu Yaā Dios. Te áchí yá:

¹⁴ Yóhyo luu cújéhnū Yaā Dios nde nuū sucún.

Te na ndúvāha ni tāca ñáyuu ñayiví, sáha ya jeē cúsī ni yā jíin i.

Achí táca ndajéhé.

¹⁵ Yūcuán na te cuanungoo ndajéhé un andiví. Te tēe cácuu pastor ni cacahān de jíināhan de:

Na quihín yō nde ñuu Belén, te cuni yō na vé ni cuu jeē ní castūhun máá Jítóho yō nuū yō, achí de.

¹⁶ Te yachī cuangoo de, te ni nanihīn de María jíin José jíin sūchi yíquín un, cátú i ini nundōo núu yéji quití. ¹⁷ Te nuū ní cajini de nuū i, te ni canacani de jnūhun jeē ní cachi ndajéhé yā nuū de siquī sūchi yíquín un. ¹⁸ Te ni canaa ni tāca ñáyuu cájini nahín i jnūhun cácahān tēe cácuu pastor. ¹⁹ Te María, ni quendōo tāca jnūhun yáha nuū jeē níjnūní ña, te nácani ni ña siquī. ²⁰ Te tēe cácuu pastor cuanungoo de, te ni cacahān de jeē yóhyo vāha Yaā cúu Yaā Dios siquī tāca jēe ní cajini sōho de jíin jēe ní cajito de, chi ni squícu nahín nájnūhun ni cahān ndajéhé yā jíin de.

Jeē ní castéén de i nuū Yaā Dios ini templo

²¹ Te ni cuu unā quiví jeē ní cacu ya, te ni casáha de circuncidar sūchi yíquín un. Te ni casnání de i Jesús, chi síhví yúcuan ní cachi ndajéhé yā nuū María nde ná tu jecūhun i.

²² Te ni jíinu quiví jeē casquícu ña costumbre jeē ndúndoo ña nuū Yaā Dios jíināhan ña, nájnūhun cáhán ley jeē ni jéhe ya nuū Moisés. Te ni jengoo de jíin i ñuu Jerusalén jeē nácuāha de i nuū máá Jítóho yō Yaā Dios.

²³ Súcuan ni casáha de, chi yósó núu tútu ley yā: Tāca sūchi yí núu jēe cácacu, quihí cuenta i nuū Jítóho yō Yaā Dios, achí tutu.

²⁴ Te suni cuasocō de nájnūhun cáhán ley

maá Jítóho yō: Socō rō uū liví chí úu paloma, achí tutu.

²⁵ Te ni iyo ñn tēe nání Simeón, ndéé de ñuu Jerusalén tiempo un. Te tēe ndaā, tēe chíñúhún vāha nuū Yaā Dios cúu de. Te ñúhun ni de jeē quée máá Yaā jnama ñayuu nación de Israel. Te máá Espíritu Santo íyó yá jíin de. ²⁶ Te je ni castūhun yá nuū de jeē ma cúu cuitá de chi nde coto de nuū Cristo jeē tají máá Jítóho yō Yaā Dios. ²⁷ Te ni steén yā nuū de jeē quihín de templo quiví ún. Te suni tátá naná sūchi yíquín Jesús, ni quivícoo de ini templo jíin i, jeē nácuāha de i nuū Yaā Dios nájnūhun cáhán ley Moisés. ²⁸ Te Simeón ni ñunundee de i, te ni cahān de jeē yóhyo vāha Yaā cúu Yaā Dios, te áchí de:

²⁹ Tátá Yaā Dios, vijna te cuu cuāha ni jnūhun jeē cuu ná, chi je ni cusī ni ná.

Chi je ni squícu ní jnūhun ni jejnūhun ní núu sãña jēe cúu ná mozo ní.

³⁰ Chi ni jito jíinúu na núu Yaā jnama sãña jíināhan ná.

³¹ Chi ni jeni ní yá jeē jnama ya tāca ñáyuu ñayiví.

³² Te máá yá sáha jeē cúndijin ini anuá ñayuu táca nación,

návāha jecūhun ni i siquī ní.

Te sáha ya jeē cújéhnū ñayuu máá ní Israel. Achí Simeón.

³³ Te José jíin náná i cánaa ni de cájini nahín de jnūhun ni cahān Simeón siquī i.

³⁴ Te ni jíicān tahu Simeón jehē de jíināhan de, te ni cahān de jíin náná i María:

Sūchi yáha vēji i jeē candíje cuehē ñayuu nación yō Israel, te cācu i jíināhan i. Te sava i ma candíje i, te jnahnū ndetū i. Chi cúu i Yaā ní tají Yaā Dios, te sa squéhichí ni cuehē ñayuu i. ³⁵ Te súcuan te quenda ndijin ndese cájeni ni tāca ñáyuu. Te máá ró chi jnahuhū ndasí ni rō coto ró jēe ndóho i. Achí Simeón.

³⁶ Te suni íne ñn ñahan nácani jnūhun Yaā Dios, naní ña Ana. Te sēhe Fanuel, yucūn Aser cúu ña. Te je jéhnū ndasí ña. Te nde ná lulí ña te ni condee ña jíin yí ña uxā cuiyā. ³⁷ Yūcuán na te ni quendōo ndáhú ña, te ni cuu cuūn xico cuūn cuiyā ña. Te tu cújiyo ña ini vehe íi, chí jéjníñū ña nuū Jítóho yō Yaā Dios nduú ñuú, te ndite ni ña te jíicān tahu ña. ³⁸ Te suni hora un ní quee

ña, te ni nacuatáhu ña nuū Yaā Dios. Te ni cahān ña jnūhun sūchi yíquín un jíin táca ñáyuu Jerusalén jeē cáñuhun ni i jeē queé Yaā jnama i.

Jeē cuánungoo de ñuu Nazaret

³⁹ Te ni jíinu ni casquícu de táca jniñu ndácu ley maá Jítóho yō Yaā Dios, te cuanungoo de ñuu de Nazaret, ndañū Galilea. ⁴⁰ Te sūchi lúlí un ní jehnu i, te ni ije i, te ni cundichí gá i. Te ni sáha Yaā Dios jeē váha ndasí jíin i.

Jeē íne sūchi lúlí Jesús ini templo

⁴¹ Te ndijnahan cuiyā jéngoo tátá i náná i ñuu Jerusalén, jeē cúu vico pascua. ⁴² Te nuū ní cuu uxí uū cuiyā i, te cuangoo tucu de Jerusalén, nájñuhun sáha sáha de quiví vico ún. ⁴³ Te ni yáha vico, te cuanungoo de. Te sūchi lúlí Jesús, ni quendōo i Jerusalén, te tu ní cájini José jíin náná i. ⁴⁴ Te cájeni ni de jeē cuahán i mēhñu ñáyuu cájica ichi ún. Te ni cajica de ñn quiví, te sáa te ni cananducú de i mēhñu táca jnáhan de jíin ñáyuu cájini jnáhan de jíin. ⁴⁵ Te tu ní cánanihñ de i. Te ni canandicó de cuangoo de Jerusalén, cuananducú de i.

⁴⁶ Te nuū uní quiví te ni cananihñ de i ini templo, néne i mēhñu tée cástéén tutu ley Yaā Dios, te jíni nahín i jeē cácahān de te cájnūhún i de síquí jnúhun ún. ⁴⁷ Te táca ñáyuu cájini jnūhun cáhán i, cánaa ni cájito jeē váha cájí xíní i te vāha nástió cuñí i jnūhun. ⁴⁸ Te nuū ní cajito tátá i náná i nuū i, te ni canaa ni de. Te ni cahān naná i jíin i:

Séhē, ¿naun ni sáha ró súcuan jíin rí? Chi ruhū jíin tátá rō, yōhyo ni canacani ni rí cánanducú rí rohó, achí ña.

⁴⁹ Yūcuán na te ni cahān i:

¿Naun cánanducú ní sãña? ¿A tu cájini ni jéé cánuú cocu ná jíin jniñu Tátá na Yaā Dios? Achí i.

⁵⁰ Te tu ní cájecūhun ni tátá i náná i jnūhun ni cahān i.

⁵¹ Yūcuán na te cuanuhun i jíin de jíjnáhan de ñuu Nazaret, te ni jendije i nuū de. Te náná i, ni quendōo táca jnúhun yáha núu jeē níjnūní ña. ⁵² Te Jesús ni jehnu ga i, te ni cundichí gá i, te cúsiñ ni Yaā Dios jíin i, te suni súcuan táca ñáyuu.

Jnūhun Juan tēe scuándute

(Mt. 3.1-12; Mr. 1.1-8; Jn. 1.19-28)

3

¹ Te ni cuu xahūn cuiyā jeē ndácu Tiberio jniñu nñ nación. Te Poncio Pilato cúu de gobernador Judea, te Herodes cúu de gobernador Galilea, te ñani de Felipe cúu de gobernador Iturea jíin Traconite, te Lisnias cúu de gobernador Abilinia. ² Te sutū cujéhu ga cácuu Anás jíin Caifás. Te ni quee jnūhun Yaā Dios nuū Juan sēhe Zacarías, jeē íne de nuū ñuhun téhé. ³ Te ni jica nuu de táca ñuu jeē iyó yajni yūte Jordán. Te cáhán de jíin ñáyuu jeē na nácani ni i jeē stóo i cuéchi i te cuandute i, návāha cone cáhnu ni Yaā Dios nuū cuéchi i. ⁴ Te súcuan ni squícu jnūhun Juan jeē yosó nuū tútu ni tee Isaías, tēe ni nacani jnūhun Yaā Dios nde jenahán: Coó ñn tēe cana jee nde nuū ñuhun téhé: Sátūhva ró máá ró jíjnáhan ró, chi quee maá Jítóho yō.

Te sáha ró jniñu ndaā, chi vēji ya.

⁵ Te táca xéhvā na ndúndaā, te táca yucu jíin loma na ndúnduhvā, te na ndúyóhó ichi yácuá, te na ndúlíñ ichi ndáyí.

Te ndihí un cúu jeē ndúvāha ndundaā anuá ñayuu nuū yā.

⁶ Te ndihí i cuni i jeē jnáma Yaā Dios i.

Súcuan cahān Juan, achí tutu.

⁷ Te ni quendacoo cuehē ñayuu, cuahān i nuū de jeē scuándute de i. Te ni cahān de nuū i:

Va sēhe coō cácuu ró, chi xeēn rō nájñuhun coō. ¿A cájeni ni rō jeē cuu cunu ró cācu ró núu castigo xeēn jeē quíji? ⁸ Núu súcuan te sáha ró jniñu váha, te súcuan stéén rō jeē ní nacani ndije ni rō jeē stóo ró cuéchi ró. Te ma cáni ni rō cahān rō jeē cuu cācu ró síquí jeē cácuu ró yúcūn Abraham. Chi cáhán rí jíin ró jeē cuu sáha Yaā Dios jeē táca yūyú yáha nduu sēhe Abraham jeē candíje vāha, te núu cúní yā. ⁹ Te cácuu ró nájñuhun nundehé jeē tu jéhe ndehē váha. Te vijna je íyó túhva Yaā Dios jeē cuáha ya castigo xeēn, nájñuhun je íyó túhva ñn cāa jeē cahnde nde yoho yujnu. Núu súcuan te sáha ya jíin ró nájñuhun jíin táca yujnu jeē tu cúun ndehē váha, jeē tahndé te cayū nuū ñuhún. Achí de.

¹⁰ Te ñayuu un ní cacajnūhún i de:

¿Te ndese sáha ná núu súcuan? Achí i.

¹¹ Te ni cahān de:

Róhó jéē cánevāha uū sahma, na cuáha ró ñn nuū jeē tu névāha. Te róhó jéē cánevāha jeē yéji, suni súcuan na sáha ró, áchí de jíin i.

¹² Te suni jecu tēe cástútú xúhun renta, ni quecoo de jeē cuándute de. Te ni caca-jnūhún de Juan:

Maestro, te máá ná, ¿ndese sáha ná jíjnáhan ná?

¹³ Te ni cahān Juan jíin de:

Ma scaá ró cácan rō xūhún, chi máá cúhva-ni jeē ní ndacu jniñu nuū rō, achí de.

¹⁴ Te suni ni cacajnūhún jecu soldado:

Te máá ná, ¿ndese sáha ná jíjnáhan ná? áchí de.

Te ni cahān Juan jíin de:

Ma quénde rō ndajniñu ni ñn jíin jnūhun siúhú ni jíin jnūhun stáú yáhu, te cusñ ni rō jíin yáhu ró, áchí de.

¹⁵ Te tāca ñayuu cándetu i jeē quíji Cristo, Yaā jeē tají Yaā Dios, te cájeni ni i jeē sanaa te suu cúu Juan. ¹⁶ Te ni cahān Juan jíin i jíjnáhan i:

Ruhū chi jíin ndute scuándute ri rohó. Te vēji ñn Yaā jeē nájnūhun scuándute ya rohó cúu jeē cuáha ya Espíritu Santo condee ini anuá rō, te poder yā cúu nájnūhun ñuhūn. Te cújéhnū ndasí yá, chi tú na vé jéhnū cuíti cúu ri nuū yā, ni jeē cuajniñu ri nuū yā vēsú ñn jniñu lúlí gá nájnūhun jeē ndají rí vēsú correa ndijēn yā. ¹⁷ Te sáha ya nájnūhun sáha tēe scánda trigo, chi sásñn ya ñayuu vāha jíin ñayuu cunéé, nájnūhun cúndoo trigo jeē quénda sñn paja. Te nastútú yá trigo yā ndívi ini yacā yā. Te paja chi jnaa yā nuū ñuhún jeē ma ndahvá cuíti. Achí Juan.

¹⁸ Te súcuan te jíin cuéhē gā jnūhun ni stihví ni de ñayuu un, ní nacani de jnūhun vāha Yaā Dios nuū i. ¹⁹ Te suni ni cahān xeēn de nuū Herodes, tēe cúu gobernador, chi tēe un ní nacueca de Herodías, ñasihí ñani de Felipe. Te cuehē gā jniñu néé súcuan ni sáha Herodes. ²⁰ Te sa víhyá gā ni sáha de jeē neé gá, chi ni chune de Juan vecāa.

Jeē ní jendute Jesús

(Mt. 3.13-17; Mr. 1.9-11)

²¹ Te nde ná tu quívi Juan vecāa, ná ni ine de ni scuándute de tāca ñayuu, te suni ni scuándute de Jesús. Te jícán tahu yā, te ni nune-ni andívi. ²² Te ni cuun Espíritu Santo

ni quee xinī yā, te cáa nájnūhun ñn paloma. Te íchi andívi ní cahān ñn jnūhun:

Máá ró cúu Sēhe ri jeē maní ndasí rí jíin, te yōhyo cúsn ni rí jíin ró, achí.

Lista ñayuu yucūn ní quiji Jesucristo

(Mt. 1.1-17)

²³ Te ná ni quejéé Jesús steén yā jnūhun, te íyó yá nájnūhun ocō uxī cuiyā. Te cájeni ni ñayuu jeē séhe José cúu ya. Te José ni cuu séhe Elí, ²⁴ te Elí ni cuu séhe Matat, te Matat ni cuu séhe Leví, te Leví ni cuu séhe Melqui, te Melqui ni cuu séhe Jana, te Jana ni cuu séhe José, ²⁵ te José ni cuu séhe Matatías, te Matatías ni cuu séhe Amós, te Amós ni cuu séhe Nahum, te Nahum ni cuu séhe Esli, te Esli ni cuu séhe Nagai, ²⁶ te Nagai ni cuu séhe Maat, te Maat ni cuu séhe Matatías, te Matatías ni cuu séhe Semei, te Semei ni cuu séhe José te José ni cuu séhe Judá, ²⁷ te Judá ni cuu séhe Joana, te Joana ni cuu séhe Resa, te Resa ni cuu séhe Zorobabel, te Zorobabel ni cuu séhe Salatiel, te Salatiel ni cuu séhe Neri, ²⁸ te Neri ni cuu séhe Melqui, te Melqui ni cuu séhe Adi, te Adi ni cuu séhe Cosam, te Cosam ni cuu séhe Elmodam, te Elmodam ni cuu séhe Er, ²⁹ te Er ni cuu séhe Josué, te Josué ni cuu séhe Eliezer, te Eliezer ni cuu séhe Jorim, te Jorim ni cuu séhe Matat, ³⁰ te Matat ni cuu séhe Leví, te Leví ni cuu séhe Simeón, te Simeón ni cuu séhe Judá, te Judá ni cuu séhe José, te José ni cuu séhe Jonán, te Jonán ni cuu séhe Eliaquim, ³¹ te Eliaquim ni cuu séhe Melea, te Melea ni cuu séhe Mainán, te Mainán ni cuu séhe Matata, te Matata ni cuu séhe Natán, ³² te Natán ni cuu séhe David, te David ni cuu séhe Isaí, te Isaí ni cuu séhe Obed, te Obed ni cuu séhe Booz, te Booz ni cuu séhe Salmón, te Salmón ni cuu séhe Naasón, ³³ te Naasón ni cuu séhe Aminadab, te Aminadab ni cuu séhe Aram, te Aram ni cuu séhe Esrom, te Esrom ni cuu séhe Fares, te Fares ni cuu séhe Judá, ³⁴ te Judá ni cuu séhe Jacob, te Jacob ni cuu séhe Isaac, te Isaac ni cuu séhe Abraham, te Abraham ni cuu séhe Taré, te Taré ni cuu séhe Nacor, ³⁵ te Nacor ni cuu séhe Serug, te Serug ni cuu séhe Ragau, te Ragau ni cuu séhe Peleg, te Peleg ni cuu séhe Heber, te Heber ni cuu séhe Sala, ³⁶ te Sala ni cuu séhe Cainán, te Cainán ni cuu séhe Arfaxad, te Arfaxad ni cuu séhe Sem, te Sem ni cuu séhe Noé, te

Noé ni cuu sēhe Lamec, ³⁷ te Lamec ni cuu sēhe Matusalén, te Matusalén ni cuu sēhe Enoc, te Enoc ni cuu sēhe Jared, te Jared ni cuu sēhe Mahalaleel, te Mahalaleel ni cuu sēhe Cainán, ³⁸ te Cainán ni cuu sēhe Enós, te Enós ni cuu sēhe Set, te Set ni cuu sēhe Adán, te Adán ni cuu sēhe Yaā Dios, chi ni sáha ya de.

Jeē ní jito ndee jexeén Jesús
(Mt. 4.1-11; Mr. 1.12-13)

4

¹ Te Jesús ni cunuú Espíritu Santo ini yā, te ni quenda ya yūte Jordán cuahān yā. Te ni jínū yā nde nuū nūhun téhé ní sáha Espíritu Santo. ² Te ni ine ya yūcuan úū xico quivī, te ni jito ndee jexeén yā, chi cúní jeē sáha ya cuēchi. Te tāca quivī ún tu ní yéji cuiti yā, te ná ni yāha quivī ún, te jíi yā sōco. ³ Yūcuán na te ni cahān jexeén un jíin yá:

Núu máá ró cúu Sēhe Yaā Dios, te cahān rō jeē yuū yáha na ndúu staā caji rō, achí.

⁴ Te ni cahān Jesús jíin:

Tuú chi yósó núū tútu iī: Nasūu máni máá jíin stāā cátecu ñayuu, chi suni jíin táca jnúhun cáhān Yaā Dios, achí yá.

⁵ Yūcuán na te cuahān jexeén un jíin yā nde xinī ñn yucu súcún, te ñn núnúu-ni ni steén nuū yā tācá nación ní cáhnu ñayiví.

⁶ Te ni cahān jíin yá:

Nuū máá ró cuāha ri jeē kujéhu ró núū ndivii nación yáha, chi yōhyo luu cáa. Chi máá rí jnāi ndihí, te cuu cuāha ri nuū ndé ñn cúní rī. ⁷ Núu súcuan te núu cuiñi yítí ró chiñúhún ró ruhū, te cuāha ndihí ri nuū rō. Achí jexeén.

⁸ Te ni cahān Jesús jíin:

Satanás, cujiyo quihīn rō, chi yósó núū tútu jeē chiñúhún ñayuu máá Jítoho i Yaā Dios, te nuū maá-ni ya cuajníñu i. Achí yá.

⁹ Yūcuán na te cuahān jexeén un jíin yā nde ñuu Jerusalén. Te ni jeni ya xinī torre templo. Te ni cahān jíin yá:

Te núu Sēhe Yaā Dios cúu ró, te síngava ró máá ró nde nuū nūhun, chi jnama ya rohó.

¹⁰ Chi yósó núū tútu: Tejníñu ya ndajéhé yā quijicoo coto rōhó.

¹¹ Te cunundee yā rohó jíināhan ya, návāha ma cáchihi ró jéhē rō nuū yuú.

Achí tutu. Achí jexeén.

¹² Te ni cahān Jesús:

Tuú chi suni yósó núū tútu jeē ma coto ndee ñayuu Jítoho i Yaā Dios, núu jnama ya i chí tuú, achí yá.

¹³ Te tuá ni níhín jexeén modo coto ndee Jesús quivī ún, te ni cujiyo cuahān jecu-ni tiempo.

Jeē ní quejéé Jesús nácani ya jnúhun región Galilea
(Mt. 4.12-17; Mr. 1.14-15)

¹⁴ Te ni cunuú fuerza Espíritu Santo ini Jesús, te cuanuhun yā Galilea. Te ní región yajni yūcuan ní jítē núu jnúhun ya. ¹⁵ Te ni steén yā jnúhun ini tācá vehe iī sinagoga, te ndihí ñayuu ni cajejnúhún i ya.

Jeē cuánuhun yā ñuu Nazaret
(Mt. 13.53-58; Mr. 6.1-6)

¹⁶ Te ni najinū yā ñuu Nazaret nuū ní jehnu ya. Te quivī ndétátú ni quivī ya ini vehe iī sinagoga, nájnūhun sáha sáha ya. Te ni ndocuiñi yā jeē cahu ya tutu iī. ¹⁷ Te ni cajēhe de tutu ni tee Isaías, tēe ni nacani jnúhun Yaā Dios nde jenahán. Te ni nune ya tutu ún, te ni nanihīn yā nuū yosó jnúhun ni cahu ya:

¹⁸ Espíritu máá Jítoho yō Yaā Dios iyó yá jíin rí,

chi ni tejníñu ya ruhū jeē nácani ri jnúhun vāha nuū ñayuu ndahú.

Te ni tají yá ruhū vēji ri jíin jnúhun jeē ndúvāha ni ñayuu cáccuñhyá ni.

Te castūhun rí nuū ñayuu cáyihí ndaha jexeén jeē coo libre i.

Te sáha ri jeē ndúndijin ini anuá ñayuu tu cájecūhun ni,

te jnama ri ñayuu jeē cándoho i sáha jnáhan i.

¹⁹ Te nacani ri jnúhun jeē ní quee tiempo jeē sáha Jítoho yō Yaā Dios jeē vāha ñayuu.

Achí tutu ni cahu ya.

²⁰ Te ni nacasi yā tutu ún, te ni nacuāha ya nuū téé jéjníñu ini sinagoga, te ni nucōo ya jeē steén yā jnúhun nuū ñayuu cáhīn ini sinagoga. Te tācá i cájito vāha i nuū yā. ²¹ Te ni quejéé yá cahán yā jíin i:

Vijna te ni squícu jnúhun cáhán tutu iī yāha ní cajini sōho ró, achí yá.

²² Te ndivii i ni cacahān jeē vāha tēe cúu ya, te cánaa ni i jeē ní cajini i tāca jnúhun luu ni cahān yā. Te ni cacajnūhun jnáhan i:

¿A násūu séhe José cúu tēe yáha?

²³ Te ni cahān yā jín i:

Jíní vāha ri jeē cájeni ni rō cahān rō jnūhun yátá yáha jín rí: Tēe tájné, sátájné ró maá ró núu súcuan. Te jnūhun yáha cúni cahān jeē nájñūhun ni nasávāha ri cuehē ñayuu cácuñū ini ñuu Capernaum ni canihīn rō jnūhun, suni súcuan na sáha ri ñuu yō yáhá návāha candíje ró cájeni ni rō. Achí yá jín i.

²⁴ Te ni cahān gā yā:

Jendaá cahán rī jín ró, ni ñn tēe nácani jnūhun Yaā Dios, tu cájetáhu ñayuu ñuu maá de nuū de. ²⁵ Te suni jendaá cahán rī jín ró jeē ni íyo cuehē ñahan ní ndóo ndáhu ini nación yō Israel, tiempo ni cotecu Elías, tēe ni nacani jnūhun Yaā Dios. Te tiempo un tu ní cúun cuiti saū unī cuiyā yosáva, te ni íyo ñn jnamā xeēn ñí cáhnu nación. ²⁶ Te tu ní tájī Yaā Dios Elías quihīn de nuū ni ñn ñahan viuda nación yō Israel, chi nuū máa ñn-ni ñahan viuda jeē ndeē ñuu Sarepta ndañú Sidón, ni jehēn de ni jito de jeē ní yeji ña. ²⁷ Te ini nación yō Israel suni ni íyo cuehē tēe ni candoho cuehyī stehyú, tiempo jeē ní cotecu Eliseo, tēe ni nacani jnūhun Yaā Dios. Te ni ñn de tu ní cándíje jeē ndúvāha de sáha Eliseo, chi sa suhva máñúhún-ni Naamán, tēe nación Siria ni nduvāha. Achí yá.

²⁸ Yūcuán na te tāca ñáyuu cáhīn ini sinagoga, yōhyo ni caquitī ní i jnūhun ní cahān yā. ²⁹ Te ni candocuñī i, te ni caquenehen i ya yatā ñúū ún, cuahān i jín yá xinī yúcu íne ñuu ún, chi cácuñi i chundahá i ya ñinga ya cava ún. ³⁰ Te tu ní cúu sáha i, chi ni yāha-ni ya mēhñú i cuahān yā.

Jeē ní quenehen ya tachī ini ñn tēe
(Mr. 1.21-28)

³¹ Yūcuán na te cuahān Jesús ñuu Capernaum región Galilea. Te quivī ndétātu ní steén yā jnūhun nuū ñáyuu. ³² Te ni canaa ni i cájini i jnūhun steén yā. Chi ni steén vāha ya nuū i, chi jíní vāha máa yá.

³³ Te ini vehe sinagoga un íne ñn tēe jeē ñūhun tachī xeén ini de. Te tēe un ní cana cóhó de:

³⁴ Cujíyo ní. ¿Naun vēji ní núū na jínáhan ná, Jesús ñuu Nazaret? ¿A véji ní jēe snāa ni sáña, chí naún? Je jíní na ndé ñn cúu ní, chi Sēhe ñi Yaā Dios cúu ní. Achí de.

³⁵ Te Jesús ni cahān xeēn yā nuū tachī ún: Casi yuhu ró te quenda ró ini tēe yáha, áchí yá.

Te ni cotúú-ni tēe un núū tāca ñáyuu, ni sáha tachī ún. Te ni quenda ini de cuahān, te tú na vé ni sáha ga jín de. ³⁶ Te ndíhi ñayuu un ní cayūhú i, te ni cacahān i jín jnāhan i:

¿Na jnūhun cúu yāha jēe ní cuu súcuan? Chi cújéhnu tēe yáha jēe ndácu ñihin de jniñu nuū tachí, te quéndacoo-ni, áchí i.

³⁷ Te jnūhun ya ni jitē núu cuahān ñí cáhnu región yūcuán.

Jeē ní nasávāha ya naná chīsó Simón Pedro
(Mt. 8.14-15; Mr. 1.29-31)

³⁸ Yūcuán na te ni quenda Jesús ini vehe ñi sinagoga, te cuahān yā te ni jinū yā vehe Simón. Te naná chīsó Simón, yíhi xeēn quíji ña, te ni cacahān ndahú de jín yá jehē ña. ³⁹ Te ni jīta ndeyi ya nuū ña, te ni cahān yā jeē na ndíco quíji ún. Te ni nduvāha-ni ña. Te ni ndocuñī-ni ña, te ni sáha ña jeē ní yeji yā jín de.

Jeē ní nasávāha ya cuehē ñayuu
(Mt. 8.16-17; Mr. 1.32-34)

⁴⁰ Te jeē ni quée niāndii, te tāca ñáyuu jeē iyó jnāhan i cácuñū ndinuū cuehyī, ni caquindeca i jnāhan i un núū yā. Te ni soó yá ndaha ya siquī ñn ñn i, te súcuan ni nasávāha ya i. ⁴¹ Te suni cuehē ñayuu ni quendacoo tachī ini i, te cácana cóhó táchí ún:

Máa ní cúu Sēhe Yaā Dios, achí.

Te ni cahān xeēn yā nuū, te tu ní jéhe ya jnūhun jeē cahán gā súcuan, chi cájini jeē maá yá cúu Cristo, Yaā ní tají Yaā Dios.

Jeē ní nacani ya jnūhun región Galilea
(Mr. 1.35-39)

⁴² Te nuū ní cundijin, te ni quenda ya cuahān sīn ya yatā ñúū nuū tú ñayuu. Te tāca ñáyuu cánanducú i ya, te ni jinūcoco i nuū íne ya. Te cástétu i ya jeē tú cujiyo ya nuū i. ⁴³ Te ni cahān yā jín i:

Suni cánuú jēe nacani ri jnūhun vāha nuū tāca gá ñuu siquī ndese ndácu Yaā Dios jniñu, chi jeē yúcuñ ní tají yá ruhū vēji ri. Achí yá.

⁴⁴ Te ni jica cuu ya ní región Galilea, nácani ya jnūhun ini tãcã vehe ïi sinagoga.

Jeē ní canihīn de cuehē chãcã ni sãha ya (Mt. 4.18-22; Mr. 1.16-20)

5

¹ Te ïn quivī te ïne Jesús yumar Gensaret. Te ni quecoo cuehē ñayuu, te ni chitú níhin i nuū yã, chi cãcuni i cuni nahín i jnūhun Yaã Dios. ² Te ni jito ya jeē yúcu uū barco yajni yumar. Te tēe cájni chãcã, je ni quendacoo de ini barco, te cãnacate de ñunu de. ³ Te ni quivī ya ini ïn barco jeē cúu barco Simón. Te ni cahãn yã jíin de jeē na scãca yátã de quihīn jecu gã nuū ndúte. Te ni cucõo ya, te nde ini barco un ní steén yã jnūhun nuū ñáyuu cuehē jeē yúcu i yundúte un. ⁴ Te nuū ni jínu ni steén yã, te ni cahãn yã jíin Simón:

Scãca ró barco na quihín yõ nde nuū iyó cúnú ndute, te sínga ró ñunu ró jni ró chãca, áchí yã.

⁵ Te ni cahãn Simón:

Maestro, ní ñiñu ni casínga ná ñunu jeē jni ná tí, te tu ní níhín cuiti ná ni ïn tí. Te jeē cahãn maá ní súcuan, te na sínga tucu ná ñunu, áchí de.

⁶ Te ni casínga de, te ni quivīcoo cuehē ndasí chãca, nde nducú táhdē ñunu de. ⁷ Te ni cacaja ndahã de nuū jnáhan de cáhīn ini ïnga barco, na quíjicoo chindéé ñájnáhan jíin de. Te ni quecoo de, te ni cascútú ndí de tí ndíndúú barco, te nde je yajni quee barco. ⁸ Te ni jito Simón Pedro jeē súcuan ni cuu. Te ni jecuiñī yití de nuū Jesús, te ni cahãn de:

Cujiyo ní núu ná, chi tēe íyó cuéchi cúu ná, áchí de.

⁹ Chi máã de jíin táca tēe cáhīn jíin de, ni cayūhú de jeē ní canihīn de cuehē chãcã un ní sãha ya. ¹⁰ Te suni ni cayūhú Jacobo jíin Juan, ndíndúú séhe Zebedeo, chi tēe chindéé ñájnáhan jíin Simón cácuu de. Te ni cahãn Jesús jíin Simón:

Ma yūhu ró, chi nde vijna te sãha ri jeē nihīn rō cuehē ñayuu candíje ruhū, nájnūhun ni nihīn rō cuehē chãcã. Achí yã.

¹¹ Yūcuán na te nuū ni jíincoo de jíin barco nuū ñūhun íchi, te ni castóo de ndihí ndajniñu de, te ni candiquīn de ya cuango de.

Jeē ní nasávãha ya ïn tēe ndóho cuehyī stehyú

(Mt. 8.1-4; Mr. 1.40-45)

¹² Yūcuán na te ïne Jesús ini ïn ñuu, te ni quee ïn tēe ndóho cuehyī stehyú. Te ni jito de nuū Jesús, te ni jecuiñī yití de ni jequīn de nuū de nde nuū ñūhun, te ni cahãn ndahú de jíin yã:

Jíní na jéē cuu sãha ní jéē nduvãha ná, te núu cúní ni, áchí de.

¹³ Yūcuán na te ni soó yã ndaha ya siquī de, te ni cahãn yã:

Cúní rī. Te na ndúvãha ró, áchí yã.

Te ná ni cahãn yã súcuan, te ni nduvãha-ni tēe ndóho cuehyī stehyú un.

¹⁴ Te ni ndacu ya jniñu nuū de jeē ma cáchi cuiti de nuū ní ïn. Te áchí yã:

Quisteén rō maá ró nuū sutú, te condahã ró jeē socó rō nuū Yaã Dios siquī jeē ndúndoo ró núu yã, nájnūhun ni ndacu Moisés jniñu jenahán. Te súcuan te cuni ñayuu jeē ní nduvãha ró. Achí yã.

¹⁵ Te víhyã gã ni jitē núu jnūhun ya cuahãn. Te ni cataca cuehē ñayuu jeē cúní nahín i jnūhun stéén yã, jíin jéē nasávãha ya i nuū táca cuéhyī cándoho i. ¹⁶ Te máã yã cuahãn sñn ya nuū tú ñayuu, te ni jicãn tahu yã.

Jeē ní nasávãha ya ïn tēe ndóho cuehyī ni íjin

(Mt. 9.1-8; Mr. 2.1-12)

¹⁷ Te ïn quivī te stéén yã jnūhun, te jecu tēe grupo fariseo jíin tēe cástéén tutu ley Yaã Dios, cáyucú de yūcuán. Te tēe un ní quecoo de nuū yã jeē véjicoo de táca ndañū Galilea, jíin ndañū Judea, jíin ñuu Jerusalén. Te poder maá Yaã Dios iyó jíin yã jeē nasávãha ya ñayuu cácuu. ¹⁸ Yūcuán na te ni quecoo jecu tēe, cándiso de ïn tēe ndóho cuehyī ni íjin, cáttú de nuū ïn camilla. Te cánducú de squivī de tēe ún ini vehe, te caquin de nuū ïne ya. ¹⁹ Te tu ní canihīn de modo quivīcoo de jíin tēe un, chi cáyucú chitú ñáyuu. Te ni cacoo de siquī véhe, te ni canune de teja. Te ni cascúun de tēe cúhú un jíin camilla de nde nuū ïne Jesús mēhñu ñáyuu. ²⁰ Te ni jini Jesús jeē cácdíje de jeē cúu nasávãha ya tēe cúhú un. Te ni cahãn yã jíin tēe cúhú un:

Róhó, je íne cáhnu ni rī nuū tāca cuéchi ró, áchí yá.

²¹ Yūcuán na te tēe cástéén tutu ley Yaā Dios jíin tēe grupo fariseo, ni quejéé de cájeni ni de síquī yā: ¿Ndé ìn cúu tēe yáha jéé cahán de jnūhun ndevāha jeē quití ni Yaā Dios? Chi nasūu Yaā Dios cúu de jeē cóne cáhnu ni de nuū cuéchi.

²² Te ni jíin Jesús jeē súcuan cájeni ni de, te ni cahān yā jíin de:

¿Naun cájeni ni rō jeē cahán ndevāha rī? ²³ Jeē uú jnūhun yáha, ¿ndé ìn yí gá cáa? ¿A jéé cahán rī jíin tēe cúhú: Je íne cáhnu ni rī nuū tāca cuéchi ró? ¿Chí yí gá jeē cahān rī: Ndocuñī te caca ró, chí je ni nduvāha ró, achi rī? ²⁴ Te vijna te na stéén rī jeē maá rí, Yaā ní nduu tēe, ndíso jníñu rī ini ñayīvi yáha jéé cóne cáhnu ni rī nuū cuéchi.

Yūcuán na te ni cahān yā jíin tēe ni íjin ún:

Cáhán rī jíin ró, ndocuñī te naquihin ró camilla rō, te quinuhun rō vehe ró, áchí yá jíin de.

²⁵ Te ni ndocuñī-ni tēe ún, jíto jíinúū ñayuu. Te ni naquihin de camilla nuū ni cátu de, te cuanuhun de vehe de. Te nácuatáhu de nuū Yaā Dios. ²⁶ Te yōhoyo ni canaa ni tāca ñayuu cájito i, te ni cacahān i jeē yōhoyo vāha Yaā cúu Yaā Dios. Te suni yōhoyo cáyūhú i, te cácahān i:

Vijna te ni cajito yó jniñu jéhnu téyí, áchí i.

Jeē ní cana ya Leví

(Mt. 9.9-13; Mr. 2.13-17)

²⁷ Yūcuán na te ni quenda ya cuahān yā, te ni jito ya nuū ìn tēe stútú xúhun renta, naní de Leví, néne de nuū cutútú xúhun renta. Te ni cahān yā jíin de:

Condiquīn ruhū na quíhín yō.

²⁸ Te ni ndocuñī de, te ni stóo de ndihi ndajníñu de, te cuahān de jíin yá.

²⁹ Yūcuán na te ni sáha Leví ìn vico cáhnu vehe de, jeē cúsi ni de jíin Jesús. Te cuehē tēe cástútú xúhun renta jíin sava ga tēe, cáyūcú de mesa cáyeji de staā jíin yá. ³⁰ Te tēe grupo fariseo jíin tēe cástéén tutu ley Yaā Dios, ni quejéé de cácahān de síquī tēe cáscuáha jíin yá, te ni cacajñuhún de:

¿Najehē cáyeji rō cájili ró jíin tēe cástútú xúhun renta jíin tēe cása ha cuéchi? áchí de.

³¹ Te ni cahān Jesús:

Ñayuu cáhīyo vāha, tu jíin ñúhún i tēe tájné, chí ñayuu cácu hū cúu jeē jíin ñúhún.

³² Te ruhū nasūu jéé véji rī cana rī ñayuu tú cuéchi, jeē cúu i nájnūhun ñayuu cáhīyo vāha. Chi sa suhva véji rī cana rī ñayuu cáhīyo cuéchi, jeē na nácani ni i te stóo i cuéchi i. Achí yá.

Jeē ní cacajñuhún de ya síquī jeē cóndite ni *(Mt. 9.14-17; Mr. 2.18-22)*

³³ Yūcuán na te ni cacahān de jíin yá:

Tēe cáscuáha jíin Juan, jíin tēe cáscuáha jíin grupo fariseo, cuehē jíinu cáhīyo ndite ni de te cájicān tahu de. Te tēe cáscuáha jíin maá ní, ¿naun tu cása ha de súcuan? Chí cáyeji de cájili de.

³⁴ Te ni cahān yā jíin de:

¿A cuu condite ni de níni jéé iyó rí jíin de? ¿A cuu sáha ró jéé condite ni ñayuu cáhīn vico nándāha, te núu níni néne tēe nándāha?

³⁵ Te quee quivī jeē cújiyo tēe ni nándāha, te quivī ún chí condite ni i. Achí yá.

³⁶ Te suni ni cahān yā uū jnūhun yátá síquī jeē tu quíjnāhan jnūhun jeé jéé steén yā jíin táca jnúhun jenahán. Achí yá:

Ni ìn ñayuu tu jéhnde i ìn pedazo sahma jéé i, te nachuhun i nuū ìn sahma túhú i. Chí núu súcuan te stívi i sahma jéé i, te suni tu quíjnāhan jeé jeé un jíin jéé tuhú. ³⁷ Te tú ni ìn chúhun vino jeé ini ñí tuhú. Chí núu súcuan, te vino jeé un ndatá ñí, te naa vino jíin ñí. ³⁸ Chí cánuú jéé chúhun vino jeé ini ñí jéé, te súcuan te quéndōo vāha ndíndúú.

³⁹ Te ñayuu cájili vino áva, tu cúni i coho i jeé jeé, chí jeé áva cúu jeé vāha ga, achi i. Achí yá.

Jeē ní cataxín de yoco trigo quivī ndétátú *(Mt. 12.1-8; Mr. 2.23-28)*

6

¹ Te ìn quivī ndétātu ní yāha Jesús cuahān yā mēhñú nuū cáa trigo. Te tēe cáscuáha jíin yá ni cataxín de yoco trigo, te ni caquīn de ini ndaha de, te ni cáyeji de. ² Te sava tēe grupo fariseo ni cacajñuhún de:

¿Najehē casáha ró jniñu jeē tu íyó vāha sáha ró quivī ndétátú?

³ Te ni cahān Jesús jíin de:

¿A tu ní cácahu cuítī rō tutu ndese ni sáha David, ìn quivī jeē ni jíi de sōco jíin tēe cáhīn jíin de? ⁴ Te ni quivī de ini vehe Yaā

Dios, te ni quihin de pan iī jeē yosó ndijin nuū Yaā Dios. Te ni yeji de, te suni ni jēhe de ni cayejī tēe cáhīn jín de. Te tú na ley jeē cáji ni ĩn tēe, chí máá-ni sutū cuu caji. Te vēsú súcuan te tú na cuēchi ní íyo siquī de. Achí yá.

⁵ Te ni cahān gā yā jín de:

Ruhū, Yaā ní nduu tēe, máá rí cúu jeē ndácu jniñu siquī ndese sáha ñayuu quiṽi ndétátú, áchí yá.

Jeē ní nduvāha tēe ni ichī ndaha
(Mt. 12.9-14; Mr. 3.1-6)

⁶ Te ĩnga quiṽi ndétátú, suni ni quiṽi ya ini vehe iī sinagoga, te ni steén yā jñūhun. Te yūcuan íne ĩn tēe ni ichī ndaha váha de. ⁷ Te tēe cástéén tutu ley jín tēe grupo fariseo, cájito yuhu de ya núu nasávāha ya tēe un quiṽi ndétátú, návāha nihīn de cuēchi siquī yā. ⁸ Te máá yá je jíní yā ndese cájeni ní de. Te ni cahān yā jín tēe ni ichī ndaha ún:

Ndocuiñī, te condichi rō mēhñu yáha, áchí yá.

Te ni ndocuiñī de, te ni jecondichi de mēhñú. ⁹ Yūcuán na te ni cahān yā jín de jínáhan de:

Na cájnūhun rí rohó ĩn jñūhun: ¿Ndese cáhán ley siquī quiṽi ndétátú? ¿A jēe sáha vāha yó, chí sáha néé yó? ¿A jēe nasávāha yó ñayuu je yajni cuu, chí sáha yó jēe cúu i? Achí yá.

¹⁰ Te ndéhé yá nuū de jeē cáyūcú de ní xiin ya. Te ni cahān yā jín tēe cúhú un:

Scáá ndaha ró.

Te ni scaá de, te ni nduvāha-ni ndaha de.

¹¹ Te yōhyo ni caquiṽi ni tāca tēe un, te ni quejé de cándajnūhún de siquī Jesús, ndese cahni de ya.

Jeē ní nacāji ya uxī uū tēe apóstol
(Mt. 10.1-4; Mr. 3.13-19)

¹² Te ni cuu jecu quiṽi, te ni quenda ya cuacacān tahú yā nde yucu. Te ní niñu ni jicān tahú yā nuū Yaā Dios. ¹³ Te nuū ní cundijin, te ni cana ya tāca tēe cáscuáha jín yá. Te ni nacāji ya uxī uū de, te ni cahān yā jeē cuu de apóstol, condiso jniñu de nacani de jñūhun ya. ¹⁴ Te yāha cúu síhví de jínáhan de: Simón jeē ní nasnání yá de Pedro, jín ñani de Andrés, te suni Jacobo jín Juan, Felipe jín Bartolomé, ¹⁵ Mateo,

Tomás, Jacobo sēhe Alfeo, Simón tēe grupo cananista, ¹⁶ Judas ñani Jacobo, jín Judas Iscariote, tēe jeē ní nastúu de ya.

Jeē ni stéén yā nuū ñáyuu cuehē
(Mt. 4.23-25)

¹⁷ Te ni nanuu ya yucu jín táca tēe un jēe cascuáha jín yá, te ni jecuiñī yā ĩn nduhvā jín de. Te cuehē ñayuu ní región Judea jín ñuu Jerusalén, jín ñáyuu yumar ñuu Tiro jín ñuu Sidón, ni quecoo i jeē cúni nahín i jñūhun stéén yā, jín jēe ndúvāha i cuehyī cándoho i. ¹⁸ Te ñayuu jeē ñūhun tachī ini i, suni ni canduvāha i ni sáha ya. ¹⁹ Te ndivii ñayuu cáculi i quehé i ya, chí súcuan ndúvāha i sáha ya jín poder yā.

Jñūhun ñayuu yōhyo ndetū jín ñáyuu jeē xeēn ndoho
(Mt. 5.1-12)

²⁰ Te ni ndacoto ya nuū tēe cáscuáha jín yá un, te ni cahān yā:

Yōhyo ndetū rohó jēe cándoho ndáhú, chí quiṽi ró ñuu nuū ndácu Yaā Dios jniñu.

²¹ Yōhyo ndetū rohó jēe cájī sōco vijna, chí quiji quiṽi jeē ndutú chíji ró.

Yōhyo ndetū rohó jēe cándahyū rō vijna, chí quiji quiṽi jeē cuecú rō.

²² Yōhyo ndetū rō te núu cáquiṽi ni ñayuu nuū rō jeē siquī ruhū, Yaā ní nduu tēe, te cáscuáha i rohó, te cácahān neé i nuū rō, te cácahān i jeē ñáyuu casáha jniñu néé cácuu ró. ²³ Te na cóo sí ni rō quiṽi sáha i súcuan, te víhyá gā na cúsi ni rō, chí cáhnu téyí coo tahū rō nde andiví. Chí suni súcuan ni casáha uhū tāca jí i jín tēe ni canacani jñūhun Yaā Dios nde jenahán.

²⁴ Te nacā jeē xeēn ndoho rohó ñáyuu cucá, chí vijna-ni cúu jeē cáhīyo sí ni rō.

²⁵ Nacā jeē xeēn ndoho rohó ñáyuu jeē vijna cáhīyo vetū chíji ró, chí quiji quiṽi jeē cuu rō sōco.

Nacā jeē xeēn ndoho rohó ñáyuu jeē vijna cájecū rō, chí quiji quiṽi jeē nducuíhyá ni rō te ndahyū rō.

²⁶ Nacā jeē xeēn ndoho tāca ró núu cácejnūhún ñáyuu rohó, chí suni súcuan ni cajejnūhún jí i tāca tēe ni canacani jñūhun stáhú ndé jenahán.

Jnūhun jeē cundáhú ni yō ñayuu cájito uhū yohó

(Mt. 5.38-48; 7.12)

²⁷ Te cáhán rī jín róhó jeē cájini sōho: Cundáhú ni rō ñayuu cájito uhū rohó. Te sáha vāha ró jín ñáyuu cáquitī ni nuū rō.

²⁸ Te cacān rō jeē vāha coo ñayuu cácahān ndevāha síquī rō. Te cacān tahu rō jehē ñáyuu cácahān neé nuū rō. ²⁹ Te núu ndé téé caní de ñin lado yiquí núu rō, te vāha ga suni cuāha ró inga lado caní de, vēsú jeē nácuāha ró jéé ndútahū de. Te núu ndé téé cúní de quende de ticāchi ró, suni cuāha ró jnūhun jeē na quíhín de jín ndé camisa rō. ³⁰ Te na-ni ñayuu jicān nuū rō, te cuāha ró núu i. Te ñayuu quíhin ndajniñu ró, ma nándacān rō. ³¹ Te nájnūhun cáconi rō jeē sáha vāha ñayuu jín ró, suni súcuan na sáha vāha ró jín i.

³² 'Chi núu íyó mánī rō jín máa-ni ñayuu jeē maní jín ró, ¿te na vé jeē vāha ga sáha ró núu súcuan? Chi nde tēe cásáha cuēchi, suni maní de jín téé maní jín máa de. ³³ Te núu sáha vāha ró jín máa-ni ñayuu jeē casáha vāha jín ró, ¿te na vé jeē vāha ga sáha ró núu súcuan? Chi nde tēe cásáha cuēchi, suni súcuan cásáha de. ³⁴ Te núu cuāha núu ró núu maá-ni ñayuu jeē ñūhun ni rō nacuāha i nuū rō, ¿te na vé jeē vāha ga sáha ró núu súcuan? Chi nde tēe cásáha cuēchi, suni jéhe núu de nuū tāca gá tēe cásáha cuēchi, návāha nanihīn tucu de. ³⁵ Núu súcuan te cundáhú ni rō ñayuu cájito uhū rohó, te sáha vāha ró jín i, te cuāha núu ró núu i. Te ma cuāha ró máa síquī jeē caní ni rō jeē suni nacuāha i nuū rō. Te súcuan te cáhnu coo tahu rō, te stéén rō jeē cácuu ró séhe Yaā kujénu téyí. Chi máa yá vāha ni yā jín ñáyuu tu nácuatáhú núu yā jín ñáyuu casáha neé. ³⁶ Núu súcuan te cundáhú ni rō ñayuu, nájnūhun máa Tátá rō cundáhú ni yā i.

Ma cáhán yō síquī cuēchi jnāhan yó

(Mt. 7.1-5)

³⁷ 'Ma cáhán rō síquī cuēchi ñayuu ndese sáha i, návāha suni ma cáhán Yaā Dios cuēchi síquī rō jeē casáha ró súcuan. Ma cáhán xeēn rō síquī i jeē tú vāha sáha i, návāha suni ma cáhán Yaā Dios súcuan síquī rō. Cone cáhnu ni rō nuū i, te suni cone cáhnu ni yā nuū rō. ³⁸ Cuāha ró núu ñáyuu, te suni súcuan cuāha Yaā Dios nuū rō. Chi

vāha ndasí cuāha ya nuū rō, nájnūhun jeē chícuāha vāha ya, quisi ya, sánihin ya, te nde scáa ya cuāha ya nuū rō. Chi cūhva jeē cájēhe ró núu ñáyuu, suni cūhva un cuāha ya nuū rō. Achí yá.

³⁹ Te ni cahān yā ñin jnūhun yátá jín i:

Tēe cástéén jnūhun tú ndaā, cácuu de nájnūhun tēe cuáá. Te ñin tēe cuáá, ¿á cuu stéén de ichi nuū inga tēe cuáá? ¿A tú ñingava ndindúú de ini xehvā? ⁴⁰ ñin tēe scuáha, tu cújénu de nuū maestro de. Te tēe scuáha ún, núu je ni cutūhva vāha de, te jínū de coo de nájnūhun maestro de.

⁴¹ 'Te cuēchi jnāhan ró cúu nájnūhun jeē íne ñin yāca lúli tinūú i. ¿Te naun cásáha ró cuenta jeē súcuan, te tu cásáha ró cuenta cuēchi máa ró jeē cúu nájnūhun jeē íne ñin nduhu tinūu máa ró? ⁴² ¿Te naun cácahān rō jín jnāhan ró: Condetu, na táva rī yāca íne tinūu ró, te tu cánacani ni rō jeē íne ñin nduhu tinūu máa ró? Tēe stáhú-ni cácuu ró núu súcuan. Xihna gā tinūu máa ró tava rō nduhu, te yūcuán na te cuu condēhe vāha ró jéé táva rō yāca tinūu jnāhan ró.

Jín jniñu cásáha ñayuu te náconi yō ndese ñayuu cácuu i

(Mt. 7.17-20; 12.34-35)

⁴³ 'Tu íyó yujnu vāha jeē jéhe ndehē neé, te ni tu íyó yujnu neé jéé jéhe ndehē vāha. ⁴⁴ Chi jín ndehē jeē jéhe ñin ñin yujnu, te jíní yō núu yujnu vāha cúu. Chi tu scóyo yó ndehē higo xiní íñu, ni tu scóyo yó ndehē uva xiní yucú zarza. ⁴⁵ Te suni súcuan tēe vāha, cáhán de jnūhun vāha, chi vāha ánuá de. Te tēe sáha neé cáhán de jnūhun neé, chi cánéé ánuá de. Chi modo ndese íyó ánuá ñayuu, máni jeē yúcuan cúu jeē cácahān i.

Síquī uú vehe

(Mt. 7.24-27)

⁴⁶ '¿Najehē cácahān yíñuhún ró jín rí: Jitoho ná, áchí ró, te tu cásquícu ró jniñu ndácu rí? ⁴⁷ Tāca ñáyuu vēji nuū rī te jíní sōho jnūhun cáhán rī te squícu, na stéén rī nuū rō ndese cúu i. ⁴⁸ Cúu i nájnūhun ñin tēe jeē ní jeni de vehe de, te ni jete cúnú de nde ni nihīn de toto, te ni jeni de síquī. Te nuū ní ndaa yūte, te ni chundahá vehe ún, te tu ní cánda cuítí sáha, chi síquī toto íin. ⁴⁹ Te tāca ñáyuu jíní sōho jnūhun cáhán rī, te tu squícu i, cúu i nájnūhun ñin tēe ni jeni

de vehe de nuū ñúhun, te tu yítuu jehē. Te nuū ní ndaa yūte, te ni chundahá vehe ún, te ni cotúú-ni, te ni naa iī-ni. Achí yá jíin i jíjnáhan i.

*Jeē ní nasávāha ya mozo capitán
(Mt. 8.5-13)*

7

¹ Te nuū ni jíinu ni cahān yā ni cajini nahín ñáyuu ún, te cuahān yā ñuu Capernaum. ² Te ñn tēe nación Roma jeē cúu capitán, íyó ñn mozo de jeē manī ndasí de jíin. Te mozo un cúhú i te je yajni cuu i. ³ Te ni jini capitán jnūhun Jesús. Te ni tají de jecu tēe jéhu cándacu jniñu nuū ñáyuu hebreo, cuango de nuū yā jeē cahán ndahú de jíin yá jeē na quíji ya sávāha ya mozo de. ⁴ Te ni jinūcoo tēe un núu Jesús, te ni cacahān ndahú ndasí de jíin yá:

Chindéé ñáhán ní tēe cúu capitán, chi tēe vāha cúu de. ⁵ Chi manī de jíin nación yō, te máá de ni ndacu jniñu ni cuvāha ñn vehe sinagoga cuu yó. Achí de.

⁶ Yūcuán na te cuahān Jesús jíin de jíjnáhan de. Te nuū ní cuyajni ya vehe capitán, te ni tají de jecu amigo de cuajnahān yā. Te ni cacahān de jíin yá:

Achí capitán jeē tu cúní de sájneñu de níhín, chi tu cújéhu de jeē quihín ni quívi ní vehe de. ⁷ Jeē yúcuán tu ní sájéhu de máá de jeē quíji de nuū ní, áchí de. Te máá jéē cahán-ni ní, te na ndúvāha-ni mozo de, áchí de. ⁸ Chi máá de suni ndíso jniñu de ni casáha tēe cácujeñu ga. Te cújéhu de nuū tācá soldado de, áchí de. Te núu cáhán de jíin ñn tēe jeē na quihín de, te cuahān de. Te núu cáhán de jíin inga tēe jeē na quíji de, te quíji de. Te núu ndácu de ñn jniñu nuū mozo de, te sáha i, áchí de. Achí táca tēe un jíin yá.

⁹ Te jeē ní jini Jesús jnūhun yáha, te ni naa ni yā. Te ni ndió cóto ya ni cahān yā jíin ñáyuu cuehē cándiquñ yatā yā:

Jendaá cahán rī jíin ró jeē ni nación yō Israel tu ní níhín rī ni ñn ñayuu candíje níhin súcuán, nájnūhun cándíje tēe ún, vésú tēe nación tu jíin jnūhun Yaā Dios cúu de. Achí yá.

¹⁰ Te tēe ni tají capitán nuū yā, ni najinūcoo de vehe, te ni cajito de jeē jé ni nduvāha mozo un.

Jeē ní nastécu yā sēhe yí ñahan viuda

¹¹ Yūcuán na te cuahān yā ñn ñuu naní Naín. Te tēe cáscuáha jíin yá, jíin ñáyuu cuehē, suni cuango i jíin yá. ¹² Te ná ni cuyajni ya yuñúú ún, te yūcuán ní quenda-coo ñayuu jeē quíchindūji i ñn tēe suchí jéē ni jíhī. Te máñúhún-ni i nuū naná i, te ñahan viuda cúu ña. Te cuehē ñayuu ñuu un véjicoo jíin ña. ¹³ Te ná ni jito máá Jítoho yō nuū ña, te ni cundáhú ni yā ña, te ni cahān yā jíin ña: Ma ndahyú ni, áchí yá.

¹⁴ Yūcuán na te ni jinū yā nde nuū ndáyí ún, te ni jniñi ya yejnū, te ni cajecuiñi tēe cándiso ún. Te ni cahān yā jíin súchi ní jíhī:

Cáhán rī jíin ró, ndocuiñi, achí yá.

¹⁵ Yūcuán na te ni nucōo súchi ní jíhī ún, te ni quejéé i nácahān i. Te ni nacuāha ya i nuū naná i. ¹⁶ Te ndivii ñayuu ni cayūhú i jeē ní cajito i, te ni cacahān i jeē yóhyo vāha Yaā cúu Yaā Dios. Te cacahān i:

Mēhñu yó ni quee ñn tēe cújéhu nácani jnūhun Yaā Dios.

Te suni cacahān i:

Máá Yaā Dios ni quejéé yá chindéé ñáhán yá ñayuu yā. Achí i.

¹⁷ Te ni jité núu jnūhun ya ní cáhnu región Judea jíin táca región yajni yūcuán.

*Jeē ní tají Juan uū tēe nuū yā
(Mt. 11.2-19)*

¹⁸ Te íne Juan vecāa, te tēe cáscuáha jíin de ni cacastūhun núu de jeē súcuán ni cuu tācá jniñu yáha. ¹⁹ Te ni cana Juan uū tēe ún, te ni tají de cuango nuū Jesús, návāha cajnūhún de ya núu máá yá cúu ndije Cristo jeē ní cachi Yaā Dios jeē tají yá, chí núu nasūu yá cúu te condetu de inga. ²⁰ Te ni jinūcoo tēe un núu yā, te ni cacahān de:

Juan tēe scuándute ni tají de sãña véjicoo ná cajnūhun ná níhín núu máá ní cúu Cristo jeē achí tutu jeē quíji, chí condetu yó inga tēe quíji. Achí de.

²¹ Te máá hora un ní nasávāha ya cuehē ñayuu cácuñu, jíin ñáyuu cándoho cuehyí xeēn, jíin ñáyuu ñúhun tachí ini. Te suni cuehē ñayuu cuaá ní ndundijin tinūu i ni sáha ya. ²² Te ni cahān yā jíin de:

Cuángoo te castūhun ró nuū Juan tācá jniñu ni cajito ró jíin jnúhun ni cajini ró. Te cachi rō nuū de jeē ñáyuu cuaá cánanune tinūú i, te ñayuu yacuá canacaca i, te ñayuu ndóho cuehyī stehyú cánduvāha i, te ñayuu sohó cánanune sōho i, te ñayuu jihí nátecu i sāha ri. Te suni nácani ri jnúhun nuū ñáyuu ndahú jéē jnama Yaā Dios i. ²³ Te yōhyo ndetū tēe jeē ma nácani yátá ni de jeē ruhū cúu Cristo. Súcuán cachi rō nuū Juan. Achí yá jíin de.

²⁴ Te ná cuanuhun ndindúú tēe ún, te ni quejéé Jesús cahán yā jnúhun Juan jíin ñáyuu:

¿Na vé ni jécondēhe ró jijnáhan ró ndé nuū ñúhun téhé? ¿A ñin tēe jéni ñin jéni uū ni, nájnūhun ite jeē cánda sāha tachī? ²⁵ Te núu tuú, ¿te na vé ni jécondēhe ró núu súcuán? ¿A ñin tēe cúní cujéhu jeē ñúhun sahma lúu? Tuú chí cájini rō jeē tēe cáñuhun sahma lúu te cánducú tāca jéē cúsiñ ni, máni ini vehe rey cáyúcú de. ²⁶ ¿Te na vé ni jécondēhe ró núu súcuán? ¿A ñin tēe nácani jnúhun Yaā Dios? Cáhán rī jíin ró jeē suu ni jécondēhe ró. Te cújéhu ga Juan yáha vēsú tāca gá tēe ni canacani jnúhun Yaā Dios. ²⁷ Chí jnúhun Juan cúu jeē ni cáhān Yaā Dios jeē yosó núu tútu i:

Tají rí tēe nacani jnúhun ri cosnūú de ichi núu Cristo,

návāha coo tūhva ñayuu jeē jinú yā.

Achí Yaā Dios, achí tutu. ²⁸ Te cáhán rī jíin ró jeē ini ñayīvi yáha cújéhu ga Juan tēe scuándute vēsú tāca gá tēe jeē ni íyo ini ñayīvi. Te vēsú súcuán te tāca tēe núu ga ini ñuu nuū ndácu Yaā Dios jniñu, cújéhu ga de vēsú Juan. Achí yá.

²⁹ Te tāca ñáyuu jíin táca tēe cástútú xúhun renta, ni cajini i jnúhun cáhán yā, te ni cajetáhú i jeē Yaā ndaā cúu Yaā Dios, chí je ni cajendute i nuū Juan. ³⁰ Te tēe grupo fariseo jíin tēe cástéén tutu ley, ni casquéhichī de jnúhun jeē cuní Yaā Dios sāha ya jeē váha de, chí tu ní cájendute de nuū Juan. ³¹ Te ni cahān gā maá Jítóho yō:

Yáhá cachi rī ñin jnúhun yátá návāha na cúní rō ndese cúu ñayuu tiempo vijna.

³² Cúu i nájnūhun sūchi lúli cáhān nuū yáhu cácasiquí i. Te cácana ndee i xinī jnáhan i: Ni cativī rī scuilí, te tu ní cajita jéhé ró. Te ni

cajita ri yaa jeē cuihyá jíta, te tu ní cándahyū rō, achí i. Te nájnūhun cándāa sūchi lúli un jéē tu ní nújnahan ni i ni ñin, suni súcuán cándāa ró. ³³ Chí ni quiiji Juan tēe scuándute, te cuehē jínu ni íyo ndite ni de, tu ní yéji de staā ni tu ní jíhi de vino. Te tu ní cánujnahan ni rō, chí ni cacahān rō jeē ñúhun tachī ini de. ³⁴ Yūcuán na te ni quee máá rí, Yaā ní nduu tēe, te yéji rī jíhi ri, te tu cánujnahan ni rō, te chísoó jnúhun ró cácahān rō jeē máni máá jéē yéji rī jíhi ri vino. Te quíjnahan ri jíin tēe cástútú xúhun renta jíin táca gá tēe cásaá cuēchi, achí ró. ³⁵ Te núu cúndichí ñin tēe jíin jnúhun Yaā Dios, te jíin jniñu sāha de te cájini tāca gá tēe ndíchí jeē ndichí de. Achí yá.

Jeē íne Jesús vehe Simón tēe fariseo

³⁶ Te ñin tēe fariseo ni cana de Jesús jeē cáji yā staā jíin de. Te ni jinū yā vehe de, te ni cucōo ya mesa jeē cáji yā staā. ³⁷ Yūcuán na te ñin ñahan sāha cuēchi, ndéé ña ñuu yúcuán, te ni jini ña jeē ni jínu Jesús vehe tēe fariseo un, yéji yā staā. Te ni quee ña jíin ñin frasco yuū luu jeē ñúhun chitú aceite perfume. ³⁸ Te ín yítí ña nuū jehé yā, te ndáhyú ña. Te ni quejéé ña stáji ña jehé yā jíin ndute tínúú ña, te ni nasíchí ña jíin ixi xíní ña. Te ni techūhú ña jehé yā, te ni chuhun ña perfume un. ³⁹ Te tēe fariseo un jeē ní cana de ya, ni jito de jeē súcuán ni sāha ña, te ni jeni ni de: Núu tēe nácani jnúhun Yaā Dios cúu tēe yáha, te cuni de ndese ñahan cúu ñahan yáha jeē quehé ña de, chí ñahan sāha cuēchi cúu ña, jéni ni de.

⁴⁰ Yūcuán na te ni cahān Jesús jíin de:

Simón, cúní rī cahān rī jíin ró ñin jnúhun.

Te ni cahān maá de:

Cahān ní, Maestro.

⁴¹ Te ni cahān Jesús:

Ñin tēe jéhe núu xūhún, ni íyo uū tēe táu nuū de. ñin de ni cotaū uhūn ciento denario, te inga de ni cotaū uū xico uxī denario. ⁴² Te tú na vé cánevāha tēe un jéē náchunaa de. Te tēe jéhe núu xūhun ní ine cáhnu ni de nuū ndindúú tēe ún. Núu súcuán te cachi rō: Jeē ndindúú tēe ún, ¿ndé ñin de coo manī gā jíin de? Achí yá.

⁴³ Te ni cahān Simón:

Jéni ni na jéē tēe ni cotaū cuehē gā, achí de.

Te ni cahān yā jíin de:

Ndaā cahán rō, achí yá.

⁴⁴ Te jíto ya nuū ñahan ún, te ni cahān gā yā jíin Simón:

¿A jíto ró na vé sáha ñahan yáha? Jeē ní quee rī vehe ró, te tu ní jéhe ró ndute jeē ndúndoo jehē rī nájnūhun íyó costumbre. Te ñahan yáha ní stáji ña jehē rī jíin ndute tínúú ña, te ni nasíchí ña jíin íxi xíní ña. ⁴⁵ Te tu ní téchūhu ró ruhū nájnūhun íyó costumbre. Te ñahan yáha, nde jeē ni quívi ri vehe ró, tu jécuiñī ña jeē téchūhú ña jehē rī. ⁴⁶ Te tu ní chūhun ró aceite xinī rī nájnūhun íyó costumbre. Te ñahan yáha ní chuhun ña aceite perfume jehē rī. ⁴⁷ Núu súcuan te cáhán rī jíin ró jeē ni stéén ña jeē yóhyo manī ña jíin rí siquī jeē íne cáhnu ni rī nuū tāca cuéchi ña, vēsú cuehē cúu. Te núu cone cáhnu ni rī nuū ñn ñayuu iyó jecu-ni cuéchi, te jecu-ni stéén i jeē maní i jíin rí, achí yá.

⁴⁸ Te ni cahān yā jíin ña:

Je íne cáhnu ni rī nuū tāca cuéchi ró, achí yá.

⁴⁹ Yūcuán na te ñayuu cáyeji staā jíin yá, ni quejéé i cácahān maá i:

¿Nde ñn ga cúu tēe yáha jéé cahán jeē íne cáhnu ni nuū cuéchi? achí i.

⁵⁰ Te Jesús ni cahān gā yā jíin ñahan ún:

Ni candíje ró rúhū, te jeē yúcuan ní jnama ri rohó. Cuáhán te na ndúsñ ni rō. Achí yá.

Jnūhun ñahan ní cajejniñu nuū yā

8

¹ Yūcuán na te ni cuu jecu quívi, te ni jica cuu Jesús tācá ñuu náhnu jíin ñuu lulí. Te nácani ya jnūhun vāha te cástūhun yá ndese ndácu Yaā Dios jniñu. Te ndihúxí uū tēe cácuu apóstol, cájica de jíin yá. ² Te suni íyó jecu ñahan cájica jíin yá, jeē ní quenehen ya tachī ini sava ña, te ni nasávāha ya sava ña jeē cándoho cuehyī. Te ñn ña cúu María ñuu Magdala, te ini ñahan un ní quenehen ya uxā tachī. ³ Te inga ña cúu Juana, ñasihí Chuza, tēe ndíso jniñu ini vehe Herodes. Te inga ña cúu Susana, jíin cuéhē gā ñahan jeē cáchindéé ñáhán ña, jéhe ña tāca jéé jíni ñúhún yá jíin de jíināhan de.

Jnūhun yátá síquī tēe jéte trigo
(Mt. 13.1-9; Mr. 4.1-9)

⁴ Te cuehē ñayuu tācá ñuu yúcuan ní jinūcoo i nuū Jesús. Te ni cacutútú cuéhē ndasí ñáyuu, te ni cahān yā ñn jnūhun yátá jíin i:

⁵ ñn tēe cate trigo, ni quenda de jeē cáte de. Te ná ni quejéé de jéte de, te jecu trigo ni jítē yuhíchi. Te ni cajeñū ñayuu siquī, te ni cayeji saa. ⁶ Te jecu gā ni jítē nuū ñúhun yuū. Te ni cane, te ni ichī-ni, chi tú cuehē cajin. ⁷ Te jecu gā ni jítē nuū náne iñu. Te ñnuú-ni ni canecoo iñu jíin, te ni jesi nuū. ⁸ Te jecu ni jítē nuū ñúhun váha. Te nuū ní jehnu, te ni jéhe cuehē nunī, chi jeē ñn ñn ni jéhe nde ciento. Achí yá.

Yūcuán na te ni cahān jee ya:

Tāca rōhó jéé jíini sōho, na chúsóhó ró, achí yá.

Najehē cahán yā máni jnūhun yátá
(Mt. 13.10-17; Mr. 10-12)

⁹ Te tēe cáscuáha jíin yá ni cacajñuhún de ya na vé cuní cahān jnūhun yátá yáha. ¹⁰ Te ni cahān yā:

Róhó jíināhan ró, chi sáha Yaā Dios jeē cájecūhun ni rō jnūhun ni yisāhi yáha, ndese quívicoo ñayuu ndaha Yaā Dios jeē ndacu ya jniñu nuū i. Te máni jíin jnūhun yátá cáhán rī jíin sava ga i, návāha vēsú cájito i, te quéndōo i nájnūhun jeē tú na vé ni cájito i. Te vēsú cájini sōho i, te ma jécūhun ni i.

Jeē ní castūhun cáji yá jnūhun yátá tēe jéte trigo

(Mt. 13.18-23; Mr. 4.13-20)

¹¹ Jnūhun yátá yáha cuní cahān: Trigo un cúu jnūhun Yaā Dios. ¹² Te trigo jeē ni jítē yuhíchi cúu nájnūhun ñayuu cájini sōho jnūhun, te quíji-ni jexeén te quénde-ni jnūhun ini anuá i, návāha ma candíje i te ma jnáma ri i. ¹³ Te trigo jeē ni jítē nuū ñúhun yuū cúu nájnūhun ñayuu cájini jnūhun, te cájetáhú i te cácusñ ni i jíin. Te tu cúcutú jnūhun ún ini anuá i. Te jecu-ni quívi cácandíje i, te núu ni quejéé jnúndóho, te cájica yátá i. ¹⁴ Te trigo jeē ni jítē nuū náne iñu cúu nájnūhun ñayuu cájini jnūhun, te cuango i te cácuñeñu i jíin jniñu i jíin jéé cuní i cucúca i te coo sñ ni i. Te tu íje i jíin jnūhun ya. ¹⁵ Te trigo jeē ni jítē nuū ñúhun váha cúu nájnūhun ñayuu cájini nahín jnūhun ya, te cájniñ vāha i, chi íyó váha íyó

ndāa anuá i. Te cáhije i jíin jnúhun ya, chi cá candíje vāha i.

Jnúhun yátá síquī lámpara
(Mr. 4.21-25)

¹⁶ Núu nástín ñayuu ñin lámpara, te tu jési i ni ñin síquī, ni tu jéni i chíji jito. Chi sa suhva jéni i nuū sucún, návāha cundijin nuū ñáyuu quívicoo vehe. ¹⁷ Te suni súcuan tu íyó ni ñin jnúhun sāhi jéē ma cúni ñayuu, chi ndíhi tāca jnúhun cácahān i nane ndijin te cuni ñayuu.

¹⁸ Núu súcuan te na cúni sōho vāha ró, chi ñayuu je jécūhun ni, stéén gā yā nuū i. Te ñayuu tu cándíje, máá jecu jeē jéni ni i jeē jiní i, sa suhva naa. Achí yá.

Náná yā jíin ñani yā
(Mt. 12.46-50; Mr. 3.31-35)

¹⁹ Yūcuán na te ni quee naná yā jíin táca ñani yā nuū íne ya. Te tu ní cúu quívicoo ña nuū yā síquī jeē chitú ñayuu. ²⁰ Te ñin ñayuu ni castūhun núu yā:

Náná ni jíin táca ñani ni cáhīn nuū quéhe, te cá cuni cahān jíin ní, achí i.

²¹ Te ni cahān maá yá:

Suni náná rī jíin ñani rī cácuu ñayuu cájini sōho jnúhun Yāā Dios te cáscuicu i, achí yá jíin i.

Jeē ní jecuiñi tachī níhin jíin mar ni sáha ya
(Mt. 8.23-27; Mr. 4.35-41)

²² Te ñin quívi ni quívi ya ñin barco jíin téé cáscuáha jíin yá, te ni cahān yā jíin de:

Na yáha yó quíhīn yō inga lado mar.

Te ni cáscaca de barco cuango de. ²³ Te níni cáscaca de barco, te ni quixī yā. Te ni jequíhi ñin tachī níhin nuū mar, te je yajni chitú ndute ini barco, te ndúcú quéé barco.

²⁴ Te ni castóna de ya, te ni cacahān de:

Maestro, Maestro, vijna te quēe yó chíji ndute te naa yō, achí de.

Te ni ndocuiñi-ni ya, te ni cahān yā nuū tachī níhin jíin núu mar. Te ni cajecuiñi-ni, te ni cuu nayúú íi-ni. ²⁵ Te ni cahān yā jíin téé cáscuáha jíin yá:

¿Naun tu cá candíje ró?

Te máá de yōhyo ni cayūhú de, te cánaa ni de, te cácahān de jíin jnáhan de:

¿Ndé ñin ga cúu téé yáha jéē nde nuū tachí níhin jíin núu ndúte ndácu de jniñu te cájetáhú jéē cahān de? Achí de.

Tēe Gadara jeē ndóho tachī
(Mt. 8.28-34; Mr. 5.1-20)

²⁶ Yūcuán na te ni cane ya jíin de región Galilea, te cuahān yā región Gadara jeē íne inga lado mar Galilea. ²⁷ Te nuū ní nanuu ya nuū ñúhun íchi, te ñin téē ñuu un ní quee de nuū yā. Te je ni cuu cuehē cuiyā ñúhun cuehē tachī ini de. Te tu ñúhun cuiñi de sahma, ni tu ndéé de vehe, chí sa suhva nuū cáyindūji ndíyi ndeé de. ²⁸ Te ná ni jito de nuū Jesús, te ni jecuiñi yití de nuū yā, te ni cana cóhó de:

¿Naun vēji ní núu ná, Jesús Sēhe Yāā cujéhnú téyí? Cáhan ndahú ná jíin ní jeē ma stóho ní sáña, achí de.

²⁹ Súcuan ni cahān de, chi je ni ndacu ya jniñu nuū tachí un jéē na quéndacoo ini de. Te ni cuu cuehē jínu sáha xeēn tachí jíin de. Te cájihni ñayuu ndaha de jehē de jíin cadena, návāha tú na vé sáha de. Te ndíhi-ni jéhn de, te jínu de jéhén de nde nuū ñúhun téhé sáha tachí ún. ³⁰ Te Jesús ni cajnúhun yá de:

¿Na vé naní ró?

Te ni cahān de:

Legión naní ná.

Súcuan ni cahān de jeē naní de, chí ñúhun cuehē tachí ini de. ³¹ Te ni cacahān ndahú táchī un jíin yá jeē ma tají yá quíhīn ini túhnchi cúnú. ³² Te yucu yúcuan cáhīn cuehē quíñi cájitu ti. Te tachí jeē cáñuhun ini téē un ní cacahān ndahú jíin yá jeē na cuáha ya jnúhun quívicoo ini quíñi ún. Te ni jēhe ya jnúhun. ³³ Te ni quendacoo tachí ún ini téē ún, te ni quívicoo ini quíñi. Te quíñi un ní cajinu ti ni níngoo ti ñin yucáva, ni quívicoo ti nuū mar, te ni ndaquíhi ti ndute, ni cajihī ti.

³⁴ Te téē cándito ti ni cajito de jeē súcuan ni cuu, te ni cayūhú de. Te ni cajinu de cuacastūhún de nuū ñáyuu ñuu un jíin ñáyuu táca rancho. ³⁵ Te cuango ñayuu un cuácondéhé i na vé ni cuu. Te ni jinūcoo i nuū íne Jesús. Te ni cajito i nuū téé ní quendacoo tachí ini, néne de nuū jehé Jesús, te ñúhun de sahma, te je ni nducájí xíní de. Te ni cayūhu ñáyuu ún. ³⁶ Te téē ní cajito ni canacani de jnúhun nuū ñáyuu, ndese ni nduvāha téē ni ñuhun tachí ini.

³⁷ Yūcuán na te táca ñáyuu ní región Gadara, ni caquejéé i cácahān ndahú i jíin

yá jeē na cújiyo ya quihīn yā, chi yōhyo cáyūhú i. Te ni ndivī ya ini barco jeē quínuhun yā. ³⁸ Te tēe jeē ní quendacoo tachī ini, ni cahān ndahú de jíin yá jeē na cuáha ya jnūhun quihīn de jíin yá. Te Jesús ni cahān yā jeē na quéndōo de, te áchí yá:

³⁹ Cuánuhun vehe ró, te nacani ró jnūhun ndese yōhyo jéhnū jniñū ni sáha Yaā Dios jíin ró, achí yá jíin de.

Te cuahān de, te ni nacani de jnūhun nāñū ún, ndese yōhyo jéhnū jniñū ni sáha Jesús jíin de.

Jnūhun sēhe síhí Jairo jíin ñahan ní quehé yusáhma ya

(Mt. 9.18-26; Mr. 5.21-43)

⁴⁰ Te nuū ní najinū Jesús inga lado mar, te ñayuu un ní cacusī ni i jeē ní najinū yā, chi ndihī i cándetu i ya. ⁴¹ Te ni quee ñn tēe cújéhnū ini vehe ñi sinagoga, nani de Jairo. Te ni jecuiñī yití de nuū jehé yā, te ni cahān ndahú de jíin yá jeē na quihín yā jíin de vehe de. ⁴² Chi íyó ñn sēhe síhí de jeē mañúhún-ni i nuū de, te íyó i nájñūhun uxī uū cuiyā. Te sūchí un je yajni cuu i. Te cuahān yā jíin de. Te cuehē ñayuu cándiquñ i ya, te ni chitú níhin i xiin ya cuango i.

⁴³ Te mēhñū ñayuu un cuahān ñn ñahan cúhú jeē ní cuu uxī uū cuiyā ndóho ña cuehyī niñī. Te ni jexin ña tāca jéé névāha ña jíin tēe tájna, te tu ní ndúvāha ña sáha ni ñn de. ⁴⁴ Te ni quee ña ichi yátá yā, te ni quehé ña yusáhma ya. Te ni jecuiñī-ni niñī ña.

⁴⁵ Yūcuán na te ni cahān Jesús:

¿Ndé ñn ni quehé sahma ri? achí yá.

Te ndivī i ni cacahān jeē tu ní quehé i. Te Pedro jíin tēe cáhīn jíin de, ni cacahān de:

Maestro, jito ní jéé ñayuu cuehē yāha ní chitú níhin i xiin ní, te cáquīhi i níhín, te cájnūhun ní ndé ñn ni quehé sahma ní.

⁴⁶ Te ni cahān Jesús:

Tuú chi ñn ñayuu ni quehé sahma ri, chi ni jini rī jeē jíin fuerza rī ni nduvāha ñn ñayuu, achí yá.

⁴⁷ Te ni jini ñahan un jéé tu ní cúu coo yuhu jeē ní sáha ña. Te quísi i ña ni quee ña, te ni jecuiñī yití ña nuū jehé yā. Te jito jíinú tāca ñayuu, te ni cachi cají ña najehē ni quehé ña yusáhma ya, jíin jéé ní nduvāha-ni ña. ⁴⁸ Te ni cahān yā jíin ña:

Séhē, ni candíje ró jéé cuu nasávāha ri rohó, te jeē yúcuán ní nduvāha ró. Cuahān te na ndúsī ni rō, achí yá.

⁴⁹ Te níni cáhán gā yā súcuán, te ni quee ñn tēe vēji vehe Jairo, tēe cújéhnū ini sinagoga, te ni cachi nuū de:

Je ni jihī sēhe síhí ní. Te ma sájnēñū ga ní Maestro, achí de.

⁵⁰ Te ni jini Jesús jnūhun yáha, te ni cahān yā jíin Jairo:

Ma yūhu ró, chi candíje-ni ró, te nastécu rī sēhe ró, achí yá.

⁵¹ Te ni jinū yā vehe, te tu ní jéhe ya jnūhun quivī ñayuu jíin yá, chi máá-ni Pedro jíin Juan jíin Jacobo jíin tátá naná sūchi síhí un. ⁵² Te cácuquíhyá ni ndihī ñayuu cáyūcú ini vehe, te cándahyū i jehē sūchí un. Te ni cahān yā:

Ma ndahyú rō jijnáhan ró. Tu ní jíhí i, chi quixí-ni i, achí yá.

⁵³ Te ni cajecū catá i jeē ní cahān yā, chi cájini i jeē ní jíhí sūchi síhí un. ⁵⁴ Yūcuán na te ni jñi ya ndaha i, te ni cahān jee ya jíin i: Síhí, ndocuiñī, achí yá.

⁵⁵ Te ni natecu i, te ni ndocuiñī-ni i. Te ni ndacu ya jniñū jeē na cuáha ña jeē cáji i.

⁵⁶ Te tátá i náná i yōhyo ni canaa ni de cájito de. Te ni ndacu níhin ya jniñū nuū de jeē ma cáchi de nuū ni ñn jeē súcuán ni cuu.

Jeē ní tají yá ndihúxí uū de cuanacani de jnūhun

(Mt. 10.5-15; Mr. 6.7-13)

9

¹ Te ni nastútú yá ndihúxí uū tēe cáscuáha jíin yá, te ni sáha ya jeē cóndiso jniñū de te coo poder de jeē quénehen de tachī ini ñayuu, jíin jéé nasávāha de ñayuu cácuñū.

² Te ni tají yá de quingoo de jeē nacani de jnūhun ndese ndácu Yaā Dios jniñū, jíin jéé nasávāha de ñayuu cácuñū. ³ Te ni cahān yā jíin de:

Ma cóndiso ró jéé cuajniñū ró ichi, ni vara, ni ñunu, ni staā, ni xūhún. Te quihīn rō jíin ñn-ni camisa, te ma cóndiso ró inga.

⁴ Te na-ni vehe núu ni quivīcoo ró, te yūcuán coyūcu ró nde quenda tucu ró quihīn rō inga ñuu. ⁵ Te núu ñn ñuu tu cájetáhú i rōhó, na quéndacoo ró yúcuán, te scóyo ró tícachā

jehē rō, te súcuan stéén rō jeē iyó cuéchi i jeē tu ní cájetáhú i. Achí yá.

⁶ Te ni quendacoo de cuahān de, ni cajica nuu de tācá ñuu, ni canacani de jnūhun jnáma Yaā Dios ñayuu. Te tāca lado ni canasávāha de ñayuu cácuñū.

Jeē ni jíhī Juan tēe scuándute

(Mt. 14.1-12; Mr. 6.14-29)

⁷ Te Herodes, tēe cúu gobernador, ni jini jnūhun de tācá jniñū sáha Jesús. Te ni cunéé ni de, chi cájeni ni sava ñayuu cácahān i jeē Juan ni natecu de. ⁸ Te sava ga i cácahān jeē ní nane Elías, tēe ni nacani jnūhun Yaā Dios nde jenahán. Te sava ga i cácahān jeē inga tēe ni nacani jnūhun ya nde jenahán, ní natecu de. ⁹ Te ni cahān Herodes:

Juan chi ni ndacu ri jniñū ni tahndē xinī. Núu súcuan ¿te ndé tēe cúu tēe yáha jeē jíni jnūhun ri jeē sáha de jniñū jéñu? Achí de.

Te ni nducú Herodes modo coto de nuū Jesús.

Jeē ni scáji yā uhūn mil tēe

(Mt. 14.13-21; Mr. 6.30-44; Jn. 6.1-14)

¹⁰ Te ni ndecoo tēe cácuu apóstol jeē ní tají yá ni canacani jnūhun. Te ni cacachi de nuū yā tācá jniñū ni casáha de. Te ni jeca ya de cuahān sáñ ya jíin de ñin lugar nuū tú ñayuu, yajni ñuu Betsaida. ¹¹ Te ni cajini ñayuu, te suni cuangoo i. Te ni jetáhú yá i, te ni nacani ya jnūhun ndese ndácu Yaā Dios jniñū, te ni nasávāha ya ñayuu cácuñū.

¹² Te nuū cuáhini, te ni quecoo ndihúxí uū tēe cáscuáha jíin yá, te ni cacahān de jíin yá:

Tají ní ñayuu cuehē yāhá na quíngoo i tācá ñuu jíin táca rancho yajni yāhá, te nducú i nuū ndóo i te cuaan i jeē cáji i, chi tú na vé iyó yáha, achí de.

¹³ Te ni cahān yā jíin de:

Cuāha máá ró jeē cáji i, achí yá.

Te ni cacahān de:

Tú na vé cánevāha ná, chi uhūn-ni staā jíin úu-ni chācá. Te vésú núu quicuaan ná staā caji ndihí ñayuu cuehē yáha, te ni ma cúu, achí de.

¹⁴ Chi iyó nájnūhun uhūn mil tēe. Te ni cahān yā jíin tēe cáscuáha ún:

Cahān jíin ñáyuu na cúcōo sáñ cincuenta cincuenta i, achí yá.

¹⁵ Te súcuan ni casáha de, te ni cacucōo ndihí ñayuu. ¹⁶ Te ni quihin ya ndihúhún

staā jíin úu chācá un, te ni ndacoto ya ichi ándiví, te ni nacuatáhú yá. Te ni tahú cuéchí yá staā ún, te ni jēhe ya nuū tēe cáscuáha jíin yá, te ni casaja de nuū ñáyuu cuehē. ¹⁷ Te ndivii i ni cayeji, te ni candutú chíji i. Te ni canastútú de pedazo staā jeē ní quendōo, te ni chitú úxí uū jíca.

Jeē ní cahān Pedro jeē Jesús cúu Cristo

(Mt. 16.13-19; Mr. 8.27-29)

¹⁸ Te ñin quiñvī ni cusáñ Jesús, jícan tahú yá, te máá-ni tēe cáscuáha un cáhīn de jíin yá. Te ni cajjnūhun yá de:

Ruhū, ¿ndé ñin cúu ri cácahān ñayuu? achí yá.

¹⁹ Te ni cacahān de:

Sava i cácahān jeē cúu ní Juan tēe ni scuándute. Te sava ga i cácahān jeē cúu ní Elías, tēe ni nacani jnūhun Yaā Dios nde jenahán. Te sava ga i cácahān jeē inga tēe ni nacani jnūhun ya ni natecu de.

²⁰ Yūcuán na te ni cajjnūhun yá de:

Te máá ró, ¿ndé ñin cúu ri cácahān rō?

Te ni cahān Pedro:

Máá ní cúu Cristo, Yaā ní tají Yaā Dios, achí de.

Jeē ní castūhún Jesús jeē cúu yā

(Mt. 16.20-28; Mr. 8.30-9.1)

²¹ Yūcuán na te ni ndacu ñihin ya jniñū nuū de jeē ma cáchi de jnūhun yáha núu ní ñin ñayuu. ²² Te ni cahān yā:

Máá rí, Yaā ní nduu tēe, cánuú ndoho xeēn rī. Te tāca tēe jéñu jíin sūtū cácujeñu jíin tēe cástéén tutu ley, squéhichí de ruhū. Te cahni de ruhū, te nuū uní quiñvī te natecu rī, achí yá.

²³ Yūcuán na te ni cahān yā jíin ndihí de:

Na-ni ñayuu núu cúní i condiquīn i ruhū, na cási i jeē cuní maá i, te na cóndiquīn i ruhū tāca quiñvī, te cuāha i jnūhun ndoho i jnūndóho jeē siquí rī, vésú na cúu i. ²⁴ Chi núu ndé ñáyuu cuní i cácu i nuū jnūndóho quiji nuū i jeē siquí ruhū, núu súcuan te jnahnū ndetū i ní cáni. Te núu ndé ñáyuu, vésú na cúu i jeē siquí ruhū, te cotecu i ní cáni. ²⁵ ¿Chi ndé cuajniñū vésú na cúndeyí ñayuu ñihīn i ní ñáyiví, te núu squíví i máá i nuū jnahnú ndetū i ní cáni? ²⁶ Chi núu na-ni ñayuu cúcanu i jeē siquí ruhū, Yaā ní nduu tēe, jíin siquí jnūhun cáhān rī, suni súcuan cucanu rī jeē siquí máá i, quiñvī ndíji

ri. Te quivī ún chi yōhyo luu cujéhu ri, nájnūhun cujéhu Tátá ri, te suni cácujehu ndajéhe ndoo ya sáha ya. ²⁷ Te jendaá cahán rī jíin ró jeē sava tēe cáhīin yāhá, ma cúu de chi nde cuni de jeē ndácu Yaā Dios jniñu jíin poder yā. Achí yá.

Jeē tucu ni nduu ya
(Mt. 17.1-8; Mr. 9.2-8)

²⁸ Yūcuán na te nájnūhun nuū uná quivī jeē ni cáhān yā jnūhun yáha, te ni caa ya ñn yucu, cuacacān tahu yā. Te Pedro jíin Jacobo jíin Juan cuango de jíin yá. ²⁹ Te níni jíicán tahu yā, te tucu ni nduu nuū yā, te sahma ya ni nducuíjín quiyi, te ndíndēe. ³⁰ Yūcuán na te ni canecoo uū tēe, cándajnūhún de jíin yá. Te cúu de Moisés jíin Elías, tēe ni cahīyo jenahán. ³¹ Te luu ndíndēe de cáhīin de, te ni cacahān de jíin yá siquī jeē ní cuyajni cuu yā ñuu Jerusalén. ³² Te Pedro jíin tēe cáyūcu jíin de, yōhyo cáji de máhná, te vésú súcuan te tu ní cáquixi de. Te ni cajito de jeē lúu ndíndēe yá jíin ndíndúu tēe cáhīin jíin yá. ³³ Te nuū ní cacujiyo tēe un núu yā, te ni cahān Pedro jíin yá:

Maestro, nacā jeē váha jeē cáhīin ná yáha. Te na sáha ná únī vehe ramada, ñn cuu máá ní, ñga cuu Moisés, te ñga cuu Elías, achí de.

Te tu sáha de cuenta na vé cúu jeē cahán de. ³⁴ Te níni cáhán de súcuan, te ni quee vicō nūhun ní jesi nuū de jíin de. Te ni cayūhú de jeē cáhīin de chíji vicō ún. ³⁵ Te nuū vicó un ní cahān ñn jnūhun:

Yáha cúu Sēhe ri jeē maní ndasí rí jíin. Te na cúni nahín ró jnūhun cáhán yā, achí.

³⁶ Te nuū ni jínu ni cahān jnūhun ún, te máá ñn na Jesús ín ya nuū de. Te máá de tu ní cácahān cuiti de, te tāca quivī ún tu ní cácachí de nuū ni ñn jeē súcuan ni cajito de.

Jeē ní nasávāha ya ñn sūchi ñūhun tachī ini
(Mt. 17.14-21; Mr. 9.14-29)

³⁷ Te ñga quivī un ní nanuu ya yucu jíin de. Te cuehē ñayuu ni jejnahan i ya. ³⁸ Te mēhñu ñayuu cuehē un ní cana jee ñn tēe:

Maestro, jíicán tahu na núu ni jēe condēhe ní sēhe yí ná, chí máñūhún i nuū ná. ³⁹ Te máni jeē sáha xeēn tachī jíin i, te cána cóhó i sáha, te jéni yíhí i, te jée tiñū yuhu i. Te yōhyo stóho i, te yōhyo uhū siaá i. ⁴⁰ Te ni

cahān ndahú ná jíin tēe cáscuáha jíin ní jeē na quénehen te tachī ún, te tu ní cúu sáha de, achí de.

⁴¹ Te ni cahān yā jíin de jíin de:

Ñayuu yōhyo ñhni ni cácuu ró, chí tu cácuandíje ró jēe cuu nduvāha i. ¿Nasaa ga quivī condee rī jíin ró jeē cuándeyí ni rī jíin ró? Cuáquihin sēhe ró na quíji i, achí yá.

⁴² Te níni véji i nuū yā, te ni cotúu i ni sáha tachī, te ni jehni yíhí i. Te Jesús ni cahān xeēn yā nuū tachí un, te ni nasávāha ya sūchí un, te ni nacuāha ya i nuū tatá i.

⁴³ Te ndivii ñayuu nahán ní canaa ni i cájito i jeē yóhyo jéhu jniñu sáha Yaā Dios.

Jeē ni cáhān tucu ya jeē cúu yā
(Mt. 17.22-23; Mr. 9.30-32)

Te níni cánaa ni i cájito i táca jniñu ni sáha Jesús, te ni cahān yā jíin tēe cáscuáha jíin yá:

⁴⁴ Chuhun vāha ni rō jnūhun cáhán rī yāhá, te ma náa ni rō, chí ruhū, Yaā ní nduu tēe, nastúu i ruhū quivī ri ndaha tāca tēe xeēn, achí yá.

⁴⁵ Te tu ní cájecūhun ni de jnūhun cáhán yā, chí tu ní cúu cuiti jecūhun ni de. Te ni cayūhú de cajnūhún de ya siquī jnūhun ni cahān yā.

Ndé ñayuu cúu jeē cujéhu ga
(Mt. 18.1-5; Mr. 9.33-37)

⁴⁶ Yūcuán na te tēe cáscuáha jíin yá ni caquejé de cácahān de siquī núu ndé ñn de cujéhu ga. ⁴⁷ Te Jesús ni jini yā jeē súcuan cájeni ni de. Te ni jni ya ndaha ñn sūchi lúli, te ni jeni ya i xiin ya. ⁴⁸ Te ni cahān yā jíin de:

Na-ni ñayuu núu jeē siquí ruhū jetáhú i sūchi lúli yáha, te ruhū jetáhú i. Te ñayuu jetáhú ruhū, suni jétáhú i Yaā ní tají ruhū véji ri. Te ñayuu núu ga mēhñu ró, máá i cujéhu ga, achí yá.

Ñayuu tu cáhán siquī yā, ín i jíin yá
(Mr. 9.38-40)

⁴⁹ Yūcuán na te ni cahān Juan:

Maestro, ni cajito ná ñn tēe jeē jíin síhví ní quénehen de tachī ini ñayuu. Te ni cajesi na jēe sáha de, chí tu jíca de jíin yó, achí de.

⁵⁰ Te ni cahān Jesús jíin de:

Ma cási rō jeē sáha de, chí tēe tu cáhán siquī yō, ín de jíin yó, achí yá.

Jeē ni cáhān yā nuū Jacobo jíin Juan

⁵¹ Te ni cuyajni quiv̄i jeē quínuhun yā andiv̄í, te ni tee téyí ni yā jeē quihín yā ñuu Jerusalén. ⁵² Te ni tají yá sava tēe yósnúu de jíin jnúhun jeē jinú yā. Te cuangoo de ñn ñuu Samaria návāha nducú de nuū ndóo ya. ⁵³ Te ñayuu Samaria un tu ní cájēhe i vehe ndōo ya, chi ni cajini i jeē ndé Jerusalén quihín yā. ⁵⁴ Te Jacobo jíin Juan, tēe cáscuáha jíin yá, ni cajini de jeē súcuan cúu, te ni cacahān de jíin yá:

¿A cúní ni jēē ndácu yó jniñu quiiji ñuhūn nde andiv̄í, nájnūhun ni sáha Elías, návāha naa ñayuu yáha? Achí de.

⁵⁵ Yūcuán na te ni ndió cóto Jesús nuū de, te ni cahān yā nuū de:

Tu cájini rō na nuū vēji jnūhun cácahān rō. ⁵⁶ Chi ruhū, Yaā ní nduu tēe, tú vēji ri jeē snáa rī ñayuu, chi sa suhva jeē jnáma ri ñayuu, achí yá.

Yūcuán na te cuahān yā jíin de inga ñuu.

*Siqūi ñáyuu jeē cáconi i condiqūin i ya
(Mt. 8.19-22)*

⁵⁷ Te níni jíca ya ichi jíin de, te ni cahān ñn tēe jíin yá:

Condiqūin na níhín quihín yō ndé-ni cúu-ni nuū quihín ni, achí de.

⁵⁸ Te ni cahān Jesús jíin de:

Tāca ñūcuui, iyó yāu cava cáñuhun ti. Te suni saa, iyó táca tī. Te ruhū, Yaā ní nduu tēe, tú nuū cusú rī, achí yá.

⁵⁹ Te ni cahān yā jíin inga de:

Condiqūin ruhū na quihín yō.

Te máá tēe un ní cahān de:

Condetu ní ndé na quíchindūji ná tátá na xihna gā. Yūcuán na te condiqūin na níhín, achí de.

⁶⁰ Te ni cahān Jesús jíin de:

Stóo tāca nd̄iyi na chindūji jnáhan nd̄iyi, chi nd̄iyi cácuu ñayuu tu cácañd̄ije. Te rōhó, cuáhán te nacani ró jnúhun ndese ndácu Yaā Dios jniñu, achí yá.

⁶¹ Yūcuán na te suni ni cahān inga de:

Cúní na condiqūin na níhín, te cuāha ní jnúhun jeē xihna gā quicahān na jíin ñáyuu cáyūcú vehe ná, achí de.

⁶² Te ni cahān Jesús jíin de:

Núu na-ni tēe quéjéé de condiqūin de ruhū, te núu máni jeē nácani cuíhyá ni de siqūi tāca jēē ni stóo de, núu súcuan te cúu de nájnūhun ñn tēe jítu jíin yátá, te jícó cóto de

ichi vehe de. Te ma cuajniñu de condiqūin de ruhū siqūi jniñu ndácu Yaā Dios, achí yá.

Jeē ní tají yá unī xico uxī de

10

¹ Te ná ni cuu tācá jniñu yáha, te máá Jítóho yō ni nacāji ya unī xico uxī gā de. Te ni tají yá nd̄ihuū nd̄ihuū de jeē cósnūú de nuū yā, quingoo de tācá ñuu jíin táca lugar nuū jé yajni quihín maá yá. ² Te ni cahān yā jíin de:

Ñayuu yáha cácuu i nájnūhun trigo jeē tahndé, te ndaā jeē cuehē cúu, te tēe cahnde chi jecu-ni de cúu. Núu súcuan te cacān tahú rō nuū maá Jítóho rō Yaā Dios jeē na tájí yá cuehē tēe na quingoo de cahnde de trigo, cúu jeē nacani de jnūhun ya nuū ñáyuu. ³ Te cuángoo jíinánhan ró, te na cástūhun rí nuū rō jeē tají rí rohó quingoo ró nájnūhun londe mēhñu yh̄i. ⁴ Te ma cóndiso ró ñunu, ni yijni xūhún, ni ndijēn. Te ichi ma cucuéé ró ndajnūhun ró jíin ni ñn. ⁵ Te na-ni vehe núu ni quiv̄i ró, te xihna gā cahān rō: Na quíji jnūhun ndeyí jnūhun siñ ni nuū rohó, ñáyuu vehe yáha, achí rō. ⁶ Te núu vehe yúcuan iyó ñáyuu vāha, te jnūhun ndeyí ní cahān rō jinū siqūi i. Te núu tuú, te jnūhun ndeyí ní cahān rō ma jinú siqūi i. ⁷ Te suni vehe yúcuan coyūcu ró, te caji rō coho ró jēē cuáha ñayuu nuū rō. Chi siqūi jniñu jeē nácani ró jnúhun nuū ñáyuu, te cánuú coto i rōhó. Ma quéndōo ró tijni vehe, chi ñn-ni vehe. ⁸ Te na-ni ñuu núu ni quiv̄icoo ró, te núu cuatáhú i rōhó, te caji rō tāca jēē cuáha i nuū rō. ⁹ Te nasávāha ró ñáyuu cácuu ñuu yūcuán. Te cachi rō nuū i: Je ni cuyajni Yaā Dios jeē ndacu ya jniñu nuū rō, achí rō. ¹⁰ Te na-ni ñuu núu ni quiv̄icoo ró, te núu tu ní cájetáhú i rōhó, te quendacoo ró ini calle yūcuán, te cahān rō: ¹¹ Nde ticachā ñuu rō yāha jēē ni jn̄i jehē rī, na náscóyo ri jeē cúu seña jeē iyó cuéchi ró jēē tu ní cájetáhú ró. Te na cónahán ró jeē Yaā Dios je ni cuyajni ya jeē ndacu ya jniñu nuū rō nuú. ¹² Te cáhán rī jíin ró jeē quiv̄i juicio te xeēn gā coo castigo siqūi ñuu casáha súcuan vēsú siqūi ñuu Sodoma nuū ní casáha ndasí ñáyuu cuēchi.

*Jeē ní cuxeēn yā nuū sava ñuu nīhni ni
(Mt. 11.20-24)*

13 'Nacā jeē xeēn ndoho ró, ñáyuu ñuu Corazín. Te nacā jeē xeēn ndoho ró, ñáyuu ñuu Betsaida. Chi núu ini ñuu Tiro jíin ñuu Sidón ni sáha ri jniñu jéhu jeē ni sáha ri ini ñuu maá ró, te yachī nacani ni ñayuu ñuu un jéē stóo i cuēchi i núú. Te sáha i seña jeē steén jeē nacani ni i siquī cuéchi i, chi cahun i sahma jnúú te chuhun i yaā xinī i núú. 14 Núu súcuan te quivī coo juicio te xeēn gā coo castigo siquī rō jijnáhan ró vēsú jeē ni íyo siquī ñuu Tiro jíin ñuu Sidón. 15 Te róhó ñáyuu ñuu Capernaum, ¿á cájeni ni rō jeē cujéhu ró nájnūhun ñin jeē cáa cuahān ichi ándiví? Tuú chi sa nanuu ró ndé lugar nuū cáyūcu ánuá ndīyī. Achí yá.

16 Te ni cahān gā yā jíin téē jeē tají yá quingoo:

Ñayuu chusóhó jnúhun cahān rō, nuū maá rí chusóhó i. Te ñayuu squéhichī rohó, suni ruhū squéhichī i. Te ñayuu squéhichī ruhū, suni squéhichī i Yaā ní tají ruhū vēji ri. Achí yá.

Jeē ní ndecoo téē ni tají yá

17 Te ni ndecoo unī xico uxī téē un, cácusī ni de te cácahān de jíin Jesús:

Nde tachī cájetáhú núu na jéē jíin síhví ní, chi quéndacoo ini ñayuu, achí de.

18 Te ni cahān yā jíin de:

Súcuan cúu, chi ni jito ri jeē nájnūhun ñin taja ni ñingava Satanás ichi ándiví, chi ni quende rī ndihí poder un. 19 Te vijna te je ni jēhe ri fuerza nuū rō jeē cueñū rō nájnūhun siquī táca cóo jíin tísuhma, te cundeyí ró siquī táca fuerza maá jéē jíto uhū yohó, te tú na vé sáha ga jíin ró. 20 Te ma cúsi ni rō maá-ni jeē cájetáhú táchī nuū rō, chi sa cusī gā ni rō jeē yosó síhví ró nde ándiví. Achí yá.

*Jeē ní cusī ni Jesús
(Mt. 11.25-27; 13.16-17)*

21 Te suni hora un ní cusī ni Jesús, ni sáha Espíritu Santo, te ni cahān yā:

Na cútahū na núu ni Tátā, Jitoho ándiví jíin ñáyiví. Chi ni jesi ni táca jnúhun ndíchí ní, jeē ma cúní ñayuu ndíchí jíin ñáyuu tūhva cuenta ñayiví yáha. Te ni steén ni núu ñáyuu

cácuu nájnūhun sūchi lúlí. Chi súcuan ni nujnahan ni ni Tátā, achí yá.

22 Te ni cahān gā yā:

Ndivii ni jēhe Tátā rī nuū rī. Te tu cájini ñayuu ndé ñin cúu ruhū, Sēhe Yaā Dios, chi máá-ni Tátā rī cúu jeē jiní yā ruhū. Ni tu cájini ñayuu ndese Yaā cúu máá Tátā, chi máá-ni Sēhe cúu jeē jiní. Te íyó ñáyuu jeē cuní maá Sēhe steén yā nuū i ndese Yaā cúu Tátā yā, te máá i suni cuní i. Achí yá.

23 Yūcuán na te jíto ya nuū téē cáscuáha ún, te ni cahān yā jíin máá-ni de:

Yōhyo ndetū ñayuu cájito jniñu jéhu jeē cájito máá ró. 24 Chi cáhán rī jíin ró jeē cuehē téē ni canacani jnúhun Yaā Dios, jíin táca rey, ni cacuni de coto de jeē cájito máá ró, te tu ní cájito de. Te suni ni cacuni de cuní sōho de jeē cájini sōho máá ró, te tu ní cájini de. Achí yá.

Jnúhun ñin téē vāha ni nación Samaria

25 Yūcuán na te ñin téē steén tutu ley Yaā Dios, ni ndocuñī de ni jecahān de jíin Jesús, chi cúní de coto ndee de ya. Te ni cajnúhún de:

Maestro, ¿na vé sáha ná te nihīn tahú na cotecu na ní cáni ándiví? áchí de.

26 Te ni cahān yā jíin de:

¿Nde se yosó núu tútu ley? ¿Nde se cáhán cáhu ró? Achí yá.

27 Te máá téē un ní cahān de jeē cahán nuū tútu:

Coo manī ndasí ró jíin máá Jítoho rō Yaā Dios, nde jnáā ndasí ró sáha ró ndihí jeē cúsi ni yā, nde jíin ini jíin ánuá rō, jíin ní fuerza rō, jíin ní jéē níjnūní rō. Te cundáhú ni rō jnáhan ró nájnūhun cundáhú ni rō maá ró, achí. Achí de.

28 Te ni cahān yā jíin de:

Vāha ni cahān rō. Te núu cuu sáha ró súcuan te nihīn tahú rō cotecu rō ní cáni, achí yá.

29 Te máá téē un cúní de jeē quéndōo ndaā de nuū yā jíin jnúhun ni cajnúhún de, te ni cahān de:

¿Te ndé ñáyuu cácuu jnáhan ná? áchí de.

30 Te ni cahān Jesús:

Ñin téē ni quenda de ñuu Jerusalén, ni cuun de cuahān de ñuu Jericó. Te ichi un ní canecoo ñacuñna núu de, te ni caquende ndihí ndajniñu de, te nde sahma ñúhun de. Te ni cacani ndevāha ún de jeē jé yajni cuu

de núú. Te ni castóo ún de, te cuangoo. ³¹ Te ni cuu jeē íchi un yáha ñn sutū quihín de, te ni jito de nuū téé ún, te ni síyo-ni de cuahān de. ³² Te suni súcuan ñn tēe grupo levita jeē cájejnīñu ini templo, vēji de íchi ún, te ni jito de nuū téé ún, te ni yáha jíca-ni de cuahān de. ³³ Te ñn tēe nación Samaria, suni vēji de íchi ún, te nuū ní jito de, te ni cundáhú ni de tēe ún. ³⁴ Te ni quee de nde nuū catú téé ún, te ni chuhun de aceite jíin vino nuū ni túji tēe ún, te ni jihni de sahma nuū. Te ni soó de tēe un síquī quiti de, te cuahān de jíin téé un ndé ñn mesón, te ni condito de. ³⁵ Te inga quivī ún, hora jeē quihín de, te ni tava de uū xūhun cáa, ni jēhe de nuū tēe chíi mesón. Te ni cahān de: Coto ní téé yáha, te núu caxīn gā ni xūhun ní jíin de, te nuū nándicó ná te nachunaa ná núú ní, áchí de. ³⁶ Núu súcuan ¿te ndese jéni ni rō? Jeē ndinúní téé ún, ¿ndé ñn de ni chíhi cuenta jeē jnāhan de cúu tēe ni canecoo ñacuñna núú? Achí yá jíin tēe stéén tutu ley.

³⁷ Te ni cahān de:

Tēe jeē ní cundáhú ni tēe ni tujī, vēsú tēe ñuu jíca cúu de.

Yūcuán na te ni cahān Jesús jíin de:

Cuáhán núu súcuan, te suni súcuan cundáhú ni rō tāca ñáyuu, achí yá.

Jeē ni íne ya vehe Marta jíin María

³⁸ Yūcuán na te ni quihin tucu ya ichi cuahān yā, te ni jinū yā ñn ñuu lulí. Te ñn ñahan nání Marta, ni cana ña ya ni jehēn yā vehe ña. ³⁹ Te Marta, íyó ñn cuhū ña nání María. Te María ni cucōo ña nuū jehé Jesús, jíni nahín ña jnūhun cáhán yā. ⁴⁰ Te Marta chíi cúnéé máá ña jíin cuéhē jniñu sáha ña. Te ni quee ña nuū yā, te ni cahān ña:

¿A tu sáha ní cuenta jeē cuhū na ní stóo máñuhún ña sãña núú jniñu? Te cahān ni jíin ña na chindéé ñahán ña sãña, áchí ña.

⁴¹ Te ni cahān Jesús jíin ña:

Marta, yōhoyo ndíhví ni rō jíin cuéhē jniñu, te yōhoyo stóho ró máá ró jíin. ⁴² Te íyó ñn-ni jniñu cánuú. Te María chíi ni nacáji ña jniñu cánuú, suu jeē ndíhví ni ña síquī jnūhun Yaā Dios, te ma quénehen yó ña nuū ún. Achí yá.

*Jeē ni stéén yā ndese cacān tahú yó
(Mt. 6.9-15; 7.7-11)*

11

¹ Te ñn quivī íne Jesús ñn lugar jícan tahú yā. Te nuū ní ndíhi ni jícan tahú yā, te ñn tēe scuáha jíin yá, ni cahān de:

Stéén ni núú ná ndese cacān tahú na jíināhan ná, nájnūhun ni steén Juan nuū téé ni cascuáha jíin de, áchí de.

² Te ni cahān yā jíin de:

Jeē cacān tahú rō, te suhva cahān rō:

Tátá maá ná jíināhan ná jēé ndeé ní andíví, níni na cóo yíñuhún ná nuū ní, chíi Yaā ñi cúu ní.

Te ñūhun ni na jēé yachí quiji quivī ndacu ní jniñu ní ñáyiví yáha.

Te na cóo táca jniñu nújnahan ni ní, nájnūhun íyó ini andíví, súcuan na cóo ini ñáyiví.

³ Staā jeē cátecu na táca quivī, cuāha ní núú ná vijna.

⁴ Te cone cáhnu ni ni núú tāca cuéchi cásáha ná núú ní,

nájnūhun cáhine cáhnu ni na núú ñáyuu casáha cuéchi nuū ná.

Te ma cuáha ní jnūhun jeē coto ndee jexeén sãña,

chíi sa suhva jnama ní sãña nuū tāca jēé neé. Achí rō jíināhan ró. Achí yá.

⁵ Te ni cahān gā yā:

Núu ndé ñn rōhó íyó ñn amigo rō, te núu quihín rō vehe de sava ñuu te cahān rō jíin de: Amigo, cuāha núu unī staā nuū rī. ⁶ Chíi ñn amigo rī jeē jíca de viaje, ni quee de vehe rī, te tú na vé névāha rī jeē cuáha rī caji de. Achí rō. ⁷ Te núu cahān tēe íne ini vehe: Ma stáhān rō ruhū, chíi ndíhyú yehyí rí, te je cáquixī sēhe rī jíin rí, te ma cúu ndonda rī jeē cuáha rī nuū rō, achí de. ⁸ Te cáhán rī jíin rō, vēsú ma ndóna de cuāha de nuū rō síquī jeē cúu de amigo rō, te jeē yóhoyo stáhān rō de, jeē yúcuan ndonda de cuāha de ndíhi jeē jíni ñūhún ró. ⁹ Núu súcuan te cáhán rī jíin ró jíināhan ró jeē suni súcuan cacān tahú rō nuū Yaā Dios, te cuāha ya nuū rō. Te nducú ró tāca jēé váha íyó núú yā, te nihín rō sáha ya. Te cacān tahú rō nde nihín rō, nájnūhun sáha ñayuu cáhán yehyí ndé nune quiví i.

¹⁰ Chíi táca ñáyuu jícan, cuāha ya nuū i. Te ñayuu nducú, suni nihín i. Te ñayuu cáhán, nune ya ichi nihín i jeē cuní i.

¹¹ ¿Te ndé ñn ró cúu tátá, te núu sēhe ró jícan i staā nuū rō, te á cuáha ró ñn yuū nuū

i? Te núu jícán i chācá, ¿te á cuáha ró ñn coō nuū i? ¹² Chí núu jícán i ñn ndivī, ¿te á cuáha ró ñn tisuhma nuū i? Tú cuiñi súcuan. ¹³ Núu súcuan te máá ró jijnáhan ró, vēsú ñáyuu iyó cuéchi cácuu ró, te cájini rō cuáha ró jēē váha nuū séhe ró. Te nagā ni cuu máá Tátá rō andiví jēē ma cuáha ya Espíritu Santo nuū ñáyuu jicán nuū yā. Achí yá.

Jeē ní cacahān de jeē jejniñu ya fuerza Satanás

(Mt. 12.22-30; Mr. 3.19-27)

¹⁴ Te quénehen ya ñn tachī ini ñn tēe, jeē ní cuiñhín de ni sáha. Te nuū ní quenda tachī, te ni nacahān tēe ni cuiñhín un. Te ni canaa ni ñáyuu cájito i. ¹⁵ Te sava ñáyuu ún chi ni cacahān i:

Jíin fuerza Satanás jeē cujéhnun nuū tachī, quénehen tēe yáha táca táchī ini ñáyuu, achí i.

¹⁶ Te sava ga i cúní i coto ndee i ya, te ni cajicān i jeē sáha ya jeē coo ñn seña ichi ándiví. ¹⁷ Te máá yá jiní yā jeē súcuan cájeni ni i, te ni cahān yā:

Táca nación jeē sasín máá te cuajnáhan máá, núu súcuan te snāá jeē iyó váha máá. Te núu ñáyuu ñn vehe sásín máá te cuajnáhan máá, núu súcuan te ma cúu ga coyūcu cáhnu. ¹⁸ Te suni súcuan Satanás, núu sásín máá jíin jnáhan tachī, ¿te ndese cuiñi ñihin jeē ndácu jniñu núu súcuan? Chi cácahān rō jeē jíin fuerza Satanás quénehen ri tachī ini ñáyuu. ¹⁹ Te núu súcuan cúu núú, te ñáyuu cascuáha jíin máá ró jijnáhan ró, ¿na jíin fuerza cáquenehen máá i tachī, cájeni ni rō? Núu súcuan te máá i jijnáhan i cachi jeē ní castiví ndasí ró ni cacahān rō jeē cáquenehen ri tachī jíin fuerza Satanás. ²⁰ Te tuú chi sa suhva jíin fuerza Yaā Dios cúu jeē quénehen ri tachī. Núu súcuan te je ndeé Yaā Dios mēhñu ró jēē ndácu ya jniñu.

²¹ Te núu ñn tēe ndacuī, ndíto de vehe de jíin nújijí de, núu súcuan te tú ni ñn ndajniñu de ndoñhún. ²² Te núu quiji inga tēe ndacuī gā, te cundeyí jíin tēe ún, núu súcuan te quende nujijí de jeē ndíto de vehe de, te sáha de ndese cúní maá de jíin ndajniñu jeē quēnde de. Te nájnūhun tēe ndacuī gā ún, súcuan cúu máá rí nuū Satanás.

²³ Te ñáyuu tu iyó mání jíin rí, núu súcuan te jíto uhū i ruhū. Te ñáyuu tu nástútú jíin rí,

núu súcuan te sa jéte núu i ñáyuu vējicoo nuū rī.

Tachī jeē nastútú jnáhan ndiví ini ñáyuu (Mt. 12.43-45)

²⁴ Núu ni quenda ñn tachī ini ñn tēe tu cándije, te jícá cuu nuū ññhun téhé, ndúcú núu ndétátú, te tu níhín, yūcuán na te jéni ni maá: Na quínuhun rī vehe nuū ní quenda ri. ²⁵ Te núu ni ndee tucu, te jíto jeē tēe tu cándije un cúu de nájnūhun ñn vehe jeē ní ndundoo. ²⁶ Yūcuán na te jéquiñin uxā gā tachī xeén gā vēsú maá. Te quívicoo ini tēe un jēē cóyūcu yúcuan. Núu súcuan te xeén gā ndoho tēe un jēē sándihí vēsú jeē xíhna ññhún. Achí yá.

Yōhyo ndetū ñáyuu cájini nahín jnūhun ya

²⁷ Te níni cáhán yā jnūhun yáha, te ñn ñahan íne mēhñu ñáyuu cuehē un, ní cahān jee ña jíin yá:

Yōhyo ndetū ñahan ní scácu níhín te ni scáxin ña níhín, áchí ña.

²⁸ Te ni cahān yā:

Sa suhva yōhyo ga ndetū ñáyuu cájini nahín jnūhun Yaā Dios te cásquicu i, áchí yá.

Jeē ní cajicān ñáyuu tu cácañdije ñn jniñu jéhnun

(Mt. 12.38-42; Mr. 8.12)

²⁹ Te ni cataca cuehē gā ñáyuu nuū Jesús, te ni quejéé yá cahán yā:

Ñáyuu iyó vijna máni cásáha néé i. Te cájicān i ñn jniñu jéhnun jeē steén núu Yaā ní tají Yaā Dios cúu ri. Te tú na inga jniñu jéhnun steén rī nuū i, chi máa-ni jniñu jéhnun nájnūhun ni cuu jíin Jonás, tēe ni nacani jnūhun Yaā Dios nde jenahán. ³⁰ Chi nájnūhun ni cajini ñáyuu ñuu Nínive jeē ní cuu ñn jniñu jéhnun jíin Jonás, suni súcuan cuni ñáyuu tiempo yáha jeē coo ñn jniñu jéhnun jíin rúhū, Yaā ní nduu tēe, jeē quiñnáhan jíin modo ni ndoho Jonás. ³¹ Te reina jeē ní cujéhnun nación ichi sur, natecu ña jíin ñáyuu tiempo yáha, quiví juicio jeē sándaā yā cuéchi, te cahān ña cuéchi síquī i. Chi nde jicá téyí ní quiji ña ni jini nahín ña jnūhun ndíchí ní cahān rey Salomón. Te vijna chi cújéhnun ga ruhū, Yaā íne yáha vēsú Salomón, te tu cácañdije ró rúhū. ³² Te táca ñáyuu ñuu Nínive nuū ní nacani Jonás jnūhun, natecu i jíin ñáyuu tiempo yáha,

quiv̄ juicio jeē sándaā yā cuēchi, te cahān i cuēchi siqūi ñáyuu yáha. Chi máá i ni canacani ni i ni castóo i cuēchi i quiv̄ ní nacani Jonás jnūhun nuū i. Te vijna chi cújēhnu ga ruhū, Yaā íne yāhá vēsú Jonás, te tu cácandíje ró rúhū.

*Jnūhun yátá siqūi lámpara
(Mt. 5.15; 6.22-23)*

³³ 'Núu nást̄in ñayuu ñn lámpara, tu chísāhí i, ni tu chúne i ch̄iji ñn cajón. Chi sa suhva jéni i nuū sucún, návāha cundijin nuū ñáyuu quiv̄icoo vehe. ³⁴ Te tinūu ró cúu nájñūhun lámpara nuū yiqui cúñu rō. Núu súcuan te núu tinūu ró iyó ndijin, te ñí-ni yiqui cúñu rō cundijin. Te núu tinūu ró tu iyó ndijin, te ñí-ni yiqui cúñu rō iyó nee. ³⁵ Te suni súcuan cúu ánuá rō, te coto ró jéē ma cáni néé ni rō, návāha tú coo nee ini anuá rō. ³⁶ Chi núu máni jniñu váha cásáha ró, te tú na jniñu néé cásáha ró, núu súcuan te luz yā cundijin vāha ini anuá rō, nájñūhun ñn lámpara jeē sáha jeē cundijin vāha. Achí yá.

*Jeē ni cáhān yā jeē iyó cuēchi de jijnáhan de
(Mt. 23.1-36; Mr. 12.38-40; Lc. 20.45-47)*

³⁷ Te nuū ní cuu ni cahān yā, te ñn tēe grupo fariseo ni cana de ya jeē caji yā staā vehe de. Te ni quiv̄i ya, te ni cucōo ya mesa jeē caji yā staā. ³⁸ Te tēe fariseo un nāā ni de jíto de jeē tu squícu ya costumbre jeē nandahá yá te caji yā staā. ³⁹ Te ni cahān maá Jítoho yō jíin de:

Róhó tēe fariseo jijnáhan ró, chi nájñūhun jeē cánacate ró yátā vaso jíin yátā cohó cúu jeē nándahá ró. Te ichi íni rō chi ññūhun máni máá jnūhun cuíhná jíin jnūhun néé. ⁴⁰ Tēe cánéé cácuu ró. ¿A tu cájini rō jeē Yaā ni sáha yiqui cúñu rō, suni ni sáha ya anuá rō? ⁴¹ Te jeē cájēhe ró caridad nuū ñáyuu ndahú, na sáha ró siqūi jeē cundáhú ndije ni rō i. Te súcuan te coo ndaā anuá rō.

⁴² 'Nacā xeēn ndoho róhó tēe fariseo, chi cásquícu ró tēcá jniñu lúlí, te tu cásquícu ró jniñu cánuú. Chi cásáha ró úxī úxī nuhñi tam̄inu jíin ruda jíin táca yucū, te cásocō rō ñn ñn siqūi táca úxī un núu Yaā Dios. Te tu cásáha cuít̄i rō jniñu ndaā, ni tu cáhiyo manī rō jíin Yaā Dios. Táca jéē yáha cánuú sáha ró núú, te suni ma stóo ró jéē socó rō táca yúcū ún.

⁴³ 'Nacā xeēn ndoho róhó tēe fariseo, chi máni cánujnahan ni rō cucōo ró núu silla yññúhún gá ini vehe ñn sinagoga. Te cánujnahan ni rō jeē cahán yññúhún ñáyuu jíin ró nuū calle.

⁴⁴ 'Te nacā xeēn ndoho róhó tēe cástéén tutu ley Yaā Dios, jíin róhó tēe fariseo, chi tēe stáhú-ni cácuu ró. Chi cándāa ró nájñūhun yaū nd̄iyi jeē tú ndijin, chi cásnāā rō anuá ñayuu, te tu jíin i jeē súcuan cásáha ró jíin i. Achí yá jíin de.

⁴⁵ Yūcuán na te ni cahān ñn tēe stéén tutu ley:

Maestro, jeē ni cáhān ni táca jnūhun yáha, suni nde siqūi maá ná jíináhan ná ní cahān ní, áchí de jíin yá.

⁴⁶ Te ni cahān yā:

Suni nacā xeēn ndoho róhó tēe cástéén tutu ley. Chi suni cástéén rō táca ley ni catava maá ró jeē yí sáha, te tu cácuñdeyí ñáyuu squícu i. Te máá ró, chi ni ñn xinī ndáha ró tu cáscánda ró jéē squícu ró.

⁴⁷ 'Nacā xeēn ndoho ró jíináhan ró. Chi cásáha ró vehe siqūi nuū yññúji nd̄iyi jíi rō, tēe ni canacani jnūhun Yaā Dios nde jenahán. Te suni táca jíi rō ni cajehni de tēe ún. ⁴⁸ Te jeē casáha ró súcuan cúu jeē cáquijnáhan ró jíin de siqūi jniñu ní casáha de. Chi máá de ni cajehni tēe ún, te máá ró cásáha ró vehe nd̄iyi ún.

⁴⁹ 'Jeē yúcuan nde jenahán ní cahān Yaā Dios ñn jnūhun ndíchí: Tají rí táca tēe nacani jnūhun rí jíin táca tēe apóstol quingoo de nuū i. Te sava de cahni i, te sava ga de coto xeēn i, áchí Yaā Dios. ⁵⁰ Te súcuan te siqūi ñáyuu tiempo yáha na cóndee cuēchi jeē ní cajehni jíi i tēe ni canacani jnūhun Yaā Dios, nde quiv̄i ni jécōo ñayiv̄i te nde vijna, ⁵¹ nde Abel xīhna gā te nde Zacarías, tēe ni cajehni de ini templo sava mēhñu cuarto ñn jíin altar. Núu súcuan te cáhān rī jíin ró jeē siqūi ñáyuu tiempo yáha condee táca cuēchi ún.

⁵² 'Nacā xeēn ndoho róhó jéē castéén tutu ley, chi cájesi rō ichi jeē jécūhun ni ñayuu jnūhun ya. Chi ni máá ró tu cácuñi rō jecūhun ni rō, ni tu cájēhe ró jnūhun jeē jecūhun ni ñayuu cácuñi. Achí yá.

⁵³ Te jeē ni cáhān yā jnūhun yáha, te tēe cástéén tutu ley Yaā Dios jíin tēe fariseo,

yōhyo ni caquitī ni de nuū yā. Te ni caque-jéé de cástíchí de ya siquī cuehē gā jnūhun. ⁵⁴ Chi yuhu-ni cánducú de núu sanaa te stívi yá jnūhun cahān yā, návāha nihīn de cuēchi siquī yā.

Siquī jnūhun stáhú cácahān tēe fariseo

12

¹ Te níni súcuan cúu, te ni cacutútú cuéhē mil ñayuu, chi nde cájeñū i siquī jehé jnāhan i. Te xīhna gā ni quejéé yá cahān yā jíin tēe cáscuáha jíin yá:

Coto má candíje ró levadura tēe grupo fariseo, chi suu cúu jnūhun stáhú cácahān de. Chi jíte núu nuū ñáyuu, návjñūhun ndécava levadura nuū ñújen pan. ² Chi jnūhun stáhú un má quéndōo sáhi cuítī, chi ndihī natūu ndijin, te cuni ñayuu. ³ Núu súcuan te suni máá ró, táca jnúhun ni cacahān rō jeē tu ní jíni ñayuu, ñn quivī te cuni vāha i. Te táca jnúhun ni cacahān sáhi ró jeē ndihyú yehyí, ñn quivī te cahān jee ñayuu yatā táca vehe.

Jeē ní cachi yā ndé ñn cúu jeē yūhu yó (Mt. 10.28-31)

⁴ 'Cahān rī jíin ró jijnáhan ró, amigo: Ma yūhu ró coto ró ñáyuu cahni yiqui cúñu rō, chi núu ni cajehni i rōhó, te tuá na vé cúu sáha ga i. ⁵ Te na cáchi rī nuū rō ndé ñn yūhu ró coto ró: Jeē yūhu ró coto ró cúu Yaā Dios jeē núu sáha ya jeē cúu rō, te íyó poder yā chune ya rohó infierno. Suu máá yá cúu jeē yūhu ró jeē ma stívi ró nuū yā.

⁶ 'Te táca saa chi tú yahu ndéé tī, chi nde uhūn tī jeē uú centavo lulí. Te ni ñn tī tu náa ni Yaā Dios jeē tu ndíto ya. ⁷ Te nagā ni cuu rōhó jijnáhan ró, chi nde ndihī ixi xíní rō je ni cahu ya. Núu súcuan te ma yūhu ró jijnáhan ró, chi cánuú ndasí gá rō nuū yā vésú cuehē táca saa.

Ñayuu jejnúhún Jesucristo nuū ñnga ñayuu (Mt. 10.32-33; 12.32; 10.19-20)

⁸ 'Te cahān rī jíin ró, táca ñáyuu jeē cuajnúhún rúhū nuū ñnga ñayuu, suni súcuan ruhū, Yaā ní nduu tēe, cuajnúhún rí i nuū táca ndajéhé Yaā Dios. ⁹ Te táca ñáyuu jeē ma cuajnúhún rúhū nuū ñnga ñayuu, suni súcuan ma cuajnúhún rí i nuū táca ndajéhé Yaā Dios.

¹⁰ 'Te núu ndé ñáyuu cahān i siquī ruhū, Yaā ní nduu tēe, cone cáhnu ni Yaā Dios nuū i. Te núu ndé ñáyuu cahān ndevāha i siquī Espíritu Santo, ma cóne cáhnu ni Yaā Dios nuū i.

¹¹ 'Te núu cuandeca i rōhó táca vehe íi sinagoga nuū tēe cásañdaā cuēchi, jíin núu tēe cácuu tohō, te ma nácani ndasí ni rō ndese stío cuñí rō jnūhun nuū de. ¹² Chi máá hora un te Espíritu Santo steén yā nuū rō ndese cahān rō. Achí yá.

Siquī jeē ma ténuū yō ndajníñu cúca

¹³ Yūcuán na te ñn tēe íne nuū ñáyuu cuehē un ní cahān de jíin Jesús:

Maestro, cahān ni jíin ñani na jéé na táhú sáva de tahū na jíin de, áchí de.

¹⁴ Te ni cahān yā jíin de:

¿Ndé ñn ni jeni ruhū jeē ndacu ri jniñu tahū sáva tahū rō? Achí yá.

¹⁵ Te ni cahān gā yā:

Condito ró máá ró jijnáhan ró jéé ma ndíyo ni rō xūhun jíin táca gá. Chi vésú cuehē ndasí ndajníñu névāha ñn tēe, te nasūu jéé yúcuan sáha jeē quéndōo ndetū de, áchí yá.

¹⁶ Yūcuán na te ni cahān yā ñn jnūhun yátá jíin i:

Ni íyo ñn tēe cúca jeē névāha ñuhun jeē cúu vāha ndasí itu. ¹⁷ Te tēe cúca un ní nacani ni de: ¿Ndese sáha rí? Chi tuá ndé cuhun niñi rí. Achí de. ¹⁸ Te ni jeni ni de: Suhva na sáha rí. Na cánu rī táca yácā rī, te nasáha rí jeē náhnu ga. Te yūcuán chuvāha ndihī ri niñi rí jíin táca ndajníñu rí. ¹⁹ Yūcuán na te cahān rī jíin ánuá rí: Vijna te cuehē teyí névāha yó jéé canda cuehē cuiyā. Na ndétātu yó te caji yō coho yó, te na cúsiñi ni yō, ni jeni ni de.

²⁰ Te ni cahān Yaā Dios jíin de: Tēe cánéé cúu ró. Chi jecuáa vijna cuu rō, te táca jéé ní chuvāha ró, ¿ndé tēe cuu? Achí Yaā Dios jíin de. ²¹ Te súcuan ndoho táca tēe jeē sacúca de máá de, te tu ndúcú de jeē quéndōo ndetū de sáha Yaā Dios. Achí yá.

Yaā Dios ndíto ya yohó (Mt. 6.25-34)

²² Te ni cahān yā jíin tēe cáscuáha jíin yá:

Núu súcuan te cahān rī jíin ró: Ma nácani ndasí ni rō siquī jeē cótecu rō, núu ndese caji rō, ni siquī sahna, núu ndese cuhun ró. ²³ Chi Yaā Dios ni sáha ya jeē técu rō jíin

yiqui cúñu rō, te nagā ni cuu jeē ma cuáha ya jeē cáji rō jíin jée cúhun ró. ²⁴ Condēhe ró ndese cátecu quití cácuu nájnūhun calú, chi tu cátaji tí, ni tu cánastútú tí jeē chívāha tí, ni tú yacā tí. Te vēsú súcuan te máá Yaā Dios scáji yā tí. Te cánuú ndasí gá rō jijnáhan ró vēsú tǎcá quití ún. ²⁵ ¿Te ndé ĩn ró, á cuu scuéhnu ró máá ró sava metro gā, vēsú na nácani ndasí ni rō? ²⁶ Te núu ma cúu sáha ró vēsú ĩn jniñu lúlí súcuan, ¿te najehē cánacani ndasí ni rō siquí jeē cáji rō jíin jée cuhun ró?

²⁷ Condēhe jijnáhan ró ndese jée ita tǎca yúcū. Chi tu sájniñu, ni tu táú. Te cáhan rī jíin ró jeē ni rey Salomón, quiví ní ñūhun de sahma váha ndasí, tu ní ñūhun de sahma lúu súcuan nájnūhun ita ún. ²⁸ Te núu súcuan jéhe Yaā Dios sahma lúu ita un jée jée vijna te sajnē cayū nuū ñuhún, te nagā ni cuu rōhó jijnáhan ró jée ma sáha ya jeē nihín rō sahma. ¿Te naun tu cá candíje nihin ró jée ndíto ya rohó? ²⁹ Núu súcuan te ma nácani cuíhyá ni rō ndese caji rō ndese coho ró. ³⁰ Chi tǎca ñáyuu ñayívi jée tu cá candíje cúu jeē máni siquí jeē yáha cándihví ni i. Te máá ró jijnáhan ró, chí íyó Tátá rō andíví, te jíni yā jeē cájini ñūhun ró tǎca jée yáha. ³¹ Te sa suhva cánuú gá jeē cóndihví ni rō siquí jniñu jeē ndácu Yaā Dios nuū rō. Yūcuán na te sáha ya jeē nihín rō tǎca jée yáha.

*Ndese coo cúcá yó nde andíví
(Mt. 6.19-21)*

³² Ma yūhu ró jijnáhan ró chí cácuu ró nájnūhun lanchi rī. Chí vēsú jecu-ni cácuu ró, te máá Tátá rō cúsi ni yā jeē quívicoo ró ñuu nuū ndácu ya jniñu. ³³ Xico ró jeē cánevāha ró, te cuáha ró xúhun un núu ñáyuu ndahú. Te súcuan caya rō tahū rō nde andíví núu ma cútúhú, nájnūhun jeē chívāha ró xúhun ini yijni. Chí nde andíví te ma náá jeē váha coneváha ró. Chí yūcuán má quíví ñacuñhá, ni ma cúu stívi tiquíxin. ³⁴ Chí nde nuū nihín rō tahū váha ró, yūcuán cúu nuū cóndihví ni rō siquí.

Jeē na cóo tūhva yó jée ndé yā

³⁵ Coo tūhva ró jijnáhan ró jée ndé Jitoho rō, te coo ró nájnūhun mozo jeē nastín i lámpara i. ³⁶ Chí íyó tūhva i te cándetu i jeē ndé patrón i jeē cuahán de vico nándāha. Chí núu ni ndee de te cahán de, te nune-ni i

yéhyí jijnáhan i. ³⁷ Te yōhyo ndetū mozo un núu ni ndee patrón i, te cuni de jeē cándito i. Jendaá cahán rī jíin ró jeē máá patrón sātūhva de máá de, te scúcoo de i mesa te cani de cohó i. ³⁸ Te vēsú cucuée de ndee de nde sava ñuu, chí jée néé gā, te núu cuni de jeē súcuan cándito mozo de, te yōhyo ndetū i jijnáhan i núu súcuan. ³⁹ Te na jécūhun ni rō jeē cahán jnūhun yátá yáha: Tēe chíi vehe, núu ni jini de na hora quiji ñacuñhá, te condito de, te ma cuáha de jnūhun jeē sacuíhá vehe de núu. ⁴⁰ Te suni súcuan coo tūhva ró jijnáhan ró, chí núu tuú, te máá hora jeē tú na vé cájini ni rō, te ndee ruhū, Yaā ní nduu tēe. Achí yá jíin de.

*Jnūhun mozo vāha jíin mozo tu squícu
(Mt. 24.45-51)*

⁴¹ Yūcuán na te Pedro ni cajnūhún de ya: ¿A jíin máá-ni ná jijnáhan ná cáhan ni jnūhun yátá yáha, chí suni cáhan ni jíin ndihí ga ñayuu? achí de.

⁴² Te ni cahán maá Jítoho yō:

Cáhan rī jíin ndé-ni ñayuu cúu nájnūhun mozo jeē ndito xiní te squícu vāha. Te máá patrón sáha de jeē condiso jniñu i coto i ñayuu vehe de, návāha scáji i máá hora.

⁴³ Te yōhyo ndetū mozo un jée núu ni ndee patrón, te cuni de jeē súcuan squícu vāha i.

⁴⁴ Jendaá cahán rī jíin ró jeē cani de mozo un jée cóto i ndihí ndajniñu de. ⁴⁵ Te núu jéni ni i jeē ma ndíji yachí patrón i, te quejé i cani i tēe jíin ñahan cácuu jnáhan mozo i, te caji i coho i te najíni i, ⁴⁶ núu súcuan te ndee-ni patrón quiví jeē tu ndetu i jíin hora jeē tú na vé jéni ni i. Te stóho xeēn de i, te squívi de i ndoho i jíin ñáyuu tu cásquícu.

⁴⁷ Te mozo jeé jíni i ndese nújnahan ni patrón i, te núu tu sātūhva i ni tu squícu i jeé cuni de, ndoho xeēn i jíin yujnu xí. ⁴⁸ Te mozo jeé tu jíni i ndese nújnahan ni patrón i, te núu sáha i jniñu jeé cani de i, núu súcuan te cūhva-ni cani de i. Chí ñayuu jeé steén cuehē yā nuū i, suni cuehē nandacān yā nuū i. Te ñayuu jeé cuehē gā jniñu téjniñu ya i, suni cuehē gā nandacān yā nuū i.

*Jeé siquí Jesús te cusín ini ñayuu
(Mt. 10.34-36)*

⁴⁹ Ni quee rī jeé nájnūhun jeé scuíquín rī ñuhūn ini ñayívi, te suu cúu jeé cusín ini ñayuu jeé siquí ruhū. Te cúní rī jeé yachí coo

súcuan, návāha quivicoo ñayuu ndaha Yaā Dios. ⁵⁰ Te íyó ñn jñundóho cánuú ndoho ri, te cúcuíhyá ndasí ni rī chi nde jīnu ndoho ri, te ndusī ni rī. ⁵¹ ¿A cájeni ni rō jeē véji ri jeē cóyūcu mánī ñayuu ñayiví? Cáhán rī jín ró jeē tuú, chi sa suhva jeē cusín ini ñayuu jeē siquī ruhū. ⁵² Chi nde vijna te quejéé jéé uhūn ñayuu ñn vehe, sásín máá jínáhan, unī siquī uú, te uū siquī unī. ⁵³ Chi tátá cusín ini jín séhe yí, te sēhe yí jín tátá, te náná jín séhe síhí, te sēhe síhí jín náná, te náná chíso jín séhe jēnú, te sēhe jēnu jín náná chíso. Achí yá.

Jeē ni cáhān yā siquī seña andiví
(Mt. 16.1-4; Mr. 8.11-13)

⁵⁴ Te suni ni cahān yā jín ñáyuu cuehē ún: Núu cájito ró jeē náne vicō ichi núu cáne niāndii, te cácahān rō jeē cuun saū, te súcuan cúu. ⁵⁵ Te núu quéé tachī vēji ichi sur te cácahān rō jeē nandii, te súcuan cúu. ⁵⁶ Tēe stáhú-ni cácuu ró. Chi cájecūhun ni rō ndese stéén seña andiví jín ini ñayiví, ¿te naun tu cájecūhun ni rō ndé ñn cúu ruhū jeē sáha ri táca jniñu jēhnu tiempo yáha?

Jeē cóndihvī ni yō jeē ma cóndee cuēchi siquī yō
(Mt. 5.25-26)

⁵⁷ ¿Te najehē tu cánacani ni maá ró ndé ñn cúu jniñu ndaā sáha ró? ⁵⁸ Te núu ñn ñayuu quihīn i jín ró nuū tohó jeē cacán i cuēchi siquī rō, núu súcuan te níni cuáhān rō jín i ichi te condihvī ni rō sándaā rō jín i. Chi núu tuú, te squiví i rōhó núu juez, te juez siáha de rōhó núu policía, te policía chune de rōhó vecāa. ⁵⁹ Te jendaá cahán rī jín ró jeē ma quénda cuiti rō yūcuán chi nde chunaa rō ndihí cuiti xūhun cájicān de. Te suni súcuan condihvī ni rō cahān ndahú ró jín Yaā Dios, návāha ma ndácunehen ya cuēchi siquī rō. Achí yá jín de.

Jeē cánuú nacani ni yō jeē stóo yó cuēchi yó

13

¹ Te ñn quivī yúcuan ní quecoo jecu tēe, ni canacani de jñūhun nuū yā ndese ni candoho jecu tēe Galilea. Chi ná cájehni de quiti jeē socó de, te ni quecoo mozo Pilato ni cajehni tēe ún. ² Te ni cahān Jesús:

Tēe Galilea un, ¿á cájeni ni rō jeē súcuan ni candoho de siquī jeē xeēn gā ni íyo cuēchi de vésú tāca gā ñayuu Galilea? ³ Cáhán rī jín ró jeē tuú. Te rōhó jínáhan ró suni jñahnū ndetū rō núu tú nacani ni rō jeē stóo ró cuēchi ró. ⁴ Te xahūn unī tēe jeē ní cotúú torre Siloé siquī de, te ni cajihí de, ¿á cájeni ni rō jeē ní casáha de cuēchi xeēn gā vésú tāca gā ñayuu ñuu Jerusalén? ⁵ Cáhán rī jín ró jeē tuú. Te máá ró jínáhan ró, suni jñahnū ndetū rō núu tú nacani ni rō jeē stóo ró cuēchi ró.

Jñūhun yátá núndēhe higo

⁶ Yūcuán na te ni cahān yā jñūhun yátá yáha jéē steén yā ndese cácuu ñayuu tu squícu jñūhun Yaā Dios:

Cácuu i nájnūhun ñn nundēhe higo jeē ín nuū ñūhun ñn tēe. Te ni jecondēhé de núu ín ndehē xinī, te tú na vé ín. ⁷ Te ni cahān de jín mozo sájniñu nuū ñūhun de: Vijna te je íyó únī cuiyā jeē quíji ri nducú rí ndehē xinī yújnu higo yáha, te tú na vé cúun xinī. Núu súcuan te cahnde rō, chi máá jéē sajnēñu nuū ñūhun, áchí de. ⁸ Te ni cahān mozo un jín de: Stóo ní na cuiñi ñn na cuiyā, te na nástáyā ná jéhē te chuhun ná jéhen. ⁹ Te na cóndēhe yó núu tú cuun ndehē inga cuiyā. Te núu tuú, te tahndē, achí yá.

Jeē ní nasávāha ya ñn ñahan quivī ndétātú

¹⁰ Te ñn quivī ndétātú te stéén Jesús jñūhun ini vehe ñn sinagoga. ¹¹ Te íyó ñn ñahan jeē ní cuu xahūn unī cuiyā kuhú ña. Chi ñn tachī ni sáha jeē jíca tíhí ña, te tuá cúu cuiti caca jnuu ña. ¹² Te ni jito Jesús nuū ña, te ni cana ya ña, te ni cahān yā jín ña:

Vijna te nduvāha ní jéē kuhú ni.

¹³ Te ni soó yá ndaha ya siquī ña, te ni nucuiñi jnuu-ni ña, te ni nacuatáhú ña nuū Yaā Dios. ¹⁴ Te tēe cújēhnu ini vehe ñn sinagoga, ni quiti ni de nuū Jesús jeē ní nasávāha ya ñahan un quivī ndétātú. Te ni cahān de jín ñáyuu:

Íñu quivī iyó jéē sájniñu yó, te tāca quivī ún quijicoo ró nduvāha ró. Te quivī ndétātú chi ma cúu, áchí de.

¹⁵ Yūcuán na te ni cahān maá Jítoho yō jín de:

Tēe stáhú-ni cácuu ró. Quivī ndétātu ¿á tu cándají ró stiquī rō burro ró jéē quíscóho ró

tí ndute? ¹⁶ Te ñahan yáha jéē cúu ña ñn sēhe yucūn Abraham, chí nájñūhun ni conuhnī ña xahūn unī cuiyā ni sáha Satanás. ¿Te á tu íyó váha jeē nájñūhun nandají rí ña nuū cuehyī ndóho ña quiṽī ndétátú? Achí yá.

¹⁷ Te jeē ni cáhān yā súcuan, te tāca tée cájito uhū de ya, ni cacucanu de. Te ndihī ñayuu ún chí ni cacusiñ ni i jíto i tācá jniñu jéhnū sáha ya.

Jñūhun yátá síquī ndiquin mostaza
(Mt. 13.31-32; Mr. 4.30-32)

¹⁸ Te ni cahān yā:

Na cáhān rī ñn jñūhun yátá návāha cuni rō ndese ndúcuehē ñayuu ndácu Yaā Dios jniñu nuū. ¹⁹ Ndúcuehē i nájñūhun jéhnū ñn ndiquin mostaza jeē jéquin ñn tēe nuū ñūhun de, te ndúu nájñūhun ñn yujnu. Te cúu cáhnu, te tācá saa chí cásáha tí tacā tí chíji ndaha ún. Achí yá.

Jñūhun yátá síquī levadura
(Mt. 13.33)

²⁰ Te ni cahān tucu ya:

Súcuan cúu jeē ndúcuehē ñayuu jeē ndácu Yaā Dios jniñu nuū: ²¹ Cúu nájñūhun levadura jeē ní quihin ñn ñahan, te ni saca ña jíin únī kilo harina, te ni ndaa ndihī ñujen ni sáha. Achí yá.

Siquī jeē quiṽi yó yéhyí túū
(Mt. 7.13-14, 21-23)

²² Te jíca Jesús jeē cuahán yā ichi ñúu Jerusalén, te yáha ya tācá ñuu náhnū jíin ñuu lulí, te stéén yā jñūhun. ²³ Te ñn ñayuu ni cajñūhún i ya:

¿A jecu-ni ñayuu jnama Yaā Dios, chí naún? Achí i.

Te ni cahān yā jíin i:

²⁴ Condiḥṽi ni rō quiṽicoo ró ndaha Yaā Dios. Chí cúu nájñūhun ñn yéhyí túū. Te cáhān rī jíin ró jeē ñn quiṽi te cuehē ñayuu nducú i quiṽicoo i, te ma cúu ga. ²⁵ Te quiṽi ún te sáha ri nájñūhun ñn tēe chíi vehe jeē ndociñi de te nacasi de yéhyí. Te ichi yátá véhe cuiñi ró jíinahan ró, te scáján ró yéhyí, te cahān rō: Nune ní yéhyí na quiṽicoo ná. Te cahān de jíin ró: ¿Ndé nuū véjicoo ró? Chí tu jíin rī rohó, achi de. ²⁶ Yūcuán na te quejéé ró cahān rō jíin de: Ni cayejí ná ni cajihí ná jíin ní, te ini calle ñuu na ní stéén ni jñūhun, achi rō. ²⁷ Te cahān maá de: Cáhān

rī jíin ró jeē tu jíin rī rohó ndé chí véjicoo ró. Cujiyo quingoo ró, chí ñayuu casáha jniñu néé cácuu ró. Achi de. ²⁸ Te quiṽicoo ró núū ndahyú rō, te nacayihí yuhu ró jéē ndoho xeēn rō. Te coto ró núū Abraham jíin Isaac jíin Jacob jíin ndihí tēe ni canacani jñūhun Yaā Dios, cáyucú de ñuu nuū ndácu ya jniñu. Te rohó, vésú cácuu ró yúcūn de, te quiṽicoo ró núū ndoho ró. ²⁹ Te cuehē ñayuu, vésú tu cácuu i yucūn de, te quiṽicoo i ichi núū cáne niāndii jíin ichi núū quée niāndii, ichi norte jíin ichi sur. Te cucōo i mesa caji i staā ñuu nuū ndácu Yaā Dios jniñu. ³⁰ Te sava ñayuu jeē vijna cácuu i sandihí, ichi yúcuan nduu i nuū. Te sava ñayuu jeē vijna cácuu i nuū, ichi yúcuan nduu i sandihí. Achí yá.

Jeē ní cucuñhyá ni yā síquī ñayuu ñuu Jerusalén

(Mt. 23.37-39)

³¹ Te máa quiṽi un ní quecoo jecu tēe fariseo, te ni cacahān de jíin yá:

Cujiyo ní quihīn ní inga lado, chí cúní Herodes cahni de níhín, áchí de.

³² Te ni cahān yā:

Cuángoo te castūhun ró nuū tēe mañoso un jéé ná tu jinū quiṽi cuu rī, chí vijna jíin sájnē quenehen ri tachí ini ñayuu, te nasávāha ri ñayuu cácuu. Te isá te jínu jniñu sáha ri, achi rō. ³³ Chí cánuú jéé cáca ri quihīn rī vijna jíin sájnē jíin isá, te jinū rī Jerusalén. Chí tēe cánacani jñūhun Yaā Dios, tu cájihí de inga lado, chí máa-ni ini ñuu Jerusalén cájehni i de. Achí yá.

³⁴ 'Rohó ñuu Jerusalén, jéhnū rō tēe cánacani jñūhun Yaā Dios, te jéhe ró yūu xinī tēe tájí Yaā Dios véjicoo nuū rō. Te cuehē jínu ni cuni rī nastútú rí sēhe ró, nájñūhun ndují jéē nastútú tí sēhe tí chíji ndijēn tí, te tu ní cúní rō. ³⁵ Núu súcuan te vijna te stóo uun na ri rohó jíin sēhe ró. Te cáhān rī jíin ró jéē ndé vijna te ma cóto cuiti gā rō nuū rī, chí nde quiṽi jeē cahān sēhe ró: Yōhyo váha Yaā cúu Yaā véndiji jíin jniñu máa Jítoho yō Yaā Dios, achi i. Achí yá.

Jeē ní nasávāha ya ñn tēe cúhú cuehyí cuiñi

14

¹ Te ñn quiṽi ndétātu ní jehēn yā vehe ñn tēe fariseo cujéhnū, ni jecaji yā staā jíin de. Te tāca gá tēe fariseo cájito yuhu de ya

núu stívi yá. ² Te yūcuan íne ñn tēe cūhú de cuehyī cuiñi, índichi de nuū yā. ³ Te ni cajnūhun yá tēe cástéén tutu ley Yaā Dios jíin táca tēe fariseo:

¿A íyó ley jeē nasávāha ri ñayuu cácuñi quivī ndétātu, chí tuú? áchí yá.

⁴ Te máá de tu ní cácahān cuiñi de. Te ni jñi ya tēe cūhú un, te ni nasávāha ya de, te ni cahān yā jeē na núhun de vehe de. ⁵ Te ni cahān yā jíin de jíjnāhan de:

¿Ndé ñn róhó núu burro ró chí stíquī rō ñingava ti ini pozo, te á tu yachī natava rō tī vēsú quivī ndétātu cúu, chí naún? Achí yá.

⁶ Te tu ní cúu stío cuiñi de ni ñn jñūhun nuū yā jeē súcuan ni cahān yā.

Jñūhun síquī ñayuu jéngoo vico

⁷ Te ni jito Jesús jeē tēe ni cataca ún, cánacāji de silla yññúhún gá nuū mesa cucōo de. Te ni cahān yā jñūhun yáha jíin de:

⁸ Núu ñn tēe cana de jeē quihín rō ñn vico nándāha, te ma cucōo ró lugar nuū yññúhún gá. Chi núu súcuan te sanaa te je ni cana de ñn tēe cújéñnu ga vēsú rohó. ⁹ Te quee tēe ni cana róhó, te cahān de jíin ró: Ndonga, te na cucōo tēe yáha jíin. Yūcuán na te cucanu rō jeē quihín rō cucōo ró ndé sandíhi na. ¹⁰ Chi sa suhva núu ni cana ñn tēe róhó, te cucōo ró ndé lugar sandíhi na. Te núu quee tēe ni cana róhó, te cahān de jíin ró: Amigo, nehen cucōo ró ñn lugar nuū yññúhún gá, achí de. Yūcuán na te ñayuu cáyūcu mesa jíin ró coto i jeē sajeñnu de róhó. ¹¹ Súcuan ni cahān rī jñūhun yáha návāha cuni rō jeē táca ñayuu jeē sajeñnu i máá i, nuu i sáha Yaā Dios. Te ñayuu jeē snūū i máá i, ndujéñnu i sáha ya. Achí yá.

¹² Te suni ni cahān yā jíin tēe ni cana ya yéji yā staā:

Núu sáha ró ñn vico cúsámá chí jéē cuxíni, te ma cána ró ñayuu cácuu amigo rō, jíin ñani rō, jíin jñāhan ró, jíin ñayuu cucá. Chi núu súcuan te suni máá i nacana i róhó, te súcuan nanihín rō jeē ni jéhe ró. ¹³ Chi sa suhva núu sáha ró vico, te cana ró ñayuu ndahú, ñayuu cuhndú, ñayuu chacuá, jíin ñayuu cuaá. ¹⁴ Te súcuan te quendōo ndetū rō, chí ma cúu nacuāha i nuū rō. Te nihín rō tahū rō quivī nátecu ñayuu ndaā, achí yá.

Jñūhun yátá síquī vico cúxíni

¹⁵ Te ñn tēe yéji staā jíin yá, ni jini de jñūhun yáha, te ni cahān de jíin yá:

Yōhyo ndetū ñayuu jeē cáji staā nde ñuu nuū ndácu Yaā Dios jñiñu, áchí de.

¹⁶ Yūcuán na te ni cahān Jesús ñn jñūhun yátá jéē steén yā jeē cána Yaā Dios ñayuu quivícoo i ñuu nuū ndácu ya jñiñu:

Ñn tēe ni sáha de ñn vico cáhnu cuxíni, te ni tají de mozo ni cana cuehē ñayuu.

¹⁷ Te máá quiví cuxíni, te ni tají de mozo de cuacana ñayuu jeē quíjicoo caji staā: Nehen ní jíjnāhan ní, chí je íyó túhva ndihi, áchí mozo. ¹⁸ Te ndihi i ni cacahān i jeē na cóne cáhnu ni de chí ma quíngoo i. ñn tēe ni cahān de: Sáá ní jeen ri ñn ñuhun te cánuú quícondēhe rí, te na cóne cáhnu ni de chí ma jeé rī. Achí de. ¹⁹ Te inga de ni cahān: Ni jeen ri uhūn yunta stíquī, te quihín rī coto ndee rī tī, te na cóne cáhnu ni de nuū rī chí ma jeé rī, achí de. ²⁰ Te inga de ni cahān de: Sáá ní quijnāhan ri, te jeē yūcuan ma cúu jeé rī, achí de. ²¹ Te cuanuhun mozo un, te ni castūhún de nuū patrón de ndese ni cacahān ñayuu. Yūcuán na te ni quití ni patrón, te ni cahān de jíin mozo de: Yachī quihín rō táca calle náhnu jíin calle lulí, te cana ró ñayuu ndahú, ñayuu cuhndú, ñayuu chacuá, jíin ñayuu cuaá, na quíjicoo i vico, áchí de. ²² Te ni jehēn mozo, te ni ndee de, te ni cahān de jíin patrón de: Je ni sáha ná jéē ni cahān ní, te cúmanī gā ñayuu te chitú vehe ní, áchí de. ²³ Te ni cahān tucu patrón: Quihín tucu ró táca calle jíin ichi, te cana fuerza rō ñayuu na quíjicoo i, návāha chitú vehe ri. ²⁴ Chi cáhán rī jíin ró jeē ní ñn tēe ni cana ri xihna ñúhún, ma cuáha cuiñi rī jñūhun jeē cuxíni de vehe ri, achí de. Achí yá.

Jñūhun jeē cánuú nacani vāha ni yō te condiquín yō Cristo

²⁵ Te cuehē ndasí ñayuu cándiquín i Jesús cuangoo i jíin yá, te ni ndió cóto ya nuū i, te ni cahān yā jíin i:

²⁶ Núu na-ni ñayuu cuní condiquín ruhū, te núu manī gā i jíin tátá i, náná i, ñasihí i, sēhe i, ñani i, cuāha i, vēsú jíin rúhū, ma cúu cuu i ñayuu scuáha jíin rí. Te núu ndíhví gā ni i síquī jeē cóo vāha máá i vēsú jeē cóndiquín i ruhū, te suni ma cúu tucu. ²⁷ Te na-ni ñayuu núu tu jéhe i jñūhun

ndoho i jnūndóho vēsú nde cuu i jeē síquī jeē cóndiquīn i ruhū, te ma cúu cuu i ñayuu scuáha jíin rí. ²⁸ Chi núu ndé ñn ró cúní ró sáha ró ñn vehe cáhnu, ¿á tu cánuú jéē xíhna gā cucōo ró te tava ró cuenta núu canda xūhun jéē sínu ró? ²⁹ Chi núu tuú, te núu je ni jequin ró cimientu, te tu cánda xūhun ró sínu ró, yūcuán na te tāca ñayuu sácatā i coto i róhó. ³⁰ Te cahān i: Tēe yáha ní quejéé de sáha de vehe, te tu ní cánda de sínu de, achi i. ³¹ Te suni súcuan núu ñn rey quihīn de cuajnáhan de jíin inga rey jeē véji síquī de, ¿á tu cánuú jéē xíhna gā cucōo de te nacani ni de núu canda uxī mil soldado jeē cuajnáhan de jíin inga rey jeē véji síquī de jíin ócō mil soldado? ³² Chi núu tú canda de, te níni jíca gá véji inga rey, te tají de tēe cándiso jníñu, cajnūhún de na vé cuní inga rey jeē cuáha de nuū, te jecuiñi-ni. ³³ Te máa ró jijnáhan ró, suni súcuan cánuú jéē xíhna gā nacani ni ró cahnde ni ró stóo ró ndihí jeē névaha ró, chi núu tuú te ma cúu cuu ró ñayuu scuáha jíin rí.

Jnūhun yátá síquī ññ
(Mt. 5.13; Mr. 9.50)

³⁴ Te ñayuu cácuu i nájñūhun ññ. Vāha íyó ññ, te núu ññ ún na náa jeē uhvuá, ¿te ndese nduu uhvuá tucu? ³⁵ Tuá cuajníñu cuiñi, ni jeē chúhun ñayuu nuū itu, ni jeē ndúu jēhen, chi máa cate ññ-ni i. Tāca róhó jéē jíni sōho, na chúsóhó ró. Achi yá.

Jnūhun yátá síquī lanchi ní sana
(Mt. 18.10-14)

15

¹ Te tāca tēe cástútú xūhun renta jíin táca gá tēe cásaha cuēchi, ni quecoo de nuū Jesús jeē cuni sōho de jñūhun cáhān yā. ² Te tāca tēe grupo fariseo jíin tēe cástéén tutu ley Yaā Dios, ni cacahān de síquī yā:

Tēe yáha jétáhú de tāca tēe cásaha cuēchi te véji de jíin, áchí de.

³ Te ni cahān yā jñūhun yátá yáha jíin de:

⁴ ¿Ndé ñn ró núu névaha ró ñn ciento lanchi, te núu scuíta ró ñn tñ, te á tu stóo ró cúñ xico xahūn cuñ gā tñ yucu, te quinanducú ró quiñi ní sana ún ndé nanihīn ró tñ?

⁵ Te núu ni nanihīn ró tñ, te coso sūcun ró tñ, te cusñ ni ró. ⁶ Te núu ni ndee ró vehe ró, te nastútú ró tācá amigo ró jíin ñayuu yúcu

yajni jíin ró, te cahān ró jíin i: Na cúsiñ ni yō, chi ni nanihīn rī lanchi ri jeē ní sana. Achi ró. ⁷ Te cáhān rī jíin ró jeē suni súcuan cúu nde andiví. Chi cúsiñ gā ni yā jíin ñn ñayuu iyó cuēchi núu nacani ni i jeē stóo i cuēchi i, vēsú jíin cúñ xico xahūn cuñ ñayuu iyó ndáa jeē tuá jíni ññhún nacani ni i.

Jnūhun yátá síquī ññahan ní scuíta xūhún

⁸ Te núu ñn ññahan névaha ña uxī peso cāa, te núu scuíta ña ñn, ¿á tu nastññ ña lámpara te nastāa ña vehe, te nanducú yúcun ña nde nanihīn ña? ⁹ Te núu ni nanihīn ña, te nastútú ña tācá amiga ña jíin ñayuu yúcu yajni jíin ña, te cahān ña jíin i: Na cúsiñ ni yō, chi ni nanihīn rī xūhun jéē ni scuíta ri. Achi ña. ¹⁰ Te cáhān rī jíin ró jeē suni súcuan cúsiñ ni tācá ndajéhé Yaā Dios síquī ñn ñayuu iyó cuēchi núu nacani ni i jeē stóo i cuēchi i. Achi yá.

Jnūhun yátá síquī sūchi ní jéhēñ jecó

¹¹ Te ni cahān gā yā:

ññ tēe ni ñyo uū sēhe yí de. ¹² Te tēe suchí gá ni cahān i jíin tátá i: Tátā, tahu sáva ní ndajníñu ní, te cuāha ní sava cuu tahū ná, áchí i. Te ni tahu sáva de tahū ndindúú i. ¹³ Te ni cuu jecu-ni quiñi, te tēe suchí gá un ní stutú ndihí i ndajníñu i. Te ni quenda i cuahān i ñn ñnu jíca. Te yūcuan ní snāa i tahū i, chi ni jexīn cáhá i. ¹⁴ Te ná ni ndihí ni jexīn i, te ni quee ñn jnamā xeén ini ñnu ún, te ni quejéé cúmanī jeē cáji i. ¹⁵ Yūcuán na te cuanducú jníñu i nuū ñn tēe ñnu ún. Te ni tají de i cuahān i rancho de jeē cóto i quiñi de. ¹⁶ Te cúní i caji i vēsú soō ndúchi jeē cáyeji quiñi ún, návaha ndutú chíji i. Te ni ñn ñayuu tú na vé jéhe nuū i. ¹⁷ Yūcuán na te ni quejéé i nácani ni i: Tāca mozo casáññu vehe tátá rī, íyó cuéhē staā cáyeji i. Te ruhū chi jíi rī sōco yāhá. ¹⁸ Na quiñuhun rī nuū tatá rī, te cahān rī jíin de: Tátā, ni sáha ná cuēchi nuū Yaā Dios jíin núu máa ní. ¹⁹ Vijna te nasūu gá tēe vāha cúu ná jéé cónani ná sēhe ní. Te cuāha ní jñūhun cuu ná nájñūhun ñn mozo ni, achi rī. ²⁰ Yūcuán na te ni naquihin i ichi cuanuhun i vehe tátá i.

Te níni jíca gá véji i, te ni jito tátá i nuū i, te ni cundáhú ni de i. Te jínu de cuajnahān de i, te ni nundee de sucūn i, te ni techūhú de i. ²¹ Yūcuán na te ni cahān i jíin de: Tátā,

ni sáha ná cuéchi nuū Yaā Dios jíin núū maá ní. Vijna te nasūu gá tēe vāha cúu ná jēe cónaní ná sēhe ní. Achí i. ²² Te máá tátá i chi sa ni cahān de jíin táca mozo de: Cuáquihin sahma váha ga te chuhun ró i. Te chuhun ró ñn xehyu ndaha i, te chihi ró ndíjēn jehē i. ²³ Te quiquihin ró becerro xēhen, te cahni rō tī na cáji yō, chi sáha yó vico. ²⁴ Chi sēhe yí rí yáha, nájñuhun je ni jihī i, te ni natecu i. Chi tu ní jíin rī ndé chi ní jéhēn i, te ni ndee i, achí de. Te ni caquejéé de cásáha de vico.

²⁵ Te sūchi jévāha, íne i nde rancho, te vëndiji i, te ni cuyajni i yatā véhe. Te ni jini i jeē cúu yaa te cájita jéhé ñáyuu. ²⁶ Te ni cana i ñn mozo, te ni cajñuhún i na vé cúu jeē cúu. ²⁷ Te ni cachi mozo un núū i: Ni ndee ñani rō, te tátá rō ni jehni de becerro xēhen, chi ni ndee vāha i nuū de, achí mozo. ²⁸ Yūcuán na te ni quiñi ni sūchi jévāha, te tu ní cúni i ndívi i. Te ni quenda tátá i, te ni cahān ndahú de jíin i jeē na ndívi i. ²⁹ Te ni cahān i jíin tátá i: Níní sáha ná jniñu ndácu ní, te tu cúniñni cuñi ni na núū ní. Te tu jéhe ní vēsú ñn lítú núū ná, jeē sáha ná vico caji na jíin táca amigo na. ³⁰ Te ni ndee sēhe ní yáha jeē ni jéxīn cāhá i xūhun ní jíin táca ñahan. Te ni jehni ní becerro xēhen caji i, achí i jíin tátá i. ³¹ Yūcuán na te ni cahān de jíin i: Séhē, róhó chi níni ndéé ró jíin rí, te ndíhi jeē névāha ri chi suni cuenta maá ró cúu. ³² Te vijna chi íyó váha jeē sáha yó vico te cusñi ni yō. Chi ñani rō yāhá, nájñuhun ni jihī i, te ni natecu i. Chi tu ní jíin yō ndé chi ní jéhēn i, te ni ndee i, achí de. Achí yá.

Jñuhun yátá síquī mozo jeē ni stáhú de patrón de

16

¹ Te suni ni cahān Jesús jíin tēe cáscuáha jíin yá:

Ñn tēe cúca ní ñyo ñn mozo de jeē ndíso jniñu nuū táca gá mozo. Te ni cacahān jíin patrón un jēe mozo un snāā cāhá ndajniñu de. ² Te ni cana de mozo un, te ni cahān de jíin: ¿Na jñuhun cúu yáha jēe nihín rī síquī rō? Nacuāha cuenta jniñu ndíso ró, chi ma cóndiso jniñu ga rō nuū mozo rī. Achí de. ³ Yūcuán na te jéni ni maá de: ¿Ndese sáha ri vijna? Chi patrón rī quenehen de jniñu ri. Te tú ndacuī rī jeē cáte ri ñuhun, te jeē

cacán rī caridad chi cúcanu rī. ⁴ Núu súcuan te jíin rī ñn jeē sáha ri, návāha ñayuu cájeen nuū patrón rī, cuāha i vehe condee rī núu na quée quiñi jeē quenehen de jniñu ri. ⁵ Te ni cana de ná ñn ná ñn tēe jeē cátaū nuū patrón de. Te ni cajñuhún de ñn: ¿Nasaa táu rō nuū patrón rī? ⁶ Te ni cahān tēe ún: ñn ciento barril aceite, achí de. Te ni cahān mozo un: Yāhá na cuáha ri lista rō, te cucōo yachī rō, te na sáha ró ñnga lista jeē uú xico uxī na, achí de. ⁷ Yūcuán na te ni cajñuhún de ñnga tēe: Te róhó, ¿nasaa táu rō? Te tēe un ní cahān de: ñn ciento cajón trigo, achí de. Te ni cahān de jíin tēe ún: Yāhá na cuáha ri lista rō, te na sáha ró ñnga lista jeē cuún xico na, achí de. ⁸ Yūcuán na te patrón ni cahān de: Nacā jeē ndichí ní sáha tēe cúnéé un, achí de. Te cáhán rī jíin ró jeē ñáyuu ñayívi yáha, ndíchi gá casáha i jeē quendōo vāha i nuū jnáhan i, vēsú ñayuu cá candije nuū Yaā Dios.

⁹ Núu súcuan te cáhán rī jíin ró jeē ndichí gá na sáha ró vēsú jeē ni sáha mozo ndichí un. Chi ini ñayívi yáha nuū yíhi cuéchi, na sáha ró jniñu váha jíin xūhun ró, cuāha ró núu ñáyuu ndahú, návāha vēsú núu ni ndíhi xūhun ró ñayívi yáha, te quiñi coo ró andívi núu coo vehe ró ní cáni.

¹⁰ Tēe jeē squícu vāha jíin ñn jniñu lúli-ni, suni squícu vāha de jíin jniñu cáhnu. Te tēe jeē stáhú jíin ñn jniñu lúli-ni, suni stáhú de jíin jniñu cáhnu. ¹¹ Núu súcuan te núu tu squícu vāha ró jíin xūhun jeē íyó ñayívi yáha nuū yíhi cuéchi, te ma cuáha ya jeē váha cuu ró ní cáni andívi. ¹² Te núu tu squícu vāha ró jíin ndajniñu jeē ni jéhe núu ya nuū rō ñayívi yáha, te ma cuáha ya tahū cuu ró ní cáni.

¹³ Ni ñn mozo ma cúu cuajniñu de nuū uñ patrón. Chi quiñi ni de nuū ñn te coo maní de jíin ñnga, chí squícu vāha de nuū ñn te sájéé ni de nuū ñnga. Te suni súcuan ma cúu cuajniñu ró núu Yaā Dios te núu máni síquī xūhun ndíhví ni rō, achí yá.

¹⁴ Te tēe fariseo ni casacatā de nuū yā jeē ní cajini de táca jñuhun cáhán yā, chi tēe cútóo xūhun cácuu de. ¹⁵ Te ni cahān yā jíin de:

Máá ró cásáha ró jēe tēe ndaā cácuu ró núu ñáyuu. Te Yaā Dios chi jíin yā ndese cáa ini anuá rō. Chi jniñu cájeni ni ñayuu jeē

jniñu jéhnú cúu, te nuū Yaā Dios chi jniñu néé cúu.

Siquē ley Yaā Dios jiín síquē jeē ndácu ya jniñu

¹⁶ Nde ná tu quiji Juan tēe scuándute, te ni iyo ley jeē ni jéhe Yaā Dios nuū Moisés, te suni ni castéén tāca tēe cánacani jnūhun ya. Yūcuán na te ná ni quiji Juan, te ni quejéé jítē núu jnūhun vāha ndese ndácu Yaā Dios jniñu. Te tāca ñáyuu nducú ndéyí i quívicoo i ndaha ya.

¹⁷ Te yí gá cúu jeē náā ñn letra nuū tútu ley yā vēsú jeē náā andiví jiín ñáyiví, chi squícu ndihí jnūhun cáhán.

Siquē jeē ma stóo jnāhan tēe jiín ñahan (Mt. 19.1-12; Mr. 10.1-12)

¹⁸ Núu ñn tēe stóo de ñasihí de te qui-jnāhan de jiín inga ñahan, núu súcuan te cásiquí ndéē de ña. Te núu ñn tēe condeca de ñahan ní ndusñn, suni cásiquí ndéē de ña, áchí yá.

Jnūhun tēe cúcá jiín Lázaro

¹⁹ Te ni cahān gā yā:

Ni iyo ñn tēe cúcá, ní ñn hun de sahma lúu váha ndasí. Te ndiquiví ni iyo vāha ndasí jéé ní yeji de. ²⁰ Te suni ni iyo ñn tēe ndáhú, nání de Lázaro, néne de yéhyí tēe cúcá un, te ní cáhnu de íin ndíhyí. ²¹ Te máni cúni de jeē ndutú chíji de jiín stáā cuēchi jeē stívi tēe cúcá un. Te quécoo ina te cánayuu ti nuū ndíhyí de. ²² Te ni jihí tēe ndáhú un, te tācá ndajéhé Yaā Dios cuango ya jiín ánuá de nde andiví nuū néne Abraham. Te suni ni jihí tēe cúcá un, te ni quindūji de. ²³ Te tēe cúcá un xeēn ndóho de íne de lugar nuū cáyūcu ndíyí tu ní cándíje. Te ni ndacoto de, te nde jicá ní jito de nuū Abraham, te néne Lázaro jiín de. ²⁴ Yūcuán na te ni cana cóhó de: Tātā Abraham, cundáhú ni ní sáña, te tají ní Lázaro, na quíchundaji de xiní ndáha de nuū ndúte, te quiji de stáji de yáá ná. Chi xeēn ndóho ná núu yáñuhūn yāhá. Achí de. ²⁵ Te ni cahān Abraham jiín de: Séhē, nucūhun ni rō jeē ni níhīn rō ndihí jeē váha ná ni cotecu rō, te Lázaro chi sa suhva jnūndóho ni nihīn de. Te vijna je ni ndusñ ni de yāhá, te rōhó chi ndóho rō jíñā. ²⁶ Te suni íyó ñn jeē cunú téyí, íne mēñu yó jijnāhan yó. Te ñayuu cáhīn yāhá, vēsú

cácuni i yāha i jeē i nuū rō, te ma cúu. Te ni ma cúu yāha máá ró quijicoo ró yāha. Achí Abraham. ²⁷ Yūcuán na te ni cahān tēe cúcá: Núu súcuan te cáhān ndahú ná jiín ní, Tātā Abraham, tají ní Lázaro na quíhīn de vehe tātá na. ²⁸ Chi íyó úhūn gā ñani ná, te na quícachi de nuū i jeē na nácani ni i te stóo i cuēchi i, návāha ma quívicoo i nuū ndóho ná yāha, áchí de. ²⁹ Te ni cahān Abraham jiín de: Je cánevāha i tutu jeē ní tee Moisés jiín tāca tēe ni canacani jnūhun Yaā Dios. Suu yūcuán na chúhun ni i, áchí Abraham. ³⁰ Te ni cahān tucu tēe cúcá: Vēsú súcuan, Tātā Abraham, te núu ñn ñayuu ni jihí quihīn nuū i, yūcuán na te nacani ni i jeē stóo i cuēchi i, áchí de. ³¹ Te ni cahān Abraham jiín de: Núu tu chúhun ni i jnūhun ni nacani Moisés jiín tāca tēe ni canacani jnūhun Yaā Dios, suni ma candíje cuiñi i núu natecu ñn ndíyí quihīn nuū i, áchí de.

Xeēn coo síquē ñáyuu squíví jnāhan nuū cuéchi (Mt. 18.6-7, 21-22; Mr. 9.42)

17

¹ Te ni cahān Jesús jiín tēe cáscuáha jiín yá: Máni íyó jéē nducú squíví ñayuu nuū cuéchi. Te nacā xeēn ndoho ñayuu jeē squíví jnāhan nuū cuéchi. ² Vāha ga núu ni conuhnī ñn yōso cáhnu sucūn i te quēe i chíji ndute mar, vēsú jeē squíví i ñn sūchi lúli yāha núu cuéchi. ³ Coto ma sáha ró súcuan jijnāhan ró.

Te núu jnāhan ró sáha de cuēchi síquē rō, te cahān rō nuū de. Te núu nacani ni de, te cone cáhnu ni rō nuū de. ⁴ Te núu uxā jínu jeē ñn quiví sáha de cuēchi síquē rō, te núu uxā jínu nácani ni de te cahān de jiín ró jeē cone cáhnu ni rō chi ma sáha ga de, te cánuú cone cáhnu ni rō nuū de. Achí yá.

Jeē yóhyo cújéhnú jnūhun cándíje

⁵ Te tēe cácuu apóstol ni cacahān de jiín Jítóho yō:

Sáha ní jéē níhin ga candíje ná jéē sáha Yaā Dios jeē cájicān na núu yā, achí de.

⁶ Te ni cahān maá Jítóho yō jiín de:

Núu cácandíje ró vēsú ñn tíhlí-ni, nájnūhun ñn ndiquin mostaza jeē tíhlí-ni cáa, te cuu cahān rō jeē nūyūhndu yāha na quénda te nucondichi nde nuū mar, te coo nájnūhun cahān rō.

Jeē cánuú squícu vāha yó núu yā

⁷ 'Ndé ñn ró íyó mozo rō jeē jítu de chí ndíto de quií ndéca ró, te núu ni najinū de vehe ró, te tu cáhán rō jíin de jeē cúcōo de caji de staā. ⁸ Chi sa suhva cáhán rō: Sáha ró ndeyu cuxíni ri, te caní ró cóhō rī. Te núu ni cuu ni yeji rī ni jihí ri, yūcuán na te caji maá ró coho ró, cácahān rō. ⁹ Te cácahān rō jeē tu cánuú nacuatáhú ró nuū mozo núu ni sáha de jniñu ní ndacu ró, chí jeē cánuú sáha de cúu. ¹⁰ Te suni súcuan máá ró jijnáhan ró, cácuu ró mozo Yaā Dios. Te núu ni casquícu ró táca jniñu ní ndacu ya nuū rō, te cahān rō: Tu cánuú nacuatáhú yá nuū rī, chí ni sáha ri máá-ni jeē cánuú sáha ri, achi rō. Achí yá.

Jeē ní nasávāha ya uxī tēe ndóho cuehyī stehyú

¹¹ Te jíca Jesús ichi cuahān yā ñuu Jerusalén, te ni yāha ya cuahān yā mēhñū región Samaria jíin Galilea. ¹² Te ni jinū yā ñn ñuu, te uxī tēe ndóho cuehyī stehyú ni quendacoo de vejnahan de ya, te jíca ní cajecuiñī de. ¹³ Te ni cacana jee de:

Jesús, Maestro, cundáhú ni ni sáña, áchí de jíjnáhan de.

¹⁴ Te ni jito Jesús nuū de, te ni cahān yā jíin de:

Cuángoo te stéén rō maá ró nuū tāca sútū jeē ní canduvāha ró, áchí yá.

Te níni cuángoo de te ni canduvāha-ni de. ¹⁵ Yūcuán na te ñn-ni de ni nandió cóo de nuū Jesús, te cáhán jee de, nácuatáhú de nuū Yaā Dios jeē ní nduvāha de. ¹⁶ Te ni jecuiñī yití de nuū yā, te ni jequin de nuū de nde nuū ñúhun, te ni nacuatáhú de nuū yā. Te tēe Samaria cúu de. ¹⁷ Te ni cahān Jesús:

¿A násūú ndihúxí de ni canduvāha? Te ñn gā de, ¿naun tu ní cánandicó de nacuatáhú de? ¹⁸ ¿A máñúhún-ni tēe ñuu jíca yáha cúu jeē ní nandicó de nácuatáhú de nuū Yaā Dios?

¹⁹ Te ni cahān yā jíin tēe ún:

Ndocuiñī quinhun rō. Chí ni candíje ró jēe cuu nasávāha ri rohó, te jeē yúcuan ní nduvāha ró, áchí yá.

Ndese coo quiíve jeē ndíji ya ndacu ya jniñu (Mt. 24.23-28, 36-41)

²⁰ Te tēe fariseo ni cacajnūhún de Jesús ndé quiíve quejéé jeē ndácu Yaā Dios jniñu ini ñayíve. Te ni cahān yā jíin de:

Ma quéé ndijin jeē ndácu Yaā Dios jniñu. ²¹ Ni ma cúu cahān ñayuu: Yāha íne ya ndácu ya jniñu, chí: Yūcuan íne ya, achi i. Chí je ndácu Yaā Dios jniñu mēhñu ró jijnáhan ró. Achí yá.

²² Yūcuán na te ni cahān yā jíin tēe cáscuáha jíin yá:

Quee tiempo jeē yóhyo cúu ni rō coto ró jēe ndiji ruhū, Yaā ní nduu tēe, te ma cóto ró jíjnáhan ró. ²³ Te cahān ñayuu jíin ró: Yāha íne ya, chí: Yūcuan íne ya, achi i. Te ma quíngoo ró condēhe ró, ni ma cóndiquín rō i. ²⁴ Chí nájnūhun sáha taja jeē ndíndéé ñn lado andíve te cundijin nde ñnga lado, suni súcuan cuu quiíve ndíji ruhū, Yaā ní nduu tēe, chí ndihí ñayuu coto. ²⁵ Te jíni ñúhún jēe xíhna gā ndóho xeén rī, te ñayuu iyó vijna, squéhichí i ruhū. ²⁶ Chí nájnūhun ni cuu quiíve ni íyo Noé, suni súcuan cuu quiíve ndíji ruhū, Yaā ní nduu tēe. ²⁷ Chí quiíve un ní cayeji i, ni cajihí i, ni canandāha i, ni cajēhe i sēhe sáhí i jeē nándāha, nde ni jinū quiíve jeē ni quiíve Noé ini barco cáhnu jeē naní arca. Te ni cuun saū xeén, te ni ndaa ndute ni cajihí ndihí i. ²⁸ Te suni súcuan ni cuu quiíve ni íyo Lot. Ni cayeji i, ni cajihí i, ni cajeen i, ni caxícó i, ni cataji i itu, ni cajeni i vehe. ²⁹ Te quiíve jeē ní quenda Lot ini ñuu Sodoma cuahān de, te ni cuun ñuhún jíin azufre ichi ándíve, te ni snáa ndihí ñayuu. ³⁰ Te suni súcuan coo quiíve jeē ndíji ruhū, Yaā ní nduu tēe.

³¹ 'Te quiíve ún te ñayuu cáhīn yatā véhe, te ndajniñu i ñúhun ini vehe, cáhán rī jíin i jeē ma ndíve i naquihin i, chí cánuú cunu yachí i jeē cácu i. Te suni súcuan ñayuu casájniñu nuū ítu, ma quínuhun i vehe i jeē quíhin i ndajniñu i. ³² Te nucūhun ni rō ndese ni ndóho ñasihí Lot jeē ni jíhí ña. ³³ Te núu ndé ñáyuu cuní i cácu i nuū jnúndóho quiiji nuū i jeē siquí ruhū, núu súcuan te jnahnū ndetū i ní cáni. Te núu ndé ñáyuu, vésú na cúu i jeē siquí ruhū, te cotecu i ní cáni.

³⁴ 'Te cáhán rī jíin ró jeē quiíve ndíji ri te quiíxí uū tēe ñn jito jecuáa, te ñn de naquihin rī, te ñnga de ndóo, chí tu ní cándíje de.

³⁵ Te coo uū ñahan jeē ndíco cáhnu, te ñn ña

naquihin ri, te inga ña ndōo. ³⁶ Te uū tēe sájniñu de nuū itu, te ñin de naquihin ri, te inga de ndōo. Achí yá.

³⁷ Te jeē ní cajini de jñūhun yáha, te ni cacajñūhún de ya:

¿Ndé mí coo súcuan nájnūhun ni cahān ní? Achí de.

Te ni cahān yā jín de:

Nájnūhun jeē cutútú téji ndé-ni cúu nuū catú quiñi ní jíhī, suni súcuan coo tāca jéē ni cahān rī ndé-ni cúu-ni nuū cáhīyo ñayuu.

Jñūhun yátá síquī juez jín ñahan viuda

18

¹ Te ni cahān yā ñin jñūhun yátá jín de jeē cánuú jeē niní cácan tahu de, te ma ndínuu ni de jín. ² Te ni cahān yā:

Ni iyo ñin juez ini ñin ñuu. Te ni tu ndíso iyo de nuū Yaā Dios, ni tu yúhú de nuū ní ñin ñayuu. ³ Te suni ñuu un íyó ñin ñahan ní ndóo ndáhú. Te ñahan un jéhén-ni jéhén-ni ña nuū de, jícán ña jeē na sándaā de síquī ñin ñayuu jeē jító uhū i ña. ⁴ Te cuehē quiñi tu ní cúní de sándaā de, te yūcuán na te ni jeni ni de: Vēsú tu ndíso iyo ri nuū Yaā Dios, ni tu yúhú rí nuū ní ñin ñayuu, ⁵ te ñahan viuda yáha, yōhyo stáhān ña ruhū, te jeē yúcuan na sándaā rī síquī ñayuu jeē jító uhū i ña. Chi núu tuú, te quejéé rí jnanīnī ni rī jeē quiñi ña. Achí de. Achí máá Jítoho yō.

⁶ Te ni cahān gā yā:

Súcuan cúu jeē ni cahān juez, tēe tú ndaā. ⁷ Te Yaā Dios, nasūu súcuan cúu ya, chi sándaā yā síquī jñiñu ñayuu ní nacāji ya jeē nduú ñuú cácahān ndahú i jín yá. Chi jnama ya i nuū tāca jéē cájito uhū i. ¿Te á cuéé jnama ya i? ⁸ Cahān rī jín ró jeē yachī. Te quiñi ndíji ruhū, Yaā ní nduu tēe, ¿á níñin gā rī ñayuu cácañíje níñin ini ñayíñi? Achí yá.

Jñūhun yátá síquī tēe fariseo jín tēe stútú xúhun renta

⁹ Te suni ni cahān yā jñūhun yátá yáha jín jecu ñayuu jeē cájeni ni i jeē ñayuu ndaā cácuu i, te cájeni ni i jeē sava ga ñayuu tu cáhīyo ndaā:

¹⁰ ñin tēe fariseo cuahān de templo jeē cácan tahu de. Te ñin tēe stútú xúhun renta suni cuacacān tahu de templo. ¹¹ Te tēe fariseo, índichi de, te súcuan ni jicān tahu

de: Tátā Yaā Dios, na cútahū na núu ní, chi tu cúu ná nájnūhun cándaā sava ga tēe, tēe cuihná, tēe néé, tēe cásiquí ndéē jñahan cácuu de. Ni tu cúu ná nájnūhun cáa tēe yúcuan jeē stútú xúhun renta jeē scáa ga de jícán de nuū ñayuu. ¹² Te uū jínu jeē semana iyó ndite ni na núu ní, te jéhe ná nuū ní ñin ñin síquī tāca úxī ndajniñu níñin na, achí de. ¹³ Te tēe stútú xúhun renta, ni jecuñiñi jicá de nuū templo, ni tu ní chūndeyí ni de jeē ndonehen de nuū de, chi sa suhva ni caní de yíqui jicá de jeē cucuíhyá ni de. Te ni cahān de: Tátā Yaā Dios, cundáhú ni ní sáña, chi tēe íyó cuéchi cúu ná, achí de. ¹⁴ Te cáhān rī jín ró jeē tēe stútú xúhun renta, ni jetáhú Yaā Dios de, te cuanuhun de vehe de. Te tēe fariseo chi tu ní jétáhú yá de. Chi ñayuu jeē sajeñu i máá i, sa ndululí i. Te ñayuu jeē sálulí i máá i, sa ndujéñu i. Achí yá.

Jeē ni jicān tahu Jesús jehē sūchi lúlí (Mt. 19.13-15; Mr. 10.13-16)

¹⁵ Te ni quecoo ñayuu jín sūchi lúlí núu Jesús, jeē na sóo yá ndaha ya xiní i. Te tēe cáscuáha un ní cajini de jeē súcuan cúu, te ni cacahān de nuū ñayuu vējicoo jín i. ¹⁶ Te máá Jesús ni cana ya de, te ni cahān yā:

Cuāha jñūhun na quiñicoo sūchi lúlí jín ña nuū rī, te ma cási ró jeē quiñicoo i. Chi ñayuu jeē ndió cóo ni i caní ni i nájnūhun sūchi yáha, suu i quiñi ndaha Yaā Dios jeē ndacu ya jniñu nuū i. ¹⁷ Te jendaá cahān rī jín ró, núu ñin ñayuu tú cuatáhú i jeē ndácu Yaā Dios jniñu nuū i, nájnūhun jétáhú ñin sūchi lúlí, ma quiñi cuiñi i ndaha ya, achí yá.

Jñūhun tēe cúca (Mt. 19.16-30; Mr. 10.17-31)

¹⁸ Te ñin tēe cújéñu ni cajñūhún de ya:

Tēe vāha cúu ní Maestro. ¿Te na jniñu vāha sáha ná te níñin tahu na cotecu na ní caní andiví? Achí de.

¹⁹ Te ni cahān Jesús jín de:

¿Naun cáhān ró jeē tēe vāha cúu ri? Tú ni ñin tēe vāha íyó, chi máá ñin-ni Yaā Dios. ²⁰ Je jíní ró táca jniñu ní ndacu Yaā Dios: Ma cosíquí ndéē jñahan ró. Ma cáñni ró ndíyi. Ma sacuíhná ró. Ma sajnúhún ró. Cuatáhú ró nuū tatá ró nuū naná ró. Achí yá.

²¹ Te ni cahān maá de:

Tācá jniñu yáha je ni squícu ná ndé ná lulí ná, achí de.

²² Te Jesús ni jini ya jnūhun yáha, te ni cahān yā jíin de:

Īn na jniñu cúmanī sáha ró núu súcuan. Xícó ndihí jeē névāha ró, te cuāha ró núu ñáyuu ndahú. Te nde andiví cuāha ya jeē váha ndasí núu rō. Yūcuán na te quiji rō condiquīn rō ruhū, achí yá.

²³ Te ná ni jini sōho de jnūhun yáha, te yōhyo ni cucuíhyá ni de, chí cúcá ndasí de.

²⁴ Te jíto Jesús jeē súcuan cúcuíhyá ni de, te ni cahān yā:

Tēe cúcá chí yōhyo yí quívicoo de ndaha Yaā Dios jeē ndacu ya jniñu nuū de. ²⁵ Yachī gā yáha ĩn camello yaū yutícuí vēsú jeē quívi ĩn ñayuu cucá ndaha Yaā Dios jeē ndacu ya jniñu nuū i, achí yá.

²⁶ Te tēe ní cajini jnūhun yáha, ní cacahān de:

¿Ndé ñáyuu cúu jeē cácu núu súcuan? Achí de.

²⁷ Te ni cahān yā jíin de:

Ñayuu chí ma cúu squívi i máá i ndaha Yaā Dios, te máá yá chí cuu sáha ya, achí yá.

²⁸ Yūcuán na te ni cahān Pedro:

Sāña jíjnáhan ná ní castóo ná ndihí jeē cánevāha ná, te cándiquīn na níhín, achí de.

²⁹ Te máá yá ni cahān yā jíin de:

Jendaá cahán rī jíin ró jijnáhan ró, núu na-ni ñayuu stóo i vehe, chí tátá, chí ñani, chí ñasihí, chí séhe, jeē siquí jeē scáca i jnūhun jeē ndácu Yaā Dios jniñu nuū ñáyuu, ³⁰ núu súcuan te nanihīn cuehē gā i ini ñayívi yáha, te tiempo quiji te cotecu i ní cáni, achí yá.

Jeē ni cáhān tucu ya jeē cúu yā
(Mt. 20.17-19; Mr. 10.32-34)

³¹ Te ni cana sīn ya ndihúxí uū tēe cáscuáha jíin yá, te ni cahān yā jíin de:

Vijna je cuángoo yó ñuu Jerusalén. Te yūcuan squícu ndihí jnūhun ndese ndoho ruhū, Yaā ní nduu tēe, nájnūhun ni catee tēe ni canacani jnūhun Yaā Dios nde jenahán.

³² Chí ñayuu nastúu i ruhū nuū tēe nación Roma jeē cáyucú Jerusalén cándacu jniñu. Te tēe un sácata de nuū rī, te cahān neé de nuū rī, te tesihí de nuū rī. ³³ Te cani de ruhū, te sáa te cahni de ruhū. Te nuū uní quívi te natecu rī. Achí yá.

³⁴ Te máá de tu ní cájecūhun cuiti ni de tāca jnūhun yáha. Chí jnūhun yí cúu, te tu ní cúu jecūhun ni de jeē cahán yā.

Jeē ní nasávāha ya ĩn tēe cuáá ñuu Jericó
(Mt. 20.29-34; Mr. 10.46-52)

³⁵ Te ni cuyajni ya cuahān yā ñuu Jericó. Te ĩn tēe cuáá néne de yuhíchi, jícan de caridad. ³⁶ Te ni jini sōho de jeē yáha cuehē ñayuu cuangoo i, te ni cajnūhún de naun cuángoo i. ³⁷ Te ni cacahān i jíin de jeē Jesús, tēe ñuu Nazaret, yáha ya cuahān yā. ³⁸ Yūcuán na te ni cana jee de:

Jesús Sēhe yucūn David, cundáhú ni ni sáña, achí de.

³⁹ Te ñayuu cuangoo ichi núu yā, ni cacahān i nuū de jeē na cási de yuhu de. Te máá de víhyá gā ni cana jee de:

Máá ní jeē cúu ní Séhe yucūn David, cundáhú ni ni sáña víi, achí de.

⁴⁰ Yūcuán na te ni jecuíñi Jesús, te ni cahān yā jeē na quíndeca i de. Te nuū ní cuyajni de nuū yā, te ni cajnūhun yá de:

⁴¹ ¿Na vé cuní rō jeē sáha ri jíin ró? achí yá.

Te ni cahān de:

Jeē na ndúndijin tinūu ná cuní na, achí de.

⁴² Te ni cahān Jesús jíin de:

Ndundijin tinūu ró núu súcuan. Ni candíje ró jeē cuu nasávāha ri rohó, te jeē yucuan ní nduvāha ró, achí yá.

⁴³ Te ni ndundijin-ni tinūu de, te ni ndiquīn de ya, te nácuatáhú de nuū Yaā Dios. Te ndihí ñayuu jeē ní cajito i, suni ni cacahān i jeē yóhyo vāha Yaā cúu Yaā Dios.

Jnūhun Zaqueo

19

¹ Te ni quívi Jesús ini ñuu Jericó, te ni yáha-ni ya cuahān yā. ² Te yūcuan íyó ĩn tēe cúcá nání de Zaqueo, te cújénu de nuū tēe cástútú xūhun renta. ³ Te cuní de coto de návāha cuni de ndé ĩn cúu Jesús. Te tu ní cúu, chí cuehē ñayuu cuangoo i jíin yá, te ndiquí-ni cáa de. ⁴ Te jínu de ni cosnúu de. Te ni caa de xinī ĩn nuyūhndú návāha coto de nuū yā, chí yūcuan yáha ya quihīn yā. ⁵ Te ni jinū yā yūcuán, te ni ndacoto ndaa ya nuū de. Te ni cahān yā:

Zaqueo, yachī nuu ró, chí jíni ñūhún jéé ndóo ri vehe ró vijna, achí yá.

⁶ Yūcuán na te ni cusī ni de, te yachī ni nanuu de, te ni jeca de ya cuahān de jín yá vehe de. ⁷ Te ni cajito ñayuu jeē súcuan ni cuu, te ni cacahān i síquī yā jeē cuahán yā ndōo ya vehe in tēe sáha cuēchi. ⁸ Yūcuán na te ni ndocuñī Zaqueo, te ni cahān de jín máá Jítóho yō:

Vijna te sava ndihī ndajniñu ná chi cuāha ná núu ñáyuu ndahú. Te núu ni scáa ga na ní jicān na xúhun nuū ñáyuu, te nacuāha ná únī gā síquī naquihin i, áchí de.

⁹ Te ni cahān Jesús:

Vijna te vehe yáha je ni cācu in tēe jeē ma jnahnú ndetū de, chi ni candíje de nájñuhun ni candíje jí de Abraham. ¹⁰ Chi ruhū, Yaā ní nduu tēe, ni quiji ri nducú rí ñayuu jeē jnahnú ndetū, te jnama ri i, áchí yá.

Jñuhun yátá síquī uxī mozo jín xúhun

¹¹ Te nuū ñáyuu ní cajini tāca jñuhun yáha, ní cahān gā Jesús in jñuhun yátá jéē steén yā ndese coo quiñī ndíji ya. Chi je ni cuyajni ya ñuu Jerusalén, te cájeni ni i jeē víjna ñúhún quejéé jéē ndácu ya jniñu sáha Yaā Dios. ¹² Te ni cahān yā:

In tēe cújéhnū cuahān jicá de inga nación, návāha nihīn jniñu de cuu de rey, te ndiji de ndacu de jniñu. ¹³ Te nde ná tu quihīn de, te ni cana de uxī mozo de, te nuū in in i ni jéhe de in xúhun jéē ndeé yahu ndasí. Te ni cahān de jín i: Sájniñu ró jéē na ndúcuehē xúhun yáha jínáhan ró níni jéē quihín rī te ndee rī, áchí de. ¹⁴ Te ñayuu nación de cáquiñī ni i nuū de, te ni catajī i jecu tēe cándiso jniñu cuangoo yatā de jeē cahān: Tu cánujnahan ni ñayuu nación na jéē cuáha ní jniñu nuū tēe yáha jéē cuu de rey nuū i, áchí. ¹⁵ Te vésú súcuan te ni nihīn jniñu de cuu de rey, te vendiji de nación de. Te nuū ní ndee de, te ni ndacu de jniñu jeē na quíjicoo mozo jeē ni jéhe de xúhun núu, návāha na cúni de nasaa ni canihīn in in i síquī. ¹⁶ Te ni quee in mozo un núu de, te ni cahān i: In xúhun jéē ni jéhe ní núu ná, ni nduu uxī, áchí i. ¹⁷ Te ni cahān maá rey: Vāha mozo cúu ró, te vāha ni sáha ró. Chi ni squícu vāha ró jín in jniñu lúlí-ni, te vijna te sáha ri jeē cújéhnū ró ndacu ró jniñu nuū uxí ñuu jñí ri, áchí de. ¹⁸ Te ni quee inga mozo, te ni cahān i: In xúhun jéē ni jéhe ní núu ná, ni nduu uhūn, áchí i. ¹⁹ Te suni

ni cahān de jín mozo un: Róhó, cújéhnū ró ndacu ró jniñu nuū uhūn ñuu jñí ri, áchí de. ²⁰ Te ni quee inga mozo, ni cahān i: Yāha návāha ná xúhun ní, chi ni chuvāha ná iní in pañuelo. ²¹ Chi ni yūhu ná nihín, chi tēe xeēn cúu ní. Chi cuehē gā nándacān ní vésú jeē ni jéhe ní, te cuehē gā cuní ni vésú jeē cúu sáha mozo ni, áchí de. ²² Yūcuán na te ni cahān rey: Mozo neé cúu ró núu súcuan, te jín jñuhun ni cahān rō te sándaā rī jeē iyó cuéchi ró jéē tu ní sájniñu ró jín xúhun rí. Chi jéni ni rō jeē tēe xeēn cúu ri, te cuehē gā nándacān rī vésú jeē ni jéhe ri, te cuehē gā cuní rī vésú jeē cúu sáha mozo rī. ²³ Núu súcuan ¿te naun tu ní chúne ró xúhun rí vésú nuū banco? Te jeē ní ndee rī te naquihin ri xúhun rí nde jín séhe xúhun núu. Achí de. ²⁴ Te ni cahān de jín ñáyuu cáhīn yūcuán: Quende xúhun jíñā nuū i, te cuāha ró núu mozo jeē névāha uxī, áchí de. ²⁵ Te ñayuu un ní cacahān i jín de: Te ndese, chí je névāha de uxī, áchí i. ²⁶ Te ni cahān tucu rey: Cáhan rī jín ró jeē ñáyuu je névāha, sa quiji ga nuū i, te cone vāha cuehē i. Te ñayuu jeē tu névāha, sa cujiyo-ni vésú jecu jeē névāha i. ²⁷ Te tēe jeē cájito uhū ruhū, jeē tu ní cánujnahan ni de jeē cuu ri rey nuū de, cuáquihin de na quíjicoo de yāhá. Te cahní rō de coto ri, áchí de. Achí Jesús.

Jeē ni quívi Jesús ñuu Jerusalén (Mt. 21.1-11; Mr. 11.1-11; Jn. 12.12-19)

²⁸ Te nuū ní ndihī ni cahān yā jñuhun yáha, te ni jica ga yā cuahān yā ñuu Jerusalén. ²⁹ Te nuū ní cuyajni ya ñuu Betfagé jín ñuu Betania, yajni nuū íne yucu nání yucu Olivos, te ni tají yá uū tēe cáscuāha jín yá jeē quíngoo de. ³⁰ Te áchí yá jín de:

Cuáhán ñuu lulí íne ichi núu. Te núu ni quívi ró, te nihīn rō in burro núhí tī, jeē ní in tēe ná tu coso de tī. Te ndají ró tī quiji ró jín tī. ³¹ Te núu ndé in cajñuhún naun cándají ró tī, te cahān rō jín: Máá Jítóho yō jini ñúhún yá tī, áchí rō. Achí yá.

³² Te cuangoo tēe ni tají yá, te ni canihīn de tī nájñuhun ni cahān yā jín de. ³³ Te jeē cándají de tī, te ni cacahān jítóho tī jín de:

¿Naun cándají ró burro ri? áchí.

³⁴ Te ni cacahān de:

Máá Jítóho yō jini ñúhún yá tī.

³⁵ Te ni ndecoo de jíin tí nuū Jesús. Te ni casoó de sahma de síquī tī, te ni casáha de jeē ní jecosō yā síquī tī. ³⁶ Te ná-ni cuahān yā, sáá cáscáá ñayuu sahma i ini ichi. ³⁷ Te nuū ní cuyajni ya nuū cúun ichi yucu Olivos, te ndihī ñayuu cácadíje jeē cándiquīn i ya, ni caquejéé i cácusī ni i, te cácana jee i jeē yóhoyo vāha Yaā cúu Yaā Dios síquī táca jniñu jéhnū ni sáha ya ni cajito i. ³⁸ Te áchí i:

Yóhoyo vāha Yaā cúu Rey jeē véji jíin jniñu máá Jítóho yō Yaā Dios. Te sáha ya jeē cóo manī yō jíin Yaā Dios andiví. Te yóhoyo cújéhnū Yaā Dios, achí i jíináhan i.

³⁹ Yūcuán na te jecu tēe fariseo cáhīn mēhñu ñáyuu cuehē ún, ní cacahān de jíin yá:

Maestro, cahān ni núū ñáyuu cándiquīn nihín jēé na cási i yuhu i, áchí de.

⁴⁰ Te ni cahān Jesús:

Cáhān rī jíin ró jeē núu ñayuu yáha na cási i yuhu i, te táca yūū chi cana jee, áchí yá.

⁴¹ Te nuū ní cuyajni ya Jerusalén, te ni jito ya ñuu ún, te ni ndahyū yā síquī. ⁴² Te ni cahān yā:

Róhó ñáyuu Jerusalén, yóhoyo ni cuu ni rī jeē na jécūhun ni rō jeē cuu ndumanī rō jíin Yaā Dios sáha ri. Te síquī jeē tu cácadíje ró, te vijna chi ma cúu ga jecūhun ni rō. ⁴³ Chi quee quivī jeē coo jnūndóho, te ñayuu cájito uhū rohó, cuicó ndūū i ñuu rō, te casí cutú i jíin yūū, te táca lado ndonda i síquī rō. ⁴⁴ Te ndihī vehe scótúú i, te cahni i róhó jíináhan ró. Te ma stóo i ni ñn vehe jeē cóso jnāhan ga yuū. Chi ni quiji ri nde nuū Yaā Dios jeē jnáma ri rohó, te tu ní cácadíje ró. Achí yá.

Jeē ní quenehen ya ñayuu ini templo
(Mt. 21.12-17; Mr. 11.15-19; Jn. 2.13-22)

⁴⁵ Te ni quivī ya ini templo cáhnu, te ni quejéé yá quenehen ya táca ñáyuu cájeen quití te cánaxico núū ñáyuu jeē socó i. ⁴⁶ Te ni cahān yā jíin i:

Yósó núū tútu iī jeē cahān Yaā Dios: Vehe ri chi vehe nuū cájicān tahu cúu, achí Yaā Dios. Te máá ró jíináhan ró, chi nájnūhun yaū cava ñacuīhna ní canasáha ró, achí yá.

⁴⁷ Te ndiquivī ni steén yā jnūhun ini templo. Te sutū cácujeñu jíin tēe cástéén tutu ley Yaā Dios jíin tēe cácujeñu nuū ñáyuu ñuu ún, cánducú de modo ndese cahni de ya.

⁴⁸ Te tu cánihīn de modo sáha de, chi ndivii ñayuu yóhoyo cájetáhú i cájini nahín i jnūhun cáhān yā.

Síquī jeē ndíso jniñu Jesús
(Mt. 21.23-27; Mr. 11.27-33)

20

¹ Te ñn quivī steén yā jnūhun nuū ñáyuu ini templo, te nácani ya jnūhun jeē jnáma Yaā Dios ñayuu. Te ni quecoo sutū cácujeñu jíin tēe cástéén tutu ley Yaā Dios jíin táca tēe jéhnū cándacu jniñu. ² Te ni cacahān de:

Castūhún, ¿ndé ní nihīn jniñu ró jéé sáha ró jniñu yáha? ¿Te ndé ñn ni tee jniñu síquī rō jeē sáha ró súcuan? Achí de.

³ Te ni cahān Jesús jíin de:

Suni ruhū cajnūhun rí rohó ñn jnūhun jíináhan ró. Castūhun núu rī: ⁴ ¿Ndé ñn ni tee jniñu síquī Juan jeē ni scuándute de? ¿A Yaā Dios chí táca tēe? Achí yá.

⁵ Yūcuán na te ni candajnūhun máá de:

¿Ndese cahān yō? Núu cahān yō jeē Yaā Dios ni tee ya jniñu un síquī Juan, te cahān de jíin yó: ¿Najehē tu ní cácadíje ró de núu súcuan? ⁶ Te núu cahān yō jeē ñáyuu ni catee jniñu un síquī de, te ndivii ñayuu cahni i yóhó jíin yūū, chi cácadíje i jeē tēe ni nacani jnūhun Yaā Dios ni cuu ndije Juan, achí de cacahān maá de.

⁷ Te ni cacahān de jeē tu cájini de ndé ñn ni tee jniñu síquī Juan jeē ni scuándute de.

⁸ Yūcuán na te ni cahān Jesús:

Ni ruhū, suni ma cáchi rī nuū rō ndé ñn ni tee jniñu síquī rī sáha ri jniñu yáha, achí yá.

Jnūhun yátá síquī tēe néé cásjniñu nuū uva
(Mt. 21.33-44; Mr. 12.1-11)

⁹ Te ni quejéé Jesús cahān yā jnūhun yátá yáha jíin ñáyuu ún:

Ñn tēe ni nachuhun de cuehē uva nuū ñūhun de. Te ni stóo de nuū sava tēe sájniñu nuū, te cuu sava de ndehē jíin. Te ni tee de ichi jeē cuahān nahán de inga ñuu. ¹⁰ Te máá tiempo ndutútú uva, te ni tají de ñn mozo cuahān nuū tēe cásjniñu ún, návāha naquihin de sava ndehē uva un. Te tēe un ní cacani de mozo, te ni canatají de i cuanuhun i súcuan-ni. ¹¹ Te tēe chíí uva ni tají tucu de inga mozo cuahān. Te tēe cásjniñu ún, suni ni cacahān ndevāha de

nuū i, te ni cacani de i, te ni canatají de i cuanuhun i súcuan-ni. ¹² Te tēe chíi uva ni tají tucu de inga mozo cuahān. Te tēe cásájniñu ún, suni ni castújí de mozo un, te ni cascúnu de i.

¹³ Yūcuán na te ni cahān tēe chíi uva: ¿Nde se sáha ri? Na tájí rí sēhe ri jeē maní rī jíin, chi sanaa te núu ni cajito de i te coo yíñuhún de nuū i. Achí de. ¹⁴ Te tēe cásájniñu ún, ná ni cajito de jeē véji i, te ni cacahān de: Tēe chíi táhū cúu jeē véji ún. Na cáhni yō de, te ndōo tahū de cuu máá yó, achí. ¹⁵ Te ni caquenehen de i inga lado, te ni cajehni de i, achí yá.

Te ni cajnūhun yá de:

Núu súcuan ¿te ndese sáha tēe chíi uva jíin tēe cásájniñu ún? ¹⁶ Ndihi de te cahni de tēe un jíināhan, te cuāha de ñuhun cáá uva un núu inga sava tēe sájniñu nuū, achí yá.

Te jeē ní cajini ñayuu jnūhun yáha, te ni cacahān i:

Aí, núu ma cóo cuiñi súcuan víi, achí i.

¹⁷ Te ndéhé yá nuū i jíināhan i, te ni cahān yā:

Núu súcuan ¿te á cájecūhun ni rō jnūhun yáha jēe yosó núu tútu iñ jeē cúu ri nájnūhun iñ yuū? Chi achí tutu:

Yuū jeē ní casquéhichí tēe cájeni vehe, yuū yáha nduu jeē quítuu vehe.

Achí. ¹⁸ Te ñayuu tu cá candíje, ndoho i nájnūhun ndóho ñayuu jeē cotúu siquī yuū te jnāhnú i. Te quiví sándaā Yaā Dios cuēchi, te ñayuu tu cá candíje, ndoho i nájnūhun ndóho ñayuu jeē nínga yuū siquī i te cundihí i sáha. Achí yá.

Siquī xúhun renta

(Mt. 21.45-46; 22.15-22; Mr. 12.12-17)

¹⁹ Yūcuán na te sutū cácujeñu jíin tēe cástéen tutu ley Yaā Dios, ni cacuni de jñi de ya maá hora un. Chi ni cajecūhun ni de jeē siquī maá de cúu jnūhun yátá ní cahān yā siquī tēe cásájniñu nuū uva jíin tēe cájeni vehe. Te tu ní cúu, chi cáyuhú de jeē quítu ni ñayuu. ²⁰ Yūcuán na te ni catají de jecu tēe cuacoto yuhu de ya, te tēe un cásáha-ni de jeē tēe ndaā cácu de. Te cánducú de sáha de jeē cahán yā iñ jnūhun jeē nihín de cuēchi siquī yā, te quindeca de ya nuū tēe cúu gobernador. ²¹ Te ni cacahān de:

Maestro, cájini na jēe cahán vāha ní, te stéén ndaā ní. Te tu sáha ní cuenta ndese

cúu iñ iñ ñayuu, chi inuú-ni sáha ní jíin i. Te stéén ndaā ní ndese squícu ñayuu nuū Yaā Dios. ²² Núu súcuan te cachi ní: ¿A íyó váha jeē chúnaa yō renta nuū rey nación Roma jeē jñi nación yō, chí tuú? achí de.

²³ Te ni jini yā jeē cáculi de stáhú de ya, te ni cahān yā jíin de:

¿Najehē cájito ndee rō ruhū? ²⁴ Stéén iñ xūhún na cóto ri. ¿Ndé iñ nuū cúu jeē ndeé nuū xūhun yáha, te ndé síhví cúu jeē ndeé yāhá? achí yá.

Te ni cacahān de jíin yá:

Nuū jíin síhví rey un cúu, achí de.

²⁵ Yūcuán na te ni cahān yā jíin de:

Núu súcuan te nacuāha rō núu rey un jēe yíhi cuenta nuū de, te nacuāha rō núu Yaā Dios tāca jēe yíhi cuenta nuū maá yá, achí yá.

²⁶ Te tāca tēe ún tu ní cúu nihín de cuēchi siquī yā jíin ni iñ jnūhun cáhán yā, cájito jíinú ñayuu. Chi sa ni canaa ni de jeē ndichí ní stió cuiñí yā jnūhun nuū de, te tuá na vé ni cácahān de.

Jeē ní cacajnūhún de siquī jeē nátecu ndīyi *(Mt. 22.23-33; Mr. 12.18-27)*

²⁷ Yūcuán na te jecu tēe grupo saduceo ni quecoo de nuū yā. Te tēe un cácahān jeē tu nátecu cuiñi ndīyi. Te ni cacahān de jíin yá:

²⁸ Maestro, Moisés ni tee de nuū tútu jeē cánevāha yó: Núu iñ tēe cuu de, te ndōo ñasihí de, te núu tu ní íyo sēhe de jíin ña, núu súcuan te cánuú jeē ñani de naquihin ñasihí de, te sēhe de jeē cácu jíin ña nucuiñí i nuū ndīyi ñani de, achí tutu. ²⁹ Núu súcuan te ni íyo uxā ñani. Te tēe núu ní quijnāhan de jíin ñahan. Te ni jihí de, te tú sēhe de ní íyo.

³⁰ Te tēe uū ni naquihin de ña, te suni ni jihí de, te tú na sēhe de ní íyo. ³¹ Te tēe uní ni naquihin de ña. Te suni súcuan ndihúxá de ni condeca de ña, te ni cajihí ndihí de, te ni iñ de tú sēhe de ní íyo. ³² Te jeē sándihí te suni ni jihí ñahan ún. ³³ Núu súcuan te núu na nátecu de jíināhan de quiví nátecu ndīyi, ¿te ndé iñ de cuu ña ñasihí de? Chi ndihúxá de ni condeca de ña. Achí de jíināhan de.

³⁴ Yūcuán na te ni cahān yā jíin de:

Ñayívi yáha chi cáquijnāhan tēe jíin ñahan.

³⁵ Te ñayuu vāha jeē nátecu i quivícoo i andíví, ma quijnāhan ga i yūcuán, chi tuá na jnūhun quijnāhan tēe jíin ñahan coo. ³⁶ Ni

ma cúu cuiti gā i, chi coo i nájñuhun ndajéhé Yaā Dios. Te sēhe Yaā Dios cuu i, chi je ni canatecu i. ³⁷ Te suni máá Moisés cáhán de jeē nátecu ndíyí, chi ni tee de nuū tútu ndese ni cahān yā jíin de mēhñu yúcū jeē cayú yáñuhūn. Chi ni cahān de jeē cúu ya Yaā Dios Abraham jíin Isaac jíin Jacob. ³⁸ Te jeē ni cáhán de súcuan cúu jeē ní cachi de jeē cátecu tāca ndíyí. Chi vēsú je ni cajihī i, te cátecu i nuū iyó máá yá, chi cúu ya Yaā sáha jeē técu ñayuu ní cáni. Achí yá jíin de.

³⁹ Te jecu tēe cástéén tutu ley Yaā Dios ni cacahān de:

Vāha ni cahān ní Maestro.

⁴⁰ Te tuá ni cáchundeyí ni de cajñuhún de ya.

Siquí jeē cúu Cristo sēhe yucūn David
(Mt. 22.41-46; Mr. 12.35-37)

⁴¹ Te ni cahān yā jíin de jíināhan de:

¿Ndese cúu jeē cácahān ñayuu jeē Cristo cúu sēhe yucūn David? ⁴² Chi máá David suhva ni cahān de jñuhun ya nuū tútu Salmo:

Máá Jítóho yō Yaā Dios suhva ni cahān yā jíin Jítóho rī, Yaā quiiji:

Cucōo ró lado váha ri nuū cujéhnú ró,

⁴³ te na sáha ri jeē quende rō poder tāca jéē cájito uhū rohó.

Achí Yaā Dios. Achí David. ⁴⁴ Te núu sēhe yucūn David cúu Cristo, ¿te ndese cúu jeē ni cáhán de jeē Jítóho de cúu ya? áchí yá.

Jeē ni cáhán yā jeē iyó cuéchi de jíināhan de
(Mt. 23.1-36; Mr. 12.38-40; Lc. 11.37-54)

⁴⁵ Te ni cahān yā jíin tēe cáscuáha jíin yá, te suni ni cajini sōho ndihi ñayuu:

⁴⁶ Coto má cándíje ró táca tēe cástéén tutu ley. Chi cácusī ni de cáñuhun de sahma cáni jeē steén jeē cujéhnú de, cájica cuu de jíin. Te cánujnahan ni de jeē cahán yíñuhún ñayuu jíin de nuū yáhu. Te cánujnahan ni de cucōo de nuū silla yíñuhún gá ini vehe īi sinagoga, jíin silla yíñuhún gá nuū víco cáyeji ñayuu.

⁴⁷ Te cáquende de vehe ñahan ní caquendōo ndáhú. Te nahán cájicān tahú de návāha caní ni ñayuu jeē tú na cuéchi de. Tēe yáha jíināhan de chi xeēn gā ndoho de castigo. Achí yá.

Jeē ni sócō ñahan viuda xūhún
(Mr. 12.41-44)

21

¹ Te ná ni īyo ya ini templo, te jíto ya nuū ñáyuu cucá jéē cáchuhun i cuehē xūhún ini tāca yéjñū nuū cásocō i. ² Te suni ni jito ya nuū ññahan viuda jeē ndóho ndáhú, te ni chuhun ña uū centavo lulí ini yejñū ún. ³ Te ni cahān yā:

Jendaá cahán rī jíin ró jeē cuehē gā cúu jeē ni sócō ñahan viuda ndahú yáha, vēsú jeē ní casocō tāca gá ñayuu. ⁴ Chi táca i ni casocō i jeē ni ndóo siquí xūhun cuéhē i. Te ñahan yáha, vēsú ndahú ndóho ña, te ni chuhun ndihi ña jeē cótecu ña. Achí yá jíin de.

Jeē ní cachi yā jeē náa templo
(Mt. 24.1-2; Mr. 13.1-2)

⁵ Te sava de ni cacahān de jeē luu cáa templo cáhnu, chi ni cuvāha jíin táca yúu luu jíin táca jéē ní casocō ñayuu. Yūcuán na te ni cahān yā:

⁶ Ndihi jeē cájito ró yáha, quee quiví jeē ma cóso jñahan ga ni ññayuu, chi ndihi jñanū, achí yá.

Na seña coo nuū cuácuyajni ndihi ñayiví
(Mt. 24.3-28; Mr. 13.3-23)

⁷ Te ni cacajñuhún de ya:

Maestro, ¿ndé quiví coo tāca jéē ní cachi ní jéē coo? ¿Te na seña coo nuū cuácuyajni siquícu tāca jéē ni cáhán ní? áchí de.

⁸ Te ni cahān yā:

Coto ró jéē ma stahú i róhó. Chi quiijicoo cuehē tēe jeē stahú jíin síhví rí, te cahān de: Máá rí cúu Cristo. Te suni cahān de: Je ni quee quiví ndihi ñayiví, achi de. Te ma cóndiquñ rō de. ⁹ Te núu nihñ rō jñuhun jeē tāca lado iyó guerra te cándonda ñayuu siquí tohō, te ma yūhu ró, chi cánuú jéē xíhna gā coo súcuan, te ni ma jinú yachí quiví ndihi ñayiví. Achí yá.

¹⁰ Te ni cahān gā yā:

Ndonda nación siquí inga nación, te ndonda ñuu siquí inga ñuu jeē cuajnáhan. ¹¹ Te cháha chúcuan jñāa téyí, te coo jnamā jíin cuéhyí xeēn. Te coo seña jéhnú ichi ándiví jéē yūhú ndasí ñáyuu coto i.

¹² Te nde ná tu coo táca jññu yáha, te coto xeēn i róhó, te jññi i róhó. Te quindeca i sava ró táca vehe īi sinagoga jeē cahán i cuéchi siquí rō. Te chune i sava ró vecāa. Te quindeca i sava ró núu tāca rey jíin núu táca

governador, te cahān i cuēchi siquī rō jeē siquī jeē cācandije ró rúhū. ¹³ Te jeē súcuan coo, te cuitē núu ga jnūhun ri, chi nacani ndaā rō nuū de jíjnáhan de. ¹⁴ Núu súcuan te cundaā ni rō jeē ma nácani ni rō xīhna gā ndese stío cuíñi rō nuū de te cācu ró. ¹⁵ Chi ruhū cuāha ri jnūhun ndíchí cahān rō, návāha ñayuu jeē cájito uhū rohó, ma cúndeyí i jíin ró ni ma cúu cahān i siquī rō. ¹⁶ Te nde tatá rō, naná rō, ñani rō, jnáhan ró, jíin amigo rō, nastúu i róhó núu ñáyuu xeēn. Te cahni i sava ró. ¹⁷ Te tāca ñáyuu chi quitī ni i nuū rō jeē siquī ruhū. ¹⁸ Te ni ñn ixi xíní rō jíjnáhan ró ma náā, chi coto ya rohó. ¹⁹ Te núu cuiñi nīhin ró jíin jnūhun ri, te cotecu rō ní cáni.

²⁰ Te núu ni cajito ró jéē ní cajicó ndúū soldado ñuu Jerusalén, te na jécūhun ni rō jeē je yajni naa ñuu ún. ²¹ Yūcuán na te ñayuu cáyūcú región Judea, na cúnu i caa i yucu quingoo i. Te ñayuu cáyūcú Jerusalén, na quéndacoo i quingoo i. Te ñayuu cáhīn nde rancho, ma nándicó i ñuu ún. ²² Chi tāca quivī un cuáha Yaā Dios castigo nuū ñáyuu jeē siquī cuéchi i, návāha squícu tāca jnūhun jeē yosó núu tútu. ²³ Te quivī ún nacā jeē ndahú ñahan cáñuhun sēhe jíin ñahan cándeca yiquín, chi ma cúnihīn ña cunu yachí ña. Chi yōhoyo xeēn coo jnūndóho ini ñayiví, te quiji castigo xeēn siquī ñáyuu yáha. ²⁴ Te sava i cuu nuū guerra, te sava i quingoo preso nde tācá inga nación. Te ñayuu tāca gá nación ndacu nīhin i jniñu nuū ñáyuu ñuu Jerusalén, nde jínu tiempo jeē jéhe Yaā Dios jnūhun ndacu i jniñu.

Ndese coo quivī ndiji Yaā ní nduu tēe
(Mt. 24.29-35, 42-44; Mr. 13.24-37)

²⁵ Yūcuán na te coo seña nuū níandii jíin núu yoó jíin núu quími. Te ini ñayiví te quiji jnūndóho xeēn siquī ñáyuu tācá nación. Te cunéé ni i, te yūhú i jeē nīhin xeēn mar te ndónnda xeēn ndute mar vēji nuū ñūhun. ²⁶ Te cuu sōo sava ñayuu jeē cáyūhú i cándetu i tāca jnūndóho quiji siquī ñayiví. Te tāca jéē íin andiví chi quisí i. ²⁷ Yūcuán na te coto ñayuu nuū maá rí, Yaā ní nduu tēe, ndiji ri jíin vícō, te condiso ri cuehē poder, te yōhoyo luu kujéhnu ri. ²⁸ Te núu ni quejéé táca jniñu yáha, te ndeyí coo ni rō,

te cocunuū rō andiví, chi je yajni jnama ya rohó. Achí yá jíin de jíjnáhan de.

²⁹ Te suni ni cahān yā jnūhun yátá yáha:

Condēhe jíjnáhan ró ndese sáha nundēhe higo jíin táca gá yujnu. ³⁰ Núu cájito ró jéē ní quejéé nāne numa yújnu ún, te cájini rō jeē je yajni coo tiempo jihni. ³¹ Te suni súcuan núu ni cajito ró jéē ní quejéé cúu tācá jniñu jeē ni cáhān rī, yūcuán na te na jécūhun ni rō jeē ní cuyajni quivī ndacu Yaā Dios jniñu ini ñayiví.

³² Jendaá cahán rī jíin ró jeē ma cúu ndihí ñayuu tiempo un, chi nde squícu ndihí jniñu ún. ³³ Andiví jíin ñayiví chi naa, te tāca jnūhun cáhān rī chi ma náā, chi ndihí squícu.

³⁴ Te coto ma stíví ró maá ró jíjnáhan ró jéē sáha ró táca cuéchi, jíin jéē najīni ró, jíin jéē kujnéñu ró jíin táca ndajniñu cotecu rō, návāha tú sanaa ni rō te quee quivī un siquī rō. ³⁵ Chi nájnūhun jeē núu ñn trampa, súcuan quee jnūndóho siquī ñáyuu cáyūcu ní cáhnu ñayiví. ³⁶ Núu súcuan te ndito coo ni rō, te níni cācān tahú rō, návāha cuu cācu ró núu tāca jnūndóho jeē quíji ún, te cuu cuiñi ró núu ruhū, Yaā ní nduu tēe. Achí yá.

³⁷ Te ndiquiví steén yā jnūhun ini templo, te ndijnahan jecuáá jéndōo ya nde yucu jeē naní Olivos. ³⁸ Te tāca jénéhen quécoo ñayuu nuū yā ini templo jeē cúni sōho i jnūhun stéén yā.

Jeē ní casquíjnáhan de jnūhun jniñ de Jesús
(Mt. 26.1-5, 14-16; Mr. 14.1-2, 10-11; Jn. 11.45-53)

22

¹ Yūcuán na te ni cuyajni vico pascua jeē cáyeji ñayuu hebreo pan jeē tú na levadura yíhi. ² Te sutū cācujéhnu jíin tēe cástéén tutu ley, ni canducú yuhu de modo cahni de Jesús, chi cáyūhú de jeē quitī ni ñayuu.

³ Te ni quiví Satanás ini anuá Judas jeē nastúu de ya. Te suni nání de Iscariote, te cúu de ñn jnáhan jeē ndihúxí uū tēe apóstol. ⁴ Te ni jehēn de ni candajniñu de jíin táca sūtū cācujéhnu jíin tēe cándiso jniñu ini templo, núu ndese nastúu de ya nuū tēe un jíjnáhan. ⁵ Te tēe un ní cacusí ni de, te ni cajejnūhun de jeē cuáha de xūhun núu Judas. ⁶ Te ni jetáhú Judas, te ni nducú de

modo ndese nastúu yuhu de ya hora jeē tú na ñayuu iyó.

Jeē ní jequin yā Cena yā

(Mt. 26.17-29; Mr. 14.12-25; Jn. 13.21-30; 1 Co. 11.23-26)

⁷ Te ni quee maá quíivī víco jeē cáyeji ñayuu pan jeē tú na levadura yíhi, te suni quíivī un cájehni i londe nájñūhun ni ndacu Yaā Dios jniñu jeē sáha i vico pascua un. ⁸ Te Jesús ni tají yá Pedro jíin Juan quingoo de, te áchí yá jíin de:

Cuángoo te sátūhva ró jeē cuxíni yó vico pascua, achí yá.

⁹ Te ni cacajñūhún de ya:

¿Ndé nuū cuní ni jeē quisátūhva ná? áchí de.

¹⁰ Te ni cahān yā jíin de:

Cuángoo ñuu yūcuán, te núu ni quíivīcoo ró te najnáhan ró jíin ñn tēe ndíso quíivī ndute. Te condiquín rō de quihín rō jíin de nde vehe nuū ndívi de. ¹¹ Te cahān rō jíin tēe chíi vehe ún: Achí máá Maestro: ¿Ndé ñn cúu cuarto vehe ní cuāha núú ní núu cuxíni ya vico pascua jíin tēe cáscuāha jíin yá, achí rō. ¹² Yūcuán na te stéén de ñn cuarto cáhnu nde xiní véhe jeē je iyó túhva, te yūcuán sátūhva ró jeē cuxíni yó, áchí yá.

¹³ Te cuangoo de, te ni canihín de nájñūhun ni cahān yā. Te ni casátūhva de jeē cuxíni ya vico pascua.

¹⁴ Yūcuán na te ni jinū hora jeē cuxíni, te ni quee Jesús, te ni cucōo ya mesa jíin tēe cácuu apóstol. ¹⁵ Te ni cahān yā jíin de:

Yōhvo ni cuu ni rī cuxíni ri jíin ró jijnáhan ró vico pascua yáha, vijna nde ná tu cuu rī. ¹⁶ Chi cáhán rī jíin ró jeē ma cáji cuiti gā rī vico pascua, chi nde quiiji quíivī ndacu Yaā Dios jniñu nñ ñayíiví, te sáá te caji tucu ri, achí yá.

¹⁷ Te ni quihin ya ñn copa ndūxi uva, te ni nacuatáhú yá, te ni cahān yā:

Quihin copa yáha, te coho ró jíin jnáhan ró. ¹⁸ Chi cáhán rī jíin ró jeē ndé vijna te ma cóho ga rī ndūxi uva, chi nde quiiji quíivī ndacu Yaā Dios jniñu nñ ñayíiví, te sáá te coho tucu ri. Achí yá.

¹⁹ Te ni quihin ya pan, te ni nacuatáhú yá, te ni tahú cuéché yá, te ni jēhe ya nuū de jíin áhan de. Te ni cahān yā:

Yāha cúu yiqui cúñu rī jeē socō rī jeē chunaa rī cuēchi ró jíin áhan ró. Te níni caji rō súcuán jeē cáñuhun ni rō ruhū jeē ni jíin rī jehē rō. Achí yá.

²⁰ Te suni súcuán ni sáha ya jíin copa ndūxi uva, ná ni cuu ni cuxíni ya. Te ni cahān yā jíin de:

Yāha cúu níñi rī jeē cuáha ri jeē cúu contrato jeé, te cati jeē ndundoo cuēchi ró jíin áhan ró.

²¹ Te vijna chi tēe nastúu ruhū, néne de jíin rí nuū mesa yáha. ²² Chi ruhū, Yaā ní nduu tēe, jendaá cúu jeē quihín rī cuu rī nájñūhun je ni sándaā Yaā Dios jeē súcuán coo. Te nacā xeēn ndoho tēe jeē nastúu ruhū, achí yá.

²³ Yūcuán na te ni caquejéé de cácajnūhun jnáhan de ndé ñn de cúu jeē nastúu de ya.

Jeē ní cacahān de siquī ndé ñn de cújéhnu ga

²⁴ Yūcuán na te yōhvo ni cacahān de siquī ndé ñn de cújéhnu ga nuū jnáhan de. ²⁵ Te ni cahān Jesús jíin de:

Rey tācá nación chi cándacu níhin de jniñu nuū ñayuu cájni de, te cácahān i jeē tēe cásaáha vāha cúu jeē cácuajéhnu nuū i. ²⁶ Te rōhó jíin áhan ró, ma cóo ró súcuán. Chi núu ndé ñn ró cújéhnu ga, te sa nasáha lulí ró maá ró. Te núu ndé ñn ró ndácu jniñu, te sa nasáha ró máá ró tēe jéjniñu nuū jnáhan. ²⁷ ¿Te ndé ñn cúu jeē cujéhnu ga, á tēe yéji nuū mesa, chí tēe jéni cohō? ¿A násūu tēe jeē yéji nuū mesa cúu jeē cujéhnu ga? Te ruhū nasūu súcuán cúu ri, chi ni nasáha ri maá rí nájñūhun tēe jéjniñu nuū rō, chi vēji ri sáha ri jeē nihín tahú rō.

²⁸ Te máá ró cácuu tēe jeē níni cáhīin jíin rí tāca quíivī jeē ndóho ri jñūndóho. ²⁹ Núu súcuán te nájñūhun ni sáha Tátá rī jeē ndácu ri jniñu, suni súcuán sáha ri jeē ndácu ró jniñu jíin áhan ró. ³⁰ Te caji rō coho ró jíin rí ini ñuu nuū ndácu ri jniñu. Te cucōo ró ñn ñn mesa jeē sándaā rō jniñu ndihúxí uū yucūn Israel. Achí yá.

Jeē ní cachi yā jeē yūhu Pedro cahān de jeē jini de ya

(Mt. 26.31-35; Mr. 14.27-31; Jn. 13.36-38)

³¹ Te suni ni cahān maá Jítoho yō jíin Simón Pedro:

Simón, cuni sōho ró, chi ni jicān Satanás rohó jijnáhan ró jéē coto ndee rohó nájnūhun jeē síjin trigo, te stúu ndé ñn ró cácuu nájnūhun paja jeē nayūhu ró, te ndé ñn ró cácuu nájnūhun trigo jeē candíje nihin ró. ³² Te ni jicān tahu rī jehē rō návāha ma náyūhu ró jeē ma cándíje ga rō. Te jeē nácandíje tucu ró, te sáha ró jéē íje tāca jnáhan ró jíin jnúhun ri. Achí yá.

³³ Te ni cahān de jíin yá:

Je íyó túhva ná quihñ na jíin ní vecāa te vésú na cuu na jíin ní, achí de.

³⁴ Te ni cahān yā:

Pedro, cáhán rī jíin ró jeē nde ná tu cana líhli vijna, te yūhu ró jeē jññ ñayuu rohó, te unī jíinu cahān rō jeē tu jíin rō ruhū, achí yá.

Jeē ní cuyajni coto ya jnūndóho

³⁵ Yūcuán na te ni cajnúhun yá de jíináhan de:

Ná ni taji rí rohó ní jengoo ró jéē tu ní cóndiso ró ñunu ni yijni xūhún ni ndijēn, ¿te á ní íyo ñn jeē ní cumanī nuū rō? Achí yá.

Te ni cacahān de:

Tú ni ñn ní cumanī.

³⁶ Te ni cahān yā:

Nde vijna sa cáhán rī jeē cóndiso ró ñunu ró, te suni yijni xūhún. Te tēe jeē tu névāha espada jeē coto de máá de, na xíco de ticāchí de te na cuáan de. ³⁷ Chi cáhán rī jíin ró jeē quee quivī ndoho yó jnūndóho, chi cánuú squícu jnúhun yáha jéē cahán nuū tútu síquī rī: Sáha ñayuu jíin yá nájnūhun cásáha i jíin tēe sáha cuēchi xeēn, achí tutu. Chi tāca jnúhun un jéē yosó cáhán síquī rī, chi squícu nahín, achí yá.

³⁸ Yūcuán na te ni cacahān de:

Yāha íyó úu espada, achí de.

Te ni cahān yā jíin de:

Jíin jéē yáha-ni, achí yá.

Jeē ní jicān tahu yā nuū huerto Getsemani (Mt. 26.36-46; Mr. 14.32-42)

³⁹ Te ni quenda ya cuahān yā yucu Olivos nájnūhun sáha sáha ya. Te tēe cáscuáha jíin yá ni candiquñ de ya cuango de jíin yá. ⁴⁰ Te nuū ni jíin yā yūcuán, te ni cahān yā jíin de:

Cacān tahu rō jijnáhan ró jéē chindéé ñáhán yá rohó jéē ma sáha ró cuēchi núu coto ndee jeneé rōhó, achí yá.

⁴¹ Te ni jica ya jecu, cūhva jeē jicá jínú yuū jeē squíin. Te ni jecuiññ yití yá, te suhva ni jicān tahu yā:

⁴² Tātā, núu cúní ni te tejiyo ní jnūndóho yáha jéē ma quíji síquī ná. Te nasūu jéē cuní maá ná, chi jeē cuní maá ní na cóo, áchí yá.

⁴³ Te ni cane ñn ndajéhé andiví núu yā, te ni jēhe fuerza nuū yā. ⁴⁴ Te cúcuíhyá ndasí ni yā jeē quíji jnūndóho síquī yā, te ni nducú ndéyí gá yā ni jicān tahu yā. Te ni cane jñañū yā, te tóo nuū ññhun nájnūhun yúyú nahnu niññ.

⁴⁵ Te ná ni ndocuiññ yā jeē ni jicān tahu yā, te ni ndee yā nuū tēe cáscuáha jíin yá. Te ni jito ya jeē cáquixí de, chi tuá cáhiyo ndeyí ni de cacān tahu de jeē cácuquíhyá ndasí ni de. ⁴⁶ Te ni cahān yā jíin de:

¿Naun cáquixí rō? Ndonga te cacān tahu rō jeē chindéé ñáhán yá rohó jéē ma sáha ró cuēchi jeē cóto ndee jeneé rōhó. Achí yá.

Jeē ní cajññ de Jesús

(Mt. 26.47-56; Mr. 14.43-50; Jn. 18.2-11)

⁴⁷ Te sá cáhán gā yā súcuan, te ni quecoo cuehē ñayuu. Te tēe nání Judas, ñn jnáhan jeē uxí uū tēe scuáha jíin yá, yósnúu de nuū ñayuu un véji de. Te ni quee de nde nuū Jesús, te ni techūhú de ya, te súcuan ni nastúu de ya. ⁴⁸ Te ni cahān Jesús jíin de:

Judas, ¿á jíin jéē téchūhu ró ruhū cúu jeē nastúu ró ruhū, Yāá ní nduu tēe? Achí yá.

⁴⁹ Te tēe cáhñ jíin yá, ni cajito de jeē ní quejéé cúu, te ni cacajnúhún de ya:

¿A ndonga ná jíináhan ná síquī de jíin espada? achí de.

⁵⁰ Te ñn de ni stují de mozo sutū cujéhnu ga, chi ni jehnde de sōho lado váha. ⁵¹ Te ni cahān Jesús:

Siáá, na jecuiññ, achí yá.

Te ni tee ya ndaha ya sōho mozo un, te ni nasávāha ya de. ⁵² Te ni cahān yā jíin sūtū cácujuhnu jíin tēe cándiso jñññ ini templo jíin táca tēe jéhnu jeē ní quecoo de jeē jññ de ya:

¿Te va tēe cuíhñá cúu ri jeē véjicoo ró jíin espada jíin yujnu jeē jññ ró ruhū jeē súcuan?

⁵³ Tāca quiví ni ine ri jíin ró jijnáhan ró ini templo cáhnu, te tu ní cájññ ró ruhū. Te vijna te ni quee hora jeē jññ ró ruhū jíin jéē sáha ró táca jñññ jeē ndácu jeneé jéē ndeé núu néē. Achí yá.

Jeē ní cachi Pedro jeē tu jíní de ya
(Mt. 26.57-58, 69-75; Mr. 14.53-54, 66-72;
Jn. 18.12-18, 25-27)

⁵⁴ Te ni cajñi de ya cuango de jín yá vehe sutū cujéhu ga. Te Pedro chi jicá-ni ndíquín de ya. ⁵⁵ Te tǎcǎ policia ni cascáyú de ñuhún ini patio, te ni condúu de yuñúhún un cáyúcú de. Te suni ni cucōo Pedro jín de. ⁵⁶ Te ñin ñahan jéjníñu ini vehe un, ní jito ña nuū de jeē néne de yuñúhún. Te ni jito vāha ña nuū de, te ni cahān ña:

Tēe yáha suni ni jica de jín tēe ún, áchí ña.

⁵⁷ Te máá de tu ní cáchi de, chi ni cahān de:

Tu jíní rī tēe ún, áchí de.

⁵⁸ Te ni cunúu jecu gā, te ni jito tucu inga ñayuu nuū Pedro, te ni cahān:

Róhó, suni jnáhan tǎca tēe un cúu ró, áchí.

Te ni cahān Pedro:

Nasūu cúu rī, hombre, achí de.

⁵⁹ Te ni cuu nájnūhun ñin hora gā, te ni cahān ñihin inga de:

Jendaá ndije jeē tēe yáha ní jica de jín tēe ún, chi suni tēe región Galilea cúu de, áchí de.

⁶⁰ Te ni cahān Pedro:

Hombre, tu jíní rī na jnūhun cáhán rō.

Te sá súcuan cáhán gā de, te ni cana-ni líhli. ⁶¹ Yūcuán na te ni ndió cóto máá Jítoho yō, te ni jito ya nuū Pedro. Te ni nucūhun ni de jnūhun ni cahān yā jín de: Nde ná tu cana líhli, te yūhu ró te cahān rō unī jínu jeē tu jíní rō ruhū. ⁶² Te ni quenda de cuahān de, te yōhyo ni ndahyū de jeē ní cachi de jeē tu jíní de ya.

Jeē ní casácatā de nuū yā

(Mt. 26.67-68; Mr. 14.65)

⁶³ Te tǎca tēe cándito Jesús, ni casácatā de nuū yā, te ni cacani de ya. ⁶⁴ Te ni cajesi de sahma nuū yā, te ni cacani de nuū yā, te ni cacahān de:

Cachi ndé ñin cúu jeē ní cani róhó, áchí de.

⁶⁵ Te cuehē gā jnūhun súcuan ni cacahān neé de jín yá.

Jeē ní indichi Jesús nuū junta tēe cácujeñu ga

(Mt. 26.59-66; Mr. 14.55-64; Jn. 18.19-24)

⁶⁶ Te jeē ní cundijin, te ni candutútú tǎca tēe jéñu cándacu jniñu nuū ñayuu hebreo, jín sūtū cácujeñu, jín tēe cástéén tutu ley Yāa Dios. Te cuango de jín yá nuū junta

tēe cácujeñu ga, te yūcuan ní cacajnūhún de ya:

⁶⁷ Cachi, ¿á máá ró cúu Cristo jeē ní tají Yāa Dios? Achí de.

Te ni cahān yā jín de:

Vēsú na cáhán rī jeē suu ri cúu, te ni ma candíje cuñi rō. ⁶⁸ Te suni núu cajnūhun máá rí rohó jínáhan ró, te suni ma stió cuñi rō nuū rī, ní ma siaá rō ruhū. ⁶⁹ Te ruhū, Yāa ní nduu tēe, tǎca quívi jeē quíji conene ri lado váha máá Yāa iyó poder, achí yá.

⁷⁰ Yūcuán na te ndihi de ni cacajnūhún de ya:

¿A máá ró cúu Sēhe Yāa Dios núu súcuan?

Te ni cahān yā jín de:

Suu ri cúu, nájnūhun cácahān rō, achí yá.

⁷¹ Yūcuán na te ni cacahān de:

¿Na testigo gā jini ñúhún yó núu súcuan? Chi ni cajini sōho yó jín yuhu máá de jeē cahán ndevāha de jeē cúu de Sēhe Yāa Dios. Achí de jínáhan de.

Jeē ní indichi Jesús nuū Pilato

(Mt. 27.1-2, 11-14; Mr. 15.1-5; Jn. 18.28-38)

23

¹ Yūcuán na te ni candocuñi ndihi de, te cuango de jín yá nuū Pilato. ² Te yūcuan ní caquejé de cácahān de cuēchi siquī yā:

Ni canihīn na tēe yáha jéé stóna de ñayuu siquī tohō. Te cáhán de jeē tú vāha jeē cuāha ná xúhun renta nuū rey nación Roma jeē ndácu jniñu nuū nación na. Te suni cáhán de jeē maá de cúu Cristo, Rey jeē ní tají Yāa Dios. Achí de jínáhan de.

³ Yūcuán na te Pilato ni cajnūhún de ya:

¿A máá ró cúu Rey ñayuu hebreo?

Te ni cahān yā:

Suu ri cúu, nájnūhun cáhán rō, achí yá.

⁴ Te ni cahān Pilato jín sūtū cácujeñu jín ñayuu cuehē ún:

Tú ni ñin jnūhun stívi cáhán tēe yáha jéé nihín rī cuēchi siquī de, áchí de.

⁵ Te máá de víhyá gā ni cacahān de:

Tēe yáha stóna ndasí de ñayuu siquī tohō jín jnūhun stéén de ní Judea. Chi ní quejé de stéén de nde Galilea, te vijna te nde yáha, achí de.

Jeē ní indichi Jesús nuū Herodes

⁶ Te nuū ní jini sōho Pilato jeē Galilea cácahān, te ni cajnūhún de ñayuu núu tēe

región Galilea cúu ya. ⁷ Te nuū ní cacahān ñayuu jeē cúu ya tēe Galilea, te ni ndacu de jniñu jeē na quíngoo de jíin yá nuū Herodes, tēe cúu gobernador Galilea. Chi qui^v ún suni íne Herodes ñuu Jerusalén. ⁸ Te nuū ní jito de nuū Jesús, te yōhyo ni cus^h ni de, chi je ni cuu cuehē tiempo jeē cuní de coto de nuū yā. Chi ni nihīn de jnūhun ya, te ñūhun ni de jeē sáha ya ñn jniñu jéhnu coto de. ⁹ Te ni cajnūhún de ya cuehē jnūhun, te tu ní stío cuíñi yā ni ñn jnūhun nuū de. ¹⁰ Te suni cáhīn tāca sūtū cácujeñnu jíin tēe cástéén tutu ley, te nihīn ni cacahān de cuēchi siquī yā. ¹¹ Yūcuán na te Herodes jíin táca soldado de ni cacahān neé de jíin yá, te ni casácatā de nuū yā, chi ni cachuhun de ya sahma váha luu jeē cúu sahma rey. Te Herodes ni ndacu de jniñu jeē na quíndeca de ya nuū Pilato. ¹² Te máá qui^v un ní candumanī jnáhan Pilato jíin Herodes, chi ichi yátá ni caqui^t jnáhan ni de.

Jeē ní cundaā jeē cúu yā

(Mt. 27.15-26; Mr. 15.6-15; Jn. 18.39-19.16)

¹³ Yūcuán na te ni cana Pilato tāca sūtū cácujeñnu jíin táca tēe cándiso jniñu jíin táca gá ñayuu, ni candutútú. ¹⁴ Te ni cahān de:

Ni caquindeca ró tēe yáha núu rī, jeē cácahān rō jeē stónnda de ñayuu siquī tohō. Te je ni stichí rī de, ni cajito jínúu rō. Te tu ní níhín rī ni ñn cuēchi siquī de nájñūhun jeē cácahān rō. ¹⁵ Te ni Herodes, tu ní níhín de, chi ni natají tucu de tēe yáha núu rī. Te tú cui^t ni ñn cuēchi ní sáha de jeē cúu de.

¹⁶ Núu súcuan te na cuáha ri castigo de, te siaá rī de quihīn de, áchí Pilato.

¹⁷ Te íyó costumbre jeē tāca vico pascua siaá Pilato ñn preso jeē cuní ñayuu. ¹⁸ Te ñayuu cuehē ún, ñnuú-ni ni cacana jee i:

Na cúu tēe jíñá, te siaá ní Barrabás, áchí i.

¹⁹ Te Barrabás íne de vecāa siquī jeē ni stónnda de ñayuu siquī tohō ini ñuu ún, te ni jehni de ndīyí. ²⁰ Te Pilato cuní de siaá de Jesús, te ni cahān tucu de jíin ñáyuu. ²¹ Te máá i víhyá gā ni cacana jee i:

Cata caa ní de jicā cruz, na cúu de, áchí i.

²² Te ni cahān tucu de jíin i vuelta uní:

¿Na cuēchi ni sáha de núu súcuan? Tu ní níhín cui^t rī ni ñn cuēchi siquī de jeē cúu de.

Núu súcuan te na cuáha ri castigo de, te siaá rī de quihīn de, áchí Pilato.

²³ Te víhyá gā ni cacana jee ñayuu un, ní cacahān nihīn i jeē na cúu yā jicā cruz. Te máá i jíin táca sūtū cácujeñnu, ni cacana jee ndasí i. Te ni cacundeyí i ni cascáhān i Pilato jeē na cúu yā. ²⁴ Yūcuán na te ni ndacu Pilato jniñu jeē na cóo nájñūhun cácuñi i. ²⁵ Te ni siaá de tēe jeē ní cajicān i, tēe jeē íne vecāa jeē ni stónnda de ñayuu siquī tohō te ni jehni de ndīyí. Te ni jēhe de jnūhun jeē na cúu Jesús nájñūhun cácuñi i.

Jeē ní cacata caa de ya jicā cruz

(Mt. 27.32-44; Mr. 15.21-32; Jn. 19.17-27)

²⁶ Te cuangoo tāca soldado jíin yá jeē cahni de ya jicā cruz. Te ni canihīn de ñn tēe ñuu Cirene, nání de Simón, vendiji de jeē ni jéhēn de rancho. Te ni catejniñu de tēe un jēe cóndiso de cruz yā quihīn de yatā yā.

²⁷ Te cuehē ndasí ñáyuu ndíquín i yatā yā cuangoo i. Te suni cuehē ñahan cuangoo ña, te cándahyū cohó ña jeē cácuquíhyá ni ña jehē yā. ²⁸ Te ni ndió cóto Jesús nuū ña, te ni cahān yā:

Róhó ñahan Jerusalén jijnáhan ró, ma ndahyú rō jehē rī, chi sa suhva ndahyú rō jehē maá ró jíin jéhē sēhe ró jijnáhan i. ²⁹ Chi quee qui^v jeē coo jnūndóho xeēn siquī rō, te cahān rō: Yōhyo ndetū tāca ñahan númá, jíin jēe tu ní scácu sēhe, jíin jēe tu ní cóndeca yiquíñ, chi tú sēhe ña jeē jnahuhū ni ña jeē ndóho i, achi rō jijnáhan ró. ³⁰ Qui^v ún te quejéé ñáyuu cahān i jíin táca yucu: Cotúu siquī rī jijnáhan ri návāha cuu rī. Te suni jíin táca loma: Casí siquī rī jijnáhan ri, áchí i. ³¹ Chi núu casáha xeēn i jíin rúhū jeē tú na cuēchi ri, te nagā ni cuu jeē ma cóo xeēn siquī ndihí ñayuu chi íyó cuéchi i. Achí yá.

³² Te suni cuangoo de jíin úu tēe ni casáha cuēchi xeēn, jeē suni cuu de jíin yá. ³³ Te ni jinūcoo de lugar nuū naní Yiquí Xíní, te yūcuan ní cacata caa de ya jicā cruz. Te suni ni cacata caa de ndíndúu tēe ni casáha cuēchi xeēn un núu uū gā cruz, ñn de lado váha ya, te inga de lado jecó yá. ³⁴ Te níni jēe súcuan cúu, te ni cahān Jesús:

Tátā, cone cáhnu ni ni núu de jijnáhan de, chi tu cájini de na vé casáha de, áchí yá.

Te soldado un ní casáha de sorteo jeē siquí ndese nihīn ñn ñn de sahma ya. ³⁵ Te

cáhīn ñayuu yūcuan, cájito i nuū yā. Te suni nde tēe cándiso jníñu, cácahān catá de cájito de ya:

Núu inga ñayuu ni jnama de, te na jnáma de máá de vijna, te núu ndaā jeē Cristo jeē ní nacāji Yaā Dios cúu de, áchí.

³⁶ Te tēcá soldado suni ni casácatā de nuū yā, chí ni quecoo de nde nuū yā, te ni cajēhe de vinagre iyá coho ya. ³⁷ Te cácahān de jín yá:

Núu máá ró cúu Rey ñayuu hebreo, te na jnáma ró máá ró, achí de.

³⁸ Te suni ni īyo jnūhun jeē ndeé xinī cruz yā jeē cahán na siquī ní jhī yā, te suhva yósó jín yuhu griego jín latín jín hebreo: Yāha cúu Rey ñayuu hebreo, achí.

³⁹ Te ĩn jeē ndīndúú tēe ni casáha cuēchi xeēn, jeē cándita caa, ni cahān neé de nuū yā:

Núu máá ró cúu Cristo, te na jnáma ró máá ró te suni jnama ró ndīndúú rí, achí de.

⁴⁰ Te inga de ni cahān de nuū jnáhan de:

¿A tu yúhú ró Yaā Dios naún? Chi ĩnuú cándoho yó jín Yaā yáha. ⁴¹ Te máá yó chí vetū-ni cándoho yó, chí yāha cánihīn yō castigo siquī jniñu neé ní casáha yó. Te Yaā yáha chí tú ni ĩn cuēchi ní sáha ya, achí de.

⁴² Te ni cahān de jín yá:

Jesús, nucūhun ni ní sáña jēe quéjéé ní ndacu ní jniñu, áchí de.

⁴³ Yūcuán na te ni cahān Jesús jín de:

Jendaá cahán rī jín ró jeē vijna te condee rō jín rí nuū jardín andiví, áchí yá.

Jeē ni jhī Jesús

(Mt. 27.45-56; Mr. 15.33-41; Jn. 19.28-30)

⁴⁴ Te nuū ní cuu nájnūhun cahuxī uū, te ni cunee ní cáhnu nde cahunī. ⁴⁵ Te ni cujnúú níāndii. Te sahma ndíta caa jeē ndihyú cuarto ĩ ini templo cáhnu, ni ndatā-ni sava sava. ⁴⁶ Yūcuán na te ni cana jee Jesús:

Tátā, naquihin ní ánuá na, áchí yá.

Te súcuan ni cahān yā, te ni jihī-ni ya.

⁴⁷ Te tēe nación Roma jeē cúu capitán ni jito de jeē súcuan ni cuu, te ni cahān de jeē yóhoyo cújéhnu Yaā Dios, te áchí de:

Jendaá ndije jeē tēe tú na cuēchi cúu tēe yáha, áchí de.

⁴⁸ Te ndivii ñayuu cáhīn yūcuan ní cajito i tāca jēe ní cuu, te cácani i yīqui jícā i jeē

cájnahunū ni i, te ni nandió cóo i cuanungoo i. ⁴⁹ Te tāca ñáyuu cájini jnáhan jín yá, jín táca ñahan Galilea jeē ní cajica ña jín yá, cáhīn jícā ña cájito ña tāca jēe ní cuu.

Jeē ní quindūji Jesús

(Mt. 27.57-61; Mr. 15.42-47; Jn. 19.38-42)

⁵⁰ Te ni īyo ĩn tēe vāha tēe ndaā, nání de José. Te tēe ñuu Arimatea ndañūū Judea cúu de. Te cúu de jnáhan tāca tēe hebreo cácujeñnu ga jeē casáha junta. ⁵¹ Te ñūhun ni de jeē quiji quivī jeē ndacu Yaā Dios jniñu, te suni tu ní nūjnahan ni de jeē ní casāndaā junta un jēe cúu Jesús. ⁵² Te tēe un ní jehēn de nuū Pilato, ni jicān de yīqui cúñu Jesús. ⁵³ Te ni snúu de ya jicā cruz, te ni chusúcun de ya ĩn sahma cuitá. Te ni chindūji de ya ĩni ĩn yaū jeē ní caan jicā ĩn cava, nuū ná tu quindūji ndīyi. ⁵⁴ Te quivī un cúu quivī casátūhva ñayuu, chí jehīni un quéjéé quivī ndétátú.

⁵⁵ Te ñahan ní quijicoo jín yá nde Galilea, ni jengoo ña jín José, te ni cajito vāha ña yaū ún, jín ndese ni cachindūji de ya. ⁵⁶ Te cuanungoo ña vehe ña, te ni casátūhva ña tēcá perfume jín aceite yucū jeén asīn. Te ni candetátú ña quivī ndétátú, nájnūhun ndacu ley Yaā Dios jniñu.

Jeē ní natecu Jesús

(Mt. 28.1-10; Mr. 16.1-8; Jn. 20.1-10)

24

¹ Te jenéhen ndasí quivī domingo, te ni jinūcoo tucu ñahan un núu ní yindūji Jesús, te cándahá ña tēcá perfume jín aceite ni casátūhva ña. Te suni cuangoo sava ga ñahan jín ña. ² Te nuū ni jínūcoo ña, te ni cajito ña jeē ní cujiyo yuū ndihyú yuyáú ndīyi. ³ Te ni quivīcoo ña yaū ún, te tuá yīqui cúñu Jitoho yō Jesús ní cájito ña. ⁴ Te ni cacunéé ni ña cájito ña jeē tuá ndīyi. Sáa te ni cajito ña uū ndajéhé Yaā Dios jeē cáa nájnūhun tēe, cáhīn ya xiin ña, te cáñūhun ya sahma ndíndéé. ⁵ Te yóhoyo ni cayūhú ña, te ni cajexin ña nuū ña nde nuū ñūhun. Te ni cacahān ndajéhé un jín ña:

¿Naun sa nuū cáyindūji ndīyi cánanducú ró Yaā técu? ⁶ Tuá yā yáhá, chí je ni natecu yā. Te nucūhun ni rō ndese ni cahān yā jín ró ná ĩne ga yā región Galilea. ⁷ Chí ni cachi ya jeē maá yá, Yaā ní nduu tēe, cánuú natūu

ya nuū tāca tēe cáhīyo cuēchi, jeē jnī de ya cahni de ya jicā cruz, te nuū uní quivī te natecu yā. Achí ndajéhé un.

⁸ Yūcuán na te ni canucūhun ni ña tāca jnúhun ni cahān Jesús. ⁹ Te ni quendacoo ña nuū ní yindūji ya, te cuanungoo ña. Te ni canacani ña tāca jnúhun yáha núū ndihúxí ñn apóstol jíin núū tāca gá de. ¹⁰ Te ñahan ní canacani jnúhun yáha núū tēe cácuu apóstol, cúu ña María ñuu Magdala, jíin Juana, jíin María naná Jacobo, jíin sava ga ña. ¹¹ Te tāca apóstol chí cájeni ni de jeē jnúhun cánéé cáñúú cacahān ña, te tu ní cá candíje de.

¹² Te vēsú súcuan, te Pedro ni quenda de, te jínu de cuacondéhé de nuū ní yindūji ya. Te ni jito nihni de ini yaū, te ni jito de jeē sahma cuitá un cáyūcu máá na. Te cuanuhun de vehe de, te nahán náā ni de jeē ní jito de jeē tuá yā.

Jeē ní ndajnūhun yá jíin úū de ichi cuáhán Emaús
(Mr. 16.12-13)

¹³ Te suu quivī un cuángoo uū jnáhan de ñn ñuu naní Emaús, jeē jicá nájñūhun uxī ñn kilómetro jíin ñuu Jerusalén. ¹⁴ Te cándajnūhún de síquī tācá jniñu jeē ní cuu ún. ¹⁵ Te níni cándajnūhún de te cácajnūhun jnáhan de, te máá Jesús ni cuyajni ya yatā de, te jica ya cuahān yā jíin de. ¹⁶ Te ni sáha jíin de jeē tu ní canacuni de ya, vēsú cájito de nuū yā. ¹⁷ Te ni cajñūhun yá de:

¿Na jñūhun cándajnūhun ró cájica ró? ¿Te najehē cácuuhyá ni rō? Achí yá.

¹⁸ Te ñn de jeē naní Cleofas ni cahān de jíin yá:

Ndihí cuiti ñayuu cájini i tācá jniñu ní cuu ini ñuu Jerusalén tāca quivī yáha. ¿Te á máñúhún-ni níhín cúu jeē ní quee ní ñuu un jéē tu jíni ni na vé ni cuu? Achí de.

¹⁹ Te ni cajñūhun yá de:

¿Te na vé ni cuu? Achí yá.

Te ni cacahān de jíin yá:

Jeē ní ndoho Jesús ñuu Nazaret, Yaā ní nacani jñūhun Yaā Dios. Te jíin poder Yaā Dios ni sáha ya tācá jniñu jéñu te ni nacani ya jñūhun, jíto jíinúū Yaā Dios jíin tāca ñáyuu.

²⁰ Te sutū cácujeñnu jíin tēe cándiso jniñu nuū ná, ni canastúu de ya nuū tāca tēe Roma, te tēe un ní casándaā de jeē cúu yā jicā cruz. ²¹ Te máá ná ní cañūhun ni na

jéē maá yá jnama ya nación na Israel nuū ñáyuu Roma nuú. Te síquī tācá jniñu yáha, te ni cane inga jñūhun. Chí vijna je íyó úní quivī jeē ní cuu ún. ²² Te sava ñahan cájini jnáhan ná jíin, ni canacani ña ñn jñūhun jeē yóhoyo cánaa ni na sáha, chí cacahān ña jeē ní natecu yā. Chí jenéhen ndasí ní jengoo ña yaū ndiyi ún. ²³ Te tuá ni cájito ña yiqui cúñu yā. Te ni ndecoo ña nuū na jíjñáhan ná, te cacahān ña jeē ní cajito ña jeē ní canecoo ndajéhé Yaā Dios nuū ña, te ni cacahān jeē ní natecu Jesús. ²⁴ Te ni jengoo sava jnáhan ná ndé yaū ndiyi ún, te ni cajito de jeē súcuan íyó, nájñūhun ni cacahān ñahan ún, te tu ní cájito cuiti de nuū yā.

²⁵ Yūcuán na te ni cahān maá yá jíin de:

Tēe tu cájecūhun cuiti ni cácuu ró. Yóhoyo uhū cá candíje ró tāca jnúhun Cristo ni cacahān tēe ni canacani jñūhun Yaā Dios nde jenahán. ²⁶ ¿Te á tu súcuan ní jíni ñúhún ndoho Cristo tāca jnúndóho yáha, te sáá te quinhun yā nuū lúu cujéñnu ya? Achí yá.

²⁷ Te ni nacani cáj yá tāca jnúhun jeē yosó núū tútu i jeē cahán síquī maá yá. Te ni quejéé yá jíin jnúhun ni tee Moisés, te ni cahān gā yā tāca jnúhun jeē ní catee tēe ni canacani jñūhun ya nde jenahán.

²⁸ Te nuū ni jínūcoo de ñuu nuū cuángoo de ún, te Jesús ni sáha ya jeē cáca ga yā quihīn yā. ²⁹ Te máá de ni castétu de ya, ni cacahān de jíin yá:

Ndōo ní vehe ná, chí je ni ini te je yajni cuaa, áchí de.

Yūcuán na te ni quivī ya jeē quéndōo ya jíin de. ³⁰ Te nuū ní cucōo ya mesa jeē cáji yā jíin de jíjñáhan de, te ni quihin ya staā, te ni jicān tahú yā, te ni tahú cuéchí yá, te ni jēhe ya nuū de. ³¹ Te jeē sáha ya súcuan, te nájñūhun ni cananune tinūú de, te ni canacuni de ya. Te ni ndoñúhún-ni ya nuū de cuahān yā. ³² Te ni cacahān maá de:

Jendaá jeē yóhoyo ni cacusī ni yō ná ni nacani ya jñūhun nuū yō ichi ún te ni castūhun cáj yá jñūhun cáhan tutu i. Achí de.

³³ Yūcuán na te yachī ni canaquihin de ichi, ni canandicó de cuanungoo de ñuu Jerusalén. Te ni canajnáhan de jíin ndihúxí ñn ga apóstol, cáyūcu tútu de jíin sava ga

jnáhan de. ³⁴ Te ni cacahān tēe cáyūcu tútú un:

Jendaá ndije jeē ní natecu maá Jítóho yō, te ni nane ndijin yā nuū Simón, achí de jíjnáhan de.

³⁵ Yūcuán na te ndindúú tēe un ní canacani de jnūhun ndese ni najnáhan ya jíin de ichi, jíin ndese ni canacuni de ya ná ni tahú cuéchi yá staā.

Jeē ní nane ya nuū tēe cáscuáha jíin yá
(Mt. 28.16-20; Mr. 16.14-18; Jn. 20.19-23)

³⁶ Te sá cácahān gā de tāca jnúhun yáha, te ni jecuiñi-ni Jesús mēhñú de jíjnáhan de. Te ni cahān yā jíin de:

Ndeyí sñ coo ni rō jíjnáhan ró, áchí yá.

³⁷ Te ni candacoto iyo de, ni cayūhú ndasí de, chí ni cajeni ni de jeē ñin ánuá cúu ya.

³⁸ Te ni cahān yā jíin de:

¿Naun cáyūhu ró, te naun cájeni siquí ni rō súcuan? ³⁹ Condēhé ndaha ri jíin jēhē rī, te cuni rō jeē maá rí cúu. Jñi ruhū te cuni rō, chí ñin ánuá tu névāha cūñu ni yiqui najnūhun cájito ró jēe névāha maá rí, achí yá.

⁴⁰ Te jeē ni cáhān yā súcuan, te ni steén yā ndaha ya jehē yā nuū ni yíhi ndūyu cāa.

⁴¹ Te yōhyo ni cacusiñi ni de, te cánaa ni de. Te vēsú súcuan te ná tu candíje vāha vāha de jeē maá yá cúu. Te ni cahān yā jíin de:

¿A cánevāha ró jecu jeē cáji rī yāhá? áchí yá.

⁴² Yūcuán na te ni cajēhe de ñin pedazo chācá ní tau nuū yā, jíin ñin pedazo ñahmā ndūxi yocō. ⁴³ Te ni quihin ya, te ni yeji yā nuū de jíjnáhan de. ⁴⁴ Te ni cahān yā jíin de:

Tāca jēe ní cuu jíin rí cúu jeē ni cáhān rī ná ni ine ri jíin ró jíjnáhan ró ndé saá, jeē cánuú squícu tāca jnúhun ri jeē yosó núu tútu ley Moisés, jíin núu tācá tutu tēe ni canacani jnūhun Yaā Dios, jíin núu tútu salmo, achí yá.

⁴⁵ Te ni nune ya jeē níjnūní de, návāha cuu jecūhun ni de tāca jēe cahán tutu iñ. ⁴⁶ Te ni cahān yā:

Súcuan cáhān nuū tútu jeē ruhū Cristo, cánuú cuu rī, te nuū uní quiví natecu rī.

⁴⁷ Te cuitē núu jnūhun ri jeē cánuú nacani ni ñayuu jeē stóo i cuēchi i, te cone cáhnu ni Yaā Dios nuū i. Te ñuu Jerusalén quejéé cuitē núu jnūhun yáha, te quihñ nuū ñáyuu

tācá nación. ⁴⁸ Te máá ró cácuu tēe nacani jnūhun tācá jniñu ní cajito ró. ⁴⁹ Te tají rí Espíritu Santo quiji ya nuū rō jíjnáhan ró, najnūhun ni jejnūhun Tátá rī. Te na quéndōo ró ñuu Jerusalén condetu ró ndé nihñ rō poder Espíritu Santo jeē quiji nde andiví. Achí yá.

Jeē ní ndaa ya cuanuhun yā andiví
(Mr. 16.19-20)

⁵⁰ Yūcuán na te ni quenda ya ñuu Jerusalén, cuahān yā nde ñuu Betania jíin de jíjnáhan de. Te ni ndonehen ya ndindúú ndaha ya, te ni jicān tahú yā jehē de. ⁵¹ Te níni jicān tahú yā jehē de, te ni cujiyo-ni ya nuū de, ni ndaa ya cuanuhun yā andiví.

⁵² Te máá de ni cachiñúhún de ya. Te sáa te cuanungoo de ñuu Jerusalén, te yōhyo cácusñi ni de. ⁵³ Te níni cáhiñ de ini templo cáhnu, cánacuatáhu de nuū Yaā Dios. Te ni cuu. Amén.

JNUHUN VAHA NI TEE SAN JUAN

Yaā naní Jnúhun Yaā Dios ni nduu ya tē

¹ Nde xīhna ñúhún ná ni jecōo ndihi jeē iyó, te je iyó Yaā naní Jnúhun Yaā Dios, chi steén yā ndihi jnúhun ndese Yaā cúu Yaā Dios. Te Yaā naní Jnúhun un ndéé yá jíin Yaā Dios, te Yaā Dios cúu ya. ² Máá yá ndeé yá nde jeē xīhna ñúhún jíin Yaā Dios. ³ Te ni sáha Yaā Dios jeē jíin máá yá ni jecōo ndihi tāca jéé iyó. Te ma jécōo ni ñin jeē iyó núu tu ní sáha máá yá. ⁴ Máá yá sáha jeē técu ndihi-ni, te máá yá cúu luz jeē steén ini anuá ñayuu, cúu jeē sáha ya jeē jécūhun ni i síquī Yaā Dios. ⁵ Te Yaā cúu luz ún ndíndēe núu ñayuu tu cájica ndaā, jeē nájnūhun cáhīyo i nuū néē. Te ñayuu cáhīyo nuū néē tu cúu ndahva i luz yā.

⁶ Te ni ĩyo ñin tēe jeē ní tají Yaā Dios, naní de Juan. ⁷ Tēe un ní quiji de jeē nacani cájí de jnúhun máá Yaā cúu luz, návāha candíje tāca ñayuu jeē jíin jnúhun cáhán de. ⁸ Nasūu máá Juan cúu luz ún, chi cúu de ñin jeē ní nacani cájí jnúhun máá luz un. ⁹ Te máá Yaā cúu luz ndije jeē steén ini anuá tāca ñayuu, nde saá ní quiji ya ini ñayíví.

¹⁰ Te Yaā cúu Jnúhun Yaā Dios ni condee yā ini ñayíví, te vésú jeē jíin máá yá ni sáha Yaā Dios ñayíví, te ñayuu ñayíví tu ní cácuni i cuatáhú i jeē máá yá cúu. ¹¹ Ni quiji ya nuū ñayuu máá yá nación hebreo, te ñayuu ún tu ní cájetáhú i ya. ¹² Te vésú súcuan te sava ñayuu chi ni cajetáhú i ya, te ni cacandíje i jeē sáha ya jehē i. Te nuū máá i ni jēhe ya jnúhun jeē ndúu i sēhe Yaā Dios. ¹³ Te jeē ndúu i sēhe Yaā Dios, nasūu jíin modo jeē cácacu ñayuu ini ñayíví, ni nasūu síquī jeē cácuni tēe, chi máá Yaā Dios sáha ya jeē ndúu i sēhe ya.

¹⁴ Te máá Yaā cúu Jnúhun Yaā Dios ni nduu ya tēe, te ni condee yā jíin yó. Te ni cajito yó jéé yóhō luu cújéhnu ya, chi máñúhún-ni ya cúu Sēhe Tátá yā, Yaā cújéhnu súcuan. Te máni máá jéé sáha ya jeē váha yóhō, te máni máá jnúhun ndaā cahán

yā. ¹⁵ Te Juan ni nacani de jnúhun ya, te ni cahán de:

Yaā váha cúu jeē ni cáhán rī náa áchí rí jeē Yaā quiji chi cújéhnu ga yā vésú ruhū, chi je iyó yá nde ná tu cacu ri, achí de.

¹⁶ Te ndihi yó ní canihīn yō cuehē ndasí jeē váha íyó núu yā, chi máni jeē váha sáha sáha ya jíin yó. ¹⁷ Moisés ni steén de ley Yaā Dios nuū ñayuu jenahán, te Jesucristo chi sáha ya jeē váha yóhō te steén yā tāca jnúhun ndaā Yaā Dios nuū yō. ¹⁸ Tú ni ñin ñayuu ní jíto cuiti nuū Yaā Dios. Te máñúhún-ni Sēhe ya jeē ndeé yá jíin Tátá yā, suu ya ni steén nuū yō ndese Yaā cúu Yaā Dios.

Jnúhun Jesús jeē ni cáhán Juan tēe scuándute

(Mt. 3.11-12; Mr. 1.7-8; Lc. 3.15-17)

¹⁹ Te ñayuu hebreo ñuu Jerusalén, ni catajé i jecu sutū jíin tēe grupo levita jeē cájejníñu ini templo, ni jengoo de nuū Juan, návāha cajnúhún de ndé ñin cúu Juan te na jniñu ndíso de. ²⁰ Te Juan cájí ní cachi de:

Nasūu rúhū cúu Cristo, achí de.

²¹ Te ni cacajnúhún tucu de:

Núu súcuan ¿te ndé ñin cúu ró? ¿A cúu ró Elías, tēe ni nacani jnúhun Yaā Dios nde jenahán, chí naún?

Te ni cahán Juan:

Nasūu de cúu ri.

Te ni cacajnúhún tucu de:

Núu súcuan ¿te á cúu ró tēe nacani jnúhun Yaā Dios jeē achí tutu ĩi jeē quiji?

Tuú, achí tucu Juan.

²² Te ni cacahán tucu jíin de:

¿Te ndé ñin cúu ró núu súcuan? Cachi nuū rī jijnáhan ri, chi jíni ñúhún castūhun rí nuū tāca tēe ni catajé rúhū vējicoo ri. Cachi na jniñu ndíso ró ví.

²³ Te ni cahán Juan:

Máá rí cúu tēe jeē ni cáhán Isaías, tēe ni nacani jnúhun Yaā Dios nde jenahán, jeē quiji ri cana jee ri nde nuū ñúhún téhé. Te cáhán rī jíin ñayuu jeē na sátūhva i máá i, chi quiji máá Jítoho yō. Achí Juan.

²⁴ Te tēe grupo fariseo cácuu jeē ní catajé tēe ni quijícoo ún. ²⁵ Te ni cacajnúhún de Juan:

Núu súcuan ¿te naun scuándute ró te núu nasūu Cristo ni Elías ni máá tēe quiji nacani jnúhun Yaā Dios cúu ró?

26 Te ni cahān Juan:

Ruhū chi jíin ndute scuándute ri. Te mēhñu ró jíināhan ró íne ñn Yaā jeē tu cájini rō. 27 Te Yaā un cúu jeē ni cáhān rī jeē quíji ya te cújēhnu ga yā vēsú ruhū. Chi tú na vé jēhnu cuítu cúu rí nuū yā, ni jeē cuajníñu ri nuū yā vēsú ñn jniñu lúli gá nájñuhun jeē ndají rí correa ndijēn yā. Achí de.

28 Súcuān ni cuu jeē ní candajñuhún de jíin Juan nde Betábara jeē íne ichi núu cáne niāndii yūte Jordán, nuū scuándute Juan.

Siquē jeē cúu ya Londe Yaā Dios

29 Te inga quivī un ní jito Juan nuū Jesús jeē véji ya nuū de. Te ni cahān de jíin ñayuu:

Condēhe jíināhan ró, chi yāha véji Yaā cúu Londe jeē ní tají Yaā Dios, te cuu yā jeē sándoo ya cuēchi ñayuu ñayiví. 30 Yaā yāha cúu jeē ni cáhān rī jeē quíji ñn Yaā cujēhnu ndasí, chi je íyó yá nde ná tu cacu ri. 31 Te nde saá te tu ní jíin rī jeē yāha cúu Yaā ní tají Yaā Dios. Te ni quíji ri jeē scuándute ri ñayuu ñuu yō Israel jíin ndute, návāha stéén rī nuū i jeē suu ya cúu, achí Juan.

32 Te suni ni cahān gā de jñuhun ya:

Ni jito ri Espíritu Santo, ni cuun ya ichi ándiví, cáa ya nájñuhun paloma, te ni queue ya xinī Jesús. 33 Te nde saá te ná tu cuni rī jeē Jesús cúu. Te máá Yaā Dios jeē ní tají yá ruhū jeē scuándute ri jíin ndute, ni cahān yā jíin rí: Núu ni jito ró jēe cúun Espíritu Santo te quendōo xinī ñn tēe, yūcuān cúu Yaā jeē cuáha Espíritu Santo condee ini anuá ñayuu, achí Yaā Dios. 34 Te je ni jito ri ún, te nácani cáj rí jñuhun jeē máá yá cúu Sēhe Yaā Dios. Achí Juan.

Uū tēe jeē ní cana ya xīhna gā

35 Te inga quivī ún te Juan íne tucu de yūcuān jíin úu tēe cájica jíin de. 36 Te ni jito de nuū Jesús jeē jíca ya yūcuān. Te ni cahān de:

Condēhe jíināhan ró, chi yūcuān cúu Yaā cúu Londe jeē ní tají Yaā Dios.

37 Te ndindúú tēe cájica jíin Juan ni cajini sōho de jñuhun yāha, te ni candiquīn de Jesús. 38 Te ni ndió cóto Jesús, te ni jito ya jeē cándiquīn de yatā yā. Te ni cahān yā jíin de:

¿Na vé cánanducú ró?

Te ni cacahān de jíin yá:

Maestro, ¿ndé nuū ndeé ní?

39 Te ni cahān yā jíin de:

Quíngoo yó te cuni rō.

Te ni jengoo de, te ni cajito de nuū ndeé yá. Te ni caquendōo de jíin yá quivī ún, chi nájñuhun cacuūn jehíni cúu.

40 Te Andrés, ñani Simón Pedro, cúu ñn jeē ndindúú tēe un jēe ní cajini sōho jñuhun ni cahān Juan, te ni candiquīn Jesús. 41 Te Andrés, yachí ni jenanducú de ñani de Simón, te ni cahān de jíin:

Ni caquijnāhan ri jíin Mesías, achí de. Te jñuhun un cúní cahān Cristo, Yaā ní tají Yaā Dios.

42 Yūcuān na te cuanuhun de nuū Jesús jíin Simón. Te nuū ní jito Jesús nuū Simón, te ni cahān yā:

Máá ró cúu Simón sēhe Jonás. Te nde vijna te conaní ró Cefas, achí yá. Te jñuhun un cúní cahān Pedro, jeē cuni cahān yuū.

Jeē ní cana ya Felipe jíin Natanael

43 Te inga quivī un cúní Jesús quihīn yā región Galilea. Te ni nihīn jñāhan ya jíin Felipe, te ni cahān yā jíin de:

Condiquīn ruhū na quihín yō.

44 Te Felipe cúu tēe ñuu Betsaida, jeē cúu ñuu Andrés jíin Pedro. 45 Te ni jenanducú de Natanael, te ni cahān de jíin:

Ni canihīn jñāhan ri jíin Yaā jeē yosó jñuhun ya nuū tútu ley jeē ní tee Moisés, jíin núu tútu ni catee tēe ni canacani jñuhun Yaā Dios nde jenahán. Te Jesús sēhe José ñuu Nazaret cúu ya. Achí de.

46 Te ni cahān Natanael jíin de:

¿Te ndese cúu cujēhnu ñn tēe jeē ní cacu ñuu ndahú Nazaret?

Te ni cahān Felipe:

Quihín yō de cuni rō, achí de.

47 Te ni jito Jesús jeē véji Natanael, te ni cahān yā:

Yāha véji ñn tēe ndaā jeē cúu ndije yucūn Israel, chi tu stáhú cuítu de, achí yá.

48 Te ni cahān Natanael jíin yá:

¿Ndese jíiní ni sáña?

Te ni cahān Jesús:

Je ni jito ri rohó ndé ná tu cana Felipe xinī rō, ná íne ró jēhē nundēhe higo, achí yá.

49 Yūcuān na te ni cahān Natanael jíin yá:

Maestro, máá ní cúu Sēhe Yaā Dios, máá ní cúu Rey ñuu yō Israel, achí de.

⁵⁰ Te ni cahān Jesús:

¿A máá jēē ni cáhān rī jeē ní jito ri rohó ná íne ró jéhē nundéhe higo, te jeē yúcuan cándíje ró rúhū naún? Tuú chi coo jniñu jéhnū ga coto ró vēsú jeē yáha, áchí yá jíin de.

⁵¹ Te ni cahān gā yā:

Jendaá cahán rī jíin ró jijnáhan ró jēē nde vijna te coto ró jēē núne andiví, te tǎcá ndajéhé Yaā Dios cándaa cánuu nuū ruhū, Yaā ní nduu tēe, áchí yá.

Jeē ni jéhēn yā #n vico nándāha ñuu Caná

2

¹ Te ni yáha unī quivī, te ni íyo #n vico nándāha ñuu Caná ndañū Galilea. Te yūcuan íne náná Jesús. ² Te suni ni cacana i Jesús jíin tēe cáscuáha jíin yá, ni jehēn yā vico un jíin de. ³ Te ni ndoco vino. Te náná Jesús ni cahān ña jíin yá:

Ni ndoco vino i, áchí ña.

⁴ Te ni cahān Jesús jíin ña:

¿Naun cáhān ni súcuan jíin ná nánā? Chi ná tu quee quivī jeē sáha ná jniñu jéhnū, áchí yá.

⁵ Te náná yā chi ni cahān ña jíin ñáyuu cájeni cohō:

Sáha ró jíjnáhan ró táca jēē cahān yā jíin ró. Achí ña.

⁶ Te yūcuan íyó íñū tenéjā yuū jeē ñúhun ndute cájichi ñayuu hebreo jeē ndúndoo i nuū Yaā Dios. Te #n #n tenéjā un cánda cuhun cuūn xico chí ciento litro ndute. ⁷ Te ni cahān Jesús jíin ñáyuu cájeni cohō:

Scútú ndī rō tǎcá tenéjā yáha.

Te ni cascútú ndī i. ⁸ Te ni cahān yā jíin i:

Vijna te quēen ró jecu te quindecá ró coto ndee tēe ndíto vico, áchí yá.

Te ni cajendeca i nuū de. ⁹ Te ni séyūhú de ndute jeē ní nduu vino, te tu jíin de ndé ní canihīn i. Chi máni mozo un cúu jeē cájini, chi máá i ni caquēen ndute ún. Yūcuán na te tēe ndíto vico ni cana de tēe nándāha. ¹⁰ Te ni cahān de jíin:

Tāca ñáyuu chi xīhna gā vino váha cájēhe i, te núu je ni cajihī vāha ñayuu cáhīn vico, yūcuán na te jéhe de vino ndahú na. Te máá ró tucu ni sáha ró, chi nde jeē sándīhí te jéhe ró vino jeē yóhyo vāha ga jíhi, áchí de.

¹¹ Jniñu yáha jēē ni sáha Jesús ini ñuu Caná ndañū Galilea cúu jniñu jéhnū xīhna

ñúhún jēē ni sáha ya jeē steén yā poder yā. Te súcuan ni steén yā jeē yóhyo cújéhnū ya. Te tēe cáscuáha jíin yá ni cacandíje de ya.

¹² Te ná ni yáha jniñu yáha, te cuahān yā ñuu Capernaum jíin náná yā jíin táca ñani yā jíin tēe cáscuáha jíin yá. Te ni coyūcu yá yūcuán jecu quivī.

Jeē ní quenehen ya ñayuu ini templo

(Mt. 21.12-13; Mr. 11.15-18; Lc. 19.45-46)

¹³ Te jeē cuácuyajni vico pascua casáha jnāhan ñuu yā hebreo, te cuahān yā ñuu Jerusalén. ¹⁴ Te ini templo cáhnu ni jito ya ñayuu cáxícó stiquī jíin lanchi jíin paloma, jíin ñáyuu castáyí xūhun, cáyūcú i nuū mesa i. ¹⁵ Te jeē súcuan ni jito ya, te ni sáha ya #n cuarta ñī. Te ni scúnu ya tǎcá i ini templo, nde jíin lanchi jíin stiquī i. Te ni jete yā xūhun ñáyuu castáyí. Te ni scotúú yá táca mesa i. ¹⁶ Te ni cahān yā jíin ñáyuu cáxícó paloma:

Tava tǎcá quiti yáha. Te ma sáha ró yáhu ini vehe Tátá rī. Achí yá.

¹⁷ Yūcuán na te tēe cáscuáha jíin yá, ni canucūhun ni de jnūhun yósó núu tútu íi: Je yajni cuu na jēē yóhyo ndíhví ni na síquī vehe ní, áchí yá jíin Tátá yā, achí tutu.

¹⁸ Te tēe ñuu yā hebreo ni cacajñuhún de ya:

¿Na jniñu jéhnū sáha ró jēē steén rō poder rō, te cucáhnū ni rī jeē ndíso jniñu ró sáha ró súcuan? áchí de jíin yá.

¹⁹ Te ni cahān yatá Jesús:

Canu rō templo yáha, te nuū unī quivī te nucondichi sáha ri, achí yá.

²⁰ Yūcuán na te ni cacahān tēe hebreo un: Uū xico íñū cuiyā te ni jínu ni cuvāha templo yáha. Te róhó, ¿á núu unī-ni quivī te nucondichi sáha ró naún? Achí de.

²¹ Te templo jeē cahān Jesús cúu máá yiqui cúñu yā, chi cahni ñayuu yā te natecu yā nuū unī quivī. ²² Jeē yúcuan cúu jeē ná ni natecu yā jeē ni jíhī yā, te tēe cáscuáha jíin yá ni canucūhun ni de jeē ni cáhān yā jnūhun yáha. Te ni cacandíje de jnūhun jeē yosó núu tútu íi, jíin jnūhun yáha jēē ni cáhān Jesús.

Jeē jíin Jesús ndese cáa ini anuá ñayuu

²³ Te ná íne Jesús ñuu Jerusalén máá vico pascua, te cuehē ñayuu ni cacandíje i jeē cúu ya Cristo, chi ni cajito i tǎcá jniñu jéhnū sáha ya jeē steén yā poder yā. ²⁴ Te máá Jesús

chi tu ní jétáhú yá i, chi je jíní yā ndese cáa ini anuá i jínáhan i. ²⁵ Te tu jíní ñúhún yá jeē cáchi ni ñn ñayuu nuū yā ndese íyó táca ñáyuu, chi máá yá je jíní yā ndese cáa ini anuá i.

Jeē ní candajñúhún Jesús jíin Nicodemo

3

¹ Te ni ñyo ñn tē grupo fariseo, naní de Nicodemo, te cújéñnu de nuū ñáyuu ñuu de hebreo. ² Tēe yáha ní quiji de nuū Jesús ñn jecuáa, te ni cahān de jíin yá:

Maestro, je cájini na jée maá Yaā Dios ni tají yá nihín jée steén ni jnúhun ya nuū na jíináhan ná. Chi núu tu íyó Yaā Dios jíin ní, te ma cúu sáha ní ni ñn jniñu jéñnu nájnúhun sáha máá ní jeē steén ni poder ní, áchí de.

³ Te ni cahān Jesús:

Jendaá cahān rī jíin ró jeē núu tu nacacu jeē ñn ñayuu, te ma cúu quívi i ndaha Yaā Dios jeē ndacu ya jniñu nuū i, áchí yá jíin de.

⁴ Te ni cahān Nicodemo jíin yá:

¿Te ndese cuu nacacu ñn tēe te núu je ni jehnu de? ¿A cuu nucúhun tucu de chíji náná de te nacacu tucu de? áchí de.

⁵ Te ni cahān Jesús:

Jendaá cahān rī jíin ró jeē núu tú nacacu ñn ñayuu, te ma cúu quívi i ndaha Yaā Dios jeē ndacu ya jniñu nuū i. Te jeē nácacu i cúu jeē ndúndoo cuēchi i nájnúhun jíin ndute, te condee Espíritu Santo ini anuá i. ⁶ Jeē cácu sáha ñayuu, chi sēhe ñayuu cúu. Te jeē cácu sáha Espíritu yā, chi sēhe ya cúu. ⁷ Ma náa ni rō caní ni rō ndese cúu jnúhun ni cahān rī jíin ró jeē cánuú jée nacacu jeé ró jíináhan ró. ⁸ Te tachí chi quée cuahān ndé-ni cúu nuū cuní maá, te jíin sōho ró jée cáyu, te tu jíin ró ndé nuū véji ni ndé nuū quihín. Te suni súcuan cúu táca ñáyuu jeē nácacu sáha Espíritu, chi tu jíin ró ndese sáha ya jniñu ún, áchí yá.

⁹ Te ni cahān tucu Nicodemo:

¿Ndese ga cúu núu súcuan?

¹⁰ Te ni cahān Jesús:

Máá ró cúu ñn maestro jeē kujéñnu nuū ñáyuu ñuu yō Israel, te ¿á tu jécúhun ni rō jnúhun yáha naún? ¹¹ Jendaá cahān rī jíin ró jeē jnúhun cájecúhun ni rī cúu jeē cácahān rī jíin ró. Te cánacani cájí rí jnúhun jniñu ní

cajito rī. Te tu cácañdije ró jnúhun cácahān rī. ¹² Chi ni cahān rī jnúhun ndese sáha Yaā Dios ini ñayívi, te tu cácañdije ró. Núu súcuan ¿te ndese candije ró núu cahān rī jnúhun táca ndese sáha ya nde andiví?

¹³ 'Chi ni ñn tu ní cáa andiví jeē cúni ndese íyó yúcuan, chi máñúhún-ni ruhū, Yaā ní nduu tēe. Chi andiví ndée rí, te ni cuun rí vēji rī. ¹⁴ Te nájnúhun ni cata caa Moisés ñn coō cáa nuū ñn yujnu, ná ni cajica ñayuu nuū ñúhun téhé, suni súcuan máá rí, Yaā ní nduu tēe, cánuú jée cóndita caa rí jicā cruz. ¹⁵ Te súcuan cánuú návāha táca ñáyuu jeē candije i jeē jnáma rí i, ma jnahnú ndetū i, chi sa suhva cotecu i ní cáni andiví.

Yōhyo ni cundáhú ni yā ñayuu ñayívi

¹⁶ 'Chi Yaā Dios yōhyo ni cundáhú ni yā ñayuu ñayívi. Jeē yúcuan ní tají yá Sēhe ya ni quiji, vésú mañúhún-ni ya iyó, návāha táca ñáyuu jeē candije i jeē jnáma ya i, ma jnahnú ndetū, chi sa suhva cotecu i ní cáni andiví. ¹⁷ Chi tu ní tají Yaā Dios Sēhe ya ini ñayívi jée snahnú ndetū yā ñayuu, chi sa suhva jeē jnáma ya ñayuu.

¹⁸ 'Ñayuu jeē candije i jeē jnáma ya i, ma jnahnú ndetū i. Te ñayuu tu cándije, je ni jnahnú ndetū i, chi tu ní cándije i máá Séhe Yaā Dios, te máá ñn-ni ya iyó. ¹⁹ Máá Yaā jeē stíndēe ini anuá ñayuu, je ni quee ya ini ñayívi. Te cánujnahan gā ni ñayuu caca i nájnúhun nuū née vésú nuū luz yā, chi jniñu cásáha i cúu jniñu née. Jeē yúcuan cúu jeē jnahnú ndetū ñayuu tu cácañdije ún. ²⁰ Chi táca ñáyuu casáha jniñu née, tu nújnahan cuiti ni i luz yā. Te tu jéhe i jnúhun jeē stíndēe yá ini anuá i, chi tu cúni i jeē natūu jniñu née cásáha i. ²¹ Te ñayuu jeē cájica jíin jniñu ndaā, jéhe i jnúhun jeē stíndēe yá ini anuá i, návāha natūu ndijin jeē táca jniñu cásáha i cúu jniñu cúni Yaā Dios. Achí yá jíin de.

Jeē ni cahān tucu Juan jnúhun Jesús

²² Yūcuán na te Jesús jíin tēe cáscuáha jíin yá, cuahān yā región Judea. Te ni condee yā yūcuán jecu tiempo jíin de, te cáscuándute de ñayuu. ²³ Te suni scuándute Juan, íne de lugar jeē naní Enón yajni ñuu Salim, chi yūcuan íyó cuéhē ndute. Te ni quijicoo

ñayuu nuū de, te ni scuándute de i. ²⁴ Súcuan ni sáha Juan nde ná tu quívi de vecāa.

²⁵ Yūcuán na te sava tēe cáscuáha jíin Juan yōhoyo ni cacahān de jíin sava jnáhan de hebreo siquī núu ndé in cúu modo vāha ga jeē cúchi ñayuu ndundoo i nuū Yaā Dios. ²⁶ Te ni quecoo de nuū Juan, te ni cacahān de:

Maestro, tēe ní ine jíin ní yūte Jordán ichi núu cáne niāndii, jeē ní nacani ní jnūhun de nuū ná, vijna te scuándute máa de, te ndivii ñayuu cuango i nuū de.

²⁷ Te ni cahān Juan:

Ni in tēe ma cúu sáha de jniñu Yaā Dios te núu ma tejniñu ya de. ²⁸ Máa ró jijnáhan ró chi ni cajini sōho ró jéē ni cáhān cají rí jeē násūu máa rí cúu Cristo, chi cúu ri in jeē ní tají Yaā Dios jeē cósnūu nacani jnūhun jeē quíji ya. ²⁹ Te núu cásáha vico quíjnáhan, te máa yīi cúu jeē ndéca ñasihí. Te amigo yīi un íne jíin de, te jíni sōho jnūhun cáhān de. Te yōhoyo cúsi ni jíni sōho jnūhun cáhān yīi ún. Te suni súcuan ruhū, chi cúu ri nájñūhun amigo yīi, chi ni quee máa Cristo, te yōhoyo cúsi ni rí jíni sōho ri jnūhun cáhān yā. ³⁰ Te jíni ñuhún jéē ndujéhu ga máa yá te ndululí gá máa rí, achí Juan.

Jeē ní quiji ya nde nuū sucún

³¹ Te Yaā jeē véji nde andiví, cújéhu ya nuū ndihí. Chi táca jéē ní cacu ini ñayívi yáha, sēhe ñayívi cúu, te máni jnūhun ñayívi cáhān. Te Yaā jeē véji ichi ándiví, chi cújéhu ya nuū ndihí ñayuu. ³² Te nácani ya jnūhun jeē ní jito ya jíin jéē ní jini sōho ya. Te ñayuu chi tu cácdije i jnūhun cáhān yā. ³³ Te núu in ñayuu candije i jnūhun cáhān yā, suu cúu jeē jejnūhún i jeē Yaā ndaā cúu Yaā Dios. ³⁴ Chi Yaā ní tají Yaā Dios véji, máni máa jnūhun Yaā Dios cahán yā. Chi Yaā Dios tu yícuáha jéhe ya Espíritu yā nuū Yaā ní tají yá. ³⁵ Máa yá jeē cúu ya Tatá, yōhoyo maní yā jíin Séhe ya, te ndivii ni jéhe ya ndaha Séhe ya jeē ndacu ya jniñu nuū. ³⁶ Ñayuu jeē candije máa Séhe ya jeē jnáma ya i, cotecu i ní cáni andiví. Te ñayuu tu cúní candije Séhe ya, ma cótecu i ní cáni andiví, chi sa suhva cuáha Yaā Dios castigo jeē ndoho i ní cáni.

Jeē ni cáhān Jesús jíin ñahan ñūu Samaria

4

¹ Te tēe grupo fariseo, ni canihin de jnūhun jeē iyó cuéhē gā tēe cáscuáha jíin Jesús vésú jíin Juan, jíin jéē cuehē gā ñayuu scuándute ya vésú Juan. ² Te nasūu jéē scuándute máa yá, chi tēe cáscuáha jíin yá cúu jeē cascuándute. ³ Te ná ni jini Jesús jeē súcuan ni canihin de jnūhun, te ni quenda ya región Judea, te cuanuhun yā región Galilea.

⁴ Te ichi jeē nuhún yā chi yáha región Samaria. ⁵ Te ni jinū yā in ñuu región Samaria jeē naní Sicar, yajni ñuhun jeē ní jéhe Jacob nuū séhe de José nde jenahán. ⁶ Te yūcuan íne pozo jeē naní pozo Jacob. Te ni cucōo Jesús xiin pozo un, chi ni cuíta yá jeē cuahán yā ichi. Te nájñūhun cahuxí uū cúu. ⁷ Te ni quee in ñahan Samaria, véji ña vequihin ña ndute. Te ni cahān Jesús jíin ña:

Cuáha ní ndute coho ná, áchí yá.

⁸ Te tēe cáscuáha jíin yá, chi je cuango de nde ñuu, cuacuaan de jeē cáji de jíin yá. ⁹ Te ñahan Samaria un ní cahān ña jíin yá:

¿Ndese cúu jeē jicán ni ndute nuū ná coho ní? Chi tēe hebreo cúu ní, te ñahan Samaria cúu ná, áchí ña.

Súcuan ni cahān ña, chi ñayuu hebreo tu cácahān i jíin ñayuu Samaria. ¹⁰ Te ni cahān Jesús:

Núu jeē jiní ni ndese cúní Yaā Dios sáha ya jeē váha níhín, jíin ndé in cúu sáña jéē jicán na ndute nuū ní, yūcuán na te máa ní cacān ni núu ná, te cuáha ná ndute jeē cótecu ni ní cáni sáha, áchí yá.

¹¹ Te ni cahān ña jíin yá:

Tátā, yōhoyo cúnú pozo yáha, te tú na vé ndahá ní jéē táva ní ndute. Núu súcuan ¿te ndé nuū nihín ni ndute jeē cótecu na sáha?

¹² ¿Te á cújéhu ga máa ní vésú jíi yō Jacob, chí naún? Chi máa de ni stóo de pozo yáha nuū yō. Te yáha ní cajihí máa de ndute, jíin táca séhe de, jíin quiti ndéca de. Achí ña.

¹³ Te ni cahān Jesús:

Tāca ñayuu jeē jíhi ndute yáha, chi jichí tucu i. ¹⁴ Te ñayuu coho ndute jeē cuáha na núu i, chi ma jichí cuíti gā i. Chi ndute jeē cuáha ná un, cane ini i nájñūhun ndute jeē cáne ñuhún, te sáha jeē cotecu i ní cáni, áchí yá jíin ña.

15 Te máá ña tu ní jécūhun ni ña, te ni cahān ña jíin yá:

Tátā, cuāha ní ndute ún coho ná, návāha ma jichí cuiṭi gā ná, ni tuá jíni ñúhun quiqui-hin ná ndute pozo yáha, áchí ña.

16 Te ni cahān Jesús jíin ña:

Cuácana ní yḥ ní te quiji ní jíin de, áchí yá.

17 Te ni cahān ña:

Tú yḥ ná íyó.

Te ni cahān Jesús:

Ndaā cahán ni jéē tú yḥ ní íyó. 18 Chi je ni cuu uhūn yḥ ní, te tēe ndéca ní vijna chi nasūú yḥ ní cúu de. Yāha cúu jeē ni cáhān ndaā ní, áchí yá.

19 Te jeē súcuan ni cahān yā, te ni cahān ña:

Tátā, ḥin tēe nácani jnūhun Yaā Dios cúu ní, jéni ni ná. 20 Tāca jíi na ñáyuu Samaria, yucu yáha ní cachiñúhún i Yaā Dios. Te máá ní ñayuu hebreo, cácahān ni jéē ñuu Jerusalén cúu nuū cánuú chiñúhún yó yā, achí ña.

21 Te ni cahān Jesús jíin ña:

Nánā, candíje ní jnūhun cáhán na, chi quee quiṽi jeē ni nasūú yucu yáha ni nasūú ñuu Jerusalén cúu nuū chiñúhún ní maá Yaā cúu Tátá, chi ndiḥi-ni lugar te cuu chiñúhún ní yá. 22 Máá ní ñáyuu Samaria tu cájini ni ndé ḥin cúu jeē cáchiñúhún ní. Te máá ná jijnáhan ná chi cájini na ndé ḥin cúu jeē cáchiñúhún ná. Chi nde nuū maá ná jijnáhan ná ñáyuu hebreo cúu nuū véji Yaā jnama ñayuu. 23 Te je ni quee quiṽi jeē ñáyuu cáchiñúhún ndāā, vijna te chiñúhún ndije i Yaā cúu Tátá nde jíin ini jíin ánuá i. Chi máá Tátá cúni yā jeē súcuan chiñúhún ñáyuu yā. 24 Yaā Dios cúu Espíritu, te ñayuu jeē cuní i chiñúhún i ya, cánuú jéē chiñúhún ndije i ya jíin ini jíin ánuá i, áchí yá.

25 Te ni cahān ñahan ún:

Jíni na jéē quiji Mesías jeē cúu Cristo, Yaā jeē tají Yaā Dios. Te núu ni quee maá yá, te stéén cají yá tāca jnūhun nuū yō.

26 Te ni cahān Jesús:

Máá ná jeē cahán jíin ní, suu ná cúu Yaā ún.

27 Te sá cáhán gā yā súcuan, te ni nde-coo-ni tēe cáscuáha jíin yá. Te ni canaa ni de cájito de jeē ndájñuhun yá jíin ñahan yúcuan. Te ni ḥin de tu ní cájnūhún de ya núu na vé cájnūhun yá ña chí na vé ndájñuhun yá jíin ña. 28 Yūcuán na te ñahan un ní stóo ña quīyi

ñā, te cuahān ñā nde ñuu. Te ni cahān ña jíin ñáyuu ún:

29 Nehen na quíngoo yó te coto ró ḥin tēe jeē ní cachi ndiḥi tāca jéē ni sáha ri. Sanaa te máá yá cúu Cristo, jeē cándetu yó quiji, áchí ña.

30 Yūcuán na te ni quendacoo i ñuu ún, te cuangoo i nuū íne Jesús. 31 Te nde ná tu jinūcoo i, te tēe cáscuáha jíin yá ni cacahān ndahú de jíin yá:

Maestro, caji ni stāā víi, achí de.

32 Te ni cahān yā jíin de:

Iyó stāā caji rī jeē tu cájini rō ndese cúu.

33 Yūcuán na te tēe cáscuáha jíin yá, ni cacajnūhun jnáhan de:

¿A ní quindecā ḥin ñayuu jeē ní yeji yā, chí naún? áchí de.

34 Te ni cahān Jesús:

Jeē ní cachi rī jeē iyó jéē cáji rī cúu jeē cúsiḥi ni rī sáha ri jniñu cúní Yaā ní tají ruhū véji rī, jíin jéē sínu rī jniñu ún. 35 Te cácahān rō jeē cúmanī cuūn gā yoō te tah-ndē trigo. Te ruhū chi cáhán rī jíin ró: Condēhe jijnáhan ró, chi ñayuu cuehē cácuu i nájnūhun trigo jeē jé ni cuaan jeē tahndé, chi je cáhiyo tūhva i candíje i ruhū. 36 Te tēe scándíje ñayuu cácuu de nájnūhun tēe cájehnde trigo, te nihīn de yāhu de. Te jeē cánastútú de ñayuu cúu jeē cótecu i ní cáni andiví. Te tēe cáscuíté núu jnūhun rī, ḥinuú-ni cusīḥi ni de jíin tēe cástéén gā jnūhun rī. 37 Chi ndaā cúu jnūhun jeē cahán: ḥin tēe jéte, te inga tēe nástútú, áchí. 38 Te suu cúu jeē ní tají rī rohó jijnáhan ró jéē scándíje ró ñayuu jeē jé ni canihīn jnūhun ya ni casáha inga tēe. Chi inga tēe je ni canacani de jnūhun nuū ñáyuu, te máá ró chi nájnūhun cánastútú ró i cúu jeē scándíje ró i.

39 Te cuehē ñayuu Samaria jeē cáyūcú ñuu ún, ni cacandíje i Jesús jeē ní jini sōho i jnūhun ni cahān ñahan ún. Chi ni cahān ña: Ni cachi ya ndiḥi tāca jéē ni sáha ri. 40 Te jeē yúcuan cúu jeē ñayuu Samaria un ní jinūcoo i nuū yā, te ni cacahān ndahú i jíin yá jeē na quéndōo ya ñuu i. Te ni ndōo ya yúcuan úu quiṽi. 41 Te cuehē gā i ni cacandíje i ya jíin jnūhun cáhán maá yá. 42 Te ni cacahān i jíin ñahan ún:

Tuá niní jéē cahán maá ró te candíje ri yā, chi je ni cajini sōho ri jnūhun cáhán maá yá.

Te cájini yō jeē maá yá cúu ndije Cristo, Yaā jnama ñayuu ñayīví. Achí i.

Jeē ní nasávāha ya sēhe tēe ndíso jniñu nuū rey

⁴³ Te nuū ni yáha uū quivī ún, te Jesús ni quenda ya Samaria, te ni quihin tucu ya ichi cuanuhun yā región Galilea. ⁴⁴ Chi je ni cahān maá yá jeē tēe cánacani jnūhun Yaā Dios, tu cáhīyo yíñúhún ñayuu ñuu de jíin de, te suni súcuan ni cuu jíin máá yá. ⁴⁵ Te ná ni najinū yā Galilea, te ñayuu un ní cajetáhú i ya, chi suni máá i ni jengoo i vico pascua ñuu Jerusalén, te ni cajito i tēcá jniñu ní sáha ya quivī ní iyo vico ún.

⁴⁶ Yūcuán na te ni jehēn tucu ya ñuu Caná ndañū Galilea, nuū ni sáha ya jeē ndúte ni nduu vino. Te ini ñuu Capernaum ni iyo ñn tēe cújēhnu jeē ndíso jniñu nuū rey. Te cúhú sēhe de. ⁴⁷ Tēe un ní jini jnūhun de jeē ní najinū Jesús región Galilea jeē ni jéhēn yā región Judea. Te ni jecondēhé de ya, te ni cahān ndahú de jíin yá jeē na quíhín yā jíin de vehe de, te nasávāha ya sēhe de, chi je yajni cuu i. ⁴⁸ Te ni cahān Jesús jíin de:

Núu tú coto ró jniñu jēhnu jeē náa ni rō sáha, te ma candíje cuiṭi rō jijnáhan ró, áchí yá.

⁴⁹ Te tēe ndíso jniñu nuū rey, ni cahān de:

Cava vāha ni ní na quíhín yō, chi núu cucuéé ní te cuu sēhe ná, áchí de.

⁵⁰ Yūcuán na te ni cahān Jesús:

Cuánuhun vehe ró, chi cotecu sēhe ró.

Te tēe un ní candíje de jnūhun ni cahān Jesús, te cuanuhun-ni de. ⁵¹ Te ní ní jíca de cuanuhun de vehe de, te ni quiijcoo mozo de ni caquijnahan i de, te ni cacahān i:

Je ni nduvāha sēhe ní, áchí i.

⁵² Te ni cajnūhún de na hora ni quejéé nduvāha i. Te ni cacahān i jíin de:

Cahñ jeē ícu ni quenda quíji i.

⁵³ Yūcuán na te máá tátá i ni sáha de cuenta jeē hora un cúu jeē ni cáhān Jesús jíin de jeē cótecu sēhe de. Te ni candíje de jíin ní vehe de jeē cúu ya Yaā ní tají Yaā Dios.

⁵⁴ Yāha cúu vuelta uū jeē ni sáha Jesús jniñu jēhnu jeē ni stéén yā poder yā región Galilea, jeē ní najinū yā jeē ni jéhēn yā región Judea.

Jeē ní nasávāha ya ñn tēe cátu yuhu pila Betesda

5

¹ Yūcuán na te cuahān tucu Jesús ñuu Jerusalén, chi íyó tucu vico cásáha jnáhan ñuu yā hebreo. ² Te Jerusalén íyó ñn pila ndute yajni yéhyí jēe naní yéhyí lanchi. Te yuhu hebreo naní Betesda. Te nuū íne pila un íyó úhūn corredor. ³ Te ini tēcá corredor un cécāa cuehē ñayuu cácuñū, jeē cuaá, jeē chacuá, jeē ni íjin. Te cándetu i jeē canda ndute ún. ⁴ Chi íyó quivī jeē cúun ñn ndajéhé yā ini pila un, te scánda ya ndute. Te ñayuu quivī xīhna gā ini pila un ná scánda ya ndute, te nduvāha i na-ni cuehyī ndóho i. ⁵ Te yūcuan íyó ñn tēe jeē ní cuu ocō xahūn unī cuiyā cuhú de. ⁶ Te ni jito Jesús jeē cátu de, te ni jini yā jeē ní cuu cuehē cuiyā cuhú de. Te ni cahān yā jíin de:

¿A cúni rō nduvāha ró? áchí yá.

⁷ Te ni cahān tēe cúhú un jíin yá:

Tu níhín na ni ñn tēe squivī sāñá ini pila hora jeē canda ndute. Chi tēca jínu jeē cuní na quivī ná, te quivī-ni inga ñayuu xīhna gā. Achí de.

⁸ Te ni cahān Jesús:

Ndocuññi te naquihin ró camilla rō te caca ró, áchí yá.

⁹ Te tēe un ní nduvāha-ni de. Te ni naquihin de camilla de, te ni quejéé de jíca de. Te quivī ndétātu cúu quivī ún. ¹⁰ Yūcuán na te jnáhan de tēe hebreo un ní cacahān jíin de:

Quivī ndétātu cúu vijna. Te áchí ley jeē ma cúu condiso ró camilla rō.

¹¹ Te ni cahān tēe ni nduvāha ún:

Tēe ni nasávāha ruhū, ni cahān de jíin rí jeē náquihin rí camilla rí te caca rí, áchí de.

¹² Yūcuán na te ni cacajnūhún un de:

¿Ndé tēe ni cahān jíin ró jeē náquihin ró camilla rō te caca ró?

¹³ Te tēe ni nduvāha ún, tu jíni de ndé ñn cúu jeē ní nasávāha de. Chi cáhīin cuehē ñayuu yūcuán, te Jesús je cuahān yā. ¹⁴ Te cúcuéé gá te ni najnáhan Jesús jíin de ini templo cáhnu. Te ni cahān yā:

Vijna chi je ni nduvāha ró. Ma sáha ga rō cuēchi, chi núu tuú, te quiiji ñn jnūndóho xeēn gā siquī rō, áchí yá.

¹⁵ Yūcuán na te cuahān tēe ún, te ni castūhún de nuū jnáhan de hebreo un jēe

Jesús cúu jeē ní nasávāha ya de. ¹⁶ Te siquī jeē ní sáha Jesús jniñu yáha quivī ndétátú, jeē yúcuan cúu jeē tée hebreo un cájito xeēn de ya, te cácuni de cahni de ya. ¹⁷ Te ni cahān Jesús jíin de:

Máá Tátá rī chi nī cáni te nde vijna sáha ya jniñu váha, te suni súcuan ruhū sáha ri jniñu váha.

¹⁸ Te siquī jeē ni cáhān yā súcuan, te tée hebreo un víhyá gā cácuni de cahni de ya. Chi nasūu máá ĩn-ni jeē tu squícu ya jeē cahán ley siquī quivī ndétátú, chi suni jeē ni cáhān yā jeē Tátá yā cúu Yaā Dios, te súcuan sáha ĩnuú yá máá yá jíin Yaā Dios.

Siquī jeē ndíso jniñu Sēhe Yaā Dios

¹⁹ Te ni cahān Jesús:

Jendaá cahán rī jíin ró jíināhan ró: Ruhū jeē cúu Sēhe Yaā Dios, tú na vé cúu sáha ri jeē maá rí, chi máni sáha ri jeē jíto ri sáha Tátá rī. Chi tāca jéē sáha Tátá rī, suni sáha ruhū jeē cúu ri Sēhe ya. ²⁰ Chi máá Tátá rī, manī yā jíin ruhū jeē cúu ri Sēhe ya, te stéén yā nuū rī ndihi jeē sáha ya. Te jéhnu ga jniñu stéén yā vēsú jeē ní cuu vijna, jeē naa ni rō coto ró jíināhan ró. ²¹ Te nájnūhun jeē nastécu maá Tátá rī ndīyi te cotecu tucu i, suni súcuan ruhū jeē cúu ri Sēhe ya, nástécu rī ndé-ni cúu jeē cuní maá rí. ²² Te máá Tátá rī, tu sándaā yā siquī ni ĩn ñayuu, chi ni jēhe ya jnūhun jeē sándaā maá rí siquī tāca ñáyuu, chi Sēhe ya cúu rī. ²³ Te súcuan te coo yíñúhún ndihi ñayuu nuū rī, nájnūhun yíñúhún i nuū Tátá rī. Te ñayuu tu íyó yíñúhún núu rī, núu súcuan te suni tu yíñúhún i nuū máá Tátá rī jeē ní tají yá ruhū vēji rī.

²⁴ Jendaá cahán rī jíin ró: Núu ĩn ñayuu chuhun ni i jnūhun cáhān rī, te candíje i jeē Yaā ndaā cúu Yaā ní tají rúhū vēji rī, ñayuu ún cotecu i nī cáni andiví, te ma jnahnú ndetū i. Chi ma cúu ga i nájnūhun ndīyi, chi sa suhva cotecu i nī cáni. ²⁵ Jendaá cahán rī jíin ró jeē quiji quivī, te vijna je ni quejéé, jeē tāca ñáyuu cácuu nájnūhun ndīyi, cuni nahín i jnūhun cáhān ruhū, Sēhe Yaā Dios. Te ñayuu cuatáhú, chi cotecu i nī cáni. ²⁶ Chi nájnūhun íyó poder maá Tátá rī jeē sáha ya jeē técu ndihi-ni, suni súcuan ni jēhe ya poder nuū ruhū jeē sáha ri jeē cotecu ndihi-ni. ²⁷ Te suni ni sáha ya jeē

ndíso jniñu ri sándaā rī siquī ñayuu, chi cúu ri Yaā ní nduu tée. ²⁸ Ma náā ni rō caní ni rō siquī jnūhun cáhān rī. Chi quee quivī jeē tāca ndīyi cuni sōho i jnūhun cahān rī, ²⁹ te quendacoo i nuū yíndūji i. Te ndīyi jeē ní casáha jniñu váha, natecu i jeē cótecu i nī cáni. Te ndīyi jeē ní casáha jniñu néé, natecu i te quivícoo i nuū jnahnú ndetū i.

Ndé vé cúu jeē steén jeē ní tají Yaā Dios yā

³⁰ Tú na vé cúu sáha ri jeē maá rí. Chi nájnūhun ndácu Yaā Dios jniñu nuū rī, súcuan sándaā rī jniñu. Te ndaā sándaā rī, chi tu sáha ri jeē cuní maá rí, chi sáha ri jeē cuní maá Tátá rī, Yaā ní tají rúhū vēji rī. ³¹ Núu ruhū cahán rī jeē cúu ri Sēhe Yaā Dios, te cachi ñayuu jeē tu jéjníñu jnūhun cáhān rī. ³² Te íyó inga jeē cahán jeē cúu ri Sēhe ya. Te jíin rī jeē jnūhun un jéē cahán yā, chi níhín jniñu. ³³ Máá ró ni catají ró téē ni cacajnūhún de Juan. Te Juan chi ndaā ni cahān de jnūhun ri. ³⁴ Te vēsú súcuan te nasūu rúhū cúu jeē jíin ñúhún jeē steén ĩn téē jeē Sēhe Yaā Dios cúu rī. Chi máá ró cúu jeē jíin ñúhún návāha candíje ró te cácu ró jíināhan ró. Jeē yúcuan ní cahān rī jeē íyó ndaā jnūhun ri jeē ní nacani Juan. ³⁵ Máá Juan ni cuu de nájnūhun ĩn lámpara jeē cayú te cúndijin, cúu jeē ní nacani de jnūhun ri. Te máá ró, jecu-ni quivī ni canujnahan ni rō jeē ni stéén de nuū rō. ³⁶ Te íyó jéē steén cají gá jeē cujéhnu ri vēsú jeē ni cáhān Juan. Suu jniñu sáha ri, jniñu jeē ní tejníñu Tátá rī ruhū jeē sáha ri, jniñu un stéén ndije jeē maá yá ni tají rúhū vēji rī. ³⁷ Te Tátá rī jeē ní tají yá ruhū vēji rī, suni máá yá cahán nuū tútu ĩi jeē cujéhnu ri, vēsú tu ní cájini sōho cuiti rō jeē cahán yā, ni tu ní cájito ró yá. ³⁸ Te tu ní cáchuhun ni rō jnūhun un jéē ni cáhān Tátá rī, chi tu cácandíje ró rúhū, Yaā ní tají yá vēji. ³⁹ Cánanducú vii rō tāca jnūhun cáhān tutu ĩi, chi cájeni ni rō jeē yúcuan níhín rō jnūhun jeē cótecu rō nī cáni sáha. Te jnūhun siquī maá rí cúu jeē cahán tutu ún. ⁴⁰ Te vēsú súcuan te tu cácuni rō cuatáhú ró ruhū quivícoo ró ndaha ri návāha cotecu rō nī cáni.

⁴¹ Tu chíhi ri cuenta jnūhun jeē cácahān ñayuu jeē cujéhnu ri. ⁴² Chi je jíin rī ndese cándaā ánuá rō jeē tu cáhīyo manī rō jíin Yaā Dios. ⁴³ Ruhū vēji rī jíin jniñu cuní

Tatá rī, te tu cájetáhú ró ruhū. Te núu inga tēe quee de jíin jniñu cúní maá de, sa tēe un yáchī cuatáhú ró de. ⁴⁴ ¿Ndese cuu candíje ró jíin náhan ró? Chi máni cáconi ró jeē cujéhnú ró sáha jnánhan ró, te tu cánducú ró jeē cujéhnú ró sáha Yaā Dios, jeē maá ñin-ni ya iyó. ⁴⁵ Ma cáni ni ró jeē cáquin rī cuēchi siquī ró nuū Tatá rī. Chi íyó ñin jeē cáquin cuēchi siquī ró, suu Moisés, tēe jeē cáñuhun ni ró jeē quendōo ndaā ró jíin ley jeē ní tee de. ⁴⁶ Chi núu ní cáncandíje ró jéē ní tee Moisés, te suni candíje ró rúhū nuú, chi jnūhun máá rí ni tee de. ⁴⁷ Te núu tu cáncandíje ró jnūhun rí jeē ní tee de, ¿te ndese candíje ró jnūhun cáhán maá rí núu súcuan? Achí yá jíin de.

Jeē ni scáji yā uhūn mil tēe
(Mt. 14.13-21; Mr. 6.30-44; Lc. 9.10-17)

6

¹ Yūcuán na te cuahān Jesús inga lado mar Galilea, jeē cúu mar Tiberias. ² Te yōhyo cuehē ñayuu ni candiquīn i ya, chi ni cajito i tācá jniñu jéhnú jeē steén yā poder yā jeē ní nasávāha ya ñayuu cácuñū. ³ Te ni caa ya ñin yucu, te ni cucōo ya yūcuan jíin tēe cáscuáha jíin yá. ⁴ Te je ni cuyajni vico pascua jeē cáncūhun ni jnánhan ñuu yā hebreo jeē ní cacācu i nuū ñayuu nación Egipto. ⁵ Te ni ndacoto ya, te ni jito ya jeē véjicoo cuehē ndasí ñayuu. Te ni cahān yā jíin Felipe:

¿Ndé nuū cuaan yó jéē cáji ñayuu yáha jíin náhan i?

⁶ Te súcuan ni cahān yā jeē jíto ndee yā de núu ndese cahān de. Chi je jíiní maá yá ndese sáha ya. ⁷ Te ni cahān Felipe jíin yá:

Te ni ma cánda uū ciento denario staā, ni vésú jeē cáji i jecu jecu jíin náhan i, áchí de.

⁸ Yūcuán na te ni cahān Andrés, ñani Simón Pedro, inga tēe scuáha jíin yá un:

⁹ Yáha íne ñin sūchi yí jéē ndíso i uhūn staā cebada jíin uū chācá. ¿Te ndé canda cuiti ún, chi ñayuu cuehē ndasí cúu?

¹⁰ Yūcuán na te ni cahān Jesús:

Cahān jíin ñayuu na cúcōo i, áchí yá.

Te yūcuan cáa cuehē ite, te ni cacucōo i, te nájnūhun uhūn mil tēe cúu. ¹¹ Te ni quihín Jesús staā ún, te ni nacuatáhú yá nuū Yaā Dios. Te ni jēhe ya nuū tēe cáscuáha jíin yá, te máá de ni casaja de nuū ñayuu ní

cacucōo ún. Te suni súcuan ni sáha ya jíin chāca, te ni cayeji i nasaa cáconi maá i. ¹² Te nuū ní candutú chíji i, te ni cahān yā jíin tēe cáscuáha ún:

Nastútú ró tācá pedazo jeē ni ndóo, návāha tu stívi cuiti yō.

¹³ Te ni canastútú de, te ni chitú úxī uū jíca pedazo jeē ni ndóo siquī ndihúhún staā cebada un jeē tuá ni ndíhi caji ñayuu. ¹⁴ Te ñayuu un ní cajito i jniñu jéhnú ni sáha Jesús jeē ni stéén yā poder yā. Te ni cacahān i:

Jendaá ndije jeē tēe yáha cúu jeē cahān tutu jeē quíji ñin ñayívi jéē nácani jnūhun Yaā Dios. Achí i.

¹⁵ Te ni jini Jesús jeē cáconi i sáfuerza i ya jeē cuu ya rey i núu. Te ni cujiyo tucu máá ñin-ni ya, ni caa ya cuahān yā nuū sucún gá yucu.

Jeē ní jica jéhé yá nuū mar
(Mt. 14.22-27; Mr. 6.45-52)

¹⁶ Te nuū cuácuaa, te tēe cáscuáha jíin yá ni nanuu de cuangoo de nde mar. ¹⁷ Te ni ndíviicoo de ini barco, te ni cascáca de jeē quíngoo de nde inga lado mar nde ñuu Capernaum. Te je ni cunee, te ná tu ndee Jesús nuū de. ¹⁸ Yūcuán na te ni jequíhi ñin tachí níhin, te sáha jeē ndónnda ndute mar un. ¹⁹ Te jeē ní cuu nájnūhun uhūn chí íñū kilómetro cájica de jíin barco, te ni cajito de jeē jíca Jesús nuū mar, te ni cuyajni ya vēji ya nuū barco. Te ni cayūhú de. ²⁰ Te máá yá ni cahān yā jíin de:

Máá rí cúu. Ma yūhu ró jíin náhan ró.

²¹ Te ni cacusí ni de jeē na quívi ya ini barco. Te ni sáha ya jeē yachí-ni ni jíinūcoo-ni de ñuhun íchi núu cuángoo de ún.

Jeē cáncanducú ñayuu Jesús

²² Te inga quívi ún, te ñayuu jeē ní caquendōo inga lado mar, ni cajini i jeē tēe cáscuáha jíin yá cuangoo de jíin máñuhún-ni barco ni íne yūcuán, jíin jéē tu ní quívi Jesús quihín yā jíin de jíin náhan de. ²³ Te sava ga barco jeē véjicoo ichi ñuu Tiberias, ni quecoo yajni lugar nuū ní cayeji i staā jeē ní nacuatáhú máá Jítoho yō jehē. ²⁴ Te jeē ní cajito ñayuu un jéē tuá Jesús íne ya yūcuán, ni tēe cáscuáha jíin yá, te ni quíviicoo i tāca barco un, te cuangoo i ñuu Capernaum cuananducú i ya.

Jesús cúu staā jeē cótecu yō ñí cáni

²⁵ Te nuū ni jínūcoo i nde inga lado mar, te ni nanihīn jnáhan i jín Jesús. Te ni cacajñuhún i ya:

Maestro, ¿na hora ni quee ni yáha?

²⁶ Te ni cahān Jesús:

Jendaá cahān rī jín ró jeē cānanducú ró ruhū siquī jeē ní cayeji ró nde ni candutú chíji ró, te nasūu siquī jeē ní cajito ró táca jniñu jéhu jeē steén rī poder rī. ²⁷ Ma cóndihvī ni ró maá siquī jeē caji ró jeē yachī nataxīn, chi sa suhva condihvī ni ró siquī jeē nihín ró jeē cótecu ró ñí cáni sáha. Te máá rí, Yaā ní nduu tēe, cuāha ri nájnūhun staā jeē cótecu ró ñí cáni sáha. Chi Tátá rī Yaā Dios ni jeni ya ruhū jeē sáha ri súcuan. Achí yá jín i.

²⁸ Yūcuán na te ni cacajñuhún i ya:

¿Ndese sáha ná návāha squícu ná jniñu cúní Yaā Dios?

²⁹ Te ni cahān Jesús:

Jniñu jeē cúní Yaā Dios cúu jeē candíje ró rúhū, Yaā ní tají yá vēji.

³⁰ Yūcuán na te ni cacahān i:

Núu súcuan ¿te na jniñu jéhu sáha ní coto ná jijnáhan ná te candíje ná jéē ní tají yá nihín? ¿Na jniñu cúu jeē sáha ní? ³¹ Chi táca jí yō jenahán ni cayeji de maná jeē ní cuun ichi ándiví ndé nuū ñūhun téhé, nájnūhun yósó núu tútu: Yaā Dios ni jéhe ya staā ni cuun ichi ándiví, ni cayeji i, áchí tutu. Achí i jín yá.

³² Te ni cahān Jesús:

Jendaá cahān rī jín ró: Nasūú Moisés ni jéhe staā un núu de jijnáhan de jeē ní cuun ichi ándiví, chi máá Tátá rī ni jéhe. Te máá yá jéhe staā ándiví jéē cótecu ró ñí cáni sáha.

³³ Chi staā jéhe Yaā Dios cúu máá Yaā ní quiji ichi ándiví, te sáha ya jeē ñáyuu ñayiví cotecu i ñí cáni ándiví. Achí yá.

³⁴ Te ni cacahān i jín yá:

Níní cuáha ni stāá ún caji na núu súcuan.

³⁵ Te ni cahān Jesús:

Máá rí cúu máá stāá jeē cótecu ró ñí cáni sáha. Ndé vé quiví ndaha ri, ma cúu cuiti gā sōco. Te ndé vé candíje ruhū, ma jichí cuiti gā. ³⁶ Te nájnūhun je ni cahān rī jín ró, tu cáandíje ró rúhū, vésú ni cajito ró núu rī. ³⁷ Táca ñáyuu jeē sáha Tátá rī jeē candíje i ruhū, máá i quivícoo ndaha ri. Te

jétáhú rí táca jéē cúní quiví ndaha ri, chi ma squéhichí cuiti rī quihīn. ³⁸ Chi ni quiji ri ichi ándiví návāha sáha ri jniñu jeē cúní Yaā ní tají rúhū, te nasūu jéē sáha ri jeē cúní maá rí. ³⁹ Te jniñu jeē cúní Tátá rī, Yaā ní tají rúhū, cúu jeē ma scuíta ri ni ñn ñayuu ni jéhe ya nuū rī, chi condito ri i te nastécu rī i quiví jínu ñayiví. ⁴⁰ Te Yaā ní tají rúhū, cúní yá jeē táca ñáyuu jeē nihín i jnūhun ruhū, Sēhe Yaā Dios, te candíje i ruhū, cotecu i ñí cáni ándiví. Chi nastécu rī i quiví jínu ñayiví. Achí yá.

⁴¹ Yūcuán na te ni caquejéé jnáhan ñuu yā hebreo cácahān de siquī yá, chi ni cahān yá jeē maá yá cúu staā ní quiji ichi ándiví. ⁴² Te ni cacahān de:

¿A násūu tēe yáha cúu Jesús, sēhe José? Te cájini yō tatá de náná de. ¿Te ndese cúu jeē cahān de jeē ni quiji de ichi ándiví núu súcuan?

⁴³ Te ni cahān Jesús jín de:

Ma cahān ró siquī rī jijnáhan ró. ⁴⁴ Ni ñn ñayuu ma cúu quiví i ndaha ri núu ma sáha Tátá rī jeē cúu ni i quiví i, chi máá yá ni tají rúhū vēji ri. Te nastécu rī i quiví jínu ñayiví. ⁴⁵ Te suhva yósó núu tútu ni catee tēe ni canacani jnūhun Yaā Dios: Tāca i chí stéén Yaā Dios nuū i, áchí. Núu súcuan te táca ñáyuu jini sōho jnūhun cáhān Tátá rī, te jétáhú i jeē steén yá nuū i, ñayuu ún chí quivícoo i ndaha ri.

⁴⁶ Te tu ní jito ni ñn ñayuu nuū maá Tátá rī. Chi máñuhún-ni ruhū ni jito ri nuū yá, chi nde nuū maá yá vēji ri. ⁴⁷ Jendaá cahān rī jín ró jijnáhan ró jéē ñayuu jeē candíje i jeē jnáma ri i, máá i cotecu i ñí cáni. ⁴⁸ Máá rí cúu staā jeē cótecu ró ñí cáni sáha. ⁴⁹ Táca jí ró jenahán, ni cayeji de staā maná jeē ní cuun ichi ándiví ndé nuū ñūhun téhé, te tu ní sáha jeē cótecu de ñí cáni ándiví. ⁵⁰ Te staā jeē cahān rī jeē vēji ichi ándiví, chi na-ni ñayuu caji, te cotecu i ñí cáni ándiví. ⁵¹ Te suu máá rí cúu staā un jéē ní quiji ichi ándiví jéē sáha jeē cótecu ró ñí cáni. Te ñayuu jeē caji staā yáha, cotecu i ñí cáni ándiví. Te staā jeē cuáha ri un cúu yiqui cúñu rī, te cuáha ri návāha ñayuu ñayiví cotecu i ñí cáni ándiví. Achí yá.

⁵² Yūcuán na te jnáhan ñuu yā hebreo ni cacahān de jín táca jnáhan de:

¿Ndese cuu cuāha tēe yáha yiqui cúñu de caji yō? achí de.

⁵³ Te ni cahān Jesús jíin de:

Jendaá cahán rī jíin ró: Núu tú candíje ró jéē yiqui cúñu ruhū, Yaā ní nduu tēe, cúu nájnūhun staā, te niñī rī cúu nájnūhun ndute, núu súcuan te ma cótecu rō ní cání andiví. ⁵⁴ Chi ñayuu cá candíje jeē yiqui cúñu rī cúu nájnūhun staā te niñī rī cúu nájnūhun ndute, máá i cotecu i ní cání. Te nastécu rī i quiví jínu ñayiví. ⁵⁵ Chi yiqui cúñu rī jíin níñī rī cúu ndije jeē sáha jeē cótecu i ní cání. ⁵⁶ Te ñayuu cá candíje jeē yiqui cúñu rī jíin níñī rī cúu nájnūhun staā jíin ndute jeē cótecu i ní cání sáha, máá i ní ní ndúú i jíin rí, te ndúú rí jíin i. ⁵⁷ Máá Tátá rī, Yaā técu, ni tají yá ruhū vēji rī, te técu rī sáha máá yá. Te suni súcuan, ñayuu cá candíje jeē cúu rī nájnūhun staā i ndute i, suni súcuan cotecu i ní cání sáha rī. ⁵⁸ Máá rí cúu staā ní quiji ichi ándiví. Te staā jeē cahán rī tu cúu nájnūhun staā maná jeē ní cayejí taca jíi rō jenahán, chi tu ní sáha jeē cótecu de ní cání. Te staā jeē cahán rī, chi ñayuu caji, cotecu i ní cání sáha, áchí yá.

⁵⁹ Taca jnúhun yáha ní steén Jesús nuū ñáyuu ní candutútú ini vehe i sinagoga ñuu Capernaum.

Jnúhun cotecu yō ní cání

⁶⁰ Te cuehē ñayuu cascuáha jíin yá, ni cajini sōho i jnúhun yáha jéē ni steén yā. Te ni cacahān máá i:

Yōhoyo yí jnúhun cáhán yā yāhá. ¿Ndese cuu cuatáhú yó?

⁶¹ Te ni jini Jesús jeē cacahān i jeē yí cúu jnúhun yāhá, te ni cahān yā jíin i:

¿A yí sáha jnúhun yáha jíin ró jijnáhan ró?

⁶² ¿Te ndese sáha ró núu coto ró jéē ruhū, Yaā ní nduu tēe, ndaa rī nuhun rī nuū ni cóndee rī xīhna ñúhún? ⁶³ Máá ánuá ñayuu cúu jeē sáha jeē técu i. Chi yiqui cúñu i tu jéjníñu cuiti súcuan. Te taca jnúhun ni cahān rī jíin ró cúu jeē quéndōo vāha ánuá rō, te cotecu rō ní cání sáha. ⁶⁴ Te sava ró chi tu cá candíje ró. Achí yá.

Chi nde xīhna ñúhún je jíin Jesús ndé-ni cúu ñayuu jeē ma cándíje, jíin ndé ñn de cúu jeē nastúu de ya. ⁶⁵ Te ni cahān gā yā:

Jeē yúcuán ní cahān rī jíin ró jeē ma cúu quiví ni ñn ñayuu ndaha rī, te núu tu sáha Tátá rī jeē cúu ni i quiví i, áchí yá.

⁶⁶ Te nde quiví ún te cuehē ñayuu cascuáha jíin yá, ni castóo i ya, te tuá ni cájica i jíin yá. ⁶⁷ Yúcuán na te ni cahān yā jíin máá ndihúxí uū tēe cascuáha jíin yá:

¿A suni cá cuni máá ró quingoo ró, chí naún?

⁶⁸ Te ni cahān Simón Pedro:

¿Ndé núu gā quingoo ná? Chi máá ní cúu jeē nácani jnúhun jeē cótecu na ní cání sáha.

⁶⁹ Te ni cacandíje ná te cájini na jéē maá ní cúu Cristo, Sēhe Yaā Dios, Yaā técu, achí de.

⁷⁰ Te ni cahān Jesús:

Te vēsú ni nacāji rī ndihúxí uū rō, te íyó ñn ró jeē ní quiví jexeén ini. Achí yá.

⁷¹ Te súcuan ni cahān yā siquí Judas Iscariote, sēhe Simón. Chi máá de nastúu de ya, vēsú ñn jnáhan jeē uxí uū tēe cascuáha jíin yá cúu de.

Jeē tu ní cá candíje ñani Jesús

7

¹ Yúcuán na te jíca cuu Jesús región Galilea. Chi tu cúní yā caca cuu ya región Judea, chi jnáhan ñuu yā hebreo jeē cáyūcu yúcuán, cá cuni de cahni de ya. ² Te cuacuyajni vico jeē casáha ñayuu yā hebreo vehe ramadá, cáyūcú i chíji. ³ Te ñani yā ni cacahān de jíin yá:

¿Naun máá yáha-ni íne ró? ¿Naun tú quihín rō región Judea, návāha tēe yúcuán jeē cá candíje de róhó, suni coto de jniñu jéhu sáha ró. ⁴ Chi núu cúní ñn tēe jeē cuité núu jnúhun de, te tu sáha yuhu de jniñu. Te núu sáha nde ró taca jniñu jéhu, vāha ga na sáha ró jéē cúni ndivii ñayuu.

⁵ Súcuan ni cacahān ñani yā jíin yá, chi ni máá de tu cá candíje de ya. ⁶ Yúcuán na te ni cahān Jesús:

Ná tu quee máá quiví jeē quihín rī. Te máá ró jijnáhan ró chi na-ni quiví-ni te cuu quingoo ró. ⁷ Chi ma quití ni ñayuu ñayiví núu rō, te máá rí chi quití ni i jíto i ruhū, chi cáhán rī jeē jini rī jeē máni jniñu néé casáha i. ⁸ Cuángoo máá ró vico ún. Te máá rí chi ma quihín rī vijna, chi ná tu quee máá quiví cánuú quihín rī. Achí yá.

⁹ Súcuan ni cahān yā jnúhun yáha jíin de, te ni quéndōo ya Galilea.

Jeē ni jéhēn Jesús vico vehe ramadá

¹⁰ Te nuū ni yáha ñani yā cuangoo de vico ún, te sáa te suni cuahān maá yá. Te tú cuahān ndijin yā, chi tu ní stéen yā maá yá.

¹¹ Te jnáhan ñuu yā hebreo cánanducú i ya nuū víco ún, te cácahān i:

¿Ndé nuū íne tēe ún? áchí i.

¹² Te yōhyo ni cacahān ñayuu jeē siquí yā, chi sava i cácahān: Tēe vāha cúu de. Te sava ga i cácahān: Tuú chi stáhú de ñayuu.

¹³ Te yuhu-ni ni cacahān i jnūhun ya, chi cáyūhú i jeē quití ni jnáhan i tēe hebreo.

¹⁴ Te jeē ní cuu sava vico, te ni quee Jesús, ni quiví ya templo cáhnu, te ni quejéé yá steén yā jnūhun. ¹⁵ Te ni canaa ni jnáhan ñuu yā hebreo cájini sōho i, te ni cacahān i:

¿Ndese jíní tēe yáha cuéhē jnūhun ndíchí, chi tu ní jíca de escuela? áchí i.

¹⁶ Yūcuán na te ni cahān Jesús:

Jnūhun stéen rī chi nasūu jnúhun máá rí cúu, chi jnūhun jeē ni jéhe máá Yaā ní tají rúhū cúu. ¹⁷ Núu ñn ñayuu cuní i sáha i jniñu cuní Yaā Dios, ñayuu ún chi jecūhun ni i núu nde nuū Yaā Dios vēji jnūhun stéen rī, chí jnúhun jeē jéni ni maá-ni ri cúu. ¹⁸ Tēe cáhān jnūhun jéni ni maá de, tēe un ndúcú de jeē na sájéhnu ñayuu de. Te núu ñn tēe ndúcú de jeē sajéhnu de Yaā ní tají de, tēe un cúu tēe ndaā, te tú na jnūhun stáhú íyó jíin de.

¹⁹ ¿A násūu jēe ni jéhe Moisés ley yā nuū rō jeē squícu ró? Te ni ñn ró tu cásquícu. Chi sa jeē cácu ni rō cahni rō ruhū, ¿te najehē cúu? Achí yá.

²⁰ Te ni cacahān ñayuu cuehē ún:

Tachí ndóho ró. ¿Ndé ñn cuní cahni rohó?

²¹ Te ni cahān Jesús:

Ni nasávāha rī ñn tēe quiví ndétátú, te ndivii rō ni canaa ni rō ni cajito ró jēe quiví ndétátú ni sáha rī jniñu ún. ²² Te Moisés ni jéhe de ley jeē cúu circuncidar nuū rō. Te cásaha ró circuncidar sūchi yí núu uná quiví jeē ní cacu i, vésú quiví ndétātu cúu. (Te nasūu máá Moisés ní jéquin ley un, chi je ni íyo nuū tāca jíí de.) ²³ Núu súcuan te núu cásaha ró circuncidar vésú quiví ndétātu cúu, návāha squícu ró ley Moisés, ¿te najehē cáquití ni rō jeē ní nasávāha ndihí ri ñn tēe quiví ndétátú? ²⁴ Ma yachí cani ni rō jeē cuéchi cúu jeē sáha rī. Chi sa cani vāha ni rō siquí tācá jniñu váha. Achí yá.

Jeē ní cachi Jesús ndé nuū vēji ya

²⁵ Yūcuán na te sava ñayuu ñuu Jerusalén ni cacajnúhun jnáhan i:

¿A násūu tēe yáha cúu jeē cánanducú tēe cácu jéhnu jeē cáhni de, chí naún? ²⁶ Te yāha cáhān ndijin de nuū chitú, te tú na jnūhun cácahān jíin de. ¿A sanaa te ni cacundaā ni tēe cácu jéhnu jeē tēe yáha cúu Cristo jeē achí tutu jeē quiji, chí naún? ²⁷ Te tuú chi je cájini yō nuū vēji tēe yáha. Te jeē quíji Cristo, chi ni ñn yó má cúni ndé chí quiji ya. Achí i.

²⁸ Yūcuán na te ni cahān jee Jesús jeē steén yā jnūhun ini templo:

Cájini rō ruhū, te cájini rō ndé ñuu vēji ri. Te vésú súcuan te máá Yaā ndaā cúu jeē ní tají rúhū vēji ri, te tú vēji ri jeē cuní maá rí. Te tu cájini rō ndese Yaā cúu ya. ²⁹ Te máá rí chí jíní rī yā, chí nde nuū maá yá vēji ri, te máá yá ni tají rúhū, achí yá.

³⁰ Yūcuán na te ni canducú de jni de ya. Te ni ñn de tu ní cúu jni de ya, chí ná tu quee maá quiví jeē jni de ya. ³¹ Te cuehē ñayuu chí ni cacandíje i ya, te ni cacahān i:

¿A násūu tēe yáha cúu Cristo, Yaā ndé tu yó jēe quiji? Chi cuehē ndasí jniñu jéhnu sáha ya jeē steén yā poder yā. Achí i.

Jeē ní catajé de policía jeē jni de Jesús

³² Te ni cajini tēe fariseo jeē súcuan cácahān ñayuu jnūhun ya. Te máá de jíin sūtū cácu jéhnu, ni catajé de policía cándito templo jeē jni de ya. ³³ Te ni cahān Jesús:

Jecu na quiví condee rī jíin ró jijnáhan ró. Yūcuán na te nuhun rī nuū Yaā ní tají rúhū vēji ri. ³⁴ Te nanducú ró ruhū, te ma nánihīn rō ruhū. Chi ma cúu jinūcoo ró núu cóndee rī. Achí yá.

³⁵ Yūcuán na te máá tēe un ní cacajnúhun jnáhan de:

¿Te ndé nuū quihín tēe yáha jeē ma nánihīn yō de? ¿A quihín de nuū jnáhan yó hebreo jeē ní cajitē núu cáyūcu ndé nación Grecia? ¿Te á steén de jnūhun nuū ñayuu Grecia, chí naún? ³⁶ ¿Te na jnūhun cúu jeē ni cáhān de jíin yó jeē nanducú yó de te ma nánihīn yō de, chí ma cúu jinūcoo yó núu cóndee de? Achí tēe un jíjnáhan de.

Siquí ndute jeē cótecu yō ñn cáni sáha

³⁷ Te quivī sándihí vico ún te cúu vico cáhnu ga. Te quivī un ní ndocuiñí Jesús, te ni cahān jee ya:

Núu ndé ñáyuu jnáa ndasí i tāca jēē váha jeē sáha ri jehē i, nájñuhun jeē jichí i ndute, núu súcuan te na quiví i ndaha ri te coho i ndute, cúu jeē nihín i jeē váha ún. ³⁸ Te ñáyuu jeē candíje jeē jnáma ri i, chi ini anuá i condee Espíritu Santo, te cuu ya nájñuhun yūte cáne ñuhún jeē sáha ya jeē cótecu i ní cáni, nájñuhun cáhán tutu ií. Achí yá.

³⁹ Te súcuan ni cahān yā jeē ñáyuu candíje jeē jnáma ya i, nihín i Espíritu Santo. Chi ná tu quee Espíritu ún, chí ná tu ndaa Jesús quinhun yā nuū ndujéhu ya.

Jeē ní cacusññ ñáyuu siquī yā

⁴⁰ Te sava ñáyuu cuehē ún, ná ni cajini sōho i jñuhun yáha, te ni cacahān i:

Jendaá jeē téē yáha cúu jeē achí tutu jeē quiji de nacani de jñuhun Yaā Dios, achí i.

⁴¹ Te sava ga i ni cacahān:

Tēē yáha cúu Cristo, Yaā ní tají Yaā Dios.

Te sava ga i chi ni cacahān i:

Tuú chi nasūu Galilea quiji Cristo. ⁴² Chi cáhán tutu ií jeē ndé yucūn rey David cacu Cristo, te cacu ya ñuu Belén, ñuu nuū ní cacu máá David. Achí i.

⁴³ Te súcuan te ni cacusññ ñáyuu jeē siquī yā. ⁴⁴ Te sava i cácuni i jññ i ya, te ni ññ i tu ní jññ i ya.

Jeē tu ní cá candíje tēē cácu jéhu

⁴⁵ Yūcuán na te policia cándito templo tu ní cájññ de Jesús, te cuanungoo de nuū tāca téē fariseo jín nuū sutú cácu jéhu. Te tēē ún ni cacajññ de policia:

¿Najehē tu ní quécoo ró jín de? áchí.

⁴⁶ Te ni cacahān policia un:

Tú cuñi ni ññ tēē cáhán váha ndasí nájñuhun cáhán tēē yúcuan, áchí.

⁴⁷ Te ni cacahān tēē fariseo:

¿Te á suni nde máá ró jijnáhan ró ní stáhú de naún? ⁴⁸ Ni ññ jnáhan ruhū tēē cácu jéhu jín téē fariseo, tu cá candíje ri jñuhun cáhán tēē ún, ¿te naun cá candíje máá ró? ⁴⁹ Te ñáyuu cuehē yáhá jēē tu cájecūhun ni i ley Moisés, chi jnahnū ndetū i jeē cá candíje i tēē ún, áchí de jijnáhan de.

⁵⁰ Te ni cahān Nicodemo, tēē ni jéhēn nuū yā ññ jecuáá, te suni ññ tēē fariseo cúu de:

⁵¹ Cáhán ley yō jeē ma cúu tee yó cuéchi siquī ññ tēē, te núu tú xihna gā cuni sōho yó ndese cáhán de, návaha cucáhnu ni yō na cuéchi ni sáha de. Achí de.

⁵² Te ni cacahān jín de:

Te róhó, ¿á suni nde Galilea vēji ró jēē cáhán ró jehē tēē ún? Nanducú váha ró núu tútu ií te cuni ró jeē ndé Galilea tu quenda cuñi ni ññ tēē nacani jñuhun Yaā Dios. Achí jín de. ⁵³ Te cuanungoo de ná vehe ná vehe de.

Jñuhun ñahan ní casiquí ndéē jnáhan

8

¹ Te ni caa Jesús cuahān yā yucu Olivos.

² Te jeē cuácundijin inga quiví, te ni ndee tucu ya templo. Te ndihí ñáyuu ni quecoo i nuū yā. Te ni cucōo ya, te ni steén yā jñuhun nuū i. ³ Yūcuán na te tēē cástéén tutu ley Yaā Dios jín téē grupo fariseo, ni quecoo de jín ññ ñahan jeē ní canihñ de ña jeē casiquí ndéē ña. Te ni cajeni de ña mēhñú. ⁴ Te ni cacahān de jín yá:

Maestro, ni canihñ ná ñahan yáha jēē casiquí ndéē ña. ⁵ Te ley Moisés ndácu jññ nuū yō jeē cuáha yó yūu xiní ñahan cása sácuan návaha cuu ña. Te máá ní, ¿ndese cáhán ní?

⁶ Te súcuan ni cacahān de jeē cájito ndee de ya núu cuatáhú yá jeē cáhán ley un, chi núu tuú te caquin de cuéchi siquī yā. Te Jesús ni jñta ndeyí ya, te ni tee ya nuū ññuhun jín xiní ndáha ya. ⁷ Te jeē cácajnñuhun cácajnñuhun de ya, te ni ndonehen ya maá yá, te ni cahān yā jín de:

Núu ndé ññ máá ró tú na cuéchi ró, te xihna gā maá ró cuáha yuū xiní ña núu súcuan, áchí yá.

⁸ Te ni jñta ndeyí tucu ya, te ni tee tucu ya nuū ññuhun. ⁹ Te nuū ní cajini de jeē súcuan ni cahān yā, te ni cajecūhun ni de jeē suni cáhñyo cuéchi de. Te ná ññ ná ññ de ni quendacoo de cuahān de, xihna gā tēē jéhu ga te nde nuū ní ndihí na. Te ni ndōo máá ññ na Jesús jín ñahan índichi mēhñú un. ¹⁰ Te ni ndonehen tucu ya maá yá, te tuá ni ññ tēē un ní jñto ya, chí máá na ñahan ún. Te ni cahān yā jín ña:

¿Ndé chí cuángoo tēē cájequin cuéchi siquī ró? ¿A tú ni ññ de ní ndón da cahān gā cuéchi siquī ró?

11 Te ni cahān ña:
 Tú ni ñn de, achí ña.
 Yūcuán na te ni cahān Jesús jíin ña:
 Ni ruhū, ma cahán rī cuēchi siquī rō.
 Cuáhán te ma sáha ga rō cuēchi, achí yá.

Jesús cúu máa luz jeē steén ini anuá ñayuu

12 Te inga jínu ni cahān Jesús jíin ñayuu:
 Máa rí cúu nájñūhun luz jeē steén ini
 anuá ñayuu ñayiví, jeē sáha jeē jécūhun ni
 i siquī Yaā Dios. Ñayuu candíje ruhū chi
 ma cáca i nájñūhun nuū néē, chi sa suhva
 coneváha i luz ini anuá i jeē sáha jeē cótecu
 i ní cáni.

13 Yūcuán na te ni cacahān tēe fariseo jíin
 yá:

Róhó chi cáhán rō jñūhun jehē maá ró, te
 tu jéjníñu jñūhun cáhán rō.

14 Te ni cahān Jesús jíin de jíjnáhan de:

Vēsú cáhán rī jehē maá rí, te íyó ndāā
 jñūhun cáhán rī. Chi jíni rī ndé nuū véji
 rī jíin ndé nuū quihín rī. Te róhó tu cájini
 rō ndé nuū véji rī ni ndé nuū quihín rī.

15 Máa ró chi cuenta ñayuu ñayiví cásandaā
 rō siquī jñūhun cáhán rī. Te ruhū chi tu
 sándaā mañúhún rí siquī ni ñn ñayuu. 16 Te
 núu sándaā rī siquī i, te ndāā sáha rí, chi tu
 sáha mañúhún rí, chi sándaā rī nde jíin máa
 Tátá rī, Yaā ní tají rúhū véji rī. 17 Te yósó núu
 tútu ley cánevāha ró jéē núu ñnuú cácahān uū
 testigo, te jíni ñúhún cuatáhú ró jeē cácahān,
 chi íyó ndāā jñūhun ún. 18 Núu súcuan te
 ruhū cúu ñn jeē cahán ndaā rī jehē rī. Te
 inga jeē cahán ndaā jehē rī cúu máa Tátá rī,
 Yaā ní tají rúhū. Achí yá.

19 Te ni cacahān de jíin yá:

¿Nde nuū ndeé Tátá rō?

Te ni cahān Jesús:

Tu cájini rō ruhū ni Tátá rī. Te núu jeē
 cájini rō ruhū, suni cuni rō Tátá rī nuú.

20 Tāca jñūhun yáha ní cahān Jesús jeē
 steén yā ini templo nuū cáyūcu yéjñū jeē
 cásocō i xūhún. Te tú ni ñn de ní jñí de ya,
 chi ná tu quee maá quíví jeē jñí de ya.

*Jeē ni cáhán yā jeē ma cúu jinūcoo de nuū
 cóndee yā*

21 Te ni cahān tucu Jesús jíin de:

Ruhū chi quihín rī, te nanducú ró rúhū,
 te ma nánihín rō ruhū, chi quendōo cuēchi

ró siquī rō quíví cúu rō. Te jeē yúcuan má
 cúu jinūcoo ró núu quihín rī, achí yá.

22 Yūcuán na te tēe hebreo un ní cacahān
 maá de:

¿A cahni tēe yáha máa de, te jeē yúcuan
 cáhán de jeē ma cúu jinūcoo yó núu quihín
 de, chí naún? Achí de.

23 Te ni cahān yā:

Máa ró jíjnáhan ró chi ñayiví yáha véjicoo
 ró, te ruhū chi nde andiví véji rī. Máa ró
 cácuu ñayuu ñayiví yáha, te ruhū chi nasūu
 tēe ñayiví yáha cúu rī. 24 Jeē yúcuan ní cahān
 rī jeē quendōo cuēchi ró siquī rō quíví cúu
 rō. Chi núu ma candíje ró jéē maá rí cúu
 Cristo, te quendōo nahín cuēchi ró siquī rō
 quíví cúu rō. Achí yá.

25 Te ni cacajñūhún de ya:

Núu súcuan ¿te ndé ñn cúu ró?

Te ni cahān yā:

Je ni cachi rī nuū rō nde xīhna ñúhún ndé
 ñn cúu rī. 26 Te íyó cuéhē gā jñūhun cuu
 cahān rī jíin ró te sándaā rī siquī rō. Te ma
 cahán rī, chi ini ñayiví yáha cáhán rī maá-ni
 jñūhun jeē ní jini rī ni cahān Yaā ní tají rúhū
 véji rī. Te máni jñūhun ndaā cahán yā. Achí
 yá.

27 Te tu ní cájecūhun ni de jeē cahán yā
 jñūhun Tátá yā andiví jíin de. 28 Jeē yúcuan
 ní cahān gā yā:

Nde na yáha jeē cáta caa ró rúhū, Yaā ní
 nduu tēe, jicā cruz, yūcuán na te cuni rō ndé
 ñn cúu rī. Te cuni rō jeē tú na vé sáha rī jeē
 maá rí, chi cáhán rī maá-ni jñūhun ni steén
 Tátá rī nuū rī. 29 Chi máa Tátá rī, Yaā ní tají
 rúhū, ndeé yá jíin rí. Te tu stóo mañúhún
 yá ruhū, chí níni sáha rī jniñu jeē nújnahan
 ni maá yá. Achí yá.

30 Te jeē ni cáhán yā jñūhun yáha, te cuehē
 ñayuu ni cacandíje i ya.

*Siquī ndé-ni cúu sēhe Yaā Dios jíin sēhe
 jexeén*

31 Yūcuán na te ni cahān Jesús jíin jñáhan
 ñuu yā hebreo jeē ní cacandíje i ya:

Te núu cuiñi ñihin ró jíin jñūhun steén rī
 nuū rō, te cuu ndije ró ñayuu scuáha jíin rí.

32 Te jecūhun ni rō jñūhun ndaā, te jñūhun
 ndaā un sáha jeē nduu libre rō nuū jeē yíhi
 ró ndaha.

33 Te ni cacahān i jíin yá:

Sēhe yucūn Abraham cácuu ri, te tu cáyihī cuiti rī ndaha ni ñn. ¿Te ndese cúu jeē cahán rō jeē nduu libre rī núu súcuan?

³⁴ Te ni cahān Jesús:

Jendaá cahán rī jín ró jeē tāca ñáyuu casáha cuēchi, tu íyó libre i, chi yāhi i chíji cuēchi jeē jejniñu cāhá i nuū. ³⁵ Te ñayuu jejniñu cāhá, chi tu cúu i ñn jnáhan ñayuu vehe nuū jejniñu i. Te ñn sēhe chi sa suhva cúu ndije i jnáhan ñayuu vehe ún. ³⁶ Núu súcuan te máá rí jeē cúu Sēhe Yaā Dios, núu sáha ri jeē tuá cuajniñu cāhá ró nuū cuéchi, núu súcuan te nduu libre ndije ró jijnáhan ró, te cuu ró sēhe ya. ³⁷ Te jíní rī jeē sēhe yucūn Abraham cácuu ró, te vēsú súcuan te cácuni rō cahni rō ruhū, chi tu cájetáhú ró jnūhun cáhán rī. ³⁸ Ruhū chi cáhán rī jnūhun jeē ni stéén Tatá rī nuū rī. Te máá ró chi casáha ró jniñu jeē ni cáhán tatá maá ró jijnáhan ró. Achí yá.

³⁹ Te ni cacahān i:

Sēhe yucūn Abraham cácuu ri.

Te ni cahān Jesús:

Núu jeē candíje ró nájñūhun ni candíje Abraham návāha cuu ndije ró yúcūn de, yūcuán na te jniñu váha ni sáha de suni sáha máá ró nuū. ⁴⁰ Te vijna chi cácuni rō cahni rō ruhū, vēsú ni cahān rī jín ró tāca jnūhun ndaā ni stéén Tatá rī nuū rī. Te Abraham chí tu ní sáha cuiti de súcuan. ⁴¹ Máá ró chí ñnuú casáha ró jín tatá maá ró. Achí yá jín i.

Yūcuán na te ni cacahān i:

Máá rí chí tu cácuu ri sēhe ndáhú jē tu tátá. Chi íyó ñn-ni tátá rī, te Yaā Dios cúu ya.

⁴² Te ni cahān Jesús:

Núu Yaā Dios cúu ndije tátá rō, te coo manī rō jín rí nuū. Chi nde nuū Yaā Dios ni quenda ri vēji ri. Te tú vēji ri jeē cuní maá rí, chí maá yá ni tají ruhū. ⁴³ ¿Te najehē tu cájecūhun ni rō jnūhun cáhán rī núu súcuan? Suu siquī jeē tu cácuni rō chusóhó ró jnūhun nácani ri. ⁴⁴ Máá ró jijnáhan ró chí tátá rō cúu jexeén. Te cácuni rō sáha ró máá jē cuní tátá rō ún. Máá jexeén ni jehni ndīyī nde jeē xihna ñúhún. Te tu ní ín cuiti jín jnūhun ndaā, te tú cuiti na jnūhun ndaā cahán. Te jeē cahán jexeén jnūhun stáhú cúu jeē súcuan cáa máá. Chi máá un cúu jeē ndíso jnūhun stáhú, te máá un cúu jeē ní

squéjéé ndihī jnūhun stáhú. ⁴⁵ Te ruhū chí cáhán rī jnūhun ndaā, te jeē yúcuan cúu jeē tu cácandíje ró ruhū. ⁴⁶ Te ni ñn ró ma nihín rō cuēchi siquī rī, chí tú cuiti na cuēchi ri. Te máni jnūhun ndaā cahán rī, ¿te naun tu cácandíje ró ruhū? ⁴⁷ Ñayuu cácuu sēhe Yaā Dios, chí cáchusóhó i jnūhun Yaā Dios. Te nasūu sēhe Yaā Dios cácuu ró, te jeē yúcuan tu cácuni rō chusóhó ró. Achí yá jín de.

Iyó Jesús nde ná tu coo Abraham

⁴⁸ Yūcuán na te ni cacahān jnáhan ñuu yā hebreo un:

Ndaā cacahān rī jeē canéé ró nájñūhun ñayuu Samaria, te ñúhun tachī ini rō.

⁴⁹ Te ni cahān Jesús:

Tu ñúhun tachī ini rī, chí yíñúhún rí jín Tatá rī. Te máá ró jijnáhan ró chí tu cáhīyo yíñúhún ró jín rí. ⁵⁰ Máá rí tu ndúcú rí jeē cujéhu ri. Iyó ñn jeē sáha jeē cujéhu ri, te máá yá sándaā siquī jnūhun cacahān rō. ⁵¹ Jendaá cahán rī jín ró, núu ndé ñáyuu squícu jnūhun cáhán rī, ma cúu cuiti i. Achí yá.

⁵² Te tēe hebreo un tu ní cájecūhun ni de, te ni cacahān de:

Vijna te ni cacucáhnu ni rī jeē ñúhun ndije tachī ini rō. Chi Abraham jín táca tēe ni canacani jnūhun Yaā Dios nde jenahán, ni cajihī de. Te róhó cáhán rō, núu ndé vé squícu jnūhun cáhán rō, te ma cúu cuiti i, áchí ró. ⁵³ ¿Te chí jéhu ga rō vēsú jí yō Abraham naún? Chi ni jihī de, te suni ni cajihī tāca tēe ni canacani jnūhun ya. ¿Te ndé ñn ga sáha ró máá ró núu súcuan? Achí de.

⁵⁴ Te ni cahān Jesús:

Núu ruhū sajhénu ri maá rí, te tu níhín jniñu. Máá Tatá rī cúu jeē sajhénu ruhū. Te cacahān rō jeē maá yá cúu Yaā Dios maá ró. ⁵⁵ Te vēsú súcuan te tu cájini rō ndese Yaā cúu ya. Te ruhū chí jíní rī yā. Te núu cahān rī jeē tu jíní rī yā, te cuu ri tēe stáhú nájñūhun máá ró jijnáhan ró. Te tuú chí jíní ndije ri yā, te squícu ri jnūhun cáhán yā. ⁵⁶ Te jí rō Abraham ni cusī ni de jeē coto de quivī quéē rī. Te je ni jito de, te ni jito ri jeē ní cusī ndasí ni de. Achí yá.

⁵⁷ Yūcuán na te ni cacahān tēe hebreo un jín yá:

Ni ná tu coo ró uū xico uxī cuiyā, ¿te ndese cúu jeē cahán rō jeē ní jito ró núu Abraham? achí de.

⁵⁸ Te ni cahān Jesús:

Jendaá cahán rī jín ró jeē nde ná tu cacu Abraham te je íyó rí, achí yá.

⁵⁹ Yūcuán na te ni caquihin de yuū jeē cuáha de xinī yā. Te Jesús chi ni quenda sāhi yá ni yāha ya mēhñú de, ni quenda ya ini templo cuahān yā.

Jeē ní nasávāha ya ñn tēe ni cacu cuáá

9

¹ Te jeē jíca Jesús cuahān yā, te ni jito ya nuū ñn tēe ni cacu cuáá. ² Te tēe cáscuáha jín yá ni cacajnūhún de ya:

Maestro, ¿naun ni cacu cuáá tēe yáha? ¿A cuéchi tátá de náná de cúu, chí cuéchi máá de cúu, chí naún?

³ Te ni cahān Jesús:

Nasūu cuéchi máá de, ni nasūu cuéchi tátá de náná de cúu jeē ní cacu de súcuan, chi sa suhva návāha cuni ñayuu jniñu jéhu sáha Yaā Dios jín de. ⁴ Níní jéē cúu nájnūhun nduú ini ñayíví, te cánuú sáha ri jniñu Yaā ní tají rúhū. Chi quee tiempo jeē coo nájnūhun jecuáá, jeē tuá cuu sájniñu ni ñn. ⁵ Níní jéē iyó rí ini ñayíví te cúu ri luz jeē cúndijin ini anuá ñayuu ñayíví, návāha jecūhun ni i síquī Yaā Dios. Achí yá.

⁶ Te ná ni cahān yā súcuan, te ni tesīhi yá nuū ñūhun, te ni sáha ya ndehyū jín tesīhi yá un, te ni tee ya síquī tñūu tēe cuáá un.

⁷ Te ni cahān yā jín de:

Cuáhan núu pila Siloé te nacate ró tñūu ró, achí yá. Te jñūhun Siloé cuní cahān, ndute ní cascáca de ni quee.

Yūcuán na te cuahān de, te ni nacate de tñūú de, te ni ndundijin-ni, te ni nandicó de vēji de. ⁸ Yūcuán na te ñayuu yúcu yajni jín de, jín ñayuu jeē ní cajito jeē cúu de tēe cuáá, ni cacajnūhun jnáhan i:

¿A násūu tēe yáha cúu jeē ndeé-ni yáhá te jícan caridad?

⁹ Te sava i ni cacahān:

Suu de cúu.

Te sava ga i ni cacahān:

Nasūú de cúu, te súcuan cúni coto de.

Te máá de chi ni cahān de:

Suu ri cúu.

¹⁰ Yūcuán na te ni cacajnūhún i de:

¿Te ndese cúu jeē ní nanune tñūu ró núu súcuan?

¹¹ Te ni cahān de:

Tēe nání Jesús ni sáha de ndehyū, te ni tee de tñūu rí, te ni cahān de jín rí: Cuáhan núu pila Siloé te nacate ró tñūu ró. Te ni jehēn rī, te ni nacate ri, te ni nanune-ni tñūu rí, achí de.

¹² Yūcuán na te ni cacajnūhún i de:

¿Ndé nuū íne tēe ún? achí i.

Tu jíní rī, achí de.

Jeē ní castíchi tēe fariseo tēe ni cacu cuáá

¹³ Yūcuán na te ni cajendeca i tēe ni íyo cuáá un núu tēe grupo fariseo. ¹⁴ Te quiví ndétātu cúu jeē ní sáha Jesús ndehyū jeē ní nanune ya tñūú de. ¹⁵ Te tēe fariseo un ní cacajnūhún tucu de tēe ún ndese ni nanune tñūú de. Te ni cahān de:

Ni tee de ndehyū síquī tñūu ná, te ni nacate ná, te ni ndundijin-ni tñūu ná, achí de.

¹⁶ Yūcuán na te ni cacahān sava tēe fariseo:

Tēe ún chi nasūu ndé nuū Yaā Dios vēji de, chi tu nēe íi de quiví ndétátú.

Te sava ga de chi ni cacahān:

¿Ndese cuu sáha tēe un táca jniñu jéhu yáha te núu tēe íyó cuéchi cúu de?

Te ni cacusñn de síquī yā. ¹⁷ Te ni cacajnūhún tucu de tēe ni íyo cuáá un:

Róhó, ¿ndese cáhan rō síquī tēe ni nanune tñūu ró núu súcuan?

Te máá de ni cahān de:

ñn tēe nácani jñūhun Yaā Dios cúu de, achí de.

¹⁸ Te tēe hebreo un chi tu ní cácandíje de jeē ní íyo cuáá tēe ún te ni ndundijin tñūú de. Te ni cacana xinī tátá de náná de. ¹⁹ Te ni cacajnūhún de:

¿A yáha cúu sēhe ro jéē ní cacu cuáá cacahān rō? Núu súcuan ¿te ndese ni ndundijin tñūú de vijna? achí.

²⁰ Te ni cacahān tátá de náná de:

Suu sēhe ri cúu tēe yáha jéē ní cacu cuáá.

²¹ Te tu cájini rī ndese ni ndundijin tñūú de vijna, ni tu cájini rī ndé tēe ni nanune tñūú de. Cajnūhun ró maá de, chi je jéhu de, te na cáchi máá de.

²² Súcuan ni cacahān tátá de náná de, chi cáyūhú de cájito de jnáhan de tēe hebreo. Chi je ni casándaā tēe un jéē núu ndé ñayuu cachi i jeē Jesús cúu Cristo, Yaā ní tají Yaā

Dios, te quenehen de i jeē ma cūu ga quívi i ini vehe iī sinagoga. ²³ Jeē yūcuan ní cacahān tatá de náná de: Cajnūhun ró maá de, chi je jéhu de.

²⁴ Yūcuán na te tēe hebreo un ní cacana tucu de tēe ni iyo cuáá un. Te ni cacahān de jíin:

Cachi cají ró nuū rī, jito jínū Yaā Dios. Chi cájini rī jeē tēe íyó cuéchi cūu tēe ni nanune tinūu ró.

²⁵ Yūcuán na te ni cahān de:

Tu jíiní na núu íyó cuéchi de, chí naún. Te íyó ĩn jeē jíiní ná, cūu jeē tēe cuáá ní cuu ná, te vijna chi ni ndundijin tinūu ná. Achí de.

²⁶ Te ni cacajnūhún tucu de:

¿Ndese ni sáha de jíin ró? ¿Ndese ni nanune de tinūu ró núu súcuan?

²⁷ Te ni cahān de:

Je ni cuu ni castūhun ná nuū ní, te tu ní cácu ni ní cuatáhu ní. ¿Te najehē cácu ni ní jeē cáchi tucu ná núu ní? ¿Te chí suni cácu ni ní jíináhan ní candíje ní yá naún?

²⁸ Yūcuán na te ni cacahān neé jíin de, te achí:

Máá ró chi cándíje ró tēe ún, te máá rí chi cándíje rī Moisés. ²⁹ Te cájini rī jeē ni cáhān Yaā Dios jíin Moisés. Te tēe yūcuan, ni tu cájini rī ndé nuū véji de.

³⁰ Te ni cahān tēe ni iyo cuáá:

Náa ni na jēe cacahān ni jēe tu cájini ní jeē véji de nuū Yaā Dios, vésú ni nanune de tinūu ná. ³¹ Te cájini yō jeē Yaā Dios tu jíiní nahín yá jeē cájicān ñayuu iyó cuéchi. Chi jíiní nahín yá nuū maá-ni ñayuu jeē cáchiñúhún i ya te cásáha i jeē cuní yā. ³² Te ní véji yó te tu ní jíiní sōho cuítí yō jeē ĩn tēe nanune de tinūu inga tēe ni cacu cuáá. ³³ Te núu nasūu ndé nuū Yaā Dios véji tēe ún, te ma cūu cuítí sáha de ĩn jniñu súcuan. Achí de.

³⁴ Te ni cacahān tēe hebreo un:

Róhó chí íyó ndasí cuéchi ró ndé quívi ní cacu ró, ¿te á máá ró steén nuū rī naún? achí.

Te ni caquenehen tēe un yátā vehe iī sinagoga.

Siquí ñayuu cáhīyo cuáá ánuá

³⁵ Te ni jíiní jnūhun Jesús jeē ní caquenehen de tēe ún. Te ni nihīn jnāhan ya jíin de, te ni cahān yā jíin de:

¿A cándíje ró Séhe Yaā Dios?

³⁶ Te ni cahān de:

¿Ndé ĩn cūu ya návāha candíje ná yá?

³⁷ Te ni cahān Jesús:

Je ni jito ró núu yā, te suu cūu ruhū jeē cahān jíin ró, achí yá.

³⁸ Yūcuán na te ni jecuiñī yití de nuū yā, te ni cahān de:

Cándíje ná jēe nihín cūu Jitoho ná.

³⁹ Te ni cahān Jesús:

Véji rī ini ñayívi yáha jēe sándaā rī siquí ñayuu. Chi ñayuu jeē nájnūhun cácuáá ánuá, ndundijin ini anuá i jeē jécūhun ni i siquí rī. Te ñayuu jeē jéni ni i jeē cájecūhun ni i, nájnūhun nducuáá ánuá í. Achí yá.

⁴⁰ Te sava tēe fariseo jeē cáhīin jíin yá, ná ni cajini de jnūhun yáha, te ni cacahān de jíin yá:

¿Te chí jéni ni rō jeē suni tēe tu cájecūhun ní cácu máá rí naún?

⁴¹ Te ni cahān Jesús:

Núu jeē cácu ró tēe tu jécūhun ni nuú, te ma cóo cuéchi ró. Te siquí jeē ní cacahān rō jeē cájecūhun ni rō, te tu cájetáhu ró, jeē yūcuan condee cuéchi siquí rō.

Jnūhun yátā síquí lanchi

10

¹ Jendaá cahān rī jíin ró, núu yíhi lanchi ini corral cánevāha cáhnu ñayuu, te núu ndé tēe tu quívi de ichi yéhyí corral un, chi sa suhva inga lado cáa de quívi de, tēe un cūu ñacuíhná, chi véji jeē sacuíhná. ² Te tēe quívi ichi yéhyí, chí tēe un cūu pastor ndíto lanchi. ³ Te tēe ndíto yéhyí, núne de te quívi tēe ún. Te lanchi de cánacuni tī tachí de. Te cána de síhví lanchi máá de, te táva de tī. ⁴ Te núu ni tava de ndíhi lanchi máá de, te yósnúu de nuū tī cuahān de. Te lanchi un cándiquín tī de, chí nácuni tī tachí de. ⁵ Te ma cóndiquín tī yatā inga tēe, chí sa suhva cunu tī coto tī de, chí nácuni tī jeē nasūu jítoho tī cūu.

⁶ Jnūhun yátā yáha ní cahān Jesús jíin ñayuu, te tu ní cájecūhun ni i na jnūhun cūu jeē ni cáhān yā.

Jesús cūu máá pastor vāha

⁷ Yūcuán na te ni cahān gā Jesús jíin i:

Jendaá cahān rī jíin ró: Máá rí cūu nájnūhun yéhyí corral nuū quívicoo ñayuu cácu nájnūhun lanchi rī. ⁸ Tāca tēe jeē tu

ní táji Yaā Dios, jeē ní quijicoo de nde ná tu quee rī, cácuu de nájñūhun ñacuīhná, chi tu ní cástéén de jñūhun ndaā. Te ñayuu cácuu nájñūhun lanchi ri, tu ní cájetáhú i de. ⁹ Máá rí cúu nájñūhun yéhyí. Te ñayuu jeē jíín máá rí quívicoo, jnama ri i. Te cuu i nájñūhun lanchi jeē ndávicoo ti nuū yíhi vāha ti, te quéndacoo ti nuū cáji vāha ti.

¹⁰ Tēe cuihná chi máni vēji de jeē sacuíhná de lanchi, te cahni de, te snáa de. Te ruhū chi vēji ri návāha cotecu ñayuu cácuu lanchi ri, te nde yōhyo vāha ndetū coo i. ¹¹ Máá rí cúu máá pastor vāha. Te pastor vāha chi ndító vāha de lanchi de, vēsú nde cuu de jeē síquí tī. ¹² Te ñin tēe yíyāhu, nasūú pastor tī cúu de, chi nasūú lanchi máá de cúu ti. Te núu jíto de jeē vēji yíhī, te stóo de lanchi, te jínu de cuahān de. Te yíhī chi jñá ti lanchi, te sáha ti jeē jité núu lanchi. ¹³ Te tēe yíyāhu ún chi jínu de cuahān de síquí jeē lanchi tátú cúu jeē ndító de, te jeē yúcuan tu cúndáhú ni de ti.

¹⁴ Máá rí cúu máá pastor vāha. Te jíni rī tāca ñayuu cácuu nájñūhun lanchi ri, te máá i cájini i ruhū. ¹⁵ Te yāha cúu nájñūhun jeē Tatá rī jíni yā ruhū, te máá rí jíni rī Tatá rī. Te cuu rī jeē síquí ñayuu cácuu lanchi ri. ¹⁶ Te suni íyó gá ñayuu jeē cácuu lanchi ri, te sáin sáin ñayuu cácuu i. Te cánúú jéē suni condeca ri ñayuu ún. Te cuatáhú i jñūhun cáhán rī. Te coyūcu cáhnu-ni ndihī ñayuu candíje, te coo ñin-ni pastor i.

¹⁷ Te Tatá rī manī ndasí yá jíni rí síquí jeē jéhe ri máá rí jeē cúu rī jehē ñayuu, te natecu tucu ri. ¹⁸ Ni ñin ma cúu cahni ruhū, chi máá rí cúu jeē jéhe jñūhun cuu rī. Jeē cachí máá rí te cuu rī, te jeē cachí máá rí te natecu rī, chi súcuan íyó poder rī. Súcuan ni cahān Tatá rī jeē sáha ri. Achí yá.

¹⁹ Te jeē ní cajini jnáhan ñuu yā hebreo jñūhun yáha, te ni cacusáin tucu i. ²⁰ Te cuehē i ni cacahān:

¿Naun cáchusóhó ró jeē cahán de? Chi ñūhun tachī ini de, te ni tīvī xínī de.

²¹ Te sava ga i ni cacahān:

Tu súcuan cáhán tēe ñūhun tachī ini, nájñūhun cáhán tēe yáha. Te tēe ñūhun tachī ini, ¿á cuu nanune de tinūu tēe cuáá naún? Achí.

Jeē ní casquéhichī i Jesús

²² Te tiempo míjin cúu, te ñuu Jerusalén cánasáha ñayuu vico jeē cánucūhun ni i quivī ní cuhiī templo cáhnu. ²³ Te jíca cuu Jesús ini templo, ini corredor jeē naní Salomón. ²⁴ Te jnáhan ñuu yā hebreo ni cacutútú i nuū yā, te ni cacahān i:

¿Nasaa ga quivī sáha ró jéē ma cucáhnu ni rī? Cachi cají núu rī jijnáhan ri núu máá ró cúu Cristo.

²⁵ Te ni cahān Jesús:

Je ni castūhun rí nuū rō, te tu ní cá candíje ró. Tācá jniñu jeē ní tejníñu Tatá rī ruhū sáha ri, yūcuan stéén cají jéē maá yá ni tají rúhū. ²⁶ Te tu cá candíje ró, chi nasūú lanchi ri cácuu ró, nájñūhun je ni cahān rī jíni ró. ²⁷ Ñayuu cácuu lanchi ri, chi nácuni i jeē maá rí cúu jeē cahán jíni i. Te jíni rī i, te cándiquīn i ruhū. ²⁸ Te cotecu i ní cáni sáha ri, te ma jnahnú ndetū cuiti i. Te ni ñin ma cúu quende i ndaha ri. ²⁹ Máá Tatá rī ni síquí ya i ndaha ri. Te cújéhnu ga maá yá vēsú tāca gá. Te ni ñin ma cúu quende i ndaha ya. ³⁰ Máá rí jíni Tatá rī, chi ñin-ni cúu ri, achí yá.

³¹ Yūcuán na te jnáhan ñuu yā hebreo ni caquihin tucu de yuū jeē cuáha de xínī yā.

³² Te ni cahān yā jíni de:

Ni steén rī cuehē jniñu váha nuū rō jeē ni sáha ri jíni poder Tatá rī. ¿Te á síquí jeē ni sáha ri jniñu váha cúu jeē cuáha ró yúu xínī rī núu súcuan? Achí yá.

³³ Te ni cacahān de jíni yá:

Nasūu síquí jeē ni sáha ró jniñu váha cúu jeē cuáha ri yuū xínī rō, chi síquí jeē cahán ndevāha ró jéē achí ró jeē inuú cúu ró jíni Yaā Dios. Chi tēe-ni cúu ró, te sáha ró jéē inuú cúu ró jíni Yaā Dios. Achí de jíni yá.

³⁴ Te ni cahān Jesús:

Yósó núu tútu ley cánevāha ró jéē ni cahān Yaā Dios: Nájñūhun yaā cácuu ró, achí Yaā Dios, achí tutu. ³⁵ Chi ñayuu jeē ní cajetáhú jñūhun ya, ni cahān yā jeē cácuu i nájñūhun yaā. Te cájini yō jeē ma cúu cahān yō jeē tú ndaā jñūhun cáhán tutu i. ³⁶ Núu súcuan ¿te naun cacahān rō jeē jñūhun ndevāha cúu jeē ni cahān rī jeē Séhe Yaā Dios cúu ri? Chi máá Yaā Dios ni jeni ya ruhū síquí jniñu i, te ni tají yá ruhū vēji ri ini ñayíví. ³⁷ Núu tu sáha ri jniñu sáha Tatá rī, núu súcuan te ma candíje ró rúhū. ³⁸ Te núu sáha ri, te vēsú

tu cácdíje ró rúhū, te na cándíje ró síquī jniñu sáha ri ún. Te súcuan te cucáhnu ni rō jeē ñn-ni cúu Tátá rī jín rí, te ñn-ni cúu ri jín Tátá rī. Achí yá.

³⁹ Yūcuán na te cánducú tucu de jni de ya. Te ni ndoñhún-ni ya cuahān yā.

⁴⁰ Te cuanuhun yā yūte Jordán ichi núu cáne niāndii, nuū ni íne Juan ni scuándute de. Te ni condee yā yūcuán. ⁴¹ Te ni quijicoo cuehē ñayuu nuū yā, te ni cacahān i jín táca jnáhan i:

Ndaā chi vēsú tu ní sáha Juan ni ñn jniñu jénu, te ni cundaā ndiñi jnūhun ni cahān de síquī ndese sáha tēe yáha. Achí i.

⁴² Te cuehē ñayuu jeē ni jéngoo nuū yā yūcuán, ni cacandíje i ya.

Jeē ni jīhī Lázaro

11

¹ Te ni iyo ñn tēe cūhú, nání de Lázaro. Te máa de jín cuáha de María jín Marta, cácuu de ñayuu ñuu Betania. ² Te María un jéē cúu cuáha Lázaro, suu ña cúu jeē ní chihí aceite perfume jehē Jitoho yō, te ni nasíchí ña jín ixi xíní ña. ³ Te ndindúú cuáha de un ní catajī ña jnūhun cuahān nuū Jesús:

Tēe jeē maní ni jín, cūhú de, áchí ña, áchí mozo.

⁴ Te ná ni jini Jesús jnūhun, te ni cahān yā:

Cuehyī yáha chi nasūu cuéhyī jeē ví cuu de cúu. Chi sa suhva sáha Yaā Dios jeē cuni ñayuu ndese cújénu ya. Chi ruhū, Sēhe Yaā Dios, jín cuéhyī yáha te stéén rī jeē suni cújénu máa rí. Achí yá.

⁵ Te maní Jesús jín Marta jín cūhū ña jín Lázaro. ⁶ Te vēsú súcuan te nuū ni níhīn yā jnūhun jeē cūhú de, te ni quendōo ya uū gā quivī nuū ndeé yá un. ⁷ Yūcuán na te ni cahān yā jín tēe cáscuáha jín yá:

Na quihín tucu yó región Judea.

⁸ Te tēe cáscuáha un ní cacahān de jín yá:

Maestro, ná tu cuu quivī jeē ní canducú jnáhan yó hebreo cuáha de yuū xinī ní. ¿Te cúní ni quihín tucu ní yúcuan naún? Achí de.

⁹ Te ni cahān Jesús:

Ma cúu cahni ñayuu ruhū núu ná tu quee maá quivī cuu rī. Chi jeē iyó rí ñayiví yáha cúu nájnūhun jeē iyó úxī uū hora ñn nduú. Te jeē sáha ri jeē cuní Yaā Dios, cúu ri nájnūhun tēe jeē jíca nduú, te tu cáchihí

de jehē de, chi cúndijin nuū de ñayiví yáha. ¹⁰ Te tēe jeē tu sáha jeē cuní Yaā Dios, chi nájnūhun jíca de jecuáa, te nájnūhun cáchihí de jehē de, chi tu cúndijin ini anuá de. Achí yá.

¹¹ Yūcuán na te ni cahān tucu ya:

Amigo yō Lázaro quixí de, te quihín rī sáha ri jeē nátahū ni de. Achí yá.

¹² Yūcuán na te tēe cáscuáha un ní cacahān de:

Núu quixí de te jíní yō jeē nduvāha de.

¹³ Te Jesús chi súcuan ni cahān yā jeē jé ni jihí de. Te cájeni ni tēe cáscuáha jeē quixí ndije de. ¹⁴ Yūcuán na te ni cahān cají yá:

Je ni jihí Lázaro. ¹⁵ Te cúsñ ni rī jeē tu ní cóyūcu yó yūcuán, návāha vāha ga candíje ró jéē coto ró jniñu jénu sáha ri. Núu súcuan te na quíngoo yó núu ndíyī ún. Achí yá.

¹⁶ Yūcuán na te Tomás, tēe cúu cuatí, ni cahān de jín jnáhan de jeē cascuáha jín yá:

Suni na quíngoo yó návāha cuu yō jín yá, achí de.

Jesús cúu jeē sáha jeē nátecu te cotecu ní cáni

¹⁷ Te nuū ní quee Jesús, te jíní yā jeē ní cuu cuñ quivī yíndūji Lázaro. ¹⁸ Te yajni-ni íne ñuu Betania jín ñuu Jerusalén, nájnūhun uū kilómetro yosáva. ¹⁹ Te Marta jín María, ni quecoo cuehē jnáhan ña hebreo jeē cahán i jnūhun ndeyí ni jín ña jeē síquí jeē ni jihí cuáha ña. ²⁰ Te nuū ní jini Marta jeē véji Jesús, te ni quenda ña cuajnahān ña ya. Te María chi ni ndōo ña vehe. ²¹ Te ni cahān Marta jín Jesús:

Núu ní iyo ní yáha, te ma cúu cuáha ná núu. ²² Te vēsú súcuan te jíní na jéē táca jéē cacán ni núu Yaā Dios, te sáha ya, achí ña.

²³ Te ni cahān Jesús jín ña:

Natecu cuáha ró.

²⁴ Te ni cahān Marta:

Jíní na jéē nátecu de quivī nátecu táca ndíyī nde quivī jínu ñayiví.

²⁵ Te ni cahān Jesús:

Máa rí cúu Yaā sáha jeē nátecu jín jéē cótecu ní cáni. Ñayuu candíje jeē jnáma ri i, vēsú na cúu i, te natecu i. ²⁶ Te ñayuu cátecu te cándíje i ruhū, cotecu i ní cáni andiví. ¿A cándíje ró jnūhun yáha? Achí yá.

²⁷ Te ni cahān ña:

Cándije ná jéē maá ní cúu Cristo, Sēhe Yaā Dios, jeē achí tutu jeē quiji ini ñayīvi, achí ña.

Jeē ni ndáhyū Jesús nuū yíndūji Lázaro

²⁸ Te ná ni cahān ña súcuan, te cuahān-ni ña, cuacana yuhu ña cuhū ña María:

Máa Maestro ni quee yā, te cána ya rohó, achí ña.

²⁹ Te jeē ní jini María jnūhun yáha, te yachí ni ndocuiñi ña, cuahān ña nuū yā.

³⁰ Te ná tu quīvi Jesús ñuu, chi ni ndōo-ni ya nuū ni jéjnahan Marta yā. ³¹ Te ñayuu hebreo un jéē cáyūcú ini vehe jíin María, jeē cácahān i jnūhun ndeyí ni jíin ña, ni cajito i jeē yachí ni ndocuiñi ña cuahān ña. Te ni candiquin i ña cuango i, chi cájeni ni i jeē cuándahyū ña nde nuū yíndūji ndīyi.

³² Yūcuán na te ni jinū María nuū íne Jesús, te ni jecuiñi yití ña nuū jehé yā, te ni cahān ña:

Núu ní íyo ní yáha, te ma cúu cuāha ná núu, achí ña.

³³ Te ni jito Jesús jeē ndahyú ña jíin jéē cándahyū ñayuu vējicoo jíin ña. Te yōhyo ni nducuihyá ni yā, te ni jnahuhū ni yā jeē cundáhú ni yā i. ³⁴ Te ni cajnūhun yá ña:

¿Ndé mí ní cachindūji ró de?

Te ni cacahān ña jíin yá:

Quíhín yō te cuni ní, achí ña.

³⁵ Te ni ndahyū Jesús. ³⁶ Yūcuán na te ni cacahān ñayuu hebreo un:

Condēhe náa yōhyo manī de jíin ndīyi ún.

³⁷ Te sava i chi ni cacahān i:

Tēe yáha jéē ní nanune de tinūu tēe cuáá, ¿á tu ní cúu sáha de jeē ma cúu Lázaro nuú? achí i.

Jeē ní natecu Lázaro

³⁸ Te yōhyo ni jnahuhū ni tucu Jesús, te ni quee yā nde nuū yíndūji ndīyi. Te ñin yaū cava cúu, te yuyáú un ndíhyú ñin yuū. ³⁹ Te ni cahān yā:

Tejiyo yuū un jíjnahan ró, achí yá.

Te Marta, cuāha ndīyi un, ní cahān ña:

Je jéén xicō de, chi je ni cuu cuūn quīvi yíndūji de.

⁴⁰ Te ni cahān Jesús jíin ña:

¿A násūú je ni cahān rī jíin ró jeē núu candije ró te coto ró jéē yōhyo cújéhnū Yaā Dios jíin poder yā? achí yá.

⁴¹ Yūcuán na te ni catejiyo i yuū jeē ndési yuyáú ndīyi ún. Te ni ndacoto-ni Jesús ichi ándiví, te ni cahān yā:

Tátā, na cútahū na núu ni jéē sáha ní jéē jicán na. ⁴² Te jíin na jéē níiní sáha ní jéē jicán na. Te jeē váha ñayuu cáhīn yáha cúu jeē súcuan cáhān na, návāha na cándije i jeē maá ní ni taji sáña.

⁴³ Te ná ni cahān yā súcuan, te ni cahān jee ya:

Lázaro, quenda quiji ró, achí yá.

⁴⁴ Te ni quenda-ni tēe ni jihī ún, te ñúsúcún ndaha de sīhīn de jíin tira sahma. Te nuū de ñúsúcún ñin sahma. Te ni cahān Jesús jíin i:

Nandají ró sahma ñúsúcún de, návāha cuu caca de, achí yá. Te ni canandají i.

Jeē ní casquijnáhan de jnūhun jeē cáhni de Jesús

(Mt. 26.1-5; Mr. 14.1-2; Lc. 22.1-2)

⁴⁵ Yūcuán na te cuehē ñayuu hebreo jeē ní quijicoo nuū María, ni cacandije i Jesús, chi ni cajito i jniñu ni sáha ya. ⁴⁶ Te sava i chi cuango i nuū tēe grupo fariseo, te ni castūhún i ndese ni sáha Jesús. ⁴⁷ Yūcuán na te tēe fariseo un jíin sūtū cácujuhnu ni candutútú de junta jíin táca gá tēe cácujuhnu. Te ni cacahān de:

¿Ndese sáha yó? Chi tēe ún yōhyo cuehē jniñu jéhnū sáha de. ⁴⁸ Te núu condēhé-ni yó, te ndivii ñayuu candije i de. Te quijicoo táca tēe nación Roma jeē cácujuhnu, te canu de templo cáhnu yó, te scuité núu de ñayuu nación yō, achí de jíjnahan de.

⁴⁹ Te ñin jnahan de jeē naní Caifás, jeē cúu máa sūtū cujéhnū ga cuiyā ún, ni cahān de:

Róhó chi tu cájini cuiti rō, ⁵⁰ ni tu cájecūhun ni rō jeē váha ga jeē cúu ñin tēe jehē ñayuu nación yō vēsú jeē náa ndivii i, achí de.

⁵¹ Te tu ní cáhān de jnūhun yáha jéē jéni ní maá de. Chi siquī jeē cúu de sūtū cujéhnū ga cuiyā ún, te ni sáha Yaā Dios jíin de jeē ní nacani de jnūhun jeē cúu Jesús jehē ñayuu nación hebreo. ⁵² Te nasūu máa ñin-ni jehē nación hebreo, chi suni jehē ndivii ñayuu cácuu sēhe Yaā Dios jeē ní cajitē núu táca nación, návāha ñin na cuu i jíjnahan i. ⁵³ Yūcuán na te nde quivī ún te táca tēe

hebreo cácujuhnu un, ní casquijnáhan de jnūhun jeē cáhni de Jesús.

⁵⁴ Jeē yúcuan tuá ní jíca ndijin yā nuū jnáhan ñuu yā hebreo un, chi ni quenda ya región Judea, te cuahān yā ñn ñuu naní Efraín, nuū iyó yajni ñuhun téhé. Te ni condee yā yúcuan jíin tée cáscuáha jíin yá.

⁵⁵ Te ni cuyajni vico pascua jeē cánasáha ñayuu hebreo. Te cuehē ñayuu tācá ñuu yūcuán cuángoo i ñuu Jerusalén, návāha squícu i jeē cahán ley jeē cúchi i ndundoo i nuū Yaā Dios, te sáá te quejéé vico pascua.

⁵⁶ Te cánanducú i Jesús, te cácajnūhun jnáhan i ini templo:

¿Nde se cájeni ni rō? ¿A quiji de vico, chí tuú? Achí i.

⁵⁷ Te sutū cácujuhnu jíin tée fariseo ni candacu de jniñu jeē núu ndé ñn ñayuu jiní ndé nuū íne ya, te na cástūhún i, návāha jñi de ya.

*Jeē ní chuhun María perfume jehē Jesús
(Mt. 26.6-13; Mr. 14.3-9)*

12

¹ Te cúmanī iñū gā quiṽi te coo vico pascua. Te ni jehēn tucu Jesús ñuu Betania nuū ndeé Lázaro, tēe ni jihī te ni nastécu yā de.

² Te ni casáha i ñn vico xíni jeē yñūhún i jíin yá. Te Marta ni jeni ña cohō. Te Lázaro yéji de staā jíin yá nuū mesa jíin táca gá ñayuu. ³ Yūcuán na te María ni quee ña jíin nájnūhun sava litro aceite perfume jeē máni ita nardo cúu, te yōhyo yahu ndeé. Te ni chuhun ña jehē Jesús, te ni nasíchí ña jíin ixi ña. Te ní ini vehe un ní chitú xícō perfume un. ⁴ Yūcuán na te ni cahān Judas Iscariote sēhe Simón, ñn tēe scuáha jíin yá un, te suu de cúu jeē nastúu de ya:

⁵ ¿Najehē tu ní cúyāhu perfume yáha jéé uní ciento denario, te cuāha yó núu ñayuu ndahú núu. Achí de.

⁶ Súcuán ni cahān de, nasūu jéé cundáhú ndije ni de ñayuu ndahú, chi sa suhva jeē cúu de tēe cuíhná. Chi máá de ndíso yijni xūhún, te quíhin cuíhná de jeē cájequin tāca tēe ún. ⁷ Yūcuán na te ni cahān Jesús:

Ma stáhān rō ña. Chi jeē ni sáha ña yāhá cúu jeē ni sātūhva ña ruhū nde quiṽi jeē quíndūji ri. ⁸ Chi níní cáyūcu ñayuu ndahú

jíin rō, te ruhū chi tuá condee rī jíin rō. Achí yá.

Jeē ní casquijnáhan de jnūhun jeē cahni de Lázaro

⁹ Te cuehē ñayuu hebreo ni cajini jnūhun i jeē néne ya ñuu Betania. Te ni jinūcoo i, te nasūu máá ñn jeē cuní i coto i nuū Jesús, chí suni jeē cuní i coto i nuū Lázaro, tēe jeē ní nastécu yā. ¹⁰ Yūcuán na te sutū cácujuhnu ni casquijnáhan de jnūhun jeē suni cahni de Lázaro. ¹¹ Chi jeē síquí Lázaro te ni cujiyo cuehē jnáhan ñuu de hebreo nuū de, te cácañdije i Jesús.

Jeē ni quívi Jesús Jerusalén

(Mt. 21.1-11; Mr. 11.1-11; Lc. 19.28-40)

¹² Te inga quiṽi ún, te ñayuu cuehē jeē ní quecoo vico pascua un, ní cajini jnūhun i jeē véji Jesús ñuu Jerusalén. ¹³ Te ni cajehnde i ndaha ñúú, te ni quendacoo i cuajnahān i ya. Te cácana jee i:

Yōhyo cújehnu Yaā Dios. Yōhyo vāha Yaā cúu Yaā jeē véji jíin jniñu máá Jítoho yō Yaā Dios. Yōhyo vāha Yaā cúu Rey nación yō Israel. Achí i.

¹⁴ Te ni nihīn Jesús ñn burro, te ni jecosō yā tī, nájnūhun cáhán tutu i:

¹⁵ Ñayuu ñuu Jerusalén jeē naní ñuu Sion, ma yūhu ró jijnáhan ró.

Yāhá condēhe ró jeē véji Rey rō, te yósó yá ñn burro.

Achí tutu.

¹⁶ Te quiṽi ún te tēe cáscuáha jíin yá, tu ní cájecūhun ni de jeē súcuán squícu tāca jéé yosó núu tutu i. Te nde ná ni ndujehnu Jesús jeē cuánuhun yā andiví, te sáá te ni canucūhun ni de tāca jnūhun yósó síquí yā, jíin jéé ní casáha de súcuán jíin yá.

¹⁷ Te ñayuu ní cahīn jíin yá ná ni cana ya xinī Lázaro nuū ní yindūji de, te ni nastécu yā de, ni canacani i jnūhun ndese ni sáha ya. ¹⁸ Jeē yúcuan ní quendacoo ñayuu cuehē un, ní jejnahan i ya, chí ni cajini jnūhun i jeē ni sáha ya jniñu jehnu un jéé ni steén yā poder yā. ¹⁹ Yūcuán na te ni cacahān máá tēe fariseo:

Vijna te je ni cajito yó jéé ma cúu cuiti gā casi yō. Chi jíto yó jéé ndivii cuiti ñayuu cuangoo i jíin de. Achí de jijnáhan de.

Ñayuu nación Grecia nánducú i Jesús

²⁰ Te sava ñayuu nación Grecia, suni ni quijicoo i ñuu Jerusalén vico pascua un jéē chiñúhún i Yaā Dios. ²¹ Te ni quecoo i nuū Felipe, tēe ñuu Betsaida ndañúū Galilea. Te ni cacahān i jíin de:

Tátā, cáculi ná cahān na jíin Jesús, achí i.

²² Te ni jehēn Felipe, ni castúhún de nuū Andrés. Te ndindúú de cuacastúhún de nuū Jesús. ²³ Te ni cahān Jesús jíin de:

Je ni quee quiví jeē ndujéhu Yaā ní nduu tēe. ²⁴ Te jendaá cahán rī jíin ró, ñn nuní trigo núu tú ñingava nuū ñúhun te quindúji, núu súcuan te quendōo máá ñn-ní. Te núu quindúji, te nacayā cuehē ndasí. Te suni súcuan cánuú cuu rī quindúji ri, návāha coo cuehē ñayuu jeē ndúu i sēhe Yaā Dios. ²⁵ Te na-ní ñayuu núu tu jéhe i jnūhun ndoho i jeē siquí ruhū, te jnahnū ndetū i. Te ñayuu jeē jéhe i jnūhun ndoho i jeē siquí ruhū ini ñayiví yáha, cotecu i ní cáni andiví. ²⁶ Núu ndé ñayuu cuní i cuajníñu i nuū rī, na cóndiquin i ruhū. Te nuū cóndee rī, suni yūcuán condee ñayuu jejniñu nuū rī. Te ñayuu jejniñu nuū rī, chí sáha Tátá rī jeē cujéhu i.

Jeē ni cahān Jesús jeē cuu yā

²⁷ Te vijna te cúcuíhyá ndasí ni rī sáha jnūndóho quiji siquí rī. ¿Te ndese cahān rī? ¿A cahān rī jíin Tátá rī: Jnama ní sáña núu jnūndóho jeē quíji siquí ná, achí rī? Ma cúu, chí jeē siquí yúcuán cúu jeē véji ri. ²⁸ Tátā, stéén ni jéē cujéhu ndasí ní jíin poder ni, achí yá.

Yūcuán na te ichi ándiví ní cahān ñn jnūhun:

Je ni steén rī jeē cujéhu ri, te sáha tucu ri ñnga jínu, achí yá.

²⁹ Te ni cajini ñayuu cáhīn yūcuán, te ni cacahān i jeē taja cáhán. Te sava ga i ni cacahān:

ñn ndajéhe Yaā Dios ni cahān jíin yá.

³⁰ Te ni cahān Jesús jíin i:

Tu ní cáhán jnūhun yáha jéē siquí ruhū, chí sa suhva návāha cuní rō siquí jnūhun jeē ni cáhán yā jíin rí. ³¹ Vijna cúu jeē sándaā Yaā Dios siquí cuéchi ñayuu ñayiví yáha. Vijna cúu jeē scúnu ya jexeén jeē ndácu jniñu ini ñayiví yáha. ³² Te ruhū, núu na jínu condita caa rī cuu rī ini ñayiví, te

sáha ri jeē jnāā tāca ñayuu quivícoo i ndaha ri, achí yá.

³³ Súcuan ni cahān yā jeē steén yā ndese modo cuu yā. ³⁴ Te ni cacahān ñayuu jíin yá:

Ni cajini sōho ná jéē cahán tutu ley Yaā Dios cánevāha yó, jeē Cristo cotecu yā ní cáni. ¿Te naun cáhán ni jéē Yaā ní nduu tēe, cánuú condita caa ya cuu yā? ¿Ndé ñn cúu máá Yáā ní nduu tēe núu súcuan? Achí i.

³⁵ Yūcuán na te ni cahān Jesús:

Máá jecu na quiví condee rī jíin ró jeē cúu ri luz cundijin ini anuá rō. Núu súcuan te vijna jeē iyó gá luz rī jíin ró, te caca ró jíin, chí sanaa ni rō te cuahān rī, te nájñūhun quendōo ró núu néē. Chí ñayuu cájica nájñūhun nuū néē, tu cájini i ndé nuū cuángoo i. ³⁶ Núu súcuan te níni ndéé gá rī jíin ró, te candíje ró rúhū jeē cúu ri luz, návāha nduu ró ñayuu cájica jíin luz, achí yá.

Súcuan ni cahān Jesús tāca jnūhun yáha, te cuahān-ni ya, te tuá ni steén yā maá yá nuū i.

Jeē tu ní cáculíje ñayuu hebreo jeē cúu ya Cristo

³⁷ Te vésú cuehē jniñu jéhu ni sáha Jesús jeē steén yā poder yā nuū i, te tu ní cáculíje i ya. ³⁸ Chí squícu nahín jnūhun ni cahān Isaías, tēe ni nacani jnūhun Yaā Dios nde jenahán:

Tátā Yaā Dios, tu ní cáculíje ñayuu jnūhun ni canacani ná, te tu ní cáculíje i jniñu jéhu jeē ni steén ni poder ni núu i.

Achí Isaías. ³⁹ Jeē yúcuán tu ní cúu candíje i, chí ni cahān tucu Isaías:

⁴⁰ Ni sáha ya jeē nájñūhun cáhīyo cuáá ánuá i,

jíin jéē cáculíni ni i,

návāha coo nájñūhun jeē tu cájito i,

te ni ma jécūhun ni i,

ni ma násāma ini i quivícoo i nuū rī,

jeē nasávāha ri anuá i nuū cuéchi i.

Achí Cristo, achí tutu. ⁴¹ Jnūhun yáha ní cahān Isaías, chí je ni jito de ndese yōhyo cújéhu Jesús, te ni cahān de ndese coo quiví jeē quíji ya.

⁴² Te vésú súcuan te cuehē ñayuu hebreo chí ni cacandíje i ya, te suni nde jíin sava tēe cándacu jniñu. Te tu ní cáculí de jeē cáculíje de ya, chí siquí jeē cáyūhú de tāca

tée fariseo. Chi núu súcuan te quenehen ún de ini vehe iī sinagoga jeē ma cuáha ga jnūhun quivícoo de. ⁴³ Chi cácusī gā ni de jeē kujéhnū de sáha ñayuu, vēsú jeē kujéhnū de sáha Yaā Dios.

Jnūhun cáhán Jesús cúu jeē sándaā siquī ñáyuu

⁴⁴ Te ni cahān jee Jesús:

Ñayuu cácandíje ruhū, nasūu máñúhún-ni ruhū cácandíje i, chi suni cácandíje i nde maá Tátá rī, Yaā ní tají ruhū. ⁴⁵ Te ñayuu cájito nuū rī, suni cájito i nuū Yaā ní tají ruhū. ⁴⁶ Máá rí jeē cúu ri luz cúndijin ini anuá ñayuu, ni quiji ri ini ñayiví návāha tāca ñáyuu cácandíje ruhū, ma cáca i nájñūhun nuū néē. ⁴⁷ Te núu ñin ñayuu jini sōho i jnūhun cáhán rī, te núu tu jétáhú i, te nasūu ruhū sándaā siquī i. Chi tú vēji ri jeē ndénehen ri cuēchi siquī ñayuu ñayiví, chi sa suhva jeē jnáma ri i. ⁴⁸ Te ñayuu jeē casquéhichī i ruhū te tu cájetáhú i jnūhun cáhán rī, íyó ñin jeē sándaā siquī i. Suu tāca jnúhun jeē ni cáhán rī, jnūhun un cúu jeē ndenehen cuēchi siquī i quiví jínu ñayiví. ⁴⁹ Chi tu cáhán rī jeē cúu ni maá rí, chi Tátá rī, Yaā ní tají ruhū, máá yá ni ndacu jniñu nuū rī ndese cahān rī jín ndese stéen rī. ⁵⁰ Te jíní rī jeē jniñu ndácu Tátá rī sáha jeē cótecu ñayuu ní cáni. Núu súcuan te jnūhun cáhán rī, chi máni jnūhun jeē ní cachi Tatá rī cúu, áchí yá.

Jeē ní nacate ya jehē tēe cáscuáha

13

¹ Te jehíni ñnga quiví te quejéé vico pas-cua. Te je jíní Jesús jeē ní quee quiví jeē quénda ya ñayiví yáha quíñuhun yā nuū Tatá yā. Te níni cúndáhú ni yā ñayuu maá yá jeē cáyúcú ini ñayiví. Te vijna jeē jínu jeē íne ya ñayiví, te sáha ya ñin jniñu jeē steén cají yá jeē cundáhú ni yā i.

² Te jexeén je ni squiví ini anuá Judas Iscariote sēhe Simón, jeē vijna nastúu de ya.

³ Te jíní Jesús jeē véji ya nuū Yaā Dios, te nuhūn yā nuū Yaā Dios, jín jéē ni sáha Tátá yā jeē kujéhnū ya siquī ndihí-ni. ⁴ Te cúxíni ya jíní tēe cáscuáha jín yá, te ni ndocuiñí yā. Te ni stáa ya sahma ndíi ya, te ni jihni yā ñin toalla chíji ya. ⁵ Te ni chuhun ya ndute ini

ñin tijehēn. Te ni quejéé yá nácate ya jehē tēe cáscuáha. Te násíchí yā jín toalla jeē nuhní chíji ya.

⁶ Te ni jinū yā nuū Simón Pedro. Te ni cahān Pedro jín yá:

¿Sa máá ní nacate jehē ná naún?

⁷ Te ni cahān Jesús:

Tu jécūhun ni rō jeē sáha ri vijna, te cúcuéé gá te jecūhun ni rō.

⁸ Te ni cahān Pedro jín yá:

Ma nácate cuiñi ni jéhē ná.

Te ni cahān Jesús:

Núu tú nacate ri jehē rō, te ma cúu cundúu ró jín rí.

⁹ Te ni cahān Simón Pedro:

Núu súcuan cúu te nasūu máá jéhē-ni ná, chi suni nacate ní ndaha ná jín xíní ná, áchí de.

¹⁰ Te ni cahān Jesús jín de:

Tēe jeē sa ní jichi, tu jini ñúhún ndundoo ní cáhnu de, chi máá jéhē-ni de, chi je íyó ndoo ní cáhnu de. Te máá ró chi je ni candundoo ró. Te tú ndihí ró cáhíyo ndoo.

¹¹ Chi je jíní yā ndé ñin de cúu jeē nastúu de ya, te jeē yúcuan ní cahān yā: Tú ndihí ró cáhíyo ndoo.

¹² Te nuū ni jínu ni nacate ya jehē de jínáhan de, te ni naquihin ya sahma ndíi ya, te ni nucōo tucu ya nuū mesa. Te ni cahān yā:

¿A cájecūhun ni rō na vé cuní cahān jeē ni sáha ri jín ró? ¹³ Cácahān rō jeē Maestro jín Jítóho rō cúu ri, te ndaā cácahān rō, chi suu ndije cúu ri. ¹⁴ Núu súcuan te vēsú Maestro rō jín Jítóho rō cúu ri, te ni nacate ri jehē rō jínáhan ró, te suni súcuan cánuú jéē nacate máá ró jehē jnáhan ró. ¹⁵ Chi jniñu yáha ni sáha ri jeē steén rī nuū rō jeē suni súcuan sa cuajniñu ró núu jnáhan ró, nájñūhun sa máá rí ni jejniñu ri nuū rō. ¹⁶ Jendaá cahān rī jín ró jeē ñin mozo tu cújéhnū de nuū patrón de, te tēe jíca jniñu táhú nuū de, te cújéhnū de nuū tēe ni tají de. Te máá ró cácuu mozo rī, te na cuajniñu ró núu jnáhan ró nájñūhun ni steén rī nuū rō. ¹⁷ Te núu ni cajecūhun ni rō jnūhun yáha, te yōhō ndetū rō te núu squícu ró.

¹⁸ Te nasūu jéē cahān rī jeē ndihí ró ndetū, chi je jíní rī tāca róhó jéē ní nacāji rī. Te cánuú squícu jnūhun yáha jeē cáhán tutu

iī: Tēe yéji staā jín rí, ni ndió cuñí de siquī rī, achí tutu. ¹⁹ Te vijna te je cástūhun rí tāca jéē yáha núū rō nde ná tu coo, návāha núū na cóo, te candíje ró jéē maá rí cúu Yaā ní tají Yaā Dios. ²⁰ Jendaá cahán rī jín ró jeē na-ni ñayuu jeē cuatáhu i tāca jéē tají rí, te ruhū jetáhu i. Te ñayuu jetáhu rúhū, suni jétáhu i Yaā ní tají rúhū vēji ri, achí yá.

Jeē ní cachi yā jeē nastúu Judas yā
(Mt. 26.20-25; Mr. 14.17-21; Lc. 22.21-23)

²¹ Te ná ni cahán Jesús tāca jnúhun yáha, te ni cucuíhyá ndasí ni yā. Te ni cahán cají yá:

Jendaá cahán rī jín ró jijnáhan ró jéē ñn máá ró nastúu ruhū, achí yá.

²² Yūcuán na te tēe cáscuáha jín yá, ni candacoto de nuū jnáhan de, cájeni ni de ndé ñn de cúu jeē ni cáhān yā. ²³ Te ñn máá téē scuíha jeē maní gā yā jín, néne de xiin ya mesa jeē cáxuxíni de jín yá. ²⁴ Te ni sáha Simón Pedro seña nuū de jeē na cájnūhún de ya ndé ñn de cúu jeē ni cáhān yā. ²⁵ Yūcuán na te tēe un ní scáyí de máá de nuū Jesús, te ni cajnúhún de ya:

¿Ndé ñn de cúu? áchí de jín yá.

²⁶ Te ni cahán Jesús:

Na chundaji ri staā te cuāha ri nuū ñn de, te suu tēe un cúu, achí yá.

Te ni chundaji ya staā, te ni jēhe ya nuū Judas Iscariote sēhe Simón. ²⁷ Te jeē ní quihín de staā ún, te ni quívi-ni Satanás ini anuá de. Yūcuán na te ni cahán Jesús jín de: Jniñu jeē sáha ró, na sáha yachí rō.

²⁸ Te ni ñn tēe cáyeji staā jín yá, tu ní cájecūhun ni de naun ni cahán yā súcuan jín de. ²⁹ Chi sava de cájeni ni de jeē ni cáhān Jesús jín Judas jeē cuáan de jeē jíní ñúhún yá vico ún, chí jéē cuáha de jecu xūhun núū ñayuu ndahú. Chi máá de ndíso yijni xūhún. ³⁰ Te jeē ní yeji de staā ún, te ni quenda-ni de cuahán de. Te je ni cuaa.

Jeē ní ndacu ya jniñu jéé

³¹ Yūcuán na te jeē cuahán Judas te ni cahán Jesús:

Vijna te ruhū, Yaā ní nduu tēe, stéén rī ndese cújéhnū ri, te suni jín rúhū te cuni ñayuu ndese cújéhnū Yaā Dios. ³² Te núu jín rúhū cuni ñayuu ndese cújéhnū Yaā Dios, núu súcuan te suni stéén Yaā Dios ndese

cújéhnū ruhū jeē cúu ri Sēhe ya. Te yachí-ni stéén yā. ³³ Séhē, tuá nahán condee rī jín ró jijnáhan ró. Te nanducú ró ruhū, te nájnūhun ni cahán rī jín tāca jnáhan yó hebreo, suni súcuan cáhān rī jín ró vijna, jeē ma cúu jinūcoo ró núū quihín rī. ³⁴ Te vijna te ndácu ri ñn jniñu jéé núū rō, jeē na cúndáhú ni rō jnáhan ró. Nájnūhun cúndáhú ni rī rohó, suni súcuan na cúndáhú ni rō jnáhan ró. ³⁵ Te núu cúndáhú ni rō jnáhan ró, súcuan te cuni tāca ñayuu jeē cácuu ró téē cáscuáha jín rí, achí yá.

Jeē ní cachi yā jeē yūhu Pedro cahán de jeē jini de ya

(Mt. 26.31-35; Mr. 14.27-31; Lc. 22.31-34)

³⁶ Te ni cahán Simón Pedro jín yá:

¿Ndé nuū quihín ni núu súcuan?

Te ni cahán Jesús:

Nuū quihín rī chi ma cúu condiquín rō ruhū vijna, te cúcuéé gá te jinū rō.

³⁷ Te ni cahán Pedro:

¿Najehē ma cúu condiquín na níhín vijna? Tu yúhú ná cuu na jéé siquí ni.

³⁸ Te ni cahán Jesús:

¿A jéni ni rō jeē tu yúhú ró cuu rō jeē siquí rī? Jendaá cahán rī jín ró jeē nde ná tu cana líhli, te uní jínu yūhu ró te cahán rō jeē tu jíní rō ruhū. Achí yá.

Jesús cúu ichi jeē jinú yō nuū Tatá yā

14

¹ Te ni cahán gā yā:

Ma cucuíhyá ni rō siquī tāca jnúndóho. Na cándíje ró jéē sáha Yaā Dios jehē rō, te suni na cándíje ró jéē sáha ri jehē rō. ² Chi nuū ndeé Tátá rī, íyó cuéhē vehe condee rō jijnáhan ró. Te núu jeē tu súcuan íyó, te je ni castūhun rí nuū rō nuú. Núu súcuan te quihín rī quisátūhva ri nuū cóyūcu ró. ³ Te jeē quihín rī sátūhva ri nuū cóyūcu ró, te ndiji ri quinaquihín ri rohó quihín yō, návāha suni cóyūcu ró nuū cóndee maá rí. ⁴ Te je cájini rō ndé nuū quihín rī, te cájini rō ndese jinū rō yūcuán. Achí yá.

⁵ Te ni cahán Tomás jín yá:

Tu cájini na ndé nuū quihín ni, ¿te ndese cuni ná ichi jinú yūcuan núu súcuan?

⁶ Te ni cahán Jesús jín de:

Máá rí cúu ichi jinū rō andívi, te máá rí cúu jnúhun ndaā jín jnúhun cotecu rō ní

cáni. Te ni ñn ma jinú nuū Tatá rī te núu tú ruhū. ⁷ Te núu je ni cajini rō ruhū, te suni je ni cajini rō Tatá rī núu súcuan. Te ndé vijna je cájini rō yā, chi je ni cajito ró núu rī, achí yá.

⁸ Te ni cahān Felipe jiín yá:

Stéén ni Tátá ni núu ná, te na cúvāha ni na jijnáhan ná, áchí de.

⁹ Te ni cahān Jesús:

Felipe, je ni cuu cuehē quivī jica ri jiín ró jijnáhan ró, ¿te á ná tu cuni rō ndé ñn cúu ri naún? Tēe jeē jító ruhū, suu Tátá rī jító de. Núu súcuan ¿te najehē cahán rō jeē steén rī Tatá rī nuū rō? ¹⁰ ¿A tu cándije ró jéē ñn-ni cúu ri jiín Tátá rī, te Tátá rī ñn-ni cúu ya jiín rí? Tāca jnúhun cáhán rī jiín ró, nasūu jnúhun máá rí cúu. Chi Tátá rī jeē ñn-ni cúu ya jiín rí, máá yá sāha tācá jniñu jeē sāha rí. ¹¹ Candije ró jijnáhan ró jéē ñn-ni cúu ri jiín máá Tátá rī, te Tátá rī ñn-ni cúu ya jiín rí. Te núu tu cájecūhun ni rō, te candije ró rúhū siquī tācá jniñu sāha rí. ¹² Jendaá cahán rī jiín ró, núu ndé ñayuu candije ruhū, jniñu jéhu jeē sāha ri yāhá, suni sāha i. Te jéhu ga jniñu sāha i vésú yāhá, chi quinhun rī nuū ndeé Tatá rī. ¹³ Te tācá na-ni vé cacán rō nuū Tatá rī siquī jeē cácandije ró jéē cúu ri Sēhe ya, te sāha ri jeē cacán rō, te súcuan steén rī jeē yóhoyó cújéhu Tátá rī. ¹⁴ Chi tācá na-ni vé cacán rō siquī jeē cácandije ró rúhū, te sāha nahín rí.

Jeē ni jéjnūhun ya jeē tají yá Espiritu Santo

¹⁵ Te núu manī rō jiín rí jijnáhan ró, te na squícu ró jniñu ndácu ri nuū rō. ¹⁶ Te cacān tahú rī nuū Tatá rī, te tají yá inga Yaā chindéé ñáhán róhó, te sāha ya jeē cóo sñ ni rō jijnáhan ró. Te Yaā un cúu máá Espiritu jeē steén jnūhun ndaā, te condee yā jiín ró ní cáni. ¹⁷ Te ñayuu ñayiví má cúu cuatáhu i ya, chi tu cúu coto i nuū yā, ni tu cúu cuni i ndese Yaā cúu ya. Te máá ró chi je cájini rō ndese Yaā cúu ya, chi ndeé yá jiín ró, te condee yā ini anuá rō ní cáni. ¹⁸ Ma stóo uun ri rohó, chi ndiji ri nuū rō. ¹⁹ Jecu na quivī te ma cóto ga ñayuu ñayiví núu rī. Te máá ró jijnáhan ró chi coto ró núu rī, chi cotecu rī ní cáni, te jeē yúcuan suni cotecu máá ró. ²⁰ Te quivī ún te cuni rō jeē ñn-ni cúu ri jiín Tátá rī, te máá ró ñn-ni cúu ró jiín rí jeē ndeé rí ini anuá rō jijnáhan ró. ²¹ Te

na-ni ñayuu núu ñúhun ni i jniñu ní ndacu ri, te squícu i, ñayuu un cúu jeē maní ndije jiín rí. Te ñayuu jeē maní jiín rí, suni coo maní Tatá rī jiín i. Te suni ruhū coo manī rī jiín i, te steén rī nuū i jeē nduú rí jiín i. Achí yá.

²² Te ni cahān Judas jiín yá (te nasūu téé cúu Iscariote):

Najehē cúu jeē steén ni máá ní nuū ná, te nuū ñayuu ñayiví chi tuú?

²³ Te ni cahān Jesús:

Ñayuu jeē maní jiín rí, chi cásquícu i jeē cahán rī. Te coo manī Tatá rī jiín i. Te Tátá rī jiín máá rí quijicoo ri cundúu rí jiín i. ²⁴ Te ñayuu jeē tú manī jiín rí, tu cásquícu i jeē cahán rī. Te jnūhun cájini sōho ró cáhán rī, nasūu jnúhun máá rí cúu, chi jnūhun máá Tátá rī jeē ní tají rúhū cúu.

²⁵ Tāca jnúhun yāha cáhán rī jiín ró níni íne ga rī jiín ró. ²⁶ Te Tátá rī chi tají yá Espiritu Santo, quiji nucuiñi nuū rī. Te máá yá chindéé ñáhán yá rohó, te sāha ya jeē cóo sñ ni rō. Te steén yā tāca jnúhun nuū rō, te nacachi tucu ya tāca jéē ni cáhán rī jiín ró.

²⁷ Te jeē quihín rī, te sāha ri jeē cóo ndeyí coo sñ ni rō. Nájñūhun íyó ndeyí sñ ni maá rí, suni súcuan coo ndeyí sñ ni rō sāha rí. Te jeē sāha ri jeē cóo ndeyí sñ ni rō, tu quijnáhan jiín jnúhun ndeyí cácahān ñayuu ñayiví. Ma cucuihyá ni rō siquī tāca jnúndóho, te ni ma yūhu ró. ²⁸ Je ni cajini sōho ró jéē ni cáhán rī jeē quihín rī, te ndiji ri cundúu rí jiín ró. Te núu cáhiyo manī vāha ró jiín rí, te cusñ ni rō jeē ni cáhán rī jeē nuhún rī nuū Tatá rī. Chi cújéhu ga Tatá rī vijna vésú ruhū. ²⁹ Je ni castūhun rí nuū rō tāca jnúhun yāha nde ná tu coo, návāha núu je ni cuu, te candije ró rúhū jijnáhan ró.

³⁰ Ma cahán rī cuehē gā jnūhun jiín ró, chi je vēji jexeén jeē ndácu jniñu ini ñayiví yāha. Te tú na vé cúu sāha siquī rī nuū.

³¹ Te na cóo nájñūhun ni ndacu Tátá rī jniñu nuū rī, návāha cuni ñayuu ñayiví jéē maní rī jiín Tátá rī, te sāha ri jniñu ní ndacu ya. Ndocuiñi jijnáhan ró na quíngoo yó. Achí yá.

Jesús cúu nájñūhun yoyúcú uva

15

¹ Máá rí cúu nájñūhun yoyúcú uva váha ndaā, te Tátá rī cúu nájñūhun tēe ndíto

yoyúcú uva un. ² Te máá ró chi cácuu ró nájnūhun ndaha, te núu tu jéhe ró ndéhē te quende yā rohó. Te núu cácuu ró nájnūhun ndaha jeē jéhe ndehē, te nasándoo ya nacahnde yā rohó nájnūhun jeē cúu ró ndaha ún, návāha cuāha ró cuéhē gā ndehē. ³ Te máá ró chi je ni candundoo ánuá rō jíin jnúhun ni steén rī nuū rō, nájnūhun ndúndoo ndaha uva. ⁴ Na cundúú ró jíin rí, te suni máá rí cundúú rí jíin rō. ĩn ndaha uva ma cúu cuāha ndehē jeē maá, te núu tu yǎjnē jicā yóho. Te suni súcuan máá ró, ma cúu sáha ró jniñu váha te núu tu cundúú ró jíin rí.

⁵ 'Máá rí cúu yoyúcú un, te máá ró cácuu ndaha ri. Ñayuu jeē nduú jíin rí, te ruhū ndúú rí jíin i, máá i cúu nájnūhun ndaha jeē jéhe cuehē ndehē. Chi núu tú cundúú ró jíin rí, te tú cuiṭi na jniñu váha cuu sáha ró. ⁶ Ñayuu jeē tu cundúú jíin rí, quende yā i nájnūhun ĩn ndaha uva, te ichī. Te ndoho i nájnūhun ndaha uva un jéē ndutútú te cayū nuū ñuhún.

⁷ 'Núu ndúú ró jíin rí, te cáñuhun ni rō jnūhun cáhān rī, yūcuán na te cacān rō na-ni vé cácuu rō, te sáha ri jeē cácahān rō. ⁸ Te núu cásáha ró cuéhē jniñu váha, súcuan cástéén rō jeē cúu ndije ró ñayuu cascuáha jíin rí, te súcuan nácuni ñayuu jeē yóhyo cújéhu Tátá rī. ⁹ Nájnūhun manī Tatá rī jíin rí, suni súcuan manī rī jíin ró jijnáhan ró. Núu súcuan te ma siaá rō jnūhun manī rī jíin ró. ¹⁰ Núu squícu ró jniñu ní ndacu ri nuū rō, te níni coo manī rī jíin ró, nájnūhun máá rí squícu ri jniñu ní ndacu Tátá rī nuū rī, te níni íyó mánī yā jíin rí.

¹¹ 'Súcuan ni cahān rī jíin ró návāha coo sĥi ni rō nájnūhun íyó sĥi ni rī, chi nde cusĥi teyí ni rō. ¹² Te yāha cúu jniñu ndácu ri nuū rō jijnáhan ró: jeē na cundáhú ni rō jnáhan ró nájnūhun cundáhú ni rī rohó. ¹³ Núu ĩn tēe cuu de jehē amigo de, te tuá na vé cúmanī gā sáha de jeē cundáhú ni de amigo de. ¹⁴ Te máá ró cácuu amigo rī núu squícu ró jniñu ndácu ri nuū rō. ¹⁵ Ma cahān gā rī mozo jíin ró, chi ĩn mozo tu cástūhún patrón nuū i ndese jéni ni de sáha de. Chi sa suhva amigo cahān rī jíin ró, chi je ni castūhun rí nuū rō tāca jnúhun ni cahān Tatá rī jíin rí. ¹⁶ Máá rí ni nacāji róhó jéē jnáma ri rohó, te nasūu

máá ró ni cánacani ni xīhna gā jeē cóndiquñ rō ruhū. Te ni jeni ri rohó jéē caca ndaā rō te scándije ró cuéhē ñayuu jeē cuu i sēhe ri ní cáni. Te súcuan te ndihi jeē cacán rō nuū Tatá rī siquī jeē cácandije ró rúhū, sáha ya jeē jicán rō. ¹⁷ Te yāha cúu jniñu ndácu ri nuū rō: jeē na cundáhú ni rō jnáhan ró.

Jeē cáquitī ni ñayuu ñayīvi núu Jesús jíin núu ñayuu cácandije

¹⁸ 'Te núu cáquitī ni ñayuu ñayīvi núu rō jijnáhan ró, te je cájini rō jeē xīhna gā nuū maá rí ni caquitī ni i. ¹⁹ Te núu jeē iyó gā rō jíin modo ñayuu ñayīví, te coo manī ñayuu ñayīvi jíin ró nuú, nájnūhun manī i jíin jnáhan i. Te ni nacāji ri rohó jéē tuá coo ró jíin modo ñayuu ñayīví. Te jeē yúcuan cáquitī ni i nuū rō, chi tuá cácuu ró cuenta ñayīví. ²⁰ Nucūhun ni rō jnūhun ni cahān rī jíin ró: Núu tu íyó yǎñuhún ñayuu nuū patrón, te nagā ni cuu nuū mozo de. Núu ni cajito xeēn i ruhū, te suni súcuan coto xeēn i róhó jéē cácuu ró mozo rī. Te núu jeē ni cájetáhú i jnūhun ni steén rī, te suni cuatáhú i jnūhun cástéén rō. ²¹ Te tācá jniñu yáha sáha i jíin ró jeē siquī ruhū, chi tu cájini i Yaā ní tají rúhū vēji rī.

²² 'Núu jeē tu ní quiji ri nacani ri jnūhun nuū i, te ma cóo cuēchi i núu. Te vijna chi ma cúu ga cahān i jeē tu jíin i jeē iyó cuēchi i. ²³ Ñayuu jeē cáquitī ni nuū rī, suni nuū Tatá rī cáquitī ni i. ²⁴ Núu jeē tu ní sáha ri jniñu jéhu nuū i jeē ní ĩn tēe tu ní sáha de súcuan, te ma cóo cuēchi i núu. Te vijna je ni cajito i jniñu ún, te vēsú súcuan te cáquitī ni i nuū rī jíin núu Tatá rī. ²⁵ Te súcuan cásáha i návāha squícu jnūhun yósó núu tútu ley Yaā Dios jeē cánevāha i: Ni caquitī ni i nuū rī, vēsú tú na cuēchi ri, achí.

²⁶ 'Te tají rí maá Yaā chindéé ñáhán róhó te sáha ya jeē cóo sĥi ni rō. Te Yaā un cúu máá Espíritu jeē steén jnūhun ndaā, te quiji ya nde nuū Tatá rī, te nacani cáji yá jnūhun ri. ²⁷ Te suni máá ró nacani ró jnúhun ri, chi je cáhān ro jíin rí nde ná ni quejéé rí nácuni ri jnūhun.

16

¹ 'Tāca jnúhun yáha ní cahān rī jíin ró návāha ma náyūhu ró jeē quiji jnúndóho. ² Chi quenehen i róhó jéē ma cuáha ga i

jnūhun cone ró táca vehe īi sinagoga. Te quee quivī jeē cahni i rōhó, te cani ni i jeē īin jniñu váha ni sáha i nuū Yaā Dios. ³ Te súcuan sáha i jíin ró, chi tu cájini cuiti i máa Tátá rī ni máa rí. ⁴ Te ni cahān rī jnūhun yáha jíin ró návāha núu je ni quee quivī jeē súcuan coo, te nucūhun ni rō jeē jé ni cahān rī jíin ró.

Jniñu sáha Espiritu Santo

¹Te tu ní cahān rī jnūhun yáha jíin ró nde xīhna ñúhún, chi íne máa rí jíin ró jijnáhan ró. ⁵Te vijna chi nuhūn rī condee rī jíin Yaā ní tají rúhū vēji rī. Te ni īin ró tu cájnūhun ró ndé nuū quihín rī. ⁶Chi máa jéē cácuuíhyá ndasí ni rō jeē ni cahān rī súcuan jíin ró. ⁷Jendaá cahán rī jíin ró: Jeē váha máa ró jijnáhan ró cúu jeē quihín rī. Chi núu tú quihín rī, te ma quíji Yaā chindéē ñáhán rōhó te sáha ya jeē cóo sī ni rō. Te núu cuahān rī, te tají rí yā quíji ya nuū rō. ⁸Te jeē quée yā, te stéén yā nuū ñáyuu ñayīví jéē iyó cuéchi i, jíin ndese quīvícoo i íchi ndaā, jíin jéē sándaā Yaā Dios siquī cuéchi i. ⁹Stéén yā jeē iyó cuéchi i, chi tu cácandíje i ruhū. ¹⁰Te stéén yā siquī ichi ndaā, chi máa rí nuhūn rī nuū Tátá rī, te ma cóto ga rō nuū rī. ¹¹Te stéén yā siquī jeē sándaā Yaā Dios cuéchi ñayuu, chi je ni cundaā jeē jnahnú ndetū maá jéxeén jeē kujéhnū ini ñayīví yáha.

¹²Te iyó cuéhē gā jnūhun cúní rī cahān rī jíin ró, te ma cúu jecūhun ni rō vijna. ¹³Te jeē quée maá Espiritu jeē steén jnūhun ndaā, te máa yá steén tāca jnúhun ndaā un núu rō. Chi ma cahán yā jeē maá yá, chi cahān yā tācajéē jíini sōho ya cahán Yaā Dios. Te stéén yā siquī tācá jniñu jeē coo. ¹⁴Te stéén yā jeē kujéhnū rī, chi nacastūhun yá nuū rō tāca jnúhun jeē jé ni cahān rī, te sáha ya jeē jécūhun ni rō. ¹⁵Ndihī ndese cújéhnū Tátá rī, suni súcuan cújéhnū máa rí. Jeē yúcuan ní cahān rī jeē Espiritu Santo nacastūhun yá nuū rō tāca jnúhun jeē jé ni cahān rī, te sáha ya jeē jécūhun ni rō jijnáhan ró.

Vēsú cácuuíhyá ni rō, te ndusī ni rō

¹⁶Jecu na te ma cóto ga rō nuū rī. Te jecu tucu quivī te coto tucu ró núu rī, chi quínuhun rī nuū ndeé Tátá rī. Achí yá.

¹⁷Yūcuán na te sava tēe cáscuáha jíin yá, ni cacajnūhun jnáhan de:

¿Na jnūhun cúu jeē yáha jeē cahán yā jíin yó? Chi áchí yá jeē jecu na te ma cóto ga yō nuū yā, te jecu tucu quivī te coto tucu yó núu yā, chi siquī jeē quínuhun yā nuū ndeé Tátá yā. ¹⁸¿Na jnūhun cúu jeē yáha jeē cahán yā, jecu na? Tu cájecūhun ni yō na vé cúu jeē cahán yā. Achí de.

¹⁹Te ni jini Jesús jeē cácuuni de cajnūhún de ya. Te ni cahān yā jíin de:

¿A cácajnūhun jnáhan ró na vé cúu jeē ni cahān rī jíin ró jeē jecu na te ma cóto ga rō nuū rī, te jecu tucu quivī te coto tucu ró núu rī? ²⁰Jendaá cahán rī jíin ró jeē ndahyū rō jijnáhan ró te cucuíhyá ni rō, te ñayuu ñayīví chi sa cusī ni i. Te vēsú cucuíhyá ni rō, te sa ndusī ni rō jeē cóto tucu ró núu rī. ²¹Īin ñahan núu cuacuyajni scácu ña, te jéhnde chíji ña, chi je ni quee hora jeē scácu ña. Te núu je ni scácu ña sūchi lúli, te tuá nahán ña jeē ní ndoho ña, chi cúsi ni ña jeē ní cacu sēhe ña. ²²Te suni súcuan cúu jeē cándoho ró vijna, chi cácuuíhyá ni rō jíin rí. Te jecu-ni quivī te coto jnáhan tucu yó, te cusī ndasí ni rō. Te ni īin ma cúu casí jeē cúsi ni rō.

²³Te quivī ún chi tú na vé cacān gā rō nuū rī. Chi jendaá cahán rī jíin ró jeē nuū maá Tátá rī cacān rō, te sáha ya ndihī jeē cájicān rō, siquī jeē cácandíje ró rúhū. ²⁴Nde vijna te ná tu cacān rō nuū Tátá rī jeē jíin síhví rí. Te vijna te na quéjéé ró cacān rō jíin síhví rí, te nihīn rō, návāha cusī ndasí ni rō.

Je ni quende yā poder ndihī jeneé cáhīyo ini ñayīví

²⁵Tāca jnúhun yáha ní cahān yatá rí jíin ró. Te quee quivī jeē ma cahán yatá gá rī jíin ró, chi sa suhva castūhun cájī rí nuū rō siquī Tátá rī. ²⁶Te quivī ún chi cacān rō nuū Tátá rī siquī jeē cácandíje ró rúhū. Te tu cahán rī jíin ró jeē cacān tahu rī jehē rō nuū Tátá rī. ²⁷Chi máa Tátá rī je cúndáhú ni yā rohó siquī jeē cáhīyo manī rō jíin rí, te ni cacandíje ró jéē ndé nuū maá yá vēji rī. ²⁸Ni quenda rī nde nuū Tátá rī, te ni quee rī ini ñayīví. Te vijna te quenda rī ini ñayīví, te nuhūn tucu rī nuū Tátá rī. Achí yá.

²⁹Te ni cacahān tēe cáscuáha jíin yá:

Vijna te cahán cají ní, te tuá cahán yatá ní.

³⁰Vijna te cájini na jéē jiní ni ndivīi cuiti, te

tuá jíni ñúhún jéē cájnūhún ni ñn ná níhín. Jeē yúcuan cá candíje ná jéē véji ní ndé nuū Yaā Dios. Achí de.

³¹ Te ni cahān Jesús jíin de:

¿A ndé vijna te cá candíje ró naún? ³² Te quiiji quiiví, te je ni quee, jeē cuité núu ró quínungoo ró ná vehe ná vehe ró, te stóo máñúhún ró ruhū. Te nasūu jéē quéndōo máñúhún rí, chi Tátá rī íne ya jíin rí. ³³ Tāca jnúhun yáha ní cahān rī jíin ró návāha coo ndeyí coo sī ni rō síquī jeē cá candíje ró rúhū. Ini ñayiví chi cánuú coto ró jnúndóho. Te vésú súcuan te na cóo sī ni rō, chi je ni quende rī poder tāca jéneé cáhīyo ini ñayiví. Achí yá.

Jeē ni jícan tahu Jesús jehē ñayuu cá candíje

17

¹ Te ná ni cahān Jesús tāca jnúhun yáha, te ni ndacoto ya ichi ándiví, te ni cahān yā:

Tátā, je ni quee quiiví jeē ndóho ná. Vijna te stéén ni jéē cujéhnu máá ná jeē cúu ná Séhe ní, návāha suni máá ná steén na jéē cujéhnu máá ní. ² Chi ni sáha ní jéē ndíso jniñu ná síquī tāca ñáyuu, návāha tāca ñáyuu jeē ni jéhe ní núu ná, cotecu i ní cáni sáha ná. ³ Te suhva cúu jnúhun cotecu i ní cáni: suu jeē na cúni i níhín jéē mañúhún-ni ní cúu Yaā ndaā, jíin jéē cúni i sãña jeē cúu ná Jesucristo, Yaā ní tají ní.

⁴ Je ni steén na núu ñáyuu ñayiví jéē cujéhnu ní, te je sínu ná jniñu ní ndacu ní núu ná. ⁵ Te vijna, Tátā, sáha ní jéē ndujéhnu tucu ná ndé nuū néne ní, nájnūhun cújéhnu ná jíin ní nde ná tu jecōo ñayiví.

⁶ Ñayuu jeē ní nacāji ní ini ñayiví, ni jēhe ní i nuū ná, te ni steén na núu i ndese Yaā cúu ní. Cuenta máá ní cúu i, te ni jēhe ní i nuū ná. Te ni cajetáhú i jnúhun ní, te ni casquícu i. ⁷ Te vijna te cájini i jeē ndé nuū máá ní véji tāca jéē iyó jíin ná. ⁸ Chi tāca jnúhun ni cahān ni jíin ná, ní castūhun ná núu i, te ni cajetáhú i. Te ni cajini i jeē ní quenda ndije ná ndé nuū máá ní, te ni cacandíje i jeē máá ní ni tají sãña.

⁹ Te jícan tahu na jéhē máá i jíjnáhan i. Tu jícan tahu na jéhē ñáyuu ñayiví jéē tu cá candíje, chi sa jehē máá ñáyuu ni jéhe ni núu ná, chi cuenta máá ní cácuu i. ¹⁰ Te tācá i jeē yíhi i ndaha máá ná, suni cuenta máá

ní cúu. Te tācá i jeē cúu i cuenta máá ní, suni cuenta máá ná cúu i. Te cástéén i ndese cújéhnu ná.

¹¹ Te tuá condee ná ini ñayiví. Te máá i chi quendōo i ini ñayiví, te máá ná chi najeē ná condee na jíin ní. Yaā i Yaā ndoo cúu ní, Tátā. Te jíin poder ní condito ní táca ñáyuu ni jéhe ni núu ná, návāha inuú na cóo ni i jíjnáhan i, nájnūhun cúu máá yó. ¹² Te jeē ní condee na jíin i ini ñayiví, te jíin poder ni ní condito ná i. Tāca ñáyuu ni jéhe ni núu ná, ni condito yúcún ná i. Te tu ní jéhe na jnúhun naa i jíjnáhan i, chi máá ñn-ni tēe jeē je cúu de tēe jnahnū ndetū, návāha squícu jnúhun yósó núu tútu i.

¹³ Te vijna te najeē na núu ní, te cáhán na táca jnúhun yáha jíin i níni jéē íne ga ná ini ñayiví, návāha na cóo sī ndasí ni i nájnūhun cúsi ni máá ná. ¹⁴ Ni castūhun ná jnúhun ní núu i. Te ni caquití ni ñayuu ñayiví núu i, chi tuá cácuu i cuenta ñayiví, nájnūhun máá ná tu cúu ná cuenta ñayiví. ¹⁵ Te tu jícan tahu na jéē quénehen ní i ini ñayiví, chi sa suhva jeē cóndito ní i nuū jexeén. ¹⁶ Nasūu cuenta ñayiví cácuu i, nájnūhun máá ná jéē násūu cuenta ñayiví cúu ná. ¹⁷ Jíin jnúhun ndaā ní te sáha ní jéē coo ndoo coo i i nuū ní. Tāca jnúhun cáhán máá ní cúu jnúhun ndaā. ¹⁸ Te nájnūhun ni tají ní sãña ní quiiji ná ini ñayiví, suni súcuan tají ná i nacani i jnúhun ní núu ñáyuu ñayiví. ¹⁹ Te jehē máá i cúu jeē jéhe ná máá ná cuu ná, návāha suni máá i coo ndoo coo i i nuū ni jéē jíin jnúhun ndaā.

²⁰ Te nasūu máá ñn-ni jehē ñáyuu yáha jícan tahu na, chi suni jehē tāca gá ñáyuu jeē candíje i sãña núu na cúni sōho i jnúhun jeē nacani máá i jíjnáhan i. ²¹ Te jícan tahu na jéē inuú na cóo ni i jíjnáhan i. Nájnūhun ñn-ni cúu ní jíin ná, Tátā, te ñn-ni cúu ná jíin máá ní, suni súcuan na cóo inuú i jíin yó. Te cúni na jéē inuú na cóo ni i, návāha na cándíje ñáyuu ñayiví jéē máá ní ni tají ní sãña. ²² Ni sajhénu ná i nájnūhun ni sajhénu ní sãña, návāha inuú na cóo ni i, nájnūhun inuú-ni cúu yó. ²³ Te ndúú ná jíin i, te ndúú ní jíin ná, te súcuan te inuú cuiti coo ni i jíjnáhan i. Yūcuán na te cuni ñáyuu ñayiví jéē máá ní ní tají ní sãña, jíin jéē maní ndasí ní jíin i nájnūhun maní ní jíin ná.

²⁴ 'Tátā, máá ní ni jēhe ní i nuū ná. Te cúní na jēē cóyūcú i jíin ná nuū cóndee ná, návāha coto i ndese luu cújéhnu ná ni sáha ní. Chi íyó mánī ndasí ní jíin ná nde ná tu jecōo ñayīví te nde vijna. ²⁵ Yaā ndaā cúu ní, Tátā, te ñayuu ñayīví tu jíin i níhín, te máá ná chi jíin na níhín. Te ñayuu yáha chi cájini i jeē máá ní ni tají sáña. ²⁶ Ni steén na núū i jíinahan i ndese Yaā cúu ní. Te steén gā na súcuan nuū i, návāha na cóo manī ndasí i jíin jnahan i, nájñuhun íyó mánī ndasí ní jíin ná, te návāha condee ná ini anuá i. Achí yá.

Jeē ní cajñi de Jesús

(Mt. 26.47-56; Mr. 14.43-50; Lc. 22.47-53)

18

¹ Te nuū ní cuu ni cahān Jesús tāca jñuhun yáha, te ni quenda ya jíin tēe cáscuáha jíin yá, cuahān yā inga lado yuu Cedrón. Te yūcuan íyó ñn huerto nuū ní quīví ya jíin tēe cáscuáha jíin yá. ² Te Judas, tēe jeē nastúu de ya, suni jíin de lugar un, chi cuehē jíinu ni nataca Jesús yūcuan jíin tēe cáscuáha jíin yá. ³ Te ni jinū de yūcuan jíin ñn grupo soldado jíin jecu policía cándito templo, jeē ní catajī sutū cáscuáha jíin tēe grupo fariseo. Te cándiso de machete, te cájñi de linterna jíin yiti. ⁴ Te Jesús je jíin yā tāca jñūdóho jeē véji síquī yā. Te ni quenda ya ichi núu de, te ni cahān yā:

¿Ndé ñn cánanducú ró?

⁵ Te ni cacahān de jíin yá:

Jesús tēe ñnu Nazaret cánanducú rí.

Te ni cahān yā:

Máá rí cúu.

Te Judas, tēe jeē nastúu de ya, suni íne de jíin tēe ún. ⁶ Te jeē súcuan ni cahān yā, máá rí cúu, te ni cajica yátá de, te ni cacotúu-ni de. ⁷ Yūcuán na te ni cajñuhún tucu ya de:

¿Ndé ñn cánanducú ró?

Te ni cacahān de:

Jesús tēe ñnu Nazaret.

⁸ Te ni cahān Jesús:

Je ni cachi rī jeē máá rí cúu. Te núu ruhū cánanducú ró, te máá-ni ri jñi ró, te tēe yáha na quíngoo de. Achí yá.

⁹ Súcuan ni cuu návāha na squícu jñuhun jeē ni cahān yā jíin Tátá yā: Tu ní jēhe na jñuhun naa ni ñn tēe jeē ni jēhe ni núu na, achí yá. ¹⁰ Te Simón Pedro ndíso de ñn

espada. Te ni tava de, te ni jehnde de sōho lado váha ñn tēe nání Malco. Te tēe un cúu de mozo maá sutū cújéhnu. ¹¹ Te ni cahān Jesús jíin Pedro:

Nachuvāha espada rō ini cubierta. ¿A tu cánuú jēē ndóho ri jñūdóho yáha jeē ni sándaā Tatá rī jeē ndóho ri? Achí yá.

Jeē ní indichi Jesús nuū sutū cújéhnu

(Mt. 26.57-58; Mr. 14.53-54; Lc. 22.54)

¹² Yūcuán na te tācá soldado un, jíin capitán de, jíin táca policía tēe hebreo un, ni cajñi de Jesús, te ni cajihni de ya. ¹³ Te xihna gā vehe Anás cuangoo de jíin yá. Te tátá chīsó Caifás cúu Anás. Te Caifás cúu máá sutū cújéhnu ga cuiyā ún. ¹⁴ Te suu de ni cachi nuū jnahan de hebreo jeē cánuú jēē cúu ñn tēe jehē nación de.

Jeē ní cachi Pedro jeē tu jíin de ya

(Mt. 26.69-70; Mr. 14.66-68; Lc. 22.55-57)

¹⁵ Te Simón Pedro jíin inga tēe scuáha, cándiquín de Jesús cuangoo de yatā yā. Te inga tēe scuáha ún chi jíin jnahan de jíin sutū cújéhnu. Jeē yūcuan ní quīví de jíin Jesús ini patio vehe sutū cújéhnu ún. ¹⁶ Te Pedro ni quendōo de yatā yehyí. Te máá tēe scuáha jēē jíin jnahan jíin sutū cújéhnu ún, ni quenda de ni cahān de jíin ñahan ndíto yéhyí, te ni squíví de Pedro ini patio. ¹⁷ Yūcuán na te ñahan ndíto yéhyí un ní cajñuhún ña Pedro:

¿A násūú ñn tēe scuáha jíin tēe indichi nuū sutū un cúu ró?

Te ni cahān de:

Nasūu cúu rí, achí de.

¹⁸ Te tāca mozo jíin policía un ní cascáyú de ñuhūn jíin tícāyí, chi mījin sáha. Te cáhīn de cánasaā de. Te suni indichi Pedro, násaā de jíin táca tēe ún.

Jeē ní stíchí sutū cújéhnu ún Jesús

(Mt. 26.59-66; Mr. 14.55-64; Lc. 22.66-71)

¹⁹ Te sutū cújéhnu un ní stíchí de Jesús ndé-ni cúu tēe cáscuáha jíin yá, jíin na jñuhun cúu jeē steén yā. ²⁰ Te ni cahān Jesús:

Níní ní cahān rī nuū chítú ñáyuu, ni cajini sōho ndihi ñayuu. Te níní ní steén rī jñuhun ini tācá vehe ñn sinagoga jíin ini templo cáhnu nuū ndutútú ndívii jnahan yó hebreo. Te tú ni ñn jñuhun ní cáhān sāhi rí. ²¹ ¿Te naun cajñuhun ró ruhū? Cajñuhun ñáyuu ní cajini sōho jñuhun ni cahān rī, te

maá i cachi ndese ni cahān rī. Chi cájini i ndese ni cahān rī.

²² Te jeē ni cáhān Jesús súcuan, te ìn policia ndíto templo jeē índichi de yūcuán, ní cani-ni de nuū yā. Te ni cahān de jíin yá:

¿A súcuan cáhān rō jíin sūtū cujéhnū naún?

²³ Te ni cahān Jesús:

Núu ni cahān rī ìn jnūhun néé, cachi na jnūhun néé ní cahān rī. Te núu tu ní cáhān rī ìn jnūhun néé, ¿te naun cáni ró rúhū? achí yá.

²⁴ Yūcuán na te Anás, sutū cujéhnū un, ní tají de ya, núhni yā cuahān yā nuū Caifás, tēe cúu máá sūtū cujéhnū ga.

Jeē ní cachi tucu Pedro jeē tu jíin de ya
(Mt. 26.71-75; Mr. 14.69-72; Lc. 22.58-62)

²⁵ Te níni jeē súcuan cúu, te índichi-ni Pedro, násaā de yuñhún. Te ni cacahān jíin de:

¿A násūú ìn tēe scuáha jíin tēe un cúu ró, chí naún?

Te máá de tu ní cáchi de:

Nasūu cúu ri, achí de.

²⁶ Yūcuán na te ìn mozo sutū cujéhnū, jnāhan tēe jeē ní jehnde Pedro sōho, ni cahān jíin de:

¿A násūu máá ró cúu jeē ní jito ri jíin de ini huerto?

²⁷ Te Pedro tu ní cáchi tucu de. Te ni cana-ni líhli.

Jeē ní indichi Jesús nuū Pilato
(Mt. 27.1-2, 11-14; Mr. 15.1-5; Lc. 23.1-5)

²⁸ Yūcuán na te ni quendacoo de jíin Jesús vehe Caifás, cuango de jíin yá nde palacio tēe nación Roma jeē cúu gobernador. Te je cuacundijin. Te ñayuu hebreo tu ní quívicoo i ini palacio, návāha tu stívī i ley i jeē cahān jeē ma quívī i ini vehe ìn ñayuu jeē násūú hebreo cúu. Chi núu súcuan te ma cúu cuxíni i vico pascua jeē cóo inga quívī ún. ²⁹ Yūcuán na te ni quenda Pilato, tēe cúu gobernador, ni cahān de jíin i jíjnāhan i:

¿Na cuēchi cájicān rō siquī tēe yáha?

³⁰ Te ni cacahān i:

Núu jeē násūu tēe cúnée cúu tēe yáha, te ma jnī ná de jeē quíndeca ná de nuū ni núu, achí i.

³¹ Te ni cahān Pilato:

Cuángoo jíjnāhan ró, te sándaā rō siquī de jíin ley cánevāha máá ró.

Te ni cacahān ñayuu hebreo un:

Máá ná jeē cácuu ná ñayuu hebreo, tú na permiso cánevāha ná jeē cáhni ná ni ìn ñayuu.

³² Súcuan ni cacahān i návāha squícu jnūhun jeē ní cachi Jesús jeē quívī ya ndaha tēe Roma te cahni de ya jicā cruz. ³³ Te ni ndívī Pilato ini palacio, te ni cana de jeē na quíji Jesús. Te ni cajnūhún de ya:

¿A máá ró cúu Rey ñayuu hebreo naún?

³⁴ Te ni cahān Jesús jíin de:

¿A cájnūhun ró ruhū jeē súcuan jéni ni maá ró, chí jeē ní cacastūhun ñayuu hebreo nuū rō?

³⁵ Te ni cahān Pilato:

¿Chí tēe hebreo cúu ri jeē cúni rī? Ñayuu nación maá ró jíin sūtū cácujehnū ni cachihí rōhó ndaha ri. ¿Na vé ni sáha ró núu súcuan? Achí de.

³⁶ Te ni cahān Jesús:

Nasūu jeē ndácu ri jniñu návjñūhun cándacu tāca rey ñayīvī yáha. Chi núu jeē ñayuu ñayīvī ní casáha jeē cúu ri rey, yūcuán na te tēe cándiquīn ruhū, cuajnáhan de návāha ma quívī ri ndaha jnāhan ri hebreo nuú. Te nasūu núu ñayīvī yáha cúu jeē ndácu ri jniñu vijna. Achí yá.

³⁷ Yūcuán na te ni cahān Pilato jíin yá:

¿Te á ìn rey cúu ró jeē súcuan?

Te ni cahān Jesús:

Rey cúu ri, návjñūhun cáhān rō. Ni quiiji ri ni cacu ri ini ñayīvī yáha návāha nacani ri jnūhun ndaā. Te ndihī ñayuu cájetáhú jnūhun ndaā, cájini nahín i jnūhun cáhān rī. Achí yá.

³⁸ Te ni cahān Pilato:

¿Ndese cuni yō ndé ìn cúu máá jnūhun ndaā?

Jeē ní cundaā jeē cúu yā

(Mt. 27.15-31; Mr. 15.6-20; Lc. 23.13-25)

Te jeē ni cáhān de jnūhun yáha, te ni quenda tucu de nuū ñayuu hebreo. Te ni cahān de jíin i:

Tú cuiti na cuēchi níhín rī siquī de. ³⁹ Te íyó costumbre máá ró jíjnāhan ró jeē vico pascua te siáá rī ìn tēe íne vecāa nuū rō. ¿Te á tu cácuni rō jeē siaá rī Rey rō nuū rō? Achí de.

⁴⁰ Yūcuán na te ndívīi i ni cacana jee tucu i:

Ma siaá ni téé jíñá, chi Barrabás siaá ni, achí i.

Te téé cuíhná cúu Barrabás.

19

¹ Yūcuán na te ni cahān Pilato jeē na jñí soldado Jesús, te caní de ya jíin cuarta ñí. ² Te ni casáha de ñin corona iñu, ni cachuhun de xiní yā. Te ni cachuhun de ya ñin sahma cuehé ndíhí jeē cúu sahma rey. ³ Te ni jecondichi de nuū yā, te ni cacahān catá de:

Nacā jeē váha rey cúu Rey ñayuu hebreo. Te ni cacani de nuū yā.

⁴ Yūcuán na te ni quenda Pilato inga jínu, te ni cahān de jíin ñayuu:

Yāhá condēhe ró tava rī de, návāha na cúni rō jeē tú na cuēchi níhín rī siquī de.

⁵ Te ni quenda Jesús, ñuhun ya corona iñu jíin sahma cuehé ndíhí un. Te ni cahān Pilato jíin i:

Yāhá condēhe ró de jíināhan ró.

⁶ Te nuū ní cajito sutū cácujeñnu jíin táca policía nuū yā, te ni cacana jee de:

Cata caa ní de jicā cruz, na cúu de.

Te ni cahān Pilato:

Núu súcuan te najñí máá ró de te cahni rō de. Chi ruhū, tú na cuēchi níhín rī siquī de.

⁷ Te ni cacahān ñayuu hebreo un:

Cáneváha ná ñin ley, te jeē siquī ley un cánuú jeē cúu de, chí sáha de máá de jeē Séhe Yaā Dios cúu de.

⁸ Te jeē ní jini sōho Pilato jñuhun yáha, te víhyá gā ni yūhú de. ⁹ Te ni ndívicoo tucu de ini palacio, te ni cajñuhún de Jesús:

¿Ndé nuū véji ró?

Te tu ní cáhán cuíti Jesús jíin de. ¹⁰ Yūcuán na te ni cahān de jíin yá:

¿Naun tu cáhán rō jeē cahán rī? ¿A tu jíin rō jeē ndíso jñíñu rī jeē cáhni rī rohó jicā cruz, te suni ndíso jñíñu rī jeē siaá rī rohó quíhín rō?

¹¹ Te ni cahān Jesús:

Núu tu ní sáha Yaā Dios jeē ndíso jñíñu ró, te tú na vé cúu sáha ró siquī rī. Jeē yúcuán téé jeē ní nacuāha ruhū ndaha ró, cuēchi xeēn gā condee siquī de vésú máá ró. Achí yá.

¹² Yūcuán na te nde hora un ndúcú ndéyí Pilato ndese siaá de ya. Te ñayuu hebreo chí cácana jee i:

Núu siaá ni téé jíñá, te tu cúu ní amigo rey Roma jeē cujéñnu ndácu jñíñu núu súcuan. Chí táca téé jeē sáha de rey maá de, núu súcuan te cúu de enemigo siquī rey un. Achí i.

¹³ Te jeē ní jini sōho Pilato jñuhun yáha, te ni ndacu de jñíñu jeē na quénda Jesús ini vehe quiji ya. Te ni cucōo de silla nuū cúndaā jñíñu, nuū máni máá yūu ni jecāva, te lugar un nání Gabata nuū yúhu hebreo. ¹⁴ Te cuacuu cahuxī uū, te jehíni quivī ún quejéé vico pascua. Te ni cahān Pilato jíin ñayuu hebreo:

Yāha índichi maá rey rō.

¹⁵ Te ni cacana jee i:

Na cúu de. Cata caa ní de jicā cruz, achí i. Te ni cahān Pilato jíin i:

¿A jeē cata caa rī rey rō jicā cruz naún?

Te sutū cácujeñnu un ní cacahān de:

Tuá na inga rey cánevāha ná jíināhan ná, chí máá-ni rey Roma jeē cujéñnu ndácu jñíñu nuū ná.

¹⁶ Yūcuán na te Pilato ni nacuāha de ya nuū i jeē na cúu yā jicā cruz. Te ni cajñí i ya cuango i jíin yá.

Jeē ní cacata caa de ya jicā cruz

(Mt. 27.32-44; Mr. 15.21-32; Lc. 23.26-43)

¹⁷ Te ni quenda Jesús, ndíso ya cruz yā, cuango de jíin yá ñin lugar nuū naní Yiquí Xíní, te nuū yúhu hebreo naní Gólgota. ¹⁸ Te yúcuán ní cacata caa de ya jicā cruz. Te suni ní cacata caa de uū téé nuū uū gā cruz, ñin ñin de ñin lado yā, te máá Jesús mēhñú. ¹⁹ Te suni ní ndacu Pilato jñíñu jeē na cóndee jñuhun xiní cruz yā, jeē cahán: Téé yáha cúu Jesús ñuu Nazaret, Rey ñayuu hebreo, achí. ²⁰ Te cuehé ñayuu hebreo ní cacahu i jñuhun yáha, chí máá yajni yuñúú cúu nuū ní cacata caa de ya. Te jñuhun un yósó jíin yuhu hebreo jíin griego jíin latín. ²¹ Te táca sūtū cácujeñnu nuū ñayuu hebreo, ní cacahān de jíin Pilato:

Ma téé ní jeē cúu de Rey ñayuu hebreo, chí sa suhva tee ní jeē máá de ní cahān jeē cúu de Rey ñayuu hebreo.

²² Te ni cahān Pilato:

Ma násama rī jeē jé ní ndacu rī jñíñu ní jecondée.

²³ Te soldado un, nuū ní cuu ní cacata caa de Jesús jicā cruz, te ní caquihin de sahma

ya, te ni cajehnde de ni nduu cuñ parte, te ñin ñin parte ni cuu ñin ñin soldado un. Te suni ni caquihin de camisa yā. Te camisa un tu ní quícu, chi ni cunu ní. ²⁴ Te ni cacahān maá de:

Ma cáhnde yō, chi vāha ga na sáha yó sorteo, te na cóndēhe yó ndé ñin yó níhñ, achí de.

Te súcuan ni squícu jñūhun yósó núu tútu ñi nde jenahán jéē cahān Jesús: Ni caquihin de sahma ri cuu máá de. Te ni casáha de sorteo siquī camisa rī. Achí. Súcuan ni casáha soldado un.

²⁵ Te yajni cruz nuū ndíta caa Jesús íne náná yā, jíin cúhū ña María ñasihí Cleofas, jíin María ñuu Magdala. ²⁶ Te ni jito Jesús nuū naná yā jíin núu téē scuáha jeē maní gā yā jíin, suni índichi de yūcuán. Te ni cahān yā jíin náná yā:

Nánā, nde vijna te máá de nucuññi de cuu de sēhe ní.

²⁷ Yūcuán na te ni cahān yā jíin téē scuáha ún:

Nde vijna te cuu ña nájñūhun náná rō, achí yā.

Te nde hora un ní cana de ña cuacondee ña vehe de condito de ña.

Jeē ni jíhī Jesús

(Mt. 27.45-56; Mr. 15.33-41; Lc. 23.44-49)

²⁸ Yūcuán na te ni jini Jesús jeē jé ni jínu tācá jñiñu jeē cánuú ndoho ya. Te návāha squícu jñūhun cáhán tutu ñi, te ni cahān yā:

Jíchí rī ndute, achí yā.

²⁹ Te yūcuan íin ñin tñdohō ñūhun chitú vinagre iyá. Te ni cachundaji de ñin cachí nuū vinagre un, te ni catee de xiní ñin ndaha yújnu hisopo, te ni catee de yuhu ya jeē cóho ya. ³⁰ Te ná ni jihí ya vinagre un, te ni cahān yā:

Je ni jínu, achí yā.

Te ni cāyí-ni xiní yā, te ni jihí-ni ya.

Jeē ní cují soldado lanza xiin ya

³¹ Te ñga quíiví ún coo vico pascua. Te téē hebreo tu cácuñi de jeē cóndita caa ndíyí ún jícā cruz quíiví ndétátú un. Chi quíiví ndétátú jeē cúu vico pascua, ñi ndasí gá vésú tāca gá quíiví ndétátú. Te ni cacahān de jíin Pilato jeē na ndácu de jñiñu jeē jnahnú síhñ téē cándita caa, te na cújiyo de jícā cruz. ³² Te ni quecoo soldado, te ni cajehnū de síhñ ñin téē jeē ndíta caa jíin yā, te suni

súcuan ñga de. ³³ Te nuū ní quecoo de nuū Jesús, te ni cajito de jeē jé ni jihí yā. Jeē yúcuan tu ní cájehnū de síhñ ya.

³⁴ Te ñin soldado chi ni cují de lanza xiin ya, te ni cane-ni níñi jíin ndute. ³⁵ Te máá rí jeē téē tutu yáha, ni jito ri jeē súcuan ni cuu, te nácani ndaā rí jñūhun ndese ni cuu. Te jíin rí jeē iyó ndaā jñūhun cáhán rí, návāha suni cándije máá ró jíinánhan ró.

³⁶ Chi súcuan ni cuu návāha squícu jñūhun cáhán tutu ñi: Ma cahnú de ni ñin yíqui ya, achí. ³⁷ Te suni ñga jñūhun cáhán tutu ñi: ñin quíiví te coto i nuū Yaā jeē ní cují i lanza, achí.

Jeē ní quindūji Jesús

(Mt. 27.57-61; Mr. 15.42-47; Lc. 23.50-56)

³⁸ Te ni cuu tāca jéē yáha. Te íyó ñin téē ñuu Arimatea jeē naní José, te cúu de téē cándije Jesús. Te yuhu-ni cándije de, chi yúhú de jñáhan de hebreo. Te ni cahān ndahú de jíin Pilato jeē na cuáha jñūhun quihin de yíqui cúñu Jesús. Te ni jēhe Pilato jñūhun. Yūcuán na te cuahān José, ni snúu de yíqui cúñu Jesús. ³⁹ Te suni ni jinū Nicodemo, téē ni quiji nuū Jesús ñin jecuáā. Te ndíso de nájñūhun ocō uxí kilo sūje uvuā jeē ní saca jñáhan jíin yúcū áloe. ⁴⁰ Te ndíndúú de ni caquihin de yíqui cúñu Jesús, te ni cachusúcun de jíin tira sahma jeē ni quíiví yucū jeē jeén asín ún, nájñūhun íyó costum-bre maá ñáyuu hebreo jeē cáchindūji i ndíyí. ⁴¹ Te yajni nuū ni jíhī Jesús íyó ñin huerto. Te nuū huerto un ndéé ñin yaū jeē ní caan jeé jícā ñin cava, nuū ná tu quindūji ndíyí. ⁴² Te yūcuan ní cachindūji de Jesús, chi íne yajni yaū ndíyí ún. Chi je yajni quejéé quíiví ndétátú de jeē cácuu de ñáyuu hebreo, te tú na ley chindūji de ndíyí núu je ni quejéé quíiví ún.

Jeē ní natecu Jesús

(Mt. 28.1-10; Mr. 16.1-8; Lc. 24.1-12)

20

¹ Te jenéhen quíiví domingo ni jinū María ñuu Magdala nuū ní yíndūji Jesús, te yínee gá cúu. Te ni jito ña jeē ní cujiyo yuū ndihyú yuyáú ndíyí. ² Yūcuán na te jínu ña cuahān ña nuū Simón Pedro jíin núu ñga téē scuáha ún jeē maní gā Jesús jíin. Te ni cahān ña jíin de:

Ni catava de Jitoho yō nuū ní yindūji ya, te tu cájini yō ndé nuū ní cachune de ya, achí ña.

³ Te ni quendacoo Pedro jíin inga tēe scuáha ún, cuácondēhé de yaū ndīyi. ⁴ Te cájini tayí ndindúú de. Te inga tēe scuáha ún, nihin ga ni jinu de vēsú Pedro. Te xīhna gā de ni jinū yaū ndīyi. ⁵ Te ni scáyí de máá de, te ni jito nihni de ini yaū. Te ni jito de jeē tira sahma un cáyūcu máá na. Te tu ní quívi de. ⁶ Te sáá te ni jinū Simón Pedro jeē ndiquín jnáhan de vēji de jíin inga tēe ún. Te ni quívi de nuū ní yindūji Jesús. Te suni ni jito de jeē tira sahma cáyūcu máá na. ⁷ Te ni jito de sahma jeē ni ñúsúcún xíní Jesús, tu catú jíin tira sahma, chi ni natuu te catú sín. ⁸ Yūcuán na te suni ni quívi inga tēe scuáha jeē ni jinū xīhna gā nuū ní yindūji ya. Te ni jito de ndese íyó, te ni candíje de jeē ní natecu yā. ⁹ Chi nde ná tu jinūcoo de yaū ndīyi, te tu ní jécūhun ni de jnūhun cáhán tutu iī, jeē jíni ñúhún natecu yā núu je ni jihí yā. ¹⁰ Yūcuán na te ndindúú tēe cáscuáha ún cuanungoo de vehe de.

Jeē ní nane ya nuū María ñuu Magdala
(Mr. 16.9-11)

¹¹ Te María índichi ña ndáhyú ña nuū ní yindūji ya. Te níni ndáhyú ña, te ni scáyí ña máá ña, ni jito nihni ña ini yaū ún. ¹² Te ni jito ña uū ndajéhé andiví, cáñuhun ya sahma cuijín. Te ñin ya néne ichi xíní, te inga ya néne ichi núu jehé nuū ni catu yiqui cúñu Jesús. ¹³ Te ni cacahān yā jíin ña:

¿Najehē ndahyú rō?

Te ni cahān ña:

Ni catava de Jitoho ná, te tu jíni na ndé nuū ní cachune de ya.

¹⁴ Te jeē ni cáhān ña súcuan, te ni ndió cóto ña, te ni jito ña nuū Jesús jeē índichi yā yūcuán. Te tu ní nacuni ña jeē maá yá cúu.

¹⁵ Te ni cahān yā jíin ña:

¿Najehē ndahyú rō? ¿Ndé ñin nánducú ró? achí yá.

Te máá ña jéni ni ña jeē tēe ndíto huerto cúu ya. Te ni cahān ña jíin yá:

Núu máá ní ni quenehen ní yá, te cachi ní ndé nuū ni jéchune ní yá, te na quínuquihin ná yá, achí ña.

¹⁶ Te ni cahān Jesús jíin ña:

María, achí yá.

Te jeē ni cáhān yā súcuan, te ni nacuni ña ya, te ni ndió cóto ña, te ni cahān ña jíin yuhu hebreo:

Raboni, achí ña. Te jnūhun un cúní cahān, Maestro.

¹⁷ Te ni cahān Jesús jíin ña:

Ma quehé ró rúhū, chi ná tu ndaa ri quinhun rī nuū Tatá rī. Te cuáhán núu tēcá hermano rī, tēe ni cascuáha jíin rí, te cachi rō nuū de jeē ndaa ri quinhun rī nuū Tatá rī, jeē suni Tátá maá ró jijnáhan ró cúu. Te cúu ya Yā Dios maá rí jíin Yā Dios maá ró jijnáhan ró. Achí yá.

¹⁸ Yūcuán na te María ñuu Magdala un, cuáhān ña, te ni castūhún ña nuū tēe cáscuáha un jéé ní jito ña nuū maá Jitoho yō jíin jéé ni cáhān yā jnūhun yáha jíin ña.

Jeē ní nane ya nuū tēe cáscuáha jíin yá

(Mt. 28.16-20; Mr. 16.14-18; Lc. 24.36-49)

¹⁹ Te jeē ní cuaa máá quívi domingo un, te cáhīn tūtú tēe cáscuáha ún ini ñin vehe. Te cándihyū yehyí, chi cáyūhú de jnáhan de hebreo jeē coto xeēn i de. Te ni quee-ni Jesús, ni jecuiñí yā mēhñú de vēsú ndihyū yehyí, te ni cahān yā jíin de:

Ndeyí sñ coo ni rō jijnáhan ró, áchí yá.

²⁰ Te ná ni cahān yā súcuan, te ni steén yā ndaha ya jíin xiin ya nuū de. Te ni cacusiñ ni tēe cáscuáha un jéé ní cajito de nuū maá Jitoho yō. ²¹ Yūcuán na te ni cahān tucu Jesús:

Ndeyí sñ coo ni rō jijnáhan ró. Te nájñuhun ni tají Tátá rī ruhū ini ñayiví, suni súcuan tájí rí rohó nacani ró jnúhun ri nuū ñáyuu. Achí yá.

²² Yūcuán na te ni tēvi tachí yā nuū de jíin áhan de. Te ni cahān yā:

Vijna te ni canihīn rō Espíritu Santo. ²³ Te tāca ñáyuu jeē cone cáhnu ni rō nuū cuéchi i, núu súcuan te coo jnūhun cáhnu ni nuū cuéchi i. Te núu tú cone cáhnu ni rō nuū cuéchi i, te ma cóo jnūhun cáhnu ni nuū cuéchi i. Achí yá.

Jeē ní nane ya nuū Tomás

²⁴ Te Tomás, tēe ni cacu cuatí, ñin jnáhan jeē uxí uū tēe cáscuáha jíin yá, tu ní íne de quívi jeē ní nane Jesús nuū tāca gā tēe cáscuáha. ²⁵ Yūcuán na te sava ga tēe cáscuáha un, ní cacahān de jíin Tomás:

Ni cajito ri nuū maá Jitoho yō.

Te ni cahān Tomás:
Núu tú coto ri nuū ni túji ndaha ya ni sáha ndūyu cāa, te núu tú chune ri xinī ndáha ri nuū ni íne ndūyu cāa, te núu tú chune ri ndaha ri xiin ya, te ma candíje cuiti rī, achí de.

²⁶ Te nuū uná quivī, te tēe cáscuáha un cáhīn tūtú tucu de ini in vehe. Te íne Tomás jiín de. Yūcuán na te ni quee-ni tucu Jesús, ni jecuiñī yā mēhñú de, vēsú cándihyū yehyí. Te ni cahān yā jiín de:

Ndeyí sñ coo ni rō jijnáhan ró.

²⁷ Te ni cahān-ni ya jiín Tomás:

Chune xinī ndáha ró ini ndaha ri yāhá te coto ró. Te scáa ndaha ró, te chune ró xiin ri nuū ni tújī. Te ma cáni siquí gá ni rō, chi sa suhva na cándíje ró.

²⁸ Yūcuán na te ni cahān Tomás jiín yá:

Aī, Jitoho maá ná jiín Yaā Dios maá ná cúu ní, achí de.

²⁹ Te ni cahān Jesús jiín de:

Tomás, nde ni jito ró núu rī, te ni candíje ró. Te yōhyo ndetū tāca ñáyuu jeē candíje ruhū vēsú tu ní jito i nuū rī, achí yá.

Najehē ni tee Juan libro yáha

³⁰ Te suni ni sáha Jesús cuehē gā jniñu jéhnū jeē ni stéén yā poder yā nuū tée cáscuáha jiín yá, jeē tu yósó núu tūtú yáha.

³¹ Te tācá jniñu yáha ní tee ri návāha candíje ró jijnáhan ró jéē Jesús cúu Cristo, maá Séhe Yaā Dios. Chi jeē candíje ró yá, te cotecu rō ní cáni sáha ya.

Jeē ní nane ya nuū uxá tēe cáscuáha jiín yá

21

¹ Te ni cuu jecu quivī, te inga jínu ni nane Jesús nuū tée cáscuáha jiín yá, jeē cáhīn de yumar Tiberias. Te suhva ni steén yā maá yá nuū de: ² Cáhīn tūtú Simón Pedro, jiín Tomás, tēe ni cacu cuatí, jiín Natanael, tēe ñuu Caná ndañū Galilea, jiín ndindúú séhe Zebedeo, jiín úū gā tēe cáscuáha. ³ Te ni cahān Simón Pedro jiín de jijnáhan de:

Quíññi ri chācá.

Te ni cacahān de:

Suni quingoo ri jiín ró.

Te cuangoo de, te ni quivicoo de in barco. Te tu ní canihīn cuiti de ti jecuáa yúcuan. ⁴ Te jeē cuácundijin, te íne Jesús yumar. Te tēe cáscuáha ún, tu ní cánacuni de

jeē maá yá cúu. ⁵ Yūcuán na te ni cahān yā jiín de:

Aá rō jijnáhan ró, ¿á ní canihīn rō chācá caji yō?

Te ni cacahān de:

Tú cuiti, achí de.

⁶ Yūcuán na te ni cahān yā jiín de:

Síngava ñunu ró ichi lado váha barco, te nihīn rō tī.

Te ni casíngava de ñunu, te tuá ní cúu cuiti natava de, jeē ni quivicoo cuehē ndasí chāca. ⁷ Yūcuán na te tēe scuáha jeē maní gā Jesús jiín, ní cahān de jiín Pedro:

Máa Jitoho yō cúu, achí de.

Te jeē ní jini sōho Simón Pedro jeē maá Jitoho yō cúu, te ni nachuhun de sahna de, chi ni tava de jeē sájniñu de. Te ni ndava-ni de nuū mar cuahān de nuū yā.

⁸ Te tāca gá tēe cáscuáha ún, vendicoo de jiín barco yundúte, cástaa de ñunu ñuhun chitú chāca. Chi tu jícá cáhīn de jiín ñuhun íchi, chi nájnūhun ciento-ni metro cúu. ⁹ Te nuū ní quendacoo de ini barco, te ni cajito de jeē nduhvá tīcua ñuhūn, te íne staā jiín in chācá chíhyó. ¹⁰ Te ni cahān Jesús jiín de:

Cuáquihin jecu chācá jéē sa ní cajññi ró, na táu yó, achí yá.

¹¹ Te ni quivī Simón Pedro ini barco, te ni stáa de ñunu, ni quee de jiín ndé nuū ñuhun íchi. Te ñuhun chitú chāca náhnū, in ciento uū xico uxī unī tī cúu. Te vēsú in súcuan tī ñuhun, te tu ní táhdé ñunu. ¹² Te ni cahān Jesús jiín de:

Nehen jijnáhan ró na cási ni yō.

Te ni in tēe cáscuáha ún tu ní cúndeyí ni de cajññun de ya núu ndé in cúu ya. Chi je cájini de jeē maá Jitoho yō cúu ya. ¹³ Te ni quindēhe Jesús yuññuhún, te ni quihin ya staā ún, te ni jēhe ya nuū de, te suni súcuan chācá un.

¹⁴ Yáha cúu vuelta unī jeē ní nane Jesús nuū tée cáscuáha jiín yá, ná ni natecu yā.

Jeē ní ndajnūhún Jesús jiín Simón Pedro

¹⁵ Te nuū ní cuu ni cajesi ni de, te Jesús ni cajññun yá Simón Pedro:

Simón séhe Jonás, ¿á mánī gā rō jiín rí vēsú tāca gá tēe yáha?

Te ni cahān de:

Je jíní ní jéē maní na jiín ní, achí de.

Te ni cahān yā jiín de:

Núu súcuan te stéén rō jnūhun ri nuū ñáyuu cácuu nájnūhun londe ri.

¹⁶ Te ni cajnūhun yá de vuelta uū:

Simón sēhe Jonás, ¿á mánī rō jíin rí?

Te ni cahān de jíin yá:

Je jíiní ni jēē maní na jíin ní, achí de.

Te ni cahān yā:

Condito rō ñáyuu cácuu nájnūhun lanchi ri núu súcuan.

¹⁷ Te ni cajnūhún tucu ya de vuelta unī:

Simón sēhe Jonás, ¿á mánī rō jíin rí?

Te ni cucuíhyá ni Pedro jeē ní cajnūhun yá de vuelta unī núu maní de jíin yá. Te ni cahān de:

Máá ní jíiní ni ndíhi, te jíiní ni jēē maní na jíin ní.

Te ni cahān yā:

Núu súcuan te stéén rō jnūhun ri nuū ñáyuu cácuu nájnūhun lanchi ri. ¹⁸ Te jendaá cahán rī jíin ró jeē nde ná suchí ró, te ni quihín máá ró sahma ró, te ni jica ró ndé nuū cuní maá ró. Te núu na yá ró, te nasūu jēē cuní maá ró, chí inga ñáyuu quindēca i rōhó nuū tu cuní rō quihín rō. Te scaá rō ndíndúú ndaha ró jēē cuu rō.

¹⁹ Jnūhun yáha ní cahān yā jeē ni stéén yā jeē cóndita caa de jicā cruz cuu de, te jeē súcuan cuatáhú de cúu jeē steén de jeē yóhyo cújéhnū Yaā Dios. Yūcuán na te ni cahān gā yā:

Condiquīn rō ruhū jeē sáha ró jniñu ní ndacu ri nuū rō, achí yá.

Jnūhun tēe scuáha jeē maní gā yā jíin

²⁰ Te ni ndió cóto Pedro, te ni jito de tēe scuáha jeē maní gā Jesús jíin, ndíquín de vēji de yatā. Tēe un cúu jeē ní conene xiin Jesús ná ni cacuxíni de jíin yá, te ni cajnūhún de ya: ¿Ndé ñn de cúu jeē nastúu níhín? ²¹ Te jeē ní jito Pedro nuū téē ún, te ni cajnūhún de Jesús:

Te tēe yáha, ¿ndese coo jíin de?

²² Te ni cahān Jesús:

Núu cuní rī jeē cótecu de nde quivī ndíji ri, ¿te naun ndíhví ní rō? Máá ró chí condiquīn rō ruhū jeē sáha ró jniñu ní ndacu ri nuū rō, achí yá.

²³ Yūcuán na te jnūhun yáha ní jitē núu nuū tācá hermano, jeē téē scuáha un má cúu de. Te tu ní cáhán Jesús jeē ma cúu de, chí sa suhva ni cahān yā: Núu cuní rī jeē

cótecu de nde quivī ndíji ri, ¿te naun ndíhví ní rō?

²⁴ Te tēe scuáha un jēē maní gā Jesús jíin, suu cúu ruhū jeē nácani jnūhun tācá jniñu yáha, te suu ri téē tāca jnūhun yáha. Te cájini rō jijnáhan ró jēē iyó ndáā jnūhun nácani ri.

²⁵ Te suni iyó cuéhē ndasí gā jniñu ní sáha Jesús. Te núu tee yó ná ñn ná ñn, te ma cánda nñ ñáyiví cuhun tutu jeē cóso jnūhun ún, jéni ní rī. Te ni cuu. Amén.

JNIÑU JEHNU JEE NI CASAHA TEE APOSTOL

Jeē ni jéjnūhun ya quiji Espíritu Santo

¹ Amigo Teófilo, nuū tútu jeē ní tee ná xíhna gā ni castūhun ná nuū ni táca jniñu ní sáha Jesús, jiín táca jnúhun ni steén yā nde quiiví ní quejéé yá ni sáha ya ² te nde quiiví ní ndaa ya cuanuhun yā andiví. Te nde ná tu ndaa ya quihīn yā, te ni sáha Espíritu Santo jeē ní ndacu ya jniñu nuū táca apóstol, tēe ni nacāji ya. ³ Te nuū ni jínu ni ndoho ya jeē ni jíhī yā, te uū xico quiiví te tijni jínu ni steén ndijin yā maá yá nuū tēe un jíjnáhan de, te súcuan ni cajini de jeē iyó ndāā jeē ní natecu yā. Te ni cahān yā jiín de siquī ndese ndácu Yaā Dios jniñu.

⁴ Te ná cáhīn tútú de jíin yá, te ni cahān yā jiín ndihī de jeē ma quéndacoo de ini ñuu Jerusalén, chí áchí yá:

Condetu ró ndé quee Espíritu Santo jeē ni jéjnūhun máá Tátá rī Yaā Dios. Chí je ni cachi rī nuū rō jeē ni jéjnūhun ya quiji Espíritu Santo. ⁵ Chí Juan, jendaá jeē maá ndute-ni ni scuándute de ñayuu. Te rōhó jíjnáhan ró, jecu na quiiví te nájnūhun cuandute ró jíin Espíritu Santo, cúu jeē condee yā ini anuá rō, achí yá.

Jeē ní ndaa Jesús cuanuhun yā andiví

⁶ Yūcuán na te tēe cáhīn tútú jíin yá, ni cacajnūhún de ya:

¿A vijna te nasáha ní jēē ñáyuu ñuu yō Israel ndujéhnu i ndacu i jniñu nuū nación yō chí naún? áchí de.

⁷ Te ni cahān yā:

Ma cúu cuni rō quiiví chí cuíyā jeē cóo jeē ni sándaā maá Tátá rī, chí máá ñn-ni máá yá jiní yā na quiiví sáha ya. ⁸ Te jeē cúni rō cúu jeē quee Espíritu Santo te condee yā ini anuá rō jíjnáhan ró. Yūcuán na te nihīn rō poder te nacani ró jnúhun ri ñí ini ñuu Jerusalén, ní Judea, ní Samaria, nde ní cáhnu ñayiví, áchí yá jíin de.

⁹ Te ni ndihī ni cahān yā táca jnúhun yáha. Te ní ní cájito de nuū yā, te ni ndaa-ni ya cuanuhun yā andiví. Te ni quee vicō ni jesi-ni nuū cuahán yā, te tuá ni cájito de

ya. ¹⁰ Te ní ní cáhīn de cájito ndaa de ichi ándiví núū ní ndaa ya cuahān yā, te uū jnáhan ndajéhé yā cáñūhun ya sahma cuijín ní cajecuiñī yā xiin de jíjnáhan de, te cájito ya nájnūhun tēe. ¹¹ Te ni cacahān yā jíin de:

Róhó tēe Galilea, ¿najehē cájito ndaa ró ichi ándiví? Chí máá Yáā Dios ni naquihin ya Jesús cuanuhun yā andiví, te suni súcuan ndiji ya nájnūhun cájito ró cuahān yā andiví, áchí yá.

Jeē ní canacāji de Matías jeē nucuiñī de nuū Judas

¹² Yūcuán na te ni nanungoo de yucu jeē naní Olivos, cuanungoo de ñuu Jerusalén. Te yajni-ni íne yucu un jíin ñuu Jerusalén, nájnūhun ñn kilómetro-ni, cūhva jeē ni jéhe ley permiso caca ñayuu quiiví ndétátú. ¹³ Te ni ndivícoo de ini ñuu. Te ni ndacoo de cuarto xiní véhe nuū cáyūcu núu de. Te táca de cúu Pedro, Jacobo, Juan, Andrés, Felipe, Tomás, Bartolomé, Mateo, Jacobo sēhe Alfeo, Simón jeē cúu jnáhan grupo cananista, jíin Judas ñani Jacobo. ¹⁴ Tāca tēe yáha, ní ní cándutútú ñnuú de cájicān tahu de jíin táca ñani Jesús jíin náná yā María jíin sava ga ñahan.

¹⁵ Te ñn quiiví te ni jecondichi Pedro nuū táca hermano cácandíje. Te cáhīn nájnūhun ciento ocō ñayuu. Te ni cahān de:

¹⁶ Hermano jíjnáhan ní, ni squícu nahín jnúhun cáhán tutu íi jeē ni cáhān David nde jenahán ní sáha Espíritu Santo. Te jnúhun un ní cuu siquī Judas jeē ní yosnúu núu tēe ni cajni Jitoho yō Jesús. ¹⁷ Te suu tēe un ní jica de jíin yó, te ni chindéé ñáhán jnáhan de jíin yó siquī jniñu ní jeni ya yohó. ¹⁸ Te ni cajeen ñn ñuhun jíin xúhun ní nihīn tēe un siquī jniñu neé ní sáha de. Te ni ñinga ndeyí de, te ni ndatā sáva chíji de, te ndihī yiti de ni jité. ¹⁹ Te ni jité jnúhun yáha núu táca ñáyuu cáyūcú ñuu Jerusalén, te jeē yúcuan cúu jeē ní casnání i ñuhun ún Acéldama nuū yúhu máá i, jeē cuni cahān ñuhun jeē cúu cuenta níñī. ²⁰ Chí súcuan je yósó núu tútu Salmo siquī Judas:

Vehe de na quéndōo iyú,

te ma cóndee ni ñn ga ñayuu ini vehe ún.

Te suni cáhán:

Jniñu ní condiso de na cóndiso ñnga tēe.

Achí.

21 'Núu súcuan te jíni ñúhún jéē núcuiñī ñin tēe lugar maá de jíin yó. Te tēe núcuiñī jíin yó un, nacāji yó de mēhñu táca tēe ni cajica jíin yó táca quivī jeē ní jica máá Jítóho yó Jesús jíin yó. 22 Te tēe nacāji yó un cúu tēe jeē ni íyo de jíin yó nde quivī ní jendute ya ni sáha Juan, te nde quivī ní ndaa ya cuanuhun yā andiví. Te tēe núcuiñī jíin yó na cúu de testigo jíin yó jeē jé ni natecu yā, achí de.

23 Te ni cateo nuū de uū jnáhan tēe: Matías jíin José jeē naní de Barsabás te suni naní de Justo. 24 Te ni cajicān tahu de:

Tátā Yaā Dios, máá ní chi jíiní ni ndese cáa ánuá táca ñáyuu. Núu súcuan te jeē ndindúú tēe yáha, stéén ni ndé ñin de cúu jeē ní nacāji ní. 25 Te condiso jniñu de cuu de apóstol. Te naquihin de jniñu ní stóo Judas, chi ni sáha de cuēchi te cuahān de lugar xeēn nuū cánuú quíhīn de, achí de.

26 Yūcuán na te ni casáha de ñin sorteo te ni jinū Matías, te ni núcuiñī de ni nduu de jnáhan ndihúxí ñin apóstol.

Jeē ní quee Espíritu Santo

2

1 Te máá quivī víco Pentecostés ni cahīn tūtú ñáyuu cácañdije ñuu Jerusalén. 2 Te sanaa-ni te ni quejéé ñhin vēji nde andiví nájnūhun tachī níhin quée, te táca ñáyuu jeē cáyūcú ini vehe un ní cajini sōho i jeē ñhin ún. 3 Te ni cajito i nájnūhun yáñuhūn jeē ní cajitē núu te ni cacucōo xinī ná ñin ná ñin i. 4 Te ndihī i, ni cunuú Espíritu Santo jíin i, te ni quejéé i cácahān i sñn sñn yuhu, ndese ni steén maá Espíritu nuū ná ñin ná ñin i cahān i.

5 Te ñuu Jerusalén, suni cáhīn ñayuu hebreo, yíñuhún núu Yaā Dios, jeē ní quijicoo i nde táca nación ní cáhnu ñayiví. 6 Te jeē ni ñhin súcuan te ni cacutútú cuéhē ñayuu ún. Te ni cunéé lí ni i jíjnáhan i, chi ná ñin ná ñin i ni cajini sōho i jeē tēe ni canihīn Espíritu Santo cácahān de jnūhun yuhu ñúū jicá nuū vēji i. 7 Te ni canaa ni i cájito i te ni cacahān i:

¿A násūu tēe Galilea cácuu táca tēe yáha jéē cácahān de táca yuhu ñúū nuū véjicoo yó? 8 ¿Na vé ni cuu yáha núu súcuan? Chi ná ñin ná ñin yó cájini sōho yó cácahān de

jnūhun yuhu ñúū nuū ní cacacu yó. 9 Chi vējicoo yó ndé táca ñuu jicá. Sava yó vēji nde Partia jíin Media jíin Elam. Te sava ga yó vēji yó ndé Mesopotamia jíin Judea jíin Capadocia jíin Ponto jíin Asia. 10 Suni nde Frigia jíin Panfilia jíin Egipto jíin tijnī ñuu jeē íne nde yatā gā ñuu Cirene ñuhun Africa vējicoo yó. Te sava ga yó nde ñuu Roma vējicoo yó, te cáyūcu jínu-ni yó yáha. Te máá yó jeē véjicoo ñuu Roma, sava yó cácuu máá ñáyuu hebreo te sava ga yó cácuu ñayuu sñn ñuu, ni cacandije yó ndíquín yó ley ñayuu hebreo. 11 Suni nde Creta jíin Arabia vējicoo sava yó. Te cájini sōho yó jéē jíin jnūhun yuhu ñúū ná ñin ná ñin máá yó cácahān de táca jniñu jéhnu ní sáha Yaā Dios, achí i.

12 Te ndihī i chi ni canaa íni i cájini nahín i. Te ni candajnūhún i jíin jnáhan i:

¿Na vé cúu jeē ní cuu núu súcuan jeē cácahān de yuhu ñúū yó? achí i.

13 Te sava i ni cacahān catá i:

Tuú chi jeē cánajīni de, achí i.

Jeē ní nacani Pedro jnūhun nuū ñáyuu

14 Yūcuán na te ni candocuiñī Pedro jíin ndihúxí ñin ga apóstol, te ni cahān jee Pedro jíin ñáyuu ún:

Níhín jnáhan ñuu yó hebreo, jíin ndihī níhín jéē cáyūcu ní Jerusalén, jnūhun yáha na chúhun ni ni jíjnáhan ní, chi cuni nahín ní cahān na jíin ní. 15 Chi máá ná jijnáhan ná, nasūu jéē cájini ná nájnūhun cájeni ni ní, chi sáa cahīn jenéhen cúu, te nasūu hora cánajīni ñayuu cúu. 16 Chi sa suhva squícu jniñu yáha nájnūhun ni cahān Joel, tēe ni nacani jnūhun Yaā Dios nde jenahán, chi súcuan ni cahān de:

17 Achí Yáa Dios: Quivī sándihí na

te tají rí Espíritu rī cunuú yá jíin táca ñáyuu, te sēhe yí ró jíin sēhe sñhí ró, nacani i jnūhun rī,

te táca tēe lulí chi coto ndijin de jeē steén rī nuū de,

te táca tēe jéhnu chi sáha rī jeē scóto jēni de.

18 Te quivī ún chi tají rí Espíritu rī cunuú yá jíin táca mozo rī, cúu tēe cúu ñahan,

te nacani i jnūhun rī.

19 Te ichi andiví sáha rī jniñu jéhnu jeē náā ni ñayuu coto i,

te sáha rī jniñu jéhnu ini ñayiví jéē steén jeē cujéhnu rī,

chi coo niñi jín ñúhūn jín ñúhmā nájñūhun vicō.

Yūcuan cúu jeē sāha ri jeē cóo jñūndóho xeēn.

²⁰ Te nduu jnúú níāndii te ma cúndijin gā, te yoō coto cuéhé nájñūhun niñi.

Yūcuán na te quee quivī jeē ndíji máá Jítóho rō Jesús.

Quivī ún coo cuehē jniñu jéhu, te cuni ndihi ñayuu jeē quiví máá Jítóho rō cúu.

²¹ Te tāca ñáyuu jeē cahān ndahú i jín yá te jnama ya i, áchí Yáa Dios.

Achí Joel ni nacani de jñūhun ya.

²² Jeē yūcuan níhín téē ñuu yō Israel, cuni nahín gā ni jñūhun yáha jínáhan ní. Ni steén Yáa Dios jeē ní tají yá máá Jesús, Yáa ní jéhu ñuu Nazaret, chi máá Yáa Dios ni jéhe ya jeē ni sāha Jesús jniñu jéhu mēhñu máá ní, jín jniñu jeē steén jeē kujéhu ya, te jniñu un ní canaa ni ní cajito ní. Te je cajini vāha ní jéē súcuan ni cuu. ²³ Te máá ní ni cajni ní yá, te ni cajendēca ní yá nuū téē xeēn ni cajehni de ya jicā cruz ni casáha ní. Te nde jín tiempo je ni jini Yáa Dios jeē súcuan sāha ní jínáhan ní, chi súcuan je ni sándaā yā. ²⁴ Te ni nastécu Yáa Dios Jesús te tuá ni cúu ya ndiyi, chi jñūhun xeēn jeē jihí ñayuu, tuá na vé cúu ga sāha jín yá. ²⁵ Chi nde jenahán suhva ni tee David jñūhun ndese ni cahān Jesús jín Yáa Dios:

Jíní na núu máá ní jeē cúu ní Jítóho ná, chi ní cáni ndéé ní jín ná,

chi ndéé ní ichi ndáváha ná, cúu jeē chindéé ñáhán ní sãña návāha coo ndeyí ni ná.

²⁶ Jeē yūcuan cúsi ni ná te cáhán na jñūhun siñi.

Jeē yūcuan ma nacani uhū ni na síquī jñūhun cuu ná.

²⁷ Chi ma cuáha ni jñūhun quendōo ánuá na lugar nuū cáyūcu ánuá ndiyi, ni ma cuáha ni jñūhun tehyū ná, chi jéjñiñu ná núu ní te maní ni jín ná.

²⁸ Te ni steén ni núu na jéē nátecu ná, te sāha ní jéē cusī teyí ni ná condee na jín ní ní cáni.

Achí Jesús, ni achi David.

²⁹ Tāca níhín jínáhan ní, na cástūhun cájí ná nuū ni jñūhun jí yō David, chi tu ní cáhán de jñūhun yáha síquī máá de. Chi

ni jihí de te ni quindūji de, te jíní yō nuū yíndūji de nde vijna. ³⁰ Chi ni cuu de téē ni nacani jñūhun Yáa Dios nde jenahán. Te ni jini de jeē vāha ni jejnūhun ya nuū de jeē chíji yucūn maá de quiji Cristo, te condee yā mesa de ndacu ya jniñu nájñūhun ni ndacu de jniñu jeē ní cuu de rey. ³¹ Te nde jín tiempo ni jini de jeē nátecu Cristo, te ni cahān de jeē anuá yā, ma ndóo lugar nuū cáyūcu ánuá ndiyi, ni yiqui cúñu yā ma tehyú. ³² Chi Yáa Dios ni nastécu yā Jesús, te máá ná cácuu ná testigo jeē ní natecu yā.

³³ Te ni ndujéhu tucu ya ni sāha Yáa Dios jín poder yā. Te nde nuū máá Yáa Dios, Yáa cúu Tátá yā, ni nihín Jesús Espíritu Santo, chi súcuan ni jejnūhun ya. Te ni tají Jesús Espíritu Santo, te suu ya sāha jniñu jeē cájito ní te cájini sōho ní vijna. ³⁴ Te David, nasūu síquī máá de ní cáhán de tāca jñūhun yáha, chi tu ní ndáa yiqui cúñu de andiví. Chi síquī Cristo cúu jeē ni cáhán de suhva:

Máá Yáa Dios ni cahān yā jín Jítóho rī Cristo:

Cucōo ró ichi ndáváha ri jeē steén jeē kujéhu ró.

³⁵ Te na sāha ri jeē quende rō poder tāca jéē cájito uhū rohó, áchí yā.

Achí David.

³⁶ 'Núu súcuan te ndihi ní jéē cácuu yó ñayuu Israel, na cúni vāha ní jéē vésú ni cajehni ni yá jicā cruz, te Yáa Dios ni jeni ya máá Jesús jeē cúu ya Jítóho yō te suni cúu ya Cristo, Yáa jnáma yóhó, áchí Pedro jín i.

³⁷ Te jeē súcuan ni cajini sōho i jñūhun yáha, te ni cajnahuhū ni anuá i. Te ni cacajñuhún i Pedro jín tāca gá apóstol:

¿Te ndese sāha ná jínáhan ná núu súcuan? áchí i.

³⁸ Te ni cahān Pedro jín i:

Nacani ni ní jéē stóo ni cuéchi ní jínáhan ní, te cuandute ní jéē ní cacandíje ní Jesu-cristo, návāha cone cáhnu ni Yáa Dios nuū cuéchi ní, te cuāha Yáa Dios Espíritu Santo yā condee yā ini anuá ni. ³⁹ Chi súcuan ni jejnūhun máá Tátá yō Yáa Dios nuū yō jín núu séhe yó, te suni súcuan ni jejnūhun ya nuū ñáyuu tāca gá nación, tācá i jeē cána ya i candíje i.

⁴⁰ Te jín cuéhē gā jñūhun súcuan ni cahān cají Pedro, te ni stihví ni de i:

Nducú ndéyí ní jeē na cácu ní, chí jnahnū ndetū ñayuu casáha jniñu néé, áchí de.

⁴¹ Yūcuán na te tǎcá i jeē ní cajetáhú jnúhun ni cahān de, ni cajendute i. Te quivī un ní nducuehē gā ñayuu cácadíje, nájnūhun unī mil gā ñayuu. ⁴² Te ni cahīn nīhin i siquī jnúhun cástéén apóstol. Te inuú-ni cándajnūhun mánī i te cájicān tahu i, te ñn cáhnu-ni cáyeji i pan, nájnūhun ni steén maá Jítoho yō jeē núcūhun ni yō siquī yā.

Ndese ni coyūcu ñáyuu jeē ní cacandíje jeē xíhna ñúhún

⁴³ Te ndihī ñayuu ni cayūhú i ni cajito i, chí cuehē jniñu jéhnū jeē steén jeē cujéhnū ya ni casáha tēe apóstol. ⁴⁴ Te inuú ní cahīyo ni ñayuu cácadíje, te ni cacuu inuú i tǎca jēe cánevāha i. ⁴⁵ Te ni caxīcō i na-ni na vé cánevāha i, te ni casaja i xūhún un núū tǎca jnáhan i, núū ndese jíni ñúhún ñn ñn i. ⁴⁶ Te ndijnahan quivī ni candutútú i ini templo. Te manī ni cayeji cáhnu i pan tǎcá vehe jnáhan i nájnūhun ni steén yā, te ni cahīyo sī ni i. ⁴⁷ Te ni cacahān i jeē yóhyo cújéhnū Yaā Dios. Te ndihī ñayuu ñuu un ní cajejnúhún i ñayuu cácadíje. Te ndijnahan quivī ni jnama Jítoho yō sava ga ñayuu, te ni nduu inuú i jíin ñáyuu cácadíje.

Jeē ní nduvāha tēe ríngo

3

¹ Te ñn quivī te máá cáhunī jehíni ni caa Pedro jíin Juan cuango de templo, chí hora un cájicān tahu jnáhan de hebreo. ² Te cájendēca ñayuu ñn tēe cáríngo nde quivī ní cacu de. Te tēe un ndéé de ndijnahan quivī yehyí templo jeē naní Hermosa, jícan de caridad nuū tǎca ñáyuu quivícoo ini templo. ³ Te tēe un ní jito de nuū Pedro jíin Juan jeē véji de quivícoo de ini templo, te ni jícan de caridad nuū Pedro jíin Juan. ⁴ Te Pedro jíin Juan ni cajito vāha de nuū tēe ún. Te ni cahān Pedro jíin de:

Condēhe núū rī jijnáhan ri, achí de.

⁵ Te máá tēe un ndétu tūhva de, ni jeni ni de jeē cuáha Pedro jíin Juan jecu xūhun núū de. ⁶ Te ni cahān Pedro:

Tú na xūhun plata ni xūhun oro cánevāha ri. Te íyó ñn jeē váha ga sáha ri jíin ró: jíin poder maá Jesucristo, Yaā ní jehnu ñuu

Nazaret, cáhán rī jíin ró, ndocuiñī te caca ró, áchí de.

⁷ Te ni jni de ndavāha tēe ún, te ni ndonehen de. Te jehē de jíin súcūn jehé de ni nduvāha-ni. ⁸ Te ñn ni scánda de máá de ni ndocuiñī de, te ni quejéé de jíca de. Te ni quivī de jíin Pedro jíin Juan ini templo, jíca de, cánda de, te nácuatáhú de nuū Yaā Dios. ⁹ Te ni cajini tǎca ñáyuu jeē jíca de te nácuatáhú de nuū yā. ¹⁰ Te ni canacuni i de jeē maá de cúu tēe ni condee yehyí templo jeē naní Hermosa, ni jícan de caridad. Te ni canaa ni i ni cajito i, te ni cayūhú i cajito i jeē ní nduvāha tēe ún.

Jeē ní nacani Pedro jnúhun ini corredor jeē naní Salomón

¹¹ Te tēe ni nduvāha ún, tu siáá de Pedro jíin Juan. Te ni cacutútú-ni cuehē ñayuu nuū de ini corredor jeē naní Salomón, te ni canaa ni i cajito i. ¹² Te ni jito Pedro jeē ní cutútú ñáyuu ún, te ni cahān de jíin i:

Níhín tēe ñuu yō Israel jijnáhan ní, ¿najehe cánaa ni ni cajito ní jniñu yáha? ¿Najehe cajito ní núū ná te cájeni ni ni jēe maá ná jijnáhan ná íyó poder na jēe sáha ná jēe náccaca tēe yáha? ¿Chí ní nduvāha de siquī jeē tēe cájica ndaā cacuu ná cájeni ni ní? ¹³ Tuú chí máá Yáā Dios jíi yō Abraham jíin Isaac jíin Jacob jíin tǎca gá jíi yō, ni sáha ya jniñu yáha návāha cuni ñayuu jeē cujéhnū Sēhe ya Jesús, Yaā jeē ní cajendēca ní núū tēe cácujehnū. Te ná ni cuni Pilato jeē siaá de ya, te tu ní cájēhe ni jnúhun. ¹⁴ Te ni casquéhichī ni yá vēsú cúu ya Yaā ndaā, Yaā īi. Te sa suhva ñn tēe jéhnī ndīyi ni cacahān ni jíin Pilato jeē na siáá de. ¹⁵ Te ni cacahān ni jēe na cúu Yaā jeē sáha jeē técu ndihī-ni. Te Yaā Dios ni nastécu yā Jesús jeē ní cuu ya ndīyi, te máá ná cacuu testigo jeē ní natecu yā. ¹⁶ Te tēe yáha jēe cájito ní te canacuni ní de, ni candíje de jíin ná jeē íyó poder Jesús nasávāha ya de, te jeē yúcuan ní nasávāha ya de. Te jeē súcuan ni cacandíje ná ní sáha ya, jeē yúcuan ní nduvāha vāha de nájnūhun cájito ndihī ní.

¹⁷ Te na cástūhun ná nuū ni jijnáhan ní, je jíni na jēe maá ní jijnáhan ní jíin tēe cácujehnū nuū yō, tu ní cájecūhun ni ní, te jeē yúcuan ní cajehni ni yá. ¹⁸ Te súcuan ni squícu jnúhun ni cahān Yaā Dios nde

jenahán jéē cánuú ndoho Cristo siquī cuéchi ñayuu, chi ni sáha ya jeē súcuan ni cacahān tēe ni canacani jñūhun ya nde jenahán. ¹⁹ Te na nácani ni ni jéē stóo ni cuéchi ní, te nasāma ini ní, te quivicoo ní ndaha Yaā Dios návāha ndahva yā cuéchi ní. Te quee quivī jeē ndúsi ni ni sáha máá Jítóho yō. ²⁰ Te natají yá Jesús ndiji ya, chi cúu ya Cristo, Yaā ní jeni Yaā Dios jeē jnáma ya yohó. ²¹ Te jíni ñúhún jéē cóo ya andiví ndé nasájeé yá táca jéē iyó, nájñūhun ni cacahān tēe ndoo ni canacani jñūhun nde jenahán ní sáha Yaā Dios. ²² Chi suhva ni nacani jí yō Moisés jñūhun nuū táca jí yō: Máá Jítóho yō Yaā Dios cani ya Yaā nacani jñūhun nuū rō jijnáhan ró, nájñūhun ni jeni ya ruhū. Te cuu ya ñn jnáhan ñuu yō. Te na chúhun ni rō táca jnúhun jeē nácani ya ún. ²³ Te núu ndé tēe tú chuhun ni de jñūhun cahān yā, jnahnū ndetū de, te ma cúu ga de jnáhan ñayuu yā Israel, áchí Moisés.

²⁴ Te táca tēe ni canacani jñūhun nde jenahán, nde tiempo ni quiiji Samuel te ní gá nde vijna, suni ni canacani de jñūhun siquī táca jniñu cúu quivī yáha. ²⁵ Yucūn maá tēe ni canacani jñūhun ya nde jenahán cácuu yó, te suni siquī maá yó jijnáhan yó cúu jeē ni sáha Yaā Dios contrato jíni jí yō. Chi ni cahān yā jíni Abraham: Yucūn maá ró cane Yaā sáha jeē quéndōo ndetū táca ñayuu ñí cáhnu ñayiví, áchí yá. ²⁶ Te jeē ní nastecu Yaā Dios Sēhe ya, te ni quiiji ya nuū maá yó xihna gā, návāha quéndōo ndetū yō sáha ya, chi sama ya anuá yō jeē ma sáha ga yō jniñu neé, áchí Pedro.

Jeē ní cajendēca de Pedro jíni Juan nuū tēe cácujeñhu

4

¹ Te Pedro jíni Juan níni cácahān gā de jíni ñayuu ún te ni quecoo táca sūtū jíni tēe grupo saduceo, jíni tēe cácujeñhu nuū tēe cándito templo. ² Te yōhyo ni caquitī ni de siquī jeē castéén Pedro jíni Juan nuū ñayuu, jíni jéē cánacani de jñūhun jeē nátecu ndīyī chi je ni natecu Jesús. ³ Te ni cajni ún de, te ni cachuhun ún de vecāa cone de nde cundijin inga quivī, chi je ni ini. ⁴ Te cuehē ñayuu jeē ní cajini sōho jñūhun ni cacahān Pedro jíni Juan ni cacandíje i. Te ni nduu

nájñūhun uhūn mil jeē maá nene tēe jeē ní cacandíje.

⁵ Te jeē ní cundijin inga quivī ún, te tēe cácujeñhu nuū ñayuu hebreo jíni tēe jéñhu cándiso jniñu jíni tēe cástéén jñūhun tutu ley yā, ni candutútú de ini ñuu Jerusalén.

⁶ Te suni ni candutútú de jíni Anás jeē cúu sutū cujeñhu ga, jíni Caifás jíni Juan jíni Alejandro jíni táca gá jeē cácuu jnáhan sutū cujeñhu ga ún. ⁷ Te ni candacu jniñu jeē na quijicoo Pedro jíni Juan condichi de mēhñū, te ni cacajñūhún de:

¿Ndé ñn ni tejniñu róhó te ndese ni nihñ jniñu ró ní sáha ró jéē nduvāha tēe yáha? áchí.

⁸ Yūcuán na te Pedro chi ni cunuú maá Espíritu Santo jíni de, te jíni poder yā ni cahān de jíni táca tēe ún:

Tāca níhín tēe cácujeñhu nuū ñúu yō Israel jíni táca níhín tēe jéñhu cándiso jniñu, ⁹ vijna te cástichí ni sáña siquī ñn jniñu váha ní casáha ná jéē ní nduvāha tēe chúhú yáha.

¹⁰ Te na cástūhun ná nuū nihñ jéē cácujeñhu ní, návāha suni cuni ndihí jnáhan ñuu yō Israel jeē jíni poder maá Jesucristo, Yaā ní jéñhu ñuu Nazaret, ni nduvāha tēe índichi nuū ni yáha. Te suu ya cúu Yaā jeē ní cajehni ni jícā cruz, te ni sáha Yaā Dios jeē ní natecu yā. ¹¹ Jesús cúu nájñūhun yuū cimientto jeē quítuu vehe. Te máá ní jijnáhan ní cácuu nájñūhun tēe casáha vehe,

te ni casquéhichí ni yá nájñūhun jeē cátejiyo ní yúu, chi tu ní cácujeñhu ní yá. Te ni sáha Yaā Dios jeē cúu ya nájñūhun yuū cánuú gá jeē quítuu vehe. ¹² Te tú cuiti inga jeē cúu jnama yóhó, chi tuá na inga jeē cujeñhu ní jéni Yaā Dios ini ñayiví yáha jéē cúu jnama yóhó, áchí Pedro.

¹³ Yūcuán na te ni cajini un jéē Pedro jíni Juan jéñhu-ni cácahān de. Te je cájini jeē tú tūhva de, chi tēe súcuan-ni cácuu de. Te ni canaa ní cájito nuū de, te ni casáha cuenta jeē ní cajica de jíni Jesús. ¹⁴ Te cándēhe núu tēe ni nduvāha un, índichi de jíni Pedro jíni Juan, te tu ní cánihñ gā modo ndese ga cahān. ¹⁵ Yūcuán na te ni candacu jniñu jeē na quéndacoo sñn de yatā véhe juzgado te ndajñūhun máá jijnáhan. ¹⁶ Te ni cacahān:

¿Ndese sáha yó jíni tēe yáha núu súcuan? Chi ní jite jñūhun yáha núu táca ñayuu ñuu

Jerusalén jeē súcuan ni casáha de ñn jniñu jéhnú, te ma cúu cahān yō jeē tu íyó ndāā. ¹⁷ Te návāha ma cuité ga jñūhun yáha, na cúxeēn yō nuū de jeē ma cahān cuiti gā de jñūhun Jesús nuū ní ñn ñayuu, áchí.

¹⁸ Te ni cacana ún de, te ni cacahān nīhin jíin de jeē ma cahān cuiti gā de jñūhun Jesús ni ma steén gā de jñūhun un núū ní ñn ñayuu. ¹⁹ Yūcuán na te ni cacahān Pedro jíin Juan:

Cani vāha ni ní te núu nújnahan ni Yaā Dios jeē stóo ná jniñu ní ndacu ya jeē sáha ná te cuandije ná máá na jniñu nándacu ní. ²⁰ Chi ma cúu stóo ná jniñu jeē nácani ná jñūhun ní cajini sōho ná jíin jniñu ní cajito ná, áchí de.

²¹ Yūcuán na te tēe ni cacutútú un ní cacuxeēn tucu de nuū Pedro jíin Juan. Te ni casiáá de cuango de, chi tú cuiti na modo stóho de chi cáyūhu cájito ñayuu, chi síquī jniñu jéhnú ni cuu ún te ndihí i cacahān i jeē yóhó cújéhnú Yaā Dios. ²² Chi tēe jeē ní sáha ya jniñu jéhnú jíin de jeē ní nduvāha de, víhyá gā uū xico cuiyā de.

Jeē ní cajicān tahú ñayuu cá candíje

²³ Te ná ni casiáá un Pedro jíin Juan cuango de, te ni najinūcoo de nuū táca gá jnāhan de, te ni cacachi de ndese ni cacahān sutū cácujehnú jíin tēe jéhnú cándiso jniñu. ²⁴ Te jeē ní cajini sōho de jñūhun yúcuán, te ñnuú-ni ni cajicān tahú de nuū Yaā Dios:

Tátā Yaā Dios jeē cújéhnú ní núū ndihí, máá ní cúu Yaā Dios ni sáha andiví jíin ñáyiví jíin mar jíin táca ndihí jeē iyó. ²⁵ Te jeē jíin Espíritu Santo te ni sáha ní jēe ni cahān mozo ní David nde jenahān:

¿Najehē cáquitī ndevāha ni ñayuu sñn nación?
¿Te najehē cájeni sáá ni i jeē ndóna i síquī ní?

²⁶ Ni cacutútú jēe cácuu rey ñáyiví jíjnāhan, te tēe cácujehnú ni cacutútú de, te ñnuú-ni ni candonda de síquī maá ní jeē cúu ní Jitoho ná, jíin síquī Cristo, Yaā jeē ní jeni ní. Achí David.

²⁷ Te jendaá chi Herodes jíin Poncio Pilato jíin táca tēe ñuu yō Israel jíin tēe táca gá nación, ni cacutútú de ini ñuu yáha ní candonda de síquī Séhe ñi ní Jesús, Yaā ní

jeni ní. ²⁸ Te súcuan ni cuu návāha squícu táca jniñu jeē jíin poder ni ní cundaā ni ni ndé jenahān jēe súcuan coo. ²⁹ Te vijna, Tátā, coto ní ndese cácahān xeēn de nuū na jíjnāhan ná, te cuāha ni fuerza ni núū na jēe cácuu ná mozo ni, návāha jéhnú-ni nacani ná jñūhun máá ní. ³⁰ Te jíin poder ní nasávāha ni ñáyuu cácuu, te sáha ní jniñu jéhnú jeē steén jeē cújéhnú ní. Te táca jēe yáha sáha ní jíin poder Séhe ñi ní Jesús, áchí i jíjnāhan i.

³¹ Te nuū ní ndihí ni cajicān tahú i, te nuū cáyūcu tūtú i un ní sáha ya jeē ni jnáa. Te ndihí i ni cunuú Espíritu Santo jíin i, te ni jēhe ya fuerza te jéhnú-ni ni canacani i jñūhun Yaā Dios.

Jeē ní canevāha cáhnú i ndajniñu

³² Te ñayuu cuehē jeē ní cacandíje chi ñnuú cáhiyo ni i jíjnāhan i. Te tú ni ñn i ní cahān jeē ndajniñu jeē névāha máá i cuu máá-ni i, chi táca ndajniñu ni canevāha cáhnú i. ³³ Te nīhin cánacani apóstol jñūhun jeē ní cajito de jeē ní natecu Jitoho yō Jesús. Te yóhó ni chindéé ñahān yá ñayuu cá candíje. ³⁴ Chi tú cuiti ni ñn i ní ndóho jeē cumaní nuū i, chi táca ñáyuu canevāha cuehē ñuhun chí vehe, ni caxícó i sava te ni caquindecá i xūhún un. ³⁵ Te ni cajēhe i xūhún un núū tēe apóstol, te ni casaja tēe apóstol nuū ñáyuu cá candíje núu ndese jíin ñuhún ñn ñn i. ³⁶ Te íyó ñn tēe nání José jeē cúu yucūn Leví, ni cacu de Chipre, ñuhun jeē íne sñn nuū ndúte. Te tēe apóstol ni casnání de tēe ún Bernabé, jeē cuní cahān: tēe cahān jñūhun ndeyí ni. ³⁷ Te ni xícó de ñn ñuhun de, te ndáhá de xūhún un ní jēhe de nuū tēe apóstol.

Síquī cuēchi jeē ní casáha Ananías jíin Safira

5

¹ Te suni inga tēe nání Ananías jíin ñasihí de Safira, ni caxícó de ñn ñuhun de. ² Te ni chuvāha de sava xūhún un cuu máá de jíin ña, chi súcuan ni candajñuhún de jíin ña, te ndáhá de inga sava nájnūhun jeē ndihí cúu, te ni jēhe de nuū tēe cácuu apóstol. ³ Te ni cahān Pedro:

Ananías, ¿naun ni jēhe ro jñūhun jeē quiví jexeén, jeē cúu Satanás, ini anuá rō te stáhú

ró Espíritu Santo cuní rō? Chi jeē ní caxīco ró ñuhun ró te cuēchi ró cúu jeē tu ní cáchi ndaā rō jeē ni squéndōo ró jecu xūhún un cuajniñu máá ró, chi ni sáha ró nájñuhun jeē ndihí xūhun ní jēhe ró. ⁴ ¿Te á násūu cuenta maá ró cúu ñuhun un ndé ná tu xīco ró? Te ná ni xīco ró ¿te á násūu cuenta maá ró cúu xūhun jéē cuajniñu ró ndé nuū cuní maá ró? ¿Te naun ni jeni ni rō jeē stahú ró súcuan? Te nasūu máni máá téē cúu jeē jícu ró stáhú ró, chi suni Yaā Dios, áchí Pedro.

⁵ Te ná ni jini sōho Ananías táca jñuhun yáha, te ni cotúú-ni de ni jihí de. Te táca ñáyuu ní canihín jñuhun ún, yōhyo ni cayūhú i. ⁶ Te ni candocuiñí tēe suchí, te ni cachusúcun de ndiyí un cuáchindūji de.

⁷ Te ni cunúu nájñuhun unī hora. Te ni jinū ñasihí ndiyí un ní quiví ña ini vehe ún, te tú na vé jiní cuiñí ña. ⁸ Te Pedro ni cajñuhún de ña:

Cachi nuū rī, ¿á ñn súcuan-ni ni caxīco ró ñuhun ró chí tuú? áchí de.

Te ni cachi ña:

Suu súcuan-ni ni caxīco ná, áchí ña.

⁹ Te ni cahān Pedro jíin ña:

¿Naun ni casquijnáhan jñuhun ró jéē cóto ndee rō Espíritu Santo maá Jítóho yō? Chi ni nducú ró stahú ró yā. Cuni nahín jéē cáhma nanecoo tēe cuachindūji yñi ró, te suni súcuan quichindūji de rōhó, áchí de.

¹⁰ Te ni cotúú-ni ña nuū jehé Pedro te ni jihí-ni ña. Te ni ndivícoo tēe suchí un te ni cajito de jeē jé ni jihí ña, te ni caquenehen de ña, te ni jechindūji de ña xiin yñi ña. ¹¹ Te yōhyo ni cayūhú ndiví ñayuu cáandíje jíin táca gá ñayuu jeē ní cajini jñuhun jeē súcuan ni cuu.

Cuehē jniñu jéhnu ni casáha apóstol

¹² Te cuehē jniñu jéhnu jeē steén jeē kujéhnu Yaā Dios ni casáha tēe apóstol nuū ñáyuu. Te táca ñáyuu cáandíje, inuú-ni cándutútú i ini corredor jeē naní Salomón.

¹³ Te tu ní cáchundeyí ni inga ñayuu quijnáhan jíin i. Te cájejnühún i ñayuu cáandíje.

¹⁴ Te ni nducuehē gā i, chi cúu tēe cúu ñahan ni cacandíje i máá Jítóho yō. ¹⁵ Te cáquindeca ñayuu jnáhan i jeē cácuñu, te cájequin i ini calle cácaa i nuū camilla jíin núu yúu, chi cáconi i vésú ste cuándahū Pedro na yáha síquī i te nduvāha i. ¹⁶ Te suni cuehē ñayuu

tācá ñuu cáhīyo yajni yūcuan ní quijicoo i ñuu Jerusalén ni caquindeca i jnáhan i jeē cácuñu jíin jéē cándoho tachí, te ndihí i ni canduvāha i.

Jeē ní cajito xeēn i tēe cácuu apóstol

¹⁷ Yūcuán na te sutū kujéhnu ga jíin táca gá jnáhan jeē cáandíje sahān saduceo, ni cacucuésun ni jeē síquī tēe cácuu apóstol. ¹⁸ Te ni cajniñi de tēe cácuu apóstol ni cachuhun de vecāa. ¹⁹ Te ñn ndajéhé maá Jítóho yō ni nune ya yehyí vecāa ún jecuāa, te ni quenehen ya de jíjnáhan de. Te ni cahān yā jíin de:

²⁰ Cuáhán te cuiñi ró ini templo, te yūcuán nacani cáji ró jñuhun nuū ñáyuu síquī ndese nihín tahú i cotecu i ññi cáni, áchí ndajéhé yā.

²¹ Te ni cajini sōho de jñuhun yáha. Te nuū ní cundijin te nehen ni quivícoo de ini templo, te cástéén de jñuhun ya nuū ñáyuu.

Te níni cástéén de te sutū kujéhnu ga jíin táca jnáhan de ni canastútú de tēe junta kujéhnu ga, jeē cúu ndihí tēe jéhnu cándiso jniñu nuū ñáyuu nación Israel. Te ni catajé de policía cuaquenehen tēe apóstol ini vecāa. ²² Te nuū ni jínūcoo te tuá gā tēe apóstol. Te ni canandió cóo te ni cacachi:

²³ Jendaá cúu jeē ní cajito ná ndési vāha vecāa, te cáhīn tēe cándito yehyí un. Te nuū ní canune ná, te tú cuiñi gā tēe un cáhīn ini vecāa ún, áchí de.

²⁴ Te sutū kujéhnu ga jíin tēe cújéhnu nuū tēe cándito templo jíin sūtū cácujeñu, nuū ní cajini sōho de jñuhun yáha, te ni cajeni ni de ndese ga cúu un núu súcuan. ²⁵ Te ni quee-ni ñn tēe te ni cachi:

Tēe jeē ní cachuhun ní vecāa, cáhīn de ini templo, te cástéén de jñuhun nuū ñáyuu, áchí de.

²⁶ Yūcuán na te tēe cácujeñu nuū tēe cándito templo, jíin tēe cácuu policía de, ni jengoo de, te yúcun ní nacueca de táca tēe apóstol vendicoo de jíin, chi cáyūhú de jeē sanaa te cuāha ñayuu yuū xiní de núu sáha xeēn de jíin táca tēe apóstol. ²⁷ Te nuū ní najinūcoo de jíin tēe apóstol, te ni cajecuiñi de nuū tēe casáha junta. Te sutū kujéhnu ga ni cahān:

²⁸ Ni cacahān ñhīn ri jíin ró jeē ma steén cuiñi gā rō jñuhun tēe nání Jesús. ¿Te naun ni

casáha ró jéē ní ndecāva jnūhun un ní ñuu Jerusalén yāhá? Te cácu ni rō stau yáhu ró rúhū jijnáhan ri siquī jeē ni jíhī tēe ún, áchí.

²⁹ Te Pedro jíin táca gá apóstol ni cacahān de:

Cánuú jéē squícu ná jniñu ní ndacu Yaā Dios nuū ná te nasūú jniñu nāndacu tēe.

³⁰ Máá Yáā Dios jíi yō ni nastécu yā Jesús, Yaā ní cajehni maá ní jeē ní cata caa ní yá jicā cruz. ³¹ Te ni sáha Yaā Dios jeē ní ndujéhnu tucu Jesús néne ya ichi ndáváha Yaā Dios, te cúu ya Yaā ndácu jniñu, Yaā jnáma ñayuu. Te súcuan ni sáha Yaā Dios náváha yóhó, jéē cácuu yó ñáyuu Israel, na nácani ni yō jeē stóo yó cuéchi yó, te cone cáhnu ni yā nuū táca cuéchi yó. ³² Te máá ná ni cajito ná táca jniñu yáha, te suni máá Espíritu Santo steén cají yá jeē súcuan cúu, chí jéhe Yaā Dios Espíritu Santo yā condee ini anuá táca ñáyuu jeē cájendetū nuū yā, achí de.

³³ Te ná ni cajini sōho un jnúhun yáha, te yōhyo ni caquítī ni, te cahni de cácu ni nuú.

³⁴ Te mēhñú un jijnáhan néne ñn tēe grupo fariseo nání de Gamaliel, te cúu de maestro jeē steén ley yā, te táca ñáyuu cájejnúhún i de. Te ni ndocuiñī de, te ni ndacu de jniñu jeē na cújiyo núu tēe apóstol. ³⁵ Te ni cahān de:

Róhó jnáhan ñuu yō Israel, cani vāha ni rō núu na vé cácu ni rō sáha ró jíin táca tēe yáha.

³⁶ Chí nucūhun ni rō jeē ñn cuiyā ni ndonda Teudas siquī gobierno, te ni cahān de jeē tēe téyí cúu de, te ni cacutútú nájnūhun cuñ ciento tēe jíin de. Yūcuán na te ni cajehni ñayuu Teudas, te táca jéē ní caquijnáhan jíin de ni cajitē núu cuango sáá-ni, te ni jecuiñī-ni jniñu ún. ³⁷ Yūcuán na te quívī ni íyo censo te Judas, ñn tēe Galilea, ni ndonda de siquī gobierno, te ni cacutútú cuéhē tēe jíin de. Te suni ni cajehni ñayuu Judas, te táca tēe jeē ní caquijnáhan jíin de ni cajitē núu cuango. ³⁸ Te vijna na cuáha ri consejo rohó. Ma stáhān gā rō tēe yáha. Siáá de na quíngoo de. Chí núu ñayuu-ni ni squejéé jniñu yáha, te jecuiñī ñ. ³⁹ Te núu Yaā Dios ni squejéé, te ma cúu casi rō, chí sanaa te siquī Yaā Dios cándonda ró, áchí de.

⁴⁰ Te ni cachusóhó jéē ni cáhān Gamaliel. Te ni canacana tēe cácuu apóstol, te ni canani de jíin cuarta ññ te ni cacahān xeēn

jíin de jeē ma cahán gā de jnūhun Jesús, te ni casiáá de cuango de. ⁴¹ Te máá apóstol ni quendacoo de nuū junta cuango de, cácusī ni de jeē ni jéhe ya jnūhun ndoho de jeē cuáha ñayuu jnūhun canu de siquī jeē cácuandíje de ya. ⁴² Te ndiquívī castéén de jnūhun vāha Jesucristo, te canacani de jnūhun ún ini templo jíin táca-ni vehe.

Jeē ní cajeni de uxā tēe cuajniñu mēhñu ñáyuu cácuandíje

6

¹ Te ni cucuehē ñayuu cácuandíje. Te tiempo un te tēe hebreo jeē cácahān yuhu griego, ni quejéé de cácahñu de nuū jnáhan hebreo de, áchí de jeē ñahan viuda jeē cácahān yuhu griego tu cánihñ vāha ña staā jeē cásaja de táca quívī cuu ña. ² Yūcuán na te máá ndihúxí uū apóstol ni canastútú de táca ñáyuu cácuandíje, te ni cacahān de:

Tú vāha jeē jécuiñī jniñu jeē canacani ri jnūhun Yaā Dios siquī jeē cásaja rī staā.

³ Núu súcuan te róhó, hermano, nacāji ró úxā jnáhan máá yó, te na cóndiso jniñu de saja de staā. Te nacāji ró tēe jeē cájejnúhún ñáyuu de, tēe ndíchí jéē ní cunuú Espíritu Santo jíin de. ⁴ Te ruhū jijnáhan ri, máni cacān tahú rī jíin jéē nácani ri jnūhun ya, achí de.

⁵ Te ndihí ñayuu ni canujnahan ni i jnūhun ni cacahān de. Te ni canacāji i Esteban, tēe cándíje vāha jeē ní cunuú Espíritu Santo jíin de. Te suni ni canacāji i Felipe jíin Prócoro jíin Nicanor jíin Timón jíin Parmenas jíin Nicolás. Te Nicolás cúu tēe ñuu Antioquía, te ni nduu de tēe cándíje sahān ñayuu hebreo nde ná tu candíje de jnūhun Cristo. ⁶ Te ni cajeni i táca tēe yáha núu tēe cácuu apóstol, te tēe apóstol un ní casoó de ndaha de xiní táca tēe un ní cajicān tahú de nuū Yaā Dios siquī jniñu condiso de.

⁷ Te jnūhun Yaā Dios ni jitē gā cuahān, te ni nducuehē teyí ñáyuu cácuandíje i jnūhun ya ini ñuu Jerusalén. Te suni cuehē sutū ni cacandíje de jnūhun ya.

Jeē ní cajni de Esteban

⁸ Te ni chindéé ñáhán yá Esteban ni jéhe ya poder nuū de, te ni sáha de táca jniñu jéhnu nuū ñáyuu, jniñu jeē steén jeē cujéhnu Yaā Dios. ⁹ Te ñayuu hebreo jeē ní cacuyāhu

i te ni canduu libre i, íyó vehe iī sinagoga i. Te tēe un cácuu tēe ñuu Cirene jiín tēe ñuu Alejandría jiín tēe Cilicia jiín tēe Asia. Te sava tēe un ní caquejéé de cástáhān jnāhan de jiín Esteban. ¹⁰ Te tu ní cácuñeyí jiín de, chí ndíhí ní cahān de ni sāha máá Espíritu Santo. ¹¹ Yūcuán na te ni cascáhān sava tēe jeē na cáhān jñūhun stáhú síquī Esteban. Te ni cacahān jeē ní cajini sōho cáhān ndevāha Esteban síquī Moisés jiín síquī Yaā Dios. ¹² Te jeē súcuān ni cacahān te ni caquīti ni tāca ñáyuu jiín tēe jéhnū cándīso jñīñu jiín tēe cástéēn jñūhun tutu ley yā. Te ndíhi de ni candonda síquī Esteban, te ni cajni de cuangoo jiín de nde nuū junta cujéhnū ga. ¹³ Te ni cajeni de tēe cahān jñūhun yáá síquī Esteban, te suhva ni cacahān:

Tēe yāha tu ndé jécuiñi de jeē cahān ndevāha de síquī templo iī yāha jiín síquī ley yā. ¹⁴ Chi ni cajini sōho ná cáhān de jeē Jesús, tēe ni jehnu ñuu Nazaret, canu de templo yāha te nasama de jeē tajnūnī ley yā jeē ni jéhe Moisés nuū yō, áhí.

¹⁵ Yūcuán na te ndíhi tēe cáyūcu nuū junta un ní candacoto vāha nuū Esteban, te ni cajini jeē jito nuū de ná jito nuū ñn ndajéhé Yaā Dios.

Jñūhun ni nacani Esteban

7

¹ Te máá sūtū cujéhnū ga ni cajnūhūn Esteban:

¿A ndāā jeē súcuān ni sāha ró nájnūhun cácahān de yāhá? áhí.

² Te ni cahān Esteban:

Ndíhi níhín jéé cácuu ní jnāhan ñuu yō, jiín ndíhi níhín jéé cácuñeyí ní nuū ñūñū yō, cuni nahín ní jñūhun cahān ná: Máá Yāā Dios jeē yóhyo cújéhnū ya, ni steén yā maá yá nuū jí yō Abraham nde na néne ga de región Mesopotamia, nde ná tu quihīn de condee de ñuu Harán. ³ Te ni cahān yā jiín de: Stóo ñuu rō jiín táca jnāhan ró te quihīn rō nuū cuáha ri condee rō, chí máá rí steén ichi nuū quihín rō, áhí yá. ⁴ Yūcuán na te ni quenda de región Caldea, te ni jinū de ni condee de ñuu Harán. Te yūcuān ní jihī tatá de. Yūcuán na te ni sāha Yaā Dios jeē ní quee de ñuu yāha nuū cáyūcu yó vijna. ⁵ Te tu ní jéhe ya ni ñn tíhlí ñūhun yāha cuu tahū de. Te vēsú súcuān te ni jējñūhun ya jeē cuáha

ya ñūhun un núū de nde jiín núū tāca séhe de, vēsú ná tu coo séhe de sáá. ⁶ Te súcuān ni cahān Yaā Dios jiín de: Séhe ró coyūcu jíca i inga ñuu, te cuñ ciento cuiyā sájñiñu sáá-ni i te stóho ñáyuu yūcuān i. ⁷ Te síquī jeē súcuān sāha i jiín séhe ró, te máá rí chí stóho ri ñáyuu ñuu ún. Te sáá te quendacoo séhe ró yūcuān, te nucoyūcú i yāhá chíñúhūn i ruhū, áhí yá. ⁸ Te ni cahān yā jiín Abraham jeē na cúu de circuncidar, jeē cúu ñn jñunī jeē ni sāha ya contrato jiín de. Te ná ni cacu séhe de Isaac te ni sāha de circuncidar i nuū uná quivī. Te suni súcuān ni sāha Isaac jiín séhe de Jacob, te Jacob jiín séhe yí de jeē cácuu ndíhúxí uū yucūn ñáyuu Israel.

⁹ Te tāca séhe Jacob ni cacucuésūn ni de jiín ñani maá de José, te ni caxícó de i nuū tēe jeē ní cajendēca i nde nación Egipto. Te Yaā Dios chí ni ndito ya José. ¹⁰ Te ni jnama ya i nuū tāca jñúndóho ní jito i, te ni cundíhí i ni sāha ya. Te Faraón, tēe cúu rey nación Egipto, ni cusī ni de jiín i ni sāha ya, te ni tejñiñu de José jeē cúu de gobernador te ndacu de jñiñu nación Egipto jiín núū ñáyuu cáyūcú vehe Faraón.

¹¹ Te ni quiji quivī jeē ní íyo ñn jnamā xeēn, te ni ndoho ñáyuu ñí cáhnu nación Egipto jiín ndé ñuu Canaán. Te tāca jí yō ún, tuá ni cánihīn de jeē cáji de. ¹² Te ni nihīn Jacob jñūhun jeē iyó trigo nde nación Egipto, te ni tají de séhe de ni jengoo de ni cajeen de trigo vuelta ñn. ¹³ Te jeē cuángoo de vuelta uū te ni nastúu José jeē maá de cúu ñani de jíjnāhan de. Yūcuán na te ni jini rey Faraón ndé ñn jnāhan cúu José. ¹⁴ Te ni cahān José jiín táca ñani de jeē na cóndeca de tátá de Jacob jiín ndíhi jnāhan vehe de. Te ni íyo unī xico xahūn i. ¹⁵ Te súcuān ni cuu jeē ní jínū Jacob ni condee de nación Egipto nde ni jihī de. Te suni yūcuān ní coyūcu séhe de jeē cácuu jí yō un ndé ni cajihī maá de. ¹⁶ Te ná ni quee quivī jeē ndénehen ya tāca yūcūn de jeē cáyūcu tátú de nación Egipto, te ni cacondiso de yiqui ndíhúxí uū ndíyí jí un jéé ndíji ñuu Siquem, te ni cachindūji de ini yaū ndíyí ndeé jíca cáva jeē ní jeen jí yō Abraham nuū tāca séhe Hamor ñuu Siquem.

¹⁷ Te nde ná cáyūcu gá de nación Egipto, te cuacuyajni quivī jeē squícu jñūhun ni

cahān Yaā Dios jíin Abraham jeē quéndacoo sēhe de nucoyūcú i ñuu ni jéjnūhun ya nuū i, te ñayuu un ní tahū cuehē i ini nación Egipto. ¹⁸ Yūcuán na te ni nucuñi inga rey ñuu Egipto jeē tu ní jíni de jeē váha ni sáha ndīyí José. ¹⁹ Te rey un ní stahú de tāca jíi yō te ni sáha ndevāha de jíin i, chi ni sáha fuerza de i jeē ma cóto ga i sēhe yiquín i te na cúu. ²⁰ Te tiempo un ní cacu Moisés, te ni cusñi ni Yaā Dios jíin i. Te unī yoō ni condito sāhi náná i tátá i. ²¹ Te tuá ni cúu condito sāhí de i, te ni cachune de i nuū nanihñ sēhe sñhí Faraón i, te ni naquihin sēhe ña i ni scuéhnu ña i nájnūhun sēhe máá ña. ²² Te ni cutūhva Moisés tāca jnūhun ndíchí ñuu Egipto, te ni cujéhnu de jíin jnūhun cáhán de jíin jniñu sáha de.

²³ Te nuū uú xico cuiyā de te ni jecōndéhé de jnáhan de jeē cácuu ñayuu Israel. ²⁴ Te ni jito de nuū ñn tēe nación Egipto jeē sáha ndevāha jíin ñn tēe Israel. Te Moisés ni jnama de jnáhan de Israel ún, chi ni jehni de tēe Egipto un. Te súcuan ni ndutahū jeē ni sáha ndevāha jíin jnáhan de ún. ²⁵ Te máá Moisés jeni ni de jeē jécūhun ni tāca jnáhan de jeē Yáā Dios ni tají yá de jeē jnáma de jnáhan de ún ini nación Egipto nuú, te tu ní cájecūhun cuiñi ni jnáhan de ún. ²⁶ Te inga quiñi suni ni jito de nuū uú tēe Israel jeē cájejnáhan, te cúní de jeē na jécuiñi. Te jeē yúcuani ní cahān de jíin: ¿Najehē casáha ndevāha ró jíin jnáhan ró? Chi nájnūhun ñn ñani-ni cácuu ró, áchí de. ²⁷ Te máá tēe cáni tahū jnáhan un ní chundahá de Moisés te ni cahān de: ¿Ndé ñn ni jeni rōhó jēe cujéhnu ró núu rī te sándaā rō jniñu rī jijnáhan rī? ²⁸ ¿Chí suni cúní rō cahni rō ruhū nájnūhun ni jehni rō tēe Egipto icu chí naún? áchí de jíin Moisés. ²⁹ Te nuū ní jini sōho Moisés jnūhun yáha, te ni yūhú de jeē cáhni rey de, te ni jinu de cuahān de inga nación. Te ni condee de ñuu jicá Madián, te yūcuani ní scácu ñasahí de uū sēhe yí de.

³⁰ Te ni jīnu uū xico cuiyā jeē néne de yūcuán. Yūcuán na te ñn ndajéhé Yaā Dios ni quenda ya nuū de nde nuū ñūhun téhé nuū ín yucu súcún Sinaí. Te ni quenda ya nuū de xinī ñn yucú cuiñi cáhnu cándahá yáñuhñ, te tu ní cáyú yucú ún. ³¹ Yūcuán na te Moisés ni naa ni de jíto de ún, te ni jehñ

de nde nuū, návāha coto vāha de. Te ni jini sōho de jeē cahān máá Jítoho yō jíin de: ³² Máá rí cúu Yaā Dios tāca jíi rō jenahán, Abraham jíin Isaac jíin Jacob, achí yá. Te Moisés, quísi i de jeē yūhú de, te jeē yúcuani tuá ni cúndeyí ni de coto de nuū. ³³ Te máá Jítoho yō ni cahān yā jíin de: Quenehen ndijēn rō chi nuū ín ró, ñuhun íi cúu. ³⁴ Je ni jini rī ñayuu máá rí jeē yóhyo cándoho i nación Egipto, te suni jíni sōho rī jeē cájnana uhū i, te ni cuun rī vēji rī jeē jnáma rī i jijnáhan i. Núu súcuan te vijna chi tají rí rohó ndicó ró quihñ rō nde nación Egipto, achí yá jíin de.

³⁵ Te nde ná tu quenda Moisés Egipto, te tāca jnáhan de ni casquéhichí i de jeē ní cacahān i jíin de: ¿Ndé ñn ni jeni rōhó jēe cujéhnu ró núu rī te sándaā rō jniñu rī? ni cacahān i jíin de. Te vēsú súcuan te máá ndajéhé Yaā Dios ni quenda nuū Moisés un jēe cándahá cáyú yucú cuiñi ún. Te súcuan ni cuu jeē ní natajé yá de cuanuhun de nde Egipto jeē ndácu de jniñu nuū i te jnama de i. ³⁶ Te máá Moisés ni sáha de jeē ní quendacoo jnáhan ñuu de ini nación yúcuani, te ni cayāha de Mar Rojo, te ni cajica cuu de ñuhun téhé úu xico cuiyā. Te ñn tiempo un ní sáha de cuehē jniñu jéhnu jeē steén jeē cujéhnu Yaā Dios. ³⁷ Te máá Moisés cúu jeē suhva ni cahān de jnūhun yáha jíin jnáhan ñuu yō Israel: Máá Yáā Dios cani ya Yaā nacani jnūhun nuū rō jijnáhan ró nájnūhun ni jeni ya ruhū. Te cuu ya ñn jnáhan ñuu yō. Te na chúhun ni rō jnūhun cahān Yaā ún, áchí. ³⁸ Te suni nde ná ni cajica cuu jíi yō nde nuū ñūhun téhé, te ni cahān ndajéhé yā jíin Moisés xinī yucu súcún Sinaí, te ni nihñ de jnūhun jeē cahān ndese nihñ tahú yō cotecu yō, te ni nacani de jnūhun un núu tāca jíi yō, te ni quendōo jnūhun un núu yō.

³⁹ Te tāca jíi yō ún tu ní cácuani de cuandētū de nuū Moisés, chi sa suhva ni cacuni de squéhichí ni de Moisés, te ni cacuni de nandicó de nungoo de Egipto nuú. ⁴⁰ Te ni cacahān de jíin Aarón: Sáha ní tijni yaā na cósnūu núu yō. Chi Moisés, jeē ní quenehen de yóhó Egipto vējicoo yó, tu cájini yō na vé ni ndoho de jeē tú de ndéē jeē cuahān de xinī yucu Sinaí, achí. ⁴¹ Yūcuán na te ni cajēhe de oro ni cuvāha ñn becerro oro,

te nuū becerro ídolo un ní casocō de quití, te ni cacusī ni de jíin ídolo ni casáha de ún.

⁴² Te Yaā Dios ni cujiyo ya cuahān yā, te ni stóo ya de na chíñúhún de nuū tāca jēe jíto yó ín andiví, nájnūhun yósó nuū tútu tēe ni canacani jnūhun Yaā Dios nde jenahán:

Ni cahān yā: Róhó ñáyuu Israel,
¿á cájeni ni rō jeē nuū ruhū ni casocō rō quití

ná ni cajica cuu ró úū xico cuiyā nde nuū ñúhun téhé?

⁴³ Tuú, chí sa suhva ni cacondiso ró nicho jeē íne ídolo jeē naní Moloc

jíin figura quimi jeē naní Renfán, ídolo jeē ní casáha máá ró ni cachiñúhún ró. Jeē yúcuan cúu jeē siáha ri rohó quíhín jicá ró nde yatā ñúū Babilonia, áchí yá.

⁴⁴ Te ni ndacu ya jniñu nuū Moisés jeē na sáha de vehe ñi nuū chíñúhún de ya, nájnūhun cáa jeē ní steén yā nuū de. Te tāca jíi yō, nde nuū ñúhun téhé ní canevāha de vehe i un nuū ní cachuvāha de tabla yuū jeē yosó jnūhun ley yā. ⁴⁵ Te ni castóo de vehe un nuū ndihi sēhe de jeē cúu jíi yō. Te ni quiví Josué jíin jíi yō ini nación yáha, te ni sáha ya jeē ní cacundeyí de jíin táca ñáyuu jeē ní cacoyūcu yáha ní cajinu i cuangoo i. Te ni quivícoo de tācá ñuu i jíin vehe i ún, te ni quendōo nde quiví ní cuu David rey.

⁴⁶ Te ni cusī ni Yaā Dios jíin rey David. Te ni jicān de nuū yā jeē sáha de ñn vehe i yā nuú, chí máá yá cúu Yaā Dios jíi de Jacob.

⁴⁷ Te ni cuu jeē nde sēhe yí de Salomón ni sáha vehe i yā. ⁴⁸ Te vésú súcuan ni cuu te Yaā cujéhnú téyí, tu ndéé yá máá vehe jeē casáha ñayuu, nájnūhun ni cahān tēe ni nacani jnūhun ya nde jenahán:

⁴⁹ Ni cahān yā:
Andiví cúu nájnūhun mesa nuū ndácu ri jniñu

te ñayiví cúu nájnūhun ñn nuū yítuu jehē rī. Núu súcuan ¿te ndese cuu sáha ró vehe jeē cóndee rī,

te ndese cuu sáha ró núu ndétātu rí?

⁵⁰ ¿A násūu máá rí ní sáha ndihi jeē iyó? áchí máá Jítoho yō Yaā Dios.

⁵¹ Te cáhán gā Esteban:

Yōhō cáacunihni ní ní, te tu cácuni ní chusóhó ní, te cácuu ní nájnūhun ñayuu tācá nación jeē tu cájini i jnūhun ya ní tu cácandíje i ya. Chí níni cájesi ní núu Espíritu

Santo, te nájnūhun ni casáha jíi yō jenahán, suni súcuan casáha ní vijna. ⁵² ¿A ní iyo tēe nácani jnūhun ya nde jenahán jeē tu ní sáha ndevāha jíi yō jíin de? Chí jíi yō ni cajehni de tēe ni canacani jnūhun jeē quíji máá Yāā ndaā. Te je ni quíji Yaā ún, te máá ní ni canastúu ni yá nuū tēe ni cajehni de ya. ⁵³ Te vésú nde jíin táca ndajéhé yā ni jēhe ya ley yā nuū yō, te máá ní chí tu cásquicu ní, áchí Esteban.

Jeē ní cajehni de Esteban

⁵⁴ Tāca jnūhun yáha ní cajini sōho, te yōhō ni caquití ni, te cánacayihí yuhu cájito nuū Esteban. ⁵⁵ Te máá Esteban chí ni cunuú Espíritu Santo jíin de. Te ni jito de ichi ándiví, te ni jini de jeē ndíndēe núu néne Yaā Dios, te índichi Jesús ichi ndáváha ya. ⁵⁶ Te ni cahān de:

Vijna te jíto ri jeē núne andiví, te jíto ri nuū maá Yāā ní nduu tēe, índichi yā nuū cujéhnú ya lado váha Yaā Dios, áchí de.

⁵⁷ Yūcuán na te ni cajesi un sōho, te ni cacana cóhó, te inuú-ni ni candonda siquí Esteban. ⁵⁸ Te ni caquenehen Esteban cuangoo jíin de nde yatā ñúū. Te tēe ni cacahān yaá un jíin ndihi jnáhan de ni cachucú de ticāchí de ndíto ñn tēe suchí nání Saulo, te ni cacani de yuū xiní Esteban. ⁵⁹ Te níni jēe cácani táca tēe un yúū xiní de te ni jicān tahu de nuū yā:

Tátā Jesús jeē cúu ní Jítoho ná, naquihin ní ánuá na vijna, áchí de.

⁶⁰ Te ni jecuiñí yití de te ni cahān jee de:

Tátā Yaā Dios, ma quénehen ní cuéchi siquí i jeē casáha i jíin ná, áchí de.

Súcuan ni cahān de te ni jihí-ni de.

Jeē ní jito xeēn Saulo ñayuu cácandíje

8

¹ Te Saulo, ni nujnahan ni de jeē ní jihí Esteban.

Te quiví un ní caquejéé de cájito xeēn ndasí de ñayuu cácandíje Jesús ini ñuu Jerusalén, te jeē yúcuan cúu jeē ní cajitē núu ñayuu cácandíje cuangoo i ní Judea jíin ní Samaria. Te tēe apóstol chí tu ní cajitē núu de. ² Te sava tēe yíñúhún núu Yaā Dios, ni cachindūji de Esteban. Te yōhō ni candahyū de jeē ní jihí Esteban. ³ Te Saulo chí jíto xeēn de ñayuu cácandíje, te quiví de

ndijnahan vehe te jn̄i de tēe, ñahan, chúhun de i vecāa.

Jeē ní canacani i jnūhun Yaā Dios ndañū Samaria

⁴ Te tācā ñuu nuū cuángoo tāca ñáyuu ní cajitē núu un ní canacani i jnūhun ndese jnáma Yaā Dios ñayuu. ⁵ Te ni jinū Felipe ñn ñuu ndañū Samaria, te nuū ñáyuu yúcuan ní nacani de jnūhun Cristo, Yaā ní jeni Yaā Dios jeē jnáma ya yohó. ⁶ Te tāca ñáyuu ní cacutútú un ní cajini nahín váha i tāca jnúhun ni nacani Felipe, te ni cajito i tācā jniñu jéhu ni sáha de. ⁷ Chi cuehē ñayuu cándoho tachī ni canduvāha i, te cácana cóhó táchī un ní caquendacoo. Te cuehē ñayuu ni íjin jíin ñáyuu ríngo ni canduvāha. ⁸ Te jeē yúcuan ní cacusi teyí ni ñayuu ñuu ún.

⁹ Te ini ñuu un néne ñn tēe nání Simón, te tēe tásí cúu de. Te nde ná tu jinū Felipe ñuu Samaria, te yōhyo cánaa ni ñayuu ñuu un cájito i jeē sáha Simón, te ni stahú de i ni cahān de jeē ñn tēe cújéhu téyí cúu máa de. ¹⁰ Te nde tēe cácujuhnu jíin ndivii cuiti ñayuu, cájetáhú ndasí i jnūhun cáhán de, te ni cajeni ni máa i te ni cacahān i:

Tēe yáha ní jēhe Yaā Dios cuehē poder nuū de, áchí i.

¹¹ Te cájetáhú váha i jnūhun cáhán de, chi cuehē tiempo ni sáha de jniñu stáhú ní canaa ni i ni cajito i. ¹² Te nuū ni jinū Felipe, ni nacani de jnūhun váha ndese ndácu Yaā Dios jniñu, jíin jnúhun Jesucristo, te ni cacandíje i te ni cajendute i, cúu tēe cúu ñahan. ¹³ Te suni máa Simón ni candíje de te ni jendute de, te ni jica cuu de jíin Felipe. Te ni naa ni de jito de tācā jniñu jéhu jeē sáha Felipe jeē steén jeē cujéhu Yaā Dios.

¹⁴ Te cáyūcu tēe apóstol ñuu Jerusalén, te ni canihīn de jnūhun jeē ñáyuu Samaria ni cacandíje i jnūhun Yaā Dios. Te ni catajī de Pedro jíin Juan cuangoo de yūcuán. ¹⁵ Te ni jinūcoo de, te ni cajicān tahú de jehē ñáyuu un návāha na quívi Espíritu Santo ini anuá i jíjnáhan i. ¹⁶ Chi ná tu quívi ya ini anuá ni ñn i, chi máa-ni jeē ní cajendute i jeē ní cacandíje i Jitoho yō Jesús. ¹⁷ Yūcuán na te Pedro jíin Juan ni casoó de ndaha de xinī i jíjnáhan i, te ni quívi Espíritu Santo ini anuá i.

¹⁸ Te ni jito Simón jeē súcuan casoó apóstol ndaha de xinī ñáyuu ún te súcuan quívi Espíritu Santo ini anuá i, te cúní de cuāha de xūhun núu tēe apóstol návāha nihīn de poder un núu. ¹⁹ Chi ni cahān de:

Cúní na jēe cuāha ní poder yáha núu na, návāha núu ndé ñáyuu soó ná ndaha ná xíní i te quívi Espíritu Santo ini anuá i, áchí de.

²⁰ Yūcuán na te ni cahān Pedro jíin de:

Na náa xūhun ró je jnahnū ndetū rō siquī jeē jéni ni rō jeē jíin xūhun te cuu cuan ró táhū jeē véji nuū Yaā Dios. ²¹ Ma nihín tahú rō jeē sáha ró jniñu yáha, chi tu íyó ndáa anuá rō nuū Yaā Dios. ²² Núu súcuan te jíni ñúhún jēe stóo rō jnúhun jeē jéni néé ni rō súcuan te cahān ndahú ró jíin Yáa Dios, te máa yá sanaa te cone cáhnu ni yā siquī jeē jéni néé ni rō súcuan. ²³ Chi jíin rī jeē cucuésún ni rō siquī jeē sáha ri jniñu yáha. Te tāca jēe néé jéni ni rō ni cunuú un jíin ró, achí Pedro jíin de.

²⁴ Yūcuán na te ni cahān Simón jíin de:

Cacān tahú ni jéhē na jíjnáhan ní núu maá Jítoho yō návāha tú jnahnū ndetū na nájnūhun ni cahān ní, áchí de.

²⁵ Te Pedro jíin Juan ni cacahān cají de ndese cácandíje de jnūhun Yaā Dios. Te jeē cuánungoo de ichi ñúu Jerusalén, te tíjni ndañū Samaria ni canacani de jnūhun jeē jnáma ya ñayuu.

Felipe jíin tēe nación Etiopía

²⁶ Yūcuán na te ni cahān ndajéhé maá Jítoho yō jíin Felipe:

Quihin ichi te quihīn rō ichi sur, ichi jeē quénda Jerusalén cuahān nde ñuu Gaza, áchí yá.

Te ichi chúcuan chi máa ñuhun téhé cúu. ²⁷ Te ni quihīn Felipe ichi cuahān de. Te nde nación Etiopía ni quiji ñn tēe eunuco jeē ndíso jniñu de cúu de tesorero nuū ñáhan cúu reina ndácu jniñu nación Etiopía, nání ña Candace. Tēe un ní quichiñúhún de Yaā Dios ñuu Jerusalén. ²⁸ Te cuanuhun de néne de nuū carreta de, te cáhu de tutu jeē ní tee Isaías, tēe ni nacani jnūhun Yaā Dios nde jenahán. ²⁹ Te máa Espíritu ni cahān yā jíin Felipe:

Cuáhán quíjnahan rō tēe cuahān jíin carreta un.

³⁰ Te ni jejnahan Felipe carreta un, te ni jini sōho de jeē cáhu tēe ún tutu jeē ní tee Isaías. Te ni cajñuhún de tēe ún:

¿A jécūhun ni ni jñuhun jeē cáhu ní chí tuú? áchí de.

³¹ Te ni cahān maá tēe un jíin Felipe:

¿Te ndese jecūhun ni ná? Chi tú na tēe castūhun núū ná ndese cúu ún, áchí de.

Te ni cahān de jíin Felipe jeē na cáa de conēne ndúú de jíin de ini carreta.

³² Te jñuhun cáhu de tutu iī un cáhán suhva:

Nájñuhun lanchi jeē cuahán tī nuū cúu tī, súcuan ni casáha ñayuu jíin yá.

Te nájñuhun ñin londe quitī sáte jēe tu ndáhyú tī, súcuan ni sáha ya, chi tú na vé ni cáhán cuitī yā ná ni cajicān i cuēchi síquī yā.

³³ Te hora jeē ní cajēhe i jñuhun canu yā, tu ní casáha ndaā i síquī yā jíin jñuhun ndaā,

te ni cajehni i ya ini ñayivī yáha.

Te coo cuehē ñayuu candíje nuū yā jeē ma cánda ni ñin ñayuu cahu i ñayuu ún.

Achí.

³⁴ Yūcuán na te ni cahān tēe Etiopía un:

Cava vāha ni ní cachi ni núū ná, ¿ndé síquī cahán tēe ni nacani jñuhun yáha? ¿A síquī maá de chí síquī ñinga tēe? áchí de jíin Felipe.

³⁵ Yūcuán na te ni nacani Felipe jñuhun vāha Jesús nuū tēe ún, chi ni quejé de ni castūhún de jñuhun jeē ní cahu tēe ún, jíin táca gá jñuhun jeē yosó núū tútu yā. ³⁶ Te níní cuángoo de ichi ún te ni jinūcoo de nuū ñuhun ndute, te ni cahān tēe Etiopía:

Yáha ñuhun ndute ¿te á tú cuu cuandute ná? áchí de.

³⁷ Te ni cahān Felipe:

Cuu te núu cándíje ñihin ni ndé jíin ini jíin ánuá ni táca jēe ni sáha Jítoho yō Jesús jehē yō, achí de.

Te ni cahān tēe Etiopía:

Cándíje ná jēe Jesucristo cúu máa Séhe Yaā Dios, achí de.

³⁸ Te ni sáha de jeē na jécuiñī carreta de, te ni nuu ndindúú de cuángoo de ichi véyí núū ñuhun ndute ún, te ni scuándute Felipe tēe Etiopía. ³⁹ Te nuū ní quendacoo de nuū ndúte, te Espíritu maá Jítoho yō ni sáha ya jeē ní ndoñuhún-ni Felipe. Te tēe Etiopía vésú tuá ni jíto de nuū Felipe, te cúsiñi ni de

cuahān de. ⁴⁰ Te ni nane Felipe ñuu Azoto. Te nácani de jñuhun ndese jñama ya ñayuu, cuahān de táca ñuu nde ni jinū de Cesarea.

Jeē ní nasāma ini Saulo ni sáha Jesucristo (Hch. 22.6-16; 26.12-18)

9

¹ Te Saulo chi máni cáhán de jeē cáhni de táca ñayuu cácandíje i máa Jítoho yō, te jeē yúcuán ní jehēn de nuū sutú cujéñnu ga. ² Te ni jicān de carta jeē cahán jeē quihín de táca vehe iī sinagoga ñuu Damasco te cuhni de tēe ñahan jeē cácandíje i Jesús, quiji de jíin i ñuu Jerusalén nuú. ³ Te ni quihin de ichi cuahān de. Te cuacuyajni de ñuu Damasco, te sanaa-ni te ichi ándiví ní stíndēe ñin luz nuú de. ⁴ Te ni cotúú-ni de nuū ñuhun, te ni jini sōho de ñin jñuhun cáhán jíin de:

Saulo, Saulo, ¿najehē jíto xeēn rō ruhū? achí.

⁵ Te ni cahān maá de:

¿Na nihín cúu jeē cahán, Tátā?

Te ni cahān yā jíin de:

Máa rí cúu Jesús, te jeē jíto xeēn rō ñayuu cácandíje i ruhū cúu jeē jíto xeēn rō ruhū. Te jeē sáha ró súcuan cúu nájñuhun stíquī jeē tu jéndíje tī te jéñú yatá tī xinī pulla, te súcuan stóho tī maá tī, achí yá.

⁶ Te máa de chí quísi i de jeē yūhú de, te ni cahān de:

Tátā, ¿na vé cuní ni jēe sáha ná núu súcuan? áchí de.

Te ni cahān maá Jítoho yō jíin de:

Ndocuiñī, quivī ró ini ñuu, te yūcuán íyó ñin tēe jeē cachi nuū rō na vé cúu jeē cánuú sáha ró, achí yá.

⁷ Te tēe cuángoo jíin Saulo, ni canaa ndasí ni de cájini sōho de ndusu jeē cahán, te tu ní cájito cuitī de nuū jeē cahán un. ⁸ Yūcuán na te ni ndocuiñī Saulo. Te ni nducú de coto de, te tuá cúu coto de, te ni cajñi tēe ún ndaha de ni jinūcoo jíin de nde ini ñuu Damasco. ⁹ Te yūcuán ní condee de unī quivī. Te tu ní cúu cuitī coto de, ni tú na vé ni yéji de, ni tú na vé ni jíhi de.

¹⁰ Te ñuu Damasco néne ñin tēe cándíje, nání de Ananías. Te máa Jítoho yō ni steén ndijin ya maá yá nuú de te ni cahān yā jíin de:

Ananías, achí yá.

Te máa de ni cahān de jíin yá:

Naun ní sáña, Tátā, áchí de.

¹¹ Te ni cahān maá Jítóho yō jín de:

Quihin ichi te quihīn rō calle jeē nani Calle Derecha, te vehe Judas cajnūhun rō ñn tēe nání Saulo ñuu Tarso, chi jícán tahu de. ¹² Te nájnūhun ni jito ndijin de jeē maá ró, Ananías, ni jinū rō, te ni soó ró ndaha ró xíní de, te ni nanune tinūú de, áchí yá.

¹³ Yūcuán na te ni cahān Ananías:

Tátā, cuehē ñayuu cácahān jeē tēe yúcuán yōhyo jító xeēn de ñayuu cácaandíje i níhín ñuu Jerusalén. ¹⁴ Te vijna ni quee de yāhá, chi sutū cácujuhnu ni catejníñu de vēji de jñi de tāca ñáyuu cácahān ndahú i jín ní, áchí de.

¹⁵ Te ni cahān maá Jítóho yō jín de:

Cuáhán, chi máá rí ni nacāji tēe un jéē quihīn de nacani de jnūhun ri nuū tāca ñáyuu nación Israel jín núū ñáyuu tāca gá nación nde jín núū tāca rey. ¹⁶ Chi stéén rī nuū de jeē cánuú ndoho de cuehē jnūndóho jeē siquí rī, achí yá.

¹⁷ Yūcuán na te cuahān Ananías. Te ni quiví de ini vehe nuū néne Saulo, te ni soó de ndaha de xiní Saulo, te ni cahān de:

Hermano Saulo, máá Jítóho yō Jesús, Yaā ní quenda ndijin nuū ní ichi jeē véji ní, ni tají yá sáña véji ná núū ni návāha na nánune tinūu ní, te návāha na cúnuú Espíritu Santo yā jín ní, áchí de.

¹⁸ Te ni nanune-ni tinūu Saulo, chi ni nungoo-ni nájnūhun soō chācá ní condihyū tinūú de ún. Te ni ndocuiñi de ni jendute de. ¹⁹ Yūcuán na te ni nacāji de staā, te ni nanihīn ni de. Te ni condee de jecu quiví jín tēe cácaandíje jeē cáyūcú ini ñuu Damasco.

Jeē ní nacani Saulo jnūhun ini ñuu Damasco

²⁰ Te ni quejéé-ni de nacani de jnūhun Jesús ini tācá vehe iī sinagoga, áchí de jeē Jesús cúu Sēhe Yaā Dios. ²¹ Te tāca ñáyuu ni cajini sōho jnūhun cáhán de ni canaa ni i, te ni cacahān i:

¿A násūu tēe yáha cúu jeē yóhyo jító xeēn de tāca ñáyuu Jerusalén jeē cájicān tahu nuū Jesús? Te siquí yúcuán ní quee de yāha jéē cúhni de ñayuu cácaandíje, te quihīn de jín i nuū sutú cácujuhnu núú, áchí i.

²² Te víhyá gā ni nacani Saulo jnūhun ya, te ni steén cají de jeē Jesús cúu Cristo, Yaā ní jeni Yaā Dios jeē jnáma ya yohó. Te

tēe hebreo jeē cáyūcú ñuu Damasco, tu ní cánihīn de modo cahān de jeē tu íyó ndáa jeē cáhán Saulo.

Jeē ni cácu Saulo nuū jnáhan de hebreo

²³ Te ni yāha cuehē quiví. Te jnáhan de hebreo ni casquíjnáhan jnūhun de jeē cáhni de Saulo. ²⁴ Te ni nihīn Saulo jnūhun jeē cándito de nduú ñuu táca yéhyí pared jeē ní condúu ndihyú ñuu ún. ²⁵ Yūcuán na te ñn jecuāa te tēe cácaandíje ni caquihin de Saulo, te ini ñn jīca cáhnu ni cascúun de Saulo jicā pared ún, te súcuán ni cācu de.

Jeē ní najinū Saulo ñuu Jerusalén

²⁶ Te nuū ní najinū de ñuu Jerusalén, te cúní de najnáhan de jín tēe cácaandíje. Te ni cayūhu tēe un ní cajito de Saulo, chi tu ní cácaandíje de jeē ní nduu Saulo tēe cándíje nuū Jesús. ²⁷ Te Bernabé cuahān de jín Saulo nuū cáyūcu tēe apóstol, te ni nacani de jnūhun nuū tēe ún ndese ni jini Saulo nuū maá Jítóho yō ichi nuū cuahán de, jín jéē ni cáhán yā jín de, jín jéē jéhu-ni ni nacani de jnūhun Jesús ini ñuu Damasco. ²⁸ Te ni condee Saulo ñuu Jerusalén ni jica de jín táca tēe apóstol. ²⁹ Te jéhu-ni ni nacani de jnūhun máá Jítóho yō. Te jnáhan ñuu de hebreo jeē cácahān yuhu griego, ni castáhān jnáhan jín de, te máá tēe un cácumí de cahni de Saulo. ³⁰ Te ni cajini tācá hermano cácaandíje, te ni cajendēca de Saulo nde ñuu Cesarea. Te yūcuán ní canatajé de Saulo cuanuhun de nde ñuu de Tarso.

³¹ Te ñayuu cácaandíje Jesús jeē cáyūcú Judea jín Galilea jín Samaria, tuá ni cájito xeēn ñayuu i. Te ni ije ga i jín jnūhun ya, te cándiso iyo i nuū maá Jítóho yō. Te Espíritu Santo ni chindéé ñáhán yá i te ni nducuehē gā i.

Jeē ní nduvāha Eneas

³² Te tāca lado jécondēhe Pedro ñayuu cácaandíje, te suni ni jecondēhé de ñayuu cácaandíje cáyūcú ñuu Lida. ³³ Te yūcuán ní jini de nuū ñn tēe nání Eneas jeē ní cuu unā cuiyā cáa de chi ni ijin de. ³⁴ Te ni cahān Pedro jín de:

Eneas, Jesucristo cúu Yaā nasávāha ya rohó. Ndocuiñi te natuu rō yuu ró, áchí de.

Te ni ndocuiñi-ni tēe ún. ³⁵ Te tāca ñáyuu cáyūcú ñuu Lida jín ndúhvā Sarón ni cajito

i jeē ní nacaca Eneas, te ni casquéndō i tāca jnúhun jeē tu íyó ndāā te ni cacandíje i máá Jítóho yō.

Jeē ní natecu Dorcas

³⁶ Te nde ñuu Jope ni ñyo ñn ñahan cándíje, nání ña Tabita, te nuū yúhu griego nání ña Dorcas. Te ñahan yáha máni jniñu váha ni sáha ña, te ni sáha ña caridad ni chindéé ñáhán ña ñayuu cúmanī nuū. ³⁷ Te tiempo yúcuan ní quejéé cuéhyī jíin ña, te ni jihī ña. Te ni cascúchi i ndīyī ún, te ni cajequin i ndīyī un ndé ini cuarto xinī véhe. ³⁸ Te yajni íne ñuu Lida jíin ñuu Jope, te tēe cácandíje ñuu Jope ni cajini jnúhun de jeē néne Pedro ñuu Lida, te ni catají de uū tēe cuacana de Pedro, te ni cacahān de:

Ma cucuéé ní na quíhín yachī yō ñuu Jope, achí de.

³⁹ Yūcuán na te ni quihin Pedro ichi cuahān de jíin tēe ún. Te nuū ni jíin de, te ni cacao tēe un jíin de nde xinī véhe nuū catú ndīyī ún. Te tācá ñahan viuda ni candicó ndúū ña de cándahyū ña, te cástéén ña tācá sahma jíin tícāchi jéé ni sáha Dorcas te ni saja ña nde na técu ña. ⁴⁰ Yūcuán na te ni ndacu Pedro jniñu jeē na quéndacoo ndihī ñayuu ún quingoo i nde yatā véhe. Te ni jecuiñī yití de ni jicān tahu de, te ni nandió cóto de nuū catú ndīyī ún, te ni cahān de:

Tabita, ndocuiñī ní, achí de.

Te máá ña ni ndacoto-ni ña te ni jito ña nuū Pedro, te ni nucōo-ni ña. ⁴¹ Te ni jni de ndaha ña, te ni ndonehen de ña. Yūcuán na te ni nacana de xinī ñayuu cácandíje nde jíin ñahan viuda ni ndīvicoo i, te ni steén de ña nuū i jeē ní natecu ña. ⁴² Te ni jité jnúhun jniñu yáha ní ñuu Jope cuahān, te cuehē ñayuu ni cacandíje i jnúhun máá Jítóho yō. ⁴³ Te cuehē quivī ni ndōo Pedro ini ñuu Jope, néne de vehe ñn tēe sáha curtir ññ, nání de Simón.

Pedro jíin Cornelio

10

¹ Te ini ñuu Cesarea ni ñyo ñn tēe nání Cornelio, ni cuu de capitán grupo soldado jeē naní Italiano. ² Te cúu de tēe ndíso ñyo nuū Yaā Dios nde jíin ndihī ñayuu vehe de, te yōhyo caridad ni tēe cúu de, chi jéhe de xūhun núū ñayuu hebreo cándoho ndáhú,

vēsú nasūu tēe hebreo cúu de. Te níni jicān tahu de nuū Yaā Dios. ³ Te ñn quivī ni steén ndijin yā nuū tēe yáha nájnūhun cahunī jehíni, te ni jito de jeē ñn ndajéhe maá Yáā Dios ni quivī ya nuū néne de. Te ni cahān yā jíin de:

Cornelio, achí yá.

⁴ Te máá de ni ndacoto vāha de nuū yā, te ni yūhú de. Te ni cahān de:

¿Na vé cuní ni, Tátā? achí de.

Te ni cahān yā jíin de:

Je chíhi Yaā Dios cuenta jeē jicān tahu rō jíin jéé sáha ró caridad. ⁵ Vijna te tají ró jecu tēe na quingoo de nde ñuu Jope, quicana de Simón jeē suni nání de Pedro, na quíji de. ⁶ Chi néne núu de vehe tocayo de Simón, tēe sáha curtir ññ, te ndéé vehe ún yajni yumar. Te máá de castūhun núu rō na vé cúu inga jeē cánuú sáhá ró, achí ndajéhe yā.

⁷ Te ndajéhe yā jeē ni cáhān jíin Cornelio, cuahān-ni ya. Te ni cana de uū mozo de jíin ñn soldado jeē yñúhún núu Yaā Dios, chi cúcáhnú ni de jeē squícu vāha tēe ún. ⁸ Te ni nacani ndihī de jnúhun nuū tāca tēe ún, te ni tají de cuangoo nde ñuu Jope.

⁹ Te inga quivī un cájica de ichi cuangoo de, te cuacuyajni de ñuu Jope. Te je yajni cahuxī uū cúu, te suu hora un ní caa Pedro siquī véhe chi cándaā, te yúcuan cácan tahu de. ¹⁰ Te ni quee sōco chíji de, te ni cuní de caji de staā. Te sáá cásáha ña ndeyu te ni steén ndijin yā nuū de. ¹¹ Te ni jito de jeē núne andiví. Te ni jito de nájnūhun ñn sahma manta jité cáhnu te núhni jnáhan ndicúún punta, te ni cuun véji nuū de. ¹² Te chíji un cáñūhun ndinuū quití, tācá quití cúún ndaha jíin táca cóo jíin táca quití cándava. ¹³ Te ni jini sōho de ñn jnúhun ni cahān:

Pedro, ndocuiñī te cahni rō tācá quití jñā, te caji rō tī, achí.

¹⁴ Te ni cahān Pedro:

Ma cáji na, Tátā, chi tu yéji cuiti na táca quití jeē cahán ley ni jéé tú vāha caji na tí, chí nájnūhun jeē tu cáhīyo ndoo tī nuū ní, achí de.

¹⁵ Te ni cahān tucu jnúhun un jíin de:

Achí rí jeē iyó váha caji rō tācá quití jñā, chí ni sándoo rí, te ma cahán maá ró jeē tu cáhīyo ndoo tī, achí. Te súcuan ni steén caji

yá nuū de jeē cúu quihīn de nuū ñáyuu vēsú násūu jnáhan ñuu de hebreo cúu.

¹⁶ Te unī jínu ni cahān súcuan jíin de. Te sahma un ní ndaa cuanuhun andiví. ¹⁷ Te níni nácani ndasí ni Pedro na vé cuni cahān jeē ní jito ndijin de ún, te ni jinūcoo-ni tēe ni tají Cornelio, cácajnūhún de vehe Simón nde ni jinūcoo de yéhyí tēe ún. ¹⁸ Te cácahān jee de cácajnūhún de núu yūcuan ndéé Simón jeē suni nání de Pedro. ¹⁹ Te níni nácani ga ni Pedro siquī jeē ní jito ndijin de ún, te Espíritu Santo ni cahān yā jíin de:

Ni quecoo unī tēe cánanducú róhó. ²⁰ Ndocuiñī te nanuu ró, te ma cáni ni rō jeē tú vāha quihīn rō jíin de, vēsú násūu jnáhan ñuu rō hebreo cácuu de, chi máá rí ni tají rí de vējicoo de, áchí yá.

²¹ Yūcuán na te ni nanuu Pedro nuū tēe ni tají Cornelio, te ni cahān de:

Máá ná cúu tēe cánanducú ní. ¿Te na siquī vējicoo ní núu na núu súcuan? áchí de.

²² Te ni cacahān mozo un:

Cornelio, tēe cúu capitán, ni tají de sañá. Te tēe ndaā, tēe ndíso īyo nuū Yaā Dios cúu de, te tāca ñáyuu hebreo suni cácahān i jeē tēe vāha cúu de. Te ni cahān ñn ndajéhé yā jíin de jeē na cána de níhín jéé ní vehe de te chusóhó de jnūhun cahān ni jíin de.

²³ Yūcuán na te ni cahān Pedro jíin mozo un jéé na cúcōo de ini vehe ún, te ni candōo de yūcuán. Te nuū ní cundijin, te ni quihin Pedro ichi cuahān de jíin mozo un. Te suni cuangoo jecu hermano cácañdije ñuu Jope jíin de.

²⁴ Te nde inga quivī ni jinūcoo de ñuu Cesarea. Te Cornelio ndétu de jinūcoo Pedro, chi ni nastútú de tāca jnáhan de jíin táca amigo de jeē quijnáhan vāha ga de jíin. ²⁵ Te nuū ni jínū Pedro jijnáhan de, te ni quenda Cornelio ni cahān de jíin Pedro, te ni jecuiñī yití de jeē chiñúhún de Pedro nuú. ²⁶ Te Pedro ni ndonehen de Cornelio, te ni cahān de:

Ndocuiñī ní, chi sañá suni ñn tēe-ni cúu ná, áchí de.

²⁷ Te cándajnūhún de ni quivícoo de ini vehe. Te ni jito Pedro jeē cáyūcu cuéhē ñáyuu ini vehe de. ²⁸ Te ni cahān Pedro jíin ñáyuu ún:

Je cájini vāha ni jíjnáhan ní jéé ley jeē cánevāha saña ñáyuu hebreo, cáhán jeē tú vāha jeē quijnáhan ná jíin ní quivícoo ná vehe ní siquī jeē cúu ní ñáyuu síin nación. Te Yaā Dios chi ni steén yā nuū na jéé ma kujéé ni na núu ní ñn ñáyuu. ²⁹ Jeē yūcuan cúu jeē vēji-ni ná, chi ni cana ní saña, te tu ní sájéé ni ná. Te na cájnūhun ná nihín, ¿na siquī ni cana ní saña? áchí Pedro.

³⁰ Yūcuán na te ni cahān Cornelio:

Vijna íyó cúun quivī nájnūhun máá hora yáha jéé cúu cahunī jehíni, te ndite ni ná chi súcuan chíñúhún ná nuū yā, te jícan tahu na ini vehe ná. Te ni quiji ñn ndajéhé yā nuū ná, te ndíndéé sahma ñūhun ya. ³¹ Te ni cahān yā jíin ná: Cornelio, je ni jini sōho Yaā Dios jeē jícan tahu rō, te chíhi ya cuenta jeē sáha ró caridad. ³² Núu súcuan te tají ró mozo na quíngoo de ñuu Jope quicana de Simón jeē suni nání de Pedro, na quíji de nuū rō. Chi tēe un néne de vehe tocayo de Simón, tēe sáha curtir ññi, te yajni yumar ndéé vehe de. Te quee tēe ún te castūhún de nuū rō jnūhun cánuú, áchí yá jíin ná.

³³ Súcuan ni cuu te ni tají-ni ná mozo na cuajēcoo de cana de níhín, te na cútahū ná, chi vāha ni sáha ní jéé véji ní. Te vijna ni candutútú ná yāha návāha tāca ná cuni sōho ná ndihī jnūhun Jitoho yō Yaā Dios jeē ni jéhe ya cahān ní, áchí de.

Jeé ní nacani Pedro jnūhun ya vehe Cornelio

³⁴ Yūcuán na te ni cahān Pedro:

Vijna te ni jini vāha ná jéé Yaā Dios inuú-ni sáha ya jíin táca ñáyuu, cúu ñáyuu hebreo jíin ñáyuu tāca gá nación. ³⁵ Chi cúsiñi ni yā jíin ñáyuu tāca-ni nación núu cándíso īyo i nuū ya te cásáha i jniñu ndaā. ³⁶ Chi ni cahān yā jíin ñáyuu Israel jeē ndivícoo tāca ñáyuu nuū jnūhun manī yā jíin i sáha Jesucristo. Te máá yá cúu Jitoho tāca yóhó.

³⁷ Máá ní je cájini ní ndese ni cuu. Chi ná ni jínu ni nacani Juan jnūhun jíin jéé ni scuándute de ñáyuu, te ni quejéé Jesús nácani ya jnūhun nde Galilea, te ni jité jnūhun un ní cáhnu Judea. ³⁸ Te cájini ní jéé Yaā Dios ni jéhe ya Espíritu Santo jíin poder nuū Jesús, Yaā ní jehnu ñuu Nazaret. Te cájini ní jéé ní jica cuu ya ni sáha ya jniñu vāha, te ni nasávāha ya tāca ñáyuu

jeē cándoho i sáha jexeén, chi Yaā Dios ni chindéé ñáhán yá Jesús. ³⁹ Chi máá ná cánacani cáji ná jnūhun tācá jniñu ní cajito ná ní sáha ya ní cáhnu Judea jíin ini ñuu Jerusalén. Yūcuán na te ni cajehni i ya, chi ni cata caa i ya jicā cruz. ⁴⁰ Te Yaā Dios ni nastécu yā maá Jesús nuū uní quiví, te ni ndiji ya nuū na ní cajito ná nuū yā ni sáha Yaā Dios. ⁴¹ Te tu ní quíji ya nuū tācá inga ñayuu, chi nuū maá-ni tāca ná jeē jé ni nacāji Yaā Dios sãña jéé nácani ná jnūhun tācá jniñu jeē ní cajito ná. Chi ni cayejí na stāa ni cajihí ná ndute jíin yá ná ni nane ya jeē ní natecu yā. ⁴² Te ni ndacu ya jniñu nuū na jíjnáhan ná jéé na nácani ná jnūhun ya nuū tāca ñáyuu te cahān cají ná jeē maá Yāā Dios ni jení ya Jesús jeē sándaā yā jniñu ñayuu cátecu jíin ñáyuu ní cajihí. ⁴³ Chi jnūhun Jesús cúu jeē ní cacahān tāca téé ni canacani jnūhun Yaā Dios nde jenahán. Chi ni cacahān de jeē tāca ñáyuu jeē candíje i Jesús, cone cáhnu ni yā nuū cuéchi i, áchí Pedro.

Jeē ni quiví Espíritu Santo ini anuá ñayuu jeē násūú hebreo cácuu

⁴⁴ Te níni cáhán gā Pedro tāca jnūhun yáha te ni quiví-ni Espíritu Santo ini anuá tāca ñáyuu cájini nahín jnūhun ya jeē cahán de. ⁴⁵ Te tēe hebreo jeē ní jínūcoo jíin Pedro jeē suni cá candíje de Jesús, nahán ní canaa ni de ní cajito de jeē suni ní quiví Espíritu Santo ini anuá ñayuu jeē násūú hebreo cácuu. ⁴⁶ Chi ni cajini sōho de cácahān ñayuu un sín yuhu, te cácahān i jeē yōhyo cújéhnú Yaā Dios. ⁴⁷ Yūcuán na te ni cahān Pedro:

¿Ndé ñin casi jeē ma cuándute ñayuu yáha? Chi ni quiví Espíritu Santo ini anuá maá i, nájnūhun ní quiví ya ini anuá maá yó, áchí de.

⁴⁸ Te ni cahān de jíin i jeē na cuándute i síquī jeē ní cacandíje i Jesucristo. Yūcuán na te ni cacahān ndahú i jíin Pedro jeē na quéndō de jecu quiví jíin i.

Jeē ní nacuāha Pedro cuenta nuū ñáyuu cá candíje ini ñuu Jerusalén

11

¹ Te tēe apóstol jíin tāca hermano cáyūcú Judea, ni canihín de jnūhun jeē súni ñayuu sín nación ní cacandíje i jnūhun Yaā Dios.

² Te cuanuhun Pedro ñuu Jerusalén. Te sava tēe hebreo jeē cá candíje de ya ní cacahān de nuū Pedro:

³ ¿Najehē ni condee ní vehe ñayuu jeē násūú ñáyuu nación yō cúu? Te ni yeji ní jíin i, áchí.

⁴ Yūcuán na te ni nacani cáji Pedro jnūhun nuū téé ún ndihí ndese ni cuu síquī téé sín nación:

⁵ Néne ná ñuu Jope. Te níni jícán tahu na, te ni steén ndijín yā nuū ná, te ni jito ná nájnūhun ñin sahma manta jité cáhnu jeē nuhní jnáhan ndicúún punta, te nde ichí ándiví ní cuun ní quiji nuū ná. ⁶ Te ni jito vāha ná, te ni jini na jéé chíji un cáñūhun quití cúún ndaha jíin quití xéén jíin cóo jíin quití cándava. ⁷ Te ni jini sōho ná ñin jnūhun ní cahān jíin ná: Pedro, ndocuñí te cahni rō tācá quití jíñā, te caji rō tí, áchí jíni ná.

⁸ Te ni cahān ná: Ma cáji na, Tātā, chi tu yéji cuiti na tāca quití jeē cahán ley ní jéé tu cáhīyo ndoo tí nuū ní, áchí ná. ⁹ Yūcuán na te jnūhun jeē véji nde ándiví ní cahān tucu jíin ná: Ní sándoo máá rí tí, te ma cahán gā rō jeē tu cáhīyo ndoo tí, áchí jíni ná. ¹⁰ Te uní jínu ní cahān súcuan. Yūcuán na te ní ndaa sahma un cuánuhun ándiví.

¹¹ Te hora un ní jinūcoo uní tēe vehe nuū ní cóndee ná un, cánanducú de sãñá, te ñin jnáhan ñuu de Cesarea ní tají de vējicoo de. ¹² Te máá Espíritu ní cahān yā jíin ná jeē ma cáni ní na jéé tú vāha quihín na jíin de. Te suni ññū hermano yáha ní jengoo jíin ná, te ní quivícoo ná ini vehe tēe nání Cornelio. ¹³ Te tēe un ní nacani de jnūhun nuū na jíjnáhan ná jéé ní jito de ñin ndajéhé Yaā Dios, índichi yā ini vehe de, te ni cahān yā jíin de: Tají ró jecu tēe na quíngoo de ñuu Jope, quicana de Simón jeē suni nání de Pedro, na quíji de.

¹⁴ Te tēe ún cachi de nuū rō ndese jnama Yaā Dios rohó jíin ndihí ñayuu cáyūcú vehe ró, áchí yá. Achí Cornelio jíin ná. ¹⁵ Te nuū ní quejéé ná cahán na, te ni quiví-ni Espíritu Santo ini anuá i jíjnáhan i, nájnūhun ní quiví ya ini anuá maá yó xíhna gā. ¹⁶ Yūcuán na te ni nucūhun ní na jnūhun ní cahān maá Jítoho yō: Jendaá jeē maá ndute-ni ní scuándute Juan ñayuu. Te rohó jíjnáhan ró chi nájnūhun cuandute ró jíin Espíritu Santo, cúu jeē cóndee yā ini anuá rō, áchí yá.

17 Te suni ni jēhe Yaā Dios Espiritu yā nuū maá i nájnūhun ni jēhe ya nuū maá yó jeē cá candíje yó Jítóho yō Jesucristo. Núu súcuan ¿te ndé ñin cúu ná jéē cásí ná jniñu jeē sáha Yaā Dios? áchí Pedro.

18 Súcuan ni cajini sōho de jnūhun yáha, te tuá ni cácahān de nuū Pedro, chi sa suhva ni cacahān de jeē yóhyo cújéhnu Yaā Dios. Te ni cacahān de:

Suni ni jēhe Yaā Dios jnūhun jeē na nácani ni ñayuu tāca gá nación jeē stóo i cuēchi i návāha cotecu i ñí cáni núu súcuan, áchí de.

Ñayuu cá candíje ini ñuu Antioquía

19 Te quiví ní cajehni de Esteban ni quejé de cájito xeēn de ñayuu cá candíje, te jeē yúcuan ní cajitē núu ñayuu un tāca ñuu cuangoo i, te ni jinūcoo i Fenicia jíin Chipre jíin ñuu Antioquía. Te ni canacani i jnūhun vāha ya nuū máni jnáhan hebreo i jeē cáyūcu yúcuan, te tu ní canacani i jnūhun ya nuū ínga ñayuu. 20 Te jecu tēe cá candíje jeē cáyūcu Chipre jíin ñuu Cirene ni jinūcoo de ñuu Antioquía, te suni nuū ñayuu tāca nación jeē tu cájini i jnūhun ya ni canacani de jnūhun máa Jítóho yō Jesús jeē jnáma ya i. 21 Te máa Jítóho yō ni chindéé ñáhán yá de, te cuehē ñayuu ni castóo i jniñu jeē tu íyó ndáa te ni cacandíje i máa Jítóho yō.

22 Te ñayuu cá candíje ini ñuu Jerusalén ni cajini jnūhun i, te ni catajī i Bernabé cuahān de nde ñuu Antioquía. 23 Te nuū ni jínū Bernabé yūcuán, te ni jini de jeē yóhyo vāha ni sáha Yaā Dios jíin i, te ni cusí ndasí ni de. Te ni stihví ni de tāca ñayuu un jéē jíin ini jíin ánuá i na cóndihví ni i squícu vāha i nuū maá Jítóho yō, te ma náyūhú i. 24 Chi tēe vāha cúu Bernabé, te ni cunuú Espiritu Santo jíin de, te cándíje ñihin de. Te ni cacandíje cuehē ñayuu nuū maá Jítóho yō ni sáha de.

25 Yūcuán na te cuahān de nde ñuu Tarso cuananducú de Saulo. Te ni nanihīn jnáhan de jíin Saulo, te ndéca de tēe un ní ndee de ñuu Antioquía. 26 Te ñí ñin cuiyā ni candutútú de jíin ñayuu cá candíje yūcuán, te ni castéén de jnūhun ya nuū cuehē ñayuu. Te ñuu Antioquía cúu nuū xíhna ñúhún gá ni caconaní ñayuu cristiano síquī jeē ní candíje i Cristo.

27 Te suni tiempo un ní quendacoo tēe cáncani jnūhun Yaā Dios ñuu Jerusalén

cuangoo de nde ñuu Antioquía. 28 Te ñin jnáhan de jeē naní Agabo ni ndocuiñí nuū hermano cá candíje. Te ni steén Espiritu Santo nuū de, te ni castūhún de jeē cóo ñin jnamā xeēn ñí cáhnu. Te ni cuu jnamā ún ñin parte tiempo jeē ní ndacu Claudio jniñu jeē ní cuu de rey. 29 Yūcuán na te ni candajnūhun tēe cá candíje ñuu Antioquía jeē cuáha ñin ñin de nasaa canda de cuáha de te tají de quihīn cotecu hermano cáyūcú Judea. 30 Te súcuan ni casáha de. Te ni catajī de Bernabé jíin Saulo ni cajendēca de nuū tēe jéhnu cándiso jniñu nuū ñayuu cá candíje cáyūcú Judea.

Jeē ní jehni Herodes Jacobo, te ni chune de Pedro vecāa

12

1 Te suu tiempo un ní quejéé rey Herodes jító xeēn de sava ñayuu cá candíje. 2 Te ni ndacu de jniñu jeē jíin espada na cáhni i Jacobo ñani Juan. 3 Te ni jini de jeē ní cacusí ni tēe hebreo jeē ni sáha de súcuan, te jeē yúcuan suni ni jniñ de Pedro. Te máa quiví un ní cuu vico jeē yéji ñayuu pan jeē tu yíhi levadura. 4 Te nuū ní jniñ de Pedro, te ni chune de vecāa, te ni jeni de cuūn grupo soldado jeē cóndito Pedro, cuūn cuūn soldado cúu jeē ñin ñin grupo. Chi cúní Herodes jeē na yáha vico un jéē cúu vico pascua te quenehen de Pedro vecāa un steén de nuū ñayuu cuehē. 5 Te súcuan íne Pedro vecāa, te cándito soldado un de. Te ñayuu cá candíje chi ñihin ni cajicān tahú i jehē Pedro nuū Yaā Dios jeē na cácu de.

Jeē ní quenehen Yaā Dios Pedro vecāa

6 Te jéni ni Herodes jeē na cúndijin inga quiví te quenehen de Pedro vecāa, te steén de nuū ñayuu un núú. Te núhni Pedro jíin úu cadena, cá tú de quixí de mēhñu úu soldado jecuáa ún, te suni cáhīn ga soldado cándito yéhyí vécāa ún. 7 Te suu jecuáa ún te sanaa-ni te ni jinū ñin ndajéhé máa Jítóho yō, te ni ndindéé ini vecāa. Te ni squíhi ya Pedro, te ni natahū ni de. Te ni cahān yā:

Yachī ndocuiñí rō, achí yá.

Te cadena nuhni ndaha de un ní canandajī-ni. 8 Te ni cahān ndajéhé yā jíin de:

Nacuhni ñihin chíji ró, te nuquñhi ró ndíjēn rō, achí yá.

Te súcuan ni sáha de. Te ni cahān tucu ndajéhé yā jín de:

Condii ticāchi ró, te condiquin rō ruhū na quihín yō, achí yá.

⁹ Te ni quenda de ndíquín de ya cuahān de jín yá, te jéni ni de jeē násūu jéndaá cúu jeē sáha ndajéhé yā jín de, chi jéni ni de jeē in jeē ni stéén yā jító ndijin de cúu. ¹⁰ Te ni yāha ya jín de uū nuū cándito soldado. Te ni jinū yā jín de yéhyí cáa nuū quenda de caca de calle, te yéhyí un ní nune iī-ni máá. Te ni quenda ya jín de, te ni yāha de in calle cuahān de. Yūcuán na te ni cujiyo-ni ndajéhé yā nuū de cuahān yā. ¹¹ Te ni nducájí ni Pedro te ni cahān máá ní cahān in de:

Vijna te ni jini ndaā rī jeē ní tají máá Jítóho rī ndajéhé yā ni quiji, te ni jnama ya ruhū nuū Herodes jín núū tāca ñáyuu hebreo jeē cáconi i sáha xeēn i jín rí nuú, achí de.

¹² Te nuū ní jini de jeē ni cácu ndije de, te ni quihin de ichi cuahān de vehe María naná Juan jeē suni nání de Marcos. Te yūcuan cáhīn tútú cuéhē ñáyuu cájicān tahu i jehē Pedro. ¹³ Te cáhān Pedro ni jinū de yéhyí fuera, te in sūchi síhí nání Rode cuahān i jeē cúni i núu ndé in cúu jeē cahán.

¹⁴ Te ni nacuni i tachí Pedro, te jeē ní cusī ni i te tu ní nune i yéhyí un, chi ni nandió cóo i te jínu i ni ndiví i ini cuarto. Te ni castūhún i jeē ní quee Pedro índichi de yéhyí fuera.

¹⁵ Te ni cacahān jín i:

Jeē cahán neé ró, achí.

Te máá i nihin cáhān i jeē máá de cúu. Yūcuán na te ni cacahān:

Ndajéhé yā jeē ndító Pedro cúu núu súcuan, achí.

¹⁶ Te víhyá gā cahán Pedro. Yūcuán na te ni canune i yéhyí, te ni canacuni i nuū de, te nahán ní canaa ni i cájito i. ¹⁷ Te máá de ni sáha de ndaha de jeē ma cúvaā gā i, te ni castūhún de ndese ni quenehen máá Jítóho yō de vecāa. Te ni cahān de:

Castūhun núū Jacobo jín núū tāca gá hermano jeē ní quenehen ya ruhū vecāa, achí de.

Te ni quenda de cuahān de inga lugar.

¹⁸ Te nuū ní cundijin, te ni cacuvaā teyí soldado jeē tuá Pedro. ¹⁹ Te ni ndacu Herodes jniñu jeē na nánducú váha i Pedro.

Te tu ní cánanihīn i de, te nuū ní cuu ni stichí de soldado jijnáhan, te ni ndacu de jniñu jeē na cúu. Yūcuán na te ni quenda Herodes Judea cuahān de ñuu Cesarea, te ni condee de yūcuán.

Jeē ni jhī Herodes

²⁰ Te yōhyo ni quitī ni rey Herodes nuū ñáyuu ñuu Tiro jín ñuu Sidón. Te ñayuu un ní candajnūhún i jeē inuú-ni quivicoo ndihi i nuū rey un. Te ni casáha i amigo i jín Blasto, tēe cújéhnū jéjníñu nuū rey un. Te ni cacahān ndahú i jín de jeē na cáhān ndahú de jín rey un jéē na ndéē ni de jín i. Chi nde ñuu maá rey un cájeen i jeē cáyeji i. ²¹ Te ni jeni Herodes in quiví. Te ni nucūhun de sahma yíñúhún de, te ni cucōo de mesa nuū ndacu de jniñu, te ni cahān de in jnūhun jehū ni cajini sōho i. ²² Te ñayuu un ní caquejéé i cacahān jee i jnūhun yíñúhún jín de:

Nasūu tēe-ni cúu ní, chi in yaā cúu ní, achí i jijnáhan i.

²³ Te máá hora un ní sáha-ni in ndajéhé máá Jítóho yō jeē ní jni in cuehyí xeēn rey Herodes, te ni cayejí tīndācú de, te ni jihī de, chi ni sandúxí-ni de máá de te tu ní cáhān de jeē Yaā Dios cúu jeē cújéhnū.

²⁴ Te ni jitē gā jnūhun máá Jítóho yō, te cuehē ndasí ñáyuu ni cacandíje i tācá-ni lugar.

²⁵ Te ni jīnu jniñu jeē ní quindecā Bernabé jín Saulo jeē cótecu ñáyuu Judea. Te ni quendacoo de Jerusalén cuanungoo de Antioquía, te cándēca de Juan jeē suni nání de Marcos cuahān jín de.

Jeē ní caquejéé Bernabé jín Saulo caca cuu de nacani de jnūhun ya

13

¹ Te mēhñu grupo ñayuu cácandíje ini ñuu Antioquía ni cahīyo tēe cástéén jín tēe cánacani jnūhun Yaā Dios, te cánani de Bernabé, Simón jeē suni nání de Negro, Lucio ñuu Cirene, Saulo, jín Manaén tēe ni jehnu jín inga Herodes jeē ní cuu gobernador Galilea. ² Te in quiví jeē cáhīyo ndite ni tēe yáha cáchiñúhún de nuū máá Jítóho yō, te ni cahān máá Espiritu Santo jín de:

Cúni rī jeē sasīn ró Bernabé jín Saulo na quingoo de jniñu jeē ní jeni ri de, achí yá.

³ Yūcuán na te ni cajicān tahú ndite ni de, te ni casoó de ndaha de xinī Bernabé jíin Saulo, te súcuan ni catajǐ de ndindúú tée ún cuanacani de jnūhun nuū tāca ñáyuu.

Jeē ní canacani Bernabé jíin Saulo jnūhun ya nde Chipre

⁴ Te ni sáha Espíritu Santo jeē íchi ñúú Seleucia cuango de. Te yūcuan ní quivícoo de ñn barco cuango de nde Chipre, ñuhun jeē íne sín nuū ndúte. ⁵ Te ni jinūcoo de ñuu Salamina nuū cájecuiñī barco, te ni canacani de jnūhun Yaā Dios ini tācá vehe íi sinagoga jnáhan hebreo de. Te suni cuahān Juan chindéé ñáhán jíin de. ⁶ Te ni cajica nuu de ná-ni Chipre nde ni jinūcoo de ñuu Pafos jeē suni íne nuū Chipre. Te yūcuan ní cajini de nuū ñn tēe hebreo nání Barjesús. Te tēe tásí cúu de, te cáhán stahú de jeē ñn tēe nácani jnūhun Yaā Dios cúu de. ⁷ Te tēe tásí un jéjníñu de nuū gobernador Sergio Paulo, te tēe ndíchí cúu gobernador ún. Te ni cana de Bernabé jíin Saulo jeē cúni nahín de jnūhun Yaā Dios. ⁸ Te tēe tásí un suni nání de Elimas. Te ndúcú ndéyí de casi de jeē ma cándíje gobernador ún. ⁹ Te Saulo jeē suni nání de Pablo, ni cunuú Espíritu Santo jíin de, te ni ndacoto vāha de nuū tēe tásí un. ¹⁰ Te ni cahān de:

Tēe sáha jniñu néé stahú ñáhán cúu ró, chí sēhe jexeén cúu ró te jési rō nuū tācá jniñu ndaā. Te tu jécuiñī rō jeē sáca núu ró síquī jnūhun ndaā maá Jítóho yō návāha ma cándíje ñayuu nuū yā. ¹¹ Te maá Jítóho yō stóho ya rohó vijna, te cucuáá ró jeē ma cóto ga rō niāndii jecu quiví, achí Pablo.

Te ni cunee-ni nuū tēe tásí un, te quéndāha quéhiyú de cuahān de ndúcú de ndé vé jnā ndaha de stéén ichi nuū de quinhun de. ¹² Yūcuán na te ni jini gobernador jeē súcuan ni cuu, te ni cándíje de jnūhun maá Jítóho yō, te náā ni de jini sōho de jnūhun ya.

Jeē ní coyūcu Pablo jíin Bernabé Antioquía ndañúú Pisidia

¹³ Yūcuán na te ni quendacoo Pablo jíin Bernabé jíin Juan ñuu Pafos, te ni quivícoo de barco te cuango de ñuu Perge ndañúú Panfilia. Te yūcuan ní cusín Juan, te cuanuhun de ñuu Jerusalén. ¹⁴ Te ni

quendacoo Pablo jíin Bernabé ñuu Perge cuango de, te ni jinūcoo de ñuu Antioquía ndañúú Pisidia. Te quiví ndétātu ní quivícoo de ini vehe íi sinagoga, te ni cacucōo de. ¹⁵ Te ni cahu tutu ley yā jíin tutu ní catee tēe ni canacani jnūhun ya nde jenahán. Yūcuán na te tēe cácujeñnu ini vehe íi sinagoga, vii-ni ni catajǐ de tēe cahān jíin Pablo jíin Bernabé:

Amigo, núu íyó jnūhun cahān ni jéē stihví ni ni ñáyuu yáha, te cahān ní na cúni nahín i núu súcuan, achí de.

¹⁶ Yūcuán na te ni ndocuñī Pablo te ni sáha de seña jíin ndaha de jeē nahín-ni coo ñayuu ún, te ni cahān de:

Níhín jnáhan ñuu yō Israel jíin níhín tēe jeē suni cáchiñúhún ní Yaā Dios, cuni nahín ní jijnáhan ní. ¹⁷ Máá Yāā Dios yohó ñáyuu Israel, ni nacāji ya jíi yō jijnáhan de. Te níni jéē cáyūcu tátú de ñuu Egipto, te ni sáha ya jeē ní nducuehē de. Yūcuán na te jíin poder maá yá ni quenehen ya de nación Egipto. ¹⁸ Te uū xico cuiyā ni cajica de nuū ñuhun téhé, te ni jendeyí ni yā jíin de jeē ní castíví de. ¹⁹ Te ni snāā yā uxā nación Canaán, te ni jēhe ya ñuhun un núu tāca jíi yō cúu tahū de. ²⁰ Yūcuán na te ni jeni ya tāca tēe ni candacu jniñu nuū de nájnūhun cuñn ciento uū xico uxí cuiyā, nde quiví ní cotecu Samuel, tēe ni nacani jnūhun ya. ²¹ Yūcuán na te maá ñáyuu un ní cajicān i ñn rey, te ni jeni Yaā Dios Saúl ni ndacu de jniñu nuū i uū xico cuiyā. Te yucūn Benjamín sēhe Cis ni cuu Saúl. ²² Te ni quenehen ya jniñu Saúl, te ni jeni ya David ni cuu de rey nuū i. Te ni cahān cají yá jnūhun de: Cúsī ni rī jíin David sēhe Isaí, chí sáha de tāca jéē cuní rī, achí yá.

²³ Te cáhán gā Pablo:

Te sēhe yucūn David ni cacu Jesús, Yaā ní jeni Yaā Dios jeē jnáma ya yohó ñáyuu Israel, chí súcuan ni jejnūhun ya. ²⁴ Te nde ná tu quejéé Jesús nacani ya jnūhun nuū ñáyuu, te ni nacani Juan jnūhun nuū tāca jnáhan ñuu yō Israel jeē na nácani ni i jeē stóo i cuēchi i, te cuandute i. ²⁵ Te nuū cuácuyajni jeē cúu Juan, te ni cahān de: Cándētu ró jéē quíji Cristo, te jeni ni rō jeē ruhū cúu, te nasūu rí cúu. Chí quíji ya, te

cújéhnū ndasí yá jeē ni ndijēn yā tu cújéhnū ri tava rī, achí de.

²⁶ 'Amigo jijnáhan ní, tāca níhín jéē cácuu yó séhe yucūn Abraham jíin táca níhín jéē suni cándiso iyo ní núū Yaā Dios, chi cúní Yaā Dios jeē na cúní yō jnūhun yáha jeē cáhán ndese jnáma ya yohó. ²⁷ Chi tāca ñáyuu ñuu Jerusalén jíin táca téē cácujehnū nuū i, tu ní cájecūhun ni i jeē Jesús cúu Cristo, Yaā ní jeni Yaā Dios jeē jnáma ya yohó. Te ndijnahan quivī ndétātu ní cajini sōho i jnūhun ni cacahu jeē ní catee tēe ni canacani jnūhun Yaā Dios nde jenahán. Te vēsú súcuan te tu ní cájecūhun ni i, te ni candonda i ni cacahán i jeē na cúū yā. Te súcuan ni casquícu i siquī tāca jnūhun jeē ní cacahán tēe ni canacani jnūhun ya nde jenahán. ²⁸ Vēsú tu ní cánihín i ni ñin cuēchi siquī yā jeē cúū yā, te ni cacahán níhin i jíin Pilato jeē na cúū yā. ²⁹ Te ná ni jīnu ni squícu siquī yā tāca jnūhun cáhán nuū tútu iī, te ni casnúu de ya jicā cruz, te ni cachindūji de ya ñin yaū ní jete jicā cáva. ³⁰ Te ni sáha Yaā Dios jeē ní natecu yā. ³¹ Te ñayuu Galilea jeē ni jéngoo jíin yá nde Jerusalén nde na técu yā, nuū maá i ni steén ndijin yā maá yá cuehē quivī ná ni natecu yā, te ñayuu un cácuu jeē cánacani cájí jnūhun ya nuū táca gá jnáhan yó hebreo vijna.

³² 'Te máá ná jijnáhan ná cánacani ná jnūhun vāha yáha núū ni jíin náhan ní jéē súcuan ni jejnūhun ya nuū tāca jíí yō. ³³ Te jnūhun yáha ní squícu Yaā Dios nuū maá yó jeē cácuu yó séhe yucūn de, chi ni nastécu yā Jesús. Chi suhva cáhán salmo uū jeē cahán yā jíin Séhe ya Jesús: Máá ró cúu Sēhe ri, te vijna ni sajehnū ri rohó jéē cúu ri Tatá rō, achí yá. ³⁴ Te ni nastécu yā Sēhe ya Jesús návāha ma tehyú cuiti yā, chi suhva cáhán tutu iī jeē ní cáhán Yaā Dios nde jenahán: Te níhín maá ró tāca jéē váha ni jejnūhun ri nuū David, achí. ³⁵ Te suni súcuan cáhán inga salmo jeē ní tee David jnūhun jeē cahán Jesús jíin Yáā Dios: Ma cuáha ní jnūhun tehyū ná, chi jéjníñu ná núū ní te manī ni jíin ná, achí. ³⁶ Te David chi jíin yō jeē ní jejníñu de nuū ñáyuu ní cotecu de jíin, nájnūhun ni cuni Yaā Dios. Te ni jihī de, te ni quindūji de nájnūhun ni quindūji tāca jíí yō, te ni tehyú de. ³⁷ Te Jesús, Yaā

ní nastécu Yaā Dios, chi tu ní téhyú cuiti yā. ³⁸ Jeē yúcuan jíin níñhún jecūhun ni ní, amigo, jeē Jesús cúu Yaā cóne cáhnu ni nuū tāca cuéchi yó. ³⁹ Chi ni canducú ní ndahva ni cuéchi ní jéē squícu ní ley jeē ni jéhe ya nuū Moisés, te tu ní cúu ndahvā cuéchi ní súcuan. Te Jesús cúu Yaā ndahva ndihī cuéchi ñayuu jeē cácandíje i tāca jéē ni sáha ya jehē i. ⁴⁰ Núu súcuan te coto ní jíin náhan ní jéē ma ndóho ní táca castigo jeē ní cacahán tēe ni canacani jnūhun Yaā Dios nde jenahán, chi suhva ni cahán Yaā Dios:

⁴¹ Tāca rōhó ñáyuu jeē casacatā, na cóto ró na castigo xeēn quiji siquī rō, te naa ni rō coto ró, te cuu rō. Chi tiempo maá ró te sáha ri jniñu xeēn jeē ma cándíje cuiti rō jeē súcuan sáha ri vēsú nacani ñayuu jnūhun un núū rō, achí yá.

Achí Pablo.

⁴² Te ni quendacoo Pablo jíin táca jnáhan de vehe iī sinagoga jnáhan hebreo de. Te ñayuu sán nación ni cacahán ndahú i jíin de jeē inga quivī ndétátú nacani tucu de jnūhun yáha núū i. ⁴³ Te ni jité ñayuu un cuángoo i. Te cuehē ñayuu hebreo jíin ñáyuu sán nación jeē ní cacandíje sahán hebreo te cáchiñhún i nuū Yaā Dios, cuángoo i jíin Pablo jíin Bernabé. Te ni cacahán níhin de jíin i jeē na cuíñi níhin i jíin jnūhun jeē maní Yaā Dios jíin i.

⁴⁴ Te quivī ndétátú inga semana te je yajni ndihī ñayuu ñuu un ní candutútú i jeē cúní nahín i jnūhun Yaā Dios. ⁴⁵ Te nuū ní cajini tēe hebreo jeē ní candutútú cuehē ñayuu, te ni cacucuésún ni de, te ni cacahán de jeē násūu jnūhun vāha cúu jeē steén Pablo, te ni cacahán neé de nuū Pablo. ⁴⁶ Yūcuán na te jéhnū-ni ni cacahán Pablo jíin Bernabé, achí de:

Cánuú jéē xíhna gā nuū maá ní jeē cácuu ní jnáhan ñuu yō hebreo nacani ná jnūhun Yaā Dios, te tu ní cájetáhú ní. Núu súcuan te cuéchi máá ní cúu jeē ma níhín tahú ni cotecu ni ní cáni. Te vijna te quinacani ná jnūhun ya nuū ñáyuu táca nación jeē tu cajini i jnūhun ya. ⁴⁷ Chi suhva ni ndacu máá Jítoho yō jniñu nuū na jíin náhan ná: Ni jeni ri rohó jéē cúu ró nájnūhun luz jeē steén ini anuá ñayuu táca nación,

chi ní ñáyiví stéén rō jnūhun ri nuū ñáyuu
jeē jnáma ri i, áchí yá.

Achí de.

⁴⁸ Te ñayuu sñn nación, nuū ní cajini sōho i jnūhun yáha te ni cacusiñ teyí ni i. Te ni cacahān i jeē yōhyo vāha jnūhun cúu jnūhun máá Jítóho yō, te tāca ñáyuu jeē ní nacāji Yaā Dios i jeē cótecu i ní cáni, ni cacandíje i.

⁴⁹ Te ni jitē jnūhun máá Jítóho yō cuahān ní región yūcuán. ⁵⁰ Te ñuu Antioquía cáyucú ñahan cácuu nuū te cáchiñúhún ña Yaā Dios. Te tēe hebreo ni cascáhán de ña, te suni ni cascáhán de tēe cácujeñnu ñuu ún, te ni cajito xeēn i Pablo jíin Bernabé te nde ni cascúnu i de cuango de. ⁵¹ Te ni cascóyo de ticachā jehē de jeē steén de jeē iyó cuéchi i. Te ni jinūcoo de ñuu Iconio. ⁵² Te vēsú súcuan te ñayuu cácuandíje un ní cunuú Espíritu Santo jíin i, te cácusñ teyí ni i.

Jeē ní coyūcu Pablo jíin Bernabé ñuu Iconio

14

¹ Te ñuu Iconio ni quivícoo Pablo jíin Bernabé ini vehe i sinagoga jnáhan de hebreo. Te jíin jnúhun jeē ní canacani de te ni cacandíje cuehē jnáhan de hebreo, te suni súcuan cuehē ñayuu sñn nación ni cacandíje i. ² Te jnáhan de hebreo jeē tu ní cácuandíje, ni cascáhán de ñayuu sñn nación, te ni cajeni ni i jeē násūu ñáyuu vāha cácuu ñayuu cácuandíje. ³ Te ni caquendōo Pablo jíin Bernabé yūcuan cuéhē gā quiví. Te jéñnu-ni ni canacani de jnūhun Jítóho yō, chi cácuahnu ni de ya jeē vāha quihñ jniñu un sáha ya. Te máá yá chi ni steén yā jeē iyó ndáa jnūhun jeē yōhyo vāha ni yā jíin i jeē cánacani de, chi ni jēhe ya jeē sáha de jniñu jéñnu jeē steén jeē cujéñnu ya. ⁴ Te ñayuu ñuu un ní cacusñn ni i jíin náhan i, sava i jíin tēe hebreo jeē tu cácuandíje de Jesús, te sava ga i jíin tēe apóstol. ⁵ Te ñayuu hebreo jíin ñáyuu sñn nación jíin tēe cácuu tohō ni casquín náhan jnūhun jeē sáha xeēn jíin Pablo jíin Bernabé, jíin jéē cuáha yuū xiní de núu. ⁶ Te ni cajini de jeē súcuan cácuuni sáha, te ni cajinu de cuango de nde ñuu Listra jíin ñuu Derbe ndañúu Licaonia jíin táca ñuu yajni yūcuán. ⁷ Te yūcuan ní canacani de jnūhun jeē jnáma ya yohó.

Jeē ní cajēhe i yuū xiní Pablo ini ñuu Listra

⁸ Te ñuu Listra néne ñn tēe jeē tu cúu caca, te tu jíca cuiti de chi nde quiví ní cacu de cácójó de. ⁹ Tēe un ní jini sōho de jnūhun jeē cahán Pablo, te ni jito vāha Pablo nuū de, te ni jini de jeē candíje vāha tēe un jéē ndúvāha de. ¹⁰ Te ni cahán jee Pablo jíin de:

Ndocuññ, condichi rō, achí de.

Te ni scánda tēe un máá de ni nucōndichi-ni de, te ni quejéé de caca de. ¹¹ Te ni cajini ñayuu ún jniñu jéñnu jeē ni sáha Pablo, te ni cacahān jee i jíin yuhu máá i jeē cúu yuhu Licaonia:

Ni cuun yaā ni quecoo nuū yō, te cájica nájnūhun cájica tēe, áchí i.

¹² Te ni cacahān i jeē Bernabé cúu yaā Júpiter, te Pablo cúu yaā Mercurio chi Pablo cúu tēe nácani jnūhun. ¹³ Te yajni yuñúu un néne veñūhun yaā Júpiter. Te máá sūtū jeñniñu ini veñūhun un ní quihñ de stiquí jijnáhan ti te ni scutú de ti ita te vēji de nde nuū quiví i yuñúu, te máá de jíin ñáyuu ñuu un cácuuni de cahni de stiquí un sócō de nuū Bernabé jíin Pablo nuú. ¹⁴ Te Bernabé jíin Pablo, tēe cácuu apóstol, ni cajito de jeē súcuan cácuuni ñayuu un sáha i, te ni candatá de sahna de jeē steén de jeē castíví ndasí i jeē casáha i súcuan. Te ni quenendava de ni quivícoo de mēñū ñáyuu cuehē ún, te ni cacana jee de:

¹⁵ Tátā jijnáhan ní, ma sáha cuiti ni súcuan, chi sáñá suni tēe-ni cácuu ná nájnūhun máá ní jíin náhan ní. Te vējicoo ná nacani ná jnúhun vāha Yaā Dios nuū ní, chi cahán na jíin ní jeē ma sáha ga ni táca jniñu yáha jéē tu ndé jéñniñu cuiti, chi sa suhva na chíñúhún ní máá Yáa Dios, Yaā técu, Yaā ni sáha andiví jíin ñáyiví jíin ndute mar jíin táca gá jeē iyó ní cáhnu. ¹⁶ Te nde jenahán ní jēhe ya jnūhun jeē na sáha táca ñáyuu modo cácuuni máá i. ¹⁷ Te vēsú súcuan te ní ní stéén yā ndese Yaā cúu ya, chi máni sáha ya jniñu vāha jíin yó, chi scúun ya saū, te sáha ya jeē cúu vāha itu yō, te jēhe ya jeē jini ñúhún yó návāha caji yō te coo sñn ni yō, achí ndindúu de.

¹⁸ Te vēsú súcuan ni cacahān de, te yōhyo uhū ni cajesí de nuū ñáyuu un návāha tú socō i stiquí un núu de jeē chíñúhún i ndindúu de.

¹⁹ Yūcuán na te ni quecoo jecu tē hebreo ñuu Antioquía jiín ñuu Iconio, te ni cascáhán de ñayuu cuehē ún, te ni cajēhe i yuū xinī Pablo. Te ni caquenehen i de yatā ñūú ún, chi ni cajeni ni i jeē jé ni jihī de.

²⁰ Te tē cācandíje ni cacondúu de Pablo, te ni ndonda Pablo, te ni ndīvi de ini ñuu. Te inga quivī ni quihin de ichi cuahān de jiín Bernabé nde ñuu Derbe.

²¹ Te ini ñuu un ní canacani de jnūhun jeē jnáma ya ñayuu, te ni cacandíje cuehē ñayuu ni casáha de. Te ni canandicó de cuanuhun de ñuu Listra jiín ñuu Iconio jiín ñuu Antioquía. ²² Te ni cahije ga ni ñayuu cācandíje yūcuan ní casáha de. Te ni castíhvī ni de i jeē na cuñi nīhin i jiín jnúhun ya, chi ni cacahān de jeē niní quiji cuehē jnūndóho siquī yō te yūcuán na te jinū yō ñuu nuū ndácu Yaā Dios jniñu. ²³ Te tācá ñuu ni cajeni de tē jéhu cāndiso jniñu condito de ñayuu cācandíje. Te ni cahīyo ndite ni Pablo jiín Bernabé nuū yā, te ni cajicān tahu de, te ni cacahān de jiín máá Jítoho yō jeē na cóto ya ñayuu ún chi cācandíje i máá yá.

Jeē cuánuhun tucu Pablo jiín Bernabé ñuu Antioquía ndañúú Siria

²⁴ Te ni cayāha de cuango de región Pisidia, te ni najinūcoo de región Panfilia. ²⁵ Te ni canacani de jnūhun ya ini ñuu Perge región Panfilia, te sáa te cuango de ñuu Atalia. ²⁶ Te yūcuan ní quivīcoo de barco, te ni najinūcoo de ñuu Antioquía. Te ñuu yūcuan cúu nuū ní cajicān tahu ñayuu nuū Yaā Dios jehē de jeē na chíndéé ñáhán yá de jeē quíngoo de nacani de jnūhun. Te ni jīnu jniñu, te ni najinūcoo de ñuu ún. ²⁷ Te nuū ní najinūcoo de yūcuán, te ni casáha de junta jiín ñayuu cācandíje, te ni canacani de jnūhun tācá ndese cuehē jeē váha ni sáha Yaā Dios jiín de, chi ni jēhe ya jnūhun jeē suni candíje ñayuu tācá nación jeē tu ní cájini i jnūhun ya. ²⁸ Te ni caquendōo de yūcuan cuéhē quivī jiín ñayuu cācandíje.

Siquī junta ñuu Jerusalén

15

¹ Yūcuán na te jecu tē Judea ni quijicoo de ñuu Antioquía, te ni castéén de nuū tācá hermano jeē núu tu sáha i circuncidar, nájnūhun cáhán ley jeē ni jēhe ya nuū

Moisés, te tú na modo cācu i. ² Te Pablo jiín Bernabé ni catejnáhan de jiín tēe ún, te tu ní cūndaā. Te jeē yūcuan ní candajnūhún de jeē quíngoo Pablo jiín Bernabé jiín jecu gā tē cācandíje un ndé ñuu Jerusalén, te yūcuán ndajnūhún de siquī jnúhun yáha jiín tēe cācuu apóstol jiín tēe jéhu cāndiso jniñu nuū ñayuu cācandíje yūcuán.

³ Te ñayuu cācandíje un ní canachuhun íchí i de. Te ni cayāha de ichi Fenicia jiín Samaria, te canacani de jnūhun jeē suni ñayuu tāca gá nación jeē tu ní cájini i jnūhun ya, ni castóo i jniñu jeē tu íyó ndāā te ni cacandíje i Yaā Dios. Te yōhyo ni cacusī ni tācá hermano jeē ní canihīn de jnūhun jeē súcuan ni cacandíje ñayuu ún.

⁴ Te ni najinūcoo de ñuu Jerusalén, te ñayuu cācandíje yūcuan jiín tēe apóstol jiín tēe jéhu cāndiso jniñu nuū ñayuu un, ní cacusī ni de jeē ní najinūcoo jnáhan de ún. Te Pablo jiín Bernabé ni canacani de tāca jnúhun ndese cuehē jeē váha ni sáha ya siquī jniñu jeē ní canacani de jnūhun ya. ⁵ Te sava tēe grupo fariseo jeē cācandíje ni candocuñī te ni cacahān:

Ñayuu sīn nación jeē cācandíje i Jesús, jīni ñúhún jēe sáha i circuncidar nájnūhun cásáha máá yó, te cānuú ndacu yó jniñu nuū i jeē na squícu i ley jeē ni jēhe ya nuū Moisés, áchí.

⁶ Te tāca tēe apóstol jiín tāca tēe jéhu cāndiso jniñu nuū ñayuu cācandíje, ni candutútú de junta návāha ndajnūhún de te sándaā de siquī jnúhun yáha. ⁷ Te tācá de ni cacahān de ndese cájini ni de. Yūcuán na te ni ndocuñī Pedro, te ni cahān de:

Hermano jijnáhan ní, je cájini vāha ni jēe je íyó tiempo jeē ní nacāji Yaā Dios sāña jēe quihín na núu ñayuu sīn nación te nacani ná jnúhun nuū i jeē jnáma ya i, návāha candíje i Jesucristo. ⁸ Te Yaā Dios chi jíní yā ndese cāa ánuá ndihī ñayuu, te ni steén yā jeē jetáhú yá i, chi suni ni jēhe ya Espíritu Santo nuū i jijnáhan i, nájnūhun ni jēhe ya nuū maá yó. ⁹ Te inuú-ni sáha ya jiín yó jiín máá i, chi siquī jeē suni ni cacandíje i jnūhun jeē jnáma ya i, te jeē yūcuan ní sándoo ya anuá i nuū tāca cuéchi i. ¹⁰ Te vijna ¿naun cācuni ní ndacu ní jniñu jeē na squícu i ley un? Chi tu nújnahan ni Yaā Dios

jeē súcuan. Chi cáculi ní tee ní jniñu yí yáha síquī ñáyuu cáculíje ún, te ní táca jí yō tu ní cáculdeyí de síquí de, te ní máá yó. ¹¹ Chi sa suhva cáculíje yó jēē jnáma ya yohó súcuan-ni síquī jeē yóhyo vāha ni máá Jítoho yō Jesús jíin yó, te suni súcuan-ni jnáma ya máá i, nasūu síquī jeē síquí i ley un, áchí de.

¹² Yūcuán na te tēe cuehē un ní cacuu nayúu de, te ní cajini nahín de jnūhun cácahān Bernabé jíin Pablo. Chi ní castūhún de jeē ní jéhe ya poder jeē ní casáha de táca jniñu jéhu jeē steén jeē cujéhu ya, ní cajito ñáyuu táca nación jeē tu cájini i jnūhun ya. ¹³ Te nuū ní jínu ní cacahān Pablo jíin Bernabé, te ní cahān Jacobo:

Hermano jíināhan ní, cuni sōho ní na cáhān na. ¹⁴ Ni nacani Simón Pedro jnūhun ndese ní quejéé nuú jniñu jeē jnáma Yaā Dios ñáyuu táca nación jeē tu cájini i jnūhun ya, chí suni mēhñu máá i nácāji ya ñáyuu jeē ndúu i ñáyuu máá yá. ¹⁵ Te quíjñāhan jnūhun ní cahān de yāha jíin jnúhun ní catee tēe ní canacani jnūhun Yaā Dios nde jenahán jeē yosó núu tútu íi:

¹⁶ Achí Yáā Dios:

Nájñūhun ní cotúu vehe David cúu jeē tuá ndácu sēhe yucūn de jniñu, nájñūhun ní ndacu máá de jniñu nde jenahán.

Te ñn quiví te ndee rí

te jeē nasáha rí vehe de cúu jeē sáha rí jeē nandacu Sēhe yucūn de jniñu.

¹⁷ Súcuan sáha rí návāha táca gá ñáyuu na nánducú i ruhū nde jíin ñáyuu táca nación jeē tu cájini jnūhun rí, táca i jeē cána rí i candíje i ruhū.

¹⁸ Súcuan cáhān máá Jítoho yō, te nde jenahán ní steén yā jnūhun yáha núu ñáyuu.

Achí tutu íi.

¹⁹ Jeē yúcuán jéni ní na jéē ñáyuu táca gá nación jeē ní castóo i jniñu jeē tu íyó ndáa te ní cacandíje i máá Yáā Dios, ma stáhān yō i jeē ndácu yó jniñu jeē síquí i ley Moisés.

²⁰ Chi sa suhva na tēe yó carta quihín nuū i jeē ma cáji i ndeyu jeē ní sócō nuū ídolo, te ma cáca jnéni i, te ma cáji i cūñu quiti jeē jihí jeē tu jéti ñíñi tī, te ní ma cáji i ñíñi. ²¹ Jnūhun

yáha-ni tee yó quihín nuū i nájñūhun je cástéén nde jenahán. Chi nde jenahán je íyó tēe cástéén jnūhun ley jeē ní jéhe ya nuū Moisés, te ndijnahan quiví ndétātu cácahu de ley un ini vehe íi sinagoga táca ñuu, áchí Jacobo.

²² Yūcuán na te tēe apóstol, jíin tēe jéhu cándiso jniñu, jíin ndivíi ñáyuu cáculíje, ní cacundaā ní de jeē nácāji de tēe quingoo jíin Pablo jíin Bernabé nde ñuu Antioquía. Te tēe ní canacāji de un cácuu Silas jíin Judas, te inga síhví de cúu Barsabás. Te cándiso jniñu de nuū táca hermano cáculíje. ²³ Te ní cajendēca de carta jeē cahán suhva:

Máá ná cácuu tēe apóstol, jíin táca tēe jéhu cándiso jniñu nuū ñáyuu cáculíje, jíin táca gá hermano yō. Te cátee ná carta yáha cuájeē nuū ní jíināhan ní, hermano, jeē cácuu ní ñáyuu sñn nación jeē cáyūcu ní ñuu Antioquía jíin Siria jíin Cilicia. Cuandeyí ní ní jíināhan ní. ²⁴ Ni cajini jnūhun ná jéē ní quendacoo sava jnáhan ná yáha ní jengoo nuū ní, te jíin jnúhun jeē ní cacahān de te ní casáha jeē ní canacani ndasí ní ní, te ní cacuxí ní ní, chí cándacu de jniñu jeē sáha ní circuncidar jíin jéē síquí ní jniñu cáhān ley jenahán jéē ní jéhe ya nuū Moisés. Te nasūu sáña ní cátají tēe un jéē jeé de nuū ní.

²⁵ Jeē yúcuán ní cajeni ní ná, te ñnuú-ni ní cacundaā ní ná, te ní nacāji ná tēe cuajēcoo nuū ní jíin úu hermano yō jeē maní yō jíin, cúu Bernabé jíin Pablo. ²⁶ Te ndindúu de je ní catana de máá de nuū jnúndóho vésú na cúu de jeē síquí jnūhun Jítoho yō Jesucristo.

²⁷ Núu súcuan te cátají ná Judas jíin Silas jeē nuū ní, te suni nájñūhun cáhān carta yáha suni súcuan castūhún de nuū ní jíināhan ní.

²⁸ Chi máá Espíritu Santo ní steén yā ñn modo jeē ní cacundaā ní na jéē ma tēe ná táca jniñu yí ley Moisés síquí ní, chí máá-ni jniñu yáha jéē cánuú gá: ²⁹ Ma cáji ní táca jéē ní casocō nuū ídolo, ní ma cáji ní ñíñi ní quiti jeē jihí jeē tu jéti ñíñi tī, te ma cáca jnéni ní. Te vāha síquí ní núu tuá sáha ní táca jéē yáha. Súcuan na cóo te sándeeyí ní ní, áchí carta.

³⁰ Yūcuán na te tēe quingoo un cuángoo de nde ñuu Antioquía. Te ní cacana de xiní ñáyuu cáculíje ní candutútú de junta, te ní cajéhe de carta un núu i. ³¹ Te ní

cacahu i, te ni candusī ni i jeē ni nīhīn i jnūhun ndeyí ni nuū carta ún. ³² Te suni tēe cánacani jnūhun Yaā Dios cácuu Judas jíin Silas, te jíin cuéhē jnūhun ni cacahān de te ni candundeyí ni tācá hermano un, te ni cahije ga ni i jíin jnūhun ya. ³³ Te ni coyūcú de yūcuán jecu quivī. Yūcuán na te hermano yúcuan ní canacuatáhú i nuū de jeē quinuhan de nuū tēe jeē ní catají de. ³⁴ Te Silas ni nujnahan ni de ni quendōo de yūcuán. ³⁵ Te suni ni caquendōo Pablo jíin Bernabé ñuu Antioquía, te máá de jíin sava ga tēe ni castéén de te ni canacani de jnūhun vāha máá Jítóho yō.

Jeē quihín Pablo inga jínu nacani de jnūhun ya

³⁶ Te ni cuu ga quivī, te ni cahān Pablo jíin Bernabé:

Vijna te na quícondēhe yó tācá hermano yō ndijnahan ñuu nuū ní nacani yó jnūhun máá Jítóho yō, na cóndēhe yó ndese cáhīyo i, áchí de.

³⁷ Te Juan jeē suni nání de Marcos, cúní Bernabé jeē quihín tēe un jíin de. ³⁸ Te tu ní cúní Pablo jeē quihín tēe un jíin de, chi nde Panfilia ni cusīn Marcos nuū Pablo jíin Bernabé, chi tuá ni chindéé ñáhán de ndindúú tēe un síquī jníñu ya nde saá. ³⁹ Te nahán ní candajnūhun Pablo jíin Bernabé, te tu ní cácuandaā ni de síquī Marcos, te ni cacusīn de. Te Bernabé ní jeca de Marcos, te ni quivīcoo de barco cuango de nde Chipre, ñuhun jeē íne sīn nuū ndúte. ⁴⁰ Te Pablo ni nacāji de Silas quihín jíin de. Te tācá hermano cáandije ni cajicān tahu de nuū máá Jítóho yō jeē síquī jeē vāha ni yā te na chindéé ñáhán yá Pablo. Te cuahān Silas jíin Pablo. ⁴¹ Te ni cajica cuu de ní Siria jíin Cilicia. Te tāca grupo ñayuu cáandije ni cahije ga ni i jíin jnūhun ya ni casáha de.

Jeē cuahán Timoteo jíin Pablo jíin Silas

16

¹ Yūcuán na te saá te ni jinū Pablo jíin Silas ñuu Derbe jíin ñuu Listra. Te yūcuan néne in tēe suchí cándije, nání i Timoteo. Sēhe yí in ñahan hebrea cúu i, te ñahan cándije cúu ña. Te tátá i chi tēe griego cúu de. ² Te tācá hermano ñuu Listra jíin ñuu Iconio cájehnūhún de Timoteo. ³ Te

cúní Pablo condeca de Timoteo quihín de jíin i. Te ni cahān Pablo jeē quihín i cuu i circuncidar, chi tu cúní Pablo jeē cahān ñayuu hebreo jeē tu ní squícu Timoteo costumbre un, chi ndihí ñayuu cájini i jeē tēe griego cúu tátá i. ⁴ Te tācá ñuu nuū cuángoo de te ni cacastūhún de nuū ñayuu cáandije jeē na squícu i máá jniñu jeē ní casándaā tēe apóstol jíin táca tēe jéhu cáyūcú ñuu Jerusalén jeē cándiso jniñu nuū ñayuu cáandije. ⁵ Te ñayuu cáandije ni cahije ga ni i. Te ndijnahan quivī ni cáandije cuehē gā ñayuu.

Jeē ní jito ndijin Pablo in tēe ñuu Macedonia

⁶ Te tu ní jéhe Espíritu Santo yā jnūhun jeē nácani de jnūhun ya ní Asia. Jeē yúcuan ní cayāha de ichi Frigia jíin Galacia cuango de. ⁷ Te ni jinūcoo de nuū quijnáhan Misia jíin Bitinia. Te cácuu de quingoo de Bitinia, te máá Espíritu Jesús tu ní jéhe ya jnūhun quingoo de. ⁸ Te ni cayāha de in lado Misia cuango de ñuu Troas jeē íne yajni yumar. ⁹ Te in jecuáa te nájnūhun in jēni ni jito ndijin Pablo, te ni jito de jeē índichi in tēe ñuu Macedonia nuū de cáhán ndahú jíin de: Nehen ní ñuu ná Macedonia te chindéé ñáhán ní sāña jíjnáhan ná, áchí. ¹⁰ Te súcuan ni jito ndijin de. Yūcuán na te sāña, Lucas, ni quijnáhan ná jíin de. Te ni casátūhva ná jíin de jíjnáhan de jeē quingoo ná Macedonia, chi ni cajini cají ná jeē maá Yāā Dios tájí yá sāña jíjnáhan ná jéē castūhun ná nuū ñayuu yūcuan jnūhun jnama ya i.

Jeē ní coyūcu Pablo jíin Silas ñuu Filipos

¹¹ Te jíin barco ni quendacoo ná ñuu Troas, te cuango ndaā-ni ná ndé Samotracia, ñuhun jeē íne sīn nuū ndúte. Te inga quivī ni jinūcoo ná ñuu Neápolis. ¹² Te yūcuan ní quendacoo ná, te ni jinūcoo ná ñuu Filipos jeē cúu ñuu cujéhu ga íne Macedonia, chi máá ñayuu ñuu Roma ni casáha i ñuu i ún. Te ni coyūcu ná ñuu Filipos jecu quivī. ¹³ Te in quivī ndétātu ní quendacoo ná ñuu ún, te ni jengoo ná in yuyúte, chi yūcuan cúu in lugar nuū cájicān tahu ñayuu. Te ni cacucōo ná, te ni canacani ná jnūhun ya nuū tācá ñahan ní canataca yūcuán. ¹⁴ Te in ña nání Lidia jeē véji ña ñuu Tiatira, xico ña sahma ndihí jéē yáhu ga ndeé. Te máá

ña níni chíñúhún ña Yaā Dios. Te ni jini sōho ña jñūhun cáncani ná, te máá Jítóho yō Jesús ni sáha ya jeē ní candíje ña jñūhun jnáma ya ña jeē ni cáhān Pablo. ¹⁵ Te ni jendute ña nde jíin ñáyuu cáyūcú vehe ña, te ni cahān ndahú ña jíin ná:

Núu cáucáhnu ni ni jéē candíje ndije ná máá Jítóho yō, te cuajeē ní coyūcu ní vehe ná, áchí ña.

Te ni cana fuerza ña sãña jíjnáhan ná.

¹⁶ Te ñn quiví te cuango tucu ná suu lugar nuū jéngoo ñayuu cájicān tahu. Te ni canajnáhan ná jíin ñn sūchi sñhí jéē ñúhun tachí ini i, te máá un sáha jeē cahán i táca ndese coo te cúndaā jeē cahán i. Te sūchí un ní cajeen patrón i, návāha nihīn de cuehē xūhun síquī jeē cástūhún i nuū ñn ñn ñayuu ndese coo ichi núu. ¹⁷ Te sūchí un ndíquín i sãña jíjnáhan ná cána jee i:

Tēe yáha cájejníñu de nuū Yaā Dios, Yaā cujéhnú téyí, te cácastūhún de ndese cácu ní núu cuéchi ní jíjnáhan ní, áchí i.

¹⁸ Te cuehē quiví ni cuu súcuan te nde ni jnaniní ni Pablo. Te ni ndió cóto de nuū i, te ni cahān de jíin táchí ún:

Jíin poder maá Jesucristo ndácu ri jniñu nuū rō jeē na quénda ró ini i quihīn rō, achí de.

Te hora un ní quenda-ni cuahān.

¹⁹ Yūcuán na te ni cajini patrón i jeē ma níhín gā i xūhún cuu de, te jeē yúcuan ní cajni de Pablo jíin Silas cuango jíin de nde vehe juzgado nuū cáyūcu tóhō. ²⁰ Te ni cajeni ún de nuū juez, tēe cásándaā jniñu, te ni cacahān:

Tēe hebreo cácuu tēe yáha, te cástóna de ñayuu ñuu yō cúvaā i. ²¹ Te cájequin de inga costumbre jeē ma cúu cuatáhú cuiti yō, ni ma cúu sáha yó, chí tu jéhe ley nación yō jñūhun, chí ñayuu nación Roma cácuu yó, áchí.

²² Te suni ni candonda ñayuu síquī Pablo jíin Silas. Te tēe cácuu juez ni candacu de jniñu jeē na quénda sahma ndindúú de te caní yujnu síquī de. ²³ Te nuū ni jínu ni cacani téyí un de, te ni casquíví de vecāa. Te ni candacu jniñu nuū tēe ndíto vecāa jeē na cóndito ndasí de jeē ma cácu ndindúú tēe ún. ²⁴ Te jeē súcuan ni tahu jniñu nuū tēe ndíto vecāa te ni squíví de Pablo jíin Silas nde ichi

ini gā, te ni squíví jehē de t̄isin yujnu ndéé yaū te ni cajihni de.

²⁵ Te nuū ní cuu sava ñuu, te cájicān tahu Pablo jíin Silas, te cájita de yaa íi nuū maá Yáa Dios. Te ñayuu cáhīn jíin de vecāa un ní cajini nahín i. ²⁶ Te sanaa-ni te ni jñāa nihin téyí, te nde nuū cimientó vecāa un ní canda. Te ni canune-ni yéhyí vecāa ún, te ni canandajī-ni cadena jeē cánuhñi táca ñáyuu ún. ²⁷ Te ni natahū ni tēe ndíto vecāa, te ni jito de jeē núne yéhyí vecāa ún. Te ni tava de espada jeē cáhni de máá de núu, chí ni jeni ni de jeē ndivii cuiti ñayuu cáhīn vecāa un cuángoo i. ²⁸ Te ni cana jee Pablo:

Ma cáhni ni máá ní, chí cáhīn ndihí ná, áchí de.

²⁹ Yūcuán na te máá tēe ndíto vecāa ni cana de jeē na quíndeca i ñuhūn, te yachí ni quiví de ini vecāa. Te ni jecuiñi yití de nuū Pablo jíin Silas, te quisí i de jeē yūhú de. ³⁰ Te ni quenehen de Pablo jíin Silas, te ni cajnūhún de:

Tátā, ¿na vé cánuú sáha ná te jnama ya sãñá? áchí de.

³¹ Te ni cacahān de jíin tēe ún:

Candíje ní táca jéē ni sáha Jítóho yō Jesucristo jehē ní te cácu ní, te suni súcuan cácu ndihí ñayuu cáyūcú vehe ní, áchí de.

³² Te ni canacani de jñūhun máá Jítóho yō nuū tēe un jíin núu táca ñáyuu cáyūcú vehe de. ³³ Te suu máá jecuaā yúcuan ní nacate tēe ndíto vecāa un núu ní catují Pablo jíin Silas jeē ní cacani yujnu síquī de. Yūcuán na te ni jendute de jíin ndihí ñayuu cáyūcú vehe de. ³⁴ Te ni jeca de Pablo jíin Silas cuahān de jíin vehe de, te ni jēhe de staā ni cayeji de, te cácusñi ni ndihí de vehe de jeē ní cacandíje de Yaā Dios.

³⁵ Te nuū ní cundijin, te tēe cácuu juez ni catají de policía cuango jíin jñūhun jeē na siáá tēe ndíto vecāa un Pablo jíin Silas quingoo de. ³⁶ Te tēe ndíto vecāa un ní castūhún de jñūhun yáha núu Pablo:

Tēe cácuu juez ni catají de jñūhun vēji jeē na siáá na níhín quíngoo ní. Núu súcuan te quendacoo ní quihīn ní, te cuandeyí ni ní, áchí de.

³⁷ Te ni cahān Pablo jíin policía:

Cuehē ñayuu ni cajito i jeē ní cacani de sãñá, te ni tu ní cásándaā de xīhna gā núu ndaā jeē iyó cuéchi ná. Te ni cachuhun

de sãñá vecãa, vēsú cácuu ná séhe nación Roma, te iyó ley jeē ma cúu sãha súcuan jíin ñáyuu cácuu séhe nación Roma. Te vijna ¿á quenehen sãhí de sãña cácuu de naún? Ma cúu cuiti. Na quícoo máá de quenehen de sãña jíjnãhan ná, áchí Pablo.

³⁸ Te ni canandió cóo policia ni castūhún de jnūhun yáha núū tée cácuu juez, te ni cayūhú de jeē ní cajini sōho de jnūhun jeē séhe nación Roma cácuu Pablo jíin Silas.

³⁹ Te ni quecoo tēe cácuu juez ún, te yōhyo ni cacahān ndahú jíin Pablo jíin Silas jeē na cóne cáhnu ni de. Te ni caquenehen de vecãa ún, te ni cacahān ndahú jíin de jeē na quéndacoo de ñuu un quíngoo de. ⁴⁰ Yūcuán na te ni quendacoo de vecãa, te ni jengoo tucu de vehe Lidia, te ni cacahān de jnūhun ndeyí ni jíin táca hermano. Te ni caquihin de ichi cuango de.

Jeē ní cacuvaā ñayuu Tesalónica

17

¹ Te Pablo jíin Silas ni cayāha de ñuu Anfípolis jíin ñuu Apolonia cuango de, te ni jinūcoo de ñuu Tesalónica nuū iyó ñn vehe iī sinagoga jnáhan de hebreo. ² Te ni coyūcú de yūcuan únī semana, te táca quívī ndétātu jéhén Pablo vehe iī sinagoga, nájnūhun sãha sãha de, te ni nacani de jnūhun ya nuū tée un. ³ Te jíin jnúhun cáhán tutu iī ni steén de jeē súcuan ni jini ñúhún ndoho Cristo jeē cúu yā te natecu yā. Te ni cahān de:

Jnūhun nãcani ná núū ni cúu jnūhun Jesús, te máá yá cúu Cristo, Yāá ní jeni Yāá Dios jeē jnáma ya yohó, áchí de.

⁴ Te ni cacandíje sava jnáhan de hebreo jíin cuéhē ñayuu griego jeē cáchiñúhún i Yāá Dios, jíin cuéhē ñahan cácuu nuū, te ni nduu ñnuú ni i jíin Pablo jíin Silas. ⁵ Yūcuán na te yōhyo ni cacucuésún ni jnáhan de hebreo jeē tu cacandíje, te ni castútú tée cunéé jéé cájica cúxí-ni, te ni quejéé cácana ndee cuango. Te súcuan ni casaca núu de xinī ñáyuu ñuu ún. Te ni jengoo de vehe Jasón cãanducú de Pablo jíin Silas jeē jnã de tēe un quíndēca de nuū ñáyuu cuehē. ⁶ Te tu ní cãanahín de, te ni cañuhun de Jasón jíin sava ga hermano cuango de jíin núū tohó ñuu ún. Te jeē siquí Pablo jíin Silas ni cacana jee de:

Tēe jeē castívi xinī ñáyuu ní ñáyiví, je ni quecoo de nde yāhá. ⁷ Te máá Jasón ni jēhe núu vehe cáyūcu tée ún. Te tēe ún tu cájetáhú de ley máá rey yohó ñáyuu Roma, chi sa suhva cácahān de jeē cájetáhú de nuū inga rey jeē naní Jesús, achí de jíjnãhan de.

⁸ Te ñayuu jíin tée cácuu tohó ni cajini sōho i jnūhun yáha, te ni cacuvaā i siquí.

⁹ Te Jasón jíin táca gá hermano ni castóo de xūhún de, chi ni cacahān tohó un jíin de jeē nde núu tají de Pablo jíin Silas quíngoo de inga ñuu, yūcuán na te nacuāha tohó un xūhun de. Te súcuan te ni casiáá de Jasón jíin táca gá hermano cuango de.

Jeē ní coyūcu Pablo jíin Silas ñuu Berea

¹⁰ Yūcuán na te tãcá hermano un, yachí-ni ni cascáca de Pablo jíin Silas jecuáá un, cuángoo de nde ñuu Berea. Te nuū ni jínūcoo de yūcuán, te ni quívicoo de vehe iī sinagoga jnáhan ñuu de hebreo.

¹¹ Te jnáhan ñuu de hebreo cáyūcu yūcuan, vāha ga ni máá de vēsú jnáhan ñuu de hebreo cáyūcú ñuu Tesalónica, chi vāha ni cacusī ni de jíin jnúhun ni cacahān Pablo jíin Silas. Te ndijnahan quívī cãanducú yúcún de nuū tutu iī núu súcuan cáhán chí tuú. ¹² Jeē yūcuan ní cacandíje cuehē jnáhan ñuu de hebreo te suni nde jíin cuéhē ñayuu griego, cúu tēe cúu ñahan cácuu nuū.

¹³ Te jnáhan ñuu de hebreo cáyūcú ñuu Tesalónica ni cajini jnūhun de jeē suni nde ñuu Berea nãcani Pablo jnūhun Yāá Dios, te ni caquihin de ichi cuango de Berea, te suni yūcuan ní castóna de ñayuu siquí Pablo. ¹⁴ Yūcuán na te tãcá hermano ni catajī-ni de Pablo cuahān de nde yumar. Te ni ndōo Silas jíin Timoteo ñuu Berea. ¹⁵ Te jecu hermano ni cajendēca de Pablo nde ñuu Atenas. Te ni cahān Pablo jíin de jeē cahān de jíin Silas jíin Timoteo jeē na quíngoo yachí de nuū Pablo. Te vendicoo de ñuu Berea.

Jeē ni íne Pablo ñuu Atenas

¹⁶ Te níní ndétu Pablo jeē jinúcoo Silas jíin Timoteo nuū de ñuu Atenas, te ni jini de jeē ñáyuu ñuu ún yōhyo cáchiñúhún i ídolo, te ni nacani cuíhyá ni de. ¹⁷ Te ini vehe iī sinagoga ni cahān de jnūhun ya jíin jnáhan ñuu de hebreo jíin táca gá tēe cáchiñúhún Yāá Dios. Te suni táca quívī ni nacani de

jnūhun ya nuū tāca ñáyuu cáhīn nuū yáhu. ¹⁸ Te sava tēe cáscuáha jnūhun jeē castéén grupo epicúreo, jíin inga sava tēe cáscuáha jnūhun jeē castéén grupo estoico, ni caque-jéé cácahān jíin Pablo. Te sava ni cacahān:

¿Na jnūhun cáhān tēe t̄lólhlé yāha? áchí.

Te sava ga de ni cacahān:

Tēe nácani jnūhun tāca yāá jeē tu cánevāha yó cúu de, áchí.

Súcuan ni cacahān de, chi nácani Pablo jnūhun vāha Jesús jeē ní natecu yā mēhñu ndíyí. ¹⁹ Te ni cajeca de Pablo cuango de, te ni jinūcoo de nde lugar nuū naní Areópago nuū cándutútú ñáyuu cándacu jniñu, te ni cacahān de:

Cácuni ná cachi ni núu na jnúhun jeé jéé steén ni. ²⁰ Chi cáhān ni jnúhun jeé ná tu cuni cuiṭi na jíjnāhan ná, te jeé yúcuan cácuni ná jecūhun ni na síquī tāca jnúhun yáha, áchí jíin de.

²¹ Chi tāca ñáyuu ñuu Atenas jíin tāca ñáyuu inga ñuu jeé cáyūcu núu i yūcuán, tuá na inga jniñu cácusī gā ni i jíin chi máá-ni jeé cuni nahín i jnūhun jeé chí jéé cahán i jnūhun jeé.

²² Te índichi Pablo mēhñu ñáyuu ní candutútú núu naní Areópago, te ni cahān de:

Tēe ñuu Atenas jíjnāhan ní, jito ná jéé yóhyo cáchiñúhún ní yaá maá ní. ²³ Chi ni jica nuu ná, te ni jecondēhe ná nuū jeé cáchiñúhún ní, te ni jito ná ñn altar jeé yosó jnúhun yáha: Yāha cúu altar yaá jeé ná tu cuni yō jnūhun ya, achí. Te máá Yāá un jéé cáchiñúhún ní, vēsú ná tu cuni ni jnúhun ya, suu jnūhun Yaā un cúu jeé nácani ná núu ní vijna.

²⁴ 'Chi Yaā un cúu Yaā jeé ni sáha ñayīví jíin tāca ndihí jeé iyó, te máá yá cúu Jitoho andiví jíin ñayīví, te tu ndéé yá ini veñūhun cásaḥa ñayuu. ²⁵ Te ni tu cúmanī ni ñn nuū yā jeé cuáha ñayuu nuū yā, chi máá yá sáha jeé técu ñayuu, jíin jéé stáa i tachī i, jíin jéé nihín i ndihí jeé jíni ñúhún i.

²⁶ 'Te ni sáha ya jeé chíji ñn-ni yucūn ni tahū tāca ñáyuu jeé ní nduu t̄cá nación, návāha coyūcú i ññ cáhnu ñayīví, te ni tana yā cuiyā cotecu ñayuu jíin lugar coyūcú i jíjnāhan i. ²⁷ Te súcuan ni sáha ya chí cúní yā jeé nanducú yó yā, chí núu nanducú yó yā te cuni yō jeé iyó yá, chí yajni-ni cúu ya

jíin ñn ñn yó. ²⁸ Chi máá yá sáha jeé iyó yó jíin jéé cátecu yō jíin jéé cácaṇda yō. Chi suni súcuan ni cacahān sava tēe ñuu ni jéé cátaḥa yaa: Suni nde yucūn maá yá cácuu yó, áchí.

²⁹ Te núu yucūn Yaā Dios cácuu yó, te ma cáni ni yō jeé ídolo oro chí plata chí yūu cúu ya, chí cájeni ni ñayuu jeé súcuan cáa ya, te súcuan cásaḥvāha i ídolo. ³⁰ Te ni jendeyí ni yā síquī jeé tu ní cájecūhun ni i ññ ndé saá, te vijna chí ndácu ya jniñu jeé ñáyuu ññ cáhnu ñayīví na nácani ni i jeé stóo i cuēchi i. ³¹ Chi Yaā Dios, je ni jeni ya quiví jeé ndaā sándaā yā síquī ñayuu ñayīví, te ni jeni ya Jesús jeé maá yá sándaā. Te je ni steén cají Yaā Dios nuū tāca ñáyuu jeé maá yá ni jeni Jesús, chí ni nastécu yā Jesús, achí Pablo.

³² Te jeé ní cajini sōho i jnūhun jeé nátecu ndíyí te sava i ni cacahān catá i, te sava ga i ni cacahān i:

Vāha te núu cuu cuni sōho na jnúhun cáhān ni ndé inga jínu, áchí i.

³³ Te ni quenda Pablo mēhñu ñáyuu un cuahān de. ³⁴ Te cuahān jecu ñayuu jíin Pablo, te ni cacandíje. Te ñn de cúu Dionisio, tēe ndútútú jíin tēe cácujuhnu cásaḥa junta nuū naní Areópago, jíin ñn ñahan nání Dámaris, jíin jecu gā i.

Jeé ni íne Pablo ñuu Corinto

18

¹ Yūcuán na te ni quenda Pablo ñuu Atenas, te cuahān de nde ñuu Corinto. ² Te yúcuan ní jito de nuū ñn jnáhan ñuu de hebreo, nání Aquila, te tēe región Ponto cúu de. Te sáá jecu-ni tiempo ni quee de jíin ñasihí de Priscila jeé ní quenda de Italia, chí rey Claudio ni ndacu de jniñu jeé na quéndacoo tāca ñáyuu hebreo ñuu Roma, jeé cúu capital Italia. Te ni jinū Pablo vehe Aquila jíin Priscila jeé cáyūcú de ñuu Corinto. ³ Te suni jniñu sáha tēe un sáha Pablo, chí cáquīcu de ññ cuu vehe. Te ni quendōo Pablo jíin tēe ún, te ni casájniñu de. ⁴ Te tāca quiví ndétātu ní jehēn Pablo vehe ññ sinagoga ni nacani de jnūhun ya, te ni nducú ndéyí de jeé na cándíje ñayuu jnūhun Jesús, cúu jnáhan ñuu de hebreo jíin ñáyuu t̄cá nación jeé tu ní cájini i jnúhun ya.

⁵ Te ni jinūcoo Silas jíin Timoteo ñuu Corinto jeé véjicoo de nde Macedonia. Yūcuán

na te tuá na inga jniñu ní sáha Pablo, chi máni jñuhun ya nácani cáji de nuū ñáyuu cácuu jnánhan de hebreo, jeē maá Jesús cúu ya Cristo, Yaā jeē cáñuhun ni i quiji ya. ⁶ Te ni caquejéé i ni cacahān i siquī jñuhun ún, te ni cacahān xeēn i nuū Pablo. Te maá de ni caja de sahma de jeē cúu seña jeē stóo de i jín cuéchi i, te ni cahān de jín i:

Cuéchi máá ní cúu jeē jnahnū ndetū ni núu súcuan, te nasūu cuéchi máá ná cúu. Nde vijna te quihīn na núu ñáyuu tãcá nación jeē tu cájini i jñuhun ya, te nacani ná jñuhun ya nuū i, áchí de.

⁷ Te ni quenda de ini vehe iī sinagoga, te ni jinū de vehe ñn tēe nání Justo ni condee de. Te chíñuhún tēe un Yáā Dios, te vehe tēe un néne yajni xiin véhe iī sinagoga. ⁸ Te Crispo, tēe cújéhnū ini vehe iī sinagoga, ni candíje de maá Jítoho yō nde jín ndihī ñáyuu vehe de. Te cuehē ñáyuu ñuu Corinto ni cajini nahín i jñuhun nácani Pablo, te ni cacandíje i, te ni cajendute i. ⁹ Te ñn jecuāā ni sáha máá Jítoho yō jeē ní jito ndijin Pablo ya ni cahān yā jín de:

Ma yūhu ró ni ma cási rō yuhu ró, chi níni nacani ró jñuhun ri. ¹⁰ Chi ndíto ri rohó, te ma cúu sáha xeēn ni ñn ñáyuu jín ró. Nacani ró jñuhun ri, chi coo cuehē ñáyuu candíje jñuhun ri ñuu yáha, áchí yá.

¹¹ Te ni condee Pablo yūcuán ñn cuiyā yosáva ni steén de jñuhun Yaā Dios nuū ñáyuu ún.

¹² Te ná cúu Galión gobernador Acaya, te ñáyuu hebreo jeē cúu jnánhan ñuu Pablo, ñn cáhnu-ni ni candonda i siquī Pablo. Te ni cajeca i de cuango i jín de nde vehe juzgado. ¹³ Te ni cacahān i jín Galión:

Tēe yáha yōhyo scáhán de tãca ñáyuu jeē inga modo chíñuhún i Yaā Dios, suu ñn modo jeē cúu contra siquī ley, achí i.

¹⁴ Te quejéé Pablo cahān de núu, te ni cahān-ni Galión jín ñáyuu hebreo un:

Ñáyuu hebreo jijnánhan ró, núu ñn cuéchi xeēn cúu, te cánuú cuni nahín rí jñuhun cácahān rō núu. ¹⁵ Te tuú, chi máni siquī jñuhun-ni jín siquī ley maá ró jín siquī tēe cástéén cúu. Te na sándaā maá ró siquī jniñu yáha, chi tu sándaā rī siquī maá ñn jeē súcuan-ni, áchí de.

¹⁶ Te ni cahān de nuū i jeē na quíngoo i fuera. ¹⁷ Yūcuán na te ñáyuu griego ni cajni i Sóstenes, tēe cújéhnū ini vehe iī sinagoga, te maá fuera yehyí vehe juzgado ni cacani i de, te Galión chi tu ní sáha cuiti de cuenta.

Jeē ní najinū Pablo ñuu Antioquía, te cuahān de vuelta unī jeē nacani de jñuhun ya

¹⁸ Te cuehē gā quivī ni condee Pablo ñuu Corinto. Yūcuán na te ni nacuatáhú de nuū tãcá hermano yūcuan, te Aquila jín ñasihí de Priscila cuango de jín Pablo, te ni jinūcoo de ñuu Cencrea. Te yūcuan ní saté lii Pablo xinī de, te súcuan stéén de jeē squícu de nuū Yaā Dios jeē ni jéjñuhun de. Te ni quivícoo de barco jín Aquila jín Priscila quihīn de región Siria. ¹⁹ Te ni jinūcoo de ñuu Efeso, te yūcuan ní caquendōo Aquila jín Priscila. Te ni jehēn-ni Pablo vehe iī sinagoga, te ni cahān de jñuhun ya jín jnánhan ñuu de hebreo jeē cándutútú yūcuan. ²⁰ Te ni cacahān ndahú i jín de jeē na cónēne de jecu gā quivī jín i, te tu ní jéhe de jñuhun. ²¹ Chi ni nacuatáhú de nuū i, te ni cahān de:

Cánuú jéé nuhūn ná ñuu Jerusalén cone ná vico. Te núu cúní Yaā Dios te ndee tucu ná núu ní, áchí de.

Te ni quenda de ñuu Efeso, te ni quiví de barco cuahān de. ²² Te ni jinū de ñuu Cesarea, te ni jehēn de ñuu Jerusalén. Te nuū ní ndihī ní cahān de jín grupo ñáyuu cácaandíje yūcuán, te cuanuhun de ñuu Antioquía. ²³ Te ni coyúcú de yūcuán jecu quiví, te sáa te ni quenda tucu de cuahān de ni jica cuu de ní Galacia jín Frigia. Te ñáyuu cácaandíje ni cahije ga ni i jín jñuhun ya ni sáha de.

Jeē ní nacani Apolos jñuhun Jesús ñuu Efeso

²⁴ Te ñuu Efeso ni quee ñn tēe hebreo nání Apolos, te tēe ñuu Alejandría cúu de. Te vāha nácani de jñuhun ya, chi vāha jíní de jñuhun jeē cahán tutu iī. ²⁵ Te je ni cutūhva vāha tēe un jín jñuhun máá Jítoho yō Jesús, vēsú jíní de máni máá jñuhun ya jeē ni stéén Juan ná ni scuándute de ñáyuu, te ndihví ni de stéén cají de jñuhun ya nuū ñáyuu. ²⁶ Te jéhnū-ni ni nacani de jñuhun ya ini vehe iī sinagoga. Te ni cajini sōho Aquila jín Priscila jñuhun nácani de, te ni cajeca de Apolos cuango sñn de, te ni cacastūhun

yúcun ndindúú de jnūhun ya jeē ná tu cuni Apolos. ²⁷ Te cúní Apolos quihīn de nde región Acaya. Te je cá candíje sava ñayuu yúcuan ní sáha Yaā Dios siquī jeē váha ni yā. Te tācá hermano ñuu Efeso ni cachindéé ñáhán i de, chí ni catee i carta quihīn de jíin núū ñáyuu cá candíje cá yūcú Acaya jeē na cuatáhú i Apolos. Te nuū ni jíin de yūcuán, te váha ni chindéé ñáhán de tāca ñáyuu cá candíje un jíin jnūhun ya. ²⁸ Te nuū tāca ñáyuu ñuu un ndé jíin jnáhan ñuu de hebreo jeē cá yūcu yúcuan, ní steén cají de ndese cástívi tāca jnáhan hebreo de siquī jnūhun ya. Te tu ní canihīn jnáhan de un jnūhun cahān siquī jeē ni steén de, chí jíin jéé cahán tutu iī ni steén de jeē Jesús cúu Cristo, Yaā jeē cáñūhun ni de quiji ya.

Jeē ni íne Pablo ñuu Efeso

19

¹ Te níní néne Apolos ñuu Corinto, te ni yāha Pablo ichi siquī ñuu Efeso, te ni nanuu de ni jíin de máá ñuu ún. Te yūcuan ní nijnáhan de jíin tijni tēe cá candíje. ² Te ni cajnūhún de tēe ún:

¿A ní canihīn ní Espíritu Santo ná ni cá candíje ní, chí ná tuú? áchí de.

Te ni cacahān de jíin Pablo:

Tuú, chí ni ná tu nihīn na jnūhun jeē iyó Espíritu Santo, achí de.

³ Yūcuán na te ni cahān Pablo:

¿Na siquī ni cajendute ní núu sūcuan? áchí de.

Te ni cacahān de:

Ni cajendute ná siquī jnūhun ni steén Juan, achí de.

⁴ Te ni cahān Pablo:

Jeē ní scuándute Juan ñayuu cúu jeē ni steén de jeē na nácani ni i jeē stóo i cuēchi i, te ni cahān de jeē na cándíje i máá Yāa quiji jeē cúu Cristo Jesús, áchí Pablo.

⁵ Te nuū ní cajini sōho tēe un jnūhun yáha, te ni cajendute de jeē ní cá candíje de máá Jítóho yō Jesús. ⁶ Te ni soó Pablo ndindúú ndaha de xinī tāca tēe ún, te ni quīvi ni Espíritu Santo ini anuá de jíin de, te ni cacahān de sīn sīn yuhu te ni canacani de jnūhun ya. ⁷ Te ni iyo nájnūhun uxī uū jnahán tēe.

⁸ Te unī yoō ni jehēn jehēn Pablo vehe iī sinagoga. Te jéhnú ni nacani de jnūhun

ya, te ni nducú ndéyí de jeē na cándíje ñayuu jnūhun ndese ndácu Yaā Dios jniñu. ⁹ Yūcuán na te sava i ní cacunīhni ni i te tu ní cá candíje i, chí sa ní cacahān neé i siquī jnūhun váha Yaā Dios jíin ñáyuu cá nataka. Jeē yúcuan ní cujiyo-ni Pablo nuū ñáyuu ún, te ñayuu cá candíje cuangoo i jíin de. Te ndijnahan quīvi ni steén de nuū ñáyuu ún ini escuela ñn tēe nání Tiranno. ¹⁰ Te sūcuan ní sáha de uū cuiyā, te tāca ñáyuu cá yūcu Asia, cúu ñayuu hebreo cúu ñayuu tāca gá nación, ní cajini sōho i jnūhun máá Jítóho yō Jesús. ¹¹ Te ni jēhe Yaā Dios poder nuū Pablo jeē sáha de cuehē jniñu jéhnú téyí. ¹² Te nde pañú jíin sahma jeē ní jni de ní cajengoo jíin núū ñáyuu cá cuhū, te ni canduvāha-ni i cuehyī cándoho i, te ni quendacoo tachī ini i cuangoo.

¹³ Te jecu tēe hebreo cájica cuu de jeē quénehen de tachī ini ñayuu, te ni cajeni siquī ni de jeē suni jíin poder maá Jítóho yō Jesús quenehen de tachī, te suhva ní cacahān de jíin táca táchī:

Jíin poder Jesús jeē nácani Pablo jnūhun ya, cáhán nihīn ri jíin ró jeē na quénda ró quihīn rō, achí de.

¹⁴ Te sūcuan ní casáha uxā sēhe yí ñn tēe hebreo nání Esceva, cúu de ñn sutū cujéhnú. ¹⁵ Te ná ni casáha de, te ni cahān-ni tachī ún:

Je jíin rī Jesús, te suni jíin rī Pablo. Te róhó jíin náhan ró ¿ndé tēe cá cuu ró jéé cuatáhú rí rohó? áchí jíin de.

¹⁶ Te tēe ndóho tachī un ní ndonda de, te ni cundeyí de siquī ndihúxá tēe ún. Te ní sáha xeēn ndasí de jíin ndé ní catujī te ní cacuvichí lí ni quendacoo vehe un ní cajinu cuangoo. ¹⁷ Te jnūhun yáha ní cajini tāca ñáyuu cá yūcú ini ñuu Efeso, cúu ñayuu hebreo cúu ñayuu tāca gá nación, te yōhyo ní cayūhú i, te ní cacahān i jeē yōhyo cújéhnú máá Jítóho yō Jesús.

¹⁸ Te cuehē ñayuu jeē ní cá candíje ni quijicoo i nuū Pablo ní nacani ndaā i jnūhun táca jniñu neé ní casáha i. ¹⁹ Te cuehē i jeē ní casáha jniñu tásí ní jinūcoo i cándiso i tutu i, te ní cajehmu i tutu un jító nuū tāca ñáyuu. Te ní catava i cuenta nasaa ndéé tutu ní cá yū ún, te ní cajini i jeē uú xico uxī mil xūhun plata cúu. ²⁰ Te ni jítē jnūhun máá

Jítóho yō cuahān, te ndihi ñayuu ni cajini i jeē cujéhnun ndasí jnúhun ya.

²¹ Te nuū ní ndihi tǎcá jniñu yáha, te jéni téyí ni Pablo jeē quihín de Macedonia jíin Acaya, te sáa te najinū de ñuu Jerusalén. Te ni cahān de jeē na nájinū de ñuu Jerusalén, yūcuán na te jíni ñúhún quihín de nde ñuu Roma. ²² Te uū tēe jeē cáchindéé ñáhán jíin Pablo cúu Timoteo jíin Erasto, te ni scándu de ndindúú tēe yáhá cuángoo de nde Macedonia, te ni quendōo máa de Asia jecu gā quiví.

Jeē ní cacuvaā ñayuu ñuu Efeso

²³ Te suu quiví ún yōhyo ni candonda ñayuu siquí jnúhun ya. ²⁴ Chi ni iyo ñin tēe sájniñu siquí plata, nání de Demetrio. Te máa de jíin ndihi tēe cásajniñu jíin de, cánihín de cuehē xūhún, chi jíin plata casáha de vehe lulí jéé modo veñūhun ídolo i jeē cúu yaā Diana. ²⁵ Te Demetrio ni nastútú de tēe cásajniñu jíin de jíin táca gá tēe jeē suni jniñu yúcuán casáha, te ni cahān de:

Tátā, cájini ni jéé siquí jniñu casáha yó yáha vāha cánihín yō xūhún. ²⁶ Te cájito ní te cájini sōho ní jéé ñin tēe nání Pablo chi cáhán de jeē násūu yáa cácuu jeē casáha ñayuu. Te je ni scandíje de cuehē ñayuu, nasūu máa ñin-ni ñuu Efeso yáhá chi ñí cáhnu Asia. ²⁷ Te quíyūhú ni na jéé cahān ñayuu jeē tu ndé jéjníñu jeē casáha yó. Te sanaa te suni súcuán cahān i coto i máa veñūhun yaā sihí Diana jeē cujéhnun, te suni sájéé ni i nuū yaā Diana, te ma cúu ga cujéhnun ya vēsú ndivii ñayuu Asia jíin ñayuu ní cáhnu ñayiví cáchiñúhún i ya vijna, áchí de.

²⁸ Súcuán ni cajini sōho de jnúhun yáha te yōhyo ni caquití ni de, te ni cacana jee de:

Cújéhnun téyí Diana, yaā cúu patrona ñuu yō Efeso, achí de.

²⁹ Te ñayuu ñuu Efeso ni cacuvaā i, te ñin cáhnu-ni ni candonda i ni cajniñi i Gayo jíin Aristarco cuángoo i jíin de nde vehe nuū cándutútú ñayuu casáha i junta. Te ndindúú tēe un cácuu tēe Macedonia, te cájica de jíin Pablo. ³⁰ Te cúní Pablo quiví de nuū ñayuu cuehē un cahān de jíin i, te ñayuu cácandíje tu ní cájehe i jnúhun quihín de. ³¹ Te suni sava tohō jeē cácuu amigo de cáyūcu Asia, ni catají jnúhun cuahān nuū

de, cácahān ndahú jíin de jeē ma quihín de nuū ní cacutútú ñayuu ún. ³² Te ñayuu ní cacutútú un, sava i ni cacana jee i ñin jnúhun te sava ga i inga jnúhun, te súcuán ni cacuvaā teyí i, te cuehē i ni tu cájini cuítí i na siquí cúu jeē ní cacutútú i. ³³ Te sava tēe hebreo ni cajeni de ñin jnáhan de jeē naní Alejandro nuū ñayuu cuehē ún, te ni cacastūhún de nuū tēe ún na siquí cúu jeē cacuvaā i. Yūcuán na te Alejandro ni sáha de seña jíin ndaha de jeē na cúnayúú ñayuu, chi cúní de cahān de jíin i jeē násūu cuéchi táca ñayuu hebreo cúu. ³⁴ Te ni canacuni ñayuu un jéé tēe hebreo cúu de, te jeē yúcuán ní cacana jee téyí gá i nájnūhun uū hora:

Cújéhnun téyí Diana, yaā cúu patrona ñuu yō Efeso, achí i.

³⁵ Yūcuán na te ni cacunahín ñayuu ni sáha tēe cúu secretario ñuu ún, te ni cahān de:

Nihín ñayuu ñuu yō Efeso, ndihi ñayuu chi je cájini i jeē cándito vāha yó veñūhun yaā Diana jíin imagen Diana jeē ní ñinga nde andiví. ³⁶ Te ni ñin chi ma cúu cahān jeē tú ndaā jnúhun yáha. Núu súcuán te vāha ga na cási ní yuhu ní, te ma sáha yachí ní ñin jeē tu ní nácani vāha ni ni siquí. ³⁷ Chi tēe yáha ní caquindeca ní de yáhá vēsú tu ní casáha de ni ñin cuéchi siquí Diana yō, ni tu ní cácahān ndevāha de ni ñin jnúhun siquí. ³⁸ Te Demetrio jíin táca gá tēe jeē ñin-ni jniñu casáha jíin de, núu cácuuni de cahān de cuéchi siquí ñin tēe, te na quíngoo de nde vehe juzgado nuū cáyūcu juez, tēe cásandaā jniñu, te yūcuán cundaā siquí de jíin náhan de. ³⁹ Te núu íyó jnúhun jeē ma cúu cundaā yūcuán, te jíni ñúhún cundaā nuū ñin junta nájnūhun tájnúní ley. ⁴⁰ Chi yúhú ná jeē sanaa te cahān táca tóhō Roma jeē siquí gobierno de ni candonda yó, chi ma nihín yō jnúhun castūhun yó na siquí cúu jeē ní cacutútú yó ni cacuvaā yō vijna, áchí de.

⁴¹ Te nuū ní ndihi ni cahān secretario jnúhun yáha, te ni cajitē ñayuu un cuángoo.

Jeē ni jéhēn Pablo Macedonia jíin Grecia

20

¹ Te ná ni yáha jéé ní cacuvaā ñayuu, te ni cana Pablo ñayuu cácandíje, te ni jeni ichí de i. Te ni cañunundee jnáhan de jíin

Pablo jeē ní nacuatáhú de, te cuahān de Macedonia. ² Te ni jica cuu de tācá ñuu yúcuan. Te jín cuéhē jnūhun ni stihví ni de tācá hermano cácandíje. Te ni jinū de Grecia. ³ Te ni condee de yúcuan únī yoō. Te je yajni quihīn de jín barco nde Siria nuú, te máá quivī ún te ni nihīn de jnūhun jeē jnáhan ñuu de hebreo ni casquijnáhan jnūhun jeē ndonda siquī de ichi nuū quihín de, te jeē yúcuan ní nacani ni de te cuahān tucu de ichi Macedonia. ⁴ Te ni cahīyo sava tēe cájica jín Pablo, te cánani de Sópater ñuu Berea, Aristarco jín tēe nání Segundo nde ñuu Tesalónica, Gayo ñuu Derbe, Tíquico jín Trófimo nde Asia, jín Timoteo. ⁵ Te ni cacandu tēe yáha, te cándetu de Pablo jín sáña, Lucas, nde ñuu Troas. ⁶ Te nuū ni yáha vico jeē cáyeji i pan jeē tu yíhi levadura, te jín barco ni quendacoo ná ñuu Filipos, te nde nuū uhún quivī te ni canajnáhan ná jín de nde ñuu Troas. Te ñuu yúcuan ní coyūcu ná uxā quivī.

Jeē ni íne Pablo ñuu Troas

⁷ Te máá quivī domingo ni candutútú ñáyuu cácandíje jeē cáji i pan, nájnūhun ni steén maá Jítóho yō jeē núcūhun ni yō siquī yā. Te ni steén Pablo jnūhun nuū ñáyuu ún. Te siquī jeē inga quivī un jini ñúhún quenda de quihīn de, te nahán ní nacani de jnūhun nde ni cuñuú. ⁸ Te vehe yósó jnáhan cúu vehe ún. Te nde cuarto xinī nuū ní candutútú ná un ní íyo cuehē lámpara ni cundijin. ⁹ Te ñn sūchi yí nání i Eutico, néne i yuhu ventana. Te jeē ní cunahán nácani Pablo jnūhun, te yōhyo jí i máhná, te ni quixī-ni i. Te nde piso unī un ní ñinga i nde nuū ñúhún. Te je ni jihī i ni candonehen de i. ¹⁰ Yūcuán na te ni nuu Pablo te ni jita ndeyi de ni canehen de i ni ñunundee de i, te ni cahān de:

Ma yūhu ní jijnáhan ní, chi ni natecu i, áchí de.

¹¹ Te ni ndaa Pablo, te ni yeji de pan jín i jijnáhan i jeē cánucūhun ni de siquī yā. Te nahán gá ni nacani de jnūhun nde cuacundijin. Yūcuán na te ni quenda de cuahān de. ¹² Te Eutico chi íyó váha i cuanuhun i jín de jijnáhan de, te ndivii ñayuu ún yōhyo cácusī ni i.

Jeē ní quenda Pablo ñuu Troas cuahān de ñuu Mileto

¹³ Te ni quivīcoo ná ini barco cuangoo ná. Te Pablo chi cúní de caca jéhé de, te ni cundaā jeē najnáhan ná jín de nde ñuu Asón. ¹⁴ Te nuū ní canajnáhan ná jín de ñuu Asón, te ni quivī de barco te cuangoo ná jín de nde ñuu Mitilene. ¹⁵ Te yúcuan ní quendacoo tucu ná jín barco te inga quivī ni jinūcoo ná xiin Quío, ñuhun jeē íne sīn nuū ndúte. Te quivī unī ni jinūcoo ná Samos jeē súni nuū ndúte íne, te ni caque-ndōo ná Trogilio. Te quivī cuún ni jinūcoo ná ñuu Mileto. ¹⁶ Te tu ní jéngoo ná ñuu Efeso, chi jéni ni Pablo jeē yáha-ni de ñuu un quihīn de, návāha ma cucuéé de Asia te naa tiempo nuú, chi núú de jinū yachī de ñuu Jerusalén cone de máá quivī Pentecostés núu na cúu.

Jeē ní jeni ichí Pablo tēe jénu cándiso jníñu nuū ñáyuu cácandíje ñuu Efeso

¹⁷ Te ná íne ga Pablo ñuu Mileto, te ni tají de jnūhun cuahān nde ñuu Efeso jeē na quijicoo tēe jénu cándiso jníñu nuū ñáyuu cácandíje yūcuán. ¹⁸ Te nuū ní quecoo tēe ún, te ni cahān de:

Je cájini vāha ní ndese ni jica ndaā na ndé ná ni quee nuú ná Asia te nde vijna. ¹⁹ Chi ní tiempo jeē ni íne ná jín ní te nde vijna, jéjníñu vāha na siquī jnūhun máá Jítóho yō, te tu ní sándúxí ná maá ná. Te íyó jínu ni ndahyū na jéhē ñáyuu. Te ni ndoho ná jnúndóho ni casáha jnáhan ñuu ná hebreo, chi ni casquijnáhan jnūhun i siquī ná. ²⁰ Te cájini ni jéé tu ní táñúhún ná ni ñn, vésú ndese ga cácahān ñayuu siquī ná, chi ni nacani ná ndihī jnūhun ya jeē quéndōo vāha ní sáha. Te ni steén na jnúhún ya nuū ni jijnáhan ní, cúu nuū chitú cúu tācá vehe ní. ²¹ Te ñnuú-ni jnūhun ni nacani ná núú ndihī ní, cúu jnáhan ñuu ná hebreo cúu ñayuu tāca gá nación, chi ni cahān na jéé na nácani ni ni jéé stóo ni cuéchi ní te na cándíje ní máá Jítóho yō Jesucristo. ²² Te vijna chi ñúhún ichí ná quihīn ná ñuu Jerusalén, chi stihví ni Espíritu Santo sáña quihīn ná. Te tu jíní ná ndese ga coo jín ná yūcuán. ²³ Te íyó ñn jeē jiní na, cúu jeē chune i sáña vecāa te quiji jnúndóho siquī ná, chi Espíritu Santo súcuan cáhán jín ná ndijnahan ñuu nuū jica

na. ²⁴ Te ni tu sáha ná cuenta vēsú na cáhni i sãhá, chi jeē cuní na cúu jeē na sínu vāha ná jniñu jeē ní tee máá Jítóho yō Jesús siquī ná, te súcuan cusī ni ná. Te jniñu un cúu jeē nácani ná jnúhun vāha ya nuū tāca ñáyuu ndese vāha ni Yaā Dios jíin yó.

²⁵ Te je ni jica cuu ná, ní nacani ná jnúhun ya nuū ní ndese ndácu Yaā Dios jniñu. Te vijna chi jíiní na jéē ni ñn ní ma najnáhan ga yō nuū ñáyiví yáha. ²⁶ Jeē yúcuan cástūhun cájí ná nuū ni jíinánhan ní vijna jeē násūu cuéchi ná cúu núu ndé ñn ní stívi. ²⁷ Chi ni nacani ná núu ní ndihí jnúhun Yaā Dios jeē ni sándaā yā ndese coo, te tu ní quéndōo ni ñn jnúhun. ²⁸ Núu súcuan te coto vāha ní máá ní jíin ndihí ñayuu cácadíje, chi Espíritu Santo ni jeni ya nihín jéē cóndito ní ñáyuu maá Jítóho yō, chi ni nacuaan ya i jíin níñí yā. ²⁹ Chi jeē quihín na te jíin na jéē quijicoo tēe cástáhú quívicoo mēhñu ní, te nducú de snáa de jnúhun ni cajetáhú ñáyuu cácadíje, te xeēn sáha jnúhun stáhú de nájnūhun xeēn sáha yihí jeē cájehni tī lanchi. ³⁰ Te suni nuū grupo maá ní quejéé sava de cahān de jnúhun stáhú, te stáhú de sava ñayuu cácadíje jeē na cóndiquīn i jnúhun stáhú steén de. ³¹ Jeē yúcuan condito ní jéē ma cóo súcuan. Te ma náa ni ní jéē uní cuiyā ndiquíví ndíñuu ni condihví ndasí ni na ndé ndahyú na jéhē ni, ní jeni ichí ná ñn ñn ní jíinánhan ní.

³² Te vijna, hermano, jícán tahu na núu Yaā Dios jeē coto ya nihín. Chi jnúhun jeē váha ni yā ndíso poder sáha jeē íje ga ni jíin, te suu sáha jeē ñn quíví te cuāha ya tahū jeē ndujéhnu luu ní ndé jíin ndihí ñayuu ní nacāji ya jeē cóo ndoo coo íi i nuū yā. ³³ Tu ní nducú ná jeē nihín na xúhun chí sahma nuū ní ñn i. ³⁴ Chi je cájini vāha ni jéē sa suhva ni sájniñu níhin ná návāha nihín na jéē cótecu na ndé jíin táca tēe cájica jíin ná. ³⁵ Te níiní ní steén na núu ni jéē súcuan jíiní ñúhún sájniñu yó návāha nihín yō jeē cuáha yó núu ñayuu cúmaní nuū. Te ma náa ni ní jnúhun jeē ni cahān maá Jítóho yō Jesús, chi suhva ni cahān yā: Ndetū gā quendōo yó jéē cuáha yó vēsú jeē nihín yō, achí yá. Achí Pablo.

³⁶ Te ni ndihí ni cahān de tāca jnúhun yáha, te ni jecuiñí yití de, te ni jicān tahu

de jíin ndihí tēe ún. ³⁷ Yūcuán na te ndihí de ni cajecunundee jnáhan de jíin Pablo ni catechūhú de jeē cánacuatáhú de, te ni candahyū de. ³⁸ Chi cácuuíhyá ndasí ni de jíin jnúhun ni cahān Pablo jeē ma ndácoto jnáhan ga de. Te cuangoo-ni de jíin Pablo nde núu íin barco.

Jeē cuánuhun Pablo ñuu Jerusalén

21

¹ Yūcuán na te ni caquendōo táca hermano ñuu Efeso, te ni quívicoo ná barco, te cuangoo ndaa-ni ná ndé Cos. Te inga quíví ni jinūcoo ná Rodas, te yúcuan ní quenda-coo ná te ni jinūcoo ná ñuu Pátara. ² Te ni cane ñn barco jeē quihín Fenicia, te ni quívicoo ná cuángoo ná. ³ Te nuū ní cajito ná núu Chipre jeē íne síin nuū ndúte, te ni quendōo ichi lado jecó barco, chi ni cayāha ná cuángoo ná nde Siria. Te ni jinūcoo ná ñuu Tiro, chi yúcuan ndóo jeē ndíso barco ún. ⁴ Te ni jenanducú ná ñayuu cácadíje, te ni caquendōo ná jíin i uxā quíví. Te máá Espíritu Santo ni steén nuū i jeē quíji jnúndóho siquī Pablo ñuu Jerusalén, te jeē yúcuan ní cacahān i jíin de jeē ma quihín de. ⁵ Te ni yāha uxā quíví ún, te ni quendacoo ná. Te tāca tēe cácadíje jíin ñasihí de jíin séhe de ni cachuhun ichí de sãña ní jengoo de jíin ná nde yatā ñúu, te ni cajecuiñí yití ná jíin de yumar te ni cajicān tahu na. ⁶ Te ni cañunundee jnáhan ná ní canacuatáhú ná yūcuán, te ni quívicoo ná barco cuangoo ná. Te ni canandió cóo de cuanungoo de vehe de.

⁷ Te ni quendacoo ná ñuu Tiro cuangoo ná jíin barco, te ni jinūcoo ná ñuu Tolemaida ni quendacoo ná ini barco. Te yúcuan ní jengoo ná ní cacahān na jíin táca hermano, te ni caquendōo ná jíin de ñn quíví. ⁸ Te inga quíví un ní cajica jéhé ná jíin Pablo, te ni jinūcoo ná ñuu Cesarea, te ni quívicoo ná vehe Felipe, tēe nácani jnúhun vāha ya. Tēe un cúu jnáhan jeē ndihúxá tēe jeē ní casaja staā nuū ñáhan viuda. Te ni caquendōo ná jíin de. ⁹ Te tēe un íyó cūn séhe síhí de jeē cáhiyo máá i, te cánacani i jnúhun Yaā Dios. ¹⁰ Te ni coyūcu ná yūcuán tijni quíví. Te ichi Judea ni quíji ñn tēe nácani jnúhun Yaā Dios, nání de Agabo. ¹¹ Te

ni quee de nuū ná. Te ni quihin de sanchí Pablo, te ni jihni de ndaha de jíin jéhē de, te ni cahān de:

Suhva cáhán Espíritu Santo. Jnáhan yó hebreo súcuan cuhni i tēe chíi sanchí yáha ini űuu Jerusalén, te nastúu i de nuū űáyuu sĭin nación, áchí de.

¹² Te jeē ní cajini sōho na jnúhun yáha te máá ná jíin táca tēe cávandíje cáyūcú űuu Cesarea ni cacahān ndahú ná jíin Pablo jeē ma quihín de űuu Jerusalén. ¹³ Yūcuán na te ni cahān Pablo:

¿Najehē cándahyū ni jíināhan ní, te casáha ní jeē cucuíhyá ni ná? Chi sãñá je íyó túhva ná jeē násūu máá jeē cónuhnī ná ini űuu Jerusalén, chi suni jeē vēsú na cúu na jēe síquī máá Jítóho yō Jesús, áchí de.

¹⁴ Te jeē tu ní cúu cuiĭi casicoo ná, yūcuán na te sa suhva ni cacahān ná:

Na cóo ndese cúni máá Jítóho yō nuu súcuan, áchí ná.

¹⁵ Yūcuán na te sáa te ni casátūhva ná, te cuango ná űuu Jerusalén. ¹⁶ Te suni jecu tēe űuu Cesarea jeē cávandíje cuango de jíin ná. Suni cuahān ĩn tēe Chipre nání de Mnasón, te je ni cuu cuehē cuiyā candíje de. Te ná ni jinūcoo ná űuu Jerusalén, te ni cacoyūcu ná vehe de.

Jeē ni jécondēhe Pablo Jacobo

¹⁷ Te nuū ni jínūcoo ná űuu Jerusalén, te hermano cáyūcú űuu ún yōhyo ni cacusiĭ ni de jeē ni jínūcoo ná. ¹⁸ Te ĩnga quivĭ un ní cajengoo ná jíināhan ná jíin Pablo vehe Jacobo, te yūcuán ní candutútú táca tēe jéhnū cándĭso jníñū nuū űáyuu cávandíje.

¹⁹ Te Pablo ni sáha de saludar tēe ún jíināhan de. Yūcuán na te ni castūhún de ndihĭ jniñū ní sáha Yaā Dios ná ni nacani de jnúhun ya nuū űáyuu táca nación jeē tu cájini i jnúhun ya. ²⁰ Te ni cajini sōho de jnúhun yáha, te ni cacahān de jeē yóhyo cújéhnū Yaā Dios. Te ni cacahān de jíin Pablo:

Hermano, vijna te jíní ni náa cuehē mil jnáhan űuu yō hebreo ni cacandíje i Jesús, te cácahān nĭhin i jeē cánuú squícu yó ley jeē ni jéhe ya nuū Moisés. ²¹ Te ni canihĭn i jnúhun cácahān jeē stĭvi ní steén ni núū táca jnáhan yó űáyuu hebreo cáyūcu jíca i táca gá nación, chi ni steén ni núū i jeē ma cuatáhú gá i nuū ley Moisés, ni ma sáha ga i circuncidar

sēhe i, ni ma cuatáhú gá i táca gá jeē tajnúní jenahán. ²² ¿Ndese sáha ní núu súcuan? Chi cuni űáyuu un jēe ní ndee ní te cutútú cuéhē i. ²³ Suhva sáha ní núu súcuan. Yáha íyó cúun tēe jeē ní cajejnúhun de ĩn jeē squícu de nuū Yaā Dios. ²⁴ Cueca ní tēe yáha quihĭn ni jíin de templo, te cuchĭ ní nasándoo ní máá ní jíin de nuū yā, te cuaan ní jeē socó de nuū Yaā Dios jíināhan de. Yūcuán na te cuu sāté de xinĭ de, te suu stēén jeē ní casquícu de ndihĭ jeē ní cajejnúhun de nuū yā. Yūcuán na te cuni ndihĭ űáyuu jeē tú ndaā táca jnúhun ni cajini sōho i síquĭ ní, chí coto i jeē suni máá ní sa squícu ní ley yā. ²⁵ Te űáyuu táca nación jeē násūu űáyuu hebreo cácuu i te ni cacandíje i ya, je ni catee ná carta cuahān nuū i jeē tu cánuú squícu i ley un, chí máá-ni jeē ma cáji i cúñū jeē ni sóco nuū ídolo ni niñĭ ni quiĭi jeē jihĭ jeē tu jéti niñĭ tĭ, te ni ma cáca jnéni i, áchí de.

Jeē ní cajni de Pablo ini templo

²⁶ Yūcuán na te ni jeca Pablo tēe ún, te ĩnga quivĭ un ní cajichi de ni canasándoo de máá de nuū yā. Te ni quivĭ Pablo ini templo ni cachĭ de nuū sutú na quivĭ jínu jeē nasándoo tēe un máá de nuū yā, te quindeca de quiĭi jeē socó de nuū yā.

²⁷ Yūcuán na te cácuu de jeē sínu de ndihúxá quivĭ jeē cándundoo de nuū yā, te sava jnáhan hebreo de jeē véjicoo Asia ni cajini de jeē íne Pablo ini templo, te ni cascáhán de ndihĭ űáyuu, te ni cajni i Pablo.

²⁸ Te ni cacana jee i:

Tēe űuu yō Israel, cuāha núú ní ndaha jíināhan ní na jní yó tēe yáha. Chí máá de cúu tēe jíca cuu ní cáhnu stēén de nuū táca űáyuu, te cáhán de síquĭ nación yō jíin síquĭ ley jeē ni jéhe ya nuū Moisés jíin síquĭ templo yáha. Te suni je ni quivĭicoo de jíin jecu tēe griego ini templo ĩi yáhá, te súcuan stĭvi de jnúhun ĩi jeē cahán jeē ma cúu quivĭ űáyuu ini templo te núu nasūu űáyuu hebreo cúu i, áchí.

²⁹ Chí nde na íne Pablo ini űuu un ní cajini tēe hebreo jeē jíca de jíin Trófimo, tēe űuu Efeso jeē násūu hebreo cúu de, te cájeni ní de jeē ni quivĭ tēe un jíin Pablo ini templo.

³⁰ Te ndihĭ űáyuu űuu un ní cuvaā, te ni cacutútú-ni i, te ni cajni i Pablo, te ni castáa

i de ni quenehen i de ini templo un, te ni canacasi-ni i yéhyí. ³¹ Te ni cacuni i cahni i de núú. Te general, tēe cújéhnú nuū ndíhi soldado, ni nihín de jnūhun jeē ndíhi ñayuu ñuu Jerusalén ni candonda i cácuvaā i. ³² Te ni jeca general tēcá soldado jíin capitán, te cájínu de cuango de nde nuū cáhíin ñayuu cuehē ún. Te ná ni cajito ñayuu jeē ni jínúcoo general jíin soldado, te ni cajecuiñi i jeē cácani i Pablo. ³³ Yūcuán na te ni quívi general mēhñu ñáyuu, te ni jñi de Pablo, te ni ndacu de jniñu jeē conuhni de jíin úu cadena. Yūcuán na te ni cajnūhún general ndé tēe cúu Pablo te na cuēchi ni sáha de. ³⁴ Te ni cacana ñayuu cuehē ún, sava i ñin jnūhun te sava ga i inga jnūhun, te tu ní cúu cuni de na cuēchi ni sáha Pablo, chi cácuvaā i. Te ni ndacu de jniñu cuahán Pablo nde cuartel. ³⁵ Te nuū ni jínú Pablo escalera cuartel ún, te soldado ni cajñi de Pablo cándiso de siquí jeē cácani ñayuu ún jñi i Pablo sáha xeēn i jíin de. ³⁶ Chi ndíhi i vējicoo i ichi yátá soldado, te cácana jee i:

Cahni ni tēe jíin, achí i.

Jeē ni cáhán Pablo jehē maá de nuū ñáyuu

³⁷ Te cásqúvi de Pablo ini cuartel nuú, te jíin jnūhun griego ni cahán Pablo jíin general:

¿A cuáha ni jnūhun cahán ná ñin jnūhun jíin ní? achí de.

Te ni cahán general jíin de:

Te jíní rō cahán rō yuhu griego jeē súcuan. ³⁸ Núu súcuan te nasūu róhó cúu tēe Egipto jeē jé ni cuu quívi ni ndonda siquí gobierno te ni quenehen cuūn mil tēe jéhni ndíyi cuango jíin de nde nuū ñúhun téhé, áchí.

³⁹ Yūcuán na te ni cahán Pablo:

Tuú, chi tēe hebreo cúu ná, te ni cacu ná ñuu Tarso, ñin ñuu jeē cújéhnú ndañúu Cilicia. Te quiñūhun ni ni cuáha ní jnūhun na cáhán na jíin ñáyuu yáha jíin náhan i, áchí de.

⁴⁰ Te general ni jēhe de jnūhun jeē cahán de. Te ni jecondichi Pablo nuū escalera, te ni sáha de seña jíin ndaha de jeē na cúu nayúu ñáyuu ún. Te nuū ní cuu nayúu-ni i, te jíin jnūhun yuhu ñúu de hebreo ni cahán de:

22

¹ Ndihi níhín jeē cácuu ní jnáhan ñuu yō jíin ndíhi níhín jeē cácujuhnu ní núu ñúu yō, cuni sōho ní jnūhun cahán na jéhē maá ná, achí de.

² Te ni cajini sōho i jeē cahán Pablo yuhu hebreo jeē cúu yuhu ñúu i, te víhyá gā ni cacunahín i. Te ni cahán Pablo:

³ Máa ná cúu jnáhan ñuu yō hebreo, te ni cacu ná ini ñuu Tarso ndañúu Cilicia. Te ini ñuu Jerusalén yáha ní jehnu ná, te ni cutūhva ná núu Gamaliel, te ni steén de nuū ná ndíhi siquí ley jeē ni jéhe ya nuū jíi yō. Te nde jíin ini jíin ánuá na ní nducú ndéyí ná squícu ná súcuan nuū Yā Dios, nájnūhun cása maá ní vijna. ⁴ Te ni jito xeēn na ñáyuu cácdíje i jnūhun Jesús te nde cuni na jēe na cúu ndíhi i núu. Chi cúu tēe cúu ñahan ni jñi ná ni chuhun ná vecā. ⁵ Te sutū cújéhnú ga jíin táca tēe jéhnú cándiso jniñu nuū ñúu yō, cácuu de testigo jeē súcuan ni sáha ná, te suni máa de ni cajēhe de tijni carta cuahán na jíin jēe cuáha na núu táca jnáhan yó cáyucú ñuu Damasco. Chi cuahán ná ñuu un jēe jñi ná ñáyuu cácdíje i Jesús te quindecá ná i ñuu Jerusalén yáha, návāha ndoho i núu.

Jeē ní cachi Pablo ndese ni sama ya de (Hch. 9.1-19; 26.12-18)

⁶ Te ni quihin ná ichi cuahán ná, te cuacuyajni ná ñuu Damasco, te nájnūhun caxū cúu. Te ichi ándivi ní quiji ñin nduva ní ndíndéé ndaxín núu ná. ⁷ Te ni cotúu-ni ná núu ñúhun, te ni jini sōho ná ñin jnūhun cáhán jíin ná: Saulo, Saulo, ¿najehé jito xeēn rō ruhū? achí. ⁸ Yūcuán na te ni cahán ná: ¿Na níhín cúu jeē cahán, Tátā? achí ná. Te ni cahán yā jíin ná: Máa rí cúu Jesús jeē ní jehnu ñuu Nazaret, te jeē jito xeēn rō ñayuu cácdíje i ruhū cúu jeē jito xeēn rō ruhū, achí yá. ⁹ Te tēe cuango jíin ná ni cajini ndije de jeē ndíndéé, te ni cayūhú de, te tu ní cajini sōho de ndese ni cahán yā jíin ná. ¹⁰ Yūcuán na te ni cahán ná: Tátā, ¿na vé cuni ni jēe sáha ná? áchí ná. Te ni cahán maá Jítoho yō jíin ná: Ndocuñi te quihin rō ñuu Damasco, te yūcuan íyó ñin tēe jeē cachi nuū rō na vé cúu jeē cánuú sáha ró, áchí yá jíin ná. ¹¹ Te jeē ní ndíndéé un ní sacuaá núu ná, te tēe cuango jíin ná un ní cajñi

de ndaha ná cuángoo de jíin ná ní jinūcoo ná ndé ñuu Damasco.

¹² Te yūcuan ní condee ñn tēe nání Ananías, te tāca jnāhan yó hebreo yūcuan cácahān jeē tēe vāha cúu Ananías, chí vāha squícu de ley jeē ní jéhe ya nuū Moisés. ¹³ Te ní quee tēe un núū néne ná, te ni cahān de jíin ná: Hermano Saulo, na ndúndijin tinūu ní, achí de. Te ni ndundijin-ni tinūu ná, te ni jito ná núū de. ¹⁴ Te ni cahān Ananías: Máá Yāa Dios tāca jíi yō, je ni nacāji ya nihín návāha cuni ní na vé cuni yā jeē sáha ní, te coto ní núū maá Cristo, Yāa ndaā, te cuni sōho ni jnūhun jeē cahān yā. ¹⁵ Te nacani ní jnūhun ya nuū ndivii ñayuu tāca jēe ní jito ní jíin jēe ní jini sōho ní. ¹⁶ Ma cúhuun ni ní núū súcuan. Ndocuññi ní, te cuandute ní te cahān ndahú ní jíin máá Jítoho yō, návāha nacate ya anuá ni núū cuéchi, achí de jíin ná.

Jeē ní cachi Pablo ndese ni tají Yāa Dios de nuū ñáyuu tāca gá nación

¹⁷ Te ni nandió cóo na ní ndee ná ñuu Jerusalén. Te jícan tahu na ini templo, te ni sáha máá Jítoho yō jeē ní jito ndijin ná. ¹⁸ Te ni jini na núū yā ni cahān yā jíin ná: Yachí quenda ró ñuu Jerusalén yāhá, chí ma cuatáhú ñáyuu yáha jēe nacani ró jnūhun ri nuū i, achí yá. ¹⁹ Te ni cahān na jíin yá: Tuú, chí cuatáhú i, Tātā, chí je cájini i jeē ní quíví ná ndijnahan vehe ñi sinagoga ni jni ná tāca ñáyuu cácaññi i níhín, te ni cani ná i, te ni chuhun ná i vecāa. ²⁰ Te je cájini i jeē quíví ní cajehni i Esteban, tēe ni nacani cáji jnūhun ní, suni ni indichi na yūcuan, te ni jejnūhún ná jeē na cúu de, chí ni condito ná sahama tēe ni cajehni Esteban, achí ná jíin yá. ²¹ Te ni cahān yā jíin ná: Cuáhán, chí máá rí tají rí rohó quíhñ jicá ró nde nuū ñáyuu tāca nación jeē tu cájini i jnūhun ri, achí yá jíin ná. Achí Pablo.

Jeē ni íne Pablo nuū general

²² Te tāca ñáyuu ún vāha-ni ni cajini sōho i te nde jnūhun sandññi yáha jēe ní tají yá de nuū ñáyuu tāca gá nación. Yūcuán na te ni cacuvaā i, te ni cacahān jee i:

Na cúu tēe jíñá, chí tú vāha jeē cótecu gā de, achí i.

²³ Te súcuan cácana jee i, te ni cascádoó i ticāchí i, te ni cascánda i ticachā. Te súcuan cástéén i jeē cáquiti xēen ni i. ²⁴ Te ni

ndacu general jniñu jeē na quíví Pablo ini cuartel, te ni cahān de jeē na stíchí soldado Pablo nde jíin cuarta ññi, návāha cujnúní ni general na siquí cúu jeē ní candonda ñayuu un siquí de. ²⁵ Te ni cajihni de Pablo návāha súcuan te cani de. Te ni cahān Pablo jíin capitán jeē índichi tūhva:

¿A jéhe ley jnūhun jeē cani ní cuarta tēe cúu sēhe nación Roma núu ná tu sándaā ní núu iyó cuéchi de? achí de.

²⁶ Te ni jini sōho capitán jnūhun yáha, te ni jecahān jíin general:

Coto vāha ní jēe ma stíví ní sáha ní jíin tēe yáha, chí cúu de sēhe nación Roma, achí.

²⁷ Yūcuán na te ni jinū general nuū Pablo, te ni cajnūhún de:

Cachí núu jendaá cúu jeē séhe nación Roma cúu ró, achí.

Te ni cahān Pablo:

Suu cúu ndije ná, achí de.

²⁸ Te ni cahān general:

Ruhū chí nde jeē ní jéhe ri cuehē xūhún te ni nduu ri sēhe nación Roma, achí.

Te ni cahān Pablo:

Te sañá chí nde quíví ní cacu ná cúu ná séhe nación yō Roma, achí de.

²⁹ Yūcuán na te tāca tēe jeē cácuni cani Pablo nuú, ni cacujiyo-ni cuangoo, te suni nde general ni yūhú de, chí ni stíví de jeē ní jihni de Pablo, chí tu iyó vāha sáha súcuan jíin séhe nación Roma.

Jeē ni índichi Pablo nuū junta cujéhnu ga jnāhan ñuu de hebreo

³⁰ Te ñnga quíví un cúni general cundaā vāha ni de na siquí cúu jeē ní candonda tēe hebreo siquí Pablo. Te ni ndají de cadena jeē nuhni Pablo, te ni ndacu de jniñu ni cacutútú tāca sūtū cácujeñnu jíin tāca tēe cásáha junta cujéhnu ga, te ni quenehen de Pablo, te ni jeni de nuū tēe ni candutútú un.

23

¹ Yūcuán na te ni ndacoto Pablo nuū tēe ni candutútú junta un, te ni cahān de:

Tātā jijnāhan ní, ní ndé vijna vāha iyó ni anuá na jēe tú na cuéchi ná, jíto jínúu Yāa Dios, achí de.

² Yūcuán na te Ananías, sutū cujéhnu ga, ni cahān jíin tēe cáhñin yajni nuū de jeē na cátu maá yuhu de. ³ Te ni cahān Pablo jíin sūtū cujéhnu ga ún:

Yaā Dios stóho ya nihín chi tēe stáhú-ni cúu ní, chi néne ní jēe sándaā ni núu ni stívi ná ley yā, ¿te naun stívi máá ní ley jeē ndácu ní jniñu jeē cáni de sãñá? áchí de.

⁴ Te ni cacahān tēe cáhīin nuū de ún:

¿Naun cáhán rō súcuan jíin sūtū cujéhnu ga? Chi nuū Yaā Dios jejniñu de, áchí jíin de.

⁵ Te ni cahān Pablo:

Tátā jijnáhan ní, tu ní jíin na jēe sutú cujéhnu ga cúu de, chi núu ní jíin na te ma cahán na súcuan núu, chi yósó núu tútu i jeē ni cáhān yā jeē ma cahán neé yó coto yó táca tēe cácujeñnu nuū yō, áchí Pablo.

⁶ Te nuū ní jini Pablo jeē sava de cácuu grupo saduceo te sava ga de cácuu grupo fariseo, te ni cahān jee de:

Tátā jijnáhan ní, máá ná cúu ñn jnáhan grupo fariseo, te suni súcuan ni iyo tátá na. Chi suni máá ná ñúhun ni na jēe nastécu yā ndīyi, te siquī yúcuan cúu jeē cácahān ni cuéchi siquī ná, áchí de.

⁷ Te jeē súcuan ni cahān de te ni cacusñn ni tēe junta jeē cácuu grupo fariseo jíin grupo saduceo, te ni cacahān ñhīn. ⁸ Chi cácahān tēe grupo saduceo jeē ma nátecu ndīyi, ni tu cáhīyo ndajéhé yā ni ánuá, te tēe grupo fariseo cájejnúhún de ndinúní jnúhun yáha. ⁹ Te yōhyo ni cuvaā. Te sava tēe cástéén jnúhun cáhán tutu ley yā jeē cácuu jnáhan grupo fariseo, ni candocuññ de, te ni cacahān de:

Tú ni ñn cuéchi cánihīn na síquī tēe yáha. Sanaa te ni cahān ndije ñn ánuá jíin de chí ñn ndajéhé yā. Ma sánñni ni yō nuū Yaā Dios nuu súcuan, áchí.

¹⁰ Te yōhyo ni catejnáhan, te yúhú general jeē quende i chiyō Pablo, te ni ndacu de jniñu jeē na quívi soldado te quenehen de Pablo sava mēhñú i, te na ndívi de ini cuartel.

¹¹ Te jecuáa un ní quee-ni máá Jítoho yō nuū de, te ni cahān yā jíin de:

Pablo, cuandeyí ni rō, chi nájnúhun ni nacani ró jnúhun ri ini ñuu Jerusalén yáhá, suni súcuan nacani nahín ró jnúhun ri ini ñuu Roma, achí yá.

Jeē ní casquíjnáhan jnúhun cahni Pablo

¹² Te nuū ní cundijin te ni cacutútú sava ñayuu hebreo, te ni casquíjnáhan jnúhun, te ni cacahān teyí i jeē ma cáji cuítí i ni ñn ni

ma cóho cuítí i nde núu tu cahni i Pablo. ¹³ Te víhyá gā uū xico tēe hebreo ni cacahān teyí jnúhun yáha. ¹⁴ Te ni jengoo nuū sutú cácujeñnu jíin núu tēe jéhnu cándiso jniñu nuū ñayuu hebreo, te ni cacahān jíin tēe ún:

Ni cacahān teyí ná jeē ma cáji cuítí ná ni ñn níin nde ná tu cahni na Pablo. ¹⁵ Núu súcuan te máá ní jijnáhan ní jíin táca gá tēe cásaaha junta cujéhnu ga, cuacáhān ni jíin general jeē quenehen de Pablo na jéé de nuū junta sajnē, chi cachi ni jēe cácuñi ni stíchí vāha ga ní de. Te máá ná jijnáhan ná cotúhva ná cahni ná de nde ná tu quee de nuū cáhīin tútu ní, achí.

¹⁶ Te sēhe yí cuáha Pablo ni nihīn i jnúhun jeē súcuan ni cacahān, te ni jehēn i cuartel, te ni castúhún i nuū Pablo. ¹⁷ Te ni cana Pablo xiní ñn jnáhan capitán, te ni cahān de:

Condeca ní súchi yáha quíhīn ni jíin i nuū general, chí íyó ñn jnúhun castúhún i nuū de, áchí de.

¹⁸ Te capitán un ní jeca de i cuahān i jíin de nuū general, te ni cahān de:

Pablo, tēe íne vecāa, ni cana de sãñá, te ni cahān de jíin ná jeē quíndeca ná súchi yáha núu ní, chí íyó ñn jnúhun cahān i jíin ní, áchí de.

¹⁹ Te ni jññ general ndaha i cuahān de jíin i ñn lado, te yuhu-ni ni cajnúhún de i:

Na jnúhun cúni rō cahān rō jíin rí, áchí de.

²⁰ Te ni cahān i:

Tēe hebreo ni casquíjnáhan jnúhun de jeē cahān ndahú de jíin ní quenehen ní Pablo sajnē quíhīn de nuū táca tēe cásaaha junta cujéhnu ga, chí cahān-ni de jíin ní jeē cácuñi de jeē stíchí vāha ga de Pablo. ²¹ Te ma cuáha ni jnúhun, chí víhyá gā uū xico de cándetu sáhí de ichí, te ni cacahān teyí de jeē ma cáji cuítí de ni ñn ni ma cóho cuítí de nde núu tú cahni de Pablo, te vijna je cándetu túhva de jeē cuáha ni jnúhun quíhīn Pablo nuū junta, áchí i.

²² Te ni cahān general jíin i jeē ma cáchi i nuū ní ñn ñayuu jeē ni cáhān i jnúhun yáha jíin de, te ni tají de i cuanuhun i.

Jeē ní tají general Pablo cuahān de nuū Félix, tēe cúu gobernador

²³ Yūcuán na te ni cana general uū capitán de, te ni ndacu de jniñu jeē sátúhva de uū ciento soldado cájica jéhé jíin úní xico uxí jeē cáyósó caballo jíin úu ciento jeē

cándāha lanza, chi cahīn jecuāā ún quen-dacoo de jíin Pablo quingoo de nde ñuu Cesarea. ²⁴ Te suni ni ndacu de jniñu jeē coo tūhva caballo jeē cóso Pablo, te condito vāha soldado un Pablo quingoo de nde nuū Félix, tēe cūu gobernador. ²⁵ Te ni tee de ñn carta jeē cahān jnūhun yāha:

²⁶ Máá ná cūu Claudio Lisias, te tēe ná carta yāha cuájeē nuū ní, señor Félix, gobernador kujénu. Ndese tahū cūu ní. ²⁷ Ñayuu hebreo ni cajni i tēe yāha, te je yajni cahni i de núú, te ni jnama ná de jíin soldado, chi ni jini na jēe séhe nación Roma cūu de. ²⁸ Te ni jendeca ná de nuū junta maá i jijnáhan i jeē sándaā i núu na cuēchi ni sáha de. ²⁹ Te ni jini na jēe siquī ley maá i cūu cuēchi cácahān i siquī de, te tu níhín na ni ñn cuēchi siquī de jeē cūu de ni jeē cóne de vecāa. ³⁰ Te ni nihīn na jnúhun jeē sava tēe hebreo ni casquijnáhan jnūhun de jeē cahni de tēe yāha, te jeē yúcuan cūu jeē yachī ni tají ná de cuajeē de nuū ní. Te suni je ni cahān na jíin ñáyuu cájicān cuēchi siquī de jecoo i nuū ní, te jiñā cahān i jíin ní na cuēchi ni sáha de. Je ni cahān yō, achí carta.

³¹ Te ni cajeca ñuú-ni soldado Pablo cuangoo jíin de nde ñuu Antípatris, nájñūhun ni tahū jniñu nuū de. ³² Te inga quivī ni canandió cóo-ni soldado cájica jéhe cuánungoo nde cuartel, te soldado cáyósó caballo cuangoo de jíin Pablo. ³³ Te ni jinūcoo ñuu Cesarea, te ni cachihí carta ndaha gobernador, te suni ni cajeni Pablo nuū de. ³⁴ Te ni cahu gobernador carta un. Te ni cajñūhún de ndé ñuu cūu Pablo, te ni jini de jeē tēe ndañū Cilicia cūu Pablo. ³⁵ Te ni cahān de:

Nde na quécōo tēe cájequin cuēchi siquī rō te cuni nahín rí jnūhun cahān rō, achí de.

Te ni cahān de jeē na quíndihyū Pablo ini palacio ndiyi Herodes.

Jeē ni cáhān Pablo jehē maá de nuū Félix

24

¹ Te nuū uhún quivī te Ananías, sutū kujénu ga, ni quee de ñuu ún. Te suni ni quecoo sava tēe jénu cándiso jniñu nuū jnáhan ñuu de hebreo jíin ñn tēe cūu abogado, nání de Tértulo. Te ni quivīcoo de nuū gobernador jeē cahān de cuēchi siquī

Pablo. ² Te ni cana gobernador Pablo ni quee de. Te ni quejéé Tértulo cahān de cuēchi siquī Pablo, chi suhva ni cahān de jíin Félix:

Tátā gobernador, siquī jeē cūu ní tóhō jeē vāha ndíchí ndácu ní jniñu, te jeē yúcuan tú na jnūhun cájejnáhan iyó, chi cáyūcu vāha yó. ³ Te na cútahū ná, chi tāca quivī vāha cūu tāca nuū ndácu ní jniñu jeē vāha sáha ní, tátā Félix. ⁴ Te tu cúní na snāā na cuéhē tiempo ni, te cáhān ndahú ná jíin ní cuni nahín ní jecu-ni jnūhun cahān na jíin ní. ⁵ Chi ni cajini na tēe yāha jēe cūu de ñn tēe tíxín, te sáha de jeē cánacuajnáhan máá jnáhan ñuu ná hebreo ní cáhnu-ni tāca lado, te cūu de tēe cújénu nuū ñáyuu cascuáha jnūhun tēe nání Jesús jeē ní jehnu ñuu Nazaret. ⁶ Te suni je ndúcú de jeē stívī de tācá jniñu ini templo iī, te ni cajni ná de. Te cácuni na sándaā na siquī de núú, nájñūhun cáhān ley ñuu ná. ⁷ Te ni jinū-ni general Lisias, te ni quende fuerza de tēe yāha núu na jijnáhan ná. ⁸ Te ni ndacu de jniñu jeē tāca ná jeē cácahān na cuēchi siquī tēe yāha quijicoo ná ndé nuū ní. Te vijna cuu stíchí maá ní de, te jíin jnúhun cahān maá de te cuni ni jēe ni sáha de cuēchi jeē cácahān na jíin ní, achí Tértulo.

⁹ Te suni ni cacahān tēe hebreo jeē ni jínūcoo jíin de jeē iyó ndāā jeē súcuan cūu cuēchi Pablo. ¹⁰ Yūcuán na te ni sáha gobernador seña nuū Pablo jeē na cáhān de, te ni cahān Pablo:

Je jíiní na jēe cuehē cuiyā cūu ní gobernador ñuu yāha, te jeē yúcuan nújnahan ni na jēe sándaā ni siquī ná. ¹¹ Chi máá ní cuu nanducú ní te cuni ni jēe sáá máá úxī uū quivī ni cuu jeē ni jéhēn ná ñuu Jerusalén jeē chiñúhún ná Yaā Dios. ¹² Te tu ní stáhān jnáhan ná jíin ni ñn ñayuu, ni tu ní stóna ná ñáyuu ini templo ni ini vehe iī sinagoga ni ini maá ñuu. ¹³ Ni tú na jíin stéen de jeē iyó ndāā jnūhun cácahān de siquī ná. ¹⁴ Te jnūhun cáhān cají ná jíin ní cūu jeē chiñúhún ná Yaā Dios tāca jíí na, te suu cūu jeē chiñúhún ná maá Jesucristo, te máá jnúhun yāha-ni cūu jeē cácahān de jeē stívī ná. Te cándíje ná tāca jnúhun yósó núu tútu ley yā jíin núu tútu jeē ní catee tēe ni canacani jnūhun ya nde jenahán. ¹⁵ Te inuú

ñúhun ni na jíin de jeē sāha Yaā Dios jeē nátecu tāca ndíyí, cúu ñayuu ní casáha vāha jíin ñayuu ní casáha néé. ¹⁶ Te jeē yúcuan máni jeē vāha ndíhví ni na sāha ná. Súcuau te vāha íyó ni anuá na jéē tú na cuēchi ndéé síquī na núu Yaā Dios ni nuū ñáyuu.

¹⁷ Te ni jica cuu ná táca ñuu jicá jecu cuiyā, te sáa te ni ndee na jíin xúhun jéē ní cajēhe tāca ñayuu jeē chindéé ñáhán i jnāhan ñuu na cáyūcú Jerusalén. Te suni ni ndee na jéē socó na quití nuū Yaā Dios. ¹⁸ Te íne ná ini templo síquī jeē cuchi ná ndundoo ná núu Yaā Dios te socó ná. Te jecu jnāhan ñuu ná hebreo jeē véjicoo Asia ni cajito de sañá ini templo, te tú na ñayuu cuehē ni cóyūcu jíin ná jeē sávaā i. ¹⁹ Te núu ni stívi ná ¿te naun tu ní quíjicoo tēe Asia un návāha suni cahān de ndese ni stívi ná? ²⁰ Chí tēe ni quecoo yāhá na cáhán maá de núu na cuēchi ni canihīn de síquī na ná ni indichi na núu junta tēe cácujeñhu ini ñuu ná. ²¹ ¿Te chí cájequin de cuēchi síquī na jéē ni cáhán jee ná suhva ná ni iyo ná nuū junta naún? Chí ni achi na jéē cándíje ná jéē nátecu tāca ndíyí, te jeē yúcuan cájequin ni cuéchi síquī ná, ni achi na jíin de. Achí Pablo.

²² Te Félix chi je jíni vāha de ndese cácujeñhu ñayuu Cristo. Te jeē ní jini sōho de jnūhun yāha te ni stétu de un jíināhan, te ni cahān de:

Nde na quee general Lisias te cajnūhun gá rī síquī jniñu yāha, achí de.

²³ Te ni ndacu de jniñu nuū capitán jeē na cóne ga Pablo vecāa, te ma cási jeē sāha de jeē cuní de, te ni ma cási jeē quíjicoo jnāhan de jeē chindéé ñáhán i de.

²⁴ Te ni cuu jecu quiví, te ni quiji tucu Félix jíin ñasihí de Drusila, te ñahan hebreo cúu ña. Te ni ndacu de jniñu jeē na quíji Pablo návāha nacani de jnūhun ndese candíje yó Jesucristo. ²⁵ Te ni cahān Pablo jíin de jeē cánuú sāha yó jniñu ndaā, te cánuú coto yó máá yó jeē ma sāha yó jniñu stívi, chí quiví sándihí te sándā Yaā Dios jniñu ndívii ñayuu ndese ni casáha i. Te ni yūhu Félix te ni cahān de:

Vijna te cuáhán, te inga quiví jeē núne ri te cana ri rohó quiji ró, achí de.

²⁶ Te ñúhun ni de jeē cuāha Pablo xūhun núu de te siáa de quenda de vecāa. Jeē

yúcuan tijni jínu ni cana de Pablo ni canda-jnūhún de. ²⁷ Te súcuau ni cuu uū cuiyā, te sáa te ni nucuiñí Porcio Festo nuū Félix. Te cuní Félix jeē na cúsi ni ñayuu hebreo jíin de, te jeē yúcuan ní squéndoo de Pablo vecāa.

Jeē ni índichi Pablo nuū Festo

25

¹ Te sáa únī quiví jeē ni quiví Festo cuu de gobernador Judea, te ni quenda de ñuu Cesarea cuahān de ñuu Jerusalén. ² Te tāca sūtū cácujeñhu jíin tēe cácujeñhu nuū ñáyuu hebreo ni jinūcoo nuū Festo, te ni cajicān cuēchi síquī Pablo. ³ Te ni cacahān ndahú jíin Festo jeē núu vāha ni de te na nátaji de Pablo ndiji ñuu Jerusalén. Súcuau ni cacahān, chí je ni casquíjnāhan jnūhun jeē cahni Pablo ichi. ⁴ Te ni cahān Festo jeē yíndesi vāha Pablo nde ñuu Cesarea, te je jéni ni de jeē jecu na quiví te nuhūn maá de ñuu Cesarea. ⁵ Te jeē yúcuan ní cahān de jíin táca tēe ún:

Tāca níhín jeē cándiso jniñu, na quíngoo yó nde Cesarea, te yúcuan cácujeñhu ni cuéchi síquī de te núu íyó cuéchi de, achí de.

⁶ Te ni ine de yúcuan únā chí úxi-ni quiví, te ni ndee de ñuu Cesarea, te inga quiví ni cucōo de mesa nuū sándā de jniñu, te ni cahān de jeē na quíji Pablo. ⁷ Te je cáhín tēe hebreo jeē ní quíjicoo nde ñuu Jerusalén. Te ni quee Pablo, te ni cajicó ndúu nuū de, te ni caquejéé-ni cácujeñhu tēyí síquī de, te tú na jíin ní cástéén jeē íyó ndāā jnūhun cácujeñhu. ⁸ Te ni cahān Pablo jehē maá de:

Tu ní sāha ná ni ñn cuēchi síquī ley ñuu na jéē cácuu ná ñayuu hebreo, ni síquī templo, ni síquī rey nación Roma, achí de.

⁹ Te Festo chí cuní de jeē cúsi ni ñayuu hebreo jíin de, te ni cajnūhún de Pablo:

¿A tu cuní rō quínuhun rō Jerusalén te yúcuan sándā rī síquī rō? achí de.

¹⁰ Te ni cahān Pablo:

Je índichi na núu cūndaā jniñu jeē ndácu máá tēe cúu rey nación Roma, te yāha cúu nuū cánuú cūndaā jniñu ná. Máá ní je jíni vāha ni jéē tú na cuēchi ní sāha ná síquī tāca jnāhan ñuu ná hebreo. ¹¹ Chí núu ni sāha ná ñn cuēchi xeēn jeē jíni ñúhún cuu ná, te íyó vāha jeē cúu na núu súcuau. Te núu tu íyó ndāā jnūhun jeē casácujeñhu tēe yāha síquī

ná, te ni ñn tēe ma cúu chihi de sãñá ndaha tēe yáha jíjnáhan de. Núu súcuan te cúní na quihín na núu maá rey nación Roma sãndaã de siquĩ na, áchí de.

¹² Te ni cajnúhun Festo ndese cájeni ni tēe cándiso jniñu jíin de. Yũcuán na te ni cahán de jíin Pablo:

Je ni cahán rō jeē cuní rō quihín rō nuū maá rey nación Roma sãndaã de siquĩ rō. Núu súcuan te quihín nahín ró nuū de, áchí de.

Jeē ni índichi Pablo nuū rey Agripa

¹³ Te ni cuu jecu quivĩ, te rey Agripa jíin Berenice ni jecondéhé de Festo nde ñuu Cesarea. ¹⁴ Te tijni quivĩ ni coyúcú de yũcuán. Te ni nacani Festo jnúhun siquĩ Pablo nuū rey un. Te suhva ni cahán de:

Félix jeē ní cuu de gobernador, ni stóo de ñn tēe íne vecãa yáhá. ¹⁵ Te ná ni jehēn ná ñuu Jerusalén, te sutū cácujeñhu jíin ñáyuu jéñhu cándiso jniñu nuū ñáyuu hebreo ni jinũcoo i nuū na cájequin i cuēchi siquĩ tēe ún, te cácuni i jeē na cúu de. ¹⁶ Te ni cahán na jíin i jeē tu íyó costumbre tãca tóhō Roma jeē cahni de ñn tēe súcuan-ni, chi jíni ñúhún condichi de jíin ñáyuu cájequin cuēchi siquĩ de, návãha cahán de jehē maá de te cundaã núu íyó cuēchi de. ¹⁷ Yũcuán na te ni quecoo tútú i yáhá. Te inga quivĩ ún tu ní cúcuéé ná, chi ni cucōo na mesa nuū sãndaã na siquĩ cuēchi, te ni ndacu ná jniñu jeē na quíji tēe ún. ¹⁸ Te cáhiin ñáyuu cájequin cuēchi siquĩ de. Te ni jeni ni na jēe iyó cuēchi xeēn cahán de siquĩ tēe un núu, te tú cuiti. ¹⁹ Chi jeē cácahán de cúu máni siquĩ jnúhun cácañdije-ni máá de, jíin siquĩ ñn tēe nání Jesús jeē jé ni jihī de, te Pablo cahán ñhin de jeē ní natecu ndije tēe ún. ²⁰ Te tu ní cújnúní cuiti ni ná ndese sãndaã ná, te ni cajnúhun ná de núu cúní de quihín de ñuu Jerusalén te yũcuán cundaã siquĩ de. ²¹ Te máá Pablo ni cahán de jeē cuní de quihín de nuū Augusto, rey yō nación Roma, te yũcuan sãndaã rey cuēchi de, ni achi de. Te ni cahán na jēe na cóne de vecãa nde tají ná de quihín de nuū rey un, áchí Festo.

²² Yũcuán na te ni cahán Agripa jíin Festo:

Suni cúní maá ná cuni sōho ná jēe cahán tēe un, áchí de.

Te ni cahán Festo:

Sajnē te cuni sōho ní jēe cahán de núu súcuan, áchí de.

²³ Te inga quivĩ un ní quecoo Agripa jíin Berenice. Te cáñuhun de sahna cújéñhu de, ni quivĩcoo de ini vehe juzgado jíin táca general jíin tēe cácujeñhu ini ñuu ún. Te ni ndacu Festo jniñu jeē na quíji Pablo. ²⁴ Te ni cahán Festo:

Cáhán na jíin ní, tátã rey Agripa, jíin ndihi níhín jēe cáyũcu jíin yó yáhá vijna. Yáha cúu tēe jeē siquĩ de ni candonda ndivii jnáhan de hebreo ñuu Jerusalén jíin ndé ñuu Cesarea yáhá, te máni cácahán i jeē tú vãha jeē cótecu gã de. ²⁵ Te jeni ni maá ná jēe tú na cuēchi xeēn ni sãha de jeē cúu de. Te je ni cahán de jeē cuní de quihín de nuū rey Augusto jeē sãndaã rey un siquĩ de, te jeē yũcuan ní cahán na jēe tají ná de quihín de nuū rey un. ²⁶ Te tu cúcáñhu ni ná na jnúhun tee ná núu tuntu quihín jíin de nuū rey yō. Jeē yũcuan ní ndacu ná jniñu ni quee de nuū yō jijnáhan yó, te cánuú gá nuū maá ní, tátã rey Agripa. Te stíchí ni de návãha nihín na jnúhun tee ná siquĩ de, te quihín jnúhun un jíin de nuū rey. ²⁷ Chi tu jéjñiñu cuiti jeē tají ná ñn preso quihín te núu tú castúhun ná nuū tuntu na cuēchi ni sãha de, áchí Festo.

Jeē ni cáhán Pablo jehē maá de nuū rey Agripa

26

¹ Yũcuán na te ni cahán rey Agripa jíin Pablo:

Vijna te jēhe ri jnúhun cahán rō jehē maá ró, áchí de.

Te Pablo ni sãha de ndaha de jeē ní quejé de cáhán de, te suhva ni cahán de:

² Tátã rey Agripa, cúsiñ ni ná vijna jeē cúu cahán na jíin ní siquĩ ndihi jeē casájnúhún ñáyuu ñuu yō hebreo siquĩ ná. ³ Chi je jíni vãha máá ní táca jēe ní tajnúni ñáyuu ñuu yō hebreo jíin táca jnúhun jeē tu cáhiin inuú i jíin. Jeē yũcuan cáhán ndahú ná jíin ní jeē coo paciencia ni cuni sōho ní jnúhun cahán na jíin ní.

Jeē ní cachi Pablo ndese ni sãha de nde ná tu sama ya ini de

⁴ Je cájini táca jnáhan ñuu yō hebreo ndese ni sãha ná ini ñuu nuū ní cacu ná jíin ini ñuu Jerusalén nde ná lulí ná. ⁵ Te

núu cácu ni maá de cahān ndaā de, te je cájini de sãña jéē ndé lulí ná ni quívi ná nuū grupo fariseo, te grupo un nihin ga cánducú ndéyi de squícu de ley yā vésú táca gá grupo tēe nación yō. ⁶ Te ñúhun ni na jnúhun ni jejnúhun Yaā Dios nuū táca jíi yō jeē nastécu yā ndíyi, te maá síquī táca jnúhun yáha-ni cúu jeē cájequin de cuēchi síquī ná. ⁷ Chi maá yó jeē cácu yó jnáhan ndihúxi uū yucūn ñayuu Israel, cáñúhun ni yō jnúhun ni jejnúhun ya jeē nastécu yā ndíyi, te jeē yúcuan nduú ñuú cáchiñúhún yó Yaā Dios te cájejniñú yó núu yā. Te suni súcuan ñúhun ni maá ná, tátā rey Agripa, te síquī jeē nácani ná jnúhun jeē natecu ndíyi cúu jeē cájicān jnáhan ñuu yō hebreo cuēchi síquī ná. ⁸ ¿Te chí má nastécu Yaā Dios táca ndíyi cájeni ni ní naún?

Jeē ní cachi Pablo ndese ni jito xeēn de ñayuu cácdíje

⁹ Te maá ná chi ni jeni ni na jéē jíni ñúhún ndonda ná síquī ñayuu cácdíje i Jesús, Yaā ní jehnu ñuu Nazaret. ¹⁰ Te súcuan ni sáha ná ini ñuu Jerusalén, chi táca sūtū cácujeñu ni cajēhe de jnúhun jeē cóndiso jniñú ná chuhun ná cuéhē ñayuu vecāa síquī jeē cácdíje i Jesús, te íyó váha ni na núu cájehni de i. ¹¹ Te tijni jínu ni sáha ndevāha na jíin i ini táca vehe i sinagoga jeē ni sáha fuerza na i jeē na stóo i jnúhun cácdíje i. Te xeēn ni quiñi ni na núu i, chi nde ñuu jicá ní jehēn ná ni sáha xeēn na jíin i.

Jeē ní cachi tucu Pablo ndese ni sama ya ini de

(Hch. 9.1-19; 22.6-16)

¹² Te sūtū cácujeñu ni cajēhe de jnúhun jeē cóndiso jniñú ná quiñin na sáha xeēn na jíin ñayuu cácdíje cáyūcú ñuu Damasco núu. ¹³ Te cuahān ná ichi ún, tátā rey, te caxū cúu, te ichi ándiví ní quiñi ñn nduva ni ndindéē ndaxín núu na jíin núu tēe cuango jíin ná, te víhyá gā ndíi vésú niāndii. ¹⁴ Te ndihí ná ní cacotúú ná nuū ñúhun. Te ni jini sōho ná ñn jnúhun ni cahān jíin ná jíin jnúhun yuhu yó hebreo: Saulo, Saulo, ¿najehē jito xeēn rō ruhū? Chi jeē sáha ró súcuan cúu nájñúhun síquī jeē tu jéndije ti, te jéñú yatá tí xinī pulla, te súcuan stóho ti maá tí, áchí. ¹⁵ Yūcuán na te ni cahān ná: ¿Na nihín cúu jeē cahán, Tátā? áchí ná. Te

maá Jítoho na ní cahān yā jíin ná: Maá rí cúu Jesús, te jeē jito xeēn rō ñayuu cácdíje i ruhū cúu jeē jito xeēn rō ruhū. ¹⁶ Ndonda condichi rō, chi vēji ri nuū rō jeē tejniñu ri rohó sáha ró jniñu cúní rī, te nacani cájí ró jnúhun táca jéē ní jito ró vijna, jíin jéē steén gā rī nuū rō táca quiñi quiñi. ¹⁷ Te jnama ri rohó núu táca jnáhan ñuu rō jíin núu ñayuu táca gá nación, chi nuū ñayuu un tájí rí rohó quiñin rō. ¹⁸ Te tájí rí rohó quiñin rō nuū i, chi nájñúhun nanune ró tñúú i cúu jeē steén rō jnúhun ri nuū i te jecūhun ni i. Chi ñayuu ná tu candíje i ruhū, nájñúhun cájica i nuū néē. Te jeē candíje i ruhū, quiñi i nuū luz rī, te tuá quiñi i chíji jniñu jeē cuní jexeén jeē cúu Satanás, chi sa suhva quiñi i chíji jniñu cúní maá rí. Te tájí rí rohó quiñin rō nuū i, návāha candíje i ruhū te cone cáhnu ni rī nuū cuéchi i. Yūcuán na te inuú nihín tahú i jíin táca gā ñayuu jeē ni sándoo ri anuá i, áchí yá jíin ná.

Jeē ní cachi Pablo ndese ni jetáhú de jnúhun ni cahān yā

¹⁹ Jeē yúcuan tu ní sánihni ni na núu jnúhun ni cahān yā ichi ándiví jíin ná, tátā rey Agripa. ²⁰ Chi ni jetáhú ná, te ni nacani ná jnúhun ya xihna gā nuū ñayuu ñuu Damasco, te sáa te ni nacani ná jnúhun ya nuū ñayuu ñuu Jerusalén jíin ní región Judea jíin núu ñayuu táca gá nación. Te jnúhun ni nacani ná núu i cúu jeē na nácani ni i jeē stóo i cuéchi i te nasāma ini i sáha Yaā Dios, te na sáha i jniñu váha jeē steén jeē ní nasāma ini i. ²¹ Te síquī jeē súcuan ni nacani ná jnúhun te ni cajñi jnáhan ñuu yō hebreo sãñá ini templo, te ni cacuni i cahni i sãña núu. ²² Te ni chindéé ñáhán Yáa Dios sãñá, te jeē yúcuan índichi nihin na ndé vijna nácani cájí ná jnúhun ya nuū ñayuu cácujeñu jíin núu táca-ni ñayuu. Chi tu chíso gá na jnúhun síquī jnúhun jeē ní nacani Moisés jíin táca gá tēe ni canacani jnúhun Yaā Dios nde jenahán. ²³ Te ni cundaā jnúhun ni canacani de un jéē cánuú ndoho Cristo nde cuu yā, te xihna gā maá yá natecu vésú táca gā ndíyi, te súcuan steén cájí yá nuū ñayuu jeē jnáma ya i, cúu ñayuu nación yō Israel jíin ñayuu táca gá nación, áchí Pablo.

Jeē ní nducú ndéyí Pablo scandíje de Agripa jnūhun Jesús

²⁴ Te súcuan ni cahān Pablo jehē maá de, te ni cahān jee Festo:

Ni nduloco rō, Pablo. Siqūī jeē ni scuáha ndasí ró te jeē yúcuan ní tīvī xínī rō, áchí de.

²⁵ Te ni cahān Pablo:

Tu ní tīvī xínī na, tátā Festo, chí sa suhva íyó cájī ndáā jnūhun cáhán na. ²⁶ Te máá rey Agripa je jíní vāha de táca jniñu ní íyo jeē ní nacani ná, te tu yúhú ná cahān na táca jnúhun yáha, chí je jíní vāha na jéē jíní de táca jnúhun yáha, chí tú sāhi ní cúu táca jniñu yáha. ²⁷ Tátā rey Agripa, ¿á cándíje ní jnúhun jeē ní cacahān tēe ni canacani jnūhun ya nde jenahán? Jéni ni na jéē candíje ní, áchí Pablo.

²⁸ Yūcuán na te ni cahān Agripa jín Pablo: Va jéni ni rō jeē jín jecu jnūhun ni cahān rō te sáha ró jeē candíje ri Cristo, achí de.

²⁹ Te ni cahān Pablo:

Vésú jín jecu-ni jnūhun chí jín cuéhē, te jícán tahu na jéē maá ní jín táca gá tēe cájini sōho jnūhun cáhán na vijna, na cándíje ní nájñūhun cándíje máá ná, te tu cúní na jéē cónuhni ní nájñūhun núhni na.

³⁰ Te ni ndihí ni cahān Pablo táca jnúhun yáha. Te ni ndocuiñī rey jín gobernador jín Berenice jín táca gá tēe cácujuhnu cáyūcu jín de. ³¹ Te ni cacujiyo de, te ni candajñūhun sñn máá de:

Tú ni ñn cuēchi ní sáha tēe yáha jéē cúu de ni jeē cóne ga de vecāa.

³² Te ni cahān Agripa jín Festo:

Cuu siáá ni tēe yáha núu jeē tu ní cáhán maá de jeē quihín de nde nuū rey yō nación Roma nuú, áchí de.

Jeē ní catajī de Pablo cuahān de ñuu Roma

27

¹ Te ni cundaā jeē quihín Pablo jín barco nde Italia, te suni quingoo ná jín de. Te Pablo jín sava ga tēe cáhīn vecāa ni quīvīcoo de ndaha ñn capitán naní Julio jeē quíndēca de tēe un ndé Italia. Te Julio cúu ñn jnáhan grupo soldado naní Augusto. ² Te nde ñuu Adramitio nuū cájecuiñī barco ni quenda ñn barco ni quee, te ni quīvīcoo ná, te quihín barco un táca ñuu jeē yíhi chíji Asia jeē yúcu yumar. Te suni cuahān

Aristarco jín ná, te máá de cúu tēe ñuu Tesalónica región Macedonia. ³ Te inga quivī ni jinūcoo ná ñuu Sidón nuū cájecuiñī barco. Te Julio ni cundáhú ni de Pablo, te ni jēhe de jnūhun ni jecondēhe Pablo táca amigo de, te ni cachindéé ñáhán i de. ⁴ Te ñuu yúcuan ní quenda barco cuahān jín ná. Te siqūī jeē níhin yíhi tachī te tu ní cúu quihín yohó barco, te ni tee xín barco cuahān jín ná xiin isla Chipre, ñuhun jeē íne sñn nuū ndúte, te lado jecó barco ni quendōo Chipre. ⁵ Te ni cayāha ná yumar Cilicia jín Panfilia cuahān ná, te ni jinūcoo ná ñuu Mira ndañúu Licia.

⁶ Te ñuu yúcuan ní nihín capitán ñn barco jeē véji ñuu Alejandría te quihín ichi Italia, te ni cahān de jín ná ni quīvīcoo ná barco un. ⁷ Te cuehē quivī ni cahīn na núu ndúte jín barco, chí cuéé ní jica, te fuerza-ni ni jinūcoo ná yuñúu Gnido. Te tuá ni jēhe tachī un jnúhun quihín yohó barco, te ni cayāha ná núu jnúhma tachī xiin ñúu Salmón jeē íne nuū isla Creta. ⁸ Te yōhyo ni canducú ndéyí tēe cáscaca barco un, ní yáha jín ná ñí yumar xiin Creta. Te ni jinūcoo ná ñn lugar naní Buenos Puertos nuū cájecuiñī barco, te yajni un íne ñuu Lasea.

⁹ Te je ni cuu cuehē quivī ni cajica ná jín barco. Te je yajni quejéé vico míjin, te yúcuan cúu tiempo jeē yíjica barco te sanaa te coo jnūndóho nuū mar. Te ni cahān níhin Pablo jín de:

¹⁰ Tátā jijnáhan ní, jíní na jéē yóhyo yí coo viaje yáha, te quiji jnūndóho siqūī barco, te naa barco jín ndajniñu, te nde maá yó sanaa te cuu yō, achí de.

¹¹ Te tu ní chúsóhó capitán jeē cahán Pablo, chí sa suhva jeē cahán tēe scáca barco un jín tēe chíi barco. ¹² Te siqūī jeē tu íyó váha lugar nuū ni jécuiñī barco un jéē cóyūcú de ñí vico míjin, te ni cajeni ni cuehē gā de jeē vāha ga núu quendacoo de yūcuán. Chí cájini ni de jeē núu cuu te jinūcoo de ñuu Fenice te yūcuán coyūcú de vico míjin. Chí Fenice suni íne yundúte isla Creta nuū cájecuiñī barco, te ndijin ichi noroeste jín suroeste.

Jeē ni jéquihí ñn tachī níhin jeē stóna ndute mar

13 Te ni jequĩhi vĩta táchĩ ichi sur, te ni cajeni ni de jeē jinú de Fenice nuú, te ni cascáca ga de barco jíca jíin de xiin Creta. 14 Te ni cunúu jecu gā, te ni quejéé-ni ñin tachĩ níhin ndasí jeē naní táchĩ nordeste. 15 Te tuá ni cúu ga quihĩn yohó barco, chi ni chundahá-ni tachĩ cuahān jíin, te ni casiáá-ni de jeē cascáca de, te cháha chúcuan cuahān barco jíin ndihĩ ná sáha tachĩ. 16 Te ni yāha jíin ná xiin isla lulí jéē naní Claudia, nuū jnũhma tachĩ. Te vēsú súcuan te yōhyo uhū ni cascáca ná barco lulí jeē ndiquín yatā barco cáhnu. 17 Te ni casquívĩ ná ñini barco cáhnu. Te ni casucun núu de barco cáhnu jíin yoho. Te cáyũhú de jeē quihĩn barco nuū yaxín ndute nuū naní Sirte te jnĩ nuū ñĩti, te jeē yúcuan ní casnúu de sahma cóquin jeē stechĩ te jíca barco. Te ni casiáá de jeē na quihĩn ndé chi chundahá táchĩ. 18 Te tu jécuiñĩ cuĩti jeē yĩhi tachĩ níhin. Te ñnga quivĩ un ní caquejéé de cájete de ndajníñu ndíso barco, návāha nduñama gā barco te ma queé chĩji ndute. 19 Te quivĩ uní ni cajēhe núu ná ndaha ni cajete ná máa ndajníñu jéjníñu barco. 20 Te cuehē quivĩ tu ní cájito ná níandii ni quĩmi siquĩ jeē ñin vicō, ni tu jécuiñĩ cuĩti tachĩ níhin ún, te tuá cáñũhun ni na cácu ná.

21 Te ni cuu quivĩ jeē tuá cáyeji cuĩti na stáa. Te ni jecondichi Pablo sava mēhñu téé ún, te ni cahān de:

Tátā jijnáhan ní, núu ní cájetáhú ní jnũhun jeē ni cahān ná te ma quéndacoo yó Creta nuú, te ni ma cóto yó jnúndóho yáha ni ma náa ndajníñu núu. 22 Te vijna cáhán níhin na jíin ní jeē cuandeyĩ ni ní jijnáhan ní, chi ni ñin ní má cúu ní, vēsú naa barco. 23 Chi jeē cúni ni quiñi ñin ndajéhé jeē ní tají máa Yāa Dios nuū ná. Chi máa yá cúu Jitoho ná, te jéjníñu ná núu yā. 24 Te ndajéhé yā ún suhva ni cahān yā jíin ná: Pablo, ma yũhu ró, chi vāha-ni jinū rō nuū rey nación Roma, te jeē siquĩ rohó te sáha Yāa Dios jeē cácu ndihĩ tēe cáhĩn jíin ró ñini barco yāhá, áchĩ yá jíin ná. 25 Tátā jijnáhan ní, ma yũhu ní núu súcuan, chi máa ná cúcáhnu ni na Yāa Dios jeē coo nájnũhun ni cahān ndajéhé yā jíin ná. 26 Te jinū nahín yó ñin isla, te ma jinú yachĩ yō nuū quíngoo yó, áchĩ de.

27 Te ni cuu uxĩ cuñ cuñ jecuáa nde jeē ní

quejéé táchĩ, te jíca barco nuū mar Adria, te cháha chúcuan cuahān barco sáha tachĩ. Te máa jecuáa ún te jeē ní cuu sava ñuú te cájeni ni tēe cascáca barco jeē jé cuacuyajni jinū barco ñuhun íchi. 28 Te ni casínga de ñin jeē cáchicuāhá de nasaa cúnu ndute, te ni cajini de jeē iyó ócō xahūn ñin metro. Te ni jíca barco jecu gā te ni casínga tucu de, te ni cajini de jeē iyó ócō uxā na metro. 29 Te cáyũhú de jeē jécujnáhan barco jíin toto, te ni cajihni de cuñ cāa gancho náhnu yatā barco un, te ni cascāne de nde jehē ndúte návāha chituu te jecuiñĩ barco. Te yōhyo jnāa de jeē na cúndijin yachĩ. 30 Te tēe cascáca barco un ní canducú de cunu de quíngoo de jíin barco lulí te cácu de nuū jnúndóho quiñi siquĩ barco cáhnu núu. Jeē yúcuan ní casnúu de barco lulí un núu ndúte, te casáha-ni de nájnũhun jeē snúu de ñnga cāa gancho ichi núu barco návāha tú cuni ñayuu jeē cácu de cunu de quíngoo de. 31 Te ni cahān Pablo jíin capitán jíin táca soldado:

Núu tú coyūcu tēe yáha ñini barco cáhnu jíin yó, te ma cácu cuĩti maá ní jijnáhan ní, áchĩ de.

32 Yūcuán na te soldado ni cajehnde de yoho núhni barco lulí, te ni jneni-ni cuahān.

33 Te nuū cuácundijin te ni cahān Pablo jíin táca téé un jéé na cáji de stáa. Te suhva ni cahān de:

Vijna iyó uxĩ cuñ quivĩ jeē cándito ní te tu cáyeji cuĩti ni stáa. 34 Te cáhán ndahú ná jíin ní jeē na cáji ni stáa, návāha nanihĩn ni ní te cácu ní, chi ni ñin yó má cúu, ni ma tují cuĩti yō, áchĩ de.

35 Te ni ndihĩ ni cahān de jnũhun yáha, te ni quihĩn de ñin stáa, te mēhñu táca ñayuu un ní nacuatáhú de nuū Yāa Dios, te ni tahú sáva de stáa ún, te ni quejéé de yéji de. 36 Yūcuán na te ni candusĩ ni ndihĩ de, te suni ni cayeji de stáa. 37 Te ndivii na jéé cáñũhun ná ñini barco cúu uũ ciento unĩ xico xahūn ñin ná. 38 Te ni cayeji vāha ndihĩ ná. Yūcuán na te ni cajete de trigo cuahān nuū ndúte un, návāha na nduñama gā barco.

Jeē ni queé barco chĩji ndute

39 Te nuū ní cundijin te ni cajito de ñuhun, te tu ní cánacuni de ndé nuū cúu. Te ni cajito de nuū ñne cuñi ndute, te suni máa ñĩti

cúu, te cájeni ni de jinū de yūcuan jíin barco núu na cúu núu. ⁴⁰ Te ni cajehnde de yoho núhni cāa gancho yūcuan, te ni caquendōo cāa un núu mar. Te ni canandají de yujnu jeē scotú chíi barco, te ni nacata caa de sahma cóquin ichi núu návāha chundahá táchi barco, te ni quejéé caca quihīn jíin de ichi núu iyó ñiti. ⁴¹ Te ni jinū barco nuú níhin náquijnáhan ndute. Te ni quēe barco nuū ñiti ñuhun chíi ndute, te ni jññ-ni ichi núu te tuá ni jíca cuiti, te yatā barco un ní cahya-ni jeē níhin ni caní suhmā ndute mar. ⁴² Yūcuán na te ni candajnūhún soldado jeē cáhni de tāca preso návāha ma sūte i te cunu i quingoo i. ⁴³ Te cúní capitán un jeē cācu Pablo, te ni jesicoo de. Chí sa ni cahān de núu ndé ñayuu jiní sūte te xīhna gā i na nūngoo i sūte i nuū ndúte, te na quénda-ni i quihīn i nuū ñuhun íchi. ⁴⁴ Te suni sūcuan na quécōo ndihī i quihīn i, sava i coso candá i jíin yujnu cúnu te sava ga i jíin pedazo yujnu barco. Te sūcuan ni cacācu ndihī ná ní jinūcōo ná ñuhun íchi.

Jeē ni íne Pablo isla Malta

28

¹ Te nuū ní cacācu ná te ñayuu cáyūcu yūcuan ní cacachi i nuū na jéē isla un nání Malta. ² Te ñayuu un ní cacundáhú ni i sāña jíjnáhan ná, te ni cascáyú i ññ ñuhūn cáhnu, te ni cacahān i jíin ná jeē nasaā ná, chí mījin sáha jeē cúun saū. ³ Te ni stutú Pablo jecu tujnu íchi. Te jeē jnāā de tujnu un núu ñuhún te ññ coō xeén jínu tí ni quenda tí tujnu un jéē ní cujihní, te ni chiyuhú-ni tí ndaha de. ⁴ Te ñayuu cáyūcu yūcuan ní cajito i jeē ndíta caa coō un yíyuhú tí ndaha de, te ni cacahān i:

Tēe yáha vā sanaa te ni jehni de ndīyī núu sūcuan, te vēsú je ni cācu de nuū mar, te máá yāā sándaā jññū ñayuu tu jéhe ga yā jññuhun jeē cótecu de, áchí i.

⁵ Te ni caja Pablo ndaha de, te ni ñinga coō un núu ñuhún, te tú na vé ni ndóho de. ⁶ Te cándētu tāca ñayuu jeē chūhun i cuññi de chí cotúú-ni de te cuu de. Te ni cunahán téyí cándētu i, te ni cajito i jeē tú na vé ni ndóho de. Yūcuán na te ni nasāma cájeni ni i, te ni cacahān i jeē ññ yaā cúu Pablo.

⁷ Te yajni yūcuan íyó ñuhun tēe cújéhnū ga Malta un, nání de Publio. Te ni cana tēe un sāña jíjnáhan ná, te ni jéhe núu de vehe de ni coyūcu ná jíin de unī quivī, te ni jito yúcún de sāñá. ⁸ Te tátá Publio cāa de, chí ndóho de cuehyī quīji jíin cuehyī ñññ. Te ni jecondēhe Pablo tēe ún, te ni jicān tahu de te ni soó de ndaha de siquī tēe ún, te ni nduvāha-ni de. ⁹ Yūcuán na te ni quijicoo ndihī ga ñayuu cácuñū yūcuán, te suni sūcuan ni canduvāha-ni i. ¹⁰ Te ñayuu un ní cajēhe i cuehē ndajññū ni cacutahū ná. Te nuū ni jíin quivī jeē quíngoo tucu ná jíin barco, te ni cajēhe i tācā ndajññū cuu ná ichi.

Jeē ni jíin Pablo ñuu Roma

¹¹ Te unī yoō ni coyūcu ná Malta. Te ññ barco jeē véji ñuu Alejandría ni ine Malta ní vico mījin, te ichi núu barco un ndéé uū figura ídolo ñuu de nání Cástor jíin Pólux. Te ni quivīcōo ná barco un cuángoo ná. ¹² Te ni jinūcōo ná ñuu Siracusa, te yūcuan ní coyūcu ná unī quivī. ¹³ Te ni quenda barco cuahān jíin ná nduu nduu yundúte, te ni jinūcōo ná ñuu Regio. Te inga quivī ún vāha ni quiji tachī ichi sur, te ni quendacoo ná ñuu Regio, te uū quivī te ni jinūcōo ná ñuu Puteoli. ¹⁴ Te yūcuan ní caquijnáhan ná jíin jecu hermano cácadíje, te ni cacana de sāña ní coyūcu ná jíin de ññ semana. Yūcuán na te ni quendacoo ná jéē quihīn ná ñuu Roma. ¹⁵ Te hermano cáyūcú ini ñuu Roma, je ni canihīn de jññuhun jeē jinūcōo ná, te ni quendacoo de, te sava de ni caquijnahan de sāña ndé ñuu Foro de Apio te sava ga de ñuu Tres Tabernas. Te ná ni jito Pablo nuū de jíjnáhan de, te ni nacuatáhú de nuū Yaā Dios, te ni ndundeyí ni de. ¹⁶ Te sáa te ni jinūcōo ná ini ñuu Roma, te capitán ni squivī de tāca preso ndaha tēe cújéhnū nuū tācā soldado ñuu Roma. Te ni cajēhe de jññuhun jeē cone sññ Pablo te condito ññ soldado de.

Jeē ní nacani Pablo jññuhun ya ini ñuu Roma

¹⁷ Te nuū unī quivī te ni cana Pablo tāca tēe cácuñū nuū jññáhan ñuu de hebreo cáyūcú ini ñuu Roma. Te ni cacutútú de, te ni cahān Pablo jíin de:

Tátá jijnáhan ní, tú cuiti na vé ni sáha ná siquī jññáhan yó hebreo ni siquī tācā jññū ní

catajnúni jíi yō. Te vēsú súcuan te ni cajni i sãña ndé ñuu Jerusalén ni casquívi i sãña ndaha tēe ñuu Roma jijnáhan de. ¹⁸ Te tēe ñuu Roma jeē cácujeñnu cáyucú Cesarea ni castíchi de sãña, te cácu ni de siáá de sãña núu, chi ni cajini de jeē tú na cuēchi ná jēe cúu ná. ¹⁹ Te jnáhan ñuu yō hebreo tu ní cájehe de jñuhun. Jeē yúcu ni cáhã na jēe quiji ná núu maá rey cujéñnu ga nde ñuu Roma yáhá te sãndaã maá de siquí ná. Te tú vēji ná jēe cáquin na cuēchi siquí ñayuu nación yō. ²⁰ Jeē yúcu ni cana ná níhín jijnáhan ní, návãha cuni na táca ní te nda-jñuhun yó. Chi yóhó ñayuu Israel cáñuhun ni yō jeē nátecu ndīyi, te suu jñuhun un nãcãni ná, te jeē yúcu ni cúu jeē nuhní na jíin cadena yáha, áchí de.

²¹ Te ni cacahã tēe un jíin Pablo:

Tú ni ñn carta ni cátají ñayuu cáyucú Judea nuú na jēe cástũhũn de jñuhun ní, te táca jnáhan yó Judea jeē ní quiijicoo yáhá, tú ni ñn jñuhun née ní cacahã de siquí ní.

²² Te cánujnahã ni ná cuni sōho ná ndese cúu jñuhun jeē cahã ni, chi je cájini na jēe táca-ni lado cacahã ñayuu contra siquí jñuhun jeē jēe steén ni, áchí de.

²³ Te ni cajeni de ñn quiví, te ni quiijicoo cuehē de vehe nuú néne Pablo. Te ni nacani de jñuhun ndese ndácu Yaã Dios jniñu, te ni steén cají de jñuhun nde jenéhen te nde ni ini. Te súcu ni nducú ndéyi de scándije de táca tēe un jñuhun Jesús, te ni steén de jeē suni súcu ni cáhã ley jeē ni jéhe ya nuú Moisés jíin jñuhun jeē ní catee tēe ni canacani jñuhun Yaã Dios nde jenahã.

²⁴ Te ni cacandije sava de jñuhun ni cahã Pablo, te sava ga de tu ní cájetáhu de. ²⁵ Chi tú ñnuú cáhıyo ni de. Te sáá cánducú de quingoo de te ni cahã Pablo:

Ndaã cahã jñuhun jeē ni cáhã Isaías, tēe ni nacani jñuhun Yaã Dios nde jenahã, chi suhva ni cahã de jíin táca jíi yō ni sãha Espíritu Santo:

²⁶ Ni cahã Yaã Dios:

Cuáhã núu jnáhan ñuu rō yáhá te cahã rō jíin i:

Vēsú cuni nahín váha ró te ma jécũhun ni rō, te vēsú coto váha ró te ma cúni rō.

²⁷ Chi yōhyo níhni ni rō,

chi tu cácu ni rō cuatáhu ró.

Te yōhyo uhũ cájini sōho ró,

chi tu cánujnahã ni rō cuni sōho ró jñuhun ri.

Te nájnũhun cájesi rō tinũu ró

cúu jeē tu cácu ni rō nanducú ró ndese cúu,

te tu cácu ni rō jeē násãma ini rō

návãha nasávãha ri anuá rō nuú cuēchi ró, ní achi Yaã Dios.

Achí tutu. ²⁸ Núu súcu ni na cástũhun ná nuú ni jēe jñuhun ni tájí Yáã Dios jeē jnáma ya yohó, nde vijna te tájí yá jñuhun yáha quihĩn nuú ñayuu táca nación jeē tu cájini i jñuhun ya, te máá i chi cuni sōho i, áchí de.

²⁹ Te ni jínu ni cahã de jñuhun yáha, te cuangoo jnáhan de hebreo, te yōhyo ni cacahã de siquí jñuhun yáha jíjnahã de.

³⁰ Te ni condee Pablo uũ cuiyã vehe jeē ní quihĩn núu de ún. Te ni cusĩ ni de cahã de jíin táca ñayuu ní quiijicoo nuú de. ³¹ Te jéñnu-ni ni nacani de jñuhun ndese ndácu Yaã Dios jniñu, te ni steén de jñuhun máá Jítóho yō Jesucristo, te tú ni ñn ní jési jeē nacani de jñuhun.

CARTA JEE NI TEE SAN PABLO APOSTOL NUU ÑAYUU ÑUU ROMA

¹ Máá rí cúu Pablo, mozo Jesucristo, chi ni cana Yaā Dios ruhū cúu rí apóstol yā, ni jeni ya ruhū te ni tají yá ruhū jeē nácani ri jnūhun jeē jnáma ya ñayuu.

² Te jnūhun un ní jejnūhun ya nde jehán ndasí, te yósó núu tútu iī jeē ní catee tēe ni canacani jnūhun ya. ³ Te jnūhun un cáhán siquī Jítoho yō Jesucristo, Yaā cúu Sēhe Yaā Dios. Te ni nduu ya tēe, ni cacu ya chíji yucūn rey David. ⁴ Te ni natecu yā mēhñu ndíyí ni sáha Espíritu iī, te súcuan ni steén Yaā Dios jeē cúu ya Sēhe ya jeē ndíso poder. ⁵ Te jeē jíin Jesucristo ni jēhe Yaā Dios jniñu luu yáha jeē cácuu ri apóstol, cájica ri jíin jnúhun Cristo, návāha coo ñayuu táca nación jeē candíje i jeē sáha ya jehē i, te cuatáhú i nuū yā. ⁶ Te suni máá ró jijnáhan ró, suni ni cana ya rohó ní quívicoo ró ndaha Jesucristo.

⁷ Te tēe ri carta yáha cuajeē nuū rohó ñáyuu ñuu Roma. Chi ni cundáhú ni Yaā Dios rohó, te ni cana ya rohó jēe coo ndoo coo iī rō nuū yā. Te ñúhun ni rī jeē maá Tátá yō Yaā Dios jíin Jítoho yō Jesucristo sáha ga yā jeē váha rōhó, te sáha ya jeē coo ndeyí coo sī ni rō.

Jeē cuní Pablo quihñ de ñuu Roma

⁸ Te xīhna gā cástūhun rí nuū rō jeē nácuatáhú rí nuū Yaā Dios jeē siquí rohó jijnáhan ró, chi ni sáha Jesucristo jeē váha rōhó. Chi ní ñáyívi jíte núu jnūhun cuahān ndese vāha cácandíje ró yá. ⁹ Te máá Yaā Dios jíin yā jeē níiní jícan tahu rī jehē rō jijnáhan ró nuū jícan tahu rī. Chi yōhyo ndíhví ni rī jejníñu ri nuū yā jeē nácani ri jnūhun Sēhe ya. ¹⁰ Te níiní jícan tahu rī nuū yā jeē núu cuní yā te nde vijna te cuu jecondēhe rí rohó. ¹¹ Chi cúu ní rī coto ri nuū rō jijnáhan ró, te steén gā rī jnūhun ya nuū rō, návāha quendōo vāha ga anuá rō te cuiñi ñihin ga rō jíin. ¹² Súcuan cuní rī návāha sáha yó jēe inuú coo ndeyí ni yō jijnáhan yó siquī jeē inuú cácandíje yó yá.

¹³ Hermano jijnáhan ró, cuní rī jeē na jécūhun ni rō jeē tíjni jínu ni cuu ni rī jecondēhe rí rohó, te nde vijna ná tu cuu. Chi cuní rī scuité núu ga rī jnūhun ya mēhñu ró, nájnūhun ni sáha ri mēhñu ñáyuu táca gá nación. ¹⁴ Chi cúu ri tēe táu siquī jnúhun ya, chi táu rī nacuāha ri jnūhun ya nuū ndíhi ñayuu, cúu ñayuu jíin gā siquī ndíhi jeē iyó ñayívi jíin jēe tu jíiní cuiñi, cúu ñayuu túhva jíin jēe tú túhva. ¹⁵ Jeē yúcuan cúu jeē ndíhví ni rī jeē suni nuū rohó ñáyuu ñuu Roma nacani ri jnūhun jnáma ya yohó.

Jeē ndíso jnūhun vāha ya poder

¹⁶ Chi tu cúcanu rī siquī jnúhun vāha ya, chi yúcuan cúu poder Yaā Dios jeē jnáma ya táca ñáyuu cácandíje, xīhna gā ñayuu hebreo te suni táca gá ñayuu. ¹⁷ Chi jnūhun vāha ya un steén nuū yō jeē ndáhva Yaā Dios cuēchi yó siquī jeē candíje yó jēe sáha ya jehē yō, te máá jēe candíje yó ní cuahān yō. Chi súcuan cáhán nuū tútu iī: Ñayuu jeē ní ndahva yā cuēchi i, técu i jeē candíje i jeē sáha ya jehē i, áchí.

Siquī jeē iyó ndasí cuēchi ñayuu

¹⁸ Chi jíiní vāha yó jēe Yaā Dios andívi, cuāha ya castigo xeēn nuū táca ñáyuu tu cácandíje te máni cuēchi cásáha. Chi jíin jniñu née cásáha i te cájesi i nuū jnúhun ndaā. ¹⁹ Te ma cúu cahān i jeē tu jécūhun ni i siquī ndese Yaā cúu Yaā Dios, chi máá yá ni steén nuū i. ²⁰ Chi jíin táca jeē ni sáha ya te cúu jécūhun ni ñayuu ndese Yaā cúu máá Yaā tu jíto i nuū. Chi nde ni jecōo ñayívi jíin nde vijna te cúu jécūhun vāha ni i jeē maá yá cúu Yaā Dios te iyó poder yā ní caní. Te jeē yúcuan má cúu cuiñi cahān i jeē tu jíiní i jeē iyó yá. ²¹ Chi vésú ni cajini i ndese Yaā cúu ya, te tu ní cáchiñuhún i ya jeē cúu ya Yaā Dios, te ni tu ní nácuatáhú i nuū yā. Chi sa suhva ni nduu i ñayuu cájeni cáhá ni, chi ni candunéé í i, te ni quendōo nee ini anuá i. ²² Cácahān i jeē ndichí i, te sa suhva cácanéé i. ²³ Chi ni castóo i Yaā Dios jeē yóhyo luu cújéhnu, jeē ma cúu cuiñi. Te ni cajetáhú i táca imagen jeē casáha i, jeē cáa nájnūhun tēe cájihí, te suni nde imagen saa jíin cóo jíin quiñi cájica ndicúun ndaha.

²⁴ Te jeē yúcuan ní siaá Yaā Dios i jeē na sáha i táca jíiní jnehén jniñu née jēe

cuní i. Te cásáha i jniñu neé jíin jnáhan i jeē cúu máá jnúhun canu. ²⁵ Chi tu ní cándíje i jnúhun ndaā Yaā Dios, chi sa ni cacandíje i jnúhun stáhú. Te cáhiyo yíñúhún i te cáchiñúhún i nuū tāca jéē ni sáha ya, lugar jeē chiñúhún i máá Yaā ni sáha ún, Yaā jeē cánuú cahān yō jeē cujéhnu ya ní cáni. Amén.

²⁶ Jeē yúcuan ní siaá Yaā Dios i jeē na sáha i tācá jniñu neé jéē cándiyo ni i jeē cúu máá jnúhun canu. Chi nde ñahan ni casama ña modo síhí, te ni quívi ña jíin modo neé. ²⁷ Te suni súcuan tēe ni casiáá de modo chíjñiñu jíin ñahan. Te nde ni nduquijí de ni casáha ndiyí de jíin jnáhan yí de, te tēe jíin tēe ni casáha de jniñu jnúhun canu. Te cándoho de castigo síquī jniñu neé ní casáha de.

²⁸ Te jeē tu ní cécuni i cuajnúhún i Yaā Dios, jeē yúcuan ní siaá yā i jeē na cáni neé ni i, te sáha i tācá jniñu jeē tu íyó váha. ²⁹ Te máni máá na jniñu jeē tu íyó ndáa cándihví ni, te cájica jnéni, cásáha jniñu neé, cándiyo ni, cájito uhū jnáhan. Te máni jeē cécucúsún ni, cájehni ndiyí, cájejnáhan, cástáhú, cásáhuhū jnáhan, cásájnúhún síquī jnáhan. ³⁰ Cácahān jnúhun neé síquī jnáhan, cájito uhū Yaā Dios, cácejéē ni, cásándúxi máá, cásátéyí máá, cájequin costumbre neé, tu cájendetū nuū tatá nuū naná. ³¹ Te tu cájecūhun cuítí ni, tu squícu jnúhun jéjnúhun, tu íyó máni jíin jnáhan, tu íne cáhnu ni nuū jnáhan, tu cúndáhú ni jnáhan. ³² Te je cájini váha i jeē ni sándaā Yaā Dios jeē ñáyuu casáha súcuan, cánuú jnahnū ndetū i. Te vésú súcuan cájini i, te níní cásáha i jniñu neé un, te suni cánujnahan ni i jeē casáha jnáhan i súcuan.

Ndaā sándaā Yaā Dios síquī cuéchi

2

¹ Núu súcuan te róhó jéē cahán cuéchi síquī jnáhan, núu na-ni ñayuu cúu ró, ma cúu cahān rō jeē tú na cuéchi máá ró. Chi jeē cahán rō cuéchi síquī jnáhan ró cúu jeē ndénehen ró cuéchi síquī maá ró. Chi róhó jéē cahán cuéchi, suni súcuan sáha máá ró cuéchi. ² Chi jíni yō jeē Yaā Dios, ndaā sáha ya jeē ndóna ya síquī cuéchi ñayuu casáha súcuan. ³ Te róhó jéē cahán cuéchi síquī ñáyuu casáha cuéchi, te suni súcuan sáha

máá ró, ¿te á jéni ni rō jeē cácu máá ró quívi ndóna Yaā Dios síquī cuéchi, chí naún? ⁴ ¿A cújéē ni rō nuū jnúhun jeē yóhyo váha ni Yaā Dios jíin ró, jíin jéē iyó paciencia yā jeē tú yachí cuāha ya castigo nuū rō? ¿Te á tu jécūhun ni rō jeē jnúhun jeē yóhyo váha ni yā sáha jeē nácani ni rō síquī cuéchi ró? ⁵ Chi níhni ni rō te tu nácani ni rō síquī cuéchi ró. Te jeē yúcuan cáyā gā rō castigo síquī rō quívi sáha Yaā Dios juicio, máá quívi jeē cóo ndijin jeē ndaā sándaā yā síquī cuéchi. ⁶ Chi chunaa yā nuū ná ñin ná ñin ñayuu núu ndese jniñu ni casáha i. ⁷ Te ñayuu jeē tu jécuiñí i jeē sáha i jniñu váha, cuāha ya jnúhun jeē cótecu i ní cáni. Chi ndúcú i quívi i nuū ndujéhnu yíñúhún i, nuū ní cáni cotecu i. ⁸ Te quítí ni yā te cuāha ya castigo nuū ñáyuu cújéē ni nuū yā, te cúnihni ni nuū jnúhun ndaā, chi sa nuū jnúhun yacuá yóho jetáhú i. ⁹ Te tāca ñáyuu casáha jniñu neé, chi nihín i jnúndóho xeēn te cucuíhyá ndasí ni i, xíhna gā ñayuu hebreo te suni súcuan ñayuu tāca gá nación. ¹⁰ Te sa suhva tāca ñáyuu casáha jniñu váha, chi quívi i nuū ndujéhnu yíñúhún i, te coo ndeyí coo sí ni i, xíhna gā ñayuu hebreo te suni súcuan ñayuu tāca gá nación.

¹¹ Chi Yaā Dios tu sáha ya cuenta ndese cúu ñin ñin ñayuu, chí inuú sáha ya jíin i. ¹² Chi tāca ñáyuu jeē casáha cuéchi, vésú tu cáyihí i chíji ley jeē ni jéhe ya nuū Moisés, te tu níní ley un te jnahnū ndetū i. Te tāca ñáyuu cáyihí chíji ley Moisés te cásáha cuéchi, jíin ley un sándaā yā cuéchi i. ¹³ Chi tu ndáhva Yaā Dios cuéchi ñayuu jeē máá jéē cúni nahín-ni i jnúhun cáhán ley yā. Chi sa suhva ñayuu squícu jeē cahán ley yā cúu jeē ndáhva yā cuéchi i. ¹⁴ Chi ñayuu tācá nación jeē tu cánevāha tutu ley jeē ni jéhe ya nuū ñáyuu hebreo, te núu cásquícu máá i ley yā, suu cúu jeē cánevāha i ley yā ini anuá i, vésú tu cánevāha i tutu ley un. ¹⁵ Te súcuan cástéén i jeē jnúhun ndácu ley un chí ñúhun ini anuá i. Te tāca jéē cájeni ni i jíin ánuá i, suu cúu jeē steén nuū i síquī núu ni sáha i cuéchi chí váha ni sáha i. ¹⁶ Te súcuan coo máá quívi jeē jíin Jesucristo sándaā Yaā Dios síquī tāca jéē tu íyó váha jeē ní cajeni sáhí ni tāca ñáyuu. Súcuan cáhán jnúhun váha ya jeē nácani ri.

Siquí jeē tu cásquicu ñayuu hebreo ley Moisés

¹⁷ Te róhó cácahān rō jeē tēe hebreo cácuu ró, te cátenū rō maá ley Moisés, te cácutéyí ró jeē siquí Yaā Dios. ¹⁸ Te cájeni ni rō jeē jini rō ndese nújnahan ni yā, jín jēe cúu nácāji vāha ró ndé-ni cúu jniñu vāha, chi ni cacutūhva ró ley un. ¹⁹ Te cájeni ni rō jeē maá ró cácuu tēe stéén ichi Yaā Dios nuū ñayuu tu cájini cuiti, jín jēe cúu sáha ró jēe cúndijin ini anuá ñayuu cájica nájnūhun nuū neē. ²⁰ Te cájeni ni rō jeē cúu stéén rō nuū ñayuu tú tūhva jnūhun ya, jín jēe maá ró cácuu maestro nuū ñayuu tu jécūhun ni. Chi jín tutu ley yā te cájini rō ndese cúu jnūhun ndíchí jnūhun ndaā, cájeni ni rō. ²¹ Núu súcuan te maá ró jeē castéén nuū ñayuu, ¿te naun tu cástéén rō nuū maá ró? Te maá ró jeē cácahān jeē ma sácuihná i, ¿te naun cásácuihná maá ró? ²² Te maá ró jeē cácahān jeē ma cósiquí ndéē i, ¿te naun cósiquí ndéē maá ró? Te maá ró jeē cácahān jeē cácuquini ni rō ídolo, ¿te naun cásácuihná ró ndajniñu jeē yúcu ini vehe ídolo? ²³ Te cácutéyí ró jín ley Yaā Dios, te vēsú súcuan te cásáha ró jēe cácahān ñayuu siquí yā, chi tu cásquicu maá ró jnūhun ndácu ley yā ún. ²⁴ Chi súcuan yósó núu tútu i: Ñayuu tāca gá nación, máni cácahān ndevāha i siquí Yaā Dios, jeē siquí cuéchi róhó ñayuu hebreo.

²⁵ Te núu cásquicu ró ley Moisés, yūcuán na te níhín jniñu ndije jeē ní canihīn rō jnunī circuncidar. Te núu tu cásquicu ró ley un, te vēsú ni cuu ró circuncidar, te nájnūhun jeē tu ní cúu ró. ²⁶ Te tēe tācá nación, núu cásquicu de jniñu ndácu ley un, vēsú tu ní canihīn de jnunī circuncidar, núu súcuan te nájnūhun ni canihīn de jnunī circuncidar. ²⁷ Te tēe jeē tu ní cúu circuncidar yiqui cúñu de, te cásquicu de ley yā, maá de cahān cuéchi siquí rō. Chi tu cásquicu ró, vēsú cánevāha ró tutu ley un, te ni cuu ró circuncidar. ²⁸ Chi nasūu jēe cáa ichi síquí ñn tēe sáha jeē cúu ndije de tēe hebreo. Te ni nasūu jēe cúu circuncidar yiqui cúñu ñn tēe sáha jeē cúu de tēe ndaā. ²⁹ Chi sa suhva tēe cúu hebreo ndije, cúu jeē ini anuá de ñūhun jnūhun ndaā. Te tēe cúu circuncidar ndije, chi nde jín ini jín ánuá de sáha de jniñu ndaā te nasūu jēe ndíso de

jnunī circuncidar jeē cahán ley un cúu. Tēe cándāa súcuan, nasūu ñayuu cájejnūhún i de, chi maá Yaā Dios.

3

¹ ¿Núu súcuan te na vé iyó gá nuū ñayuu hebreo jeē quéndōo vāha ga i? ¿Te ndé níhín jniñu jeē casáha i circuncidar? ² Vāha ndasí níhín jniñu. Xīhna gā níhín jniñu jeē ni jéhe Yaā Dios jnūhun ya nuū maá i. ³ Te vēsú sava i tu ní cácahān, ¿te á suu sáha jeē ma squícu ga Yaā Dios jnūhun ni jejnūhun ya, chí naún? ⁴ Tú cuiti jeē súcuan, chi vēsú núu ndíhi ñayuu castáhú i, te Yaā Dios chi iyó ndáa yā. Chi suhva yósó nuū tútu i jeē ni cáhān ñn tēe jín yá: Cahān ñayuu jeē iyó ndáa ni jín táca jnūhun cáhān ni, te cuni i jeē iyó ndáa ní vēsú núu cácahān i siquí ní.

Achí tutu.

⁵ Te cácahān sava ñayuu jeē iyó vāha jeē sáha yó cuéchi, chi cuéchi yó jéjniñu stéén jeē iyó ndáa Yaā Dios. Núu súcuan ¿te á cuu cahān yō jeē tú vāha sáha Yaā Dios jeē jéhe ya castigo núu jéjniñu cuéchi yó súcuan? (Va cáhān-ni nde ri nájnūhun cácahān ñayuu ñayiví.) ⁶ Tú cuiti jeē súcuan. Chi núu jeē tú vāha sáha Yaā Dios, ¿te ndese cuu sándaā yā cuéchi ñayuu ñayiví?

⁷ Te núu jnūhun stáhú cácahān ñayuu jéjniñu stéén jeē yóhō cújéhnu Yaā Dios siquí jeē máni cáhān ndaā yā, ¿te á cuu cahān yō jeē tú vāha jeē cahán yā jeē cuéchi cúu jeē castáhú i? ⁸ Tuú, chi núu jeē súcuan cúu, te cuu cahān yō jeē vetū-ni sáha yó jēe neé návāha quee jeē vāha núu. Te sava ñayuu cácahān ndevāha i siquí rī jeē súcuan cástéén rī, te tú ndaā. Ñayuu ún chi iyó vāha jeē ndénehen ya cuéchi siquí i.

Ndivii yō iyó cuéchi

⁹ Núu súcuan ¿te á vāha ga ñayuu cácuu yóhó ñayuu hebreo vēsú inga ñayuu naún? Tú cuiti jeē súcuan. Chi je ni cacahān yō jeē vēsú ñayuu hebreo chí ñayuu tāca gá nación, ndivii yō yíhi chíji cuéchi. ¹⁰ Chi suhva cáhān tutu i: Tú cuiti na ñayuu ndaā iyó, ni ñn i.

¹¹ Te tú cuiti ñayuu jécūhun ni iyó, te tú ni ñn i nánducú i Yaā Dios.

12 Ndihi i ni cascuíta i jnūhun ya, te inuú-ni ni castívi ndihi i máá i. Te tú cuiti ñayuu sáha jniñu váha iyó, ni ñn i.
 13 Yaū sucūn i cúu nájñūhun yaū ndīyi jeē núne, chi máni jnūhun stáhú cácahān i. Te nájñūhun veneno coō yíhi yuhu i,
 14 chi máni máá jnúhun ndevāha jnūhun uvuā cácahān i.
 15 Te yōhyo ñama jehē i jeē cáhni i ndīyi.
 16 Te ndé-ni cúu-ni nuū cájica i te squívi i jnūndóho jeē jnahnú ndetū ñayuu.
 17 Te tu cájica cuiti i jíin jnúhun coyūcu máni i,
 18 te ni tu cánacani ni i jeē cónso Iyo i nuū Yaā Dios.

Achí tutu.

19 Te jíni yō jeē tāca jnúhun cáhān ley jenahán, chi cáhān nuū ñayuu yíhi chíji ley un, návāha ndihi i ma cúu cahān i jehē i. Chi ndenehen Yaā Dios cuēchi siquī i nde jíin ñayuu ní ñáyiví. 20 Chi tú ni ñn ñayuu quendōo ndaā i nuū yā jeē nducú i squícu i jniñu ndácu ley un. Chi ley un jéjníñu máni návāha cuni yō jeē iyó cuēchi yó.

Jeē jnáma ya yohó síquī jeē candíje yó jéé sáha ya jehē yō

21 Te vijna te je cájini vāha yó ndese ndáhva Yaā Dios cuēchi yó. Te nasūu ley un sáha jeē quendōo ndaā yō, vēsú maá tutu ley jíin tée ni canacani jnūhun ya, ni cacahān ndese ndáhva yā cuēchi ñayuu. 22 Chi tāca ñayuu jeē cácaandíje i jeē ni jíhī Jesucristo jeē chúnaa yā cuēchi i, chi ndahva Yaā Dios cuēchi i siquī jeē súcuan cácaandíje i. Chi inuú-ni cúu táca ndihi ñayuu. 23 Chi ndihi yó ni casáha cuēchi, te jeē yúcuan tu ní cúu quendōo ndaā yō nuū Yaā Dios. 24 Te siquī jeē yóhyo vāha ni Yaā Dios, jeē yúcuan ndáhva yā cuēchi yó súcuan-ni. Chi siquī jeē ni jíhī Cristo Jesús cúu jeē jnáma ya yohó. 25 Chi Yaā Dios ni jeni ya Cristo návāha socō yā maá yá chunaa yā cuēchi yó jéé ni jíhī yā. Te jnáma ya yohó núu súcuan cácaandíje yó. Te súcuan ni sáha Yaā Dios návāha stéén yā jeē Yaā ndaā cúu ya. Chi ichi yátá ni Iyo paciencia yā, te tu ní chíhi ya cuenta cuēchi ñayuu. 26 Te tiempo yáha stéén yā jeē Yaā ndaā cúu ya, chi ndaā sáha ya jeē squéndōo ndaā yā ñayuu candíje vēsú iyó cuēchi i, chi

cácaandíje i jeē ní chunaa Jesús cuēchi i ni ndahva yā.

27 Núu súcuan ¿te á cuu cutéyí gá yō siquī maá yó? Ma cúu cuiti, chi ma cúu cutéyí yó cani ni yō jeē vāha squícu yó ley yā. Chi jnáma ya yohó máá síquī jeē candíje yó jéé sáha ya jehē yō. 28 Núu súcuan te je jíni yō jeē ndáhva Yaā Dios cuēchi yó síquī jeē súcuan cácaandíje yó, te nasūu jéé nducú yó squícu yó jéé ndácu ley.

29 ¿Te á núu maá-ni ñayuu hebreo cúu ya Yaā Dios, chí naún? Tuú, chi suni cúu ya Yaā Dios jeē jnáma ñayuu tāca gá nación. 30 Chi ñn-ni Yaā Dios iyó, te ndáhva yā cuēchi ñayuu cácaandíje jeē ni sáha ya jehē i, cúu ñayuu ndíso jnuni circuncidar, cúu ñayuu jeē tuú. 31 Te jeē candíje yó jéé jnáma ya yohó, ¿á sáha jeē tuá jíni ñúhún squícu yó ley yā, chí naún? Tú cuiti, chi sa suhva sáha jeē váha ga cuu squícu yó ley yā.

Abraham cúu ñn ejemplo nuū yō

4

1 Núu súcuan ¿te ndese cahān yō siquī tāca jéé ní cuu jíin jíi yō Abraham? ¿Ndese ni ndahvā cuēchi de? 2 Nasūu jéé ni sáha máá de cúu jeē ní ndahva Yaā Dios cuēchi de. Chi núu jeē súcuan cúu núu, te cuu cutéyí de jeē vāha ni sáha de. Te tu ní cutéyí de, chi nasūu siquī jeē ni sáha máá de cúu jeē ní ndahva Yaā Dios cuēchi de. 3 ¿Chi ndese cáhān tutu iñ? Cáhān jeē ní candíje Abraham jeē sáha ya jeē ni jéjñūhun ya nuū de, te jeē yúcuan ní ndahva yā cuēchi de. 4 Te ñn ñayuu sájniñu, te yāhu i chi nasūu jéé cútahū i cúu, chi jeē chúnaa yō nuū i cúu. 5 Te jeē jnáma Yaā Dios ñayuu, chi jeē cútahū i cúu. Chi vēsú tu cúu squícu i táca jniñu váha, te núu candíje i jeē jnáma ya i nuū cuēchi i, yūcuán na te ndahva yā cuēchi i. 6 Te David suni ni cahān de ndese yōhyo ndetū ñayuu jeē ndáhva Yaā Dios cuēchi i, vēsú tu cúu sáha i ni ñn jniñu jeē quendōo ndaā i nuū yā. 7 Chi ni cahān de:

Nacā ndetū ñayuu jeē íne cáhnu ni yā nuū jniñu néé ni sáha i, te tu ndénehen ya cuēchi siquī i.

8 Te nacā ndetū tée jeē tuá chíhi máá Jítoho yō cuenta cuēchi de.

Achí tutu.

⁹ ¿Te á máni máá ñáyuu squícu ley circuncidar cúu jeē quéndōo ndetū? ¿Chí suni quéndōo ndetū ñayuu jeē tu cúu circuncidar naún? Suni máá i quéndōo ndetū i. Chi je ni cahān yō jeē ní candíje Abraham jeē sáha ya jeē ni jéjnūhun ya, te jeē yúcuan ní ndahva yā cuēchi de. ¹⁰ Te ná ni ndahva yā cuēchi de, ¿á je ni cuu de circuncidar, chí ndé ná tuú? Nasūu jéé jé ni cuu de circuncidar, chí nde ná tuú. ¹¹ Te cuéé gá te ni nihīn de jnūnī circuncidar. Te suu ni cuu ñn seña, nájñūhun ñn sello jeē ní ndahva yā cuēchi de siquī jeē súcuan ni candíje de. Te jeē yúcuan ní cahān yā jeē cuu de jíi nuū tāca ñáyuu jeē candíje i jeē sáha ya jehē i, suni nuū ñáyuu tu ní cúu circuncidar, chí suni ndahva yā cuēchi máá i. ¹² Te suni cúu de jíi nuū ñáyuu ní cuu circuncidar, te nasūu máni jeē ní cuu i circuncidar, chí suni jeē ní jñī i ejemplo de. Chi cá candíje i jeē sáha ya jehē i, nájñūhun ni candíje máá de nde ná tu cuu de circuncidar.

Núu candíje yó te sáha Yaā Dios jeē ni jéjnūhun ya

¹³ Chi ni jejnūhun Yaā Dios nuū Abraham jíi nuū tāca yúcūn de jeē cuāha ya ní ñáyiví cuu tahū de. Te nasūu siquī jeē ní nducú de squícu de ley yā cúu jeē ní jejnūhun ya un núu de, chí sa suhva siquī jeē ní candíje de jeē ni jéjnūhun ya, te ni ndahva yā cuēchi de. ¹⁴ Chi núu jeē máni máá ñáyuu nducú squícu ley cúu jeē nihín jeē ni jéjnūhun ya, núu súcuan te cándíje cāha yó nuú, te ma nihín jñīñu jeē ni jéjnūhun ya ún. ¹⁵ Te ley chí sáha jeē nihín ñayuu castigo siquī jeē tu cúu squícu i. Te núu jeē tu ley, te suni tú na jñūhun stívi ñayuu siquī ley coo núu.

¹⁶ Núu súcuan te ni jejnūhun ya jeē sáha ya jeē váha jíi ñáyuu siquī jeē candíje i jeē súcuan sáha ya, te jeē cútahū i súcuan-ni cúu. Te jeē ni jéjnūhun ya ún, íyó cutú nuū tāca yúcūn Abraham, te nasūu núu máni-ñayuu jeē nducú squícu ley jenahán, chí suni nuū tāca ñáyuu cá candíje nájñūhun ni candíje Abraham. Te súcuan cúu de jíi nuū tāca yó jeē cá candíje yó. ¹⁷ Súcuan ni sáha Yaā Dios chí ni candíje de jeē sáha ya. Chi súcuan cáhán tutu íi: Ni jeni ri rohó cuu ró jíi nuū cuehē ndasí ñáyuu. Súcuan ni cahān

maá Yaā jeē nastécu ndīvi te cáhán yā ndese coo tāca jéé ná tu coo.

¹⁸ Te ni candíje de, te ni cocuhun teyí ni de jeē ni jéjnūhun ya jeē coo cuehē yucūn de, vésú tuá na modo coo sēhe de núu. Te jeē yúcuan ní nduu de jíi nuū cuehē ndasí ñáyuu, nájñūhun ni cahān Yaā Dios: Súcuan nducuehē yucūn rō, achí yá jíi de. ¹⁹ Te je yajni jinū de ciento cuiyā, te vésú súcuan te tu ní quenda de nuū jñūhun cándíje de, vésú jiní de jeē máá de jíi ñasíhí de Sara je jéñnu ndasí ndíndúu de jeē ma cúu ga coo sēhe de. ²⁰ Te tu ní nácani siquí ni de jeē ma cándíje ga de jñūhun ní jejnūhun Yaā Dios jeē coo sēhe de. Chi sa suhva ni candíje nihín ga de, te ni nacuatáhú de nuū Yaā Dios. ²¹ Chi ni cucáñnu vāha ni de jeē cúu squícu Yaā Dios ndíhi jeē ni jéjnūhun ya. ²² Te jeē yúcuan ní ndahva yā cuēchi de siquī jeē súcuan ni candíje de.

²³ Te nasūu máni-ñayuu siquī Abraham cúu jeē yosó núu tútu jeē ní ndahva yā cuēchi de jeē ní candíje de. ²⁴ Chi suni yósó jéé siquí yohó jíjñáhan yó. Chi suni ndáhva yā cuēchi máá yó jéé candíje yó jéé cúu ya Yaā ní nastécu Jitoho yō Jesús. ²⁵ Chi ni jihī Jesús jeē chúnaa yā cuēchi yó, te ni natecu yā návāha ndahva Yaā Dios cuēchi yó.

Ndese quéndōo ñayuu jeē ndáhva yā cuēchi

5

¹ Núu súcuan te je ni ndahva Yaā Dios cuēchi yó siquī jeē ní candíje yó jéé sáha ya jehē yō. Te jeē yúcuan ní sáha ya jeē ní ndīvi yó núu jñūhun manī yā jíi yó, siquī jeē ni jihī Jitoho yō Jesucristo jehē yō. ² Chi máá Cristo ni sáha jeē ni quívicoo yó núu Yaā Dios, chí ni sáha ya jeē váha yóhó siquī jeē súcuan cándíje yó. Te cáhīn nihín yó jíi jñūhun jeē sáha ya jeē váha yóhó. Te cúsiñ ni yō chí ñūhun ni yō jeē jinú yō nuū lúu cujéñnu yó jíi Yaā Dios. ³ Te nasūu máá yáha-ni, chí suni cúsiñ ni yō jeē ndóho yó jñúndóho. Chi jíi yō jeē máá jñúndóho sáha jeē jéndeýi ni yō. ⁴ Te jeē jéndeýi ni yō sáha jeē íje vāha yó cuu yó ñáyuu ndaā. Te jeē íje vāha yó sáha jeē ñūhun ni yō tāca jéé váha jeē cóo. ⁵ Te tāca jéé ñūhun ni yō, chí nihīn nahín yó. Chi jñūhun cúndáhú ni Yaā Dios

yohó, ni cunuú ini anuá yō, sáha Yaā Dios jeē jín Espíritu Santo jeē ni jéhe ya nuū yō.

⁶ Chi náa ndóho yó jéē ma cúu cuiti jnama yó máá yó, te ni jihī Cristo jehē yohó jéē cúu yó ñáyuu íyó cuéchi. Te ni jihī yā maá quívi jeē jé ni jeni Yaā Dios. ⁷ Te yí cúu jeē cúu ññayuu jehē inga ñayuu, vēsú jehē ññayuu ndaā. Chí sanaa te íyó jínu jeē chūndeyí ni ññ tēe cuu de jehē ññ tēe ndaā vāha. ⁸ Te máá Cristo chí ni jihī yā jehē yō náa máni cuéchi sáha yó, te súcuan ni steén Yaā Dios jeē cundáhú ni yā yohó. ⁹ Te vijna je ni ndahva Yaā Dios cuéchi yó síquī jeē ni jíhī Cristo jehē yō. Núu súcuan te suni jíní vāha yó jéē jnama Cristo yohó núu castigo quiji quívi sáha Yaā Dios juicio. ¹⁰ Chi náa cúu ga yō enemigo Yaā Dios, te síquī jeē ni jíhī Sēhe ya jehē yō, te ni sáha ya jeē ndívi yó núu jnúhun manī yā jín yó. Te jeē súcuan ní ndívi yó nuū jnúhun manī yā jín yó, te suni jíní vāha yó jéē cācu yó síquī jeē técu Cristo, nduú yā jín yó. ¹¹ Te nasūu máá yāha-ni, chí suni cúsi ndasí ni yō jín Yaā Dios síquī jeē ni sáha Jitoho yō Jesucristo jehē yō, chí máá yā ni sáha jeē ní ndívi yó núu jnúhun manī Yaā Dios jín yó.

Jnúhun Adán jín jnúhun Cristo

¹² Núu súcuan te jíní yō jeē ni quívi cuéchi ini ñayívi ní sáha máá ññ-ni tēe Adán. Te jeē síquī cuéchi yúcuan te ni jecōo cuehyí jéni ñayuu. Te jeē yúcuan cúu jeē jíhī ndíhi ñayuu, chí ndíhi i yíhi cuéchi. ¹³ Te nde ná tu cuāha ya ley nuū Moisés, te je íyó cuéchi ini ñayívi. Te síquī jeē ná tu coo ley yā, te tu ní chíhi ya cuenta jeē castívi i. ¹⁴ Te vēsú súcuan te nde tiempo Adán te nde tiempo Moisés ni yíhi ñayuu chíhi cuehyí jeē jéni i síquī jeē íyó cuéchi i. Chí ni jihī i síquī cuéchi ni casáha máá i, vēsú tu ní sáha i jnáhan cuéchi jeē ni sáha Adán jeē ní cuníhi ni de nuū ññ jniñu ní ndacu ya. Te Adán ni cuu de ññ muestra máá Yaā ní quiji cuéé gá.

¹⁵ Te jnúhun jeē ni sáha Adán cuéchi, tu quíjnáhan cuiti jín táhū jeē jnáma Yaā Dios yohó. Chí jeē ni stívi máá ññ-ni tēe ún, jeē yúcuan cúu jeē jíhī ndíhi yó. Te jnúhun jeē jnáma Yaā Dios yohó cújéhu ndasí gá, chí síquī jeē ni sáha máá ññ-ni tēe Jesucristo cúu jeē súcuan-ni jnáma ya ndíhi ñayuu candíje. ¹⁶ Te cuéchi jeē ni

sáha máá ññ-ni Adán, tu quíjnáhan cuiti jín jnúhun jeē jnáma Yaā Dios yohó. Chí síquī máá ññ-ni cuéchi ún te ni quívicoo ñayuu chíhi jnúhun jnahnū ndetū i. Te jnúhun jeē jnáma ya ñayuu, sa suhva sáha jeē súcuan-ni ndáhva yā cuéchi i, vēsú yōhyo cuehē cuéchi ni casáha i. ¹⁷ Chí síquī jeē ni sáha máá ññ-ni tēe Adán cuéchi, te ni nihīn poder cuehyí jéni ñayuu. Te sa suhva síquī jeē ni jíhī máá ññ-ni tēe Jesucristo, te víhyá gā ni nihīn ñayuu maá yā poder jeē cótecu i caca ndaā i jín yá. Chí ni ndahva yā cuéchi i síquī jeē yōhyo vāha ni yā.

¹⁸ Núu súcuan te síquī jeē ni sáha máá ññ-ni tēe Adán cuéchi, te ni quívicoo ndíhi ñayuu chíhi jnúhun jnahnū ndetū i. Te sa suhva síquī jeē ni sáha máá ññ-ni tēe Jesucristo ññ jniñu vāha ndasí, te ndáhva Yaā Dios cuéchi ndíhi ñayuu te cotecu i ní cání. ¹⁹ Chí síquī jeē tu ní jéndije máá ññ-ni tēe, te ni quívicoo cuehē ndasí ñayuu chíhi cuéchi. Te suni súcuan síquī jeē ní jéndije máá ññ-ni tēe Jesucristo, te ndáhva Yaā Dios cuéchi cuehē ndasí ñayuu.

²⁰ Te ni jéhe ya ley yā návāha cuni yō jeē cuéhe cuéchi casáha yó. Te jeē ní nducuehē cuéchi yó, te víhyá gā cuehē cúu jnúhun jeē vāha ni yā jeē íne cāhnu ni yā nuū yō. ²¹ Núu súcuan te nájnūhun ni nihīn poder cuehyí jéni ñayuu síquī jeē íyó cuéchi i, suni súcuan íyó poder jnúhun jeē vāha ni yā jín yó. Chí ndáhva yā cuéchi yó te cotecu yō ní cání síquī jeē ni jíhī Jitoho yō Jesucristo jehē yō.

Jeē tuá yíhi yó chíhi cuéchi chí yíhi yó ndaha Cristo

6

¹ Núu súcuan ¿te ndese cahān yō? ¿A caca ga yō jín cuéchi návāha víhyá gā sáha ya jeē vāha yóhó jéē cóne cāhnu ni yā nuū yō? ² Ma cúu cuiti. Chí nájnūhun je ni jihī yō jeē tuá yíhi yó chíhi cuéchi, te ma cúu ga caca yó jín cuéchi núu súcuan. ³ ¿A tu cájecūhun ni rō jeē tāca yó jeē ní jendute yó síquī jeē ni quívi yó ndaha Cristo Jesús, suni ní jendute yó síquī jeē ni quívi yó chíhi jnúhun jeē ni jíhī yō jín yá? ⁴ Chí jeē ní jendute yó cúu nájnūhun ni quindūji yó jéē ni jíhī yō jín yá. Te vijna te cuu caca yó jín vida jeé jeē ni jéhe ya nuū yō, chí nájnūhun suni ni natecu yō jín yá.

Chi ni natecu yā ni sāha Tátá yā jiín poder jeē cujēhnu ndasí yá.

⁵ Chi núu ni cundúú yó jiín yá siquī jnúhun jeē ni jíhī yō jiín yá, te suni súcuan cundúú yó jiín yá siquī jnúhun jeē ní natecu yō jiín yá. ⁶ Chi jíni yō jeē ní naa modo maá yó jeē ni jíca yó jiín ichi yátá, chi ni quívi yó núu jnúhun jeē ni jíhī yō jiín Cristo jicā cruz. Te súcuan ni naa modo yō jeē cúu yó mozo nuū cuéchi, návāha tuá cuajniñu yó núu tãcá jniñu jeē máni cuēchi cúu. ⁷ Chi ñayuu jeē jé ni cajihī, je ni quendacoo i chíji tãca cuéchi. ⁸ Te núu je ni jíhī yō jiín Cristo, te cándije yó jéē suni súcuan ni natecu yō jiín yá. ⁹ Chi jíni yō jeē ní natecu Cristo, te ma cúu cuiti ga yā, chi cuehyī jéhni yóhó, tuá na vé cúu sāha jíni yá. ¹⁰ Chi jeē ni jíhī yā, te ñin jínu-ni ni jíhī yā jeē siquī cuēchi ñayuu. Te jeē técu yā vijna, chi sāha ya jeē cuní Yaā Dios. ¹¹ Te suni súcuan róhó jíjnáhan ró, sāha ró cuenta jeē nájnūhun ni cajihī rō jeē ní quendacoo ró chíji cuēchi. Te cátecu rō návāha sāha ró jéē cuní Yaā Dios, chi ndúú ró jíni Jítóho yō Cristo Jesús.

¹² Núu súcuan te ma cuáha ga rō jnúhun quíhi ró chíji cuēchi jíni yiquí cúñu rō jeē cúu. Chi cuēchi ún stíhví ni rohó jéē na sāha ró táca jéē ndiyo néé ni rō. ¹³ Te ma cuáha ró máá ró cuajniñu ró núu cuéchi jeē cócuu ró jíni jniñu néé. Chi sa suhva cuāha ró máá ró nuū Yaā Dios, te sāha ró cuenta jeē nájnūhun je ni cajihī rō te ni canatecu rō nuū yā. Te cuāha ndíhi ró máá ró nuū yā jeē cuajniñu ró núu jniñu ndaā. ¹⁴ Chi tuá na poder cuēchi jeē cundeyí jíni ró, chi tuá cáyihí ró chíji ley jenahán, chi sa cáyihí ró chíji jnúhun jeē váha ni yā jíni ró.

Jnúhun mozo jeē steén ndese quéndōo ñayuu cácanđje

¹⁵ ¿Ndesé sāha yó núu súcuan? ¿A caca ga yō jíni cuéchi siquī jeē tuá yíhi yó chíji ley jenahán, chi sa yíhi yó chíji jnúhun jeē váha ni yā jíni yó? Ma cúu cuiti. ¹⁶ Chi cájini rō jeē núu cuāha ró máá ró jeē cuatáhú ró sájniñu ró núu ñin tēe, núu súcuan te cácuu ró mozo nuū tée ún, te cánuú cuandije ró núu de. Te suni súcuan núu cuāha ró máá ró jeē sāha ró cuéchi, te mozo cuēchi cácuu ró, te cuu rō. Te núu cuatáhú ró nuū maá yá, te mozo yā cácuu ró jéē cáca ndaā rō. ¹⁷ Te na

cútahū yō nuū Yaā Dios, chi vésú ni cacuu ró mozo nuū cuéchi, te vijna chi nde jíni ini jíni ánuá rō ni cajetáhú ró nuū jnúhun ya jeē ni quívicoo ró núu. ¹⁸ Te vijna te je ni nduu libre rō jeē tuá cácuu ró mozo nuū cuéchi, te cájejniñu ró núu jniñu ndaā. ¹⁹ (Ni cahān rī ñin jnúhun ndese cúu siquī mozo ini ñayívi yáha, chi tu cájecūhun yachī ni rō siquī jnúhun ya.) Núu súcuan te nájnūhun ni cajēhe ró máá ró nde saá jeē ní cajejniñu ró núu tãcá jniñu jnéhén jniñu néé, suni súcuan cuāha ró máá ró vijna jeē cuajniñu ró núu jniñu ndaā, návāha coo ndoo coo ñi rō nuū Yaā Dios.

²⁰ Chi nde náa cácuu ró mozo nuū cuéchi, te tu ní cájejniñu ró núu jniñu ndaā. ²¹ ¿Te na vé ni canihīn rō siquī cuéchi ni casáha ró un jéē cáccuanu rō vijna sāha? Tú cuiti, chi máá jéē jnahnú ndetū rō ñi cáni sāha. ²² Te vijna te je ni canduu libre rō jeē tuá cácuu ró mozo nuū cuéchi, te cájejniñu ró núu Yaā Dios. Te suu sāha jeē quéndōo váha ró, chi cáhīyo ndoo cáhīyo ñi rō nuū yā, te nde sandíhi te cotecu rō ñi cáni. ²³ Chi yāhu jeē nihín ñayuu siquī cuéchi cúu jeē jnahnú ndetū i. Te sa tahū jeē jéhe Yaā Dios cúu jeē cótecu yō ñi cáni andívi, siquī jeē nduú yó jíni Jítóho yō Cristo Jesús.

Jnúhun ñasíhi jíni yíhi jeē steén ndese quéndōo ñayuu cácanđje

7

¹ Hermano, je cájini rō ndese cáhán ley yā, te cájini rō jeē yíhi ñayuu chíji ley maá-ni núu técu i ñayívi yáha. ² Te yāha cúu nájnūhun ñin ñahan jeē ní quijnáhan, chi cáhán ley jeē yíhi ña ndaha yíhi ña maá-ni núu técu de. Te núu ni jíhī yíhi ña, te je ni quenda ña chíji ley jeē ní quijnáhan ña jíni de. ³ Núu súcuan te núu quijnáhan ña jíni inga tēe níni técu gā yíhi ña, te cásiquí ndéē ña de. Te núu je ni jíhī yíhi ña, te je ni quenda ña chíji ley un. Te cuu quijnáhan ña jíni inga tēe, chi nasūu jéē casíquí ndéē ña núu súcuan.

⁴ Te suni súcuan róhó jíjnáhan ró, ñanī máni, chi ndúú ró jíni Cristo. Chi nájnūhun ni cajihī rō jíni Cristo, te ni quendacoo ró chíji ley jenahán. Te vijna chi nájnūhun ni quijnáhan ró jíni inga, cúu jeē ní quívicoo

ró ndaha Cristo, Yaā ni natecu mēhñu ndíyi, návāha cuu sāha ró jniñu váha jeē cuní Yaā Dios. ⁵ Chi ná ni cajica yó jíin modo maá yó nde saá, te ley un ní sāha jeē ní ndíyo neé ni yō tāca jéē cuní yiqui cúñu yō jeē sāha yó. Te yūcuan ní sāha jeē jnahnú ndetū yō nuú. ⁶ Te vijna te je ni quenda yó chíji ley jenahán, chi nájnūhun je ni jihí yō jeē ma nihín gā poder siquī yō. Te súcuan te iyó libre yō jeē cuajniñu yó núu Yaā Dios. Te jíca yó jíin modo jeē jéē cuní maá Espíritu, chi tuá yñi yó chíji ley jeē ní tee Moisés jenahán.

Siquī cuēchi jeē ñúhun ini anuá yō

⁷ ¿Ndese cahán yō núu súcuan? ¿A ley ndíso cuēchi? Tú cuiti jeē súcuan. Te núu jeē tú ley yā, te ma cuní cuiti rī jeē iyó cuéchi rī. Chi ma cuní rī jeē cuēchi cúu jeē ndíyo ni rī ndajniñu jnáhan rī núu tu ní cahán ley jeē ma ndíyo ni yō. ⁸ Te súcuan ni nihín cuēchi modo cocuu jíin rí. Chi siquī jeē ndácu ley jniñu jeē ma sāha yó cuéchi, te ni quejéé ndíyo ni rī sāha rī tāca jéē neé. Te núu jeē tu ley, te suni tú na jnūhun stívi yó siquī ley nuú. ⁹ Chi ni iyo tiempo jeē técu rī jeē ná tu jecūhun ni rī jeē cahán ley. Te ná ni quejéé rí jécūhun ni rī jniñu jeē ndácu ley, te ni jecūhun ni rī jeē iyó cuéchi rī, te ni nduu rī nájnūhun ndíyi. ¹⁰ Chi ni jini rī jeē ley jeē sāha jeē cótecu anuá rī nuú, te tuú chi sa ni sāha jeē jnahnú ndetū rī nuú. ¹¹ Chi jíin jéē ndácu ley un jniñu, te ni nihín cuēchi modo cocuu jíin rí, te ni stahú ruhū. Chi jíin jéē ndácu ley jniñu, te cuēchi ni sāha jeē ní quenda jnūhun jeē jnahnú ndetū rī.

¹² Núu súcuan te iyó ndáa maá ley, te tāca jniñu ndácu chi iyó ndoo iyó ndáa vāha. ¹³ Núu súcuan te ley jeē iyó váha ún, ¿á suu sāha jeē jnahnú ndetū rī naún? Tú cuiti. Chi sa suhva máa cuéchi cúu jeē sāha jeē jnahnú ndetū rī, te súcuan stúu cuēchi ndese iyó máa. Chi jíin jniñu váha jeē ndácu ley te ni natūu jniñu neé jéē cúu cuēchi.

¹⁴ Chi jíin yō jeē nuú maá Espíritu vēji ley. Te ruhū chi sa névāha rī ñn modo neé máa rí jeē ni squívi ruhū jejniñu cāha rí nuú cuéchi. ¹⁵ Chi tāca jéē sāha rī, tu jécūhun ni rī najehē cúu jeē sāha rī. Chi jniñu váha jeē cuní rī sāha rī, tu ndé nihín rī fuerza sāha rī, chi sa suhva sāha rī jniñu neé jéē tu cúvāha

ni rī sāha rī. ¹⁶ Te náa sāha rī jniñu neé jéē tu cuní rī sāha rī, núu súcuan te nácuni rī jeē iyó ndáa ley. ¹⁷ Núu súcuan te nasūu rúhū cúu jeē sāha jniñu neé un, chi modo neé jéē ñúhun ini anuá rī cúu jeē sāha cuēchi. ¹⁸ Chi jíin rī jeē modo maá rí jeē névāha rī ini anuá rī, tú cuiti na vé jeē váha íyó. Chi cuní rī sāha rī jniñu váha, te tu ndé nihín rī fuerza sāha rī. ¹⁹ Chi jniñu váha jeē cuní rī sāha rī, tu sāha rī. Te jniñu neé jéē tu cuní rī, sa yūcuan sāha rī. ²⁰ Te náa sāha rī jniñu jeē tu cuní rī sāha rī, te nasūu rúhū cúu jeē sāha, chi modo neé jéē ñúhun ini anuá rī cúu jeē sāha.

²¹ Núu súcuan te ni jini rī jeē súcuan cúu jíin rí: Vēsú cuní rī sāha rī jniñu váha, te sa máni modo neé cúu jeē ñúhun ini anuá rī. ²² Chi cúsi ni rī jíin ley Yaā Dios nde jíin ini anuá rī. ²³ Te ni nacuni rī jeē iyó inga modo neé máa rí jeē jési nuú jeē cuní rī sāha rī jeē váha. Te cúu rī nájnūhun preso nuú cuéchi jeē jícu jíin rí.

²⁴ Nacā jeē ndahú gá cúu rī núu súcuan. ¿Ndé ñn jnama ruhū nuú modo neé máa rí jeē jícu jíin rí jeē jnahnú ndetū rī? ²⁵ Na cútahū ndasí rí nuú Yaā Dios, chi máa yá cúu jeē jnáma ruhū nuú modo neé rí siquī jeē ni jihí Jitoho rī Jesucristo jehē rī. Núu súcuan te vēsú cuní yō squícu yó ley Yaā Dios, te jeē jíin fuerza maá yó ma cúu, chi modo neé máa yó sāha jeē jejniñu cāha yó nuú cuéchi.

Siquī jeē jíca yó jíin modo cuní Espíritu Yaā Dios

8

¹ Núu súcuan te ma ndénehen Yaā Dios cuēchi siquī ñayuu cáyihí ndaha Cristo. Chi tuá cájica i jíin modo neé máa i, chi sa suhva cájica i nájnūhun cuní maá Espíritu yā. ² Chi modo jeē sāha Espíritu cúu jeē técu yō siquī jeē yñi yó ndaha Cristo Jesús. Te yūcuan ní sāha jeē ní nduu libre yō nuú jnūhun jeē ni yñi yó chíji cuēchi jeē jnahnú ndetū yō nuú. ³ Chi ni sāha Yaā Dios jeē quéndōo vāha ñayuu jeē tu ní cúu quéndōo vāha jíin ley Moisés, siquī jeē tú na fuerza i jíin modo maá i jeē squícu i ley un. Chi ni tají yá Sēhe ya ni quiji, te ni nduu ya nájnūhun ñayuu cáhīyo cuēchi, návāha socō yā maá yá siquī cuéchi, vēsú tú na cuēchi ya. Te súcuan ni

ndonda Yaā Dios siquī cuéchi jeē ní casáha ñayuu jíin modo neé máá i. ⁴ Súcuan ni cuu návāha cuu squícu yó táca jniñu ndaā jeē ndácu ley, chi tuá jíca yó jíin modo neé máá yó, chi jíca yó nájnūhun cúní maá Espíritu.

⁵ Chi ñayuu jeē cájica jíin modo neé máá, chi máni ndihví ni i siquī jeē cuní maá i. Te ñayuu jeē cájica nájnūhun cúní Espíritu, chi máni ndihví ni i siquī jniñu cúní maá Espíritu. ⁶ Te jeē ndihví ni yó siquī modo cuní maá yó sáha jeē jnahnú ndetū yō. Te jeē ndihví ni yó siquī jniñu cúní maá Espíritu, sa suhva sáha jeē cotecu yō ní cáni te coo ndeyí coo sī ni yō. ⁷ Chi ñayuu jeē ndihví ni siquī modo neé cúní maá i, chi jíto uhū i Yaā Dios, chi tu cúní i cuatáhú i ley Yaā Dios, te ni ma cúu squícu i. ⁸ Jeē yúcuan, ñayuu jíca jíin modo cuní maá, tu cúu sáha i jeē cúsi ni Yaā Dios jíin i.

⁹ Te máá ró jijnáhan ró, chi tuá cájica ró jíin modo cuní maá ró, chi cájica ró nájnūhun cúní Espíritu, chi ndéé Espíritu Yaā Dios ini anuá rō. Te ñayuu jeē tu ndéé Espíritu Cristo ini i, tu cáyihí i ndaha ya. ¹⁰ Te núu ndéé Cristo ini rō, te vésú in quiví te cuu yiquí cúñu rō jeē siquí cuéchi, te cotecu anuá rō siquī jeē ní ndahva Yaā Dios cuéchi ró. ¹¹ Te núu ini rō jijnáhan ró ndéé Espíritu maá Yaā jeē ní nastécu Cristo Jesús mēhñu ndíyí, yūcuán na te máá yá suni sáha ya jeē natecu yiquí cúñu rō jeē cúū. Te sáha ya súcuan jeē jíin máá Espíritu yā jeē ndéé ini rō.

¹² Núu súcuan, hermano jijnáhan ró, ndéé jniñu yó jéé caca ndaā yō, te nasūu jéé sáha yó modo neé cúní maá yó. ¹³ Chi núu caca ró jíin modo neé máá ró, te jnahnū ndetū rō. Te núu jíin fuerza maá Espíritu snāā rō táca jniñu casáha ró jíin modo neé máá ró, te cotecu rō ní cáni.

¹⁴ Chi táca ñayuu jeē cándiquín modo jeē steén Espíritu Yaā Dios, máá i cácuu sēhe Yaā Dios. ¹⁵ Chi Espíritu jeē ní canihín rō, tu ní sáha ya rohó jéé cuu ró nájnūhun mozo nuū yā jeē yūhú tucu ró núu yā, chi sa ni sáha ya jeē cúu yó sēhe ya. Te jeē yúcuan cúu jeē cahán jee yó: Tátá maá ná. ¹⁶ Te máá Espíritu steén yā ini anuá yō jeē cúu ndije yó sēhe Yaā Dios. ¹⁷ Te núu sēhe ya cácuu yó, te suni nihín yō maá táhū jeē ní jéjnūhun ya,

te in cáhnu-ni coo tahū yō jíin Cristo. Chi núu ndóho yó jíin yá vijna, suni cujéhnu yó jíin yá andiví.

¹⁸ Núu súcuan te sáha ri cuenta jeē táca jnúndóho jeē ndóho yó vijna, lúlí ndasí cúu nuū jnúhun jeē cujéhnu luu yó jíin yá cu-cuéé gá. ¹⁹ Chi ndihí jeē ní jécōo, yōhyo cándētu jeē na sáha Yaā Dios jeē nduvāha, quiví quénda ndijin jeē cujéhnu sēhe Yaā Dios jijnáhan i. ²⁰ Chi táca jéé ni jécōo, chi ni quiví chíji jnúhun jeē tu quéndōo vāha. Te nasūu jéé ní castiví máá, chi ñayuu ni casáha cuéchi, te jeē yúcuan ní squéndōo Yaā Dios súcuan. Te máni cándētu jeē ndúvāha. ²¹ Chi in quiví te táca jéé ni jécōo, chi quenda chíji jnúhun jeē tívi jíin jéé tehyú. Te nduluu ndasí nájnūhun coo táca sēhe Yaā Dios, chi cácu nuū jnúhun jeē tu quéndōo vāha. ²² Chi jíin yō jeē táca jéé ni jécōo, chi nde vijna te nájnūhun inuú-ni cándoho te cájitū ni jeē na ndúvāha ndihí. ²³ Te nasūu máá-ni táca jéé ni jécōo cúu jeē ndóho, chi suni nde máá yó ndóho yó, vésú je névāha yó Espíritu jeē cúu seña jeē in quiví te nihín yō ndihí tahū yō. Chi yōhyo ndóho yó jnúndóho, te ndétu yó jéé náquihin sēhe ya yohó te jnama ya yiquí cúñu yō jeē tuá ndoho yó jíin. ²⁴ Chi ni jnama ya yohó síquī jeē ñúhun ni yō jeē súcuan coo. Te núu je ni sáha ya nájnūhun ñúhun ni yō, yūcuán na te tuá ñúhun ni yō jeē sáha ya súcuan jíin yó. Chi tuá ndétu yó te núu je ni cuu súcuan. ²⁵ Te núu ná tu coto yó jéé sáha ya jeē ñúhun ni yō, yūcuán na te jíin paciencia ndétu yó jéé sáha ya.

²⁶ Te suni súcuan máá Espíritu chindéé ñáhán yá yohó jéé tú na fuerza ini yō. Chi tu jíin yō cacán tahú yō nájnūhun cánuú. Te máá Espíritu cahán ndahú yá jíin Yaā Dios jehē yō siquī táca jéé jítu ndasí ni yō te tu níhín yō jnúhun ndese cacán tahú yō. ²⁷ Te máá Yaā Dios jeē jíto ndee anuá yō, chi jíin yā táca jéé cuní maá Espíritu cahán yā jehē yō. Chi ñayuu cáyihí ndaha Yaā Dios, cahán ndahú Espíritu jehē i nájnūhun cúní Yaā Dios.

Vāha-ni cúndeyí yó siquī ndihí jeneé

²⁸ Te jíin yō jeē táca-ni jeē quíji nuū ñayuu maní jíin Yaā Dios, jeē váha chí jéé uhú, chi quéndōo vāha ga i nuū yā, sáha ya jíin táca jéé yúcuan. Chi cácuu i ñayuu jeē ní cana ya

i ni quivicoo i ndaha ya siquī jeē súcuan ni tee ni yā nde jenahán. ²⁹ Chi nde ná tu coo i te je jíní yā i, te je ni jeni ya i jeē ndoo ndaā nduu ánuá i ndacu i máá Séhe ya, návāha na cúu Séhe ya ñani jéhnū nuū cuehē ñayuu cácuu ñani cá candíje. ³⁰ Te jeē ní jeni ya i, te suni ni cana ya i. Te jeē ní cana ya i, te suni ni ndahva yā cuēchi i. Te jeē ní ndahva yā cuēchi i, te suni ni sáha ya jeē cujéhnū i.

³¹ ¿Te ndese ga cahān yō siquī jnúhun jéhnū yáha núu súcuan? Chi núu íne Yaā Dios jíin yó, ¿te ndé ñn cuu cahān siquī yō? Tú ni ñn. ³² Chi máá yá tu ní jnáma ya Séhe ya jeē ma cúu yā, chi sa suhva ni jēhe ya Séhe ya ni jihī yā jehē ndihī yó. Te núu súcuan ni jēhe ya Séhe ya, te nagā ni cuu jeē ma cuáha ya tāca gá jeē jíni ñúhún yó. ³³ ¿Te ndé ñn cuu cahān cuēchi siquī ñayuu jeē ní nacāji Yaā Dios? Tú ni ñn. Chi máá yá ni ndahva yā cuēchi i. ³⁴ ¿Te ndé ñn cuu ndenehen cuēchi siquī yō núu súcuan? Tú ni ñn. Chi máá Cristo cúu jeē ní jihī yā jehē yō, te suni ni natecu yā. Te vijna te ndéé yá lado váha Yaā Dios nuū cujéhnū ya, te cáhán ndahú yá jíin Yaā Dios jehē yō. ³⁵ ¿Te ndé ñn cuu quenehen yóhó núu jnúhun cúndáhú ni Cristo yohó? ¿A jnúndóho, chí táca jéé yí sáha, chí jéé cájito xeēn ñayuu yohó, chí jnámā, chí jéé cúmanī sahma, chí jnúhun yúhú, chí jéé cáhni i yóhó naún? Ni ñn tāca jéé yáha. ³⁶ Chi súcuan yósó núu tútu ñi jeē cácahān ñayuu cá candíje jíin Yaā Dios:

Jeē siquī máá ní te ndihī-ni hora cá cuni i cahni i sañá.

Te cásáha i jíin ná nájnūhun cásáha i jíin lanchi, quití cúu.

Achí tutu. ³⁷ Te tuú chi vésú cándoho yó táca jéé yáha, te vāha-ni cúndeyí yó siquī ndihī-ni, sáha máá Yaā jeē ní cundáhú ni yohó. ³⁸ Jeē yúcuu cácahnu ni rī jeē tú ni ñn cuu quenehen yóhó núu jnúhun cúndáhú ni Yaā Dios yohó. Ni núu cuu yō, ni núu cotecu yō, ni táca ndajéhé andiví, ni táca jéé neé jéé cácujehnū jnú poder, ni jeē iyó vijna, ni jeē cóo, ³⁹ ni jeē iyó núu sūcún, ni jeē iyó núu cūnú, ni táca gá jeē ní jecōo, ma cúu cuítí quenehen yóhó núu Yaā Dios, jeē jíin Jítoho yó Cristo Jesús ni cundáhú ni yā yohó.

Si quī ndese ni nacāji ya yucūn Israel

9

¹ Te cáhán ndaā rī chi cúu ri tēe cándíje Cristo, te tu stáhú rí, te jíní rī ini anuá rī jeē cahán ndaā rī sáha Espíritu Santo. ² Yōhyo cúcuíhyá ni rī, te níní jnáhuhū ni anuá rī ³ jeē siquī táca jnāhan ri ñayuu nación hebreo, chi ñn-ni yucūn rī jijnāhan ri. Chi jeē siquī máá i te cúu ni rī jeē núu na cúu te cujiyo ri nuū Cristo te jnahnū ndetū rī, návāha jíin yúcuu te cuu cácu ánuá máá i núu. ⁴ Chi cácuu i yucūn ñayuu Israel, te nde jenahán ni sáha Yaā Dios jeē cúu i sēhe ya, te mēhñu vícō jeē ndíndéé ní condee yā jíin i sáa. Te jíin máá i ni sáha ya táca contrato, te ni jēhe ya ley yā nuū Moisés jeē cúu máá i, te ni steén yā ndese chiñúhún i ya ini templo, te nuū máá i ni jejnūhun ya cuehē jnúhun. ⁵ Te máá i cácuu yucūn táca jíi yō jeē ní cacujéhnū, te suni yucūn máá i ní cacu Cristo jeē ní nduu ya tēe. Te máá yá cúu Yaā Dios jeē jnú ndihī-ni, te ní cáni cahān ñayuu jeē cujéhnū ya. Amén.

⁶ Te nasūu jéé tu ní quée ndaā táca jnúhun jeē ní jéjnūhun Yaā Dios nuū ñayuu Israel. Chi ni quee ndaā nahín núu vésú jecu-ni i, chi tú ndihī-ni yucūn Israel cúu jeē cá candíje. ⁷ Chi nasūu ndihī yucūn Abraham cácuu ndije sēhe de jeē ni jéjnūhun ya. Chi ni cahān Yaā Dios jíin de: Nuū máá-ni sēhe ró Isaac cúu nuū coo yucūn rō jeē ní jéjnūhun ri nuū rō. ⁸ Te jnúhun yáha cúní cahān jeē ni ñn ñayuu tu cúu i sēhe Yaā Dios siquī jeē ní cacu i ñn yucūn jeē jéni ni i jeē váha ga cúu. Chi sa suhva máni yucūn jeē ní jéjnūhun ya cúu ndije yucūn jeē chíhi ya cuenta. ⁹ Chi yáha cúu jnúhun jeē ní jéjnūhun ya nuū Abraham: Máá tiempo jeē ní jeni ri te quiiji ri, te cacu ñn sēhe yí ñasihí ró Sara, achí yá.

¹⁰ Te nasūu máá yáha-ni, chi suni Rebeca ni cacu uū sēhe yí ña, te ñn-ni tátá ndíndúú i, jeē ní cuu jíi yō Isaac. ¹¹⁻¹³ Te nde ná tu cacu ndíndúú i, te ná tu sáha i jeē váha jeē uhú, te je ni cahān yā jíin Rebeca: Sūchi ní cacu xihna gā cuajníñu i nuū súchi sándíhí, áchí yá. Chi suni súcuan cáhán tutu ñi: Ní jito manī rī Jacob, te Esaú chi tuú, áchí Yaā Dios. Te súcuan jíin yō jeē máá Yaā Dios cuu nacāji ya ñayuu núu ndese tēe ni máá yá,

te nasūu síquī jniñu jeē sāha i, chi sa suhva síquī ndese cúní maá yá nacāji ya i.

14 ¿Ndese cahān yō núu sūcuan? ¿A jéē tu íyó ndāā Yaā Dios jeē sāha ya sūcuan, chí naún? Tú cuiti. 15 Chi nde jenahán ní cahān yā jíin Moisés: Ndé-ni cúu jeē cuní rī cundáhú ni rī, te cundáhú ni rī. Te ndé-ni cúu jeē cuní rī sāha rī jeē váha jíin, te sāha rī jíin, áchí yá. 16 Núu sūcuan te nasūu síquī jeē cuní maá ñáyuu, ni nasūu jéē nducú ndéyí máá i cúu, chi síquī ndese cúní maá yá cundáhú ni yā i. 17 Chi suni sūcuan yósó núu tútu i jeē ní cahān yā jíin rey ñuu Egipto: Ni jeni rī rohó jéē cúu ró rey, návāha jíin ríhó te stéén rī poder rī, te návāha cuitē núu síhví rí ní ñáyíví, áchí yá. 18 Núu sūcuan te núu ndé ñn cúní yā cundáhú ni yā, te cundáhú ni yā. Te núu ndé ñn cúní yā jeē cuníhni ni, te sāha ya jeē cuníhni ni.

19 Te sanaa te cahān ñn ró jíin rí: Núu sūcuan cúu ¿te najehē cahán gā yā jeē cuēchi sāha yó? Chi ma cúu casi yō nuū yā jeē ndese cúní maá yá sāha ya. Achi rō. 20 Te sa suhva cahán rī jíin ró: Róhó, ¿ndé ñn cúu ró jéē jéni ni rō stió cuñí rō nuū Yaā Dios? ¿A cuu cahān quísi ñuhun jíin téē ní sāha: Najehē ní sāha ró rúhū sūcuan? achi. 21 Chi téē sāha quísi, cuu sāha de ndese cúní maá de, chi ñn-ni ñuhun cuu sāha de ñn quísi fino te inga quísi corriente.

22 ¿Te á tu jétáhú ró jeē suni sūcuan sāha Yaā Dios jíin ñáyuu? Chi cúní yā steén yā ndese sāha ya juicio síquī ñáyuu, te sūcuan te cuni i poder yā. Te vésú sūcuan te ni íyo paciencia ni yā jeē tu ní ndóna yachí yā síquī ñáyuu jeē jnahnú ndetū. 23 Te sāha ya sūcuan návāha stéén yā ndese yōhyo luu cújéhnú ya síquī jniñu sāha ya jíin yóhó ñáyuu cundáhú ni yā. Chi nde jenahán je ní sátūhva ya yohó jéē luu cújéhnú yó jíin yá. 24 Chi ní cana ya yohó jéē candíje yó, te sava yó cúu ñáyuu hebreo te sava yó cúu ñáyuu tāca gá nación. 25 Chi suni sūcuan ní cahān yā, yósó núu tútu Oseas:

Ñáyuu jeē tu ní cúu ñáyuu maá rí, vijna te cahān rī jeē cácuu i ñáyuu maá rí.

Te ñáyuu jeē tu ní íyo maní rī jíin, vijna te cahān rī jeē cácuu i ñáyuu jeē maní rī jíin.

26 Te máá lugar nuū ní cahān rī jeē násūu ñáyuu rī cácuu i,

suu yūcuan cahān ñáyuu jeē cácuu i sēhe Yaā Dios, Yaā técu ní cáni.

Achí yá. 27 Te Isaías sa suhva ní cahān de jnūhun ñáyuu Israel: Vésú ní cayā yucūn Israel nájnūhun ñítí yumar, te jecu-ni i jnama ya. 28 Chi Jitoho yō Yaā Dios, yachí sínu ya jniñu jeē sándaā yā cuēchi ñáyuu ñáyíví. Achí tutu. 29 Chi nájnūhun ní cahān tucu Isaías:

Máá Yáā cúu Jitoho nuū tācá ndajéhé andíví, núu tu ní jnama ya jecu yucūn yō nuú,

te je ní ndoho yó nájnūhun ñáyuu ñuu Sodoma jíin ñuu Gomorra, jeē ní naa ndihi.

Achí tutu.

Jeē tu cájetáhú ñáyuu hebreo jnūhun jnama ya i

30 ¿Ndese cahān yō núu sūcuan? Suu jeē ñáyuu tāca gá nación, vésú tu ní cánducú i quendōo ndaā i nuū Yaā Dios, te ní ndahva yā cuēchi i. Chi síquī jeē ní candíje i jeē ní jíhí Cristo jehē i cúu jeē ní ndahva yā cuēchi i. 31 Te sa suhva ñáyuu Israel, vésú cánducú i quendōo ndaā i nuū Yaā Dios sāha ley yā, te tu cúndeyí i quendōo ndaā i. 32 ¿Te najehē? Síquī jeē tu cánducú i jeē ndahva yā cuēchi i jeē candíje i jeē ní jíhí Cristo jehē i, chí sa jéni ní i jeē squícu máá i ley te quendōo ndaā i. Te jeē stíví i sūcuan cúu nájnūhun cácotúú i síquī maá yúu jeē cácachihí jehē, te suu cúu Cristo. 33 Chi sūcuan cahán nuū tútu i:

Nde ñuu rī Sion sāha rī jeē cóne maá Yaā jeē cúu nájnūhun yuū jeē cácachihí i jehē i.

Te cúu ya nájnūhun toto jeē cotúú i sāha.

Te sa suhva ñáyuu cándíje Yaā ún, chí jnama nahín yá i.

Achí Yaā Dios.

10

1 Hermano jijnáhan ró, cúu ndasí ní rī te jícan tahu rī nuū Yaā Dios jehē ñáyuu nación rī Israel, jeē na jnama ya i jíjnáhan i. 2 Chi cahán rī jeē váha cásaha i jeē ndihví ní i cáchiñúhún i Yaā Dios. Te vésú sūcuan te cáchiñúhún cáhá i. 3 Chi tu cájecūhun ní i ndese ndáhva Yaā Dios cuēchi ñáyuu, te nducú i quendōo ndaā i máá-ni jeē squícu i

ley. Te tu cájetáhú i máá modo jeē ndáhva Yaā Dios cuēchi i. ⁴ Chi siquī jeē ni sāha Cristo te cuu quenda ñayuu chīji ley Moisés. Te ndáhva Yaā Dios cuēchi tāca ñayuu jeē candíje i jeē ni sāha Cristo jehē i.

⁵ Chi súcuan ni tee Moisés jnūhun ñayuu jeē cánducú quendōo ndaā jíin ley: Núu ññ ñayuu cuu squícu i tācá jniñu ndácu ley, te cotecu i núú, áchí. ⁶ Te jnūhun jeē ndáhva Yaā Dios cuēchi ñayuu siquī jeē candíje i jeē sāha ya jehē i, chi sa suhva cáhán: Ma cáni ni rō jeē jíni ñúhún caa ró andiví nasnúu ró Cristo jeē ndahva yā cuēchi ró. ⁷ Ni ma cáni ni rō jeē jíni ñúhún cuun ró ndé nuū cūnú ndonehen ró Cristo mēhñu ndíyi, nájnūhun jeē tu ní nátecu yā. ⁸ ¿Te ndese cáhán jnūhun un núu súcuan? Yajni íyó jnūhun ya jíin ró, chi ñúhun ini yuhu ró jíin ini anuá rō, achí tutu. Te suu cúu jnūhun jeē na cándíje yó jéē jnáma ya yohó. Te jnūhun yáha cúu jeē cánacani ri. ⁹ Chi núu cahán rō jeē Jítoho rō cúu Jesús, te núu candíje ró jíin ini jíin ánuá rō jeē ní natecu yā mēhñu ndíyi ni sāha Yaā Dios, yūcuán na te jnama ya rohó. ¹⁰ Chi jíin ini jíin ánuá yō cándíje yó jéē ni jíhī yā jehē yō, te súcuan te ndáhva Yaā Dios cuēchi yó. Te jeē cahán yō jeē Jítoho yō cúu Jesucristo, te súcuan te jnama ya yohó.

¹¹ Chi cáhán tutu i: Tāca ñayuu jeē candíje i ya, chi jnama nahín yá i, áchí. ¹² Chi ñnuú-ni cúu ñayuu hebreo jíin tāca gá ñayuu, chi máá yá cúu Jítoho nuū ndíhi yó, te cuehē jeē váha sāha ya jíin ñayuu cácahán ndahú jíin yá. ¹³ Chi súcuan cáhán jnūhun ya: Ndíhi ñayuu cácahán ndahú jíin máá Jítoho yō, chi jnama ya i, áchí. ¹⁴ ¿Te ndese cahán ndahú i jíin yá te núu tu ní cándíje i jeē jnama ya i? ¿Te ndese candíje i te núu tu ní jíni sōho i jnūhun ya? ¿Te ndese cuni sōho i te núu tú na ñayuu nacani jnūhun nuū i? ¹⁵ ¿Te ndese nacani ñayuu jnūhun ya te núu jeē tu táji yá i quihñ i? Chi nájnūhun cáhán tutu i: Yōhyo luu jniñu cásáha ñayuu cájica jíin jnūhun ndeyí sñ ni jeē cánacani i jnūhun vāha ya, achí.

¹⁶ Te nasūú ndíhi i jétáhú nuū jnūhun jnama ya i. Chi ni cahán Isaías nde jenahán: Tátā Yaā Dios, ¿ndé ñayuu ni candíje jnūhun jeē cánacani ná víi? áchí de. ¹⁷ Núu súcuan

te núu cuni nahín ñayuu te cuu candíje i. Te jnūhun cuni nahín i cúu jnūhun Cristo.

¹⁸ Te cájnūhun rí: ¿A tu ní cájini sōho i jnūhun un núu súcuan? Tuú chi ni cajini sōho i, chi cáhán tutu i:

Ní ñáyiví ní cajini sōho ñayuu jnūhun jeē ní canacani de.

Te nde nuū jicá gá tāca lado ni jinū jnūhun ún.

Achí tutu. ¹⁹ Te suni cájnūhun rí: ¿A tu ní cájecūhun ni ñayuu Israel jnūhun ún? Tuú chi ni cajecūhun ni i, te tu ní cájetáhú i. Chi xihna gā Moisés ni cachi de jeē ni cáhán Yaā Dios:

Cucuíñí ró jijnáhan ró, chi cuāha ri jnūhun ri nuū inga ñayuu jeē násūú ññ nación cúu.

Te quití ni rō coto ró jéē cuāha ri jnūhun ri nuū ññ nación jeē tu jécūhun ni.

²⁰ Te suni Isaías ni chundeyí ni de ni cachi cáji de jeē ni cáhán Yaā Dios:

Ñayuu jeē tu ní cánanducú rúhū, ni cajini i ruhū.

Te nuū ñayuu jeē tu ní cácajnūhún, ni steén rī nuū i ndese Yaā cúu ri.

²¹ Te siquī ñayuu Israel sa ni cahán de jeē ni cáhán yā: Ndiquiví ni cana ri i jeē quívicoo i nuū rī, te tu ní cácum i, chi ñayuu ñihni ni, ñayuu jéē ni cácuu i. Achí yá, achí Isaías.

Jeē íyó jecu na ñayuu Israel jeē jnáma ya

11

¹ Núu súcuan te cájnūhun rí: ¿A ní stóo Yaā Dios ñayuu maá yá Israel, chí naún? Tú cuiti. Chi ruhū suni tēe Israel cúu ri, te yucūn Abraham cúu ri, te Benjamín cúu jíi rī jenahán. ² Tu ní stóo Yaā Dios ñayuu maá yá, chi je ni nacāji ya i nde jenahán. ¿A tu cájini rō ndese cáhán tutu i jnūhun Elías, tēe ni nacani jnūhun ya jenahán? Chi náa jícán tahu de, te ni cahán de siquī ñayuu Israel: ³ Tátā Yaā Dios, ni cajehni i tāca tēe cánacani jnūhun ní, te ni cajenu i tācá altar ní. Te máñúhún na sāña ní quendōo, te vijna suni cácum i cahni i sāña, áchí de. ⁴ Te Yaā Dios ni nastió cuíñí yā: Iyó nahín úxā mil ñayuu cáncandíje ruhū jeē tu ní cájecuñí yití i nuū ídolo naní Baal, achí yá. ⁵ Te suni súcuan vijna, chi íyó jecu na ñayuu jeē ní nacāji ya siquī jeē váha ni yā jíin i. ⁶ Te núu ni nacāji ya i siquī jeē váha ni yā jíin i, te nasūu siquī

jeē ni sáha i jniñu váha cúu. Chi núu siquī jeē ni sáha i jniñu váha cúu, yūcuán na te nasūu siquī jeē váha ni yā cúu.

⁷ ¿Te ndese cúu núu súcuan? Cúu jeē ñayuu Israel tu ní cúndeyí i quendōo ndaā i nájnūhun ni canducú i. Te sava i jeē ní nacāji ya, chi máá i ni ndahva yā cuēchi i. Te sava ga i ni ndunīhni ni i, ⁸ nájnūhun cáhán tutu i: Ni sáha Yaā Dios jeē tu jécūhun cuiṭi ni i siquī yā, ni tu jíni i jíni tñūú i, ni tu jíni nahín i jnūhun ya, te súcuan cúu nde vijna. Achí tutu. ⁹ Te suni ni cahān David:

Vico jeē casáha i, na cóo nájnūhun in trampa chí in xeyū, návāha nihīn i castigo xeēn siquī jeē castívi i casáha i cuēchi.

¹⁰ Te ánuá i na ndúnee, nájnūhun jeē tuá cúu coto i, te na jécostíhí jnūndóho siquī i ní cáni. Achí tutu.

Siquī jeē jnáma ya ñayuu tāca gá nación

¹¹ Núu súcuan te cájnūhun rí: ¿A tuá cúu cuiṭi ndívi ñayuu Israel nuū Yaā Dios jeē súcuan ni castívi i? Tú cuiṭi. Chi sa suhva jeē ní cacunīhni ni i, te sa ñayuu tāca gá nación ni canihīn tahu máá i jnūhun jeē jnáma ya i. Te yūcuan sáha tucu jeē ñayuu Israel condihvī ni i jeē suni candíje máá i.

¹² Chi jeē ní castívi i, te sa ñayuu ní cáhnu ñayívi ní canihīn maá i jnūhun ya. Te jeē ní cajica yátá i, suu ni sáha jeē ní canihīn ñayuu tāca nación jnūhun ya. Núu súcuan te quivī jeē ndívicoo tucu ndíhi ñayuu Israel ndaha ya, te ñayuu ñayívi víhyá gá quendōo ndetū i sáha ún.

¹³ Te vijna te cáhán rī jíni rōhó ñayuu tāca nación jeē tu ní jíni jnūhun ya. Chi ni tají Yaā Dios ruhū jeē scáca rí jnūhun nuū rohó ñayuu tāca nación. Te ndúcú rí jeē na cuájnuhún ró jijnáhan ró jniñu sáha rí jeē nácani rí jnūhun ya. ¹⁴ Chi cúní rí jeē jíni yūcuan te nacani ni sava jnáhan rí ñayuu Israel jeē suni candíje máá i, te jnama ya i. ¹⁵ Chi jeē ni stóo ya ñayuu Israel, jeē yūcuan cúu jeē sa ñayuu ñayívi ní sáha ya jeē ndívicoo i nuū jnúhun manī yā jíni i. Núu súcuan te quivī naquihīn tucu ya ñayuu Israel, quivī ún suni vāha ndasí sáha ya jíni ñayuu ní cáhnu ñayívi. Chi coo nájnūhun jeē natecu i jeē cúu i nájnūhun ndíyí. ¹⁶ Te

ñayuu Israel cásocō i nuū Yaā Dios pan jeē quénda xīhna gā nuū ñujen, te súcuan stéén i jeē ndíhi un cúu cuenta yā. Te in yujnu, núu yíhi jeē cuenta yā cúu, te suu cúu nde yoho jíni ndé ndíhi ndaha. Te suni súcuan ñayuu Israel, yíhi cuenta i nuū yā, siquī jeē jíni i xīhna ñúhún, ni quívicoo de ndaha ya.

¹⁷ Chi ñayuu Israel cácuu i nájnūhun ndayújnu olivo váha, te sava ndaha un ní quendē. Te rōhó ñayuu tāca nación jeē tu jíni jnūhun ya, cácuu ró nájnūhun ndayújnu olivo yucú, te ni nachuhun ya rohó núu ni quendē ñayuu cácuu ndayújnu váha ún. Te nájnūhun inuú-ni cástáa ró ndúxi jíni cajin jeē véji nde yoho yújnu ún. ¹⁸ Núu súcuan te ma sáha téyí ró maá ró nuū ñayuu Israel jeē cácuu nájnūhun ndayújnu jeē ni quendē. Ma cutéyí ró, chi nucūhun ni rō jeē násūú jéé yoho stáa cajin nuū maá ró, chi sa máá ró stáa cajin jeē véji nde yoho.

¹⁹ Te sanaa te cahān rō: Tú chi sava ndaha ni quendē návāha nachuhun ya ruhū nuū ni quendē ún, achi rō. ²⁰ Ndaā, te ni quendē i siquī jeē tu ní cá candíje i Cristo. Te rōhó chi máni siquī jeē cá candíje ró, jeē yūcuan cúu jeē ni quívicoo ró lugar i. Te ma sándúxi ró maá ró núu súcuan, chi sa suhva conso íyo ró núu Yaā Dios. ²¹ Chi tu ní íne cáhnu ni yā nuū maá ndaha jeē chíjniñu, te suni súcuan ma cóne cáhnu ni yā nuū rō jijnáhan ró te núu stívi ró. ²² Núu súcuan te sáha vāha ro cuenta ndese vāha ni Yaā Dios jíni ndese xeēn ni yā. Chi ni nduxeēn ni yā jíni ñayuu hebreo jeē ní castívi ún, te sa cúndáhú ni yā rohó. Te cánuú cuiñi nihīn ro jíni jnúhun jeē váha ni yā jíni ró. Chi núu tuú, te suni quende yā rohó. ²³ Te máá i, núu candíje tucu i, te nucōndee tucu i, chí máá Yaā Dios cuu nachuhun tucu ya i. ²⁴ Núu súcuan te rōhó ñayuu tāca nación jeē tu ní jíni jnūhun ya, ni quendē rō xinī yújnu olivo yucú, te ni nachuhun ya rohó xinī yujnu olivo váha, vēsú nasūú ndaha máá yujnu un cácuu ró. Te nagā ni cuu ñayuu hebreo jeē ma náchuhun ya i nuū ni quendē i, chí cácuu i máá ndayújnu váha ún.

In quivī te jnama ya ndíhi ñayuu nación Israel

²⁵ Hermano, cúní rí jeē na jécūhun ni rō jijnáhan ró ndese íyó jnúhun yáha jéé ní

yisāhí, návāha ma cutéyí ró caní ni rō jeē ndichí xíní maá ró: Chi sava ñayuu Israel ni ndunihni ni i, te súcuan coo máa-ni nde quiví jínu candíje ñayuu tāca nación jeē tu jíní jnūhun ya. ²⁶ Te saá te jnama ya ndihí ñayuu nación Israel, chi cáhán tutu i: Ichi ñuu rī Sión quiji Yaā jnama ñayuu, te sāha ya jeē tuá coo cuēchi nuū tāca yúcūn Jacob.

²⁷ Te yāha cúu contrato jeē sándaā rī jíní i, quiví jeē quēnde rī cuēchi i jínáhan i, áchí Yaā Dios.

Achí tutu.

²⁸ Chi ñayuu hebreo un ní nduu i nájnūhun enemigo Yaā Dios siquí jeē tu ní cáccandíje i jnūhun jnama ya i. Te jeē yúcuan te cuu cuitē núu jnūhun un núu tāca rōhó. Te vēsú súcuan te siquí jeē ní nacāji ya tāca jí i jenahán, te cúndáhú gá ni yā i jeē ma stóo ya i ní cáni. ²⁹ Chi tu nácani yátá ni yā jeē cána ya ñayuu jíní jéē jéhe ya tahū i.

³⁰ Te rōhó jínáhan ró, suni ni cahīyo nīhni ni rō nuū Yaā Dios nde saá. Te vijna jeē ní cacunihni ni maá ñayuu hebreo, te cúndáhú ni yā rohó. ³¹ Te suni súcuan máa i, chi vēsú cáccunihni ni i vijna, te cundáhú tucu ni yā i, nájnūhun cúndáhú ni yā maá ró jijnáhan ró. ³² Chi Yaā Dios ni sāha ya jeē ní quendōo ndivii ñayuu chíji jnūhun cúnihni ni i, návāha suni cuu cundáhú ni yā ndivii i.

³³ Núu súcuan te náhán náā ni yō jeē yóhoyo cuehē jnūhun ndichí íyó jíní Yaā Dios, te ndihí cuiti jíní yā. Te ni ma cúu cuiti castūhun yó ndese téé ni yā sāha ya tāca-ni, te ma cánda cuiti yō jecūhun ni yō ndese cúu tāca jéē sāha máa yá. ³⁴ Chi cáhán tutu i: ¿Ndé ñn ni jecūhun ni ndese jéni ni maá Jítoho yō? ¿Chí ndé ñn ni steén nuū yā? ³⁵ ¿Ndé ñn ni jéhe xīhna gā nuū maá yá, návāha nachunaa yā nuū i? ³⁶ Chi nde nuū maá yá vēji tāca jéē iyó, te máa yá ni sāha ndihí, te jeē cúu máa yá cúu. Te na cáhán yō jeē yóhoyo luu cújéhnu Yaā Dios ní cáni. Amén.

Jeē na cóo ndoo ánuá yō cuajníñu yó núu Yaā Dios

12

¹ Núu súcuan te cáhán ndahú rí jíní ró jijnáhan ró, hermano, jeē siquí jeē cúndáhú ni Yaā Dios yohó. Na sócō rō maá ró núu

yā, coo ndoo coo iī rō cuajníñu ró núu yā, nájnūhun cúsiñ ni yā. Chi yāha cúu jeē chiñúhún ró yā nde jíní ini jíní ánuá rō.

² Te ma cáca ró jíní táca modo casáha ñayuu ñayiví yāha, chi sa na sáma ró modo caní ni rō, te ndujeé jéē níjnūní rō. Te súcuan te cuu nacāji ró ndé-ni cúu jeē váha jeē nújnahan ni Yaā Dios, jeē cúsiñ ni yā, jíní jéē íje ni rō jíní jnūhun ya.

³ Te siquí jeē váha ni yā ni jéhe ya jniñu nácani rí jnūhun ya, jeē yúcuan cáhán rí jíní ndihí ró jéē ma cáni ni rō jeē váha ga ñayuu cúu ró núu cūhva jeē iyó ró. Chi ná ñn ná ñn ró na cáni ndaā ni rō siquí maá ró, te ma scáa ga rō caní ni rō jeē váha ga ñayuu cúu ró vēsú nuū cūhva jeē ni jéhe Yaā Dios fuerza ini rō cáccandíje ró. ⁴ Chi cácuu yó nájnūhun ñn yiquí cúñu jeē iyó cuehē parte, te sín sín jéjníñu ñn ñn. ⁵ Chi vēsú iyó cuehē yō, te nájnūhun ñn-ni yiquí cúñu cúu yó jéē yíhi yó ndaha Cristo, chi ñn-ni ni nduu yó jijnáhan yó.

⁶ Te sín sín tahū ni jéhe Yaā Dios nuū yō jeē cuajníñu yó núu yā, núu ndese ni nujnahan ni yā ni jéhe ya nuū ñn ñn yó. Núu súcuan te na cuajníñu vāha yó jíní táhū ún. Núu ni nihín yō tahū jeē nácani yó jnūhun ya, te cánuú sāha yó ndé maá cūhva ni jéhe ya cáccandíje yó. ⁷ Te núu ni nihín yō tahū jeē chindéé ñáhán yó jnáhan yó, te na sāha yúcún yó. Te núu ni nihín yō tahū jeē steén yō, te na cóndihvī ni yō steén yō. ⁸ Te ñayuu jeē stihví ni inga ñayuu, suni na sāha yúcún i. Te ñayuu jéhe nuū jnáhan, na cuáha i súcuan-ni. Te ñayuu ndíso jníñu, na ndácu vāha i jniñu. Te ñayuu jíto ndáhú ñayuu ndahú, na cúsiñ ni i sāha i.

Ndese cánuú squícu ñayuu cáccandíje

⁹ Te na cúndáhú ndije ni rō jnáhan ró, nasūu máa jéē cahán-ni ró. Te coto uhū rō jniñu néé, te condiquín rō jniñu váha. ¹⁰ Te cánuú coo maní rō jíní jnáhan ró nájnūhun jéē maní rō jíní ñani rō. Te nducú ró jeē quendōo yíñúhún gá jnáhan ró vēsú máa ró.

¹¹ Te ma cucúxí ró jíní jniñu cásáha ró. Chi jíní ini jíní ánuá rō cóndihvī ni rō cuajníñu ró núu maá Jítoho yō.

¹² Te na cúsiñ ni rō jeē cáñuhun ni rō tāca jéē váha jeē cóo. Te na cuándeýí ni rō núu

ndóho ró jnúndóho. Te níní na cácan tahu rō.

¹³ Te coto ndáhú ró ñayuu cácan díje núu cúmaní nuū i. Te cuāha núu ró vehe nuū ñáyuu cájica.

¹⁴ Te cacān tahu rō jehē ñayuu cájito xeēn rohó. Ma cahán ndevāha ró síquī i, chí sa cacān tahu rō jehē i.

¹⁵ Te núu cúsiñi ni ñayuu, te suni na cúsiñi ni rō jíin i. Te núu cúcuíhyá ni ñayuu, te suni na cúcuíhyá ni rō jíin i.

¹⁶ Na cóo inuú ni rō jíin táca jnáhan ró. Te ma cundúxí ró, chí sa quijnáhan ró jíin ñáyuu núu ga. Ma cáni ni rō jeē ndichí xíní rō.

¹⁷ Te ma nasáha ndevāha ró jíin ni ñin ñayuu, núu ni sáha ndevāha i jíin ró. Na cóndihvī ni rō sáha ró jniñu váha, jíto jíinúū tāca ñáyuu. ¹⁸ Te na cóndihvī ni rō coyūcu mání rō jíin táca ñáyuu, vēsú ndese cándāa máa i. ¹⁹ Nání mání jijnáhan ró, ma nácuāha ró jéē ndútahū ñayuu casáha ndevāha jíin ró, chí sa cuāha ró jnúhun jeē maá Yaā Dios cuāha ya castigo i. Chí cahán tutu i: Máa rí cuāha castigo i, máa rí nacuāha yāhu i, áchí Jítóho yō. ²⁰ Te suni cahán tutu: Tēe jíto uhū rohó, núu jí de sōco, te cuāha ró jéē cáji de. Te núu jíchí de, te cuāha ró jéē cóho de. Chí núu sáha ró súcuan, te cucanu de te nacani uhū ni de jeē ni jíto uhū de rōhó. ²¹ Ma cuāha ró jnúhun jeē cundeyí jniñu néé jíin ró, chí sa jniñu váha na sáha ró návāha ndahvā jniñu néé.

13

¹ Tāca ñáyuu na cuátahú i nuū tohō cándiso jniñu ñuu. Chí ma cóo tēe cándiso jniñu te núu tu ní sáha máa Yaā Dios. Te tēe cándiso jniñu chí Yaā Dios ni tee jniñu síquī de. ² Te ñayuu jeē tu jétahú núu tēe cándiso jniñu, núu súcuan te cúnihni ni i nuū jeē ní jeni Yaā Dios. Te ñayuu jeē cúnihni ni, chí cuēchi sáha i, te nihīn i castigo. ³ Chí tāca tēe ndíso jniñu, nasūu jéē ndíso jniñu de jeē yūhú ñáyuu casáha jniñu váha, chí sa jeē yūhú ñáyuu casáha jniñu néé. Te núu cúní rō jeē ma cúxeēn tēe cándiso jniñu nuū rō, na sáha ró jniñu váha núu súcuan. Yūcuán na te cuajnúhún de rōhó. ⁴ Chí jéjniñu Yaā Dios de jíjnáhan de, návāha coyūcu váha ró jíjnáhan ró. Te núu sáha ró jniñu néé, te sa

yūhu ró, chí nasūu cáha-ni cúu jeē cándiso jniñu de stóho de ñayuu. Chí jéjniñu Yaā Dios de, návāha cuāha de castigo ñayuu casáha jniñu néé. ⁵ Jeē yúcuan cánuú jéē cuatáhú ró núu tēe cándiso jniñu, te nasūu máni jeē ma níhín rō castigo, chí suni jeē tú na cuēchi coo ánuá rō. ⁶ Te jeē yúcuan cúu jeē suni cájēhe ró xúhun núu tēe cándiso jniñu cuu jniñu ñuu. Chí jéjniñu Yaā Dios de, te máni jniñu yúcuan casáha de.

⁷ Te chunaa rō ndihí jeē cátaū rō nuū tāca ñáyuu. Cuāha ró xúhun ñuu nuū tēe stútú xúhun ñuu, te cuāha ró xúhun renta nuū tēe stútú renta. Te na cóo respeto rō nuū ñáyuu cánuú coo respeto rō. Te na cóo yíñúhún ró nuū ñáyuu cánuú coo yíñúhún ró. ⁸ Ma cótaū rō nuū ní ñin. Te íyó ñin jeē taú rō jeē ma tahndé cuiti, suu jeē ni cáhān Yaā Dios jeē cundáhú ni rō jnáhan ró. Chí ñayuu cundáhú ni jnáhan, je ni squícu i ndihí jeē ndácu ley yā. ⁹ Chí súcuan ndácu ley jniñu: Ma cosíquí ndéē rō jnáhan ró, ma cáhni rō ndīyí, ma sacuíhná ró, ma sajnúhún ró, ma ndíyo ni rō jeē névāha jnáhan ró. Te tāca jnúhun yáha jíin táca gá jniñu ndácu ley, ndihí-ni yíhi chíji jnúhun yáha: Cundáhú ni rō jnáhan ró nájnūhun cundáhú ni rō maá ró, áchí tutu. ¹⁰ Te núu cundáhú ni yō jnáhan yó, te tu sáha yó ni ñin jeē tu íyó váha nuū i. Núu súcuan te jeē cundáhú ni yō jnáhan yó, yúcuan cúu jeē squícu yó ní ley yā.

¹¹ Súcuan sáha ró jíjnáhan ró, chí sáha ró cuenta jeē cuácuyajni quivī ndíji ya. Te ma cóo ga rō nájnūhun ñayuu quixí, jeē cúhuun ni rō. Chí vijna je ni cuyajni ga quivī jnáma ya yohó vēsú quivī ní candíje yó jnúhun ya. ¹² Chí nájnūhun je yajni yáha jecuāa, te cuacundijin quivī jnáma ya yohó. Núu súcuan te na stóo yó jniñu jeē ni sáha yó núu néé, te na cúcutú yó jíin táca jniñu ndaā jeē caca yó jíin luz yā. ¹³ Na cáca yíñúhún yó nájnūhun cánuú caca yó jíin luz yā. Ma nájini ró, ma sáha ró táca vico néé, ma cáca jnéni ró, ma sáha ró jniñu néé, ma cuajnáhan ró, ma cucuésún ni rō. ¹⁴ Chí sa suhva cuiñi cutú ró jíin fuerza máa Jítóho yō Jesucristo, jeē ma cuāha ga rō jnúhun sáha ró jniñu cúní modo neé máa ró.

Ma cahán neé yó coto yó jnáhan yó

14

¹ Cuatáhú ró ñayuu jeē ná tu ije jíin jnúhun ya, te ma tejnáhan ró jíin i síquī tāca jnúhun jeē sún jéni ni i jíin máá ró. ² Chi íyó ñayuu jeē jéni ni i jeē cúu caji i ndinuū-ni. Te íyó ñayuu jeē ná tu ije jíin jnúhun ya, te cájéni ni i jeē tú vāha caji i cūñu, chi jeē ní casocō ñayuu nuū ídolo cúu. ³ Te róhó tée jeē yéji ndinuū-ni, ma cahán rō coto ró tée jeē tu yéji ndinuū. Te róhó tée jeē tu yéji ndinuū, ma cahán rō coto ró tée jeē yéji ndinuū. Chi Yaā Dios ni jetáhú yá tēe ún. ⁴ Te róhó, ¿ndé ñin cúu ró jéē cahán neé ró jíto ró mozo Yaā Dios? Chi núu vāha chí neé sáha de, te máá yá cúu jeē sándaā jíin de, nasūu máá ró. Te tuú chí cuiñi vāha de, chí mozo máá Jítoho yō cúu de, te cuu sáha ya jeē ma stívi de.

⁵ Te suni íyó ñayuu jeē jéni ni jeē íi gā ñin quivī vēsú inga quivī. Te inga ñayuu chí jéni ni i jeē inuú-ni cúu tāca quivī. Te tācá i na cúndaā vāha ni máá i síquī jeē jéni ni i. ⁶ Chi tēe jeē neé íi quivī, chíñúhún de máá Jítoho yō jeē sáha de súcuan. Te tēe jeē tu neé íi quivī, suni chíñúhún de Jítoho yō jeē sáha de súcuan. Te tēe jeē yéji ndinuū-ni, chíñúhún de máá Jítoho yō jeē sáha de súcuan, chí nácuatáhú de nuū Yaā Dios. Te tēe jeē tu yéji ndinuū, suni chíñúhún de Jítoho yō jeē sáha de súcuan, te suni nácuatáhú de nuū yā.

⁷ Chi ni ñin yó tu técu yō jeē váha máá-ni yó, te ni ñin yó tu jíhí yō jeē cuní máá yó. ⁸ Chi núu técu yō, te técu yō jeē cuajníñu yó núu máá Jítoho yō. Te núu cuu yō, te suni cuu yō síquī jeē cuní máá Jítoho yō. Núu súcuan te núu jeē cótecu yō chí jéē cuu yō, te yáhi yó ndaha Jítoho yō. ⁹ Chi ni jihí Cristo te ni natecu yā, návāha cuu ya Jítoho nuū ñayuu ni jíhí jíin ñayuu técu.

¹⁰ Te róhó, ¿naun jéni neé ni rō jíto ró jnáhan ró núu súcuan? ¿Te naun cújéē ni rō jíto ró de? Chi tāca yó cuiñi yó yuhu mesa Cristo jeē sándaā yā jniñu yó. ¹¹ Chi suhva yósó núu tútu íi:

Jendaá ndije chí nuū máá rí cuiñi yítí táca ñayuu,

te ndihi i cahán jeē máá rí cúu Yaā Dios, áchí máá Jítoho yō.

¹² Núu súcuan te ná ñin ná ñin yó nacuāha yo cuenta nuū Yaā Dios ndese jniñu ni casáha yó.

Ma sáha yó jéē quivī jnáhan yó cuéchi

¹³ Te jeē yúcuan ma cahán neé gá yō coto yó jnáhan yó. Chi sa tee ni rō jeē ma sáha ró ni ñin jniñu jeē sáha jeē stívi jnáhan ró te quivī i cuéchi. ¹⁴ Te jíin rī jeē ni ñin jeē ni sáha Yaā Dios, tu stívi ánuá yō. Chi súcuan ni cucáhnu vāha ni rī síquī jeē candíje ri Jítoho yō Jesús. Te núu ñin ñayuu jéni ni i jeē íyó jéē stívi ánuá i, yūcuán na te súcuan sáha un jíin máá i. ¹⁵ Te núu jnáhan ró tu cúvāha ni de jeē yéji rō cūñu ni casocō ñayuu nuū ídolo, chí jéni ni de jeē stívi un ánuá rō, núu súcuan te tu cúndáhú ni rō de jeē sáha ró súcuan. Coto má snāā rō anuá jnáhan ró síquī jeē yéji rō ñin jeē jéni ni de jeē cuéchi cúu. Chi suni jehē máá de ni jihí Cristo. ¹⁶ Ma sáha ró jniñu jeē cahán i síquī, vēsú jíin máá ró jeē íyó váha. ¹⁷ Chi jeē ndácu Yaā Dios jniñu nuū yō, nasūu síquī ndese caji yō coho yó cúu, chí sa suhva síquī jeē na sáha yó jniñu ndaā, te coyūcu mánī yō jíin jnáhan yó, te cusí ni yō sáha Espíritu Santo. ¹⁸ Te ñayuu jeē súcuan jéjníñu nuū Cristo, chí cúsí ni Yaā Dios jíin i, te suni cájejnúhún ñayuu i.

¹⁹ Núu súcuan te na cóndihvī ni yō coyūcu mánī yō, návāha jíin yúcuan chindéé ñájnáhan yó ije yó jíin jnúhun ya. ²⁰ Te ma cuáha ró jnúhun jeē ndeyu yéji rō snāā jniñu ni sáha Yaā Dios jíin jnáhan ró. Chi íyó ndoo ndije ndihi jeē yéji yō, te vēsú súcuan te tú vāha jeē yéji rō ndeyu jeē sáha jíin jnáhan ró jéē caji de jeē jéni ni de jeē cuéchi cúu. ²¹ Vāha ga ma caji rō cūñu, ni ma cóho ró vino, te ni ñin ma sáha ró jéē stívi ánuá jnáhan ró, te quivī de cuéchi, te caca yátá de nuū jnúhun cándíje de. ²² Te núu cándíje ró jéē tú na vé sáha jeē yéji rō, te súcuan na cándíje máá-ni ró núu Yaā Dios. Te nacā ndetū tēe jeē tu sáha jíin ánuá de jeē cuéchi cúu núu caji de coho de. ²³ Te tēe yéji ñin jeē jéni ni de sanaa te stívi ánuá de, núu súcuan te sáha de cuéchi, chí tu cándíje de jeē íyó váha jeē yéji de. Chi tāca jéē sáha yó, núu tu cándíje yó jéē íyó váha, te cuéchi cúu.

Jeē na sáha yó jéē cúsí ni jnáhan yó

15

¹ Te yóhó jéē ni ije yó jíin jnúhun ya, cánuú condito yó ñáyuu jeē ná tu ije jíin jnúhun ya, návāha candíje vāha i. Te ma sáha yó jéē maá-ni yó cusī ni. ² Chi ná ñn ná ñn yó na sáha yó jéē cusī ni jnáhan yó, návāha quendōo vāha i te ije i jíin jnúhun cándíje i. ³ Chi ni Cristo, tu ní sáha ya jeē cusī ni maá yá, chi sa suhva jeē cusī ni Tatá yā. Chi suhva cáhán tutu iī: Tāca jnúhun ndevāha jeē cácahān ndevāha ñayuu siquī ní, ni ndīvi siquī maá ná, áchí Cristo jíin Tatá yā. ⁴ Chi tāca jnúhun jeē ni jécósō nuū tútu iī nde jenahán, chi ni jecosō návāha stéén nuū yō, te nihīn yō jnúhun jeē sáha jeē cuandeyí ni yō te ndusī ni yō. Te súcuan te cocuhun ni yō tāca jéē vāha jeē cóo. ⁵ Te maá Yaā Dios jeē jéhe jnúhun cuandeyí ni jíin jnúhun ndúsī ni, na sáha ya jeē cóo inuú ni rō, nájnūhun cúní Cristo Jesús. ⁶ Te súcuan te ñn-ni coo ró te inuú-ni cuu cahān rō jeē yóhó vāha Yaā cúu Yaā Dios, Tatá Jitoho yō Jesucristo.

Jeē ni jítē jnúhun vāha ya nuū ñáyuu tācá nación

⁷ Núu súcuan te cuatáhú ró tāca jnáhan ró, nájnūhun ni jetáhú Cristo yohó, návāha cuni ñayuu jeē luu cújéhu Yaā Dios. ⁸ Chi cáhán rī jeē ní quiji Cristo Jesús, ni sáha ya tācá jniñu jeē quéndōo vāha ñayuu hebreo, návāha cundaā tāca jnúhun jeē ni jéjnūhun Yaā Dios nuū tāca jíi i. Te súcuan ni steén Cristo jeē squícu Yaā Dios tāca jéē ni jéjnūhun ya. ⁹ Te suni ni quiji ya návāha ñayuu tācá nación jeē tu jíin jnúhun ya, cahān i jeē yóhó vāha ni Yaā Dios jeē cundáhú ni yā i. Chi suhva cáhán tutu iī:

Núu súcuan te cahān na jéē yóhó vāha ni ní, cuni ñayuu tācá nación,

te cata ná yaa jeē chiñúhún ná nihín.

¹⁰ Te cáhán tucu tutu iī:

Róhó ñáyuu tācá nación, inuú na cusī ni rō jíin ñáyuu maá yá.

¹¹ Te cáhán tucu:

Róhó ñáyuu tācá nación, na cáhán rō jeē yóhó vāha ni Jitoho yō Yaā Dios,

te róhó ñáyuu tācá-ni ñuu, suni na cáhán rō jeē yóhó cújéhu ya.

¹² Te suni ni tee Isaías jnúhun yáha:

Nuū yúcūn Isaí quiji ñn jeē cujéhu,

te ndacu ya jniñu nuū ñáyuu tācá nación.

Te ñayuu ún chi cocuhun ni i tāca jéē sáha ya. Achí tutu.

¹³ Te maá Yaā Dios jeē sáha jeē cáñuhun ni yō tāca jéē vāha jeē coo, na sáha ya jeē cóo siī ndasí ni rō jíin jéē cóo ndeyí ni rō siquī jeē cácañíje nīhin ró yá. Te súcuan te cocuhun teyí gá ni rō tāca jéē vāha jeē coo, sáha poder maá Espíritu Santo.

¹⁴ Ñánī mánī, cúcáhu ni rī jeē vāha ndasí cándihvī ni rō jíin jniñu vāha, te vāha ndasí cájecūhun ni rō, te cúu stíhvī jnáhan ni rō.

¹⁵ Te ni jeni ni rī jeē tee ri carta yáha cáhán cají rí jíin ró jijnáhan ró, návāha víhyá gā na cócuhun ni rō tāca jnúhun yáha. Chi súcuan sáha ri siquī jeē vāha ni Yaā Dios te ni jéhe ya jniñu nuū rī ¹⁶ jeē jejniñu ri nuū Jesucristo, jeē nácani ri jnúhun nuū ñáyuu tācá nación jeē tu jíin jnúhun ya. Te nácani ri jnúhun vāha Yaā Dios nuū i jeē jnáma ya i. Súcuan sáha ri návāha ñayuu tācá nación, cuu squívi ri i ndaha ya jeē cúu i nájnūhun ñn jeē sócō rī nuū yā jeē cusī ni yā jíin. Chi ni sáha Espíritu Santo jeē iyó ndoo íyó íi i nuū yā.

¹⁷ Núu súcuan te siquī jeē candíje ri Cristo Jesús, te cusī ni rī jeē jejniñu vāha ri nuū Yaā Dios. ¹⁸ Chi ma cúu cahān rī siquī jniñu cásáha ñga tē, chi maá-ni siquī ndese ni jejniñu Cristo ruhū jeē sáha ri jeē ñáyuu tācá nación tu ní jíin jnúhun Yaā Dios, vijna jétáhú i nuū yā. Chi súcuan ni cuu jíin jnúhun ni cahān rī jíin jniñu ni sáha ri. ¹⁹ Chi ni sáha ri jniñu jéhu ndíso poder jeē steén jeē cujéhu ya, te ni iyo poder Espíritu Santo jíin rí. Te súcuan ni nacani ndíhi ri jnúhun ndese jnáma Cristo ñayuu. Te ni nacani ri nde ñuu Jerusalén, jíin ndíhi tācá ñuu, jíin nde ní región Ilírico. ²⁰ Súcuan cúu jeē ní condíhvī ni rī ni nacani ri jnúhun jeē jnáma ya ñayuu. Te ni jehēn rī nuū ñáyuu jeē ná tu cuni jnúhun Cristo, chi tu ní cúní rī nacani ri nuū ñáyuu jeē jé ni jini i ni canacani ñga tē. ²¹ Chi sa suhva ni sáha ri nájnūhun cáhán tutu iī:

Tāca ñáyuu jeē tu ní quiji jnúhun ya nuū i, vijna chi cuni i jnúhun ya,

te tāca ñáyuu jeē tu ní jíin cuiti jnúhun ya, vijna chi jecūhun ni i.

Achí tutu.

Jeē ñúhun ni Pablo jeē quihín de Roma

²² Te jeē yúcuān cúu jeē cuehē jínu ni cujnēñu rí, te tu ní cúu jecondēhe rí rohó jíjnáhan ró. ²³ Te vijna chi ni ndihi jniñu rí ní cáhnu tācá región ndañū yáha. Te je ni cuu cuehē cuiyā jeē cuní rī jeē rī nuū rō. ²⁴ Núu súcuan te ñúhun ni rī jecondēhe rí rohó jíjnáhan ró núu na yáha rí quihīn rī España. Te ñúhun ni rī jeē núu je ní cusī ni rī jeē ní jito jnáhan yó, yúcuān na te chindéé ñáhán ró ruhū jeē quihín gā rī. ²⁵ Te xīhna gā na quihín rī ñuu Jerusalén quindēca rí xūhún cuu hermano cáyūcu yúcuān. ²⁶ Chi ñayuu Macedonia jíin Acaya ni cajeni ni i jeē cáquin i xūhun quihīn nuū hermano cándoho ndáhú ñuu Jerusalén. ²⁷ Chi súcuan ni cacusī ni i ni casáha i. Te íyó váha jeē súcuan, chi máá i jeē cácuu i ñayuu tāca gá nación, táu i jeē sáha vāha i nuū ñáyuu hebreo un. Chi ñayuu hebreo ni casáha jeē ní quiji jnūhun Yaā Dios nuū i jeē quéndō vāha ánuá i sáha. Jeē yúcuān cánuú jéē chindéé ñáhán i ñayuu hebreo cáncandíje jíin ndajniñu ñayivī yáha. ²⁸ Núu súcuan te jeē jínu jniñu yáha jéē quindēca rí xūhun yáha nuū i, yúcuān na te jecondēhe rí rohó jíjnáhan ró jéē yáha rí quihīn rī España. ²⁹ Te jíni vāha rí jeē quivī jínú rī nuū rō, te vāha ndasí quendōo ró jéē nacani ga rī jnūhun vāha Cristo nuū rō.

³⁰ Hermano jijnáhan ró, cáhán ndahú rí jíin ró jeē chindéé ñáhán ró ruhū cacān tahu rō jehē rī nuū Yaā Dios síquī jniñu ndúcú ndeyí rí. Súcuan sáha ró síquī jeē candíje yó Jítoho yō Jesucristo, jíin síquī jeē cundáhú ni yō jnáhan yó sáha máá Espíritu. ³¹ Te cacān tahu rō jeē na cácu rí nuū téē región Judea jeē tu cáncandíje, jíin jéē na cusī ni tācá hermano ñuu Jerusalén jeē quindēca rí xūhun yáha cuu de. ³² Te súcuan te núu cuní Yaā Dios te jecondēhe rí rohó jíjnáhan ró, te cusī ni yō, te nanihīn ni rī jeē condee rī jíin ró. ³³ Te máá Yaā Dios jeē jéhe jnūhun ndeyí sī ni, na cóo ya jíin ró jijnáhan ró. Amén.

Jeē cahán Pablo jeē sáncandíje ni i

16

¹ Te vijna te cáhán rī jíin ró jijnáhan ró jéē na chindéé ñáhán ró hermana Febe, chi cúu ña ñahan jéjníñu jeē síquī jnūhun

ya nuū ñáyuu cáncandíje ñuu Cencrea. ² Te cuatáhú ró ña nájnūhun cuní maá Jítoho yō, chi súcuan cánuú sáha hermano cáncandíje. Te chindéé ñáhán ró ña na-ni vé cúu jeē jíni ñúhún ña, chi súcuan ni chindéé ñáhán máá ña cuehē ñayuu, te suni nde ruhū.

³ Cahán rō jíin Priscila jíin Aquila jeē sáncandíje ni ndindúú de, áchí rí, chi cáchindéé ñájánhan de jíin rí síquī jniñu Cristo Jesús. ⁴ Chi ná ni íyo jnūndóho jeē cuu rī nuú, te ni cachundeyí ni de ni canducú de scácu de ruhū, vésú suni cuu maá de núu. Te nácuatáhú rí nuū ndindúú de, te nasūu máá-ni ruhū, chi suni tāca grupo ñayuu cáncandíje tācá nación. ⁵ Te suni cahán rō jíin ñáyuu cáncandíje ndútútú vehe de, sáncandíje ni i, áchí rí. Te cahán rō jeē sáncandíje ni Epeneto, téē manī rī jíin. Chi ñuu Acaya, máá de cúu jeē ní candíje xīhna gā nuū Cristo. ⁶ Suni cahán rō jeē sáncandíje ni María, ñahan jeē ní jéjníñu ndasí jeē síquī jnūhun ya mēhñu ró jijnáhan ró. ⁷ Te cahán rō jeē sáncandíje ni Andrónico jíin Junias, téē cácuu jnáhan ñuu rī jeē ní cahīn jíin rí vecāa. Te tācá apóstol chi cájéjníñu de ndindúú téē jíin, te xīhna gā de ni cáncandíje Cristo vésú máá rí.

⁸ Cahán rō jeē sáncandíje ni Amplias, téē manī rī jíin, chi cáncandíje de Jítoho yō. ⁹ Te cahán rō jeē sáncandíje ni Urbano, téē chindéé ñájánhan jíin yó síquī jniñu Cristo Jesús, te suni súcuan Estaquis, téē jeē manī rī jíin. ¹⁰ Suni cahán rō jeē sáncandíje ni Apeles, téē jeē ni stéén jeē candíje vāha de Cristo, te suni súcuan cahán rō jíin ñáyuu vehe Aristóbulo. ¹¹ Cahán rō jeē sáncandíje ni Herodión, téē cúu jnáhan ñuu rī. Te suni súcuan ñayuu vehe Narciso jeē cáncandíje máá Jítoho yō. ¹² Te suni cahán rō jeē sáncandíje ni Trifena jíin Trifosa, ñahan cásajniñu síquī jnūhun máá Jítoho yō. Te suni sáncandíje ni Pérsida, hermana jeē manī yō jíin, chi suni ni sájniñu ndasí ña síquī jnūhun Jítoho yō. ¹³ Te cahán rō jeē sáncandíje ni Rufo, téē cájéjníñu ñáyuu jeē vāha cáncandíje de máá Jítoho yō. Te suni súcuan cahán rō jíin náná de, te máá ña suni ni jito ña ruhū nájnūhun jeē naná rī cúu ña. ¹⁴ Te cahán rō jeē sáncandíje ni Asíncrito jíin Flegonte jíin Hermas jíin Patrobas jíin Hermes jíin tāca hermano jeē cáyūcu jíin

de. ¹⁵ Te suni súcuan Filólogo jíin Julia jíin Nereo jíin cuáha de, jíin Olimpas jíin ndihi hermano cá candíje cáyūcu jíin de jíin áhan de.

¹⁶ Te jeē cahán tāca ró jíin jn áhan ró, te yíñúhún techūhu ró ndaha i. Te tāca grupo ñayuu cá candíje nuū Cristo, cáhan i jeē na sá ndeyí ni rō.

¹⁷ Te cáhan ndahú rí jíin ró, hermano jíin áhan ró, jeē cóto ró máá ró nuū ñayuu cútucu ni te ndúcú stívi jn áhan jíin jnúhun tu quíjn áhan jíin jeē ní cacutūhva ró. Te cujiyo ró núū i jíin áhan i. ¹⁸ Chi ñayuu súcuan, tu jéjn íñu i nuū Jítoho yō Jesucristo, chi máni ndíhví ni i síquī jeē cáji i. Te yōhyo ndúxí i jíin jnúhun cácahān i, te súcuan stáhú i ñayuu jeē tu jíní vāha. ¹⁹ Te máá ró jíin áhan ró, chi je cájini ndihi ñayuu ndese vāha cájetáhú ró nuū yā, te jeē yúcuan cúsiñ ni rī. Te cúní rī jeē cóo listo vāha ró sáha ró jniñu vāha, te ma sáha ró jniñu néé. ²⁰ Te máá Yaā Dios jeē jéhe jnúhun ndeyí síñ ni, yachí sáha ya jeē cún deyí ró síquī jexeén jeē cúu Satanás. Te ñúhun ni rī jeē Jítoho yō Jesucristo na sáha ya jeē vāha rōhó jíin áhan ró.

²¹ Sándeyí ni rō jíin áhan ró, áchí Timoteo, tēe chíndéé ñáhán jíin rí síquī jnúhun ya. Te suni súcuan cácahān jn áhan ñuu rī Lucio jíin Jasón jíin Sosípater.

²² Te ruhū jeē naní Tercio, jeē tēe rí carta yáha jeē cahán Pablo, suni cáhan rī jeē sándeyí ni rō jeē cá candíje ró Jítoho yō.

²³ Te Gayo, tēe ni jéhe núu vehe ndéé rúhū Pablo, cáhan de jeē sándeyí ni rō jíin áhan ró. Te suni jéhe núu de vehe nuū tāca ñayuu cá candíje. Te suni súcuan cáhan Erasto, tēe cúu tesoroero ñuu yáha, te suni súcuan cáhan hermano Cuarto.

²⁴ Te ñúhun ni rī jeē máá Jítoho yō Jesucristo, na sáha ya jeē vāha rōhó jíin áhan ró. Amén.

Jnúhun sándíhi jéē cahán jeē yóhyo cújéhnua

²⁵ Te vijna na cáhan yō jeē yóhyo cújéhnua Yaā Dios. Chi máá yá cuu sáha jeē cuíñi nīhin ga rō jíin áhan ró jíin jnúhun jnáma ya rohó jeē nácani rí, jíin jnúhun Jesucristo jeē steén rī. Chi súcuan ni steén Yaā Dios jnúhun sáhi yá, jeē ní yisáhi ní cáni nde ná tu jecōo ñayívi. ²⁶ Te vijna te je ni nane cáji. Chi jíin

tútu iñ jeē ní catee tēe ni canacani jnúhun ya, ni jítē núu jnúhun sáhi yáha nuū ñayuu táca nación, návāha candíje i te cuatáhú i. Chi Yaā Dios jeē técu ní cáni, súcuan ni ndacu ya jniñu.

²⁷ Te ní cáni na cáhan yō jeē yóhyo cújéhnua Yaā Dios síquī jniñu ní sáha ya jeē jíin Jesucristo. Chi máá ñn-ni ya iyó te yóhyo ndíchí yá. Súcuan na cóo. Amén.

CARTA HN JEE NI TEE SAN PABLO APOSTOL NUU ÑAYUU ÑUU CORINTO

¹ Máá rí cúu Pablo, te ni cana Yaā Dios ruhū cúu ri apóstol Jesucristo. Chi súcuan ni nujnahan ni yā ni tají yá ruhū nacani ri jnūhun ya. Te ndĩndúú rí jín hermano yō Sóstenes ² cátee ri carta yáha cuájeē nuū rohó ñáyuu ñuu Corinto jeē cá candíje ró Yaā Dios. Chi cácuu ró ñayuu maá yá, chi cáyihí ró ndaha Cristo Jesús. Chi ni cana Yaā Dios rohó jínáhan ró jéē coo ndoo coo iī ró nuū yā. Te ni cana ya rohó ndé jín táca gá ñayuu jeē ndácunehen i máá Jítoho yō Jesucristo, ndé-ni cúu nuū cáhīyo i. Chi Jítoho táca yó jín i cúu ya. ³ Te cáñuhun ni rī jeē Tatá yō Yaā Dios jín Jítoho yō Jesucristo na sáha ga yā jeē váha róhó, te sáha ya jeē coo ndeyí coo sī ni rō.

Cristo sáha ya táca jéē váha yóhó

⁴ Te níni nácuatáhú rí nuū Yaā Dios jeē siquí rohó jijnáhan ró, chi jeē jín Cristo Jesús ni sáha ya jeē váha róhó. ⁵ Chi cáyihí ró ndaha Cristo, te jeē yúcuan ní sáha Yaā Dios jeē cáhīyo cúca ró jín táca jnūhun ya, chi cájecūhun váha ni rō te cúu nácani ró. ⁶ Chi súcuan cúu jeē cáhīn nīhin ró jín jnūhun Cristo jeē ní canacani ri nuū rō. ⁷ Te súcuan te tu cúmanī ni ñn tahū jeē jéhe ya cuu ánuá rō níni jéē cándetu ró quívī jeē quénda ndijín Jítoho yō Jesucristo. ⁸ Te máá yá chi sáha ya jeē cuiñi nīhin ró nde na jínu quívī, návāha ma cóo cuēchi siquí rō quívī ndíji Jítoho yō Jesucristo. ⁹ Te squícu Yaā Dios táca jéē ni jéjnūhun ya, te ni cana ya rohó jínáhan ró návāha cuni jnáhan ró jín Séhe ya, Yaā cúu Jítoho yō Jesucristo.

Siquí jeē ma cóo sñn ni i jín jnáhan i

¹⁰ Hermano, nde jín sñhví Jítoho yō Jesucristo cahán ndahú rí jín ró jeē inuú-ni na ndájnūhun ró jijnáhan ró, te ma cóo sñn ni rō. Chi váha inuú na cóo ni rō jín táca jéē cájeni ni rō. ¹¹ Súcuan cáhán rī, ñánī mánī, chi ni cacastūhun ñáyuu vehe Cloé nuū rī jeē cátejnanhan ró. ¹² Chi táca ñn ñn ró sñn sñn cácahān rō: Ruhū chi jín Pablo índichi

rī, cácahān sava ró. Te sava ga rō: Ruhū chi jín Apolos. Ruhū chi jín Pedro. Ruhū chi jín Cristo. Cácahān rō. ¹³ Te jeē cácahān rō súcuan ¿te á cájeni ni rō jeē sñn sñn Cristo iyó jéē cánacani ri jnūhun? ¿Te á rúhū Pablo ni jhī jicā cruz jehē rō? ¿Chí jín sñhví rúhū ni cajendute ró, chí naún? ¹⁴ Tú cuiti. Te na cútahū rī nuū Yaā Dios jeē tú cuehē rō ni scuándute ri, chi máá Crispo jín Gayo-ni, ¹⁵ návāha ma cahán ni ñn ró jéē jín sñhví rí ni jendute ró. ¹⁶ Te sá núcūhun ni rī jeē suni ni scuándute ri Estéfanos jín ñáyuu vehe de. Te sanaa te súcuan-ni cúu ñayuu ni scuándute ri, jéni ni rī. ¹⁷ Chi tu ní téjníñu Cristo ruhū jeē scuándute ri, chi sa suhva jeē nácani ri jnūhun jeē jnáma ya ñayuu. Te tu ní ndúcú rí jeē steén rī nuū rō ñn modo ndichí jéē ma jécūhun ni rō, chi núu súcuan te ma cúu jecūhun váha ni rō jnūhun jeē ni jhī Cristo jicā cruz.

Jín Cristo ni steén Yaā Dios poder yā jín jnūhun ndichí yá

¹⁸ Te jnūhun jeē ni jhī yā jicā cruz jeē jnáma ya ñayuu, chi jnūhun cánéé í cúu nuū ñáyuu cuango nuū jnahnú ndetū. Te máá yó jeē cuahán yō nuū cácu yó, chí jín yō jeē jnūhun Yaā Dios jeē ndíso poder cúu. ¹⁹ Chi suhva yósó núu tútu iī jeē ni cáhān Yaā Dios: Na snāa rī jnūhun ndichí cácahān ñayuu ndichí cuenta ñayívi yáha, te ma cuatáhú rí jnūhun cácahān ñayuu jeē jéni ni jeē jíní váha.

Achí yá.

²⁰ Núu súcuan ¿te ndé cuajníñu tēe ndichí cuenta ñayívi yáha, jín tēe cástéén tutu, jín tēe cánuanducú yúcún siquí jeē steén ñayuu ñayívi yáha? Chi táca jnūhun ndichí cuenta ñayívi yáha, ni cahán Yaā Dios jeē jnūhun cánéé í cúu. ²¹ Te yóhō ndichí sáha Yaā Dios. Chi táca jnūhun ndichí cájini ñayuu ñayívi, ni cachi ya jeē tu jéjníñu jeē cúni i ndese Yaā cúu ya. Yūcuán na te ni nujnahan ni yā jeē jín jnūhun ya jeē cánacani ri te jnama ya ñayuu cá candíje, vēsú cájeni ni ñayuu ñayívi jéē jnūhun cánéé í cúu.

²² Chi ñayuu hebreo, máni cáconi i jeē sáha Yaā Dios cuehē jniñu jéhu jeē steén poder yā. Te ñayuu griego chi máni siquí jnūhun ndichí cándihvī ni i. ²³ Te máá rí chi sa suhva cánacani ri jnūhun jeē ni jhī Cristo

jicā cruz jeē jnáma ya ñayuu. Te jnūhun yáha sáha jeē jnáníní ni ñayuu hebreo, te ñayuu tāca gá nación chi cájeni ni i jeē jnūhun cánéé íi cúu. ²⁴ Te ñayuu jeē ní cana ya ni quívicoo ndaha ya, vésú ñayuu hebreo chí ñayuu griego, chi jíní i jeē jíin Cristo ni steén Yaā Dios poder yā jíin jnūhun ndíchí yá. ²⁵ Chi jnūhun Yaā Dios jeē cácahān ñayuu jeē jnūhun cánéé íi cúu, yōhyo ndíchí gá vésú jnūhun ndíchí ñayuu. Te cájeni ni ñayuu jeē tú na poder yā ná ni jihí Jesús jeē jnáma ya yohó, te tuú chi nīhin téyí gá poder yā ún vésú poder ñayuu. ²⁶ Hermano, máá ró cácuu jeē ní cana ya ni quívicoo ró ndaha ya. Te condēhe ró jeē tú cuehē rō ndichí jíin jnūhun ñayíví, ni tú cuehē rō cándacu jniñu, ni tú cuehē rō cácuu sēhe ñayuu kujénu. ²⁷ Chi sa suhva ni nacāji Yaā Dios tāca jēē cácahān ñayuu ñayíví jēē tu ndíchí cuiṭi, návāha coo jnūhun canu nuū tāca jēē ndichí. Te ni nacāji ya ñayuu tu téyí ini ñayíví, návāha coo jnūhun canu nuū ñayuu teyí. ²⁸ Te suni ni nacāji Yaā Dios tāca jēē tu cújénu ini ñayíví, jíin tāca jēē sajēē ni i nuū, nde jíin tāca jēē tú jniñu cájeni ni i, návāha snúu ya tāca jēē kujénu ini ñayíví. ²⁹ Súcuu ni sáha ya návāha ni ññ ñayuu ma cúu sátéyí i máá i nuū yā. ³⁰ Te máá ró jíin náhan ró chi ni sáha Yaā Dios jeē nduú ró jíin Cristo Jesús. Chi nde nuū máá yá ni canihīn yō jnūhun ndíchí, te ni ndahva yā cuēchi yó, te ni sáha ya jeē iyó ndoo íyó íi yō nuū yā, chi ni jnama ya yohó. ³¹ Te jeē yúcuu na cóo nájnūhun cáhan tutu íi: Núu ññ ñayuu cuní i cutéyí i, te na cutéyí i síquī jeē ni sáha máá Jítoho yō jehē i, áchí.

Jeē nácani Pablo jnūhun jeē ni jíhí Cristo

2

¹ Te ruhū, hermano, ná ni jeē rī nuū rō jíin náhan ró jēē nácani ndaā rī jnūhun Yaā Dios, te tu ní nácani rī jnūhun ndíchí jēē ma jécūhun ni rō. ² Chi ná ni íyo rī jíin ró te tú na inga jnūhun ní ndúcú rí castūhun rí nuū rō, chí máni máá jnūhun Jesucristo jeē ni jíhí yā jicā cruz jeē jnáma ya yohó. ³ Te ná ni jinū rī nuū rō jíin náhan ró, chí tú na fuerza rī, te yúhú rí, te quísi i ruhū. ⁴ Te ná ni nacani rī jnūhun nuū rō, chí nasūu jíin jnūhun ndíchí ñayuu ñayíví ní scándíje rī rohó, chí sa suhva

jíin máá poder Espíritu yā ni steén rī nuū rō jíin náhan ró, ⁵ návāha ma cuiñi ró síquī jnūhun ndíchí cácahān ñayuu, chí cuiñi ró síquī poder Yaā Dios.

Jíin Espíritu te steén Yaā Dios ndese Yaā cúu ya

⁶ Te ndaā chí ndíchí cácahān rī jíin ñayuu jeē jé ni ije jíin jnūhun cándíje i ya. Te nasūu jnūhun ndíchí jēē iyó ini ñayíví yáha, ni nasūu jnūhun ndíchí cácahān tēē cácujuhnu ñayíví yáha, chí tēē ún yāha-ni jeē cácujuhnu de. ⁷ Chi jnūhun cácahān rī cúu jnūhun ndíchí máá Yaā Dios jeē ní yisāhí. Chí jnūhun ndíchí un jēē ní yisāhí, ni jequin Yaā Dios nde ná tu jecōo ñayíví, návāha cácu yó jēē cótecu yō ní cáni sáha jnūhun ún. ⁸ Chí ni ññ tēē cújénu nuū ñayíví yáha, tu ní jécūhun ni de jnūhun ndíchí un. Chí núu ni jécūhun ni de núú, te ma cáhni cuiṭi de máá Jítoho yō, Yaā kujénu luu. ⁹ Chí cúu nájnūhun cáhan tutu:

Tāca jēē ni sátūhva Yaā Dios jeē cúu ñayuu jeē maní jíin yá,
ni ññ ún tu ní jito jínúu ñayuu, ni tu ní jíní sōho i,

ni tu ní quíji jeē súcuu cani ni i.
Achí tutu. ¹⁰ Te máá yó jíin náhan yó chí ni steén Yaā Dios tāca un núu yō jeē jíin Espíritu yā. Chí máá Espíritu jíní vāha ya te steén yā ndihí, chí nde ndihí jeē ndichí gá máá Yaā Dios.

¹¹ Chí ni ññ ñayuu ma cúu cuni i ndese jéni ni inga ñayuu, chí máá-ni i jíin ánuá i cúu jeē jíní. Te suni súcuu ni ññ ñayuu tu jíní i ndese jéni ni Yaā Dios, chí máá-ni Espíritu Yaā Dios cúu jeē jíní. ¹² Te máá yó chí ni nihīn yō Espíritu un jēē véji nuū Yaā Dios, te tu cájeni ni yō nájnūhun cájeni ni ñayuu ñayíví. Te jeē yúcuu cúu jeē cájecūhun ni yō ndese ni sáha Yaā Dios jeē váha yohó síquī jeē váha ni yā. ¹³ Te suu síquī tāca jēē yáha cúu jeē cácahān rī, te nasūu jíin jnūhun jeē castéén ñayuu ndichí, chí jíin jnūhun jeē steén máá Espíritu. Chí castéén rī jnūhun Espíritu nuū ñayuu cánevāha Espíritu.

¹⁴ Te ñayuu ñayíví tu cájetáhú i tāca jnūhun jeē véji nuū Espíritu Yaā Dios, chí cájeni ni i jeē jnūhun cánéé íi cúu. Te ma cúu jécūhun ni i, chí tu cánevāha i máá Espíritu jeē sáha jeē jécūhun ni i. ¹⁵ Te ñayuu

cáneváha Espíritu, chi cájecūhun ni i ndese iyó ndíhi-ni. Te ñayuu ñayiví ma cúu jecūhun ni i ndese ñayuu cácuu ñayuu ún. ¹⁶ Chi suhva cáhán tutu íi: ¿Ndé ñn cuu cuni ndese jéni ni maá Jítoho yō? ¿Te ndé ñn cuu stéén nuū yā? Ni ñn ma cúu. Achí tutu. Te vēsú súcuan te máá yó chi cájeni ni yō nájnūhun jéni ni Cristo.

Jeē cáchindéé ñájnáhan de cájejniñu de nuū Yaā Dios

3

¹ Te ruhū, hermano, tu ní cúu cahān rī jín ró jijnáhan ró nájnūhun cáhán rī jín ñáyuu jica jín Espíritu. Chi ni cahān rī jín ró nájnūhun jín ñáyuu cájica jín modo maá, chi cácuu ró nájnūhun sūchi lúlí jéé ná tu ije ró jín jnúhun Cristo. ² Ni steén rī nuū rō jeē tú yí, chi cácuu ró nájnūhun sūchi lúlí jéé jéxin gā. Te tu ní cáhán rī jín ró jnūhun yí jeē cúu nájnūhun jeē ndáva jeē yéji ñayuu ni ije, chi ná tu canda ró jín ndé saá. Te ni vijna ná tu canda ró jín. ³ Chi cájica ga rō jín modo neé máá ró. Chi cáccuésún ni rō, te cácajnáhan ró, te cácusñn ni rō. Núu súcuan te cácuu ró nájnūhun ñayuu ñayiví jeé cájica jín modo neé máá. ⁴ Chi ñn ró cáhán: Ruhū chi jín Pablo índichi rī. Te inga rō cahán: Ruhū chi jín Apolos. Te súcuan cúu jeé cájica ró jín modo neé máá ró

⁵ ¿Te ndé ñn cúu ruhū, te ndé ñn cúu Apolos núu súcuan? Chi máá mozo-ni Yaā Dios cácuu ri, te ni jejniñu ya ruhū návaha candíje ró máá Jítoho yō. Chi ná ñn ná ñn ri ni sáha jniñu ndese ni jēhe máá Jítoho yō nuū rī. ⁶ Ruhū, nájnūhun ni taji ri jnūhun ya ini anuá rō, te Apolos, nájnūhun ni chuhun de ndute cúu jeē ní steén gā de nuū rō. Te máá Yaā Dios cúu jeē ni scuéhnu jnūhun ini anuá rō. ⁷ Núu súcuan te tú na vé cúu sáha tēe táji ni tēe chúhun ndute, chi sa suhva máá Yaā Dios cúu jeē scuéhnu. ⁸ Te tēe táji jín tēe chúhun ndute, ñn-ni cácuu de. Te táca de chi cuāha ya yāhu nuū de ndese jniñu ni casáha ñn ñn de. ⁹ Chi ruhū jijnáhan ri chi tēe chindéé ñájnáhan cájejniñu nuū Yaā Dios cácuu ri. Te máá ró jijnáhan ró cácuu nájnūhun itu Yaā Dios jeé jicu ya jín.

Te suni nájnūhun ñn vehe jeē sáha Yaā Dios cácuu ró. ¹⁰ Te ruhū chi cúu ri nájnūhun

ñn maestro albañil jeē ní jequin rī cimientu vehe ún, cúu jeē ni scándíje ri rohó. Te inga de cásama de siquí, cúu jeē castéén gā de nuū rō. Núu súcuan te ná ñn ná ñn de na cóo cuidado de ndese sáma de siquí. ¹¹ Te Jesucristo cúu cimientu vehe ún, te ni ñn ma cúu caquin inga cimientu, chi máá yá cúu jeē ní ndahva cuēchi ró. ¹² Te táca ñáyuu cácañdíje, chi sáha i vehe siquí cimientu un, núu jín ndajniñu vāha nájnūhun oro chí plata chí yúu luu, chí jín jéé yachí naa, nájnūhun yujnu chí ite chí ndayóhō. ¹³ Te natūu jniñu un jéé ní sáha ñn ñn i, te suu cúu ndese ni condíhvī ni i siquí maá yá. Chi máá quiví juicio jeē sándaā yā jniñu ñayuu, quiví ún natūu cáji jniñu i. Chi jín ñuhūn quiiji quiví ún, te nájnūhun sáha ñuhūn jeē jéhu táca jéé cúu cayū, súcuan coto ndee ya jniñu ñn ñn i. ¹⁴ Te núu tú cayū jniñu ní sáha i siquí cimientu un, te nihñn i tahū i. ¹⁵ Te núu tu ní cóndíhvī ni i jín jniñu ya, te ma nihñn i tahū i, chi nájnūhun cayū jniñu i. Te máá i chi cācu ánuá i, vēsú nájnūhun je yajni cayū i nuū yáñuhūn.

¹⁶ ¿A tu cájini rō jeē cácuu ró nájnūhun templo Yaā Dios, chi ndéé Espíritu Yaā Dios ini anuá rō? ¹⁷ Te núu ñn tēe stívī de templo Yaā Dios, te snáhnú ndetū yā tēe ún. Chi ndoo ndasí cúu templo yā, te suu cácuu máá ró.

¹⁸ Ni ñn ró ma stahú ró maá ró jín jéé jéni ni rō. Núu ñn ñayuu jéni ni i jeé ndichí i jín jnúhun ñayiví yáha, vāha ga na siáa i ún, návaha coo ndichí ndije i jín jnúhun máá yá. ¹⁹ Chi jnūhun ndichí jéé iyó ini ñayiví yáha, jnūhun cánéé íi cúu nuū Yaā Dios. Chi cáhán nuū tútu íi: Ñayuu ndichí cuenta ñayiví, chi nájnñ ya i siquí jnúhun ndichí i jeé jési i jnūhun ya, achí. ²⁰ Te cáhán tucu tutu: Máá Jítoho yō jini yā táca jéé jéni ni ñayuu ndichí, chi máni jeé jéni cáhá ni i, achí. ²¹ Núu súcuan te ni ñn ró má cuteyí ró jeé siquí ni ñn tēe ndichí. Chi cuenta maá ró cúu ndíhi-ni. ²² Cúu Pablo, cúu Apolos, cúu Pedro jeé castéén nuū rō. Cúu ndíhi jeé iyó ini ñayiví, jeé iyó vijna jín jéé quíji. Te vēsú núu cotecu rō chí cuu rō, te ndíhi-ni chí cuenta maá ró cúu. ²³ Te máá ró cácuu cuenta Cristo, te Cristo cúu cuenta Yaā Dios.

Jeé casájniñu apóstol siquí jnúhun ya

4

1 Núu súcuan te na cáni ni rō jijnáhan ró jeē mozo-ni nuū Cristo cácuu ri, jeē ní tejníñu ya ruhū jeē steén rī jñūhun Yaā Dios jeē ní yisāhi ndé jenahán. 2 Te ndaā chi tēe jeē sájniñu siquī ún, íyó responsable ná ñn ná ñn de jeē squícu vāha de. 3 Te ruhū tu sáha ri cuenta núu cánanducú ró siquī rī ndese sáha ri, chí núu cánanducú ñáyuu cácujuhnu ini ñayīví. Te ni máá rí tu chíhi ri cuenta siquī maá rí. 4 Chi vēsú jíní rī jín ánuá rī jeē tú na cuēchi ri, te nasūu yúcuan cúu jeē quéndōo ndaā rī, chi máá Jítóho yō cúu jeē jító ndee ruhū. 5 Jeē yúcuan ma nánducú ró siquī jniñu jnáhan ró, chi nde na queē maá quíví te cuni rō. Chi nde na ndíji máá Jítóho yō te nastúu ndijin yā tāca jniñu jeē yisāhi núu néē, te steén ndijin yā tāca jéé jéni ni ñáyuu jín ánuá i. Yūcuán na te máá Yaā Dios cuajnúhún yá ná ñn ná ñn i ndese ni casáha i.

6 Hermano, tāca jnúhun yáha ní cahān rī návāha quendōo vāha ró jijnáhan ró. Te ni cachi rī jeē maá rí jín Apolos cácuu ri mozo-ni nuū yā, te súcuan cácuu ri ñn ejemplo nuū rō. Te cáhán rī jeē súcuan cácuu ri, návāha cutūhva ró caní ni rō maá-ni nájnūhun cáhán tutu iī. Chi ma sandúxí ró jeē cuajnúhún ró ñn tēe steén, te inga de tuú. 7 ¿Te naun cácutéyí ró nuū jnáhan ró núu súcuan? ¿Te na vé cúu jeē iyó núu rō jeē tu ní cacutahū rō nuū yā? Te núu ni cacutahū rō nuū yā, ¿te naun cásatéyí ró maá ró jeē nájnūhun jeē nasūu jéé ní cacutahū rō cúu?

8 Va je ni cacucúca ró, chi je cánevāha ró ndíhi, cájeni ni rō. Te je cándacu máá ró jniñu, te ni tuá cájini ñúhún ró ruhū, cájeni ni rō. Tú vāha jeē súcuan cácutéyí ró. Te nacā jeē vāha núu jeē cándacu ndije nde ró jniñu núu, návāha suni cuāha ró jnúhun jeē ndacu nde ri jniñu jín ró jijnáhan ri. 9 Te íyó jéni ni rī jeē ruhū tēe cácuu apóstol, ni sáha Yaā Dios jeē cácuu ri nájnūhun tēe núu ga nuū ñáyuu, nájnūhun tēe jeē jé ni cundaā jeē cúu. Te ní ñayīví jín andíví cándēhe vāha nuū rī, cúu ndajéhé Yaā Dios jín ñáyuu. 10 Chi jeē siquí Cristo te cácahān i jeē tēe cánéé cácuu ri. Te tāca rōhó va ndíchí ró jín jnúhun Cristo, cájeni ni rō. Te tāca rúhū chi tu fuerza rī, te rōhó va íyó fuerza rō, cájeni

ni rō. Te rōhó chi cáhīyo yíñúhún ñáyuu nuū rō, te nuū rī chi casájéé ni i. 11 Níí véjicoo rī cájiī rī sōco te nde vijna. Te cájichī rī ndute, te cúmanī sahma ri, te tu casáha vāha ñáyuu jín rī, te ni tu cánevāha ri vehe. 12 Te ñihin casájniñu ri jín ndaha ri. Cácahān neé i nuū rī, te cácahān vāha ri jín i. Cájito xeēn i ruhū, te cájendeyí ni rī. 13 Cácahān neé i siquī rī, te sa cácahān manī rī jín i. Te cácuu rī nájnūhun yāca ini ñayīví, te casquéhichí i ruhū nde vijna.

14 Te nasūu jéé tēe ri yāha jéé cúcanu rō, chi sa suhva jeē stihví ni rī rohó, chi cácuu ró nájnūhun sēhe ri chi manī rī jín ró. 15 Chi vēsú na cóo uxī mil tēe steén jnúhun Cristo nuū rō, te ñn-ni tátá rō iyó. Te máá rí cúu nájnūhun tátá rō, chi ni scandíje ri rohó jéé ní nacani ri jnúhun vāha Cristo Jesús jeē jnáma ya yohó. 16 Núu súcuan te cáhán ndahú rí jín ró jeē na ndácu ró rúhū jijnáhan ró.

17 Te jeē yúcuan cúu jeē tají rí Timoteo cuajeē de nuū rō. Chi cúu de nájnūhun sēhe ri jeē manī rī jín de, te squícu vāha de nuū maá Jítóho yō. Te máá de nacachi tucu de nuū rō ndese jíca ri jeē candíje ri Cristo, jín ndese steén rī nuū tāca grupo ñáyuu cácañdije tāca lado. 18 Te sava ró chi casátéyí ró maá ró, chi cájeni ni rō jeē ma jéé cuiti gā rī nuū rō. 19 Te tuú chi yachí jeē rī nuū rō te núu súcuan cúní maá Jítóho yō. Yūcuán na te nanducú rí siquī tēe cácutéyí, te ma sáha ri cuenta jnúhun cácahān-ni de, chi sa coto ndee rī de núu cuu squícu nde de. 20 Chi jeē ndácu Yaā Dios jniñu nuū yō, nasūu máá jéé cahán iī-ni yó cúu, chi jíní ñúhún condiso poder jnúhun cáhán yō jín jniñu sáha yó. 21 Núu súcuan ¿te ndese cácuu rō? ¿A jéé cuxeēn rī nuū rō núu na jéé rī, siquī jeē tu cánacani ni rō, chí nacani ni rō te jeē rī jín jnúhun cúndahú ni jín jnúhun vītá ní?

Jeē sándaā Pablo siquī ñn cuēchi

5

1 Te ni nihīn rī jnúhun jeē jíca jnéni ñn tēe jeē íne mēhñu ró, chi ndéca de naná uū de. Te xeēn ndasí sáha tēe ún, chi ni ñáyuu jeē tu cájini jnúhun Yaā Dios, tu casáha i súcuan. 2 Te vēsú súcuan te casátéyí ró maá ró jijnáhan ró. Vāha ga jeē na cúcuíhyá ndasí

ni rō. Te cánuú jéē na quénehen ró téē sáha cuēchi ún na quénda de mēhñu ró. ³ Te ruhū, vēsú tu íyó rí jíin ró, te nájñuhun jeē iyó rí jíin ró cúu jeē ñúhún ni rī rohó. Te je ni sándaā rī siquī téē ni sáha cuēchi ún, chi nájñuhun jeē iyó rí jíin ró cúu. ⁴ Núu súcuan te na ndútútú ró jijnáhan ró, te máá Jítoho yō Jesucristo coo ya jíin ró. Te máá rí chi nájñuhun cone rí jíin ró, chi ñúhún ni rī rohó. Te poder máá Jítoho yō Jesús suni coo jíin ró. ⁵ Te na chíhi yó téē ún ndaha Satanás, návāha na ndóho yiqui cúñu de, te nacani ni de te cácu ánuá de quivī ndiji Jítoho yō Jesús.

⁶ Tuú vāha jeē casátéyí ró maá ró. ¿A tu cájini rō jñuhun cáhán suhva? Vēsú jecu-ni levadura te ndáa ní ñujen sáha, áchí. ⁷ Núu súcuan te quenehen ró téē un nájñuhun scáne ró levadura jeē ni tívi. Te súcuan te cuu ró nájñuhun pan jeē cúvāha jíin ñujen jéé jéé tú na levadura yíhi, jeē cáyeji i vico pascua. Te ndaā jeē súcuan cácuu ró. Chi je ni jihī Cristo jeē ni sócō yā maá yá jehē yō, chí cúu ya nájñuhun londe pascua jeē ni jíhī. ⁸ Núu súcuan te na cócūhun ni yō ndese ni cuu vico pascua un, te na cóo ndije ndaā anuá yō, te suu cúu nájñuhun pan jeē tú na levadura yíhi. Te ma sáha yó jniñu néé jíin jniñu jnéhén, jeē cúu nájñuhun levadura jeē ni tívi.

⁹ Nuū inga carta jeē ní tee ri nuū rō jijnáhan ró ni cahān rī jeē ma quivī nduu rō jíin ñáyuu cájica jnéni. ¹⁰ Te tu ní cáchi rī jeē ma quíjñahan cuiṭi rō jíin ñáyuu tu cácandíje jeē cájica jnéni, jeē ndíyo ni, jeē sácuihná, jeē chiñúhún ídolo. Chi núu súcuan te jíini ñúhún jeē quénda ró ini ñayiví núú, chí tuá na inga modo jeē cújiyo ró núú i chí ndéé yó ñayiví jíin i. ¹¹ Chi sa suhva ni cachi rī jeē ma quiví nduu rō jíin máá ñáyuu jeē cácahān i jeē cúu i hermano, te núu jíca jnéni i, chí ndíyo ni i, chí chíñúhún i ídolo, chí chíso jnúhun i siquī jnáhan i, chí nájñi i, chí cuihná i. Te ni ma cáji cuiṭi rō staā jíin ñáyuu casáha súcuan. ¹²⁻¹³ Chi nasūú jniñu rí cúu jeē sándaā rī siquī ñáyuu jeē tu cáhiin jíin yó. Yaā Dios cúu jeē sándaā siquī i. Te ñáyuu cáhiin jíin ró chí cánuú jéē sándaā rō siquī i. Núu súcuan te cánuú jéē quénehen ró téē ni sáha cuēchi un jéé íne de mēhñu ró, na quénda de.

Jeē ma cáquin i cuēchi siquī jnáhan i nuū

tohó tu cácandíje

6

¹ Te núu jnáhan ró jéē candíje ni sáha cuēchi siquī rō, ¿te naun jéngoo ró jíin de nuū tohó jeē tu cácandíje jíin yó? ¿Te naun tu casándaā rō nuū jnáhan ró cácandíje Yaā Dios? ² ¿A tu cájini rō jeē ñáyuu cácandíje Yaā Dios chí ñn quiví te sándaā i jniñu ñayuu ñayiví? Te núu ñn quiví sándaā rō jniñu ñayuu ñayiví, ¿te á má cúu sándaā rō vijna siquī tāca cuēchi lúli casáha jnáhan ró? ³ ¿A tu cájini rō jeē ñn quiví te sándaā yō nde jniñu tācá ndajéhé andiví? Te nagā ni cuu jniñu ñayiví yáha jeē ma cúu sándaā yō. ⁴ Núu súcuan te núu jnáhan ró sáha de ñn cuēchi siquī rō, ¿te naun jéngoo ró sa nuū tāca téē jeē tu cúu de jnáhan ñayuu cácandíje jeē sándaā de siquī cuēchi ún? ⁵ Súcuan cáhán rī návāha na cúcanu rō jijnáhan ró. ¿A tu íyó ni ñn téē jécūhun ni mēhñu ró jeē cuu sándaā de siquī rō? ⁶ Tú vāha jeē ñn hermano caquin cuēchi siquī inga hermano nuū tohó jeē tu cácandíje.

⁷ Te jeē cájequin rō cuēchi siquī jnáhan ró, chí jeē castiví íi rō cúu. ¿A tú vāha ga cuandeyí ni rō na sáha i cuēchi siquī rō chí quende i ndajniñu ró? ⁸ Te tuú chí sa máá ró casáha cuēchi te cáquende ró ndajniñu, te nuū tācá hermano rō cúu jeē casáha ró.

⁹⁻¹⁰ ¿A tu cájini rō jeē ñáyuu tu íyó ndáā, ma nihín tahú i quiví i ñuu nuū ndácu Yaā Dios jniñu? Ma stahú ró maá ró cani ni rō jeē nihín tahú rō, chí ni ñáyuu jeē jíca jnéni, ni ñáyuu chíñúhún ídolo, ni ñáyuu casiquí ndéē jnáhan, ni téē sáha ndiyí jíin jnáhan yí, ni ñáyuu cuihná, ni ñáyuu ndíyo ni, ni ñáyuu nájñi, ni ñáyuu chíso jnúhun siquī jnáhan, ni ñáyuu stahú jnáhan siquī xúhun, ma nihín tahú i quivícoo i ñuu nuū ndácu Yaā Dios jniñu. ¹¹ Te súcuan ni candāa sava ró núú, te vijna chí je ni nacate ya rohó, te cáhiyo ndoo cáhiyo íi rō nuū yā. Chi je ni ndahva yā cuēchi ró jéé jíin máá Jítoho yō Jesús jíin Espíritu Yaā Dios.

Jeē iyó ndoo íyó íi yiqui cúñu ñayuu cácandíje

¹² Te ndaā cúu jeē cácahān jeē ndihi-ni jniñu íyó váha sáha yó núu ndese cúní yō. Te vēsú súcuan te nasūú ndihi sáha jeē quéndō

vāha ánuá yō. Ndihi chi cuu sáha yó, te vēsú súcuan te tu íyó váha jeē quívi yó núū jníñu jeē stívi ánuá yō. ¹³ Te ndaā cúu jeē cácahān jeē ndeyu cúu jeē cúhun chīji, te chīji cúu jeē cúhun ndeyu. Te ñn quívi te tuá coo súcuan, chi naa ndíndúú un sáha Yaā Dios. Te nasūu síquī jeē cáca jnéni yó cúu jeē iyó yíqui cúñu yō, chi sa suhva jeē sáha yó jéē cuní maá Jítóho yō. Te Jítóho yō chi ndíto ya yíqui cúñu yō. ¹⁴ Te nájnūhun jeē ní nastécu Yaā Dios Jítóho yō, suni súcuan nastécu yā yohó jíin poder yā.

¹⁵ ¿A tu cájini rō jeē yíqui cúñu tācá ñn ñn rō cúu nájnūhun tāca parte yíqui cúñu Cristo? Núu súcuan ¿te á cuu quende yó ñn parte yíqui cúñu Cristo te squíjnahan yó jíin ñn ñahan jíca jnéni? Ma cúu cuiti súcuan. ¹⁶ ¿A tu cájini rō jeē tēe quíjnahan jíin ñahan jíca jnéni, ñn na yíqui cúñu ni nduu de jíin ña? Chi cáhan tutu íi: Jeē ndíndúú chi ñn na yíqui cúñu cuu, áchí. ¹⁷ Te ñayuu jeē quíjnahan jíin maá Jítóho yō, chi suni súcuan ñn na cúu i jíin yá síquī jeē candíje i ya.

¹⁸ Núu súcuan te cunu rō jéē ma quívi rō núū jnúhun jíca jnéni. Chi tāca gá cuēchi jeē sáha ñayuu, chi nasūu yíqui cúñu i stívi i. Te núu jíca jnéni i, te síquī yíqui cúñu i cúu jeē sáha i cuēchi. ¹⁹ ¿A tu cájini rō jeē yíqui cúñu rō cúu templo Espíritu Santo jeē ni jéhe Yaā Dios nuū rō, te ndéé yá ini rō? Te nasūu cuenta maá rō cácuu rō. ²⁰ Chi Yaā Dios yahu ni cuu jeē ní nacuaan ya rohó jíjnahan rō. Te jeē yúcuan cánuú jéē cáca yíñuhún rō nuū Yaā Dios jeē sáha rō jníñu váha nde jíin yíqui cúñu rō jíin ini jíin ánuá rō, chi máni cuenta Yaā Dios cúu.

Jnūhun cástūhun síquī tēe jíin ñasihí

7

¹ Vijna te na cáchi rī síquī tāca jnúhun jeē ní cacajnúhun rō ruhū nuū carta. Jendaá jeē vāha ga quendōo ñn tēe núu tú condeca de ñahan. ² Te síquī jeē iyó jnúhun jnéni, te vāha ga jeē tāca tēe na cóo ñasihí maá de, te suni tācá ñahan coo yíi maá ña. ³ Te yíi na squícu vāha de nuū ñasihí de jeē cúu de yíi ña. Te suni súcuan ñasihí na squícu vāha ña nuū yíi ña. ⁴ Chi ñasihí chi tu cúu sáha ña jeē cuní ña jíin yíqui cúñu ña, chi suni jeē cuní yíi ña. Te suni súcuan yíi tu cúu sáha de

jeē cuní de jíin yíqui cúñu de, chi suni jeē cuní ñasihí de. ⁵ Te ma sasáhán rō maá rō nuū jnáhan rō. Te núu cácuu rō jeē vihyá gā cacān tahu rō jecu tiempo, te núu cáhīyo conforme ndíndúú rō, te cuu sásáhán rō maá rō nuū jnáhan rō. Te yūcuán na te vāha ga naquijnahan tucu rō, návāha ma cóto ndee Satanás rohó síquī jnūhun jnéni.

⁶ Te nasūu jéē ndácu ri jníñu jeē cánuú quíjnahan rō, chi jeē jéhe ri jnūhun cúu. ⁷ Chi nújnahan ni rī jeē tāca tēe na cóo maá ñn-ni de, nájnūhun íyó maá rí. Te sín sín ni sáha Yaā Dios jíin ñn ñn de ndese cúu maá de, chi sava de cuu quendōo maá ñn-ni de, te inga de chi tuú chí sín ni sáha ya jíin de.

⁸ Núu súcuan te cáhan rī jíin ñayuu cáhīyo maá ñn-ni, jíin ñahan ní caquendōo ndáhú, jeē vāha ga te núu quendōo maá ñn-ni i, nájnūhun íyó maá rí. ⁹ Te núu jíin i jeē ma cánda i quendōo maá ñn-ni i, te na quíjnahan i núu súcuan. Chi vāha ga jeē quíjnahan i vēsú jeē ndúquji i.

¹⁰ Te nuū ñayuu jeē jé ni quíjnahan chí ndácu ri jníñu jeē ñahan ma ndusín ña jíin yíi ña. Te nasūu ruhū cúu jeē ndácu jníñu, chí maá Jítóho yō. ¹¹ Te núu ñn ñahan ndusín ña jíin yíi ña, te na quendōo maá ñn-ni ña, chí cuu naquijnahan ña jíin yíi ña. Te yíi suni ma ndusín de jíin ñasihí de.

¹² Te jíin sava ga ñayuu chí cahān rī yāha jéē jéni ni maá rí, te nasūu jéē ní cachí maá Jítóho yō cúu. Núu ñn hermano ndéca de ñahan jeē tu cándíje, te núu nújnahan ni ña condee ña jíin de, te ma ndusín de jíin ña. ¹³ Te núu ñn ñahan ndéca ña tēe jeē tu cándíje, te núu nújnahan ni de condee de jíin ña, te ma ndusín ña jíin de. ¹⁴ Chí tēe tu cándíje, yíhi cuenta de nuū Yaā Dios síquī jeē ní quíjnahan de jíin ñahan cándíje. Te ñahan tu cándíje, yíhi cuenta ña nuū Yaā Dios síquī jeē ní quíjnahan ña jíin tēe cúu hermano cándíje. Chí núu tu súcuan te sēhe i ma quíhi cuenta i nuū Yaā Dios, te vijna chí yíhi cuenta i nuū yā. ¹⁵ Te yíi chí ñasihí tu cándíje, núu fuerza cuní i ndusín i jíin jnáhan i, te na ndusín i. Chí núu súcuan cuní i, te hermano chí hermana cándíje tu cánuú casí i jeē ndusín jnáhan i jeē tu cándíje. Chí ni cana Yaā Dios yohó jéē condee maní yō jíin jnáhan yó. ¹⁶ Te rohó jéē cácuu ñasihí, tu

cájini rō, sanaa te candíje yíi ró sáha ró, te cācu de. Te suni súcuan rōhó jéē cácuu yíi, tu cájini rō, sanaa te candíje ñasihí ró sáha ró, te cācu ña.

¹⁷ Te ná ñn ná ñn ró na quéndōo ró ndese ni sáha Jitoho yō jeē cúu ró, jíin ndese íyó ró ná ni cana ya rohó ní candíje ró. Te súcuan ndácu ri nuū tāca grupo ñayuu cáccandíje. ¹⁸ Núu ni cana ya ñn tēe jeē ní cuu circuncidar, te súcuan na quéndōo de. Núu ni cana ya ñn tēe jeē tu ní cúu circuncidar, te ma cúu de circuncidar. ¹⁹ Chi tú na vé sáha núu cúu yó circuncidar chí tuú, chi jeē cánuú gá cúu jeē na squícu vāha yó jniñu cúní Yaā Dios. ²⁰ Ná ñn ná ñn ró na quéndōo ró ndese íyó ró ná ni cana ya rohó ní candíje ró. ²¹ Núu mozo jeē ní jeen ñayuu cúu ró ná ni cana ya rohó, te ma cóndihvī ni rō jeē quéndā ró. Te núu íyó modo jeē quéndā ró nduu libre rō, te íyó váha jeē sáha ró. ²² Chi tēe cúu mozo jeē ní jeen ñayuu, te núu ni cana Jitoho yō de, te vijna chi ni nduu libre de nuū cuéchi de, jéjníñu de nuū maá Jitoho yō. Te suni súcuan tēe sájniñu cuenta maá, te núu ni cana ya de, te vijna chi ni nduu de mozo jejniñu nuū Cristo jeē ní nacuaan ya de. ²³ Chi yahu ni cuu jeē ní nacuaan Yaā Dios rohó jijnáhan ró, cúu jeē ni jíhī Sēhe ya jehē rō. Núu súcuan te ma cuajniñu ró núu jniñu cāhá-ni jeē ndácu ñayuu ñayiví. ²⁴ Núu súcuan hermano, ná ñn ná ñn ró na quéndōo ró núu Yaā Dios ndese íyó ró ná ni cana ya rohó.

²⁵ Te vijna te siquī ñayuu jeē íyó máá-ni, tú na jñūhun ní ndácu Jitoho yō nuū rī. Te na cāhán rī jeē jéni ni maá rí, chi ni cundáhú ni Jitoho yō ruhū, te ni sáha ya jeē cúu cāhán ndaā rī. ²⁶ Jéni ni rī jeē vāha-ni núu quéndōo-ni tēe ndese cāhīyo de, jeē siquí jeē íyó jnúndóho tiempo yáha. ²⁷ Núu íyó ñasihí ró, te ma ndusñn ró jíin ña. Te núu tu íyó ñasihí ró, te ma nducú ró ña. ²⁸ Te núu quijnáhan ró, te nasūu cuéchi cúu. Te núu quijnáhan sūchi síhí, te suni nasūu cuéchi cúu. Te ñayuu quijnáhan, chi nihín i jñūndóho ñayiví yáha, te cúní rī jeē ma nihín rō jñūndóho.

²⁹ Hermano jijnáhan ró, jñūhun jeē cāhán rī yáha cúu jeē yachī-ni ndihí tiempo jeē sáha yó jniñu ya. Núu súcuan te nde vijna

te tēe íyó ñasihí, na cóndihvī gā ni de siquī jniñu máá yá vēsú siquī ña. ³⁰ Te ñayuu jeē ni jíhī jñáhan vehe i, na sáha i nájnūhun jeē tu cúcuíhyá ni i. Te ñayuu cúshí ni, na sáha i nájnūhun jeē tu cúshí ni i. Te ñayuu jéen, na sáha i nájnūhun jeē nasūu ndajniñu i cúu. Ma cuáha i jñūhun jeē cāsī tācá un jéē ma cúu condihvī ni i jniñu máá yá. ³¹ Te ñayuu jeē ní cacondihvī ni siquī ndajniñu ñayiví yáha, ma cujnéñu ga i jíin. Chi je yajni naa tāca jéē íyó ñayiví yáha.

³² Cúní rī jeē ma nácani ndasí ni rō siquī tāca jéē íyó ini ñayiví. Chi tēe cúu soltero, ndihvī ni de jniñu máá Jitoho yō, ndese cusí ni Jitoho yō sáha de. ³³ Te tēe íyó ñasihí chí ndihvī ni de jniñu íyó ñayiví, ndese cusí ni ñasihí de sáha de. ³⁴ Te suni súcuan sñn sñn jéni ni ñahan íyó yíi jíin ñahan íyó máá. Chi ñahan íyó máá, ndihvī ni ña jniñu máá Jitoho yō, chí cúní ña jeē coo ndoo coo íi anuá ña jíin yiqui cúñu ña cuajniñu ña nuū yā. Te ñahan íyó yíi chí ndihvī ni ña jniñu íyó ñayiví, ndese cusí ni yíi ña sáha ña.

³⁵ Jeē váha máá ró jijnáhan ró cúu jeē ni cāhán rī súcuan. Chi nasūu jéē nducú rí casí rī jeē quijnáhan ró, chí sa suhva cúní rī jeē caca yíñuhún ró te nune ró cuajniñu cutú ró núu maá Jitoho yō.

³⁶ Te núu ñn tēe íyó sēhe síhí de, te núu cuayíi i, te núu jéni ni de jeē vāha ga jeē quijnáhan i, núu súcuan te na sáha de jeē jéni ni de, te cuáha de jñūhun quijnáhan i, chí nasūu cuéchi cúu. ³⁷ Te núu ñn tēe ni cundaā ni de jeē cóndee sēhe síhí de súcuan-ni, jeē ma cuáha de i vēsú fuerza jíicán ñayuu i, núu súcuan te cuu quéndōo i nájnūhun cúní de, chí jeē váha sáha de. ³⁸ Núu súcuan te tēe jéhe jñūhun quijnáhan i, vāha sáha de. Te tēe tu jéhe jñūhun, chí vāha ga sáha de.

³⁹ Te ñahan ní quijnáhan, chí yíhi ña ndaha yíi ña níni jeē técu de. Te núu je ní jíhī yíi ña, yūcuán na te je ni cuu libre ña jeē quijnáhan tucu ña jíin na-ni tēe cúu ni ña, te núu tēe cándíje nuū Jitoho yō cúu de. ⁴⁰ Te jéni ni rī jeē ndetū gā coo ña te núu quéndōo ña súcuan-ni. Te suni jéni ni rī jeē jíin Espíritu Yaā Dios cúu jeē cāhán rī.

Siquī cūñu ni sócō nuū ídolo

8

¹ Te vijna te na cáchi rī siquī cūñu ni sócō nuū ídolo. Ndaā chi tāca yó jéni ni yō jeē maá yó cúu jeē jiní ndese cúu. Te tāca jéē jiní yō ún, chi ndúcú sáha jeē cundúxí yó. Te sa suhva jeē cundáhú ni yō jnáhan yó, sáha un jéē íje i jín jnúhun ya. ² Núu na-ni ñayuu jéni ni i jeē jiní vāha i, te tuú chi ná tu cuni cuiti i nájñuhun cánuú cuni i. ³ Te sa suhva ñayuu jeē maní i jín Yaā Dios, máa i cúu jeē jetáhú yá.

⁴ Núu súcuan te na cástūhun rī siquī cúñu jeē ní casocō ñayuu nuū ídolo. Ndaā chi jíní yō jeē tāca ídolo ñayívi, tú ndaā cuiti. Te tú na inga yaā iyó, chi máa ñn-ni Yaā Dios. ⁵ Te ñayuu chi cájéni ni i jeē iyó táca yáa ini andívi jín ñáyívi, chi cácahān i jeē iyó ndije cuehē yaā i jín jítóho i. ⁶ Te nuū maá yó chi ñn-ni Yaā iyó, jeē cúu Tátá yō Yaā Dios. Te máa yá ni sáha tāca jéē iyó, te cuenta maá yá cúu yó jínáhan yó. Te suni íyó ñn-ni Jítóho yō Jesucristo, te nde nuū maá yá véji tāca jéē iyó, te suni máa yá ni sáha yóhó.

⁷ Te ñayuu cácañíje, chi tú ndíhi i jín jnúhun yáha. Chi sava i ni cacān i ni chiñúhún i ídolo nde ná tu candíje i. Te nde vijna núu cáyeji i cūñu ún te sáha i cuenta jeē ni sócō nuū ídolo cúu. Te siquī jeē ná tu ije i jín jnúhun Yaā Dios, te jéni ni i jeē cujnéhén ánuá i sáha cūñu jeē ni sócō nuū ídolo ún. ⁸ Te ndaā chi nasūu jéē yéji yō cúu jeē sáha jeē cuatáhú Yaā Dios yohó. Chi núu yéji yō, nasūu yúcuan sáha jeē quéndōo vāha ga yō nuū Yaā Dios. Te núu tu yéji yō, ni tu sáha jeē quéndōo ndáhú gá yō nuū yā. ⁹ Te vésú tú ni ñn jési jeē ma cúu caji rō cūñu ún, te coto rō jnáhan rō jéē ná tu ije jín jnúhun ya, te ma sáha rō jéē suni caji i jeē jéni ni i jeē cuēchi cúu. ¹⁰ Vāha ga ma cáji rō núu súcuan, chi sanaa te hermano rō jeē ná tu ije jín jnúhun ya, coto de róhó jéē yéji rō ini vehe ídolo, chi jíní vāha rō jéē tú na vé sáha. Te súcuan te sáha rō jéē cájni ni de jeē suni caji maá de cūñu jeē ni sócō nuū ídolo, vésú jéni ni de jeē cuēchi cúu. ¹¹ Te súcuan stívi rō anuá hermano rō jeē ná tu ije jín jnúhun ya, vésú jiní vāha máa rō jeē tú na vé sáha jeē cáji rō. Te tú vāha sáha rō, chi suni jehē maá de ni jihī Cristo. ¹² Te núu súcuan stívi rō anuá hermano rō jeē ná tu ije jín jnúhun

ya, núu súcuan te siquī Cristo cúu jeē sáha rō cuēchi. ¹³ Núu súcuan te núu cūñu un sáha jeē quívi hermano rī cuēchi, te ma cáji cuiti ga rī cūñu ún, návāha ma sáha ri jeē quívi de cuēchi.

Siquī jeē iyó derecho tēe cácuu apóstol

9

¹ Te máa rí chi jíca libre rī, te íyó derecho rī siquī jeē cúu ri apóstol, tēe ni tají yá scáca jnúhun ya. Chi ni jito ri nuū maá Jítóho yō Jesús, te máa rō jijnáhan rō cácuu jniñu jeē ni sáha ri jeē ni squívi ri rohó ndaha Jítóho yō. ² Te núu sava ga ñayuu tu jétáhú i jeē cúu ri apóstol, te nuū maá rō chí suu cúu ndije ri. Chi siquī jeē ní scandíje ri rohó jínáhan rō, te jeē yúcuan cácuu rō prueba jeē steén jeē ndíso jniñu ri cúu ri apóstol nuū maá Jítóho yō.

³ Te jnúhun yáha cáhán rī jehē maá rí nuū ñayuu cácahān siquī rī. ⁴ Achí rí: Iyó derecho rī caji rī cohó ri jeē cájehe ñayuu núu cúní rī. ⁵ Te suni íyó derecho rī núu jeē cuní rī condeca ri ñn hermana candíje cuu ñasihí rí, caca ña jín rí, nájñuhun íyó ñasihí Pedro jín táca gá apóstol jín tēe cácuu ñani maá Jítóho yō. ⁶ ¿Chí cájéni ni rō jeē maá rúhū-ni jín Bernabé tú na derecho rī jeē stóo ri jniñu cásáha ri jeē cótecu rī, návāha nune ga rī nacani ri jnúhun vāha ya, chí naún? ⁷ ¿A íyó soldado jeē técu de xúhún vehe de? ¿A íyó tēe jeē jítu uva te tu yéji de ndehē ún? ¿A íyó tēe jeē ndíto lanchi te tu jíhi de leche tī? Tú cuiti. ¿Te á suni tu íyó derecho rī cotecu rī siquī jnúhun ya naún? ⁸ Te ma cáni ni rō jeē tāca jéē cahán rī yáhá, máni máa jéē cácahān ñayuu ñayívi cúu. Chi nde maá ley yā jeē ni jéhe ya nuū Moisés, cáhán súcuan. ⁹ Chi cáhán nuū tútu ley yā: Ma chúhun rō ñunu yuhu stíquī, quiti jéxín trigo, achí. Te ndaā chi nasūu máni siquī stíquī cúu jeē ni cáhán yā súcuan. ¹⁰ Chi suni siquī maá yó ní cahán yā. Chi ley un ní jéhe ya jeē vāha máa yó, chi steén jeē tēe jítu jín tēe jéxín trigo cánuú jeē nihín de sava un quívi ndutútú. ¹¹ Te suni súcuan ruhū jijnáhan ri jeē ní cataji ri jnúhun Espíritu ini anuá rō, ¿te á véyi cúu jín rō núu nastútú rí jeē cótecu rī nuū rō? ¹² Te núu sava ga tēe cástéén nuū rō, íyó derecho de cacān de

nuū rō, te nagā ni cuu ruhū jijnáhan ri jeē ma cóo derecho rī cacān rī.

Te tu ní cájicān rī derecho un, chi sa suhva ni jendeyí ni rī coto máá rí jeē cáji rī, návāha ma cási rī jeē cáca jnūhun vāha Cristo. ¹³Te cájini rō jeē sutū ni cajejníñu ini templo, ni cacotecu de siquī jeē ní casocō ñayuu ini templo. Chi sutū ni cajejníñu nuū altar nuū ní casocō i quití, suni ni cayeji de sava quití ún. ¹⁴Te suni súcuan ni ndacu máá Jítoho yō jniñu jeē tée cánacani jnūhun jeē jnáma ya yohó, siquī jniñu un níñin de jeē cótecu de. ¹⁵Te ruhū tu ní jícán cuití rī derecho rī yāhá, te suni nasūu jéé tée ri jnūhun yáha návāha cuāha ró núu rī jijnáhan ró. Chi jéni ni rī jeē vāha ga núu na cúu rī nasūu jéé quíhin ri jeē cuáha ró, chi casi jeē cúsiñ ni rī scáca ri jnūhun ya súcuan-ni.

¹⁶Te tú vāha núu sátéyí rí maá rí siquī jeē nácani ri jnūhun jeē jnáma ya yohó. Chi ñin jeē ní tejníñu ya ruhū cúu, te cánuú squícu ri. Chi nacā ndahú cúu ri te núu tú nacani ri jnūhun ya. ¹⁷Te núu jeē cúu ni maá rí sáha ri nuú, yūcuán na te cuu cacān rī yāhu ri. Te tuú chi cánuú sáha ri, chi máá Yaā Dios ni tee ya jniñu siquī rī. ¹⁸Núu súcuan te yāhu ri cúu jeē cúsiñ ni rī jeē súcuan-ni nácani ri jnūhun jeē jnáma ya yohó, te tu jícán rī derecho rī jeē cotecu rī siquī jeē nácani ri jnūhun ya.

¹⁹Chi vēsú tú ni ñin ñayuu ndácu jniñu nuū rī, te ni sáha ri maá rí mozo nuū tācá i jeē nácani ri jnūhun nuū i, návāha nihīn rī cuehē i candíje i Cristo. ²⁰Núu íne ri jíin jnáhan ri hebreo te sáha ri nájnūhun cásáha i, návāha cuu scándíje ri i. Chi násáha ri maá rí nájnūhun tée cáyihí chīji ley Moisés, návāha cuu scándíje ri i jeē cáyihí i chīji ley un, vēsú tuá yíhi ri chīji ley un. ²¹Te suni násáha ri maá rí nájnūhun ñayuu tu cáyihí chīji ley Moisés, návāha cuu scándíje ri ñayuu ún. Te vēsú súcuan te yíhi ri chīji ley Yaā Dios, chi suu cúu ley Cristo jeē squícu ri. ²²Te núu íne ri jíin ñayuu jeē ná tu ije jíin jnúhun ya, te sáha ri maá rí nájnūhun jeē ná tu ije ri jíin jnúhun ya, návāha cuu scándíje ga rī i. Núu súcuan te násáha ri maá rí núu ndese cándāa tāca ñayuu, návāha tācá-ni modo un te cuu scándíje ri sava i. ²³Tāca yáha sáha ri jeē siquí jnúhun jeē

jnáma ya yohó, návāha suni nihīn rī tahū jeē ndíso jnūhun ya.

²⁴Je cájini rō jeē tée cájину carrera, jendáa chi ndihí de cájину, te ñin-ni de cúndeyí níñin premio. Te suni súcuan nducú ndéyí máá ró squícu ró, návāha nihīn rō premio nuū yā. ²⁵Te tāca tée cúní cundeyí síquī ñin deporte, chi cáscuáha de te cándito de máá de. Súcuan cásáha de návāha nihīn de ñin premio jeē cúu corona ndaha yújnu jeē náa yachí. Te máá yó chi sa suhva cánducú ndéyí yó návāha nihīn yō ñin premio jeē ma náa cuití. ²⁶Te máá rí suni nducú ndéyí rí nájnūhun tée cájину, te tu nducú ndéyí cáha rí. Te sáha ri nájnūhun tée cácajnáhan juego jeē tu jéhe iyú de, chi quéé jniñu sáha ri. ²⁷Chi sa suhva stóho ri yiquí cúñu rī, te stíhví ni rī maá rí squícu rī. Chi vēsú ni stíhví ni rī inga ñayuu jeē nducú ndéyí i, te núu tu nducú ndéyí máá rí te snāa rī premio rī.

Siquí jeē ma chíñúhún i ídolo

10

¹Hermano jijnáhan ró, cúní rī jeē na jécūhun ni rō ndese ni cajica jíi yō jenahán. Chi ndihí de ni cajica chīji vicō jeē ni stéén ichi nuū de, te ndihí de ni cayāha mēhñú ndute Mar Rojo jeē ní cusñin, ni nune ichi. ²Súcuan cúu jeē ní canduu inuú ndihí i jíin Moisés, chi ni candiquin i de chīji vicō jíin méhñu mar. ³Te ndihí i chi inuú-ni ni cayeji i alimento jeē ni jéhe máá Espíritu. ⁴Te suni ndihí i ni cajihí ndute jeē ni jéhe Espíritu. Chi ni cajihí i ndute jeē ní cane jicā cáva nuū ní cajica cuu i. Te Cristo cúu nájnūhun cava un jéé jéhe ya ndute cotecu yō ní cáni. ⁵Te vēsú súcuan te cuehē i ni cunīhni ni i, te tu ní cúsiñ ni Yaā Dios jíin i, te jeē yúcuan ní cajihí i nuū ñúhun téhé.

⁶Te tāca jéé ní cuu ún, ñin ejemplo cúu nuū yō, návāha ma ndíyo ni yō tāca jéé neé, nájnūhun ni candiyo ni ñayuu ún. ⁷Te ma chíñúhún ró ídolo, nájnūhun ni casáha sava i. Chi súcuan cáhan nuū tútu iñ: Ni cacucō ñayuu ún, ni cayeji i ni cajihí i vico ídolo, te ni ndocuiñi i ni cajita jéhe i, áchí. ⁸Te ni ma cáca jnéni ró nájnūhun ni casáha sava i, te ni cajihí ocō uní mil i jeē ñin quiví-ni. ⁹Te ni ma sáha ró jniñu jeē squítí ni rō Jítoho yō,

nájnūhun ni casáha sava i, te ni cajihī i jeē ní catuu coō i, ni sáha ya. ¹⁰ Te ni ma cahán sōó ró siquī Yaā Dios, nájnūhun ni cacahān sōó sava i, te ni cajihī i jeē ní jehni ndajéhé yā i.

¹¹ Te tāca jēē ní cuu ún, chi ñn ejemplo cúu nuū yō. Te súcuan yósó núu tútu návāha na chūhun vāha ni maá yó. Chi cácuu yó ñayuu cátecu quivī cuándihī ñayivī. ¹² Núu súcuan te rōhó jēē cájeni ni rō jeē cáhīn nihin ró jēē ma sáha ró cuéchi, coto má quivī ró cuéchi. ¹³ Chi máni íyó jēē nducú squivī rōhó cuéchi, te inuú-ni cándoho ró súcuan nde jíin táca gá ñayuu. Te cuu cucáhu ni rō Yaā Dios jeē ma cuáha ya jnūhun jeē vihyá gá coto ndee jexeén rōhó vēsú jeē cúu cundeyí ró jíin. Chi sa suhva núu vēji jeē nducú squivī rōhó cuéchi, te chindéé ñáhán yá rohó quenda ró te cundeyí ró siquī.

¹⁴ Ñánī mánī, ma chiñúhún cuiti rō ídolo núu súcuan. ¹⁵ Cahán rī jíin ró jēē cúu ró ñayuu cájecūhun ni, te na sáha ró cuenta núu ndaā jnūhun cahán rī. ¹⁶ Máá copa iī jeē cájicān tahu yō jehē, suu cájihī cáhu yó jēē steén yō jeē inuú cúu ndihī yó, chi ni jeti niñī Cristo jeē siquī yō ná ni jihī yā jicā cruz. Te pan jeē sacuéchí yó cáyeji cáhu yó, steén jeē inuú cúu ndihī yó siquī jeē ni jéhe Cristo yiqui cúñu yā ni jihī yā jehē yō. ¹⁷ Te vēsú cuehē yō iyó, te ñn-ni ñayuu cácuu yó, chi ñn-ni pan un cáyeji cáhu yó siquī jeē cá candíje yó.

¹⁸ Condēhe ró ndese cásáha ñayuu Israel. Tāca téē jeē yéji quiti jeē ni sócō nuū yā, chi inuú-ni cúu ndihī de siquī jeē cáyeji de jeē ni sócō ún. ¹⁹ Núu súcuan te cahán rī jeē tu ndé jéjníñu ídolo, ni tu jéjníñu cúñu jeē ni sócō nuū ídolo, chi inuú cúu jíin táca gá cúñu. ²⁰ Te suni cahán rī jeē ñayuu tu cájini jnūhun Yaā Dios, núu cásocō i, te nuū tachī cásocō i, nasūu núu Yaā Dios. Te tu cúní rī jeē cuajníñu ró núu tachī. ²¹ Ma cúu coho ró copa maá Jítoho yō te núu cájihī ró jēē ni sócō nuū tachī. Te ma cúu caji rō nuū mesa Jítoho yō te núu cáyeji rō jeē ni sócō nuū tachī. ²² Ma quivī nduu yō súcuan jíin táchī, návāha ma cucuíñi Jítoho yō jíin yó. ¿Chí téyí gá maá yó vēsú maá yá jeē ma cúu stóho ya yohó, cájeni ni rō, chí naún?

Ndihī chi sáha yó jíin jnūhun cúndáhú ni

²³ Te ndaā cúu jeē cácahān jeē ndihī-ni jniñu íyó váha sáha yó núu ndese cúní yō. Te tuú chi nasūú ndihī sáha jeē quéndōo vāha ánuá yō. Ndihī chi cuu sáha yó, te vēsú súcuan te nasūú ndihī sáha jeē ije jnāhan yó jíin jnūhun ya. ²⁴ Chi cánuú sáha yó jēē váha jnāhan yó, nasūu máni máá jēē váha máá yó.

²⁵ Cuu caji rō ndihī-ni cúñu cúyāhu nuū yáhu, te ma cájnūhun ró ni ma cáni ni rō núu jeē ni sócō nuū ídolo cúu. ²⁶ Chi cuenta maá Jítoho yō cúu ñayivī jíin ndivii jeē iyó ini, te cuu cuajníñu yó.

²⁷ Te núu ñn tēē tu cándíje, cana de rōhó caji rō jíin de, te núu cácuu rō quihīn rō, núu súcuan te caji rō tāca jēē cáni de nuū rō. Te ma cájnūhun ró ni ma cáni ni rō núu jeē ni sócō nuū ídolo cúu. ²⁸ Te núu cachi ñn i nuū rō jeē cúñu ni sócō nuū ídolo cúu, yūcuán na te ma caji rō, chi siquī jeē jéni ni i jeē cuéchi cúu, te tu cúní rō sáha ró jēē quivī i cuéchi. ²⁹ Te súcuan cahán rī siquī jeē inga i cájeni ni i jeē cuéchi cúu, te nasūu jēē súcuan cájeni ni maá ró.

Te sanaa te cahán ñn ró: ¿A tu íyó libre rī caji rī jeē cúní maá rí, vēsú cájeni ni inga i jeē cuéchi cúu? ³⁰ ¿Te núu nácuatáhú rí nuū Yaā Dios te yéji rī, te najehē cácahān i siquī rī jeē yéji rī? achi rō. ³¹ Tuú chi ndihī jeē sáha ró, vēsú jeē caji rō chí jēē coho ró, chí na-ni jniñu sáha ró, ndihī na sáha yíñúhún ró jíin Yaā Dios, návāha cuni ñayuu jeē luu cújéhu ya. ³² Te ma sáha ró jniñu jeē squivī ró ñayuu nuū cuéchi, cúu ñayuu hebreo, cúu ñayuu táca nación jeē tu jíin jnūhun ya, cúu ñayuu cá candíje Yaā Dios. ³³ Te ruhū chi ndúcú rí jeē na cúsiñi ni táca ñayuu jíin táca jniñu sáha rí. Tu ndúcú rí jeē váha máá-ni rí, chí sa ndúcú rí sáha rí jeē váha cuehē ñayuu, návāha cācu i.

11

¹ Te na ndácu ró ruhū jijnáhan ró, nájnūhun ndácu máá rí Cristo.

Siquī ndese cánuú sáha ñahan cándutútú

² Vāha cásáha ró, hermano, jeē niní cáncūhun ni rō ruhū, te cándihvī ni rō jíin táca jniñu jeē ni steén rī nuū rō. ³ Te cúní rī jeē na jécūhun ni rō jeē Cristo cúnuú yá nuū táca téē. Te tēē cúnuú de nuū ñasihí de. Te Yaā Dios cúnuú yá nuū Cristo. ⁴ Núu ñn tēē

ñúhun de lélú te jícán tahu de chí nácani de jnūhun nuū ndutútú ñáyuu cácan díje, núu súcuan te jéhe de jnūhun canu máá de. ⁵ Te sa núu ñn ñahan tu ndési xinī ña te jícán tahu ña chí nácani ña jnūhun, núu súcuan te jéhe ña jnūhun canu máá ña, chi ñn-ni cúu un núu ní sáte xinī ña. ⁶ Chi núu tú casi ña xinī ña, vāha ga na sáte ña ixi ña núu súcuan. Te núu cúcanu ña jeē sáte ña ixi ña chí jéē sáte lī ña, te na cási ña núu súcuan. ⁷ Te tēe chi ma cási de xinī de, chi máá de cúu muestra jeē steén ndese cúu Yaā Dios jeē cujéhu ya. Te ñahan chi stéén ña jeē cujéhu tēe. ⁸ Chi ná ni sáha ya tēe, te nasūu jíin yiqui ñahan ni sáha ya, chi sa suhva jíin yiqui tēe ni sáha ya ñahan. ⁹ Te ñahan chi ni cuvāha ña jeē siquí tēe, nasūu tēe jeē siquí ñahan. ¹⁰ Te jeē yúcuan cánuú jéē cóndesi xinī ñahan, te suu stéén jeē cujéhu tēe, chi suni cándehé ndajéhé yā ndese sáha ña. ¹¹ Te vésú súcuan te yóhó jéē candíje yó, chi jíni yō jeē tu íyó tēe núu jeē tu íyó ñahan, te tu íyó ñahan núu jeē tu íyó tēe. ¹² Chi vésú ni sáha ya ñahan jíin yiqui tēe, te vijna cácu tēe chíi ñahan, te máá Yaā Dios cúu jeē sáha tācá-ni.

¹³ Na sáha máá ró cuenta ¿á íyó váha núu tu ndési xinī ñahan te jícán tahu ña nuū Yaā Dios? ¹⁴ Chi sáha yó cuenta jeē ini ñayivi yáha, núu cáni ixi tēe te cúcanu de sáha. ¹⁵ Te ñahan chi sa vāha jíto ña te núu cáni ixi ña, chi suu ni jéhe ya jeē cóndesi xinī ña. ¹⁶ Te núu ndé ñn ñayuu cuní i cahān i siquí jnúhun yáha, te ruhū jíin táca grupo ñayuu cácan díje nuū Yaā Dios, tú na inga costumbre jejnúhún rí siquí jnúhun yáha.

Jeē castívi i siquí Cena Jitoho yō

¹⁷ Te íyó inga jnūhun cánuú cahān rī jíin ró, chi tu cúu cahān rī jeē vāha cásáha ró. Chi nuū cándutútú ró te tu sáha jeē quéndōo vāha ga rō, chi sa jeē castívi ró. ¹⁸ Xīhna jnūhun yáha cáhān rī, jeē nihín rī jnūhun jeē nuū cándutútú ró te cácusñn ni rō. Te jéni ni rī jeē ndaā cúu. ¹⁹ Chi níni coo sava ró jéē cusñn ni, návāha natūu ndé-ni cúu jeē cácan díje vāha mēhñu ró. ²⁰ Te jeē cácusñn ró súcuan nuū cándutútú ró, te nasūu cena máá Jitoho yō cúu jeē cáyeji rō núu súcuan. ²¹ Chi núu cáyeji rō, te tācá ñn ñn ró cuní caji xīhna gā vésú jnāhan ró. Te súcuan te sava ró tu cániñn, te cájiī sōco, te sava ró

cánajīni jeē cájihi cuehē. ²² ¿A tu cánevāha ró vehe nuū cáji rō coho ró, chí naún? Chi jeē casáha ró súcuan cúu jeē tu íyó yíñúhún ró ini vehe nuū cándutútú ñáyuu cácan díje Yaā Dios, chi cásáha ró jéē cácanu ñayuu jeē tú na vé névāha. ¿Ndese cahān rī jíin ró núu súcuan? ¿A cáhān rī jeē vāha cásáha ró? Tuú chi nasūu jéē váha cúu jeē casáha ró súcuan.

Siquí jeē ní jequin Jitoho yō Cena yā

(Mt. 26.26-29; Mr. 14.22-25; Lc. 22.14-20)

²³ Chi jnūhun yáha jéē ní nastéén rī nuū rō, chi nuū máá Jitoho yō ni nihín rī: Jeē máá jecuāā jeē ní nastúu de Jitoho yō Jesús, te ni quihin ya pan. ²⁴ Te ni nacuatáhu yá, te ni tahu cuéchí yá, te ni cahān yā jíin tēe cácuáha jíin yá: Quihin te caji rō jijnáhan ró, chi yáha cúu yiqui cúñu rī jeē ni sócō rī jeē siquí rō. Te níni caji rō súcuan jeē cáñuhun ni rō ruhū jeē ni jíhī rī jehē rō. Achí yá. ²⁵ Te suni súcuan ni quihin ya copa ná ni cuu ni cuxíni ya jíin de, te ni cahān yā: Jeē ñúhun copa yáha cúu niñī rī jeē sácutú contrato jeē jeē jnáma rī ñayuu. Te táca jínu jeē cájihi ró, te nucūhun ni rō ruhū. Achí yá. ²⁶ Chi táca jínu jeē cáyeji rō pan un te cájihi ró copa un, súcuan cástéén rō jeē ni jíhī Jitoho yō jehē yō. Te súcuan na sáha ró ndé quivī ndíji ya.

Ndese caji yíñúhún i Cena yā

²⁷ Te núu na-ni ñayuu caji i pan un chí coho i copa Jitoho yō ún, te núu tu sáha yíñúhún i nuū Yaā Dios, núu súcuan te sáha i cuéchi jeē tu íyó yíñúhún i siquí yiqui cúñu máá Jitoho yō jíin siquí niñī yā. ²⁸ Núu súcuan te coto ndee rō máá ró núu íyó ndoo ánuá rō jeē tú cuéchi ró. Te sáá te cuu caji rō pan un te coho ró copa un. ²⁹ Chi núu ñn ñayuu tu yéji tu jíhi yíñúhún i te tu nucūhun ni i jeē yiqui cúñu yā cúu, ñayuu ún chi nihín i castigo núu na cáji i coho i. ³⁰ Jeē yúcuan cúu jeē íyó cuehē ñayuu cácuñu jíin jéē ní cacuxíí, cáhīyo mēhñu ró. Te sava i je ni cajihī. ³¹ Te núu coto ndee yō máá yó nde ná tu caji yō, te Jitoho yō ma cuáha ya castigo yohó. ³² Te núu Jitoho yō jéhe ya castigo yohó, te súcuan stóho ya yohó návāha ma jnahnú ndetū yō jíin ñáyuu ñayivi.

³³ Nánī mánī, núu súcuan te jeē cándutútú ró jeē cáji rō Cena yā, te condetu ró te caji

inuú ró. ³⁴ Te núu ññ ñáyuu jíi i sōco, te xīhna gā na cáji i vehe i návāha ma stívi i nuū cándutútú ró. Te súcuan te ma cuáha ya castigo i. Te quivī jécondēhe rí rohó te cachi rī ndese coo sava ga jniñu.

Siquī tāca táhū jeē jéhe Espíritu

12

¹ Hermano, cúní rī jeē na jécūhun ni rō siquī tāca táhū jeē jéhe Espíritu nuū yō, suu tāca modo jejniñu ññ ññ yó núu Yaā Dios.

² Te cájini rō jeē ná ni cuu ró ñáyuu ná tu candíje, te ni cacondihvī ni rō ni cachiñuhún ró ídolo ññhín. ³ Te vijna te na jécūhun ni rō jeē núu ndé ñáyuu cahán ndevāha i siquī Jesús, te nasūu jíin poder Espíritu Yaā Dios cúu jeē cahán i súcuan. Te ni ññ i ma cúu cahán i jeē Jitoho i cúu Jesús, te núu tu ndéé poder Espíritu Santo ini i.

⁴ Te sñn sñn tahū jéhe ya jeē cuajniñu ññ ññ yó núu yā, te ññ-ni máá Espíritu cúu jeē jéhe. ⁵ Te sñn sñn jéjniñu yó, te nuū máá ññ-ni Jitoho yō jejniñu yó. ⁶ Te sñn sñn modo sáha yó jniñu ya, te ññ-ni Yaā Dios cúu jeē sáha jniñu un jíin yó. ⁷ Te nuū ná ññ ná ññ yó ní jéhe Yaā Dios tahū jeē sáha Espíritu yā jíin yó, návāha na sáha yó jéé ije jnāhan yó jíin jnūhun ya. ⁸ Chi sava yó ní canihñn tahū jeē ndichí cáhán yō jnūhun ya, sáha máá Espíritu. Te sava ga yō ni canihñn yō jeē cúu jécūhun vāha ni yō te castūhun yó, te suni máá Espíritu sáha. ⁹ Te nuū sava ga yō ni jéhe ya tahū jeē cúu cándíje ññhín yó jéé sáha ya jeē jicán yō, te sava ga yō cúu sáha yó jéé ndúvāha ñáyuu cácuñu, te suni máá Espíritu sáha. ¹⁰ Te sava ga yō cúu sáha jniñu jéñu jíin fuerza Yaā Dios. Te sava ga yō cúu nácani jnūhun ya. Te sava ga yō ni sáha ya jeē nácuni yō tāca jnūhun, núu vēji nuū Espíritu yā chí tuú. Te sava ga yō ni ññhñn tahū jeē cahán yō tijni yuhu jeē tu jécūhun ni yō. Te sava ga yō cúu nacastūhun yó jnūhun ni cahán jnāhan yó jíin inga yuhu ún. ¹¹ Te tāca táhū yáha, chí ññ-ni máá Espíritu sája, te sñn sñn jéhe ya nuū ññ ññ yó, ndese núnjahan ni máá yá.

Ndihí yó cúu nájnūhun ññ na yiqui cúñu

¹² Chi nájnūhun ññ yiqui cúñu iyó cuéhē parte, súcuan cúu yó jíin Cristo jeē cúu yó

nájñūhun yiqui cúñu yā, chí ññ na cúu yó jíin yá. Te vēsú cuéhē parte cácuu yó te ññ-ni cúu yó, nájnūhun ññ yiqui cúñu jeē iyó cuéhē parte. ¹³ Chi ññ na ni canduu yó jíin yá ni sáha ññ-ni máá Espíritu ná ni cajendute yó. Súcuan cúu vēsú cúu yó ñáyuu hebreo chí ñáyuu griego, vēsú mozo jeē ní jeen ñáyuu chí téé sájññu cuenta maá. Te ndihí yó chí ññ-ni Espíritu ni canihñn yō.

¹⁴ Te ññ yiqui cúñu chí nasūu ññ-ni parte cúu, chí sa cuéhē parte cúu. ¹⁵ Te núu jehē cahán: Nasūu cuenta yiqui cúñu cúu ri, chí nasūu ndaha cúu ri, te tuú chí parte yiqui cúñu cúu nahín. ¹⁶ Te núu sōho cahán: Nasūu cuenta yiqui cúñu cúu ri, chí nasūu tññu cúu ri, te tuú chí parte yiqui cúñu cúu nahín. ¹⁷ Núu ññ yiqui cúñu yō cúu tññu, ¿te ndese cuni sōho yó núu súcuan? Te núu ññ yiqui cúñu yō cúu sōho, ¿te ndese cuaan yó xícō núu súcuan? ¹⁸ Te Yaā Dios ni chujnāhan ya ññ ññ parte yiqui cúñu, nájnūhun cúní yā jeē coo. ¹⁹ Chi núu ññ-ni parte cúu ndihí, te nasūu ññ ññ yiqui cúñu cúu núu súcuan. ²⁰ Te tuú chí cuéhē parte iyó, te ññ-ni yiqui cúñu cúu.

²¹ Te ni ma cúu cahán tññu jíin ndaha: Tu jíini ññhñn rí rohó. Te ni xinī ma cúu cahán jíin jéhe: Tu jíini ññhñn rí rohó. ²² Chi sa suhva tāca parte yiqui cúñu jeē jéni ni yō jeē núu ga fuerza, suu cúu jeē cánuú gá. ²³ Te tāca parte yiqui cúñu jeē jéni ni yō jeē tu cáa vāha, suu cúu jeē yucún gá chūhun yó sahna. Te parte jeē tú-ni luu cáa, sa vāha ga jési yō. ²⁴ Chi parte jeē lúu cáa, tu cánuú jéé condihyū. Chí súcuan ni chujnāhan Yaā Dios yiqui cúñu, jeē yucún gá ndíto yó jéé tu cáa luu. ²⁵ Súcuan ni sáha ya návāha ma cusñn tāca parte yiqui cúñu, chí sa chindéé ñájñāhan vāha jíin jnāhan. ²⁶ Te núu jétú ññ parte yiqui cúñu, te suni ññ cáhnu-ni jétú. Te núu ññ parte ndíto yucún yó, te suni ndihí-ni parte quéndōo vāha.

²⁷ Te rōhó jíjñāhan ró chí nájnūhun yiqui cúñu Cristo cácuu ró, chí ññ na cúu yó jíin yá. Te ná ññ ná ññ ró cúu ññ ññ parte yā. ²⁸ Núu súcuan te sñn sñn jniñu ni jéhe Yaā Dios nuū tāca ñáyuu cácuñu jeē cácuu i nájnūhun ññ ññ parte yā: Te suu ññ parte yā cúu tācá apóstol jeē ní jeni ya xīhna gā jeē scáca de jnūhun ya. Yūcuán na te jeē

uú, tēe cánacani jñūhun ya, te jeē uní, tēe cástéén. Yūcuán na te ñayuu casáha jniñu jéhu jín fuerza yā, jín ñáyuu casáha jeē ndúvāha ñayuu cácuñū, jín ñáyuu cachíndéé ñájñáhan, jín ñáyuu cándiso jniñu, jín ñáyuu cácahān sñn sñn yuhu jeē tu cájecūhun ni.

²⁹ ¿A ndihí yó cácuu apóstol, chí naún? ¿A ndihí yó cánacani jñūhun? ¿A ndihí yó cástéén? ¿A ndihí yó cuu sáha jniñu jéhu?

³⁰ ¿A ndihí yó cuu sáha jeē ndúvāha ñayuu cácuñū? ¿A ndihí yó cuu cahān sñn sñn yuhu? ¿A ndihí yó cuu nacastūhún yuhu ún, chí naún? Tuú chí sñn sñn tahū ni canihín yō. ³¹ Núu súcuan te na cóndihvī ni rō cacān rō jeē cuáha Yaā Dios tahū cánuú gá nuū rō. Te vijna te na stéén rī nuū rō ñn jeē váha ga nuū tāca gá tahū ún, suu jñūhun cúndáhú ni jnáhan.

Jñūhun jeē cundáhú ni jnáhan

13

¹ Vēsú núu cuu cahān yō tijni yuhu jeē cácahān ñayuu chí jéé cácahān ndajéhé Yaā Dios, te núu tu cúndáhú ni yō jnáhan yó, te jñūhun cahān yō un cúu nájnūhun ñn tambor jeē ndaxín cáján chí ñn platillo jeē ndaxín cáxín sánee sōho ñayuu. ² Te vēsú cuu nacani váha yó jnúhun ya, te cuu jecūhun ni yō tāca jnúhun sáhi yá jín táca jnúhun ndíchí, te núu tu cúndáhú ni yō jnáhan yó, te tu ndé jéjñiñu cuiti yō núu súcuan. Te vēsú cuu candíje téyí yó jeē nde cuu cahān yō jeē cújiyo yucu, te núu tu cúndáhú ni yō jnáhan yó, te tu ndé jéjñiñu cuiti. ³ Te vēsú na sája yó ndihí jeē névāha yó cuu ñayuu ndahú, te vēsú núu cuāha yó jnúhun cahmu ñayuu yohó jéé siquí jnúhun ya, te núu tu cúndáhú ni yō jnáhan yó, te tu ndé jéjñiñu cuiti.

⁴ Ñayuu cundáhú ni chí íyó paciencia jín jnáhan, te íyó mání ni, te tu cúcuésún ni. Te tu sándúxí, te tu sátéyí máá. ⁵ Tu sájéé ni, te ndúcú jéé cúu máá-ni, tu quítí ni, tu ñūhun ni jñūhun quítí ni. ⁶ Tu cúsiñ ni jito jniñu néé casáha jnáhan, chí sa cúsiñ ni jín jniñu váha. ⁷ Ñayuu cundáhú ni chí ndihí jéhnde ni ndoho jehē jnáhan, te tu jécuiñí jeē candíje jnáhan, jín jéé ñūhun ni jeē squícu jnáhan, jín jéé jéndeyí ni jín jnáhan.

⁸ Jñūhun cúndáhú ni chí ma náā cuiti. Te quiji quiví jeē tuá nacani i jñūhun, ni tuá

cahān i tijni yuhu, ni tuá jini ñūhún jñūhun ndíchí. ⁹ Chí tu jini váha váha yó vijna, te jñūhun cánacani yó suni jecu-ni cúu. ¹⁰ Te núu na quíji quiví jeē cúni yō ndihí, yūcuán na te tuá coo jeē jini yó jecu-ni.

¹¹ Ná ni cuu yó súchi lúlí te ni cahān yō, ni jeni ni yō, ni jecūhun ni yō nájnūhun súchi lúlí. Te ná ni jehnu yó te ni stóo yó modo súchi lúlí. ¹² Te suni súcuan, jecu-ni jecūhun ni yō vijna, nájnūhun jeē jito yó núu ñn espejo jeē tú ndijin váha. Te cúcuéé gá te jecūhun cájí ni yō ndihí. Te vijna chí jecu-ni jini yō, te cúcuéé gá te cuni váha yó ndese Yaā cúu ya, nájnūhun jini váha ya yohó ndese ñayuu cúu yó. ¹³ Núu súcuan te íyó úní jñūhun jeē quéndōo cutú ní cáni: Jeē candíje ñhin yó jéé squícu ya jeē ni jéjñūhun ya, jeē cócuhun ni yō tāca jéé váha coo, jín jéé cundáhú ni yō jnáhan yó. Te jñūhun cúndáhú ni chí jéhu ndasí gá cúu nuū tāca jéé yáha.

Siquí jeē cácahān i tijni yuhu

14

¹ Na cóndihvī ni rō cundáhú ni rō jnáhan ró, te suni cóndihvī ni rō cacān rō tāca táhū jeē jéhe Espíritu. Te tahū jeē cánuú gá cúu jeē nácani ró jnúhun ya. ² Chí tēe névāha tahū jeē cahán de tijni yuhu jeē tu jecūhun ni de, chí máá-ni Yaā Dios jini jeē cahán de, nasūu ñáyuu. Chí ni ñn i ma jecūhun ni jeē cahán de. Chí sáha Espíritu jeē cahán de tāca jnúhun yísahí. ³ Te sa suhva tēe nácani jñūhun ya, chí jín ñáyuu cahán de návāha ije i jín jnúhun ya, te stíhví ni de i, te cahán ndeyí ni de jín i. ⁴ Te tēe jeē cahán tijni yuhu, chí máá-ni de íje jín jnúhun ya. Te tēe jeē nácani jñūhun ya, chí sa suhva sáha de jeē ñáyuu cácandíje íje i jín jnúhun ya.

⁵ Nújnahan ni rī jeē ndihí ró cuu cahān rō tijni yuhu jeē tu jecūhun ni rō, te jeē cánuú ndasí gá cúu jeē nácani ró jnúhun ya. Chí jéhu ga jniñu sáha tēe nácani jñūhun ya vēsú tēe cahán tijni yuhu. Chí núu tú tēe castūhun jnúhun cahán de, te ma cuajniñu jeē íje ñayuu cácandíje. ⁶ Jeé yúcuan hermano jijnáhan ró, núu na jéé rī nuū rō, te núu cahān rī tijni yuhu jeē tu jecūhun ni rō, ¿te ndé cuajniñu ún? Te núu na cahán rī ñn jeē ni stéén yā, chí ñn jeē cútūhva ró

jnūhun ndaā, chí ñn jeē nácani ri jnūhun ya, chí ñn jeē steén rī nuū rō, yūcuan cúu jeē cuajníñu.

⁷ Sáha yó cuenta jeē nájnūhun instrumento música, vésú tu técu, te cuu cata, nájnūhun flauta jíin arpa. Te núu tu jíta sñn sñn nota, ¿te ndese cuni yō na yaa jíta?

⁸ Te núu corneta tu jécú cájí, te ni ñn tēe ma sátūhva de quihñ de guerra. ⁹ Te suni súcuan róhó jíjnáhan ró, núu tu cáhán cají ró jnūhun jecūhun ni ñayuu, ¿te ndese cuni i na vé cahán rō? Chi jnūhun cáhán rō ndíso tachī cuahñ jíin. ¹⁰ Te ndaā chí íyó cuéhē yuhu ini ñayíví, te taca yuhu chí íyó ñayuu jécūhun ni. ¹¹ Te núu tu jécūhun ni yō yuhu cáhán ñn tēe, te cúu yó nájnūhun tēe ñuu jicá núu tēe cáhán, te suni nájnūhun tēe ñuu jicá cúu de nuū maá yó. ¹² Jeē yúcuan róhó jéē cácuni ndasí ró nihñ rō tahū jeē jéhe Espíritu, na cácan rō tahū jeē sáha jeē íje ñayuu cácandíje jíin jnūhun ya.

¹³ Núu súcuan te ñayuu jeē cahán inga yuhu jeē tu jécūhun ni i, na cácan tahu i jeē cuu nacastūhún i yuhu ún. ¹⁴ Chi núu jicán tahu yō jíin inga yuhu, te maá ánuá-ni yó cúu jeē jicán tahu, te tu ndé jéjníñu nuū jeē níjnūní yō. ¹⁵ ¿Ndesé sáha yó núu súcuan? Na cácan tahu yō jíin ánuá yō, te suni jíin jéē níjnūní yō. Na cáta yó yaa ñn jíin ánuá yō, te suni jíin jéē níjnūní yō. ¹⁶ Chi núu nácuatáhú ró máni jnūhun jeē ní quiji nuū anuá rō te tu jécūhun ni rō, núu súcuan te tēe jíni sōho te tu jécūhun ni, ma cúu nacuatáhú de jíin ró. Chi tu jíni cuíti de na jnūhun cáhán rō. ¹⁷ Ndaā chí vāha nácuatáhú maá ró, te inga de chí tú na vé nihín de jeē íje de jíin jnūhun ya. ¹⁸ Na cútahū rī nuū Yaā Dios jeē cahán gā rī jíin tijni yuhu vésú maá ró jíjnáhan ró. ¹⁹ Te vésú súcuan te núu íne ri nuū cáyūcu tūtú ñayuu cácandíje, te nújnahan gā ni rī cahñ rī uhñ-ni jnūhun jeē jécūhun ni i te steén nuū i, vésú jeē cahán rī uxī mil jnūhun jíin inga yuhu jeē tu jíni cuíti i.

²⁰ Hermano jíjnáhan ró, ma cáni ni rō nájnūhun sūchi lúlí, chí sa suhva na íje ró jéē jecūhun vāha ni rō. Te coo ró nájnūhun sūchi lúlí jéē tu jíni i jniñu néé. ²¹ Te yósó núu tūtu ley yā jenahán: Jíin jnūhun cácahñ tēe inga yuhu, jíin jnūhun cácahñ tēe ñuu jicá, sáha ri jeē cúni sōho ñayuu yáha jnūhun

ri. Te ni jíin súcuan ma sáha i cuenta jnūhun cahñ rī, achí maá Jítoho yō. ²² Núu súcuan te tahū jeē cahñ yō tijni yuhu, yūcuan cúu ñn jeē steén poder Yaā Dios nuū ñayuu tu cácandíje, nasūu núu ñayuu cácandíje. Te jeē nácani yó jnūhun ya, yūcuan cúu jeē steén nuū ñayuu cácandíje, nasūu núu ñayuu tu cácandíje. ²³ Núu súcuan te núu ndíhi ró ñayuu cácandíje cáhíyo tūtú, te taca ró cácahñ sñn sñn yuhu, te quívícoo ñayuu tu jécūhun ni jíin ñayuu tu cándíje, ¿te á má cahñ i jeē ní canduu loco rō? ²⁴ Te núu taca ró cánacani jnūhun ya, te núu quívi ñn tēe tu cándíje chí ñn tēe tu jécūhun ni, yūcuán na te nacuni de jeē tēe íyó cuéchi cúu de, te coto ndee de maá de jíin jnūhun cánacani ró. ²⁵ Te nucūhun ni de taca jéē ní jeni yuhu ni de jíin ánuá de. Yūcuán na te jecuíñi yití de te chíñuhún de Yaā Dios. Te cahñ de jeē íne ndíje Yaā Dios jíin ró jíjnáhan ró.

Siquē jeē yucún yíñuhún na cóo nuū ndutútú yó

²⁶ Núu súcuan hermano jíjnáhan ró: Nuū cándutútú ró te taca ró coo ñn yaa ñn cata ró, chí ñn jnūhun steén rō, chí ñn jnūhun jeē ni sáha Yaā Dios jeē jécūhun ni rō, chí inga yuhu jeē cahñ rō, chí jéē nácastūhun ró jnūhun inga yuhu ún. Te ndíhi ún na sáha ró návāha íje ñayuu cácandíje jíin jnūhun ya. ²⁷ Te núu cáhíyo tēe cahñ inga yuhu, te na cáhán uū de chí úní-ni de, te ná ñn ná ñn de na cáhán. Te suni jíni ñuhún jéē nacastūhún ñn tēe jnūhun ún. ²⁸ Te núu tu íyó tēe jeē cúu nacastūhun jnūhun ún, te tēe cácahñ inga yuhu, vāha ga ma cahñ de nuū cándutútú ró, te na cáhán maá-ni de jíin Yaā Dios. ²⁹ Te suni súcuan tēe cánacani jnūhun, na cáhán uū de chí úní de, te sava ga rō nacani ni rō núu íyó ndaā jeē cácahñ tēe ún. ³⁰ Te núu inga tēe néne ni nihñ de ñn jnūhun jeē ni steén yā nuū de, núu súcuan te tēe cáhán na jecuíñi jeē cahñ de, návāha cahñ inga tēe ún. ³¹ Te súcuan te ná ñn ná ñn ró coo nacani ró jnūhun jeē steén yā nuū rō, návāha cutūhva ró te coo ndeyí ni rō. ³² Te tēe cánacani jnūhun, jíni ñuhún cuatáhú de jeē nácani inga tēe jnūhun te jecuíñi jeē cahñ maá de. ³³ Chi Yaā Dios cuni yā jeē coo nayúú méhñu ró, násūu jéē sacā núu cuvaā rō.

Te nájñūhun cásáha tāca grupo hermano cācandíje, ³⁴ suni súcuan tācá ñahan cāndutútú jíin ñáyuu cācandíje, na cóo nayúú ña. Chi tú vāha jeē cahán ña, chi sa cuatáhú ña nájñūhun cāhán tutu ley yā. ³⁵ Te núu cúní ña cucáhnu ni ña ñn jñūhun, te nde vehe na cājñūhún ña yñ ña. Chi jñūhun canu cúu jeē cahán ñn ñahan mēhñu núu cāndutútú ró.

³⁶ Te na sáha ró cuenta jeē tu ní quēnda jñūhun Yaā Dios nuū maá ró jijnáhan ró, te nasūu maá ñn maá ró ní cānihñ jñūhun ya. ³⁷ Núu ñn tēe jéni ni de jeē tēe nácani jñūhun ya jíin tēe névāha Espíritu cúu de, núu súcuan te na cuājñūhún de jeē jñiñu ní ndacu Jitoho yō cúu jeē tēe ri yāhá. ³⁸ Te núu tu jétáhú de jñūhun yáha, suni ma cuatáhú yó de.

³⁹ Núu súcuan, ñánñi mánñi jijnáhan ró, na cóndihvñi ni rō nacani ró jñūhun ya, te ma cási rō nuū tēe cācāhān sñn sñn yuhu. ⁴⁰ Te yúcūn yññūhún na sáha ró táca jñiñu.

Jñūhun jeē ní natecu Cristo

15

¹ Hermano jijnáhan ró, vijna te nucūhun ni rō jñūhun jñáma ya yohó jeē ní nacani ri nuū rō. Te jñūhun ún chi je ni cajetáhú ró, te suni cāhññi ññin ró jíin. ² Te suni jíin jñūhun ún te ni jñama ya rohó, te núu cāhññi ññin ró jíin jñūhun ni nacani ri nuū rō, te núu tu ní cācandíje cāha ró.

³ Chi jñūhun cánuú gá jeē ni níhññi maá ní ni nastéén rñ nuū rō: Jeē ni jíhñi Cristo síquñi cuéchi yó, nájñūhun je cāhán tutu ññi nde jenahán. ⁴ Te ni quindūji ya, te ni natecu yā nuū uní quivñi, nájñūhun cāhán tutu ññi. ⁵ Te ni nane ya nuū Pedro. Te sáa te ni nane ya nuū ndihúxí gā apóstol. ⁶ Te sáa te ni nane ya nuū vihyá gā uhññi ciento hermano jeē cáyūcu tútú. Te sava i tēcu gā nde vijna, te sava i je ni jíhñi. ⁷ Te sáa te ni nane ya nuū Jacobo, yūcuán na te nuū ndihñi ga apóstol.

⁸ Te jeē sándññi na te ni nane ya nuū maá ní. Te nájñūhun ññi jeē ní cacu yúte, súcuan cúu jeē ññi sanaa-ni te ni nduu ri apóstol. ⁹ Chi tēe núu ga nuū tāca gá apóstol cúu ri, te ni nasūu tēe vāha cúu ri jeē cónaní rñ apóstol, chi ni jito xeññi rñ ññi yūcuán cācandíje nuū Yaā Dios. ¹⁰ Te síquñi jeē ni sáha Yaā Dios jeē

vāha ruhū, jeē yúcuan cúu ri apóstol vijna. Te jeē ni sáha ya jeē vāha ruhū, chi tú cāha ní cúu, chi sa ni scáca ga rñ jñūhun ya vēsú tāca gá tēe apóstol. Te nasūu maá ní ni sáha, chi Yaā Dios ni sáha ya jeē vāha un jíin rñ. ¹¹ Núu súcuan te vēsú ruhū chí táca gá tēe ún, súcuan cānacani ri jñūhun, te súcuan ni cācandíje ró.

Jñūhun jeē natecu ndñyi

¹² Te jeē cānacani ri jñūhun Cristo jeē ní natecu yā mēhñu ndñyi, ¿te naun cācāhān sava ró jéē ma nátecu ndñyi? ¹³ Chi núu jeē tú natecu ndñyi, te suni tu ní nátecu Cristo nuú. ¹⁴ Te núu jeē tu ní nátecu Cristo, te cānacani cāha rñ jñūhun ya nuú, te suni cācandíje cāha ró núu. ¹⁵ Chi núu jeē súcuan cúu núu, te cácuu ri tēe jeē tu cācāhān ndaā jñūhun Yaā Dios, chi ni cacachi rñ jeē ní nastécu Yaā Dios Cristo. Te núu jeē tú natecu ndñyi, núu súcuan te tú ndaā jeē ní nastécu Yaā Dios Cristo. ¹⁶ Chi núu tú natecu ndñyi, te ni Cristo suni tu ní nátecu yā nuú. ¹⁷ Te núu tu ní nátecu Cristo, te cācandíje cāha ró te cāndiso ññi gā rō cuéchi ró núu. ¹⁸ Te núu jeē súcuan cúu núu, te suni je ni cajnahññi ndetū ññi yūcuán ni cācandíje Cristo. ¹⁹ Chi núu tú natecu ndñyi, te núu maá ññi-ni síquñi vida yáha ññi yō jeē sáha Cristo jeē vāha yohó, núu súcuan te ndahú ndasí gá cácuu yó vēsú tāca gá ññi yūcuán, chi cācandíje cāha yó nuú.

²⁰ Te tuú chi íyó ndaā jeē ní natecu Cristo mēhñu ndñyi. Te maá yá cúu jeē xññi gā ni natecu nuú tāca gá ndñyi jeē natecu. ²¹ Chi síquñi jeē ni stññi ññi-ni tēe Adán, te ni quejéé jíhñi ññi yūcuán. Te suni súcuan síquñi jeē ni sáha ññi-ni tēe Cristo, te natecu ññi yūcuán. ²² Chi nájñūhun cājññi ndihñi yó síquñi jeē cácuu yó yúcūn Adán, suni súcuan natecu ndihñi yó síquñi jeē yññi yó ndaha Cristo. ²³ Te ná ññi ná ññi ndese ndíquñi jñáhan maá: Xññi gā Cristo ni natecu yā, te sáa te quivñi ndñyi ya te natecu tāca ññi yūcuán yññi ndaha ya. ²⁴ Yūcuán na te jíññi tiempo, te snāñi yā poder tācá enemigo jeē cujéññi jíin jéē ndácu jñiñu jíin jéē iyó poder. Te ndihñi jeē ndácu ya jñiñu nuú, nacūñi ya nuú Tatá yā Yaā Dios. ²⁵ Chi cánuú jéē ndacu Cristo jñiñu nde quijñi quivñi jeē quēnde Yaā Dios poder tāca jéē jíto uhñ

nuū Cristo, te stóho ya. ²⁶ Te jeē sándihí na te snāā yā cuehyi jéhni ñayuu. ²⁷ Chi cáhán tutu iī jeē sáha Yaā Dios jeē cujéhnú Cristo siquī ndihi, te cuatáhú núū yā. Te jeē cahán jeē cujéhnú ya nuū ndihi-ni, te jíní vāha yó jéē maá Yaā Dios ma quíhi ya ndaha Cristo, chi Yaā Dios cúu jeē ní chíhi tācá un ndaha Cristo. ²⁸ Te ná ni quiví ndihi ún ndaha Cristo, yūcuán na te suni máá Cristo jeē cúu ya Sēhe, quiví ya ndaha Tátá yā, Yaā jeē ní chíhi tācá un ndaha ya. Te súcuan te máá Yaā Dios jni ya ndihi-ni.

²⁹ Te iyó ñayuu cájendute jehē ndíyi. Te núu tú natecu cuiti ndíyi, ¿te najehē cájendute i jehē ndíyi núu súcuan?

³⁰ Te ruhū jijnáhan ri, ¿najehē cúu jeē ndiquiví cájendeyí ni rī jító ri jnūndóho cuu rī, te núu tú natecu ndíyi? ³¹ Hermano, nájnūhun iyó ndāā jeē cúsi ni rī siquī jeē cá candíje ró Jítoho yō Jesucristo, suni súcuan iyó ndāā jeē ndiquiví nducú ñayuu cahni ruhū siquī jniñu ya. ³² Te jeē ní ndoho ri ni casáha tēe xeēn ñuu Efeso, jeē cácuu de nájnūhun quiti xéén, ¿te na vé nihín rī siquī un núu súcuan? Chi núu tú natecu ndíyi, te cuu cahán yō nájnūhun áchí in jnūhun: Na cúsi ni yō caji yō coho yó, chi sanaa te sajnē te cuu yō, achi yō nuū.

³³ Ma cuáha ró jnūhun stáhú ñayuu rohó. Chi áchí in jnūhun: Núu cájica ró jín ñayuu neé, te stívi i róhó jéē tuá caca ndāā rō. ³⁴ Nachuhun ni rō jijnáhan ró, te sáha ró jniñu ndāā, te ma sáha ga rō cuēchi. Chi sava ró tu cájini cuiti rō ndese Yaā cúu Yaā Dios. Súcuan cáhán rī návāha na cúcanu rō.

Ndese natecu ndíyi

³⁵ Te sanaa te cahán in ró: ¿Ndese natecu ndíyi? ¿Ndese coo yiqui cúñu i? achi rō. ³⁶ Tu jécūhun cuiti ni rō núu súcuan. Chi cúu nájnūhun jeē cátají ró táca tata chíji ñuhun návāha nane yucū i. ³⁷ Te tata jeē quiví chíji ñuhun, núu trigo chí inga tata, chí nasūu yucū cúu, chí máá núnī-ni cúu. ³⁸ Te cuéé gá te cane, chí Yaā Dios ni jēhe ya yucū tata ún, ndese ni nujnahan ni maá yá, te ná in ná in tata chí sín sín cáa yucū ni sáha ya. ³⁹ Te suni súcuan tācá yiqui cúñu, chí tú inuú cándāa. Chi sín cáa ñayuu, te sín cáa quiti, te sín cáa saa, te sín cáa chācá. ⁴⁰ Te suni súcuan cúu táca jéē in andiví jín

táca jéē iyó ñayiví. Te sín luu cáa jeē in andiví, te sín luu cáa jeē iyó ñayiví. ⁴¹ Te sín ndíndēe níandii, te sín ndíndēe yóo, te sín ndíndēe táca quimi. Te tācá in in quimi chí suni sín sín ndíndēe. ⁴² Te suni súcuan coo jín ndíyi jeē natecu. Ndíyi jeē chíndūji yó chí téhyū, te jeē nastécu yā chí ma cúu gā. ⁴³ Jeē chíndūji yó chí ndáhú cáa, te jeē nastécu yā chí luu cujéhnú. Jeē chíndūji yó chí tú na fuerza, te jeē nastécu yā chí coo fuerza. ⁴⁴ Jeē chíndūji yó chí in yiqui cúñu cuenta ñayiví cúu, te jeē nastécu yā chí in yiqui cúñu cuenta Espíritu yā cúu. Chi iyó yiqui cúñu cuenta ñayiví, te suni iyó yiqui cúñu cuenta Espíritu.

⁴⁵ Chi súcuan yósó núu tútu iī: Adán, tēe xihna ñuhún, ni cuvāha de jín vida cuenta ñayiví, áchí. Te Cristo cúu nájnūhun inga Adán uū, te máá yá cúu Espíritu jeē jéhe vida. ⁴⁶ Te nasūu yiqui cúñu cuenta Espíritu cúu jeē ní cuvāha xihna gā, chí sa suhva yiqui cúñu cuenta ñayiví, te sáa te nduu cuenta Espíritu. ⁴⁷ Te cuenta ñayiví cúu tēe xihna ñuhún, chí ni cuvāha de jín tícachā ñuhun. Te Adán uū jeē cúu máá Jítoho yō, chí nde andiví ní quiji ya. ⁴⁸ Te ñayuu ñayiví yáha, chí cúu i jnāhan Adán jeē ní cuvāha jín tícachā ñuhun. Te ñayuu jeē quiví coo andiví, chí ndúu i nájnūhun máá Yaā ní quiji nde andiví. ⁴⁹ Chi jeē cáa yó nájnūhun tēe ni cuvāha jín tícachā ñuhun, suni súcuan coo yó nájnūhun cáa máá Yaā ní quiji nde andiví.

⁵⁰ Jnūhun yáha cástūhun rí nuū rō jijnáhan ró, hermano, jeē yiqui cúñu yō cuenta ñayiví yáha, ma cúu quiví ñuu nuū ndácu Yaā Dios jniñu. Chi jeē jihí cúu, te ma cúu quiví nuū cótecu ní cáni. ⁵¹ Te cúní rī jeē na jécūhun ni rō jnūhun yáha jeē ní yisāhí: Nasūu ndihi yó cuu, te ndihi yó chí nasāma yiqui cúñu yō. ⁵² Chi quiví jeē cuécu sandihí na trompeta, te in yachí-ni, nájnūhun in jeē nácuenī-ni yó, te nasama ya yohó. Chi cuecu trompeta un, te natecu táca ndíyi jeē ma cúu gā i. Te táca yó jeē cátecu yō quiví ún, chí nasama ya yiqui cúñu yō. ⁵³ Chi jeē tehyú yáha, cánuú nucūhun jeē ma téhyú gā. Te jeē jihí cánuú nucūhun jeē ma cúu cuiti gā. ⁵⁴ Chi jeē jihí jeē tehyú, chí quiji quiví jeē nucūhun jeē ma cúu gā ma tehyú

gā. Yūcuán na te cundaā jnūhun yósó núu tútu iī: Jíin poder yā ni snāā yā cuehyī jéhni ñayuu. ⁵⁵ Cuehyī jéhni yóhó ¿ndese ga cuu sáha xeēn jíin yó? Chi natecu yō. ¿Te ndese ga cundeyí jíin yó? Chi snāā yā. Achí tutu. ⁵⁶ Chi cuēchi cúu jeē sáha jeē cundeyí cuehyī jéhni ñayuu. Te ley yā jenahán sáha jeē náne cuēchi síquī yō. ⁵⁷ Te na cútahū yō nuū Yaā Dios, chí jíin máá Jítóho yō Jesucristo sáha ya jeē cundeyí yó síquī cuēchi jíin síquī jnūhun cuu yō.

⁵⁸ Jeē yúcuán, ñánī mánī, cuiñi nīhin ró te ma cáca yátá ró jijnáhan ró. Te níni na sájniñu vāha ró jíin jniñu máá Jítóho yō. Chi je cájini ró jeē tu cásájniñu cāha ró jíin máá Jítóho yō.

Siquī jeē cáquin i xūhún cuu tācá hermano

16

¹ Te vijna te cahān rī síquī xūhun jéē cáquin ró cuu hermano cácadíje cándoho ndáhú. Suni na sáha máá ró jijnáhan ró nájnūhun ni ndacu ri nuū tāca grupo ñayuu cácadíje ichi Galacia. ² Tācá domingo te ná ñn ná ñn ró chuvāha sñn ró jecu xūhún, núu ndese ni nihīn maá ró, návāha quiivī jeē jinú rī nuū ró te je íyó túhva. ³ Te jeē jeé rī, te cuāha ri carta nuū tāca téje jeē nácāji ró, te tají rí de quingoo de nuū tācá hermano cáyūcú Jerusalén, quisiáha de xūhun jéē ní casocō ró. ⁴ Te núu íyó váha jeē quihín rī, te suni quihín rī jíin de jijnáhan de.

Jeē cahán Pablo síquī jeē quícondēhé de ñayuu cácadíje

⁵ Te jeē jeé rī nuū ró jijnáhan ró, te jíni ñūhún jeē xíhna gā jeē rī región Macedonia, yūcuán na te jeē rī ñuu ró Corinto. ⁶ Te sanaa te quendōo ri jíin ró jijnáhan ró jecu tiempo, chí sanaa te coyūcu yó ní tiempo mījin. Yūcuán na te cuu chindéé ñáhán ró ruhū, núu ndé chí quihín tucu ri. ⁷ Chí tu cúní rī jeē rī nuū ró vijna te yāha yachī rī quihín rī, chí ñūhun ni rī jeē quendōo ri jíin ró jecu tiempo, te núu cuāha Jítóho yō jnūhun. ⁸ Te cone ri ñuu Efeso yāhá nde na yāha quiivī Pentecostés. ⁹ Chí coo cuehē ñayuu scandíje ri, te vāha quihín jniñu Jítóho yō. Te suni íyó cuéhē ñayuu cácuu contra.

¹⁰ Te núu na jéé Timoteo, te sáha ró jéé coo sñi ni de mēhñu ró, te ni ñn ma cáni ni de síquī. Chí suni jniñu máá Jítóho yō sáha de, nájnūhun máá rí. ¹¹ Núu súcuán te ni ñn ró má sajéé ni ró nuū de. Chí sa suhva chindéé ñájñáhan ró jíin de jeē na quihín gā de, te coo ndeyí coo sñi ni de, návāha ndiji de coto jnáhan ri jíin de. Chí ruhū jíin sava ga hermano cándetu ri de.

¹² Te hermano Apolos chí ni cahān ndahú rí jíin de jeē na jéé de jíin sava ga hermano, condēhé de róhó. Te ni jeni ni de jeē ma cúu jeē de vijna. Te núu na núne de te jeē de.

Saludo jeē sándihí

¹³ Ndito coo ni ró jijnáhan ró, te cuiñi nīhin ro jíin jnūhun cácadíje ró. Te téyí na cóo ni ró, te na cóo fuerza ini ró. ¹⁴ Te tāca jéé casáha ró, na sáha ró jíin jnūhun cundáhú ni jnáhan.

¹⁵ Hermano, cájini ró jeē xíhna gā ñayuu vehe Estéfanos ni cacandíje ichi Acaya. Te ni cajēhe i máá i nuū jniñu jeē chindéé ñáhán i tācá hermano cácadíje. ¹⁶ Te cúní rī jeē suni máá ró jijnáhan ró, cuatáhú váha ró ñáyuu casáha súcuán, jíin táca ñáyuu cachindéé ñájñáhan te cásájniñu síquī jniñu ya. ¹⁷ Cúsñi ni rī jeē ní quijicoo Estéfanos jíin Fortunato jíin Acaico, chí tēe yāha ni cajejñiñu de nuū rí jehē ró jeē tu ní cáhiyo ró jíin rí. ¹⁸ Chí ni ndundeyí ni rī, te suni súcuán máá ró jijnáhan ró, ni casáha de. Te cánuú cuajnúhún ró tāca téje cándāa súcuán.

¹⁹ Sándeyí ni ró jijnáhan ró, áchí táca grupo ñayuu cácadíje cáyūcu Asia. Aquila jíin Priscila jíin ñáyuu cácadíje jeē cándutútú vehe de, cácahān i jeē sándeyí ndasí ni ró jíin jnūhun máá Jítóho yō. ²⁰ Te tācá hermano cácahān i jeē sándeyí ni ró. Te jeē cahán ró jíin táca jnáhan ró, te yíñūhún techūhu ró ndaha i.

²¹ Ruhū Pablo, jíin ndaha máá rí téje ri jnūhun yāha jeē na sándeyí ni ró jijnáhan ró.

²² Te núu ndé ñn tu íyó mánī jíin Jítóho yō Jesucristo, te na jnáhnú ndetū i núu súcuán. Te na cáhán yō: Jítóho ná, cúní na jéé yachī ndiji ní.

²³ Te ñūhun ni rī jeē máá Jítóho yō Jesucristo na sáha ga yā jeē váha róhó jijnáhan ró. ²⁴ Te manī rī jíin ró jijnáhan ró jéé

cácandíje ró Cristo Jesús. Súcuan na cóo.
Amén.

CARTA UU JEE NI TEE SAN PABLO APOSTOL NUU ÑAYUU ÑUU CORINTO

¹ Máá rí cúu Pablo, apóstol Jesucristo, chi súcuan ni nujnahan ni Yaā Dios ni tají yá ruhū nacani ri jñūhun ya. Te ndindúú rí jín hermano yō Timoteo cátee ri carta yáha cuájeē nuū rohó hermano ñuu Corinto jeē cácañdeé ró Yaā Dios, jín núū ndihí róhó jéé cáyihí ndaha Yaā Dios jeē cáyūcu nñí cáhnu Acaya. ² Te cáñuhun ni rí jeē Tatá yō Yaā Dios jín Jítoho yō Jesucristo na sáha ga yā jeē váha róhó te sáha ya jeē coo ndeyí coo sñí ni rō.

Siquí jeē ní ndoho Pablo jñúndóho

³ Na cáhán yō jeē yóhyo cújéhnu Yaā Dios, Yaā cúu Tatá maá Jítoho yō Jesucristo. Chi máá yá cúu Tatá yō jeē cundáhú ni yohó, te níní sáha ya jeē ndúsñí ni yō. ⁴ Chi sáha ya jeē ndúsñí ni yō siquí tāca jñúndóho ndóho yó, návāha suni cuu sáha máá yó jeē ndúsñí ni jñáhan yó jéé cándoho jñúndóho. Chi nájnūhun ni sáha ya jeē ndúsñí ni maá yó, suni súcuan sáha yó jéé ndúsñí ni i. ⁵ Chi jeē ndóho yó cuehē jñúndóho nájnūhun ni ndoho Cristo, suni súcuan nihín yō cuehē jñūhun ndusñí ni, sáha Cristo. ⁶ Jeē yúcuan núu cándoho ri jñúndóho te súcuan te cuu sáha ri jeē ndúsñí ni rō te quendōo vāha ga anuá rō. Te jeē sáha Yaā Dios jeē ndúsñí ni rí, suu sáha tucu jeē ndúsñí ni maá ró, te quendōo vāha ga anuá rō. Te súcuan te nihín rō fuerza jeē cuándeýí ni rō jín tāca jñúndóho nájnūhun cándoho ri. ⁷ Te cáñuhun ndasí ni rí jeē cúu róhó, chi cájini rí jeē nájnūhun cándoho ró jñúndóho jín rí, suni súcuan ndusñí ni rō jín rí sáha máá Yaā Dios.

⁸ Hermano, cácu ni rí jeē na cúni rō jñáhan ró ndese ni candoho ri ichi Asia. Chi yóhyo xeēn jñúndóho ni cajito ri, nde je yajni tuá canda ri, te ni jeni ni rí jeē cuu rí nuú. ⁹ Te siquí jeē ní cajehnde ni rí cuu rí, te yúcuan ní sáha jeē ní cajecūhun ni rí jeē ma ténuū rí maá rí chi tú jniñu ri, chi sa suhva Yaā Dios jeē nastécu ndíyí tenuū rí. ¹⁰ Chi máá yá ni scácu ruhū jijnáhan ri nuū

jñúndóho xeēn jeē jé yajni cuu rí nuú, te suni súcuan scácu ya ruhū vijna. Te ñúhun ni rí jeē suni scácu tucu ya ruhū ichi núú gā. ¹¹ Te suni na chindéé ñáhán ró ruhū jijnáhan ri jeē cacān tahú rō jehē rí. Chi núu cuehē ñayuu cacān tahú jehē rí, te suni cuehē i cuu nacuatáhu jehē rí jeē ni sáha ya jeē váha ruhū.

Jeē ní cucuéé Pablo quihín de ñuu Corinto

¹² Iyó ññ jeē sáha jeē cácusñí ni rí: Chi vāha iyó ni anuá rí jeē váha ndoo te ndaā ni cajica ri nuū ñayuu ñayíví, te víhyá gā nuū maá ró jijnáhan ró. Chi siquí jeē váha ni Yaā Dios, te ni chindéé ñáhán yá ruhū, te nasūu siquí jéé ndichí máá rí cúu jeē ní cajica ri súcuan. ¹³ Te jñūhun cátee ri nuū tāca carta rí, chi máni jeē cúu cahu ró te jecūhun ni rō cúu. Te ñúhun ni rí jeē jecūhun vāha ga ni rō, ¹⁴ nájnūhun je cájecūhun ni rō jecu. Te súcuan te cuu cusñí ni rō siquí rí quiví ndíji Jítoho yō Jesús, nájnūhun cácusñí ni rí siquí maá ró.

¹⁵ Te siquí jeē súcuan ni cucáhnu ni rí, te jeē yúcuan ní jeni ni rí jeē núu na quihín rí Macedonia te jeē rí nuū maá ró xihna gā, návāha cusñí ni rō jeē jécondēhe rí rohó úu jínu núu. ¹⁶ Chi ni jeni ni rí jeē jécondēhe rí rohó, te yāha ri quihín rí Macedonia, te jeē nándicó rí Macedonia te ndíji tucu ri nuū rō. Yūcuán na te cuu chindéé ñáhán ró ruhū jeē quihín rí ichi Judea nuú. ¹⁷ Te jeē súcuan ni jeni ni rí, ¿te á té tu nácani vāha ni cúu ri jeē tu ní jéé rí nuū rō, chí naún? ¿A cájeni ni rō jeē cúu ri nájnūhun ñayuu ñayíví jéé yachí cahán jeē cuu, yūcuán na te tuú, chí naún? ¹⁸ Tuú chi máá Yaā Dios jíní yā jeē tu cáhán rí jín ró jeē cuu, te yachí nácahán rí jeē ma cúu. ¹⁹ Chi ruhū jín Silvano jín Timoteo ni canacani ri jñūhun Jesucristo Sēhe Yaā Dios nuū rō jijnáhan ró. Te máá yá tu cáhán yā jeē cuu te nacahán tucu ya jeē ma cúu. Chi squícu ya jeē cahán yā. ²⁰ Chi ndihí jeē ní jéjñūhun Yaā Dios, squícu máá Cristo. Te jeē yúcuan cácahán yō jeē yóhyo luu cújéhnu Yaā Dios, te cácahán yō Amén, chi ndihí squícu Cristo Jesús. ²¹ Te Yaā Dios cúu jeē sáha jeē ruhū jijnáhan ri jín róhó jijnáhan ró, cáhín nihín yó jín Cristo, te ni sándoo ya yohó jéé cuajniñu yó núu yā. ²² Te suni ni jēhe ya Espíritu yā jeē cóndee ini anuá yō, te cúu ya

nájnūhun ñn sello jeē steén jeē cúu yó séhe Yaā Dios. Te sáha Espíritu jeē iyó ndāā ni yō jeē cuāha Yaā Dios tahū yō.

²³ Te jeē ná tu jeē rī nuū rō ñuu Corinto, nájnūhun ni jeni ni rī, suu cúu siquī jeē tu ní cúní rī cuxeēn rī nuū rō jeē tu cásáha vāha ró. Te máá Yaā Dios cúu Yaā jiní jeē cahán ndaā rī. Te iyó váha jeē na cúu rī te núu tu cáhán ndaā rī. ²⁴ Te nasūu jéē cácuni rī ndacu ñihin ri jniñu nuū rō siquī jnūhun cá candíje ró yá, chi je cáhīn ñihin ro jín jnūhun ún. Chi sa suhva cácuni rī chindéé ñáhán rí rohó jéē na cúsiñ gā ni rō.

2

¹ Núu súcuan te ni jeni ni rī jeē ma jéé rī inga jínu nuū rō jín jnūhun cuxeēn rī te cucuíhyá ni rō sáha rī. ² Chi núu cucuíhyá ni rō sáha rī, ¿te ndé ñáyuu sáha jeē cusīñ ni maá rí? Tuá na inga ñayuu, chi máni máá rōhó, te ndese cuu te núu ni sáha rī jeē cucuíhyá ni rō. ³ Te jeē yúcuan cúu jeē ní tee ri carta un núu rō, návāha nacani ni rō siquī cuéchi ró sáha, te ma cucuíhyá ni rī sáha cuéchi ró quívī jeé rī nuū rō. Chi sa suhva sáha ró jéé cúsiñ ni rī. Te jiní vāha rī jeē núu cusīñ ni rī, te suni ndiñi ró jijnáhan ró cusīñ ni rō. ⁴ Te jeē ní tee ri carta un núu rō, te yōhyo ni nacani ni rī siquī rō, te ni jnahuhū ni rī, te nde ndahyú rī ni tee ri. Te tu ní téé rī jeē sáha rī jeē cucuíhyá ni rō, chi sa suhva návāha cuni rō ndese yōhyo manī rī jín ró.

Jeē íne cáhnu ni Pablo nuū téé ni sáha cuéchi

⁵ Te jeē ní cucuíhyá ni rī ni sáha tēe jeē ni sáha cuéchi ún, te nasūu máá-ni ri, chi suni nde máá ró jijnáhan ró ni sáha de jeē ní cacucuíhyá ni rō jecu. Te cáhán rī jeē jecu-ni, chi tu cúní rī cuxeēn ndasí rí. ⁶ Te jín jéé ní cacuxeēn rō nuū de ná ni candutútú ró, te jín yúcuan-ni te ni cuu-ni. ⁷ Te vijna chi jini ñúhún jeē cóne cáhnu ni rō nuū de, te sáha ró jéé ndúsīñ ni de, chi sanaa te caa ga cucuíhyá ni de, te ma ndúsīñ gā ni de. ⁸ Núu súcuan te cáhán ndahú rí jín ró jijnáhan ró jéé steén tucu ró jéé iyó máni rō jín de. ⁹ Chi jeē siquī jniñu yáha cúu jeē ní tee ri carta un núu rō, návāha coto ndee rī rohó núu cuatáhu váha ró jniñu ndácu ri

nuū rō. ¹⁰ Núu súcuan te núu íne cáhnu ni rō nuū ñayuu, te suni súcuan ruhū. Chi jeē íne cáhnu ni rī nuū ñayuu núu ni sáha i cuéchi, te sáha rī súcuan siquī jeē maní rī jín ró jito jínúu Cristo. ¹¹ Chi cánuú cone cáhnu ni yō, chi tu cúní yō jeē nihín Satanás cuéchi siquī yō, chi je jiní vāha yó ndese ndúcú un stáhu yóhó sáha yó cuéchi.

Jeē tu ní íyo nayúu ni Pablo ini ñuu Troas

¹² Ná ni jehēn rī ñuu Troas jeē nácani ri jnūhun Jitoho yō Cristo, te vāha ni sáha ya jeē ni íyo modo jeē nácani ri jnūhun ya. ¹³ Te vésú súcuan te tu ní íyo nayúu ni anuá rī, chi tu ní níjnáhan ri jín hermano yō Tito. Yūcuán na te ni nacuatáhu rí nuū ñáyuu yūcuán, te cuananducú rí de ichi Macedo-nia.

Jnūhun jeē kujénu ndúu yó jín Cristo

¹⁴ Te na cútahū yō nuū Yaā Dios, chi níni ndéca vāha ya yohó cuángoo yó jín Cristo Jesús, te ndúu yó jín yá jeē kujénu ndasí yá snáā yā poder ndiñi enemigo yā. Te jéjníñu ya yohó jéé scuité núu yó jnūhun ya tēcá-ni lugar, nájnūhun jité núu ñn xicō asīñ. ¹⁵ Te cúu yó nájnūhun ñn sūje jeē jeén asīñ nuū Yaā Dios sáha Cristo. Te nájnūhun jeē jinú xicō un núu ñáyuu cācu ánuá jín núu ñáyuu jnahnū ndetū. ¹⁶ Nuū ñáyuu jnahnū ndetū chi cúu yó nájnūhun ñn xicō jeē cúu i sáha, te nuū ñáyuu cācu ánuá chi cúu yó nájnūhun ñn xicō váha jeē cótecu i sáha. Te ní ñn yó ma cánda yó sáha yó jniñu yáha, te núu ma chindéé ñáhán yá yohó. ¹⁷ Te ruhū jijnáhan rī, tu cásáha rī nájnūhun cásáha cuehē tēe jeē cánducú de nihín de xūhun síquī jnūhun Yaā Dios. Chi sa cánacani ndaā rī jnūhun ya, chi máá Yaā Dios ni tají rúhū, te máá yá jiní jeē cánacani ndaā rī siquī jeē cá candíje rī Cristo.

Jnūhun siquī contrato jeé

3

¹ Te jeē cácahān rī súcuan, ¿te á cájeni ni rō jeē cánducú tucu ri cahān rī jeē váha ga tēe cácuu ri, chí naún? ¿Te chí jini ñúhún jéé steén rī carta recomendación nuū rō, chí jéé cacán rī cuāha ró núu rī jijnáhan rī, nájnūhun cásáha sava i? ² Tuú chi máá-ni ró cácuu nájnūhun ñn carta recomendación rī. Te jeē ñúhún ni rī jeē ní cacandíje vāha

ró ni sáha ri, suu cúu nájñūhun jeē yosó jñūhun carta un ini anuá rī. Te ndíhi ñayuu chí nájñūhun cáhu i, cúu jeē jiní i ndese ni nasāma ró. ³ Chi máá ró cácuu nájñūhun ññ carta jeē ní tee Cristo te cáscáca ri. Te nasūu jíin tinta ni tee ya, chí sa suhva jíin Espíritu Yaā Dios, Yaā técu. Te nasūu núu tabla yuū nájñūhun ni tee ya ley yā, chí sa suhva nuū anuá ñayuu ni tee ya.

⁴ Te cácahān rī súcuan, chí cácucahnu ni rī Yaā Dios siquī jeē ni sáha Cristo. ⁵ Te nasūu jéē cájeni ni rī jeē cúu canda máá rí sáha ri jñiñu ún. Chí sa suhva máá Yaā Dios sáha jeē cuu squícu ri. ⁶ Te máá yá ni sáha jeē cuu cuajníñu vāha ri siquī contrato jeé yá. Te contrato yáha tu cáhān jeē squícu yó ley jeē ní tee jíin letra, chí sa suhva jeē caca yó jíin vida jeé, suu jeē ni jéhe Espíritu yā. Chí contrato ley jeē yosó jíin letra, jñahnū ndetū ñayuu sáha. Te jeē sáha máá Espíritu cúu jeē cótecu yō ní cáni.

⁷ Te ley jenahán jeē ni jéhe ya nuū Moisés, ni yosó letra nuū tabla yuū. Te yōhyo ni cujéhnu, te ni ndindēe ndasí ni sáha, te nde Moisés ndíi nuū de ni sáha. Te tu ní cúu coto vāha ñayuu Israel nuū de ni sáha. Te vēsú súcuan te cuéé-ni cuéé-ni ni ndahvā jeē ndíndēe núu de. Te núu súcuan ni cujéhnu ndasí ley jeē sáha jeē cuu ñayuu te jñahnū ndetū i, ⁸ te sa víhyá gā cujéhnu ndasí gā jñūhun cotecu yō jeē jéhe Espíritu nuū yō. ⁹ Chi núu yōhyo ni cujéhnu ley un jéē jñahnū ndetū ñayuu sáha, te sa víhyá gā cujéhnu jñūhun jeē ndáhva Yaā Dios cuēchi yó. ¹⁰ Chi ley un jéē ní cujéhnu nde saá, tuá cujéhnu cuítí, siquī jeē cujéhnu ndasí gā jñūhun Espíritu jeē iyó vijna. ¹¹ Te núu súcuan ni cujéhnu ley jeē ní íyo jecu-ni tiempo, te sa cujéhnu ndasí gā jñūhun jeē coo ní cáni.

¹² Te jeē súcuan cáñuhun ni rī, jeē yúcuan cáhīyo téyí ni rī nácani ri jñūhun yáha. ¹³ Chi tu casáha ri nájñūhun ni sáha Moisés jeē ní jesi de ññ sahma nuū de, návāha tú coto ñayuu Israel ndese cuandahvā jeē ní ndindēe núu de. ¹⁴ Te ñayuu ún tu ní cájecūhun ni i. Te nde vijna núu cácahu ñayuu Israel tutu contrato ley jenahán, suni tu cájecūhun ni i, chí nájñūhun jesi sahma un núu jeē níjñūní i, te tu cújiyo cuítí. Chí nde jeē candíje i Cristo, yūcuán na te cujiyo.

¹⁵ Te suni súcuan nde vijna núu cácahu i tutu ley Moisés, te nájñūhun jeē jesi ññ sahma nuū jeē níjñūní i. ¹⁶ Te jeē násāma ini ññ ñayuu quívi i nuū maá Jítoho yō Cristo, yūcuán na te cújiyo-ni jeē jesi ún. ¹⁷ Chi Jítoho yō cúu máá Espíritu. Te nuū íne Espíritu maá Jítoho yō, yūcuan cúu nuū iyó libre ñayuu jeē tuá yíhi i chíji ley jenahán. ¹⁸ Te jeē yúcuan máá yó jíināhan yó, tuá jesi nuū jeē níjñūní yō. Chí cácuu yó nájñūhun espejo jeē jéhe nduva, cúu jeē cájica ndaā yō te suu stéén ndese yōhyo luu cújéhnu máá Jítoho yō. Te máá yó tāca quívi cuanasāma yó cuanduu luu ga anuá yō nájñūhun cáa máá yá. Chí máá Jítoho yō jeē cúu ya Espíritu, súcuan sáha ya jíin yó.

4

¹ Núu súcuan te tu ndínuu ni rī cánacani ri jñūhun ya. Chí siquī jeē ní cundáhú ni yā ruhū jíināhan ri te ni jéhe ya jñiñu yáha nuū rī. ² Te tu casáha ri jñiñu néé jéē cúcanu yō sáha, ni tu cájica cuu ri jíin jñūhun ndíchí stáhú, ni tu casáma ri jñūhun Yaā Dios. Chí sa suhva cácahān rī máni jñūhun ndaā. Te súcuan te cuu cuni tāca ñayuu ini anuá i jeē cácahān ndaā rī jító jíinúu Yaā Dios. ³ Te núu íyó ñayuu tu jécūhun ni jñūhun jnama ya yohó jéē cánacani ri, te súcuan cúu nuū máni máá ñayuu jñahnū ndetū. ⁴ Te jeē tu cácadíje i, te máá jéxeén jeē ndácu jñiñu ini ñayívi yáha, ní jesi nuū jeē níjñūní i, návāha ma ndíndēe jñūhun Cristo ini anuá i, te ma cúni i jeē yóhyo luu cújéhnu Cristo, Yaā jeē ínuú cáa jíin Yaā Dios. ⁵ Te jeē cánacani ri jñūhun, te nasūu jñūhun máá rí, chí sa suhva jñūhun Jítoho yō Jesucristo cánacani ri. Te máá rí chí cácuu ri mozo-ni nuū rō jíināhan ró jéē siquí jeē maní rī jíin Jesús. ⁶ Chí ná ni sáha Yaā Dios ñayívi te ni cahān yā jeē na cundíjin nuū néé. Te suni súcuan ni sáha ya jeē ní cundíjin nuū anuá yō jeē cájecūhun ni yō siquí Jesucristo, ndese ndíndēe núu yā, cúu jeē yōhyo luu cújéhnu ya nájñūhun cúu Yaā Dios.

Jeē cándiquīn yō jñūhun cácadíje yó yá

⁷ Te tāca jñūhun yáha jeē yóhyo luu cújéhnu, chí nájñūhun jeē ññuhun ini ññ quísi ññuhun. Chí cácuu yó nájñūhun quísi ññuhun, chí tú na fuerza yō. Te jeē yúcuan cájini vāha

ri jeē maá Yaā Dios cúu jeē jéhe poder siquī jnúhun yáha jeē yóhoyo luu cújéhnú, te nasūu fuerza maá rí cúu. ⁸ Te jeē yúcuán, vésú tāca lado cájito ri jnúndóho, te tu sáha jeē ma ndúsī gā ni rī. Te vésú cácuclhyá ni rī siquī jnúndóho, te cáñuhun ni rī jeē quee vāha jniñu ri. ⁹ Te vésú cájito xeēn ñayuu ruhū, te máá yá tu stóo ya ruhū jijnáhan ri. Te vésú cánducú i snāā i ruhū jiín jniñu sáha ri, te ma cúu. ¹⁰ Te ndé-ni cúu nuū cuángoo ri, te nájnūhun ni ndoho Jesús jeē ni jíhī yā, suni súcuán cándoho ri jeē jé yajni cuu rī, návāha suni cuu stéén rī fuerza Jesús jeē técu yā ini yiqui cúñu rī. ¹¹ Chi jeē niní cátecu rī, te tāca quívi je yajni cahni ñayuu ruhū jeē siquī Jesús. Te súcuán te cájito ñayuu jeē técu Jesús ini yiqui cúñu rī jeē cúu. ¹² Núu súcuán te ruhū jijnáhan ri, niní cúu jeē jé yajni cuu rī siquī jnúhun ya, te yúcuán sáha jeē cotecu maá ró ní cáni jijnáhan ró.

¹³ Te yósó núu tútu iī: Ni candíje ri te jeē yúcuán ní cahān rī, achí. Te suni jeē cáncandíje máá rí cúu jeē cáncani ri jnúhun ya. ¹⁴ Chi cájini rī jeē maá Yaā jeē ní nastécu Jitoho yō Jesús, suni súcuán nastécu yā ruhū, te sáha ya jeē in cáhnu ni cuiñi ndihī yó núu yā. ¹⁵ Chi tāca jnúndóho yáha cándoho ri návāha coo vāha ró jijnáhan ró. Te súcuán te cayā cuehē gā ñayuu jeē sáha ya jeē váha i. Yúcuán na te suni yóhoyo cuehē i nacuatáhú i nuū Yaā Dios, te cujéhnú ga yā sáha.

¹⁶ Jeē yúcuán cúu jeē tu ndínuu ni rī, te vésú cuandihī fuerza yiqui cúñu rī, te sa suhva cuanduú fuerza gā anuá rī tāca quívi. ¹⁷ Chi jnúndóho jeē ndóho yó ñayivi yáha, tú-ni xeēn cúu, te yachī yāha. Te sáha jeē nihín yō in tahū jeē cujéhnú yó ní cáni jeē cáa ndasí gā vésú jnúndóho ún. ¹⁸ Te tu táñuhún yó nuū tāca jnúndóho jíto yó núu vijna, chi sa suhva táñuhún yó nuū tāca jéé váha jeē tu jíto yó núu vijna. Chi tāca jéé jíto yó núu vijna, chi yachī ndihī, te tāca jéé tu jíto yó núu, chi coo ní cáni.

5

¹ Chi yiqui cúñu yō jeē ndeé yó ñáyivi yáha, cúu nájnūhun in vehe jeē náā. Te cájini yō jeē núu na náā, te cuāha Yaā Dios in yiqui cúñu jeé, te suu cúu nájnūhun in vehe jeé

coo ní cáni ichi ándivi. Te nasūu in vehe jeē sáha ñayuu cúu, chi jeē sáha Yaā Dios cúu. ² Te niní jéé ndeé yó vehe yáha jeē cúu yiqui cúñu yō, te cájitū ni yō sáha, chi yóhoyo cúní yō jeē núcūhun yó yiqui cúñu jeé yó nde ándivi. ³ Chi jeē núcūhun yó un, te ma cóo máá na anuá yō jeē náā yiqui cúñu yō yáha. ⁴ Chi niní jéé iyó gā yō ini vehe yiqui cúñu yō yáha, te jíto ni yō te cúcuclhyá ni yō. Te nasūu jéé cúní yō jeē stóo yó yiqui cúñu yō te coo máá-ni ánuá yō. Chi sa suhva cúní yō nucūhun yó jéé jeé, návāha ndahvā yiqui cúñu yō jeē náā, te coo máá jéé cótecu ní cáni. ⁵ Te Yaā Dios cúu jeē ni sáha ya jeē súcuán coo yó. Te ni jéhe ya Espíritu yā jeé cóndee ini anuá yō, te sáha Espíritu jeé iyó ndáā ni yō jeē cuāha Yaā Dios tahū yō.

⁶ Núu súcuán te niní cúu jeē cácuclhnu ni rī. Chi cájini rī jeē niní ndeé gā rī chíji yiqui cúñu yáha, te jíca cúu ri jiín núu ndeé máá Jítoho yō. ⁷ Chi vijna chi cáncandíje ri jeé iyó yá jiín rí, vésú ná tu coto ri nuū yā. ⁸ Te cácuclhnu ni rī, chi sáha ri cuenta jeé váha ga núu na quénda ri chíji yiqui cúñu yáha te quihín rī condee rī jiín máá Jítoho yō. ⁹ Jeé yúcuán cúu jeé cánducú ndeyí rí sáha ri jeé cusī ni yā jiín rí, vésú núu ndeé gā rī yiqui cúñu rī chí vésú núu condee rī jiín yá. ¹⁰ Chi cánuú jéé ndihī yó cuiñi yuhu mesa Cristo jeé sándaā yā jniñu yó. Te ná in ná in yó níhín yō siquī ndese ni casáha yó, á jéé váha chí jéé neé, ná ni condee yō chíji yiqui cúñu yō.

Siqui jeé ndivicoo yó núu jnúhun manī Yaā Dios jíto yó

¹¹ Núu súcuán te cándiso iyo ri nuū maá Jítoho yō, te jeē yúcuán ndúcú ndeyí rí scandíje ri ñayuu. Te jíni Yaā Dios jeé cáhíyo ndaā rī, te ñúhun ni rī jeē suni súcuán cájini maá ró. ¹² Te nasūu jéé cánducú tucu ri cahān rī jeé váha ga tēe cácuu ri, chi sa suhva cástūhun rí jeé cuu cusī ni rō jeé siquī rī jijnáhan ri. Te súcuán te cuu stío cuiñí rō nuū ñayuu jeé cuteyí i siquī ndese cáa ñayuu, te tu sáha i cuenta ndese cáa ini anuá ñayuu. ¹³ Te va sanaa te cájeni ni rō jeé téé loco cácuu ri jeé cácahān rī súcuán. Te siquī jeé cándihvī ni rī jehē Yaā Dios cúu. Te tuú chi cáhíyo vāha xinī rī, te jeé yúcuán cájejniñu ri jeé quéndōo vāha ró. ¹⁴ Chi siquī

jeē ní cundáhú ni Cristo ruhū jijnáhan ri cúu jeē cánuú nacani ri jnūhun ya. Chi cájini vāha ri jeē ni jīhī mañúhún-ni ya jeē síquī ndīhi yó, te jeē yúcuan nájñūhun ni jīhī ndīhi yó jíin yá. ¹⁵ Chi ni jīhī yā jeē síquī ndīhi yó návāha tāca yó jēé técu, ma cótecu ga yō jeē sáha yó jēé cuní maá yó, chi sa suhva jeē cuní maá yá jeē ni jīhī yā te ni natecu yā jeē síquī yō. ¹⁶ Jeē yúcuan tuá casáha ri cuenta ndese-ni cándāa ñayuu, nájñūhun casáha ñayuu ñayīví. Te vēsú súcuan ni casáha ri cuenta síquī Cristo nde saá, jeē ñn tē-ni cúu ya, te vijna chi cájini rī jeē cúu ya Sēhe Yaā Dios. ¹⁷ Chi núu ñn ñayuu yīhi i ndaha Cristo, te je ni ndujeé i. Te tāca modo neé ní nevāha i, je ni yāha cuahān, te vijna je ni ndujeé ndīhi.

¹⁸ Te Yaā Dios cúu jeē sáha ndīhi jeē yáha, chi jíin Cristo ni sáha ya jeē ní ndívicoo yó núu jnúhun manī yā jíin yó. Te ni tejñiñu ya ruhū jeē cánacani ri jnūhun jeē ndívicoo ñayuu nuū jnúhun manī yā jíin i. ¹⁹ Chi jíin Cristo te ni sáha Yaā Dios jeē ñayuu ñayīví ndívicoo i nuū jnúhun manī yā jíin i. Te tu ndácunehen ya cuēchi ni casáha ñayuu. Te ni tejñiñu ya ruhū jeē cánacani ri jnūhun yáha ndese ndívicoo i nuū jnúhun manī yā jíin i. ²⁰ Núu súcuan te cácuu ri tēe cájica jniñu maá Cristo. Te jeē cahán rī, te nájñūhun jeē maá Yaā Dios cahán ndahú yá jíin ró. Núu súcuan te cácahān ndahú rī jíin ró jeē cahán Cristo, jeē na ndívicoo ró núu jnúhun manī Yaā Dios jíin ró. ²¹ Te Cristo, vēsú tú ni ñn cuēchi ya, te ni sáha Yaā Dios jeē ní nucondee cuēchi yó síquī yā. Te súcuan te yóhó jēé yīhi ndaha Cristo, ni nucondee síquī yō jeē iyó ndāā yō nájñūhun iyó ndāā Yaā Dios.

6

¹ Núu súcuan te síquī jeē cácuu ri tēe casájniñu jíin yá, te cácahān ndahú rī jíin ró jeē ma stóo uun ró jnúhun jeē ni sáha Yaā Dios jeē váha róhó. ² Chi áchí yá nuū tútu i: Máa tiempo cuní maá rí te cuní sōho rí jnūhun cáhán ndahú ró jíin rí.

Te máa tiempo jnáma ri ñayuu, te jnama ri rohó. Achí yá. Te vijna-ni cúu máa tiempo jeē cuní yā, chi vijna-ni cúu tiempo ni quiji Yaā jnáma yóhó.

³ Te cánducú rí jeē ma sáha ri ni ñn jniñu jeē casi jeē candíje ñayuu, návāha ma cahán i síquī jniñu ndíso rí. ⁴ Chi sa suhva cánducú rí jeē ndīhi jeē sáha ri, steén jeē cácuu ri tēe cájejniñu nuū Yaā Dios. Jeē yúcuan cájendeyí ni rī jíin jēé ndóho ri jnūndóho, jíin jēé cúmanī nuū rī, jíin jēé yī sáha jíin rí. ⁵ Chi ni iyo tijni jínu jeē ní cacani i ruhū, jeē ní cachune i ruhū vecāa, jeē ní candonda i síquī rī, jeē ní casájniñu ñihin rī, jeē ní cajehni rī māhna máá rí, jeē ní cahīyo ndite ni rī. ⁶ Te suni cánducú rí jeē cuajnúhún i ruhū síquī jeē ndoo cájica ri, te cájecūhun vāha ni rī jnūhun ndaā, te cáhīyo paciencia ni rī, te vāha ni rī, te ndéé Espiritu Santo ini rī, te cákundáhú ndije ni rī jnáhan ri. ⁷ Te cánacani ndaā rī jnūhun, te poder Yaā Dios íne jíin rí. Te jíin jnúhun ndaā cándahva rī tācá jniñu néé, chi nájñūhun jeē cájejniáhan ri síquī. Chi nájñūhun jeē ndónnda un síquī rī te ndónnda ri síquī. ⁸ Iyó jínu yīñúhún ñayuu jíin rí, te iyó jínu tuú. Iyó jínu jéjnúhún i ruhū, te iyó jínu cácahān i síquī rī. Iyó jínu cácahān i jeē tēe stáhú cácuu ri, te iyó jínu cácahān i jeē tēe ndaā cácuu ri. ⁹ Iyó jínu casáha i nájñūhun jeē tu jíin i ruhū jijnáhan ri, te iyó jínu jeē jíin vāha i ruhū. Iyó jínu jeē cuní ñayuu cahni i ruhū, te cátecu nahín rí. Te vēsú cástóho i ruhū, te tu cájihī rī sáha. ¹⁰ Te vēsú iyó jēé cácuuñhyá ni rī, te níni cácusī ni rī. Te vēsú tēe ndáhú cácuu ri, te sácúcá rí cuehē ñayuu jíin jnúhun ya. Te vēsú tú na vé cánevāha ri, te jíin máá yá te ndīhi-ni cúu jeē cánevāha ri.

¹¹ Hermano ñuu Corinto, súcuan cúu jeē cácahān cají rí jíin ró jijnáhan ró, chi síquī jeē maní rī jíin ró, jeē yúcuan cáchí ndīhi ri ndese cándoho ri. ¹² Máa rí jijnáhan ri cácahān cají rí síquī jeē maní ndasí rí jíin ró, te máa ró jijnáhan ró sanaa te tu súcuan cúu. ¹³ Nájñūhun cáhán tatá jíin séhe, súcuan cáhán ndahú rí jíin ró jeē nájñūhun iyó maní rī jíin ró, súcuan na cóo maní tucu ró jíin rí.

Síquī jeē cúu yó templo Yaā Dios

¹⁴ Ma quívi nduu ró jíin jniñu néé casáha ñayuu tu cáncandíje, chi ma cúu coo inuú ró jíin i. ¿Chi ndese cuu quijnáhan jniñu casáha ñayuu ndaā jíin jniñu casáha ñayuu tú ndaā? ¿Te ndese cuu coyúcú inuú ñayuu cájica jíin luz yā jíin ñayuu cájica nájñūhun nuū néé?

15 ¿Ndese cuu coo inuú ni Cristo jíin Satanás? ¿Te ndese cuu cuiñi cáhnu ñayuu cá candíje jíin ñáyuu tu cá candíje? 16 ¿Te ndese cuu quijnáhan templo Yaā Dios jíin ídolo? Chi máá ró cá cuu templo Yaā Dios, Yaā técu, chi ndéé yá ini anuá rō, nájnūhun ni cahān yā: Condee rī ini i te caca cuu ri mēhñú i, te cuu ri Yaā Dios maá i, te cuu i ñayuu maá rí.

17 Te jeē yúcuan ní cahān gā yā: Ma quivī nduu rō jíin jniñu néé cásáha i, te cusīn ró jijnáhan ró, áchí Jítóho yō. Te ma jnī ró táca jeē tú ndaā. Yūcuán na te naquihin ri rohó, 18 te cuu ri Tatá rō jijnáhan ró, te cuu ró séhe yí rí jíin séhe síhí rí, áchí Jítóho yō, Yaā jnī ndihí poder. Achí tutu.

7

1 Núu súcuan, ñánī mánī, cánevāha yó táca jnūhun yáha jeē ní jéjnūhun ya. Jeē yúcuan na sándoo yó máá yó táca jeē sajnéhén yiqui cúñu yō jíin ánuá yō. Te na cónso iyo yó núu Yaā Dios, te coo ndoo coo i yō nuū yā jíin ndihí jniñu cúní yā.

Jeē ní canacani ni ñayuu Corinto siquī cuéchi i

2 Coo manī rō jíin rí jijnáhan ró víi. Chi tu ní sáha ri falta nuū ní ñn ró, te tu ní stívī rí anuá ni ñn ró, te ni ñn ró tu ní stáhú rí. 3 Te nasūu jeē nducú rí cahān rī nuū rō cúu jeē cahān rī súcuan, chi je ni cahān rī jeē yóhyo manī rí jíin ró. Te níni ñūhun ni rī rohó, vēsú cuu yō chí cotecu yō. 4 Te cúcáhnu ndasí ni rī rohó jijnáhan ró, te cúsī teyí ni rī jeē siquí rō. Te vēsú cájito rí táca jnūndóho yáha, te íyó ndeyí ni rī te cúsī ndasí ni rī jeē siquí rō.

5 Ná ni jengoo ri Macedonia te tu ní íyo nayúú ni anuá rī, chi sa suhva yí ní iyo jnūndóho jíin rí táca lado. Chi ni iyo jeē ní castáhān jnāhan jíin rí, te ni cayūhu rí sanaa te caca yátá ñáyuu cá candíje. 6 Te Yaā Dios jeē sáha jeē ndúndeyí ni ñayuu cá cucuíhyá ni, ni sáha ya jeē ní candundeyí ni rī, chi ni quiji Tito ni sáha ya. 7 Te ni candusī ni rī, nasūu máá ñn-ni siquī jeē ní quiji de, chi suni jeē ní ndundeyí ni de ni casáha ró. Chi ni castūhún de jeē cáñuhun ni rō coto tucu ró rúhū, jíin jeē cá cucuíhyá ni rō jeē siquí

cuéchi ró, jíin jeē cá canacani ni rō jehē rī. Te jeē yúcuan ní cusī gā ni rī.

8 Te carta jeē ní tají rí nuū rō, vēsú ni sáha jeē ní cacucuíhyá ni rō, te tuá nácani cuíhyá ni rī jeē ní sáha súcuan. Chi vēsú ni cucuíhyá ni rī saá, te vijna te tuá, chi jíin rī jeē jecu-ni quivī ni cacucuíhyá ni rō ni sáha. 9 Te vijna te cúsī ni rī, te nasūu síquī maá jeē ní cacucuíhyá ni rō. Chi cúsī ni rī jeē ní jéjnīñu jeē ní cacucuíhyá ni rō, chi ni sáha jeē ní canacani ni rō siquī cuéchi ró. Chi ni cacucuíhyá ni rō nájnūhun cúní maá Yaā Dios, te nasūu jeē ni sáhuhū rī rohó. 10 Chi núu cúcuíhyá ni yō nájnūhun cúní Yaā Dios, te suu sáha jeē nácani ni yō siquī cuéchi yó te jnama ya yohó, te ma cóo ga jeē nácani cuíhyá ni yō. Te jeē cá cucuíhyá ni ñayuu tu cá candíje, tu jéjnīñu jeē nácani ni i, chi sa jnahnū ndetū i. 11 Te ni cacucuíhyá ni rō nájnūhun cúní Yaā Dios, te vijna te cájito ró náa vāha ni jéjnīñu. Chi ni canacani ndasí ni rō ni sáha, te ni canducú ró jeē quéndōo ndaā rō, te ni cacuxeēn rō nuū tée ni sáha cuéchi, te ni cayūhu ró jeē ní castívī ró núu yā. Yūcuán na te yóhyo ni cacuni rō coto tucu ró núu rī, te yóhyo ni candihvī ni rō ni cacuxeēn rō nuū tée ni sáha cuéchi ún. Te súcuan ni castéén rō jeē tú cuéchi ró, chi tu ní cájéjnūhún ró cuéchi ni sáha tée ún. 12 Te jeē ní tee ri carta un, nasūu máá-ni jeē cúxeēn rī nuū tée ni sáha cuéchi ún, ni nasūu máá-ni jeē cahān rī jehē tée ni ndoho ni sáha de. Chi sa suhva ni tee ri návāha nucūhun ni rō ndese yóhyo ni canacani ni rō jehē rí jito jíinúu Yaā Dios. 13 Jeē yúcuan ní candusī ni rī jeē siquí rō.

Te víhyá gā ni cacusī ni rī jeē ní jini rī jeē cúsī ni Tito, chi ni nduu nayúú ini de ni casáha ró. 14 Chi je ni cahān rī jíin de jeē cúsī ni rī jeē váha ñayuu cá cuu ró, te vijna te tu ní quéndōo ri jnūhun canu jeē siquí rō. Chi nájnūhun ni cajini rō jeē íyó ndaā táca jnūhun ni cacahān rí jíin ró, suni súcuan ni cundaā jnūhun ni cacahān rí jíin Tito jeē cúsī ni rī siquí rō jeē váha cásquícu ró. 15 Te víhyá gā manī de jíin ró vijna jeē ñūhun ni de jeē váha ni cajetáhú ró jeē cahān de, te ni cahíyo yíñuhún ró ni candiso iyo ró núu de. 16 Núu súcuan te cúsī ni rī siquí jeē cucáhnu ndasí ni rī rohó jijnáhan ró.

*Jeē na cúsī ni i socō i cuehē***8**

¹ Hermano, vijna te suni cācuni rī castūhun rī nuū rō jijnáhan ró ndese cuehē jeē váha ni sáha Yaā Dios jín ñáyuu cācandíje cáyucú Macedonia. ² Chi vēsú yōhyo ni jito ndee jnūndóho i, te suni yōhyo ni cacusī ni i jín jnúhun ya. Te vēsú ñayuu ndahú ndasí cācuu i, te yōhyo váha ni cajequin i cuehē xūhun jéē cúu ñayuu ndahú cācandíje. ³ Chi cúu rī testigo jeē ní cacusī ni maá i ni cajēhe i ndésaa ni canda i, te nde vihyá gā ni cajēhe i. ⁴ Chi ni cacahān ndahú ndasí i jín rī jeē na cuáha ri jnūhun chindéé ñáhán i jín yó cuāha i xūhún cuu hermano cándoho ndáhú. ⁵ Te víhyá gā ni casáha i vēsú jeē ní cajeni ni rī, chi xīhna gā ni casocō i maá i nuū Jítoho yō, te sáa te ni cajēhe i maá i sáha i tāca jéē cācuni rī, ndihi ndese nújnahan ni Yaā Dios. ⁶ Te jeē súcuan ni casáha ñayuu Macedonia, te ni castíhvī ni rī Tito jeē na jéé tucu de nuū maá ró, sáha de jeē jīnu jniñu jeē ni squéjéé de jín ró jeē suni caquin rō cuehē xūhún cuu ñayuu ndahú. ⁷ Chi maá ró yōhyo váha casáha ró táca-ni, chi váha cācandíje ró, váha cánacani ró jnúhun, váha cájecūhun ni rō, váha cándíhvī ni rō, váha manī rō jín rī jijnáhan rī. Núu súcuan te suni cánuú sáha váha ró jniñu yáha jéē cuáha ró jéē cúu ñayuu ndahú.

⁸ Te nasūu jéē cuní rī ndacu ri jniñu nuū rō, chi sa cástūhun rī nuū rō ndese yōhyo cācusī ni sava ga ñayuu jéhe i xūhún, te súcuan te cuni rī jeē suni maá ró cācundáhú ndije ni rō ñayuu ndahú. ⁹ Chi je cájini rō ndese yōhyo váha ni Jítoho yō Jesucristo jín yó. Chi siquī jeē ní cundáhú ni yā rohó te ni nasáha ndáhú yá maá yá, vēsú cucá ndasí yá nde andiví núú. Te súcuan ni sáha ya jeē cācucúca ró ndihi jeē ndiso jnūhun ya, siquī jeē ní nasáha ndáhú yá maá yá.

¹⁰ Te jeē váha maá ró cúu jeē na cáchi rī ndese jéni ni rī siquī jniñu yáha. Váha ni caquejéé ró nde jendujin, chi nasūu maá-ni jeē ní cajequin rō xūhún, chi suni yōhyo ni cacusī ni rō sáha ró. ¹¹ Núu súcuan te vijna te sínu ró. Te nájnūhun ni cacusī ni rō ni caquejéé ró jín, suni súcuan na cúsī ni rō sínu ró, chi cuāha ró núu ndese cánevāha

ró. ¹² Chi núu cúsī ni yō cuāha yó, te jétáhú yá núu ndese névāha yó, chi tu jícán yā jeē cuāha yó jéē tu névāha yó.

¹³ Te nasūu jéē cahán rī jeē cáhni ndahú ró máá ró jeē cáa ga nihīn i vēsú jeē ndóo nuū maá ró. ¹⁴ Chi sa suhva jeē ñn cūhva-ni coneváha ró jín i. Chi cánevāha cuehē rō vijna, te cuu cuāha ró jéē cúmanī nuū i. Yūcuán na te núu ndé ñn quivī coneváha i, te suni cuu cuāha i te núu ni cumanī nuū rō. Te súcuan te ñn cūhva-ni coneváha ró jijnáhan ró, ¹⁵ nájnūhun cáhán tutu i siquī ñáyuu jeē ní canastútú maná nde jenahán: Tēe jeē ní nastútú cuéhē, tu ní ndóo ga nuū de. Te tēe jeē ní nastútú jecu-ni, suni tu ní cúmanī nuū de. Achí tutu.

Jnūhun Tito jín úu gā jnáhan de

¹⁶ Te na cútahū rī nuū Yaā Dios jeē ni sáha ya jeē ndíhvī ni Tito jehē rō nájnūhun cándíhvī ni maá rí. ¹⁷ Chi ni jetáhú de jeē ní cacahān rī jín de jeē jeé de nuū rō. Te siquī jeē ndíhvī ni de jehē rō, jeē yúcuan cuájeé de, chi súcuan cúu ni maá de.

¹⁸ Te suni cátají rī ñn hermano cuajeē jín Tito nuū rō. Te tāca grupo ñayuu cācandíje cájejnúhún i tēe un jéé váha jéjníñu de siquī jnūhun jeē jnáma ya yohó. ¹⁹ Te tāca grupo ñayuu cācandíje suni ni catee i jniñu siquī de jeē cáca de jín rī chindéé ñáhán de quindēca de xūhun jín rī jeē ní cajēhe ñayuu. Te jniñu yáha casáha ri návāha cahān ñayuu jeē yóhyo váha Yaā cúu maá Jítoho yō, chi cuni i ndese yōhyo cācusī ni rō cāsocō rō xūhún. ²⁰ Te quingoo ndíndúú rí návāha ni ñn ñayuu ma tēe i cuēchi siquī rī siquī xūhun cāsocō ñayuu. ²¹ Chi ndúcú rí jeē squícu ndaā rī táca jniñu, nasūu maá ñn-ni nuū Yaā Dios, chi suni nuū ñáyuu.

²² Te suni cátají rí ñnga hermano yō cua-jeē de jín ndíndúú tēe yáha. Te tíjni jínu ni steén de jeē yóhyo cúsī ni de ndíhvī ni de táca jniñu. Te vijna chi ndíhvī gā ni de jehē rō, chi cúcáhnu ndasí ni de jeē cāsquícu ró. ²³ Te núu cācajnūhún ñayuu siquī Tito, te achi rō jeē cúu de tēe chindéé ñáhán jéjníñu jín rí nuū rō siquī jnúhun ya. Te uū gā hermano yō yáha, achi rō jeē cācuu de tēe jeē ní catejníñu ñayuu cācandíje, te cáhīyo yíñuhún de nuū Cristo. ²⁴ Núu súcuan te steén rō nuū de jeē cáhīyo manī ndije ró

jíin de, návāha na cúni tāca grupo ñayuu cácanđíje. Te súcuan cuni i jeē tu ní cácusī cāhá ni rī siquī rō.

Siquī jeē cájequin i xūhún cuu tācá hermano

9

¹ Te vijna te tuá jíni ñúhún tee ri nuū rō siquī xūhun jeē cájequin rō cuu tācá hermano cándoho ndáhú. ² Chi je jíni rī jeē cánujnahan ni rō cuāha rō. Te jeē yúcuan máni cúsi ni rī cahán rī jíin ñáyuu Macedonia jeē rohó ñáyuu Acaya, je ni casátūhva rō xūhun ndé jendujin. Te jeē súcuan ni cacusi ni maá rō, te jeē yúcuan cuehē ñayuu Macedonia ni cacondihvī ni i ni cajēhe máa i. ³ Te táji rí ndinúni hermano yáha cuájeē maá de nuū rō xīhna gā, návāha jeē jinú maá rí te ma quéndōo néé rí siquī jnúhun ni cahán rī jeē squícu vāha rō jíin jniñu ún. Chi coo tūhva ndije rō jíin xūhun nájnuhun ni cahán rī jíin i. ⁴ Chi sanaa te jecoo jecu tēe Macedonia jíin rí, te núu cuni de jeē tu cáhīyo tūhva rō, te coo jnúhun canu nuū rī, te suni nuū maá rō jijnáhan rō, chi ni cahán teyí rí jeē cáhīyo tūhva ndije rō. ⁵ Jeē yúcuan ní jeni ni rī jeē cánuú cahán rī jíin táca hermano yáha jecoo de xīhna gā, te sáa te jinú rī, návāha stīhvī ni de rōhó jéē yáchī na cóo tūhva xūhun jéē ní cacahán rō jeē cuáha rō. Te súcuan te coo tūhva siquī jeē vāha ni rō, te nasūu jéē safuerza rī rohó.

⁶ Cocuhun ni rō jnúhun yáha, jeē núu jecu-ni cuāha rō te suni jecu-ni nanihīn rō: Chi tēe jeē tihlí-ni táji, suni tíhli-ni nastútú. Te tēe jeē táji cuehē, suni cuehē nastútú. Achí tutu. ⁷ Tācá in in rō cuāha rō ndésaa ni tee ni rō. Ma cúxi ni rō cuāha rō, chi nasūu fuerza cúu. Chi Yaā Dios manī yā jíin ñáyuu jeē cúsi ni cuāha. ⁸ Te máa Yaā Dios cuu sáha ya jeē nducuehē ndinuū jeē vāha cuu rō jijnáhan rō, návāha níni cone vāha rō ndihī tācá jeē jíni ñúhún rō, te coo sobra gā jeē cuāha rō jéē cúu tācá jniñu vāha. ⁹ Chi súcuan cáhan tutu i siquī tāca ñáyuu jéhe: Ní scáa i ni jēhe i nuū ñáyuu ndahú. Te tācá jniñu vāha sáha i, chi quendōo ní cáni.

Achí tutu. ¹⁰ Te Yaā Dios jéhe ya tata nuū tēe táji, te nihīn de staā jeē cáji de. Te suni súcuan cuāha ya ndinuū jeē vāha cuu

rō, te sáha ya jeē cáyā te nducuehē jniñu vāha cásáha rō. ¹¹ Súcuan cucúca rō jíin táca-ni, návāha cuu cuāha cuehē rō. Te xūhun jéē cuáha rō quihīn nuū hermano cándoho ndáhú, suu sáha jeē nácuatáhú i nuū Yaā Dios. ¹² Chi xūhun jéē cuáha rō núu i, nasūu máa in-ni jeē nihín i jeē cúmanī nuū i, chi suni sáha jeē nácuatáhú ndasí i nuū Yaā Dios. ¹³ Te cahán i jeē yóhoyo vāha Yaā cúu Yaā Dios, chi xūhun jéē ní cajēhe rō stéen jeē vāha cácanđíje rō jnúhun Cristo. Te suni sáha jeē cahán i jeē yóhoyo cújéhnu Yaā Dios siquī jeē ní cajēhe cuehē rō nuū i jíin núu sava ga ñayuu. ¹⁴ Te suni cacān tahu i jehē rō, chi coo manī ndasí i jíin rō siquī jeē yóhoyo vāha ni sáha Yaā Dios jíin rō. ¹⁵ Te na cútahū yō nuū Yaā Dios, chi ni jēhe ya Sēhe ya nuū yō, jeē cúu in tahu cáhnu ndasí jéē ma cánda cuiti yō castūhún ndihī yó.

Jeē ndíso jniñu Pablo cúu de apóstol

10

¹ Te ruhū Pablo, cáhan ndahú rí jíin rō jijnáhan rō jíin modo maá Cristo jeē vītá ni yā te vāha ni yā. Ruhū, chi cacahán rō jeē iyó suchí ni rī núu ndéé rí jíin rō, te núu ndéé jíca rí te tu yúhú cuiti rī cahán nihīn rí jíin rō, cacahán rō. ² Núu súcuan te cáhan ndahú rí jíin rō jeē núu na jéé rī te ma cahán rō jnúhun jeē sáha jeē cuxeēn rī nuū rō. Chi sava rō cacahán jeē casáha rí jniñu ya siquī jeē máni jeē na nihín rī siquī ún. Núu súcuan te íyó tūhva rí cuxeēn rī nuū ñáyuu cacahán súcuan. ³ Chi vésú cácuu rí ñayuu cáyúcú ini ñayiví, te tu cájejnáhan rí modo cájejnáhan ñayuu ñayiví. Chi nájnuhun jeē cájejnáhan rí siquī tācá jniñu neé. ⁴ Chi nasūú ndajniñu ñayiví jéjníñu rí cájejnáhan rí, chi jíin poder Yaā Dios cájejnáhan rí snáa rī tāca fuerza jeē cúu contra siquī yā. ⁵ Súcuan cásnāa rī tāca jnúhun ndúxí jíin jnúhun téyí jeē nducú casi jeē ma cúni ñayuu ndese Yaā cúu Yaā Dios. Te cájesi rí nuū ndihī jeē tú vāha jeē cájeni ni ñayuu, návāha cuandetū i nuū Cristo. ⁶ Te jeē jínu cuandetū vāha máa rō, yúcuan na te coo tūhva rí cuāha rí castigo nuū tāca gā ñayuu jeē tu cájendetū.

⁷ Máa rō jijnáhan rō máni cájeni ni rō modo ñayuu tu cájecūhun ni. Núu na-ni tēe jéni ni de jeē Cristo ni tejniñu ya de, te na

sáha de cuenta jeē suni súcuan ni tejníñu ya ruhū jijnáhan ri. ⁸ Te núu ni cahān teyí rí jín ró jeē ndíso jníñu ri, te tu cúcanu rí sáha. Chi máá Jítoho yō ni tejníñu ya ruhū jijnáhan ri, návāha sáha ri jeē ije ánuá rō jín jnúhun ya, nasūu jēē snāā rī. ⁹ Núu súcuan te tu cúní rī jeē cáni ni rō jeē nducú rí siúhú rí rohó jín carta rī. ¹⁰ Chi cácahān sava rō jēē tāca carta rī yōhyo stíhví ni te nīhin ndácu jniñu, te sa suhva núu ndéé rí jín ró te tu cúndeyí ni rī ndacu nīhin ri jniñu, te suni tu cúu cahān vāvihí rí, achí ró. ¹¹ Te ñayuu cácahān súcuan na sáha i cuenta jeē nájnūhun nīhin cáhān carta rī jeē íne jícá rí, suni súcuan nīhin ndacu ri jniñu nuū rō jeē cóndee rī jín ró.

¹² Te va ma chúndeyí cuiti ni nde ri jeē sajhēnu ri maá rí, nájnūhun cásáha sava tēe un jēē cájehnúhún nde de máá de. Tāca tēe ún chi cáacunéé de jeē cájeni ni de jeē cujēhnu ga de vēsú jnáhan de, te tu cásáha de cuenta ndese cúní Yaā Dios jeē caca de. ¹³ Te ruhū jijnáhan ri, chi cutéyí nde ri maá cúhva-ni jniñu jeē ni jēhe Yaā Dios nuū rī, te ma yáha ga rī. Máá Yaā Dios ni tee cūhva yá ndésaa cúu jeē sáha ri, te máá yá ni jēhe jnúhun jeē ni jínū rī nuū rohó ñáyuu ñuu Corinto. ¹⁴ Jeē yúcuan ná ni jinūcoo ri nuū rō jeē xíhna ñúhún te nasūu jēē ni yáha ri nuū cúhva jniñu ní jēhe ya nuū rī. Chi xíhna gā maá rí ni jinūcoo nuū rō ni canacani ri jnúhun vāha Cristo. ¹⁵ Te tu cácutéyí rí siquī jniñu ní casáha inga tēe, nájnūhun jeē jniñu máá rí cúu. Chi sa suhva cáñuhun ni rī jeē cuehē gā candíje ró, te súcuan te cuu sáha ri cuehē gā jniñu ya mēhñu ró, te níni máá cúhva jeē ni jēhe ya nuū rī. ¹⁶ Yūcuán na te cácuni rī scuité núu ga rī jnúhun jnáma ya yohó núu tāca gā ñuu yūcu ndé yūcuán gá. Te súcuan te ma quívi nduu rī cutéyí rí nuū jeē jé ni canacani inga tēe jnúhun.

¹⁷ Te núu ndé tēe cúní de cutéyí de, na cutéyí de siquī jeē sáha máá Jítoho yō, nasūu siquī jēē sáha máá de. ¹⁸ Chi nasūu tēe jeē jejnúhún máá cúu jeē quéndōo yíñúhún, chi sa suhva tēe jeē jejnúhún máá yá.

Jeē cahán Pablo siquī tēe cánacani jnúhun stáhú

11

¹ Cone cáhnu ni rō jijnáhan ró jeē cahán rī jecu jnúhun modo nájnūhun cácahān ñayuu canéé. Núu súcuan te cáhnu coo ni rō ví. ² Chi cúcuñí rí jehē rō jijnáhan ró, nájnūhun cúcuñí Yaā Dios. Chi cácuu ró nájnūhun ñn sūchi síhí íyó ndoo, te ni sáha ri jeē quijnáhan ró jín Cristo, nájnūhun quijnáhan ñn sūchi síhí jín máñúhún-ni yí i. ³ Te yúhú rí sanaa te cuāha ro jnúhun stáhú tāca tēe un rohó, te siáá rō jnúhun jeē chiñúhún ndáá rō Cristo nde jín ini jín ánuá rō. Chi suni súcuan ni sáha Satanás jín Eva, chi ni quívi ini ñn coo, te ni stáhú un ña jín jnúhun ndíchí stáhú. ⁴ Chi núu quíjicoo tēe nuū rō jeē tu cánacani ndaā de jnúhun Jesús nájnūhun ni canacani ri nuū rō, te va yōhyo vāha cájetáhú nde ró de. Te suni súcuan vāha cájetáhú nde ró núu inga espíritu jín núu inga jnúhun jeē tu quijnáhan jín Espíritu jín jnúhun jeē ní cacandíje ró jēē jnáma ya rohó. ⁵ Te tāca tēe cácañíje ró un jēē cácahān jeē apóstol cujēhnu ga cácuu, tú cuiti jeē cujēhnu ga nde de nuū rī. ⁶ Chi vēsú tu níhín vāha nde ri modo cahān rī, te jécūhun vāha ni rī. Chi jín ndíhi jniñu ni casáha ri mēhñu ró ni castéén cají rí nuū rō jeē súcuan cúu.

⁷ Tu ní jícán rī xūhun núu rō siquī jeē ní nacani ri jnúhun jnáma ya yohó. Te súcuan ni cotecu ndahú rí návāha quendōo vāha ga maá ró jín jnúhun ya. ¿Te va cuēchi ni sáha ri jeē ni sáha ri súcuan, chí naún? ⁸ Chi sava ga grupo ñayuu cácañíje ni quihin ri xūhun jēē ní cajēhe i nuū rī, návāha súcuan-ni nacani ri jnúhun ya nuū rō jijnáhan ró. ⁹ Te ná ni condee rī jín ró te ni ndíhi xūhun rí, te tu ní jícán cuiti rī nuū ní ñn ró. Chi hermano jeē ní quíjicoo ichi Macedonia ni cajēhe de nuū rī jeē cúmaní. Te jeē súcuan tu ní stáhān rī rohó, te ni ma sáha cuiti rī. ¹⁰ Te nájnūhun cúcáhnu vāha ni rī jeē jini rī jnúhun ndaā Cristo, suni súcuan jini rī jeē ma quíhin ri xúhún nuū ni ñn ñayuu ní ndáñúú Acaya, návāha ma cási i jeē cúsiñi ni rī jeē súcuan-ni nacani ri jnúhun ya. ¹¹ ¿Te á siquī jeē tú maní rī jín ró cúu jeē cahán rī súcuan, jeni ni rō, chí naún? Tuú chi máá Yaā Dios jini yā jeē maní rī jín ró jijnáhan ró.

¹² Te sáha ri ná-ni sáha ri, chi ma quíhin ri xūhun ró, návāha casi rī nuū jeē casátéyí tēe

un máa de jeē cácahān de jeē inuú cásáha de jniñu ya jín rí. ¹³ Te tēe ún chi nasūú apóstol ndaā cácuu de, chi máni máá jnúhun stáhú cácahān de, te cásáha de máa de jeē cácuu de apóstol Cristo. ¹⁴ Te tu náa ni yō jíto yó jēe casáha de súcuan, chi je jíní yō jeē suni Satanás násama máa te stáhú jēe sáha máa nájnūhun in ndajéhé Yaā Dios jeē jica jín luz yā. ¹⁵ Te jeē yúcuan suni tu náa ni yō jíto yó jēe tēe cájejniñu nuū Satanás, cásáha de máa de jeē tēe ndaā cácuu de. Te in quiví te nanihīn de siquī jniñu née cásáha de.

Jnūndóho ni ndoho Pablo siquī jeē cúu de apóstol

¹⁶ Inga jínu cáhán rī jín ró jeē ni in ró ma cáni ni rō jeē tēe cánée cúu rí. Te núu súcuan cájeni ni rō, te va cuatáhú nde ró jēe cahán rī nájnūhun tēe cánée, návāha suni cuu cutéyí nde rí jecu nájnūhun cásáha tēe ún. ¹⁷ Jeē cahán rī vijna chi nasūu jēe ní ndacu máa Jítoho yō cúu, chi sa nájnūhun tēe cánée cáhán rī jeē cutéyí nde rí. ¹⁸ Chi cuehē de cásatéyí de máa de modo jeē iyó ini ñayiví, te suni súcuan na satéyí nde rí maá rí núu súcuan. ¹⁹ Te va tēe cáhīyo cájí xíní cácuu nde ró, te jeē yúcuan cúu vāha ni nde ró cuatáhú ró in tēe cánée núu súcuan. ²⁰ Chi va vāha-ni cájendeyí ni rō nuū tēe un jēe casáfuerza de róhó cuajniñu ró núu de, chí cásáha de jeē ndundáhú ró, chí cáquende de ndajniñu ró, chí cásájéhnū de máa de nuū rō, chí ndé cácatu de nuū rō. ²¹ Te vēsú cúcanu nde rí cahán rī, te na cáhán rī jeē tu ní cúndeyí ni nde rí satéyí rí maá rí nájnūhun casáha tēe ún.

Te vijna te núu iyó sava tēe chúndeyí ni de satéyí de máa de, te va suni chunde yí ni nde máa rí núu súcuan. Te va cáhán rī nájnūhun cáhán in tēe cánée. ²² Núu cácutéyí de jeē tēe hebreo cácuu de, te suni súcuan ruhū. Núu tēe Israel cácuu de, te suni ruhū. Núu yucūn Abraham cácuu de, te suni ruhū. ²³ Núu tēe cájejniñu nuū jnúhun Cristo cácuu de, te víhyá gā ruhū. Te va cáhán rī nájnūhun tēe cánée jēe cutéyí rí súcuan. Chi ni caa ga ni sájniñu rí vēsú maá de jíjnáhan de, te ni caa ga ni cacani i ruhū, te cuehē gā jínu ni ine rí vecāa, te suni cuehē gā jínu ni cacuni ñayuu cahni i ruhū. ²⁴ Te jnáhan rí hebreo, uhūn jínu ni

cacani xeēn de ruhū jín cuarta ñi, in cūhva jeē jé yajni cuu rí sáha. ²⁵ Unī jínu ni cacani de ruhū jín yujnu xí, te in jínu ni cajēhe de yuū xinī rí. Unī jínu ni quēe barco jeē ní jica rí siquī jnúhun ya. Te in jecuāa jín in ndiáca ni yosō candá rí nuū cunú ndute mar. ²⁶ Cuehē jínu ni ndoho rí ni jica rí ichi, te ni cācu rí nuū táca yúte, te ni cācu rí nuū táca ñácuīhná. Ni cācu rí nuū ñayuu nación rí jín núu ñayuu ñuu jícá. Ni cācu rí cháha chúcuan ná ni iyo rí ñuu jín rancho jín mar. Ni cācu rí nuū táca jnáhan rí jeē tu iyó ndaā. ²⁷ Ni sájniñu nihin rí te yí ní ndoho rí. Cuehē jínu ni jehni rí maá rí máhná. Ni jī rí sōco, ni jichī rí ndute. Cuehē jínu ni iyo ndite ni rí, ni cuijnu rí, ni cumanī sahma rí

²⁸ Te siquī táca jēe yáha chi iyó gá. Chi ndiquiví ndóho rí jeē nácani ndasí ni rí jehē táca grupo ñayuu cácadíje. ²⁹ Núu in ñayuu tu fuerza ini i, te suni ndóho rí jehē i. Te núu in ñayuu quiví i cuēchi sáha jnáhan i, te ndóho rí jnúhun cúcanu jín jnúhun náxeēn ni. ³⁰ Núu súcuan te núu cánuú cutéyí nde rí, te va cutéyí rí siquī táca jēe steén jeē tú na fuerza ini rí. ³¹ Te Yaā Dios, Yaā cúu Tátá maá Jítoho yō Jesucristo, jíní yā jeē cahán ndaā rí. Te ñi cáni na cáhán ñayuu jeē vāha ndasí Yaā cúu ya. ³² Ná ni iyo rí ñuu Damasco, te gobernador jeē ndácu jniñu ndañúu jeē jnī rey Aretas, ni jeni de soldado ni cacondito táca yéhyí jeē ní condúu ndihyú ñuu ún, chi jnī de ruhū quihīn rí vecāa ni cuni de núu. ³³ Te ni quiví rí chíjī in jīca, te ñayuu cácadíje ni cascúun i ruhū ventana in vehe jeē néne jicá jeē ndihyú ñuu ún. Te súcuan ni cācu rí nuū tēe ún.

Jeē ní jito ndijin Pablo jeē ni stúu ya nuū de

12

¹ Te tu níhín jniñu jeē cutéyí rí. Te vāha ga na cástūhun rí nuū rō siquī jeē ní jito rí jeē ni stúu maá Jítoho yō nuū rí te ni steén ndijin yā nuū rí. ² Jíní rí in tēe cándíje Cristo, te je ni cuu uxī cuūn cuiyā jeē ní sáha ya jeē ní caa tēe un ní jehēn de nde andiví únī. Te tu jíní rí núu ni jehēn rí jín yiquí cúñu rí, chí ní jehēn anuá-ni rí. Máa Yaā Dios cúu jeē jíní. ³ Te jíní rí jeē ní ndonehen

ya ruhū. Te á ní jehēn rī jín siquī cúñu rī, chí ní ndōo, tu jíní rī, chí máá-ni Yaā Dios cúu jeē jíní. ⁴ Chí ní sáha ya jeē ní caa ri ní jehēn rī nde jardín andiví. Te yūcuan ní jini sōho ri tāca jnúhun sáhi ndasí jēē ma cúu castūhun yóhó ñáyuu. ⁵ Te siquī jeē ní sáha ya sūcuan jín rí cúu jeē cutéyí rí, te ma cutéyí rí siquī ndese cúu máá rí. Chí cutéyí rí máni jeē tú na fuerza ini rī. ⁶ Te núu cúní rī cutéyí rí siquī maá rí nuú, te nasūu jēē canéé rí núu sáha ri sūcuan núu, chí ndaā cúu jeē iyó jeē cutéyí rí. Te ní ma sáha ri, chí tu cúní rī jeē cani ní ñayuu jeē kujéhu ga rī vésú jeē ní jito i chí jēē ní jini i jnúhun rī.

⁷ Te tu cúní yā jeē yáha ri cutéyí rí siquī jeē ní stéén ndijin yā jniñu jéhu ndasí un núu rī, te jeē yūcuan ní quiji ñn jnúndóho jeē ndiquín ruhū te stóho ruhū. Te ñn jeē ní jéhe ya jnúhun ní tají Satanás cúu, ñn jeē stóho ruhū, návāha ma yáha ri cutéyí rí. ⁸ Te unī jínu ní cahān ndahú rí jín máá Jítoho yō jeē na téjiyo ya quihín. ⁹ Te ní cahān yā jín rí: Tuú chí tu cúmaní jeē cundáhú ní rī rohó. Chí ñayuu jeē tú na fuerza ini, sáha ri jeē nducuehē gā fuerza maá rí ini i, ní achi yā. Núu sūcuan te cúsiñ ní rī jeē tú na fuerza ini rī, chí sūcuan te nducuehē gā fuerza Cristo ini rī. ¹⁰ Jeē yūcuan cúu jeē cúsiñ ní rī jeē tú na fuerza rī, jín jēē cácahān ndevāha ñayuu jín rí, jín jēē cúmaní nuū rī, jín jēē cájito xeēn i ruhū, jín jēē ndóho ri jnúndóho siquī Cristo. Chí jeē tú na fuerza maá rí, yūcuan sáha jeē nihín rī fuerza maá yá.

Jeē nácani ní Pablo siquī ñayuu cácañdije ñuu Corinto

¹¹ Te va tēe cánéé cúu ri jeē ní sátéyí nde ri maá rí. Te siquī jeē tu cácañdije ró ruhū, jeē yūcuan ní sátéyí rí maá rí. Chí cánuú jēē máá ró cuajnúhún ró ruhū nuú. Chí vésú tú jniñu ri jeē maá rí, te va tu núu cuiñi nde ri nuū tāca tēe un jēē cácahān rō jeē apóstol kujéhu cácuu de. ¹² Chí mēñu ró ní sáha ri tācá jniñu jeē steén jeē cúu ndije ri apóstol. Chí jín cuéhē paciencia ní sáha ri tācá jniñu jéhu jeē steén poder Yaā Dios, jín tāca jniñu jeē nahán ní canaa ní rō ní cajito ró. ¹³ Te tu ní sáha ri jeē núu ga cácuu ró núu tāca gá grupo ñayuu cácañdije, chí máá ñn-ni jeē tu ní stáhān rī rohó jēē cuáha

ro jēē jíní ñúhún rí. Cone cáhu ní rō núu sūcuan ní sáha nde ri falta nuū rō ví.

¹⁴ Te vijna je íyó túhva ri jecondēhe rí rohó vuelta unī. Te suni tú na vé cacán rī nuū rō, chí nasūu ndajniñu ró cúu jeē cuní rī, chí sa suhva jeē quendōo vāha ró jín jnúhun ya. Chí najnúhun sēhe ri cácuu ró, te sēhe chí tu cánuú caya i jeē cúu tátá i, chí sa tátá cánuú cuāha de jeē quendōo vāha sēhe de. ¹⁵ Jeē yūcuan cúsiñ ní rī stíhi ri jeē névāha ri, te nde stíhi ri fuerza maá rí, návāha sáha ri jeē quendōo vāha ánuá rō jijnáhan ró. Te maní gā coo ri jín ró, vésú sanaa te jecu-ni cáhiyo maní rō jín rí.

¹⁶ Te íyó jecu rō cácahān jeē vésú tú na vé ní jícán rī nuū rō, te tēe stáhú cúu ri, chí ní nducú rí modo ndichí nihín rī xūhun ró, cácahān rō. ¹⁷ ¿A tāca tēe ní tají rí nuū rō, á ñn máá de ní stahú de róhó jēē nihín de xūhun ró cuu máá rí, chí naún? Tú cuiñi. ¹⁸ Ni cahān ndahú rí jín Tito jeē jecondēhé de róhó, te ní tají rí ñn hermano ní jeē jín de. ¿Te chí ní stahú Tito rohó ní quihin de xūhun núu rō jeē cuu máá de, chí naún? Tuú chí inuú-ni casáha ndindúu rí, te ñn-ni ánuá ndindúu rí.

¹⁹ ¿Sanaa te cájeni ní rō jeē cahán rī jnúhun yáha návāha quendōo vāha ri jín ró, chí naún? Nasūu sūcuan cúu, chí Yaā Dios jíní yā jeē cahán rī maá-ni jnúhun jeē cuní Cristo. Te ndihi jeē cahán rī chí nducú rí jeē ije ró jín jnúhun ya, ñání maní. ²⁰ Chí yúhú rí jeē núu na jéé rī, te sanaa te cuni rī jeē tu casáha ró jniñu nújnahan ní rī. Te máá ró jijnáhan ró, suni ma nújnahan ní rō ruhū. Chí sanaa te cátejnahán ró, cácuuésún ní rō, cáquití ní rō, cáсандúxí ró, cásjnúhún ró, cácahān rō siquī jnahán ró, cácutéyí ró, cájica néé ró. ²¹ Te yúhú rí jeē núu na jéé tucu ri te cuāha Yaā Dios jnúhun canu nuū rī jeē sūcuan casáha ró. Te sanaa te cucuíhyá ní rī núu íyó cuéhē rō jeē ní casáha cuéchi ichi yátá, te tu nácani ní rō stóo ró jniñu jnéhén jniñu jíca jnéni jín jniñu néé ndasí ní casáha ró.

Saludo jín jnúhun cástūhun Pablo jeē sándihí

13

¹ Yáha cúu vuelta unī jeē jecondēhe rí rohó. Te sándaā yō jniñu najnúhun cáhān

tutu: Jíin jnúhun jeē cahán uū chí únī testigo te cundaā tācá jniñu, áchí. ² Te vijna jeē ine jicá rí te cahán tucu ri nájnūhun ni cahān rī ná ni ine ri jíin ró. Cahán rī nuū ñáyuu ni casáha cuēchi un jíin núū ndihí ró, jeē núu na jéé tucu ri te ma cóo vītá ni rī jíin ró. ³ Te yūcuán cuu prueba jeē cánducú ró, suu núu jendaá jeē cahán rī jíin fuerza Cristo. Chi Cristo tu cúmanī fuerza yā jeē sándaā yā jíin ró, chi stéén yā poder yā mēhñu ró. ⁴ Te vēsú tu ní stéén yā fuerza yā ná ni jihī yā jicā cruz, te vijna chi técu yā jíin poder Yaā Dios. Te nájnūhun ni ndoho máá yá, suni súcuan cándoho ri vijna jeē tu fuerza rī. Te vēsú súcuan te jíin poder Yaā Dios cátecu rī jíin yá jeē cuajniñu ri nuū rō jeē siquí jnúhun ya.

⁵ Coto ndee rō maá ró núu cáhīn nīhin ró jíin jnúhun cácandíje ró yá. Sáha vāha ro cuenta. ¿Te á tu cájini rō jeē ndeé Jesucristo ini anuá rō, te núu ndaā jeē ní cacandíje ndije ró? ⁶ Te ñúhun ni rī jeē suni cá cucáhnu ni rō jeē maá rí cá candíje ndije ri. ⁷ Te cájcān tahu rī nuū Yaā Dios jeē ma sáha ró ni ñn jniñu néé. Te vēsú núu cuajnúhún ró jeē váha ndácu ri jniñu nuū rō, chí vēsú núu ma cuajnúhún ró, te tú na vé sáha, chi máni jeē na sáha ró jniñu ndaā cúu jeē cánducú rí. ⁸ Chi tu jési ri nuū jniñu ndaā, chi sa suhva scáca ri. ⁹ Núu súcuan te cá cusī ni rī núu tú na fuerza maá rí, te núu íyó fuerza maá ró. Te níni cá cān tahu rī jeē na íje ga ni rō jijnáhan ró jíin jnúhun ya. ¹⁰ Te tée ri carta yáha nuū rō nde ná tu jeē rī, návāha núu na jéé rī te tuá jíni ñúhún cuxeēn rī nuū rō. Chi ni jēhe Jitoho yō jniñu ndíso ri yāha jéé sáha ri jeē íje ánuá rō jíin jnúhun ya, nasūu jéé snāā rī.

¹¹ Je ni cahān yō núu súcuan hermano, te na cóo jeē váha jíin ró jijnáhan ró. Te na cóndihvī ni rō íje ró jíin jnúhun ya, te coo ndeyí ni rō. Te na cóo inuú ni rō te coyūcu mánī rō jíin jnáhan ró. Te Yaā ndíso jnúhun ndeyí sī ni jíin jnúhun cundáhú ni, coo ya jíin ró jijnáhan ró. ¹² Te jeē cahán rō jíin táca jnáhan ró, te yíñúhún techūhu ró ndaha i. ¹³ Sándeyí ni rō jijnáhan ró, áchí hermano cá candíje jeē cáyūcu yáha.

¹⁴ Te ñúhun ni rī jeē Jitoho yō Jesucristo na sáha ga yā jeē váha rōhó jijnáhan ró, te

Yaā Dios cundáhú ni yā rohó, te Espiritu Santo condee cáhnu ya jíin ró. Súcuan na cóo. Amén.

CARTA JEE NI TEE SAN PABLO APOSTOL NUU ÑAYUU GALACIA

1 Máá rí cúu Pablo apóstol. Te nasūu ñáyuu ni jeni ruhū ni nasūu ñáyuu ni tájí rúhū jeē nácani ri jnūhun, chi sa suhva máá Jesucristo jíin Tátá yō Yaā Dios, Yaā ní nastécu Jesús mēhñu ndíyí. 2 Te ruhū jíin táca hermano cáyūcu jíin rí yāhá, cátee ri carta yáha cuájeē nuū rohó ñáyuu cácandíje ní región Galacia. 3 Te cáñuhun ni rī jeē Tátá yō Yaā Dios jíin Jítóho yō Jesucristo, na sáha ga yā jeē váha róhó, te sáha ya jeē coo ndeyí coo sñi ni rō. 4 Chi Jesús ni socō yā maá yá jeē ni jíhī yā jeē siquí cuéchi yó, návāha jnama ya yohó núu tāca jēē neé íyó ñayívi yáha, chi súcuan ni nujnahan ni maá Tátá yō Yaā Dios. 5 Jeē yúcuan na cáhán yō jeē yóhoyó luu cújéhnū ya ní cáni. Súcuan na cóo. Amén.

Siquí jeē tuá na inga jnūhun cācu ñayuu

6 Te náhán náā ni rī jíto ri jeē yóhoyó yachí cánducú ró stóo ró Yaā Dios, Yaā ní cana róhó jēē quívi ró ndaha ya siquí jeē cundáhú ni Cristo yohó. Chi ni candiquín rō inga jnūhun jeē sñi cáhán. 7 Te tú cuíti na inga jnūhun jnama yohó íyó. Te cáhīyo jecu ñayuu castáhān i róhó, te cácuni i nasama i jnūhun ndese jnáma Cristo yohó. 8 Te núu ñi ñayuu nacani inga jnūhun nuū rō ndese jnáma ya rohó, te núu tu quíjnahan jíin jnūhun ni canacani ri nuū rō xihna gā, na jnáhnú ndetū ñayuu ún. Te vésú maá rí chí ñi ndajéhé jeē quíji nde andívi nacani inga jnūhun núu, na jnáhnú ndetū. 9 Je ni cahān rī jíin ró, te suni súcuan cáhán tucu ri vijna: Na-ni tēe nacani inga jnūhun nuū rō, te núu tu quíjnahan jíin jnūhun jeē ní cajetáhú ró, na jnáhnú ndetū tēe ún.

10 Te jeē cahān rī súcuan, ¿á ndúcú rí jeē cuajnúhún ñáyuu ruhū, chí Yaā Dios? ¿Chí ndúcú rí jeē cúsi ni ñayuu jíin rí, cájeni ni rō? Núu ndúcú gá rī jeē cúsi ni ñayuu jíin rí, te nasūu mozo Cristo cúu ri núu súcuan.

Ndese ni jinū Pablo cúu de apóstol

11 Te cástūhun rí nuū rō, hermano jijnáhan ró, jēē jnūhun jnáma ya yohó jēē nácani ri, nasūu jēē ní jeni ni maá rí jíin ñáyuu cúu. 12 Chi nasūu ñáyuu ni steén nuū rī, ni nasūu ñáyuu ni sáha jeē ní cutūhva ri, chi sa suhva máá Jesucristo ni steén nuū rī.

13 Chi je ni cajini jnūhun ró ndese ni sáha ri nde saá, ná ni chiñúhún rí sahān jnáhan ri ñayuu hebreo. Te cájini rō jeē yóhoyó ni jito xeēn rī ñayuu cácandíje nuū Yaā Dios, te ni condihví ni rī snāā rī i núu. 14 Te váha ga ni cutūhva ri sahān ún vésú cuehē gā tēe nación rī jeē ní cajehnu jíin rí, chi ni condihví gā ni rī siquí tāca jēē ní cajequin jíi rī. 15 Te vésú súcuan te Yaā Dios je ni nacāji ya ruhū nde ná tu cacu ri, te ñi quívi te ní cusí ni yā ni cana ya ruhū jeē quívi ri ndaha ya, siquí jeē yóhoyó ni cundáhú ni yā ruhū. 16 Te ni steén yā Sēhe ya nuū rī, návāha nacani ri jnūhun ndese jnáma ya ñayuu tāca nación jeē tu jíin jnūhun ya. Yūcuán na te tu ní cájnūhun rí ni ñi ñayuu, 17 ni tu ní jéhén rī ñuu Jerusalén nuū tēe cácuu apóstol xihna gā vésú ruhū. Chi sa suhva ni jehēn-ni ri nde región Arabia, te saá te ni nuhūn tucu ri ñuu Damasco.

18 Yūcuán na te nde ni yáha uní cuiyā, te ni jehēn rī Jerusalén. Te ni jini jnáhan ri jíin Pedro, te ni condee rī jíin de xahūn-ni quívi. 19 Te tu ní jíto ri nuū tāca gá apóstol, chí máá ñi-ni nuū Jacobo ñani maá Jítóho yō. 20 Jnūhun yáha jēē tēe ri cuajeē nuū rō, chí jíin Yaā Dios jeē ndaā cúu.

21 Yūcuán na te ni jehēn rī ní región Siria jíin Cilicia. 22 Te ñayuu cácandíje jeē yíhi ndaha Cristo, jeē cáyucú región Judea, ná tu coto cuíti i nuū rī saá. 23 Chi máni jnūhun-ni ni cajini i cácahān ñayuu: Tēe ni jito xeēn yohó nde saá, vijna chí nácani de jnūhun cándíje yó jēē ní nducú de snāā de nde saá, áchí i. 24 Te ni cacahān i jeē yóhoyó cújéhnū Yaā Dios jeē súcuan ni sáha ya jíin rí.

Jeē ní cajetáhú táca gá apóstol un Pablo

2

1 Yūcuán na te nde nuū uxí cuñ cuiyā, te ni jehēn tucu ri Jerusalén jíin Bernabé, te suni ni jeca ri Tito ni jehēn de jíin rí. 2 Te ni jehēn rī chí máá Yaā Dios ni steén yā jeē jíin ñiñhún quíhīn rī. Te ni candutútú sñi

nene tēe cácujuhnu nuū ñáyuu cácujuhne ún. Te ni castūhun rí nuū de síquī jnúhun jnáma ya yohó jēe nácani ri nuū ñáyuu tãcá nación tu jíní jnúhun ya. Te súcuan ni sáha ri návāha cuajnúhún de jniñu ri, te ma quéndōo cāhá jniñu sáha ri jín jēe ni sáha ri. ³ Te ni tu ní cásáha fuerza de Tito, tēe ni jica jín rí, jeē cóndee jnunī circuncidar de, vēsú nasūu tēe hebreo cúu de. ⁴ Te súcuan ni cundaā, vēsú ni quivicoo jecu tēe stáhú jēe sáha de jeē hermano cácuu de. Te tēe un ní quivicoo de návāha yuhu-ni coto de ndese ni ndulibre yō nuū ley circuncidar síquī jeē yáhi yó ndaha Cristo Jesús. Chi cácuu de jeē squícu tucu yó ley un, nduu tucu yó mozo nuū ley un. ⁵ Te tu ní cájetáhú cuiti rí nuū tēe ún, chi cúní rí jeē quéndōo nihin ró jínáhan ró jín jnúhun jnáma ya yohó.

⁶ Te máá tēe cácujuhnu nuū ñáyuu cácujuhne ún, tuá na inga jniñu jēe ní cándacu de nuū rí. Te máá rí chi tu ní chíhi ri cuenta síquī jeē cácujuhne de, chi suni Yaā Dios tu sáha ya cuenta, chi inuú-ni cúu ndivii tēe nuū yā. ⁷ Chi sa suhva ni cajini de jeē jnúhun jnáma ya yohó, ndíso jniñu ri nacani ri nuū ñáyuu tãcá nación jeē tu cásáha circuncidar, nájnūhun nácani Pedro jnúhun un núu ñáyuu hebreo jeē casáha circuncidar. ⁸ Chi Yaā Dios jeē ní tají Pedro jeē nácani de jnúhun nuū ñáyuu hebreo, suni máá yá ni tají rúhū jeē nácani ri jnúhun nuū ñáyuu tãcá nación tu jíní jnúhun ya.

⁹ Jeē yúcuan, Jacobo jín Pedro jín Juan, ni cajini de jeē Yaā Dios ni jēhe ya jniñu luu yáha nuū rí. Te tēe un cácahān ñáyuu cácujuhne jeē maá de cácujuhne ga. Te ni cajini de ndaha ri jín ndaha Bernabé, jeē ní castéén de jeē cáhīyo maní de jín rí, jín jēe ní cacundaā ni de jeē maá rí quingōo nacani jnúhun nuū ñáyuu tãca gá nación, te máá de jínáhan de nuū ñáyuu hebreo. ¹⁰ Te máá ñ-n-ni jeē ní cajicān de cúu jeē cónahān rí chindéé ñáhān rí ñáyuu cándoho ndáhú, te jniñu ún je ni condihvī ni rí ni sáha ri.

Jeē ni cáhān Pablo nuū Pedro

¹¹ Te ná ni quiji Pedro ñuu Antioquía, te ni cáhān cají rí nuū de, chi ni stívi de jniñu. ¹² Chi nde ná tu quecoo sava jnáhan de hebreo jeē ní tají Jacobo, te yéji de staā jín ñáyuu jeē násūu hebreo cácuu. Yūcuán na te

nuū ní quecoo tēe ún, te ni cusān de jeē tuá yéji de jín i, chi yúhú de jeē cúni tãca tēe un jēe tuá squícu de ley jnáhan de hebreo. Chi áchí ley jeē ma cúu caji de staā jín ñáyuu jeē tu cásáha circuncidar. ¹³ Te sava ga tēe hebreo jeē cácujuhne, suni ni cacujiyo de nuū i, nájnūhun ni sáha Pedro, chi cáyūhú de jeē cúni tēe ún. Te nde máá Bernabé ni cascáhān de ni cujiyo. ¹⁴ Yūcuán na te ni jini rí jeē ní canayūhú de caji de staā jín ñáyuu ún, cúu jeē tuá jica de jín modo jeē cáhān jnúhun jnáma ya yohó. Te ni cáhān rí nuū Pedro, jito jínúu tãca de: Róhó jēe cúu tēe nación yō hebreo, tuá squícu ró ley jnáhan yó hebreo, chi yéji rō jín ñáyuu ún. ¿Te najehē safuerza rō i jeē squícu i ley jnáhan yo hebreo núu súcuan? ni achi rí.

Ñ-ni modo jnáma ya ñáyuu hebreo jín tãca gá nación

¹⁵ Te yóhó chi cúu yó ñáyuu hebreo, te cácahān yō jeē násūu ñáyuu tãca gá nación casáha cuēchi cácuu yó. ¹⁶ Te vēsú súcuan te jíní yō jeē ní ñ-n yó tu quéndōo ndaā yō nuū Yaā Dios jeē squícu yó jniñu ndácu ley Moisés jenahān, chi máá jēe candíje yó jeē Jesucristo ndahva yā cuēchi yó. Jeē yúcuan suni máá yó ni candíje yó Jesucristo, návāha ndahva yā cuēchi yó síquī jeē candíje yó, nasūu jín jēe nducú yó squícu yó ley un. Chi áchí tutu ii: Ni ñ-n ñáyuu ma quéndōo ndaā i nuū Yaā Dios jín jēe nducú i squícu i jniñu jeē ndácu ley, achí.

¹⁷ Te máá yó ñáyuu hebreo, núu cúní yō jeē ndahva Yaā Dios cuēchi yó síquī jeē ni jhī Cristo jehē yō, suu cúu jeē jécūhun ni yō jeē suni ñáyuu casáha cuēchi cúu yó, nájnūhun tãca gá ñáyuu. Núu súcuan ¿te á cuēchi ni sáha yó jeē ni stóo yó ley jenahān ná ni candíje yó Cristo? Tú cuiti jeē súcuan. ¹⁸ Chi sa núu naquihin tucu yó ley jeē ni stóo yó un, te súcuan tēe yó cuēchi síquī máá yó. ¹⁹ Chi ruhū, nájnūhun ni jihī rí ni sáha ley un, te jeē yúcuan má cúu ga ndacu jniñu nuū rí. Te súcuan te cuu cotecu rí jeē sáha ri jeē cúní Yaā Dios. ²⁰ Chi nájnūhun je ni jihī rí jicā cruz jín Cristo, te vijna chi tuá técu rí jeē maá rí, chi máá Cristo cúu jeē técu ini rí. Te jeē técu rí ini ñayivī yáha vijna cúu jeē candíje ri jeē Sēhe Yaā Dios chindéé ñáhān yá ruhū. Chi ni cundáhú ni yā ruhū te ni

socō yā maá yá jehē rī. ²¹ Núu súcuan te tu cúni rī casi rī nuū jnúhun jeē ndáhva Yaā Dios cuēchi yó síquī jeē yóhyo vāha ni yā jín yó. Chi núu jeē quéndōo ndaā yō nuū yā jeē nducú yó squícu yó ley jenahán, yūcuán na te tu ndé jéjníñu jeē ni jíhī Cristo nuú.

Jnúhun ley jín jnúhun cándíje

3

¹ Róhó hermano ñuu Galacia, ¿naun tu cájecūhun ni rō? ¿Ndé téé ni saca núu xinī rō jeē tuá cájetáhú rō jnúhun ndaā? Chi ná ni canacani rī jnúhun ya nuū rō, te cájí ndasí ni cajecūhun ni rō jeē ni jíhī Jesucristo jicā cruz jehē rō. ² ñn-ni jnúhun yáha cájnūhun rí rohó: ¿Ndese ni canihīn rō Espíritu Santo? ¿A jéé ní cacundeyí rō squícu rō jniñu ndácu ley Moisés? Tú cuiti, chi jeē ní cacandíje rō jnúhun jnáma ya rohó jéé ní cajini sōho rō. ³ ¿Ndese cúu jeē tu cájecūhun cuiti ni rō? Chi xīhna gā ni cacandíje rō jéé ni jíhī Cristo jeē jnama ya rohó, te ni canihīn rō Espíritu. Te vijna ¿á cájeni ni rō jeē stóo rō jnúhun ún te fuerza maá rō squícu rō ley un, te cācu rō naún? ⁴ Núu súcuan te tu ndé ní jéjníñu cuiti jeē ní castóho ñayuu rohó síquī jnúhun jnáma Cristo rohó, chi vijna cánducú rō squéndōo rō jnúhun ún. Nacā jeē váha te núu jeē tu ní castóo rō, chi sa cáandíje ndije rō yá. ⁵ ¿Te na síquī cúu jeē jéhe Yaā Dios Espíritu yā nuū rō te sáha ya jniñu jéhnu mēhñu rō? Tu sáha ya síquī jeē cánducú rō squícu rō ley un, chi síquī jeē ní cacandíje rō jnúhun jnáma ya rohó jéé ní cajini sōho rō.

⁶ Abraham ni candíje de jeē sáha Yaā Dios jeē ni jéjñūhun ya, te jeē yúcuan ní ndahva yā cuēchi de. ⁷ Núu súcuan te na jécūhun ni rō jijnáhan rō jéé ñáyuu cáandíje jeē sáha Yaā Dios jehē i, ndívi i yucūn Abraham síquī jeē súcuan cáandíje i. ⁸ Chi nde jenahán je cáhán tutu iī jeē ñáyuu tācá nación tu jín jnúhun Yaā Dios, ndahva yā cuēchi i núu candíje i ún. Te nde ná tu cuu tāca jéé yáha te je ni jejnūhun ya jnúhun vāha yáha nuū Abraham: Jeē rohó cúu jeē quéndōo ndetū ñayuu tācá nación. ⁹ Núu súcuan te ñayuu cáandíje, quéndōo ndetū i jín Abraham, tēe ni candíje jeē ni jéjñūhun ya.

¹⁰ Te sa jnahnū ndetū ñayuu jeē cánducú i quendōo ndaā i jeē jín ley Moisés. Chi súcuan yósó núu tutu iī: Jnahnū ndetū tāca ñáyuu jeē tu squícu ndíhi cuiti jnúhun yósó núu tutu ley, achí. ¹¹ Núu súcuan te cájí cúu jeē ni ñn ñayuu ma quéndōo ndaā i nuū Yaā Dios síquī jeē nducú i squícu i ley un. Chi cáhán tutu: Ñayuu jeē ní ndahva yā cuēchi i, técu i jeē candíje i jeē sáha ya jehē i, achí. ¹² Te ley Moisés tu cáhán jeē cótecu yō ní cáni síquī jeē candíje yó, chi sa suhva cáhán: Núu ndé ñáyuu squícu jniñu yáha, te cotecu i sáha, achí.

¹³ Te Cristo ni jnama ya yohó núu jnúhun cáhán ley jeē jnahnú ndetū yō síquī cuéchi yó, chi máá yá ni ndoho síquī jnúhun jeē jnahnú ndetū yō. Chi yósó núu tutu iī: Tāca ñáyuu condita caa jicā yúnju, jnahnū ndetū i, achí. ¹⁴ Te Cristo Jesús ni jíhī yā jicā yúnju cruz návāha quéndōo ndetū ñayuu tācá nación sáha ya. Chi jnúhun jeē ni jéjñūhun ya quéndōo ndetū Abraham, jinū nuū i. Te súcuan te núu candíje yó jeē ni sáha Yaā Dios jehē yō, te nihīn yō Espíritu jeē ni jéjñūhun ya quiiji.

Síquī ley jín síquī contrato jeē ni jéjñūhun ya

¹⁵ Hermano, na cáhán rī ñn jnúhun ndese cásáha ñayuu ñayívi: Núu ñn tēe sáha de ñn contrato chí ñn acta, te núu je ni cucutú ni sáha de firmar, te ma cúu ga najnanū, ni ma cúu jecosō gā. ¹⁶ Te suni súcuan ni sáha Yaā Dios ñn contrato jeē ni jéjñūhun ya nuū Abraham jín yúcūn de jeē quiiji. Te tu cáhán tutu iī síquī cuehē yucūn de, chi sa cáhán síquī ñn-ni yucūn de, te suu cúu Cristo. ¹⁷ Núu súcuan te jnúhun jeē cahán rī yáha cúu jeē xīhna gā ni sáha Yaā Dios ñn contrato jín Abraham, jeē quiiji Cristo jnama ya yohó, te ni sácutú yá. Yūcuán na te ni yáha cuūn ciento ocō uxī cuiyā, te sáa te ni jéhe ya ley nuū Moisés. Te ley un jéé ní quee cueé gá, ma cúu nacanū contrato un, ni ma cúu casi nuū jnúhun jeē ni jéjñūhun ya jeē jnama ya yohó. ¹⁸ Chi núu jeē jín ley Moisés jnama Yaā Dios ñayuu, yūcuán na te nasūu síquī contrato jeē ni jéjñūhun ya cúu. Chi sa suhva síquī maá jéé ni jéjñūhun Yaā Dios nuū Abraham cúu jeē ní jnama ya de.

19 Núu súcuan ¿te ndese jéjníñu ley Moisés? Jéjníñu chi ni jēhe ya un cuéé gá návāha nastúu cuēchi i. Te ni ndacu jniñu máá-ni nde ná tu quiji Cristo, Yaā cúu yucūn jeē ni jéjnūhun Yaā Dios jeē quíji. Te nde ná ni jēhe Yaā Dios ley un núu ñayuu, te ni tají yá tǎcá ndajéhé yā ni cacastūhun núu Moisés, te Moisés ni nacachī nuū i. 20 Te sǎn cúu jnūhun jeē ni jéjnūhun ya nuū Abraham jeē quíji Cristo, chi máñúhún-ni ya ni jejnūhun, te tu ní jini ñúhún ni ñn jeē nacachī nuū Abraham.

Siquī ndese jéjníñu ley jenahán

21 Núu súcuan ¿te á cúní cahān jeē ley jeē ni jēhe Yaā Dios nuū Moisés, téjiyo jeē ni jéjnūhun ya ún? Tú cuiti jeē súcuan. Chi núu jeē ni jēhe Yaā Dios ñn ley jeē cótecu ñayuu ní cáni sáha, yūcuán na te quendōo ndaā i nuū yā siquī jeē squícu i jniñu ndácu ley un núu. 22 Te tuú chi yósó núu tútu ñi jeē ndihi ñayuu ñayiví, nájñūhun yíndihyū i vecāa chi cáyihí i chíji cuēchi. Te súcuan cúu návāha tǎcá i jeē candíje i jeē ni jíhí Jesucristo jehē i, nihīn i máá jéē ni jéjnūhun ya nuū i siquī jeē candíje i ún.

23 Chi nde ná tu quee jnūhun candíje yó Cristo, te nájñūhun ni yíndihyū yō ni sáha ley jenahán, návāha condetu yó quiví quiji Cristo, Yaā candíje yó. 24 Núu súcuan te ley ni cuu ñn jeē ndító yóhó nájñūhun ñn mozo ndító sūchi lúli, te ni jejniñu nde quiví ní quiji Cristo, návāha candíje yó jéē ni jíhí yā jehē yō, te ndahva Yaā Dios cuēchi yó. 25 Te vijna jeē ní quee Cristo, Yaā candíje yó, te tuá yíhi yó ndaha ley jeē cúu nájñūhun mozo ndító yóhó.

26 Chi ndivii rō cácuu sēhe Yaā Dios siquī jeē ní cacandíje rō Cristo Jesús. 27 Chi tǎca rō jeē ní jendute rō siquī jeē ni quiví rō ndaha Cristo, ni sáha ya jeē ní nduu rō nájñūhun cúu máá yá. 28 Te vijna chi tuá cúu rō ni ñayuu hebreo ni ñayuu griego, ni mozo jeē ní jeen ñayuu, ni ñayuu sájñiñu cuenta máá, ni tēe ni ñahan. Chi ñn na cúu rō núu yā jeē cáyihí rō ndaha Cristo Jesús. 29 Te núu cáyihí rō ndaha Cristo, núu súcuan te yucūn Abraham cácuu ndije rō, te nihīn rō máá tǎhū jeē ni jéjnūhun ya.

4

1 Jeē cahán rī jíin rō jijnáhan rō cúu jeē yáha: ñn sūchi chíi tǎhū, vēsú maá i naquihin ndihi jeē névāha tǎtá i, te núu lulí i chí inuú cúu i jíin mozo. 2 Chi yíhi i ndaha tǎca jéē ndító i jíin jéē ndító ndajniñu i, nde quee quiví jeē ní jeni tǎtá i, te sáa te nihīn i. 3 Te suni súcuan yóhó, chi nde ná tu jecūhun ni yō siquī Cristo te ni cuu yó nájñūhun sūchi lulí, te ni yíhi yó chíji tǎcá costumbre jeē ní cajequin ñayuu ñayiví. 4 Te nde ná ni quee quiví jeē ní jeni Yaā Dios, te ni tají yá Sēhe ya, ni cacu ya chíji ñn ñahan, te ni cacu ya yucūn ñayuu nación hebreo jeē cáyihí chíji ley Moisés. 5 Súcuan ni cacu ya návāha jnama ya yohó jéē tuá quíhi yó chíji ley un, te návāha naquihin Yaā Dios yohó cuu yó séhe ya.

6 Te siquī jeē cácuu rō séhe ya, te ni tají Yaā Dios Espíritu Sēhe ya ni quiví ini anuá rō, te sáha ya jeē cácahān jee rō: Tǎtá maá ná. 7 Núu súcuan te tuá cácuu rō nájñūhun mozo, chi séhe ya cácuu rō. Te jeē cácuu rō séhe Yaā Dios, te suni nihīn rō maá tǎhū jeē ni jéjnūhun ya jeē jíin Cristo.

Jeē nacani ni Pablo siquī ñáyuu cácandíje

8 Chi nde saá, nde ná tu jecūhun ni rō ndese Yaā cúu Yaā Dios, te ni cacuu rō mozo nuū tǎca jéē násūu yáa ndaā cúu. 9 Te vijna chi je cájini rō ndese Yaā cúu ya, te vāha ga na cáhán rī jeē maá yá je jíni yā rohó. Núu súcuan ¿te najehē cácuni rō nandió cóo rō nduu tucu rō mozo nuū tǎcá costumbre ñayuu ñayiví jéē tu níhín jniñu cuiti? 10 Chi máni jeē cánēe ñi rō quiví jíin yóo jíin vico jíin cuíyā. 11 Te yúhú rí sanaa te tu ní jéjníñu cuiti jeē ní nacani rī jnūhun nuū rō.

12 Cáhán ndahú rí jíin rō hermano, jeē na cáni ni rō nájñūhun jeni ni maá rí jeē tuá squícu rī costumbre ñayuu hebreo. Chi ruhū ni nasáha rī maá rí nájñūhun máá rō jeē tu ní cáyihí rō núu ley costumbre ñayuu hebreo. Te tú na vé ni cásáha rō jéē cucuíhyá ni rī nde saá. 13 Chi cájini rō ndese ni cuu ná ni nacani núu rí jnūhun nuū rō ndese jnáma ya yohó. Chi siquī jeē cuhú rī te ni jecuíñi rī ñuu rō ni nacani rī jnūhun. 14 Te vēsú jnūndóho ni cuu jeē ní cocuhū rī, te tu ní cásájéē ni rō nuū rī, ni tu ní cásquéhichí ni rō ruhū. Chi sa ni cajetáhú

ró ruhū nájñūhun jeē cúu ri ñn ndajéhé Yaā Dios, chí nájñūhun jeē cúu ri maá Cristo Jesús. ¹⁵ Nūu súcuan ¿te najehē cúu jeē tuá cácusñ ni rō jíin rí vijna? Chí nájñūhun rí jeē vāha ni casáha ró jéé ní cajnahuhū ni rō nūu jeē cúu te tava rō tinūu vāha máá ró, cuāha ró nduu tinūu rí nuú. ¹⁶ Te vijna ¿á ní nduu ri enemigo rō siquī jeē cachí rí máni jñūhun ndaā nuū rō, chí naún?

¹⁷ Te cáhīyo tēe jeē cándihvī ni siquī rō jijnáhan ró, te nasūu jéé quéndōo vāha ánuá rō, chí sa jeē cácu ni de nasásñn de rōhó jíin rúhū, návāha condihvī ni rō jeē cúu máá de. ¹⁸ Te íyó vāha jeē cándihvī ni de jehē rō, te nūu jeē quéndōo vāha ánuá rō cúu nūu. Chí ní ní jíin ññuhún sáha de jeē vāha rōhó, vēsú nūu íne ri jíin ró chí nūu tú ri íne. ¹⁹ Séhē mánī jijnáhan ró, jeē siquī rohó cúu jeē inga jíin jñáhuhū ni rī, chí nájñūhun ññ nāhan scácu sēhe, súcuan ndóho ri jehē rō. Te suu cúu jeē jñáhuhū ni rī ndétu ri jeē na ndúndaā anuá rō ndacu ró Cristo. ²⁰ Nacā jeē vāha nūu jeē ndeé rí jíin ró vijna ññuhún, návāha cuu cahān manī rī jíin ró. Te tu cújñúní cuiti ni rī ndese ga cúu jeē cáni ni rī siquī rō.

Jñūhun yátá síquī Agar jíin Sara

²¹ Róhó jíináhan ró jéé cácu ni rō quihi ró chíji ley Moisés, cachí nuū rī: ¿A tu ní cájini sōho ró ndese cáhán ley un? ²² Chí cáhán tutu iī jeē Abraham ni íyo uū sēhe yí de. Te ñn i cúu sēhe Agar, ññahan cúu mozo vehe de. Te inga i cúu sēhe ññahan íyó libre, suu ññasihí de Sara jeē ní cuu ññ nāhan numá. ²³ Te sēhe ññahan cúu mozo, ni cacu i nájñūhun cácu táca gá sūchi lúli. Te sēhe ññahan cúu libre, ni cacu i máá síquī jeē súcuan ni jejnūhun Yaā Dios. ²⁴ Te yāha cúu ññ jñūhun yátá, chí ndíndúú ññahan un cúu ññ nájñūhun ndíndúú contrato jeē ni sáha Yaā Dios jíin ññayuu. Máá ññahan nání Agar, cúu ññ nájñūhun contrato ley jeē véji nde yucu Sinaí. Te ññayuu cáyihí chíji contrato ley, cácuu i mozo nuū ley un. ²⁵ Chí Agar cúu nájñūhun ley jeē ni jéhe Yaā Dios xini yucu Sinaí jeē iin nde Arabia. Te cúu ññ nájñūhun Jerusalén, ññuu ññayuu hebreo, jeē íyó vijna, chí táca sēhe ññuu Jerusalén, cácuu i nájñūhun mozo nuū ley un. ²⁶ Te

Jerusalén jeē íyó andiví, chí sa suhva íyó libre nájñūhun Sara. Te yóhó ññayuu cácuandije, nájñūhun sēhe un cácuu yó, chí íyó libre yó nuū contrato ley. ²⁷ Chí suhva yósó nūu tútu iī:

Róhó jeē ní cuu ró ññahan numá jéé tú sēhe ró, na cúsiñ ni rō.

Róhó jéé tu ní jéhnde chíji ró jéé scácu ró, na cána jee ró jéé cúsiñ ni rō.

Chí coo cuehē gā sēhe rōhó jéé ní cuu ró ññahan numá vēsú ññahan jeē jé ní scácu sēhe.

Achí tutu.

²⁸ Hermano, sēhe Yaā Dios cácuu yó, chí súcuan ni jejnūhun ya nuū yó, nájñūhun ni jejnūhun ya nuū Abraham jeē cacu sēhe de Isaac. ²⁹ Te nde saá te inga sūchi ní cacu nájñūhun cácu táca gá ññayuu, ni jito xeēn i Isaac, sūchi ní cacu ni sáha Espíritu. Te nájñūhun ni íyo sáá, suni súcuan cájito xeēn ññayuu táca sēhe Yaā Dios nde vijna. ³⁰ ¿Te ndese cáhán tutu iī? Achí: Quenehen ró ññahan cúu mozo na quihín ññ jíin sēhe ññ. Chí sēhe ññahan cúu mozo, ma nihín i tahū jíin sēhe ññahan libre, achí yá jíin Abraham. ³¹ Nūu súcuan hermano, tu cúu yó nájñūhun sēhe ññahan cúu mozo, chí nájñūhun sēhe ññahan libre cúu yó.

Na cuññi ññhin yó jíin jñūhun jeē ni sáha libre yohó

5

¹ Te Cristo ni sáha libre yā yohó jéé tuá yñhi yó chíji ley Moisés. Nūu súcuan te cuññi ññhin ró jíin jñūhun jeē ni sáha libre yā yohó, te ma ndívicoo tucu ró cuu ró mozo nuū ley un.

² Sáha ró cuenta jijnáhan ró, chí ruhū Pablo cahán rī jíin ró jeē nūu squícu ró ley circuncidar, yūcuán na te tu níhín jñíñu cuiti jeē ní candíje ró jéé ni jíhí Cristo jehē rō. ³ Te inga jíin cáhán ññhin ri jíin táca tēe cánducú cuu circuncidar, jeē nūu súcuan te suni cánuú jéé squícu de ndívií cuiti gā jñūhun cáhán ley Moisés. ⁴ Róhó jéé cánducú ró quéndōo ndaā rō jeē squícu ró ley un, je ni casiáá rō Cristo nūu súcuan. Je ni castóo ró jñūhun jeē ndahva yā cuēchi ró síquī jeē cundáhú ni Yaā Dios rohó. ⁵ Te máá yó chí cájica yó jíin Espíritu, te cácuandije yó jéé ní ndahva yā cuēchi yó, te jeē yúcuu ññuhun ni

yō jeē quendōo ndaā yō quivī cuñi yó núū Yaā Dios. ⁶ Chi yóhó jéē cáyihī ndaha Cristo Jesús, vēsú núū jeē cúu yó circuncidar chí tu cúu yó, tú na vé níhín jniñu. Jeē nihín jniñu cúu jeē candíje yó jeē sáha ya jehē yō. Te yūcuan sáha jeē cundáhú ni yō jnáhan yó.

⁷ Vāha ni cacandíje ró núú. ¿Te ndé ñn ni jesi jeē tuá cájetáhú ró jnūhun ndaā núú súcuan? ⁸ Jnūhun jeē ní cascáhán de róhó, chí tú vēji nuū maá Yaā ní cana róhó ní quivicoo ró ndaha ya. ⁹ Te ma náā ni rō jeē téē cástáhú róhó, jnūhun cástéén de cúu nájnūhun levadura, chí vēsú jecu-ni levadura, te ndáa ndihī ñujen sáha. ¹⁰ Te cúcáhnū ni rī jeē maá Jítoho yō sáha ya jeē ma cándíje ró jíjnáhan ró ñnga jnūhun jeē sñn cáhán. Te máá Yaā Dios cuāha ya castigo tēe jeē sáca núu xinī rō, núu na-ni tēe cúu de.

¹¹ Te ruhū, hermano, núu jeē nácani ga rī jnūhun ley circuncidar nde vijna, te jnáhan rī ñayuu hebreo ma cóto xeēn i ruhū nuú. Chi ma quití ni i jeē nácani rī jnūhun jeē ni jíhī Cristo jicā cruz, núu jeē súni nácani rī jnūhun circuncidar nuú. ¹² Te tāca téē jeē sáca núu xinī rō siquī jnūhun ún, vāha ga na cáhnde gā de máá de núu súcuan.

¹³ Chi máá ró jíjnáhan ró hermano, ni cana ya rohó návaha coo libre rō nuū ley un. Te vēsú iyó libre rō, te ma cáni ni rō jeē cúu quivicoo ró táca cuéchi jeē cúu modo neé cúní maá ró, chí sa suhva na sáha ró máá ró mozo jeē chindéé ñáhán ró jnáhan ró siquī jeē cundáhú ni rō i. ¹⁴ Chi je ni squícu ró ndihī ley núu squícu ró ñn-ni jnūhun ndácu jniñu yáha: Cundáhú ni rō jnáhan ró nájnūhun cundáhú ni rō maá ró, achí. ¹⁵ Te núu máni jeē ndónnda xeēn rō siquī jnáhan ró jéē cuajnáhan ró, te coto ma snáā rō jniñu jeē ni sáha ya mēhñu ró jíjnáhan ró.

Modo cuní ñayuu tu cándíje jíin modo sáha Espíritu

¹⁶ Súcuan cáhán rī jíin ró jíjnáhan ró: Caca ró nájnūhun cúní maá Espíritu, te yūcuán na te ma sáha ga rō modo jeē cuní maá ró. ¹⁷ Chi tāca jéē cuní maá yó, yūcuan jési nuū jeē cuní maá Espíritu. Te jeē cuní Espíritu, jési nuū modo neé jéē cuní maá yó. Te jeē ndíndúú yáha chí cájesi nuū jnáhan, te jeē yúcuan tu cúu sáha ró jniñu vāha jeē cuní rō

sáha ró. ¹⁸ Te núu máá Espíritu steén nuū rō, núu súcuan te tuá cáyihī ró chíji ley jenahán.

¹⁹ Te íyó ndijin tācá jniñu cásáha ñayuu cájica jíin modo neé máá, te yāha cúu: Cásiquí ndéē jnáhan i, cásáha i jniñu jnéhén, cásáha neé ndasí i. ²⁰ Cáchiñúhún i ídolo, cásáha tásí i, cájito uhū jnáhan i, cájejnáhan i, cácuquíñí ni i. Te yachí cáquití ni i, te cándihvī ni i jeē cúu máá-ni i, te cátejnáhan i cásásñn i máá i. ²¹ Te cácuquésún ni i, cájehni i ndīyi, cánajīni i, cásáha i vico neé, jíin táca gá jeē súcuan. Te cáhán níhin rī jíin ró, nájnūhun je ni cahán rī jíin ró saá, jeē ñáyuu casáha súcuan, ma nihín tahú i quivicoo i ñuu nuū ndácu Yaā Dios jniñu.

²² Te ñayuu jeē nduú i jíin Espíritu, tācá jniñu yáha sáha ya jíin i: Jeē cundáhú ni jnáhan, jeē cúsiñi, jeē iyó ndeyí sñi, jeē iyó paciencia, jeē maní ni, jeē vāha ni, jeē squícu vāha, ²³ jeē tu sáha jeē cujéhnū, jíin jéē jési modo jeē cuní maá. Te tú na ley cacān cuéchi siquī rō núu sáha ró táca jniñu yáha. ²⁴ Te ñayuu cáyihī ndaha Cristo, nájnūhun je ni cajehni i modo neé máá i jicā cruz, nde jíin táca jéē ndíyo neé ni i te cútíndí i. ²⁵ Te jeē súcuan ni jēhe máá Espíritu ñn vida jeé núu yō, te suni na cáca yó jíin modo steén Espíritu.

²⁶ Te ma sandúxí yó jéē squití ni yō jnáhan yó, te ni ma cucuésún ni yō siquī jnáhan yó.

Jnūhun jeē chindéé ñáhán yó jnáhan yó

6

¹ Hermano, núu ñn jnáhan ró ni sáha cuéchi, te róhó jéē cájica jíin Espíritu, na náchuhun ichí ró i. Te jíin jnūhun vītá cahán rō jíin i, te suni condito ró máá ró jeē ma cacān ini rō sáha ró táca cuéchi. ² Te chindéé ñáhán ró jnáhan ró núu na vé cúu jeē ndóho i, chí súcuan cúu jeē squícu ró ley Cristo.

³ Chi núu ñn ñayuu jéni ni i jeē ñáyuu teyí cúu i, vēsú nasūu súcuan cúu, te stáhú i máá i núu súcuan. ⁴ Te tācá ñn ñn ró na cóto ndeē rō ndese cáa jniñu sáha ró. Te núu vāha sáha ró, yūcuán na te cuu cusñi rō jíin jéē sáha máá ró, te tu níni jéē scáni jnáhan ró máá ró jíin jnáhan ró. ⁵ Chi tācá ñn ñn yó cánuú squícu yó jíin jniñu ní jéhe ya nuū maá yó.

⁶ Te róchó jeē cascuáha jnūhun vāha ya, na chindéé ñáhán ró tēe cástéén nuū rō jín táca jeē váha cánevāha ró.

⁷ Ma stívī ró canī ni rō jeē cuu sáha ró cuéchi. Chi ma cúu sácata rō nuū Yaā Dios canī ni rō jeē tu sáha ya cuenta. Chi tāca núu ndese sáha ñayuu, suu yūcuán nanihīn i. ⁸ Chi ñayuu jeē sáha i jeē cuní modo neé máá i, nihīn i jeē jnahnú ndetū i sáha modo jeē cuní maá i ún. Te ñayuu jeē sáha jeē cuní maá Espíritu, chi nihīn i jeē cótecu i ní cáni andiví sáha Espíritu. ⁹ Te ma cuíta yó jeē sáha yó jniñu váha núu súcuan, chi jeē quéé maá quívī te nanihīn yō, te núu ma cuíta yó. ¹⁰ Núu súcuan te tāca jínu jeē cúu sáha yó, te na sáha vāha yó jín táca ñáyuu, te hermano yō jeē cávandíje cúu jeē cánuú gá.

Saludo jín jnúhun cástūhun Pablo jeē sándhí

¹¹ Condēhe ró jeē nāhnu letra tēe ri cua-jeē nuū rō jijnáhan ró, chi ndaha máá rí tēe ri yāhá. ¹² Te tēe jeē casáfuerza de róchó cuu ró circuncidar, cásáha de siquī jeē cácuñi de cuajnúhún ñáyuu de. Te cásáha de návāha ma cóto xeēn ñayuu de jeē cánacani de jnūhun jeē ni jhī Cristo jehē yō. ¹³ Te ni máá de jeē casáha de circuncidar, suni tu squícu vāha de ndihī ga ley jenahán. Te cácuñi de jeē cuu ró circuncidar, návāha cuu sátéyí de máá de núu quihīn ró jnúnī circuncidar sáha de. ¹⁴ Te ruhū tu cuní rī satéyí rí maá rí siquī ní ñn jeē yúcuan, chi máá ñn-ni siquī jeē ni jhī Jitoho yō Jesucristo jicā cruz. Chi siquī yúcuan cúu nájnuhun ni jihī rī, chi ni siaá rī tāca jéé iyó ini ñayíví, te suni nájnuhun ñn ndīyí cúu ri nuū ñayíví. ¹⁵ Chi núu yhī yó ndaha Cristo Jesus, te tu níhín jniñu núu cúu yó circuncidar chí tuú. Chi jeē níhín jniñu cúu jeē ní nasájeé yá anuá yō. ¹⁶ Te ñúhun ni rī jeē tāca ró jeē jíca ró jín modo yáha, na sáha ga yā jeē coo ndeyí coo siñ ni rō, te cundáhú ni yā rohó. Te suni ñúhun ni rī jeē súcuan sáha ya jín táca gá i jeē cúu ndije i ñayuu cávandíje Yaā Dios.

¹⁷ Te vijna jín ní gá cuahān yō, cuní rī jeē ma stáhān gā ni ñn ñayuu ruhū. Chi yiqui cúñu rī ndíso seña jeē ni tújī rī ni ndoho ri jeē cúu ri mozo maá Jitoho yō Jesús.

¹⁸ Hermano, ñúhun ni rī jeē na sáha ga Jitoho yō Jesucristo jeē váha róchó jijnáhan ró. Súcuan na cóo. Amén.

CARTA JEE NI TEE APOSTOL SAN PABLO NUU ÑAYUU ÑUU EFESO

¹ Máá rí cúu Pablo, apóstol Jesucristo, chi súcuan ni nujnahan ni Yaā Dios ni tají yá ruhū. Te téé ri carta yáha cuájeē nuū rohó ñáyuu ñuu Efeso, jeē cácuu ró ñáyuu maá yá jeē cácandíje ró Cristo Jesús. ² Te ñúhun ni rí jeē Tatá yō Yaā Dios jíin Jítóho yō Jesucristo, na sáha ga yā jeē váha rōhó, te sáha ya jeē coo ndeyí coo sīi ni rō.

Jeē sáha Cristo jeē quéndōo vāha ánuá yō

³ Na cáhán yō jeē yóhōo cújéhnū Yaā Dios, Yaā cúu Tátá Jítóho yō Jesucristo. Chi ni jēhe ya tāca jēē váha íyó andiví jēē quéndōo vāha ánuá yō, chi yíhi yó ndaha Cristo. ⁴ Chi nde ná tu jecōo ñayiví te ni nacāji ya yohó jēē quiví yó ndaha Cristo, návāha coo ndoo ánuá yō te caca ndaā yō nuū yā. ⁵ Je ni cundáhú ni yā yohó nde saá, te ni tana ya yohó jēē náquihin séhe ya yohó. Te jíin Jesucristo ni sáha ya súcuan, chi ni nujnahan ni yā sáha ya. ⁶ Te jeē yúcuan níní na cáhán yō jeē yóhōo cújéhnū ya, chi yóhōo vāha ni sáha ya yohó jíin táca jēē váha ni yā, síquī jeē yíhi yó ndaha Cristo, Sēhe ya jeē maní yā jíin. ⁷ Te síquī jeē yóhōo vāha ni yā jíin yó, te Sēhe ya un ní jnama ya yohó jēē ni jíhi yā jehē yō, te ni ine cáhnu ni yā nuū cuéchi yó. ⁸ Te ni steén yā jeē cundáhú ndasí ni yā yohó, te ni sáha ya jeē jécūhun ni yō te cundíchi yó jíin jnúhun ya. ⁹ Te ni sáha ya jeē cuni yō iin jnúhun ya jeē ní yisāhí, jeē tu ní sáha ya jeē cuni ñayuu jenahán. Chi súcuan ni tee ni yā nde saá, te nujnahan ni yā sáha ya. ¹⁰ Te yāha cúu jnúhun ún: Nde na quéé tiempo te sáha ya jeē ndíhi jeē yúcu andiví jíin jēē yúcu ñayiví, inuú-ni nduu, quíhi ndaha Cristo.

¹¹ Te síquī jeē yíhi yó ndaha Cristo, te nihīn yō tahū yō, chi je ni nacāji Yaā Dios yohó nde saá. Chi súcuan ni tee ni maá yá, chi sáha ya tāca-ni jeē jé ni cundaā ni yā jeē nujnahan ni yā sáha ya. ¹² Súcuan ni sáha ya návāha máá rí jeē xíhna gā ni cacandíje ri Cristo, caca ndaā rí te súcuan sájéhnū ri yā jeē yóhōo luu cújéhnū ya. ¹³ Te suni máá ró

jijnáhan ró, ni cajini ró jnúhun ndaā jnúhun vāha jeē jnáma ya rohó, te ni cacandíje ró Cristo. Te ni canihīn rō Espíritu Santo jeē ni jéjnūhun ya jeē cuáha ya. Te ndéé Espíritu yā ún ini anuá yō, te cúu ya nájnūhun sello jeē steén jeē cúu yó séhe Yaā Dios. ¹⁴ Te sáha ya jeē jiní ndije yó jēē cucuéé gá te cuáha Yaā Dios tahū yō, nde na sínu ya jniñu jeē jnáma ya ñayuu yā. Te quiví ún cahān yō jeē cújéhnū ya, chi yóhōo luu cújéhnū ya.

Jeē jicán tahú Pablo jehē ñáyuu cácandíje

¹⁵ Te ruhū ni jini jnúhun ri ndese cácandíje ró jēē ni sáha Jítóho yō Jesús jehē rō, jíin ndese cácundáhú ni rō ndíhi ñayuu cáyíhi ndaha Yaā Dios. ¹⁶ Te jeē yúcuan tu jécuiñí rí jeē nácuatáhú rí jehē rō, te jeē jicán tahú rí te tu náa ni rí cacān tahú rí jehē rō. ¹⁷ Chi jicán tahú rí jeē na sáha Yaā Dios jeē jécūhun vāha ni rō te ndundíchi ró jíin jnúhun ya, te cuni gā rō ndese Yaā cúu ya. Chi máá yá cúu Yaā Dios Jítóho yō Jesucristo, te cúu ya Tatá yō jeē lúu ndasí cújéhnū. ¹⁸ Te jicán tahú rí jeē na sándijin gā yā nuū jeē níjnūnī rō, návāha jécūhun ni rō ndese cáa ndíhi jeē cáñuhun ni rō nihīn rō síquī jeē ní cana ya rohó. Te jécūhun ni rō ndese cúca cácuu ró jíin táca jnúhun jéhnū luu ndíso jnúhun ya jeē cúu ñayuu maá yá. ¹⁹ Te jicán tahú rí jeē na jécūhun ni rō ndese yóhōo jéhnū poder yā jeē sájniñu ya ini anuá yohó jēē cúu yó ñáyuu cácandíje. Chi tu ndíhi cuiti poder yā. ²⁰ Te suu poder un cúu jeē ni steén yā ná ni sáha ya iin jniñu jéhnū ga jeē ní nastécu yā Cristo mēhñu ndíyí te ni scúcōo ya lado váha ya nde andiví. ²¹ Te ni jeni ya Cristo síquī táca jēē cújéhnū, jíin jēē ndíso jniñu, jíin jēē jní poder, jíin jēē ndácu jniñu, jíin síquī táca jeē cácahān ñayuu jeē cújéhnū, cúu tiempo yáha, cúu tiempo quiji. ²² Te ni jēhe ya jeē cújéhnū Cristo síquī ndivii. Te ni sáha ya jeē cúnuú yá cújéhnū ya nuū ñáyuu cácandíje. ²³ Te ñayuu cácandíje un cácuu i nájnūhun yiqui cúñu ya, chi iin na cúu i jíin yá te ñúhun chitú yá ini anuá i, chi Yaā jeē ñúhun chitú ní cáhnu-ni cúu ya.

Ni cācu yó síquī jeē ní cundáhú ni yā yohó

2

¹ Te ni sáha ya jeē cotecu rō ní cáni jín Cristo. Chi je ni cacuu ró nájñuhun ndīyi nuū yā, ni sáha cuēchi ró jín jniñu néé ní casáha ró. ² Chi ni cajica ró jín jniñu yúcuan nde saá, ná ni cacondiquin rō jniñu ñayuu ñayīví, ná ni cajetáhú ró núu jexeén jeē ndácu jniñu nuū tāca táchī xeén, te jíca nuū tachí. Te suu cúu jeē scánda ini ñayuu nīhni ni nuū Yaā Dios. ³ Te máá rí jijnáhan ri, suni súcuan ni cajica ri, chi ni casáha ri jniñu néé jéé cuní máá rí, jín táca jéé jicán yiqui cúñu rī, jín jéé cájeni néé ni rī nde saá. Jeē yúcuan suni ni cacuu ri ñayuu jeē nihin castigo xeén jeē cuáha ya nuú, chi inuú-ni ni casáha ri nájñuhun casáha máá i. ⁴ Te Yaā Dios chi yōhyo cuehē ni cundáhú ni yā yohó, te vāha ndasí ni yā jín yó. ⁵ Te náa cúu yó nájñuhun ndīyi nuū yā ni sáha cuēchi yó, te ni nastécu yā yohó jéé cótecu yō ní cáni jín Cristo. Chi siquī jeē yōhyo vāha ni yā cúu jeē ní jnama ya yohó. ⁶ Te ni nastécu yā yohó jéé cótecu inuú yó jín Cristo Jesús, te scúcōo ya yohó jín yá nde andiví. ⁷ Súcuan ni sáha ya návāha ní gá tiempo jeē quiji, te stéén yā ndese yōhyo manī yā jín yó, jín ndese vāha ni yā jín yó jeē siquī Cristo Jesús. ⁸ Chi siquī jeē yōhyo manī yā jín ró cúu jeē ní jnama ya rohó, chi ni cacandíje ró jéé sáha ya jehē rō. Te nasūu siquī jeē ní casáha máá ró cúu, chi tahū jeē ni jéhe ya nuū rō cúu. ⁹ Chi tú na jniñu vāha ní casáha yó jéé jnama ya yohó, te jeē yúcuan ni in yó ma cúu sátéyí yó máá yó. ¹⁰ Chi cúu yó in jniñu luu jeē ní nasáha máá yá, chi ni nasáha ya yohó jéé cundúú yó jín Cristo Jesús, návāha sáha yó táca jniñu vāha jeé jé ni sátūhva Yaā Dios jeé sáha yó.

Jeé sáha Cristo jeé ndívi yó núu jnúhun manī Yaā Dios jín yó

¹¹ Núu súcuan te na núcūhun ni rō ndese ñayuu ni cacuu ró ndé saá. Chi tu ní cácuu ró ñáyuu hebreo, chi sa suhva ni cacuu ró ñáyuu tācá nación jeé tu jín jnúhun ya. Te ñayuu hebreo jeé casáha circuncidar yiqui cúñu, ni cacahān i jeé cácuu ró ñáyuu tu sáha circuncidar. ¹² Na núcūhun ni rō jeé ndé saá tu ní cáhīn ró jín Cristo, te ni cacuu ró ñáyuu ñuu jicá núu nación Israel. Te tu ní cájini rō tāca jnúhun contrato jeé ni jéjñuhun Yaā Dios. Te tu ní íne Yaā Dios jín ró ñayīvi

yáha, te tú na vé jeé vāha ní cáñuhun ni rō jeé cóo. ¹³ Te vijna chi ni ndívicoo ró núu Yaā Dios jeé tu ní cájini rō jnúhun ya nde saá, chi ni quívicoo ró ndaha Cristo siquī jeé ni jhī yā jehē rō. ¹⁴ Chi Cristo cúu Yaā sáha jeé ndúmanī jnáhan yó. Chi ni sáha ya jeé ñáyuu hebreo jín ñáyuu tāca gá nación, ni nduu yó in na nuū yā. Chi ni sáha ya jeé tuá jito uhū jnáhan yó, te suu cúu nájñuhun jeé ní jenu ya in jeé ndihyú sava mēhñu yó jeé sásin yohó. ¹⁵ Chi ni socō yā máá yá ni jihī yā, te súcuan ni ndahva yā ley jenahán jín jnúhun ndácu jniñu jín jéé tajnúní ndiso máá. Chi ley un ní sásin ñayuu hebreo jín táca nación jeé tu ní jín i ley un. Te ni nasquíjnan ya ndihī yó jéé ní nduu yó in na nación jeé, yhi yó ndaha ya. Te súcuan ni sáha ya jeé ní ndumanī jnáhan yó. ¹⁶ Te jín jéé ni jihī yā jicā cruz, te ni snāā yā jnúhun cájito uhū jnáhan ñayuu hebreo jín táca gá nación. Te ni sáha ya jeé ndívicoo yó núu jnúhun manī Yaā Dios jín yó, te ni nduu yó in na ñayuu máá yá.

¹⁷ Chi ni quiji Cristo ni nacani ya jnúhun vāha nuū tāca ñáyuu jeé na ndívi i nuū jnúhun manī yā jín i, cúu rōhó ñáyuu tu ní cájini jnúhun ya, te suni ñayuu jnáhan ri hebreo jeé cájini jnúhun ya. ¹⁸ Te vijna te siquī jeé ni jihī Cristo, te ndihī yó, cúu ñayuu hebreo chí ñáyuu tāca gá nación, cuu quívicoo yó núu Tatá yō Yaā Dios, te in-ni Espíritu yā sáha. ¹⁹ Núu súcuan te tuá cúu ró nájñuhun ñayuu ñuu jicá ni ñayuu tatú, chi in na ni nduu ró jín ñáyuu ñuu máá yá. Te jnáhan ñayuu vehe Yaā Dios cácuu ró. ²⁰ Te cácuu ró nájñuhun in in parte in vehe cáhnu jeé cuvāha siquī cimientu, te cimientu un cúu jnúhun Cristo jeé ní canacani tācá apóstol jín téé ni canacani jnúhun ya jenahán. Te máá Jesucristo cúu nájñuhun yuū cánuú gá jeé yítuu vehe. ²¹ Te ní vehe cuvāha vāha siquī máá yá, cúsúcún cuáhān, cúu in templo i jeé ndeé máá Jítoho yō. ²² Te suu cúu máá ró jijnáhan ró, chi ndúú ró jín Cristo, te inuú-ni sáma ya rohó jín táca ñáyuu cacandíje, cácuu ró nájñuhun in in yuū templo. Te suu cúu jeé ndeé Espíritu Yaā Dios ini rō nájñuhun ini in templo.

Jeé ndiso jniñu Pablo nácani de jnúhun nuū

ñáyuu tu jíní jnūhun Yaā Dios

3

¹ Te jeē yúcuan ruhū Pablo, jícán tahu rī nuū yā. Te íne ri vecāa siquī jeē ní nacani ri jnūhun Cristo Jesús nuū rohó ñáyuu tācá nación jeē tu ní jíní jnūhun ya nuū. ² Te jíní rī jeē ní cajini ró jnūhun ndese yōhyo vāha ni sāha Yaā Dios jíní rí, chi ni jēhe ya jniñu nuū rī jeē nácani ri jnūhun vāha ya nuū rō. ³ Te jnūhun ya jeē ní yisāhí, ni nastúu ya nuū rī, nájñūhun je ni tee ri jecu siquī un núu rō. ⁴ Te núu na cáhu ró te cuu jecūhun ni rō jeē ní jini vāha ri jnūhun Cristo jeē ní yisāhí un. ⁵ Te tu ní stéén yā jnūhun sāhí un núu ní ññ ñayuu tāca cuiyā ní quiiji ichi yátá. Te vijna cúu jeē steén ndijin yā jíní Espíritu yā nuū tācá apóstol jeē ní jeni ndoo ya, jíní núu téé cánacani jnūhun ya. ⁶ Te súcuan cáhán jnūhun ní yisāhí un: Ñayuu tāca gá nación, ññ cáhnu-ni nihīn i tahu i jíní ñáyuu hebreo, chi ni cacandíje i jnūhun jeē jnáma ya i. Te ñnuú-ni ni nduu ndihí i, te ññ cáhnu-ni quéndōo ndetū anuá i sāha Cristo, nájñūhun ni jejnūhun Yaā Dios. ⁷ Te jeē siquī jnūhun yáha cúu jeē ní jeni ya ruhū jeē nácani ri jnūhun nuū rō. Chi ni cutahū rī jniñu luu yáha jeē ní jēhe ya nuū rī. Te jíní poder yā ni sāha ya un jíní rí. ⁸ Te ruhū chi cúu ri tēe núu ga nuū tāca ñáyuu núu ga jeē yíhi ndaha ya. Te vēsú súcuan te nuū maá rí ni jēhe ya jniñu luu yáha jēe nácani ri jnūhun vāha ya nuū ñáyuu tācá nación jeē tu jíní, ndese yōhyo cúcá yó ndihí jeē ndíso jnūhun Cristo, jeē ma cánda cuiti yō jecūhun ni yō. ⁹ Chi ni jeni ya ruhū jeē steén cají rí jeē suni maá i jnama ya i. Te yúcuan cúu jnūhun Yaā Dios jeē ní yisāhí ndé jenahán ndasí, chi maá yá ni sāha ndihí-ni. ¹⁰ Te súcuan ni sāha ya jíní ñáyuu, návāha vijna te tāca jēe cácujeñu jíní jēe ndíso jniñu nuū sucún, na cúni ndese ndíchí ndasí Yaā Dios. Chi ndíchí ndasí ni sāha ya jíní ñáyuu cácujeñe. ¹¹ Chi súcuan ni tee ni yā nde ññ cáni, te ni sāha ya jeē Jítoho yō Cristo Jesús ni squícu ya ún. ¹² Te siquī jeē ni sāha Cristo, te vijna te jíní ndije yó jēe cúu quívi yó cáhán yō jíní Yaā Dios siquī jeē candíje yó Cristo. ¹³ Núu súcuan te cáhán ndahú rí jíní ró jeē ma cucuíhyá ni rō siquī

jnūndóho jeē ndóho ri jehē rō. Chi suu sāha jeē quéndōo ndetū anuá rō jijnáhan ró.

Cristo yōhyo cúndáhú ni yā yohó

¹⁴ Te jeē yúcuan cúu jeē jécuiñi yití rí nuū maá Yaā cúu Tátá Jítoho yō Jesucristo. ¹⁵ Te maá yá cúu Tátá nuū ndihí ñayuu yā jeē yúcu andiví jíní ñáyiví. ¹⁶ Te jícán tahu rī jeē jíní poder yā jeē cujéñu ndasí yá, na sāha ya jeē íje vāha ni rō jíní jnūhun ya, te coo fuerza ini anuá rō, sāha Espíritu yā. ¹⁷ Te jícán rī jeē candíje ñihin ró Cristo, návāha condee yā ini anuá rō, te jññ vāha ró jnūhun jeē cundáhú ni yā rohó, te cuiñi ñihin ró jíní. ¹⁸ Te súcuan te cuu jecūhun vāha ni rō jíní tāca ñáyuu candíje, ndese cáca jnūhun cúndáhú ni Cristo yohó. Chi yōhyo jíté, cáni, cúnu, súcún jnūhun ún, chi yōhyo cuehē sāha. ¹⁹ Te jícán rī jeē na cúni vāha ró ndese cúndáhú ni yā yohó, vēsú tu cúu cuiti jecūhun ni yō ndihí ndihí. Te súcuan te cundúu ró jíní Yaā Dios jeē cunuú yá ini anuá rō.

²⁰ Núu súcuan te na cáhán yō jeē yóhyo luu cújéñu ya, chi maá yá cúu Yaā iyó poder jeē sāha ya jeē vāha ndasí gá vēsú ndihí jeē jícán yō chí jēe jéni ni yō. Te sāha ya un jíní poder yā jeē sájniñu ini anuá yō. ²¹ Te na cáhán yō jeē yóhyo luu cújéñu ya jeē siquī jeē ni sāha ya jehē ñayuu cácujeñe jíní jēe siquī Cristo Jesús. Te súcuan na cóo nde ññ cáni cuiti tiempo jeē quiiji. Amén.

Ñnuú-ni cácuu ñayuu cácujeñe sāha Espíritu

4

¹ Te ruhū jeē íne ri vecāa siquī jnūhun maá Jítoho yō, cáhán ndahú rí jíní ró jeē na cáca ndaā rō nájñūhun cánuú caca ró jēe cácuu ró ñáyuu ni cana ya. ² Te níni na cóo suchí ni rō, te coo vitá ni rō. Te na cóo paciencia rō, te cuandeyí ni rō jíní jnáhan ró jēe cundáhú ni rō i. ³ Te na cóndihvī ni rō coyūcu manī ñnuú ró, sāha maá Espíritu nuū véji jnūhun manī ni. ⁴ Chi ññ-ni cácuu ñayuu maá yá, te íyó ññ-ni Espíritu, te ñnuú cáñūhun ni yō jeē cóo jeē vāha siquī jeē ní cana ya yohó. ⁵ Te íyó ññ-ni Jítoho yō, jíní ññ-ni jnūhun cándíje yó, jíní ññ-ni jnūhun jéndute yó. ⁶ Te íyó ññ-ni Yaā Dios jeē cúu Tátá yō jijnáhan yó. Te maá yá cujéñu siquī ndihí yó, te sájniñu ya jíní ndihí yó, te ndéé yá ini ndihí yó.

7 Te tācá ñn ñn yó ní cacutahū yō sñn sñn jniñu sáha yó, núu ndese ni tana Cristo cūhva tahū un núu yō. 8 Jeē yúcuan cáhán tutu iñ:

Ná ni ndaa ya cuanuhun yā andiví, te ni stutú yá cuehē jeē yñdihyū, cuahān yā jín.

Te ni saja ya tahū nuū tāca ñáyuu.

9 Te jeē cahán tutu jeē ní ndaa ya, suni cúní cahān jeē xīhna gā nde andiví ni cuun ya nde nuū cunú gá ñayiví yáha. 10 Te Yaā ní cuun, suni máá yá cúu jeē ní ndaa nde nuū sucún gá andiví, návāha cuhun chitú yá ní cáhnu-ni. 11 Te ni tana ya sñn sñn jniñu sáha ñayuu. Chi ni jeni ya sava ñayuu cuu apóstol, te sava ga nacani jñūhun ya, te sava ga scándíje ñayuu jñūhun jeē jnáma ya i, te sava ga coo pastor condito ñayuu cá candíje, te sava ga steén. 12 Súcuan ni jeni ya ñayuu maá yá jeē cuajniñu i nuū yā, návāha cuehnu ga ñayuu Cristo jín jñūhun ya. 13 Te súcuan coo nde nduu ñnuú-ni ndihí yó jín jñūhun cándíje yó, te cuni vāha yó ndese Yaā cúu Sēhe Yaā Dios. Te súcuan ije vāha yó ndé na cúchitú yó jín ndihí jñūhun jeē ñūhun chitú iní Cristo. 14 Te súcuan te ma cóo ga yō nájñūhun sūchi lúlí jéē yachí jeni yāha jeni yūcuán ni i, ni ma quívi nduu yō cháha chúcuan jín sñn sñn jñūhun jeé cástéén tēe stáhú jéē yóhyo ndito de squívi de yóhó nuū jñūhun stáhú. 15 Chi sa suhva na cóndiquñ yō jñūhun ndaā jín jñūhun cundáhú ni. Te súcuan cuehnu yó jín táca jniñu cúní Cristo, Yaā cujéhnu nuū ñáyuu cácuu nájñūhun yiquí cúñu yā, chi ñn na cúu i jín yá. 16 Te sáha ya jeē nduu ñnuú ni tācá i jeē cáhije i cuahān i, chi cácuu i nájñūhun ñn na yiquí cúñu jín yá. Te jéjñiñu vāha tācá ñn ñn i ndese ni nihñ jniñu i, návāha scuéhnu jnáhan te ije jínáhan jín jñūhun cundáhú ni.

Jeē ndújeé yó sáha Cristo

17 Núu súcuan te yāha cúu jñūhun cáhán rī jín ró, te jeē achí Jítóho yō cúu jeē cahán ññin ri jín ró: jeē ma cáca ga rō nájñūhun cájica sava ga ñayuu jeē tu jíní i ndese Yaā cúu Yaā Dios, chí cájica i jín jñūhun jeē jeni sáá-ni máá i. 18 Te íyó nee nuū jeē níjñūní i, te tu névāha i Espíritu jeē véji nuū Yaā Dios, chí tu jíní i jñūhun ya, siquí jeē níñni ni i. 19 Te tuá cúcanu i, chí ni quívicoo i jín

jniñu néé ndasí, te ndíhví ni i sáha i tācá jniñu jnéhén. 20 Te róhó jínáhan ró, nasūu súcuan ní cáscuáha ró jñūhun Cristo, 21 te núu ndaā jeē ní cajini ró jñūhun ya jín jéē ní cacutūhva ró jín jñūhun ndaā Jesús. 22 Núu súcuan te na stóo ró táca jniñu ní casáha ró ichi yátá, ná ni casáha ró modo cuní maá ró jeē ní cujnéhén ánuá rō ni sáha jniñu néé stáhú jéē ní ndiyo ni rō. 23 Te na ndújeé ánuá rō jín jéē níjñūní rō. 24 Te na cuáha ró jñūhun ndujeé ró, chí nasáha Yaā Dios rohó nájñūhun cúní maá yá jeē cáca ndaā rō jín jniñu vāha jniñu ndoo.

25 Núu súcuan te ma cahán gā rō jñūhun stáhú, te na cáhán ndaā rō jín táca jnáhan ró, chí ñn-ni cácuu ndihí yó.

26 Núu véji ñn jeē squítí ni rohó, te ma quití neé ni rō. Te ma quití ni rō nde quēe niāndii. 27 Ma cuáha ró jñūhun jeē sáha jexeén jeē quívi ró cuéchi.

28 Ñayuu ní sacuíhná, ma sacuíhná gá i, chí sa suhva na sájniñu i, te na cócuu i jín jniñu vāha, návāha nihñ i jeē cuáha i nuū ñáyuu cúmaní nuū.

29 Ni ñn jñūhun néé ma cahán rō, chí sa suhva na cáhán rō jñūhun vāha jeē scuéhnu jnáhan jín jñūhun ya, te sáha jeē quéndōo vāha ñayuu jini sōho. 30 Ma sáha ró cuéchi návāha ma cucuíhyá ni Espíritu Santo Yaā Dios. Chi Espíritu yā cúu nájñūhun sello jeē steén jeē cúu yó séhe Yaā Dios, nde quiiji quívi jínu jniñu jeē jnáma ya rohó.

31 Te na siáá rō tāca jñūhun cútucu ni, jín jñūhun xeēn ni, jín jñūhun quítí ni, jín jñūhun cáhán ndevāha, jín táca jñūhun néé.

32 Chi sa suhva na cóo vāha ni rō jín jnáhan ró, te cundáhú ni rō i. Na cóne cáhnu ni rō nuū jnáhan ró, nájñūhun ni ine cáhnu ni Yaā Dios nuū rō siquí Cristo.

Ndese cánuú caca ndaā sēhe Yaā Dios

5

1 Núu súcuan te na ndácu ró Yaā Dios, chí cácuu ró séhe ya jeē maní yā jín. 2 Te níni cundáhú ni rō jnáhan ró, nájñūhun ni cundáhú ni Cristo yohó, te ni socō yā maá yá jehē yō, ni cuu ya nájñūhun ñn londe jeē jeén asñ nuū Yaā Dios jeē ni sócō yā maá yá.

³ Te vijna jeē cácuu ró séhe Yaā Dios, te ni ma sáha ró ni ma ndájnūhun ró síquī jnūhun jíca jnéni, ni tācá jniñu jnéhen, ni jnūhun ndíyo ni ndajniñu. ⁴ Te ni ma cahán rō tāca jnúhun sáha jeē cúcanu jnáhan, ni jnūhun cánéé íi, ni jnūhun jeē tu ndé jéjníñu cuiti. Chi tācá un tu níhín jniñu. Chi sa suhva na nácuatáhú ró nuū Yaā Dios. ⁵ Chi je cájini rō jeē ní ññayuu cájica jnéni, ni jeē sáha jniñu jnéhen, ni jeē ndíyo ni tācá ndajniñu, ma níhín tahu i quívi i ndaha Cristo jíin Yaā Dios jeē ndacu ya jniñu nuū i. Chi tāca jéē ndíyo ni i cúu nájnūhun ídolo i jeē cáchiñúhún i. ⁶ Te coto ró jéē ma stahú ni ññ i róhó jíin tāca jnúhun cáhán saá ni i, chi síquī tāca jnúhun néé yáha cúu jeē quíji castigo xeēn Yaā Dios nuū tāca ñáyuu níhni ni. ⁷ Ma quívi nduu rō jíin i núu súcuan.

⁸ Chi tāca quívi saá ni coyūcu ró nájnūhun nuū néē, te vijna chi cáyūcu ró jíin luz maá Jítóho yō, cúu jeē cájecūhun ni rō síquī yā. Te na cáca ró nájnūhun cájica ñáyuu jeē steén luz yā ini anuá i. ⁹ Chi jniñu sáha luz yā jíin yó cúu tācá jniñu manī ni, jniñu ndaā, jíin jniñu váha. ¹⁰ Scuáha ró sáha ró tāca jniñu jeē nújnahan ni maá Jítóho yō. ¹¹ Te ma quívi nduu rō jíin tāca jeē tu níhín jniñu jeē casáha ñáyuu cáyūcu nájnūhun nuū néē. Chi sa suhva steén rō nuū i jeē tú váha casáha i. ¹² Chi cúcanu yō cahán yō síquī jniñu casáha yuhu maá i. ¹³ Te luz yā sáha jeē nátūu tācá jniñu néé casáha i. Te núu cuatáhú i luz yā te caca i jíin luz ún. ¹⁴ Jeē yúcuan cáhán tutu: Róhó jeē cúhuun ni, jeē nájnūhun quíxi, natahū ni,

te quenda ró méhñu ñáyuu jeē cácuu nájnūhun ndíyi.
Te Cristo steén yā luz yā ini anuá rō.
Achí tutu.

¹⁵ Núu súcuan te coto váha ró ndese caca yúcún ró. Te ma cáca ró nájnūhun cájica ñáyuu canéé, chi caca ró nájnūhun cájica tēe ndíchi. ¹⁶ Ma snāā rō tiempo, chi condihví ni rō jíin jniñu ya, chi íyó cuéhē cuēchi quívi yáha. ¹⁷ Núu súcuan te ma cóo néé xínī rō, chi sa suhva na jécūhun váha ni rō na jniñu nújnahan ni maá Jítóho yō. ¹⁸ Te ma náji ni ró, chi tīvi ró sáha. Chi sa suhva na ndúcú ró jeē cúnuú Espíritu Santo ini anuá rō. ¹⁹ Te cahán rō jíin jnáhan ró jíin salmo jíin himno,

yaa íi jeē cahán jnūhun ya. Te ini anuá rō cahán rō jíin yá jíin táca yaa, chi yūcuan cúu jeē jíta ánuá rō nuū yā chíñúhún ró yā. ²⁰ Te níni nacuatáhú ró síquī tācá-ni nuū Tatá yō Yaā Dios te ndacunehen ró síhví máá Jítóho yō Jesucristo.

Ndese squícu vāha ñáyuu cácadíje nuū jnáhan i

²¹ Te cuatáhú ró nuū jnáhan ró síquī jeē cáhíyo yíñúhún ró nuū Cristo.

²² Róhó ñahan cácuu ñasihí, cuatáhú ró nuū yíi ró, nájnūhun jétáhú ró nuū Jítóho yō. ²³ Chi yíi cújéhnú nuū ñasihí, nájnūhun cújéhnú Cristo nuū yohó ñáyuu cácadíje, jeē cácuu yó nájnūhun yíqui cúñu yā, chi ññ na cúu yó jíin yá. Te máá yá jnáma ya yohó. ²⁴ Chi nájnūhun ñáyuu cácadíje cájetáhú i nuū Cristo, suni súcuan ñasihí cuatáhú ña ndihí jeē cahán yíi ña.

²⁵ Te róhó tēe cácuu yíi, cundáhú ni rō ñasihí ró, nájnūhun ni cundáhú ni Cristo yohó ñáyuu cácadíje, te ni socō yā maá yá jehē yō. ²⁶ Súcuan ni sáha ya jeē cóo ndoo coo íi yō nuū yā, te ni nacate ya anuá yō jíin jnúhun ya jíin jéē ní jendute yó. ²⁷ Te yohó ñáyuu cácadíje chi cuiñi yó núu yā, te luu cujéhnú yó. Te ma cóndee cuēchi ánuá yō, ni jeē tú luu, ni ññ jeē súcuan, chi sa suhva coo ndoo coo íi yō nuū yā, te tú na vé cumaní gā. ²⁸ Te nájnūhun Cristo ni cundáhú ni yā ñáyuu cácadíje, suni súcuan cánuú jéē cundáhú ni yíi ñasihí de, nájnūhun cundáhú ni de máá de. Chi tēe cundáhú ni de ñasihí de, máá de cundáhú ni de. ²⁹ Chi ni ññ tēe tu jíto uhū de máá de, chi sa suhva yéji de te ndíto yúcún de máá de. Te suni súcuan sáha Cristo jíin yohó ñáyuu cácadíje nuū yā. ³⁰ Chi cácuu yó nájnūhun yíqui cúñu yā, te ññ ññ yó cácuu nájnūhun ññ ññ parte yíqui cúñu yā. ³¹ Te suu cúu nájnūhun tēe jeē stóo de tátá de náná de, te quíjnahan de jíin ñasihí de, te ññ na cúu ndíndú de. ³² Yóhyo jéhnú jnūhun sáhi yáha, te cáhán rī jeē ñáyuu cácadíje suni súcuan quíjnahan i jíin Cristo. ³³ Te suni súcuan ná ññ ná ññ ró cundáhú ni rō ñasihí ró, nájnūhun cundáhú ni rō maá ró. Te ñasihí na cúu yíñúhún ña jíin yíi ña.

6

¹ Te róchó séhe jíjnáhan ró, cuandije ró núū tatá rō nuū naná rō, chi yūcuan cúu jeē váha sáha ró jéē candíje ró Jítóho yō. ² Chi yáha cúu ñn jnáhan jeē uxí jnūhun ndácu jniñu jeē ni jéhe ya, te xīhna gā jnūhun yáha ndíso tahū: Coó yíñúhún ró nuū tatá rō nuū naná rō, ³ návāha quendōo ndetū rō, te náhán cotecu rō ini ñayívi yáha. Achí.

⁴ Te róchó tátá jíjnáhan ró, ma squití ni rō séhe ró, chi sa suhva scuéhnu ró i jíin jnūhun cuandije i, te stéén rō nuū i jeē candíje i máá Jítóho yō.

⁵ Te róchó mozo jíjnáhan ró, cuandije ró núū patrón rō ñayívi yáha, te coo yíñúhún ró te conso iyo ró núū de. Te na sájniñu ndaā sájniñu ndije ró, caní ni rō jeē nuū Cristo cájejniñu ró. ⁶ Ma sájniñu ndúxí ró jeē maá jéē coto de te cuajnúhún de róchó. Chi sa suhva sáha ró cuenta jeē mozo Cristo cácuu ró. Te sáha ró jéē nújnahan ni Yaā Dios nde jíin ini jíin ánuá rō. ⁷ Te na cúsiñi ni rō sájniñu ró, te na cáni ni rō jeē nuū maá Jítóho yō cájejniñu ró, nasūu núū ñáyuu. ⁸ Chi je cájini rō jeē jniñu váha sáha ñn ñn ró, te nihín rō yáhu jniñu yúcuu núū maá Jítóho yō, vésú cúu ró mozo chí téé sájniñu máá.

⁹ Te róchó patrón jíjnáhan ró, suni súcuan sáha ró jíin mozo rō, te ma cahán xeén rō jíin i. Chi na cócuhun ni rō jeē suni máá ró jíin máá i yíhi ró ndaha Jítóho yō, Yaā ndeé andiví. Te tu sáha ya cuenta ndese cúu ñn ñn ñayuu, chi inuú sáha ya jíin i.

Na cúcutú yó jíin táca fuerza Yaā Dios

¹⁰ Te iyó inga jnūhun, hermano jíjnáhan ró. Nducú ró jeē na cóo fuerza ini rō jíin fuerza máá Jítóho yō jeē nduú yá jíin ró, chi iyó téyí poder yā. ¹¹ Na cúcutú ró jíin táca fuerza Yaā Dios, návāha cuu cuiñi nihin ró jéē ma stahú jexeén róchó. ¹² Chi nájnūhun jeē cájejnáhan yó jíin táca jéē neé. Te nasūu ñáyuu cúu jeē cájejnáhan yó jíin, chi sa suhva jíin táca táchí cájica nuū sucún. Te yūcuan cúu jeē cácujeñu, jíin jéē cándiso jniñu, jíin jéē cándacu jniñu nuū ñáyuu ñayívi yáha jeē nájnūhun cájica i nuū néē. ¹³ Núu súcuan te na cúcutú ró jíin ndihi fuerza Yaā Dios, návāha cuu cuiñi nihin ró quívi jító ndee jexeén rohó. Te súcuan coo tūhva ró jíin táca ndihi jeē cuiñi

nihin ró jíin. ¹⁴ Núu súcuan te cuiñi nihin ró jíin jnūhun ndaā jeē cúu nájnūhun jeē yíhi nihin sanchíi chíi ró. Te sácutú ró maá ró jíin jnūhun caca ndaā rō, te suu cúu nájnūhun jeē cúcutú soldado jíin sahma cáa jeē ndihyú de. ¹⁵ Te níni cotūhva ró nacani ró jnūhun ndeyí jnūhun siñi ni jeē véji nuū Yaā Dios. Te suu cúu nájnūhun jeē chíhi soldado ndijēn jehē de. ¹⁶ Te jeē cánuú gá cúu jeē candíje ró jeē iyó yá jíin ró. Te yūcuan cúu nájnūhun jeē tūhva ró máá ró yatā ñn escudo. Chi jíin jnūhun cándíje ró un te cuu ndahva rō ndihi jeē tají máá jéxeén, jeē cúu nájnūhun nduva jeē cayú yáñuhún punta. ¹⁷ Te cuiñi ró jíin jnūhun ni jnama ya rohó, jeē cúu nájnūhun ñn lélú cáa. Te cuajniñu ró jnūhun jeē yosó núū tútu Yaā Dios jeē ni jéhe Espíritu Santo nuū rō. Chi yūcuan cúu nájnūhun jéjniñu soldado espada de. ¹⁸ Te níni cácan tahú rō nuū Yaā Dios siquí ndihi-ni, te cahán ndahú ró jíin yá jíin fuerza Espíritu. Núu súcuan te ndito na cóo ni rō, te ma jécuiñi rō jeē cacán tahú rō jehē táca ñáyuu maá yá. ¹⁹ Te suni cahán rō jehē rí, návāha nihín rí jnūhun cahán rí, te coo téyí ni rí nacani cájí rí jnūhun jeē jnáma ya yohó, suu jnūhun jeē ní yisáhi un. ²⁰ Chi ni tají yá ruhū jeē jíca rí nacani rí jnūhun ya ún, te jeē siquí un cúu jeē íne rí vecāa. Te na cácan tahú rō jeē coo téyí ni rí cahán rí jnūhun ya, nájnūhun cánuú cahán rí.

Saludo jeē sándihí

²¹ Tíquico cúu ñn hermano jeē maní yō jíin, te cúu de tēe squícu váha chindéé ñájnañan jíin rí nuū jniñu máá Jítóho yō. Te máá de castūhún ndihi ndese cuahán jniñu rí te ndese iyó rí. ²² Jeē yúcuu ní tají rí de cuajeé de nuū rō, návāha cachi de ndese cáhiyo rí, te coo ndeyí ni rō jíjnáhan ró sáha de.

²³ Te ñūhun ni rí jeē Tatá yō Yaā Dios jíin Jítóho yō Jesucristo, na sáha ya jeē coo ndeyí coo siñi ni táca róchó jéē cácuu hermano, te coo maní gā rō jíin yá, te candíje váha ró. ²⁴ Te ñūhun ni rí jeē na sáha ga yā jeē váha róchó jíjnáhan ró jéē maní ndije ró jíin Jítóho yō Jesucristo. Súcuan na cóo. Amén.

CARTA JEE NI TEE APOSTOL SAN PABLO NUU ÑAYUU ÑUU FILIPOS

1 Máá rí cúu Pablo jíin Timoteo, mozo Jesucristo. Te cátee ri carta yáha cuájeē nuū tāca róhó hermano cáyucú ñuu Filipos, jeē cácuu ró ñáyuu maá yá jeē cáyihí ró ndaha Cristo Jesús. Te suni cátee ri nuū tée cándiso jníñu cándito róhó, jíin núu tēe cájejniñu mēhñu ró. 2 Te cáñuhun ni rī jeē Tatá yō Yaā Dios jíin Jítóho yō Jesucristo, na sáha ga yā jeē váha róhó, te sáha ya jeē coo ndeyí coo sī ni rō.

Jeē jicán tahú Pablo jehē ñáyuu cá candíje

3 Tāca jínu jeē núcūhun ni rī rohó jíjnáhan ró, te nácuatáhú rí nuū Yaā Dios. 4 Te náa jicán tahú rī, te níní cúsi ni rī jicán tahú rī jehē rō. 5 Chi ni chindéé ñájnáhan ró jíin rí jeē scáca yó jnúhun váha ya, nde quiṽ ní cacandíje ró te nde vijna. 6 Te jíni ndije ri jeē maá Yaā ní squéjéé jniñu váha jíin ró, cocu ya jíin ndé quiṽ ndíji Jesucristo, te sínu ndihí ya. 7 Te íyó váha jeē súcuan jéni ni rī siquī tāca róhó, chi yóhyo manī rī jíin ró, te inuú-ni ni sáha ya jeē váha yóhó. Te súcuan cúu vēsú íne ri vecāa chí vēsú cuiñi ri nuū tāca tēe cújéhnu, cahān rī jehē jnúhun jeē jnáma ya yohó jēe jnúhun ndaā cúu. 8 Chi Yaā Dios jíni yā ndese yóhyo manī rī jíin ró jíjnáhan ró, nájnūhun yóhyo manī Jesucristo jíin yó. 9 Te jicán tahú rī jeē na cáa ga jeē cundáhú ni rō jnáhan ró, jíin jēe na jécūhun ga ni rō te cundichí ró jíin táca jnúhun ya. 10 Te súcuan te cuu nacāji ró táca jēe váha condiquīn rō, te caca ndaā rō, te ma cóo ni ñn cuēchi siquī rō quiṽ ndíji Cristo. 11 Te súcuan te cayā cuehē jniñu váha jeē sáha Jesucristo jíin ró. Te sáha jeē coo yíñúhún ñáyuu jíin Yaā Dios te cahān i jeē yóhyo luu cújéhnu ya.

Jnúhun jeē técu nduú yó jíin Cristo

12 Hermano, cúní rī jeē na cúcāhnu ni rō jíjnáhan ró ndese ni sáha jnúndóho ni ndoho rí. Chi ni sáha jeē ni jítē núu ga jnúhun jeē jnáma ya yohó. 13 Chi tācá soldado cáyucú ini palacio, jíin táca gá ñayuu, cájini i jeē íne

ri vecāa jeē siquí Cristo. 14 Te siquī jeē íne ri vecāa, jeē yúcuan cúu jeē vihyá gā nihín ndeyí ni cuehē tācá hermano cá candíje nuū Jítóho yō. Te cáhīyo téyí gá ni de nácani de jnúhun ya, te tu ndé ndínuu ni de.

15 Te ndaā chi sava tēe cáncani de jnúhun Cristo siquī jeē cuesún ni de jíin jēe nduxí de. Te sava ga de chi sa suhva cáncani de jnúhun ya siquī jeē váha ni de. 16 Sava de cáncani jnúhun Cristo siquī jeē nducú de jeē váha máa-ni de, te tú ndije de, chí cácuni de jeē nihín gā rī jnúndóho jeē íne ri vecāa. 17 Te sava ga de chí cáncani de jnúhun siquī jeē cundáhú ni de ruhū, chí cájini de jeē íne ri vecāa siquī jeē cahān rī jehē jnúhun jeē jnáma ya yohó. 18 Tú na vé sáha núu súcuan, chí tācá-ni modo cascuíté núu de jnúhun Cristo, vēsú núu ndije de chí tuú. Te yāha cúu jeē cúsi ni rī sáha.

Te suni cusī gā ni rī, 19 chí jíni rī jeē tāca jēe yáha sáha jeē váha ga coo jíin rí, chí cájicān tahú rō jehē rī, te Espíritu Jesucristo chindéé ñáhán yá ruhū. 20 Chí ñúhun ni rī te cúu ndasí ni rī jeē ma sáha ri ni ñn jeē sáha jeē cucanu ri nuū yā. Chí sa suhva coo téyí ni rī cahān rī jnúhun ya, návāha ndujéhnu ga Cristo sáha máa rí vijna, nájnūhun je ni sáha ri ní véji ri, te vēsú na cótecu rī chí vēsú na cúu rī. 21 Chí jeē técu rī cúu jeē nduú rí jíin Cristo, te jeē cúu rī cúu jeē vihyá gā váha coo jíin rí. 22 Te núu cotecu gā rī, te cuu scáca ga rī jniñu máa Jítóho yō. Núu súcuan te tu cúcāhnu ni rī ndé ñn cúu jeē váha ga, núu jeē cótecu rī chí jēe cúu rī. 23 Chí mēhñú ndíndúú jnúhun yáha íne nīhin ri. Chí ñn cúu jeē cuní rī quihīn rī condee rī jíin Cristo, chí yúcuan cúu jeē vihyá gā váha coo jíin rí. 24 Te suni cánuú gá jeē cótecu gā rī jeē siquí rohó jíjnáhan ró. 25 Núu súcuan te íyó ndaā ni rī jeē quéndōo ri condee gā rī jíin ró, návāha stéén gā rī nuū rō ndese caca váha ga rō jíin yá, te cusī gā ni rō jíin jnúhun cá candíje ró. 26 Núu súcuan te condee tucu ri jíin ró, te cusī teyí ni rō jeē siquí ruhū, sáha máa Cristo Jesús.

27 Te máa ñn-ni jeē condihṽ ni rō caca ndaā rō, nájnūhun cánuú caca ró siquī jeē cá candíje ró jnúhun Cristo. Yúcuan na te vēsú na jíin rī coto jnáhan yó, chí condee jicá rí, te nihín rī jnúhun ro jēe cáhīn nīhin

ró jíin jnúhun ya, te cáhīyo inuú ni rō, te inuú-ni cánducú ndeyí ró siquí jnúhun jeē cácdíje yó jéē jnáma ya yohó. ²⁸ Te ma yūhú cuiti rō sáha jeē cájito uhū rohó. Chi jeē jíto uhū i rōhó, yūcuan stéén jeē jnahnú ndetū i, te suni stéén jeē cācu ánuá maá ró jijnáhan ró sáha Yaā Dios. ²⁹ Chi ni jēhe Cristo uū jeē váha nuū rō: nasūu maá in-ni jeē candíje ró yá, chi suni jeē na ndóho ró jéē siquí yā. ³⁰ Chi maá rí jíin rōhó jijnáhan ró, nájnūhun jeē cájejnáhan yó jíin táca jéē neé. Chi ni cajito ró jéē sūcuan ni sáha maá rí, te cánihīn rō jnúhun jeē sáha ga rī nde vijna.

Jeē ni sáha suchí yá maá yá te ni ndujéhu ya

2

¹ Núu sūcuan te sáha Cristo jeē cáhīyo ndeyí ni rō, jíin jéē cúsi ni rō siquí jeē váha ni yā jíin ró. Te ndéé Espíritu yā jíin ró, te manī rō jíin jnáhan ró, te cájito ndáhú ró i. ² Núu sūcuan te na cócu ga rō jíin táca jnúhun yáha, návāha cusī teyí ni rī. Te inuú-ni na cóo ni rō, te coyūcu manī rō, te inuú na cóo ánuá rō, te inuú cani ni rō. ³ Te ni in jniñu ma sáha ró jéē nducú ró jeē váha maá-ni ró, ni jeē satéyí ró maá ró. Chi sa suhva sáha suchí ró maá ró, te sáha ró cuenta jeē váha ga jnáhan ró vēsú maá ró. ⁴ Te ma cóndihvī ni rō maá-ni jniñu jeē quéndōo vāha maá-ni ró, chi suni na cóndihvī ni rō jniñu jeē quéndōo vāha jnáhan ró.

⁵ Te na cáni ni rō jijnáhan ró nájnūhun ni jeni ni Cristo Jesús. ⁶ Chi maá yá cujéhu inuú yá jíin Yaā Dios, te vēsú sūcuan te tu ní jeni ni yā jeē cujéhu inuú yá jíin Yaā Dios. ⁷ Chi ni siaá yā jeē cujéhu ya, te ni nduu ya nájnūhun índāa mozo, te ni cacu ya ni nduu ya tēe. ⁸ Te ná ni nduu inuú yá jíin tēe, te ni sáha suchí yá maá yá. Te ni jendije ya nde jíin jnúhun jeē cúu yā, te nde jíin jnúhun canu jeē cúu yā jicā cruz. ⁹ Jeē yūcuan ní sáha Yaā Dios jeē yóhō ni ndujéhu luu ya, te síhvī yá cujéhu ndasí gá nuū táca gá síhvī. ¹⁰ Te táca jéē cáhīn andiví jíin ñáyiví jíin chíji ñáyiví, núu na cūni i síhvī Jesús te jecuiñi yití i. ¹¹ Te cahān ndaā ndivii i jeē Jesucristo cúu maá Jítoho. Te

sūcuan stéén i jeē yóhō cújéhu maá Tátá yā Yaā Dios.

Ñayuu cácdíje cúu i nájnūhun quīmi jeē ndíndēe

¹² Núu sūcuan hermano jijnáhan ró, nájnūhun níni ní cajendije ró jnúhun ni cahān rī ná ni condee rī jíin ró, suni sūcuan víhyá gā cuandije ró vijna jeē ndeé jíca rí jíin ró. Te cóndihvī ni rō jeē caca ndaā rō jíin jnúhun ní jnama ya rohó, te caca yíñuhún ró conso íyo ró núu yā. ¹³ Chi Yaā Dios jícu ya jíin ró jeē cúu ni rō sáha ró jniñu váha, te chíndēe ñáhán yá rohó jéē siquí ró jniñu nújnahan ni yā.

¹⁴ Ndihi jeē sáha ró, ma cahān sōo ró, ni ma tejnáhan ró, ¹⁵ návāha cuu ró séhe Yaā Dios jeē tú na cuēchi coo siquí rō te coo ndaā rō. Te caca ndoo ró méhñu ñáyuu níni ni jeē casáha neé. Chi méhñu ñáyuu un stéén rō jniñu váha ró, te sūcuan cácuu ró nájnūhun quīmi jeē ndíndēe núu neé ñáyiví. ¹⁶ Te stéén rō jnúhun ya nuū i jeē cótecu i ní cáni sáha. Te sūcuan te cusī teyí ni rī quiví ndíji Cristo, chi cuni rī jeē tu ní jíca cāhá rí, ni tu ní sájniñu cāhá rí. ¹⁷ Te vēsú na cúu rī jeē socō rī maá rí nuū yā jeē siquí rohó, te yūcuan cúu jeē nducú rí scandíje ga rī rohó, návāha socō rō maá ró sáha ró jniñu váha jeē cácdíje ró yá. Jeē yūcuan cúsi ni rī, te cūni rī jeē suni cusī ni rō jíin rí jijnáhan ró. ¹⁸ Núu sūcuan te na cúsi ni maá ró jíin rí, te inuú na cúsi ni yō jijnáhan yó.

Jnúhun Timoteo jíin Epafrodito

¹⁹ Te ñúhun ni rī jeē cuáha maá Jítoho yō Jesús jnúhun jeē tají yáchī rī Timoteo jeē de nuū rō, návāha ndusi ni rī núu na níhín rī jnúhun ndese cáhīyo ró. ²⁰ Chi tuá na inga tēe íyó yáha jéē inuú jeni ni jíin rí, nájnūhun maá de jeē ndihví ndije ni de jehē rō. ²¹ Chi táca de cánducú de jeē cúu maá de, te nasūu jéē cūni Cristo Jesús. ²² Te je cájini rō jeē tēe vāha cúu Timoteo. Chi nájnūhun sēhe jíin tátá, sūcuan ni jejniñu de jeē nácani de jnúhun vāha ya jíin rí. ²³ Núu sūcuan te ñúhun ni rī tají rí de jeē de nuū rō, te núu je ni cucáhu ni rī ndese coo jíin rí. ²⁴ Te jeni ndije ni rī jeē cuáha Jítoho yō jnúhun jeē suni maá rí jinū yachī rī nuū rō jijnáhan ró.

²⁵ Te suni jéni ni rī jeē cánuú tají rí hermano yō Epafrodito jeē de, chi tēe sájniñu jíin rí siquī jnúhun ya cúu de te chindéé ñájnáhan de jíin rí. Chi máá ró ni catajíró de jeē cuajniñu de nuū rī tāca jéē cúmanī nuū rī. ²⁶ Chi yōhyo cúu ni de ndacoto tucu de nuū rō jijnáhan ró. Te ni cucuíhyá ndasí ni de, chi ni canihīn rō jnúhun jeē ní cocuhū de. ²⁷ Chi jendaá ni cocuhū de, te je yajni cuu de núú. Te Yaā Dios ni cundáhú ni yā de, te nasūu máñúhún-ni de, chi suni ruhū, návāha tú caa ga cucuíhyá ni rī jehē de núú. ²⁸ Jeē yúcuán cúu jeē ndihví gā ni rī tají rí de nuū rō, návāha ndusī ni rō jeē ndácoto tucu ró núú de. Te suni ruhū ma cucuíhyá ndasí gā ni rī. ²⁹ Núu súcuán te na cúsi ni rō jeē nájinū de nuū rō, chi cúu de hermano yō jeē candíje de maá Jítóho yō. Te coo yíñúhún ró jíin táca tēe índāa nájnūhun cáa de. ³⁰ Chi jeē siquī jniñu Cristo cúu jeē jé yajni cuu de núú. Chi ni chundeyí ni de jeē cúu de siquī jeē chindéé ñáhán de ruhū jíin jniñu jeē tu ní íyo modo sáha máá ró jijnáhan ró.

Jnúhun jeē cáca ndaā vāha yó

3

¹ Te vijna, hermano jijnáhan ró, na cúsi ni rō jíin máá Jítóho yō. Ruhū chi tu jnánini ni rī jeē tēe tucu ri jnúhun yáha núú rō, chi cuajniñu jeē quéndōo vāha ga rō. ² Condito ró máá ró nuū tēe casáha jniñu néé, jeē cándāa ná cándāa ina. Chi cánducú de stújí de róhó jéē casáha de circuncidar, te tu casáha de jniñu ndaā. ³ Te máá yó cácuu ñayuu ni cuu circuncidar ndije, chi cáchiñúhún yó nuū Yaā Dios nde jíin ini jíin ánuá yō, te cácusī ni yō jeē yíhí yó ndaha Cristo Jesús, te tu tēnuū yō jeē quéndōo ndaā yō jíin jniñu jeē sáha máá-ni yó. ⁴ Núu jeē súcuán cúu te ruhū chi suni cuu tenuū rī jniñu jeē sáha máá-ni ri núú. Chi núu ndé tēe jéni ni de jeē cuu tenuū de máá de, te ruhū chi víhyá gā cuu tenuū rī maá rí. ⁵ Chi ni casáha circuncidar ruhū nuū uná quiví ná ni cacu ri. Te yucūn Israel cúu ri, te suni jnáhan yucūn Benjamín, te ñn hebreo sēhe hebreo cúu ri. Te suni ni cuu ri tēe grupo fariseo jeē ni squícu ri tāca ley jnáhan ñuu rī hebreo. ⁶ Te ni jito xeēn rī ñayuu cá candíje, chi yōhyo ni condihví ni rī jeē ma sáma i

modo ley jenahán. Te ni ñn tu ní cúu cahān jeē tu squícu ri ley un, chi ni squícu vāha ri. ⁷ Te tāca jéē ní tenuū rī ún, chi sáha ri cuenta jeē tu ndé níhín jniñu cuiti, chi vijna te ni candíje ri Cristo. ⁸ Te suni chíhi ri cuenta jeē vāha ga na náā ndihí jeē ní tenuū rī ún, chi vāha ndasí gā cúu jeē ni quiví ri ndaha máá Jítóho rī Cristo Jesús. Te jeē siquí maá yá te ni siaá rī ndihí ún, te sáha ri cuenta jeē nájnūhun yācá-ni cúu. Chi ni quiví ri ndaha Cristo, ⁹ te ndúú yá jíin rí. Te tuá nducú rí quendōo ndaā rī jeē jíin ley un, chi sa suhva Yaā Dios ni ndahva yā cuēchi ri jeē ní candíje ri Cristo. Chi súcuán squéndōo ndaā yā ñayuu cá candíje. ¹⁰ Te vijna te cúní rī jecūhun vāha ni rī ndese Yaā cúu ya. Te cúní rī jeē poder jeē ní natecu yā cone jíin rí. Te cúní rī ndoho ri jíin yá, te nde jinū rī ndoho ri nájnūhun ni ndoho máá yá jeē ni jíhí yā. ¹¹ Chi yōhyo ñúhún ni rī natecu rī nájnūhun ni natecu yā.

Jeē nducú ndéyí Pablo sínu de carrera de

¹² Te ná tu nihīn rī ndihí jeē ni cáhān rī ún, ni ná tu ije ri jíin. Te ndúcú ndéyí rí siquī ún, chi ñúhún ni rī jeē nihín rī tācá un, chi jeē yúcuán cúu jeē ni níhín Cristo Jesús ruhū xihna gā. ¹³ Hermano jijnáhan ró, tu sáha ri cuenta jeē jé ni nihīn rī ndihí ún. Te íyó ñn jeē sáha ri, cúu jeē squéndōo ri tāca jéē ní cuu ichi yátá, te ndúcú ndéyí rí nihīn rī tāca jéē iyó ichi núú. ¹⁴ Chi cúu un nájnūhun jeē jínu ri ñn carrera cuahān rī nde jinū rī andiví, te nihīn rī premio jeē cuáha Yaā Dios. Chi ni cana ya yohó jéē quihín yō nuū yā andiví siquī jeē yíhí yó ndaha Cristo Jesús.

¹⁵ Te tāca yó jeē jé ni ije vāha yó jíin jnúhun cándíje yó, súcuán na cáni ni yō. Te núu ndé ñn ró sñn jéni ni rō, te Yaā Dios suni stéén yā nuū rō jeē násūu súcuán cúu. ¹⁶ Te jíni ñúhún cani ni yō te caca yó modo jeē quijnáhan jíin jéē jé ni nihīn yō.

¹⁷ Hermano, na ndácu ró rúhū jijnáhan ró. Te condēhe vāha ró ndese cájica ñayuu ndaā, chi cájica i nájnūhun ni castéén rī nuū rō. ¹⁸ Te je ni cuu tijni jínu ni cahān rī jíin ró, te nde ndahyú rī cahān tucu ri vijna, jeē iyó cuéhē ñayuu cájica i ñn modo jeē steén jeē jíto uhū i jnúhun jeē ni jíhí Cristo jicā cruz.

19 Te ñin quiv̄i te jnahnū ndetū ñayuu ún. Chi máni jeē cáji vāha i cúu jeē cáchiñúhún i. Te sátéyí i máá i jíin jniñu neé jeē jéhe jnūhun canu. Te máni máá jéē iyó ini ñayiv̄i cúu jeē ndihv̄i ni i. 20 Te máá yó chi ñayuu coyūcú andiv̄i cúu yó, te cándetu yó jéē nde yūcuán ndiji Jitoho yō Jesucristo, Yaā jnáma yóhó. 21 Te máá yá nasama ya yiqui cúñu ndahú yó, návaha nduu yó nájnūhun cáa máá yá jeē lúu cújéhu ya. Te súcuan sáha ya jíin poder yā jeē kujéhu ya siqūi ndih̄i-ni.

Níní na cús̄i ni yō jíin Jítoho yō

4

1 Núu súcuan hermano jijnáhan ró, cuiñi n̄hin ró jíin jnúhun máá Jítoho yō. Chi yōhyo man̄i rī jíin ró, te cúní rī jeē coto jnáhan yó, te cús̄i ni rī jíin ró, te nájnūhun premio rī cácuu ró.

2 Te cáhán ndahú rí jíin róhó Evodia jíin Síntique jeē inuú na cóo ni rō, chi cácuu ró hermana jeē cácadíje ró máá Jítoho yō. 3 Te suni cáhán ndahú rí jíin róhó, tée jeē ní chindéé ñájnañan vāha jíin rí, jeē na chindéé ñáhán ró hermana un, chi ni casájniñu n̄hin ña jíin rí siqūi jnúhun jeē jnáma ya yohó. Te suni súcuan ni sáha Clemente jíin sava ga ñayuu ni sájniñu jíin rí. Te ni jecosó sihv̄i i nuū libro jeē yosó síhv̄i ñayuu cotecu ní cáni.

4 Te níní na cús̄i ni rō jijnáhan ró jíin máá Jítoho yō. Te inga jínu cáhán rī jeē na cús̄i ni rō. 5 Sáha vāha ró jíin táca ñáyuu, návaha cuni i jeē súcuan vāha ni rō. Chi máá Jítoho yō, yajni-ni cúu ya jíin ró.

6 Ma nácani ndasí ni rō siqūi ni ñin. Chi sa cahān rō jíin Yaā Dios siqūi táca jéē nácani ni rō. Chi cacān tahú rō, te cahān ndahú ró, te suni nacuatáhú ró nuū yā. 7 Yūcuán na te sáha Yaā Dios jeē cóo ndeyí coo s̄i ndasí ni rō, te súcuan coo jíin ró nde cūhva jeē ma jécūhun ni rō ndese cúu jeē sáha ya ún. Te condito vāha ya anuá rō jíin jéē níjnūnī rō, coo cuehē jnūhun ndeyí jnūhun s̄i ni jíin ró, siqūi jeē ȳh̄i ró ndaha Cristo Jesús.

Jeē na cáni ni yō siqūi táca jéē vāha

8 Te ñin na jnūhun íyó, hermano jijnáhan ró. Na cáni ni rō siqūi táca jéē iyó ndáa, jíin jéē sáha yíñúhún, jíin táca jniñu sáha vāha, jíin jniñu íyó ndoo, jíin táca jéē iyó man̄i ni,

jíin jéē lúu sáha. Te máni na núcūhun ni rō táca jéē vāha jeē sáha jeē nácuatáhú ró nuū yā.

9 Táca jéē ni stéén rī nuū rō, jeē ní cacutūhva ró núu rī, jíin jéē ní cajini ró ní cahān rī, jíin jéē ní cajito ró ni sáha ri, táca yúcuan suni na sáha máá ró. Yūcuán na te máá Yaā jeē jéhe jnūhun ndeyí s̄i ni, coo ya jíin ró.

Jeē ní casocō ñayuu Filipos nuū Pablo

10 Te yōhyo cús̄i ni rī sáha máá Jítoho yō, chi vijna te ni canucūhun tucu ni rō jeē chindéé ñáhán ró rúhū. Te nasūu jéē ní naa ni rō sáha ró súcuan, chi siqūi jeē tu ní íyo modo. 11 Te nasūu jéē cahān rī siqūi jeē ndóho ndáhú rí, chi je ni cutūhva rī cus̄i ni rī jíin jéē névāha ri. 12 Jíní rī cotecu ndahú rí, te jíní rī cotecu cucá rí. Chi ni cāan ri jíin táca-ni, núu jeē ndutú chíji ri chí jéē ndóho rī sōco, núu jeē cónevāha cuehē rī chí jéē cúmanī nuū rī. 13 Ndihi-ni cúu sáha ri, chi máá Cristo jéhe ya fuerza ini rī. 14 Te vésú súcuan te vāha ni casáha ró jéē ní chindéé ñáhán ró ruhū jíin jnúndóho jeē ndóho ri.

15 Te róhó ñáyuu ñuu Filipos, je cájini rō ndese ni cuu. Chi nde quiv̄i ní quejéé rí nácani ri jnūhun jeē jnáma ya yohó, ná ni quenda ri Macedonia vēji ri, te ni casocō rō xūhun núu rī siqūi jeē ní canih̄in rō jnūhun ya ni nacani rī. Te ni ñin grupo ñayuu cácadíje tu ní sáha súcuan, chi máá-ni róhó jijnáhan ró. 16 Te ná íne ri ñuu Tesalónica, te ni catají ró jecu jeē jíní ñúhún rí, ni jinū ñin uū jínu. 17 Te nasūu jéē nducú rí jeē cuáha ró núu rī, chi sa nducú rí jeē na cáyá gā jniñu vāha ró, návaha cayā tahū rō nuū Yaā Dios.

18 Chi je ni nih̄in rī ndih̄i jeē jíní ñúhún rí, te ndóo ga. Te íyó cuehē nuū rī, chi ni nih̄in rī jeē ní catají ró vēji jíin Epafrodito. Te jeē ní catají ró cúu nájnūhun ñin ofrenda jeē as̄in jeén, ni casocō rō nuū Yaā Dios, te cús̄i ni yā jíin. 19 Te Yaā Dios chi cuáha ya nuū rō táca jéē cúmanī nuū rō, chi cucá ndasí yá jíin táca jéē vāha jeē lúu íyó núu Cristo Jesús. 20 Te na cáhán yō jeē yóhyo luu cújéhu Tátá yō Yaā Dios ní cáni. Amén.

Saludo jeē sánd̄h̄i

21 Cachi rō nuū táca ñáyuu maá yá jeē sándeyí ni i, áchí rí, chi cácadíje i Jesucristo.

Te hermano yō cáyūcu jíin rí yáha, cácahān de jeē sándeýí ni rō jíjnáhan ró. ²² Te tāca ñáyuu maá yá jeē cáhiyo yáha, suni cácahān i jeē sándeýí ni rō. Te ñayuu cáyūcú vehe rey cújéhnū ñuu Roma yáha, máá i cácahān gā súcuan.

²³ Te ñúhun ni rī jeē maá Jítóho yō Jesu-cristo, na sáha ga yā jeē váha róhó jíjnáhan ró. Súcuan na cóo. Amén.

CARTA JEE NI TEE APOSTOL SAN PABLO NUU ÑAYUU ÑUU COLOSAS

¹ Máá rí cúu Pablo, apóstol Jesucristo, chi súcuan ni nujnahan ni Yaā Dios ni tají yá ruhū. Te jíin hermano yō Timoteo ² cátee ri carta yáha cuájeē nuū rohó ñáyyuu ñuu Colosas, jeē cácuu ró ñáyyuu maá yá jeē cá candíje vāha nuū Cristo. Te cáñuhun ni rī jeē Tatá yō Yaā Dios na sáha ga yā jeē váha rōhó, te sáha ya jeē coo ndeyí coo sī ni rō.

Jeē jicán tahu Pablo jehē ñáyyuu cá candíje

³ Te jeē cájicān tahu rī nuū Yaā Dios, Yaā cúu Tatá maá Jítoho yō Jesucristo, te níní cáncuatáhu rí nuū yā jeē siquí rohó jíjnáhan ró. ⁴ Chi ni cajini jnūhun ri ndese vāha cá candíje ró Cristo Jesús, jíin ndese cá cundáhu ni rō tāca ñáyyuu maá yá. ⁵ Chi cáñuhun ni rō nihīn rō jeē ñūhun vāha nde andiví cuu ró. Chi ná ni cajini ró jnúhun ndaā jeē jnáma ya rohó, te ni caquejéé ró ñūhun ni rō. ⁶ Te jnūhun un jéé ní canacani nuū rō, chi ndúcuehē cuahān te níhīn jniñu ní cáhnu ñayiví. Te suni súcuan ni sáha jíin rōhó jíjnáhan ró ndé quiví ní cajini ró te ni cajecūhun ni rō jeē ndaá cúu jeē yóhyo vāha ni Yaā Dios jíin ró. ⁷ Te jnūhun un cúu jeē ni stéén Epafras nuū rō, tēe sájniñu jíin rí jeē maní rī jíin. Chi cúu de tēe jéjniñu squícu vāha nuū Cristo jeē ndíto de rōhó. ⁸ Te máá de ni castūhun núu rī siquí rohó, ndese cá cundáhu ni rō jnáhan ró sáha máá yá.

⁹ Jeē yúcuan suni tu cájecuñī rī jeē cájicān tahu rī jehē rō, nde quiví ni níhīn rī jnūhun ún te nde vijna. Te cájicān rī nuū yā jeē na jécūhun vāha ni rō te coo ndíhí ró jíin jnúhun ya, sáha máá Espíritu, návāha cuni rō ndihí ndese nújnahan ni maá yá. ¹⁰ Te cájicān rī jeē caca ndaā rō nájnūhun cánuú caca ró jéé cácuu ró ñáyyuu maá Jítoho yō. Te súcuan te sáha ró ndihí jeē nújnahan ni yā, te nihīn jniñu ró jíin táca jniñu vāha, te jecūhun ga ni rō ndese Yaā cúu Yaā Dios. ¹¹ Te cájicān rī jeē cuáha ya fuerza ini rō, nájnūhun íyó fuerza maá yá jeē kujéhu luu

ya. Te súcuan te cuu cuandeyí ni rō jíin táca-ni jnūndóho, te cusī teyí ni rō. ¹² Te cuu nacuatáhu ró nuū Tatá yō, chi máá yá ni chihí fuerza yohó jéé ñn cáhnu-ni jíin táca ñáyyuu maá yá nihīn yō tahu yō. Chi cájica yó jíin luz yā jeē yíhi yó ndaha ya. ¹³ Chi ni jnama ya yohó jéé ni yíhi yó ndaha máá jéé jnái poder nuū néé, te ni squíví ya yohó ndaha Séhe ya jeē maní yā jíin, ndácu ya jniñu nuū yō. ¹⁴ Chi Séhe ya un ní jnama ya yohó jéé ni jíhī yā jehē yō, te ni ine cáhnu ni yā nuū cuéchi yó.

Jeē ni sáha Cristo jeē ní ndiví yó núu jnúhun maní Yaā Dios jíin yó

¹⁵ Yaā Dios jeē tu cúu coto yó, ni sáha ya jeē ní quiji Séhe ya, te súcuan ni jito yó máá yá. Te Séhe ya ún, je íyó yá nde ná tu jecōo tāca jéé iyó. ¹⁶ Chi jíin Séhe ya ni sáha Yaā Dios ndihí jeē ni jécōo, ndihí jeē iyó andiví jíin jéé iyó ñayiví, jeé jini yō nuū jíin jéé tu jini yō nuū. Te suni ni sáha ya tāca ndajéhé jeé cándacu jniñu, jíin jéé cándiso jniñu, jíin jéé cácujuhnu, jíin jéé cájni poder. Jíin Cristo ni sáha Yaā Dios jeē ni jécōo ndihí, te jeé cúu Cristo cúu. ¹⁷ Te je íyó Cristo nde ná tu coo ndihí jeé iyó. Te ndaha máá yá yíhi vāha ndihí-ni. ¹⁸ Te máá yá cújéhu nuū ñáyyuu cá candíje, nájnūhun cújéhu xinī nuū yiquí cúñu, chi nájnūhun yiquí cúñu yā cácuu i, cúu jeē ñn na cúu i jíin yá. Te máá yá sáha jeé cotecu i ní cáni, te xīhna gā maá yá ni natecu mēhñu ndíyí, návāha kujéhu ya nuū tāca-ni. ¹⁹ Chi ni cusī ni Yaā Dios jeē ndihí ndese cúu máá yá, suni súcuan cúu Cristo. ²⁰ Te siquí jeē ni jíhī Cristo, te ni cusī ni Yaā Dios sáha ya jeē ndívicoo tāca-ni nuū jnúhun maní yā jíin, tāca jéé yúcu ñayiví jíin jéé yúcu andiví. Chi jíin jéé ni jíhī Cristo jicā cruz, te ni sáha Yaā Dios jeē ndívicoo tāca-ni nuū jnúhun maní yā jíin.

²¹ Te máá ró jíjnáhan ró, chi sūn siquí ni cahīn ró ndé saá, te ni cajito uhū rō yā ini anuá rō, chi máni jniñu néé ní casáha ró. Te vijna chi je ni sáha Yaā Dios jeé ní ndívicoo ró núu jnúhun maní yā jíin ró. ²² Súcuan ni sáha ya siquí jeé ni sócō Cristo maá yá ni jíhī yā, návāha coo ndoo coo i rō cuiñí ró núu yā, te ma cóo jnéhén ró, te tú na cuéchi coo siquí rō. ²³ Te súcuan sáha ya núu cuiñí níhīn ró jéé candíje vāha ró, te núu quendō

nīhin ró jíin jnúhun vāha jeē cáñuhun ni rō jeē jnáma ya rohó, te ma siaá cuiti rō. Chi jnúhun un ní cajini ró, te ni jite núu nái cáhnu ñayiví. Te ruhū Pablo suni jéjníñu ri jeē nácani ri jnúhun ún.

Jeē jejníñu Pablo siquī ñáyuu cávandíje

²⁴ Te vijna te cúsiñ ni rī jeē ndóho ri jehē rō jíinánhan ró. Chi jíin yiqui cúñu rī ndóho ri jeē cúmanī gā ndoho ri jíin Cristo jehē ñáyuu cávandíje, suu ñayuu cúu nájnūhun yiqui cúñu yā. ²⁵ Te cúu ri tēe jéjníñu siquī ñáyuu cávandíje, chi súcuan ni tejníñu Yaā Dios ruhū, návāha nacani ndihī ri jnúhun ya nuū rō te quendōo vāha ró. ²⁶ Te nácani ri jnúhun ya jeē ní yisāhí, jeē tu ní cajini ñayuu nde jenahán ndasí te nde ní cáni vēji. Te vijna te je ni steén cají yá jnúhun un núu ñáyuu maá yá. ²⁷ Chi ni cusīñ ni yā jeē steén yā nuū i ndese cúcúca ndasí i jíin ndihī jeē ndíso jnúhun sāhi yāha jéē lúu cújéñu, te cuitē núu quihīn nuū tāca nación jeē tu jíiní. Te jnúhun sāhi yāha cúu jeē ndeé Cristo ini anuá rō, ndúú yá jíin ró, te jeē yúcuán cáñuhun ni rō tāca jéē lúu jéñu jeē coo.

²⁸ Te jnúhun Cristo un cúu jeē cánacani ri, te cástihví ni rī tāca ñáyuu, te cástéén rī jnúhun ya návāha jecūhun vāha ni i. Te súcuan te ije vāha ni ndivii i jeē yihī i ndaha Cristo Jesús. ²⁹ Te siquī yúcuán cúu jeē sájniñu ri, chi ndihví ni rī nácani ri jnúhun jíin tāca fuerza Cristo jeē chindéé ñájnanhan ya jíin rí.

2

¹ Chi cúni rī jeē na jécūhun ni rō ndese yōhyo ndúcú ndéyí rí jehē rō, jíin jéhē ñayuu ñuu Laodicea, jíin ndé tāca ñáyuu jeē tu ní cajini cuiti nuū rī. ² Chi cúni rī jeē coo ndeyí ni anuá i, te inuú-ni coyūcu mánī i, te jecūhun ndihī ni i ndese yōhyo cúca i jíin jnúhun jeē candíje nīhin i. Chi cuni i ndese Yaā cúu Cristo, chi máa yá cúu jnúhun Yaā Dios jeē ni yisāhí un. ³ Te ini Cristo yisāhí tāca jnúhun jeē cucúca ró jíin, suu jnúhun ndíchí jíin jnúhun jécūhun ni. ⁴ Te jnúhun yāha cáhán rī jíin ró jíinánhan ró, návāha ma stahú ni ñin i rohó jíin tāca jnúhun stahú jéē lúu cáhán. ⁵ Chi vēsú ndeé jíca rí jíin ró, te ñúhun ni rī rohó, te cúsiñ ni rī jeē jíin rí

ndese cájica ndaā rō te cávandíje nīhin ró Cristo.

⁶ Núu súcuan te nájnūhun ni cajetáhú ró jeē Jítoho rō cúu Jesucristo, suni súcuan na cáca ndaā rō jíin yá. ⁷ Te na jnái vāha jnúhun ya ini rō, te na íje vāha ró jíin jnúhun cávandíje ró yá, nájnūhun je ni cajini rō. Te níní nacuatáhú ró nuū Yaā Dios.

Jeē ndújeé yó sáha Cristo

⁸ Coto má cuāha ró jnúhun jeē stahú ni ñin ñayuu rohó jíin jnúhun ndíchí jéē tu jéjníñu, jíin jnúhun ndúxí stahú. Chi tu cávandíje i jnúhun Cristo, chi sa cávandíje i tāca jéē tajnúni ñayuu, modo jeē castéén ini ñayiví yāha.

⁹ Chi ndihī ndese cúu máa Yaā Dios, suni súcuan cúu Cristo. ¹⁰ Te ndihī ndese cúu Cristo, suni súcuan cúu ró jíinánhan ró, chi cáyihī ró ndaha ya. Te máa yá cújéñu nuū tāca jéē cújéñu jíin jéē ndíso jníñu andiví.

¹¹ Te siquī jeē cáyihī ró ndaha ya, suu cúu jeē nájnūhun ni cuu ró circuncidar. Te jeē súcuan ni sáha ya circuncidar rohó, chi nasúú ñin jnunī jeē yihī yiqui cúñu rō cúu, chi sa suhva jeē ní sándoo ya tāca cuéchi ni casáha ró jíin modo neé máa ró. Chi súcuan cúu jeē sáha Cristo circuncidar rohó.

¹² Te jeē ní cajendute ró cúu nájnūhun jeē ní quindūji ró jíin Cristo, te suni nájnūhun jeē ní natecu rō jíin yá. Chi ni cacandíje ró jéē jíin poder Yaā Dios ni nastécu yā Cristo mēñu ndíyí. ¹³ Chi ni cacuu ró nájnūhun ndíyí nuū yā siquī cuéchi ró, chi ná tu sáha ya circuncidar anuá rō nde saá. Te vijna te ni sáha Yaā Dios jeē cotecu rō ní cáni jíin Cristo, chi ni ine cáhnu ni yā nuū tāca cuéchi ró. ¹⁴ Te nájnūhun jeē iyó ñin acta jeē jíicán cuéchi siquī yō jeē ní stíví yó ley yā. Te ni ndahva yā acta un, chi ni chunaa Cristo cuéchi yó jéē ni jíhī yā jíicā cruz. ¹⁵ Chi ná ni jíhī yā jíicā cruz, te ni quende yā ndihī poder tāca jéneé jéē cácujeñu jíin jéē cájniñ poder. Te ni quende yā jeē tuá cújéñu, chi ni sáha ya jeē cuángoo nuū quíndihyū, te súcuan ni steén yā poder yā.

Na ndúcú yó jeē quéndōo vāha yó ndé andiví

¹⁶ Núu súcuan te ma cuatáhú ró núu cácahán ñayuu cuéchi siquī rō, siquī ñin jeē yéji rō chí siquī ñin jeē jíhī ró, chí jéē tu

née iī rō quivī víco jíin quivī núcōsō yoō jíin quivī ndétátú. ¹⁷ Chi tāca ley siquī un ní jejniñu máá ndé ná tu quiji Cristo. Te vijna te ni quiji ya te tuá jíni ñúhún táca ún. ¹⁸ Ma cuáha ro jnúhun jeē cásí ni ññayuu jeē nihín rō tahū rō. Chi cáchiñúhún i tācá ndajéhé yā, te cácahān i jeē súcuan cásáha suchí i máá i. Te cácahān i jeē cájini ndije i jeē iyó ndāā jnúhun cánacani i, te tuú. Te súcuan cásáha téyí sáá-ni i máá i, chi cájeni née ni i. ¹⁹ Te tu cáhiin i jíin Cristo, Yaā cujéhnú nuū ñáyuu cácuu nájnūhun yiqui cúñu yā chi ññ na cúu i jíin yá. Chi máá yá scuéhnu ya i jíin jnúhun ya, te nduu inuú ni tācá i jeē cáhije i cuahān i, nájnūhun ni jeni ni Yaā Dios.

²⁰ Núu súcuan te nájnūhun jeē je ni cajihī rō jíin Cristo, cúu jeē ní casiáá rō tāca jéē tajnúni jeē castéén ini ñayiví. Núu súcuan ¿te naun cásáha ga rō nájnūhun cásáha ñayuu ñayiví jéē jéndije ró táca jéē tajnúni i? ²¹ Chi cácahān i: Ma quehé ró ma cáji rō jeē yáha chí jéē yúcuan, ni ma jnāí ró, áchí i. ²² Te máni jeē tajnúni ñayuu jíin costumbre maá i cúu te tu níhín jniñu jeē quéndōo ndaā ñayuu. ²³ Te ndaā chi cájeni ni i jeē jnúhun ndíchí cúu ún, chi sáha jíin i jeē chiñúhún níhin i, jíin jéē sáha suchí i máá i, jíin jéē stóho i yiqui cúñu i. Te tu níhín jniñu cuiti jeē casi táca jniñu née jéē cuní i sáha i.

3

¹ Núu súcuan te nájnūhun ni natecu Cristo, suni súcuan ni canatecu rō jeē ní cuu ró nájnūhun ndiyi ni sáha cuēchi ró. Te na cóndihvī ni rō siquī tāca jéē iyó andiví núu ndeé Cristo lado váha Yaā Dios nuū cujéhnú ya. ² Te na cáni ni rō siquī tāca jéē iyó andiví, nasūu siquī jeē iyó ini ñayiví. ³ Chi nájnūhun je ni cajihī rō jíin Cristo, te vijna chi nájnūhun cátecu rō jíin yá andiví, chi cáyihí ró ini ndaha Yaā Dios. ⁴ Te quivī ndíji Cristo, Yaā sáha jeē cótecu yō ní cáni, yūcuán na te suni quendacoo ndijin maá ró jíin yá, te cujéhnú luu ró jíin yá.

Ñayuu jica jíin modo cuní maá, jíin ñáyuu ní ndujeé

⁵ Núu súcuan te casi rō táca modo cuní maá ró jeē cáhiyo ró ini ñayiví yáha. Chi ma cáca jnéni ró, ma sáha ró jniñu jnéhén,

ma ndíyo ni rō sáha ró táca jniñu née, ma cutóó ró, ma ndíyo ni rō ndajniñu. Chi táca ndajniñu jeē ndíyo ni yō cúu nájnūhun ídolo yō jeē chiñúhún yó. ⁶ Chi siquī táca jniñu yáha cúu jeē cuáha Yaā Dios castigo xeēn nuū ñáyuu níhni ni nuū yā. ⁷ Te suni jíin jniñu yáha ní cajica ró ndé saá, ná ni casáha ró súcuan. ⁸ Te vijna te na stóo ró táca jéē yáha: jeē quití ni, jeē xeēn ni, jeē sáha jniñu née, jeē cahán ndevāha nuū jnáhan, jíin jéē cahán táca jnúhun tú vāha. ⁹ Ma stahú ró jnáhan ró, chi yúcuan cúu modo maá ró jeē ní cajica ró jíin ndé saá, te je ni castóo ró. ¹⁰ Te ni canduu ró ñáyuu jeé, cuandacu ró máá Yaā ni sáha róhó, te cuajecūhun vāha ni rō ndese Yaā cúu ya. ¹¹ Te ñayuu ní ndujeé tuá cúu i ñayuu griego, ni ñayuu hebreo, ni ñayuu ni sáha circuncidar, ni ñayuu tu ní sáha circuncidar, ni ñayuu ñuu jicá, ni ñayuu yucú jeē ní indāa née, ni mozo jeē ní jeen ñayuu, ni ñayuu sájniñu cuenta maá, chi inuú cúu ndihí i nuū yā. Chi Cristo cúu Jitoho ndihí i, te ndeé yá ini anuá ndihí i, ndúú yá jíin i.

¹² Chi ni nacāji Yaā Dios rohó jíin náhan ró jeē cúu ró ñáyuu maá yá jeē maní yā jíin. Núu súcuan te níni cundáhú ni rō jnáhan ró, te coo vāha ni rō jíin jnáhan ró. Te coo suchí ni rō, te coo vitá ni rō, te coo paciencia ni rō. ¹³ Cuandeyí ni rō jíin jnáhan ró, te cone cáhnu ni rō nuū i te núu na vé ni sáha i nuū rō. Chi nájnūhun ni ine cáhnu ni Cristo nuū rō, suni súcuan sáha máá ró. ¹⁴ Te jeē cánuú gá cúu jeē cundáhú ndasí ni rō jnáhan ró. Chi yúcuan sáha jeē ndúu inuú ni rō te íje vāha ni rō jíin jniñu váha. ¹⁵ Te jnúhun coyūcu mání na cúnuú ini anuá ró sáha Yaā Dios. Chi ni cana ya rohó jéē nduu ró ññ na ñayuu jéē cóyūcu mání rō. Te níni na nácuatáhú ró núu yā.

¹⁶ Te scuáha vāha ró jnúhun Cristo návāha cunuú jnúhun ún ini anuá rō. Te stéén rō nuū jnáhan ró, te stíhví ni rō i jíin táca jnúhun ndíchí yá. Te jíin salmo jíin himno, yaa iī jeē cahán jnúhun ya, na cáta luu ró jéē nácuatáhú ró ini anuá rō nuū Yaā Dios. ¹⁷ Te táca jniñu sáha ró, núu jeē cahán rō chí jéē sáha ró cúu, ndihí na sáha ró jéē ndujéhnú síhví máá Jitoho yō Jesús, te nacuatáhú ró núu Tatá yō Yaā Dios sáha ya.

Ndese cánuú squícu ñayuu cávandije nuū jnáhan i

¹⁸ Róhó ñahan cácuu ñasihí, cuatáhú ró nuū yíh ró, chi súcuan cánuú sáha ró síquí jeē candije ró Jítóho yō. ¹⁹ Te róhó téē cácuu yíh, cundáhú ni rō ñasihí ró, te ma cútucu ni rō jíin ña. ²⁰ Róhó séhe jíjnáhan ró, tǎcá-ni jniñu cuandije ró núu tatá rō nuū naná rō, chi súcuan cúshí ni maá Jítóho yō. ²¹ Te róhó tátá jíjnáhan ró, ma squítí ni rō séhe ró, návaha ma cucuíhyá ni i. ²² Róhó mozo jíjnáhan ró, tǎcá-ni jniñu cuandije ró núu patrón rō ñayívi yáha. Ma sájniñu ndúxí ró jeē maá jeē coto de te cuajnúhún de róhó. Chi na sájniñu ndaá sájniñu ndije ró, te conso íyo ró núu Yaā Dios. ²³ Te tǎcá jniñu sáha ró, na cúshí ni rō sáha ró, te na cáni ni rō jeē nuū Jítóho yō cájejniñu ró, nasūu núu ñayuu. ²⁴ Chi je cájini rō jeē maá Jítóho yō cuāha ya cuehē tahū cuu ró ní cáni. Chi nuū maá Cristo cájejniñu ró, chi maá yá cúu Jítóho rō. ²⁵ Te ñayuu casáha jniñu néé, chi sa suhva ndutahū i síquí jeē ni sáha i. Chi tu sáha Yaā Dios cuenta ndese cúu ñn ñn ñayuu, chi inuú sáha ya jíin i.

4

¹ Róhó patrón jíjnáhan ró, vāha ndaā na sáha ró jíin mozo rō. Te na núcūhun ni rō jeē suni íyó Jítóho maá ró, Yaā ndeé andiví.

² Te ndivíi rō ma jécuiñí rō jeē jicán tahu rō, chi coo ndito ni rō jíin, te nacuatáhú ró núu Yaā Dios. ³ Te suni cacān tahu rō jehē rí jíjnáhan rí, jeē na sáha Yaā Dios jeē cóo ga modo nacani rí jnūhun, návaha cuu cahān rí jnūhun Cristo jeē ní yisāhí, jeē tu ní cájini ñayuu jenahán. Te síquí jnūhun un cúu jeē íne rí vecāa. ⁴ Te cacān tahu rō jeē cuu cahān cají rí ndese cánuú cahān rí.

⁵ Sáha yúcún váha ró jíin ñayuu tu cávandije. Ma cúhuun ni rō síquí i, chi condíhvī ni rō scandije ró i. ⁶ Te máni cahān váha ró jíin ñayuu, te cahān rō jnūhun cuajniñu jeē quéndō vāha i sáha. Te caní ni rō ndese vāha nastió cuíñí rō jnūhun nuū ñn ñn i.

Saludo jeē sándhí

⁷ Tíquico cúu ñn hermano jeē maní yō jíin, te téē squícu vāha chíndéé ñájnañan jíin rí cúu de, te jéjniñu de jíin rí nuū maá Jítóho

yō. Te máa de castūhún ndihí nuū rō ndese cuahān jniñu rí. ⁸ Jeē yúcuan ní tají rí de cuajeē de nuū rō jíjnáhan ró, návaha cuni rō ndese cáhíyo rí jíin jniñu, te coo ndeyí ni rō sáha de. ⁹ Te suni cuajeē Onésimo jíin de, téē cúu jnáhan máa ró jíjnáhan ró. Te cúu de hermano jeē squícu vāha jeē maní yō jíin. Te ndíndúú de castūhun núu rō ndese cuahān tǎcá jniñu ichi cháha.

¹⁰ Sándeyí ni rō jíjnáhan ró, áchí Aristarco, téē íne jíin rí vecāa. Te suni súcuan cáhán Marcos, ñani primo Bernabé. Te je ni ndacu rí jniñu nuū rō síquí Marcos, te núu ni jecondéhé de róhó te sáha vāha ró jíin de.

¹¹ Te suni súcuan cáhán Jesús, téē jeē suni nání Justo, jeē sándeyí ni rō. Te máa-ni de cácuu téē hebreo cávandije jeē chindéé ñáhán cánacani jnūhun jíin rí síquí ndese ndácu Yaā Dios jniñu. Te yōhyo ndeyí íyó ni rí casáha de. ¹² Sándeyí ni rō jíjnáhan ró, áchí Epafras, téē cúu jnáhan máa ró, te mozo Cristo cúu de. Te níni jícán tahu ndasí de jehē rō, jeē na cuíñi níhin ró, te ije vāha ni rō jeē squícu vāha ró ndihí jniñu cúní Yaā Dios. ¹³ Chi cáhán ndaā rí jeē yóhyo ndíhví ni de jehē rō jíjnáhan ró, jíin jéhē ñayuu ñuu Laodicea jíin Hierápolis. ¹⁴ Lucas, téē cúu médico jeē maní yō jíin, suni cáhán de jeē sándeyí ni rō, te suni súcuan cáhán Demas.

¹⁵ Cachi rō nuū tǎcá hermano ñuu Laodicea jeē sándeyí ni i, áchí rí. Te suni súcuan cahān rō jíin Ninfas, jíin táca ñayuu cávandije cándutútú vehe ña. ¹⁶ Te ná ni jíinu ni cacahu ró carta yáha, te suni tají ró na cáhu ñayuu cávandije ñuu Laodicea. Te suni cahu máa ró carta jeē cuahān nuū ñayuu Laodicea te ndiji nuū rō. ¹⁷ Te cachi rō nuū Arquipo jeē na ndúcú ndeyí de squícu de jniñu ní tee Jítóho yō síquí de, áchí rí.

¹⁸ Ruhū Pablo, yāhá-ni cúu jeē téē rí jíin ndaha máa rí, jeē sándeyí ni rō. Te nucūhun ni rō ruhū jeē íne rí vecāa. Te ñúhun ni rí jeē na sáha ga Yaā Dios jeē váha róhó jíjnáhan ró. Súcuan na cóo. Amén.

CARTA HN JEE NI TEE APOSTOL SAN PABLO NUU ÑAYUU ÑUU TESALONICA

¹ Máá rí cúu Pablo jíin Silvano jíin Timoteo, te cátee rí carta yáha cuájeē nuū rohó ñáyuu cácandíje ñuu Tesalónica, jeē cáyihí ró ndaha Tátá yō Yaā Dios jíin Jítóho yō Jesucristo. Te cáñuhun ni rí jeē Tátá yō Yaā Dios jíin Jítóho yō Jesucristo, na sáha ga yā jeē váha róhó, te sáha ya jeē coo ndeyí coo sī ni rō jijnáhan ró.

Ñayuu Tesalónica cúu i ñn ejemplo vāha

² Níní cáncuatáhu rí nuū Yaā Dios jeē siquí rohó jijnáhan ró, te tu náā ni rí cacān tahu rí jehē rō jeē cájicān tahu rí. ³ Te níní ndácunehen rí rohó núū Tátá yō Yaā Dios, jeē váha casáha ró táca jniñu chí cácandíje ró, jíin jéē váha cájejniñu ró núū yā chí manī rō jíin yá, jíin jéē cájendeyí ni rō chí cáñuhun ni rō jeē coo jeē váha sáha Jítóho yō Jesucristo. ⁴ Chí manī Yaā Dios jíin ró jijnáhan ró hermano, te cájini rí jeē ní nacāji ya rohó. ⁵ Chí ná ni canacani rí jñuhun nuū rō jeē jnáma ya rohó, te nasūu jéē ni cáhān rí súcuan-ni, chí ni nacani rí jíin poder Espíritu Santo, te ni cacucáhu vāha ni rí jeē jñuhun ndaā cúu. Te cájini rō ndese ni casáha vāha rí ná ni coyūcu rí jíin ró, chí ni nducú rí jeē quéndō vāha ró.

⁶ Te róhó jijnáhan ró chí ni candacu rō rúhū, te suni ni candacu ró máá Jítóho yō. Chí ni cajetáhu ró jñuhun ya, te ni cacusī ni rō ni sáha Espíritu Santo, vēsú ni cajito ró cuehē jñūdóho siquí ún. ⁷ Te súcuan cácuu ró ñn ejemplo nuū ndihí ñayuu cácandíje jeē cáyūcú región Macedonia jíin Acaya jíñā. ⁸ Chí jeē siquí rohó jijnáhan ró cúu jeē ní jite núu jñuhun Jítóho yō, te nasūu máni Macedonia jíin Acaya, chí suni ní cáhnu-ni ni jité núu jñuhun ndese cácandíje ró Yaā Dios. Te jeē yúcuan tuá jíni ñúhún jeē nácani máá rí jñuhun nuū i. ⁹ Chí sa máá i cáncani ndese ni cajetáhu váha ró rúhū ná ni jecoo rí nuū rō, jíin ndese ni castóo ro ídolo te ni quivícoo ró ndaha Yaā Dios, Yaā ndaā Yaā

técu, jeē cuajniñu ró núū yā. ¹⁰ Te cáncani i jeē cándetu ró jéē ichi ándiví ndiji Sēhe ya Jesús jeē ní nastécu yā. Te máá Jesús jnama ya yohó núū castigo xeēn jeē quíji.

Jniñu jeē ni sáha Pablo ñuu Tesalónica

2

¹ Chí cájini rō hermano, jeē tu ní jécoo cáhá-ni rí nuū rō. ² Te cájini rō jeē ní castóho i ruhū te ni cacahān ndevāha i nuū rí ini ñuu Filipos. Te vēsú súcuan te máá Yaā Dios ni chindéē ñáhán yá ruhū, ni sáha ya jeē ni íyo ndeyí ni rí, te ni jecoo rí ñuu rō ni canacani rí jñuhun jeē jnáma ya rohó. Súcuan ni casáha rí vēsú xeēn ni íyo jñūdóho. ³ Te jñuhun ni canacani rí, nasūu jñuhun ni castiví rí cúu, ni nasūu jéē nihín rí siquí rō, ni nasūu jéē ní castáhu rí rohó. ⁴ Chí máá Yaā Dios ni jito ndee yā ruhū, te ni tejniñu ya ruhū jeē nácani rí jñuhun jeē jnáma ya rohó. Te jeē yúcuan cúu jeē cácahān rí. Te tu cácahān rí jñuhun jeē nújnahan ni ñayuu, chí sa jeē nújnahan ni Yaā Dios, chí máá yá jito ndee anuá rí. ⁵ Te cájini rō jeē tu ní cánducú rí cuajnúhún rí rohó ñn modo stahú, ni tu ní cácahān rí jeē cúsi ni rí jíin ró návāha nihín rí xūhun ró. Te jíni Yaā Dios jeē súcuan cúu. ⁶ Te ni tu ní cánducú rí jeē cuajnúhún ró ruhū, ni jeē cuajnúhún inga ñayuu ruhū, vēsú súcuan cánuú coo núú, chí apóstol Cristo cácuu rí. ⁷ Chí sa suhva víta ní cacahān rí jíin ró, nájnūhun sáha ñahan ndéca yiquín jéē yucún ndíto ña sēhe ña. ⁸ Te siquí jeē cácondáhu ndasí ni rí rohó, jeē yúcuan ní cacondíhvī ni rí nacani rí jñuhun vāha Yaā Dios nuū rō. Te nasūu máá yúcuan-ni, chí suni nde vida rí cuāha rí jeē siquí rō nuú, chí yóhyo manī rí jíin ró. ⁹ Te cáncani ró hermano, jeē tú ni ñn ró ní stáhān rí jeē cacān rí nuū rō ná ni canacani rí jñuhun vāha Yaā Dios nuū rō. Chí ni canducú ndeyí rí ni casájniñu ndasí rí siquí jeē cótecu rí. Te nduú ñuú ni casájniñu rí.

¹⁰ Máá ró cájini rō, te suni Yaā Dios jíni yā ndese ndaā ndoo ni cajica rí nuū rohó ñáyuu cácandíje. Te ni ñn tu cúu cahān cuēchi siquí rí. ¹¹ Te suni cájini rō ndese ni castíhvī ni rí ná ñn ná ñn ró, te ni cacahān rí jñuhun ndeyí ni jíin ró, nájnūhun sáha ñn

tátá jíin séhe de. ¹² Te ni cacahān nīhin ri jíin ró jeē na cáca ndaā rō nuū Yaā Dios nájnūhun cánuú caca ró. Chi ni cana ya rohó jēē quíngoo ró núū ndácu ya jniñu, nuū luu cujēhnu ró jíin yá.

¹³ Te jeē yúcuan níní nácuatáhú rí nuū Yaā Dios, chi ni cajetáhú ró jnūhun ya jeē ní canacani ri. Chi ni cajini rō jeē násūu jnūhun ñn tēe cúu, chi jnūhun Yaā Dios cúu. Te máá jéndaá jeē jnūhun un sájniñu ini anuá rohó ñáyuu cá candíje nde ndacu ró yá. ¹⁴ Hermano, ñayuu ñuu rō ni cajito xeēn i rohó, te súcuan ni candoho ró nájnūhun ni candoho ñayuu cá candíje cáyūcú región Judea jeē cáyihī ndaha Yaā Dios jíin Cristo Jesús. Chi nájnūhun ni candoho i ni sáha jnáhan i ñayuu hebreo, suni súcuan ni candoho ró. ¹⁵ Chi suu ñayuu hebreo ni cajehni de máá Jítóho yō Jesús, nájnūhun ni cajehni de táca tēe ñuu de jeē ní canacani jnūhun ya nde jenahán. Te suni nde ruhū jijnáhan ri ni cascúnu de. Te casáha de jniñu jeē tu nújnahan ni Yaā Dios, te cúu de contra síquī táca ñáyuu. ¹⁶ Chi jésicoo de jeē ma nácani ri jnūhun nuū ñáyuu táca nación jeē tu jíiní, návāha tú cácu i. Te súcuan sáha de jeē nducuehē gā cuēchi síquī de. Te vijna te yachī quiñi quiñi jeē cuāha Yaā Dios castigo xeēn nuū de.

Jeē cuní Pablo quicōndēhé tucu de ñayuu Tesalónica

¹⁷ Hermano, ni cacujiyo ri ñn núnúu-ni nuū rō jijnáhan ró. Te vēsú tu cájito jnáhan yó, te níní cáñuhun ni rī rohó. Te yōhyo ni cacuu ni rī ndacoto ri nuū rō jijnáhan ró. ¹⁸ Te jeē yúcuan ní cajeni ni rī jecoo ri nuū rō nuú. Te ruhū Pablo, tijní jíinu ni nducú rí modo jeē rī, te Satanás ní jesi ichi ri jijnáhan ri. ¹⁹ Chi tuá na ñnga cáñuhun ni rī, te tuá na ñnga cácusñ ni rī, chi suu máá ró jijnáhan ró. Te jeē síquī máá ró cúu jeē nihín rī premio rī te cusñ teyí ni rī cuiñi yó núū máá Jítóho yō Jesucristo quiñi ndíji ya. ²⁰ Suu jeē síquī rohó cúu jeē cácusñ teyí ni rī.

3

¹ Te jeē yúcuan tuá ni cácanda ri condetu ri nde nihín rī jnūhun ndese cáhīyo ró. Te ni casándaā rī jeē quéndōo máá-ni ri ñuu Atenas. ² Te ni catajī rí hermano yō Timoteo,

tēe jéjniñu jíin rí nuū Yaā Dios síquī jnūhun jeē jnáma Cristo yohó. Te ni jecondēhé de rohó návāha sáha de jeē cuiñi nīhin ró te coo ndeyí ni rō jíin jnūhun cá candíje ró. ³ Te ni jeē de návāha ma náyūhú ni ñn ró síquī táca jnūndóho jeē sáha ñayuu. Chi je cájini rō jeē súcuan cánuú ndoho yó. ⁴ Chi nde ná ni coyūcu rí jíin ró, te ni cacastūhun rí nuū rō jeē nihín nahín yó jnūndóho. Te je cájini rō jeē súcuan ni cuu, nájnūhun ni cacahān rī. ⁵ Te jeē yúcuan, náa tuá ni cánda ri condetu ri jeē nihín rī jnūhun ndese cáhīyo ró, te ni tají rí de ni jeē de, návāha cuni rī núu cá candíje nahín ró. Chi ni jeni ni rī á sanaa te jexeén jeē jíto ndee yohó ní cundeyí jíin ró, te naa cāhá-ni jniñu jeē ní casáha ri jíin ró.

⁶ Te vijna chi je ni ndee Timoteo nuū rī jijnáhan ri jeē ní jēē de ñuu rō Tesalónica. Te ni nacani de jeē cá candíje vāha ró, te cá cundáhú ni rō jnáhan ró. Te ni cachi de jeē cáñuhun ni rō ruhū, chi cáhīyo manī rō jíin rí. Te cá cuni rō ndacoto ró núu rī, nájnūhun cá cuni rī ndacoto ri nuū rō. ⁷ Te jeē yúcuan ní candusñ ni rī síquī jeē cá candíje vāha ró, hermano, vēsú xeēn iyó jnūndóho síquī rī. ⁸ Te vijna je ni cananiñiñ ni rī, chi cáhīñ nihín ró jíin máá Jítóho yō. ⁹ Núu súcuan te tu jíinu cuiñi nacuatáhú rí nuū Yaā Dios jeē síquī rohó jijnáhan ró. Chi jíto ya jeē cá cusñ ndasí ni rī jeē súcuan cáhīyo ró. ¹⁰ Te nduú ñuu cájicān tahú ndasí rí jeē ndacoto tucu ri nuū rō, te stéén gā rī na-ni jnūhun cúmanī jecūhun ni rō síquī jnūhun cá candíje yó.

¹¹ Te cá cuni rī jeē máá Tátá yō Yaā Dios jíin Jítóho yō Jesucristo, na núne ya ichi jeē cuu jecoo tucu ri nuū rō. ¹² Te na sáha máá Jítóho yō jeē cuehē ndasí gá cundáhú ni rō jnáhan ró jíin táca gā ñayuu, nájnūhun cá cundáhú ni rī rohó jijnáhan ró. ¹³ Te na sáha ya jeē íje ánuá rō jeē cuiñi nīhin ró, návāha coo ndoo ró jēē ma cóo cuēchi ró núu máá Tátá yō Yaā Dios, quiñi ndíji Jítóho yō Jesucristo jíin táca ñáyuu yñi ndaha ya.

Síquī jeē caca ndaā yō modo jeē cúsn ni yā

4

¹ Te vijna hermano, íyo ñnga jnūhun jeē cacahān ndahú rí jíin ró te cáhán nīhin ri jíin ró, chi súcuan cúní máá Jítóho yō Jesús. Je ni

castéén rī nuū rō ndese cánuú caca ndaā rō návāha cusī ni Yaā Dios. Te cácahān ndahú rí jín rō jeē sa víhyá gā na cáca rō súcuan.

² Chi je cájini rō na jniñu ni candacu ri nuū rō jeē ní ndacu máá Jítóho yō Jesús. ³ Te cúní Yaā Dios jeē na cóo ndoo coo iī rō nuū yā, te ma cáca jnéni rō. ⁴ Te ná ñn ná ñn rō na cóndeca yñúhún rō ñasihí máá rō, te súcuan caca ndoo rō. ⁵ Te ma sáha rō jniñu néé jéē ndíyo ni rō jesihí, nájnūhun cásáha ñayuu tācá nación jeē tu cájini i jnūhun Yaā Dios. ⁶ Ni ñn rō ma sáha rō cuéchi jeē quénde rō ñasihí jnáhan rō. Chi máá Jítóho yō cuāha ya castigo xeēn nuū ñayuu casáha tācá jniñu súcuan, nájnūhun je ni cacahān nihin ri ni castūhun rí nuū rō. ⁷ Chi tu ní cána Yaā Dios yohó jéē sáha yó jniñu jnéhén, chi sa jeē caca ndoo yó. ⁸ Núu súcuan te ñayuu jeē squéhichī jnūhun yáha, nasūu jnúhun ñn tēe squéhichī i, chi sa jnūhun Yaā Dios, Yaā ni jéhe Espíritu Santo nuū yō.

⁹ Te tu jini ñúhún jéē téé ri nuū carta jéē coo manī rō jín táca hermano, chi je ni steén Yaā Dios nuū rō jeē coo manī rō jín jnáhan rō. ¹⁰ Te je cáhīyo manī rō súcuan jín táca hermano cáyūcu ní cáhnu Macedonia jñā. Te cáhán ndahú rí jín rō hermano, jeē sa víhyá gā na cóo manī rō jín i. ¹¹ Te na cóndihvī ni rō coyūcú nayúú rō, te ma cóndihvī ni rō síquī ndese cásáha jnáhan rō, chi cóndihvī ni rō sáha rō jniñu máá rō, nájnūhun ni candacu ri nuū rō. ¹² Súcuan na sáha rō návāha ñayuu tu cándíje, cuatáhú i róhó, te suni ma cúmanī jeē cotecu rō.

Siquī jeē ndíji Jítóho yō

¹³ Suni cácuni rī, hermano, jeē na jécūhun ni rō jijnáhan rō síquī ñayuu cájihī, návāha ma cucuíhyá ni rō nájnūhun sava ga ñayuu jeē tu cáñuhun ni i jeē nátecu ndíyi. ¹⁴ Chi nájnūhun cácañdije yó jéē ni jihī Jesús te ni natecu yā, suni súcuan cácañdije yó jéē nastécu Yaā Dios tāca ñayuu ni cacandije nuū Jesús te ni cajihī.

¹⁵ Jeē yúcuan cácastūhun rí ñn jnūhun jeē ní castūhun máá Jítóho yō nuū rī: Jeē yóhó jéē cátecu gā quivī ndíji máá Jítóho yō, nasūu máá yó cosnúu jéē ndaa yó quihīn yō. Chi xīhna gā ñayuu je ni cajihī ndaa i quihīn i. ¹⁶ Chi máá Jítóho yō nuu ya quiji ya ichi ándiví, te cana jee ya jeē máá yá ndácu

jniñu, te cana jee ndajéhé cujéhnu ga, te cuecu trompeta Yaā Dios. Te xīhna gā natecu tāca ndíyi jeē ní cacandije Cristo. ¹⁷ Yūcuán na te yóhó jeē cátecu gā yō quivī ndíji ya, suni ndonehen ya yohó jín i, quihīn yō mēhñu vícō. Te naquijnáhan yó jín máá Jítóho yō sava andiví. Te súcuan condee yō ní cáni jín máá Jítóho yō. ¹⁸ Núu súcuan te jín jnúhun yáha cahān ndeyí ni rō jín táca jnáhan rō.

5

¹ Te tu jini ñúhún jéē téé ri nuū carta yáha síquī cuiyā chí quivī jeē coo táca un, hermano. ² Chi je cájini vāha rō jéē ñn sanaa ni yō te quee quivī ndíji máá Jítóho yō, nájnūhun ñn sanaa ni yō te quiji ñacuīhná jecuáa. ³ Chi ná-ni cácahān ñayuu jeē nayúú-ni ín te tú na jnūndóho coo, te ná-ni cácahān i súcuan te ñn sanaa ni i te quiji jnūndóho síquī i jeē náa i, te ma cácu cuiti i. Chi quiji quivī un nájnūhun ñn sanaa-ni te quejéé jéhdē chíji ñn ñahan scácu sēhe. ⁴ Te róhó hermano, tu cácuu rō ñayuu cájica nájnūhun nuū néé jeē ñn sanaa-ni te quiji quivī un síquī rō nájnūhun quiji ñacuīhná. ⁵ Chi ndihi rō cácuu ñayuu jeē nájnūhun cájica rō nduú, chi stéén luz yā ini anuá rō. Chi tu cácuu yó nájnūhun ñayuu jeē tu jécūhun ni síquī Yaā Dios, jeē nájnūhun cájica i nuū néé. ⁶ Núu súcuan te ma cúhuun ni yō nájnūhun ñayuu cáquixī, chi sa ndito na cóo ni yō te coo cájí xínī yō. ⁷ Chi jecuáa cúu jeē cáquixī ñayuu, te suni jecuáa cúu jeē nájini i. ⁸ Te máá yó chí nájnūhun jeē cájica yó nduú, te na cóo cájí xínī yō. Te na cúcutú yó jín jnúhun cándíje nihin yó jín jnúhun cúndáhú ni yō jnáhan yó, nájnūhun cúcutú soldado jín sahna cáa. Te na cúcutú yó jín jnúhun jeē cáñuhun ni yō jeē cácu yó, nájnūhun cúcutú soldado jeē ñúhun lélú cāa xínī de. ⁹ Chi Yaā Dios tu ní jéni ya yohó jéē cuáha ya castigo yohó, chí sa suhva jeē jnama ya yohó sáha máá Jítóho yō Jesucristo. ¹⁰ Te máá yá ni jihī yá jehē yō, návāha cotecu inuú yó jín yá, vésú núu cotecu gā yō ñayiví yáha chí cúu yō. ¹¹ Núu súcuan te cahān rō jnūhun ndeyí ni jín táca jnáhan rō, te scuéhnu jnáhan rō jín jnúhun ya, nájnūhun je cásáha rō.

Jeē jéni ichí Pablo tācá hermano

¹² Te cácahān ndahú rí jiín ró hermano, jeē cuatáhú ró tēe cájejniñu cándito róhó, jeē cácujeñu de nuū rō jiín jniñu máá Jítóho yō, te cájeni ichí de róhó. ¹³ Te coo yíñúhún ndasí ró nuū de, te coo manī rō jiín de siquī jniñu ya jeē casáha de. Te na cóyūcu mánī rō jiín táca jnáhan ró.

¹⁴ Te suni cácahān ndahú rí jiín ró hermano, jeē na stíhví ni rō ñayuu cájica cúxí. Te cahān rō jnūhun ndeyí ni jiín ñáyuu jeē yachī ndínuu ni i. Te chindéé ñáhán ró ñayuu jeē tu fuerza ini. Te cuandeyí ni rō jiín ndihí ñayuu.

¹⁵ Te coto má nasáha ndevāha ro jiín ni ññayuu te núu sáha ndevāha i jiín ró. Chi máni jeē váha nducú ró sáha ró jiín táca jnáhan ró jiín ndihí-ni ñayuu.

¹⁶ Níní na cóo sī ni rō jijnáhan ró. ¹⁷ Te níní na cácan tahu rō. ¹⁸ Te nacuatáhú ró jeē siquí tācá-ni. Chi súcuan cúní Yaā Dios jeē sáha ró jéé cácañdije ró Cristo Jesús.

¹⁹ Te ma cási rō nuū jniñu jeē sáha Espíritu Santo jiín ró. ²⁰ Te ni ma cujéé ni rō nuū jnūhun cácahān tēe cánacani jnūhun Yaā Dios. ²¹ Chi coto ndee rō táca jnūhun, te núu jeē váha cúu, te cuatáhú ró. ²² Te ma quívi nduu rō jiín ni ññayuu néé.

²³ Te máá Yaā Dios jeē jéhe jnūhun ndeyí sī ni, ññuhun ni rī jeē sáha ndihí ya jeē cóo ndoo coo iī rō nuū yā. Te ññuhun ni rī jeē cóndito vāha ya anuá rō jiín jéé níjnūnī rō, jiín yiquí cúñu rō, návāha tú na cuēchi coo siquī rō quivī ndíji máá Jítóho yō Jesucristo. ²⁴ Chi Yaā jeē ní cana róhó, sáha ya ndihí un jiín ró, chi squícu ya jeē ni jéjnūhun ya.

Saludo jiín bendición jeē sándihí

²⁵ Hermano jijnáhan ró, cacān tahu rō jehē rī jijnáhan rī.

²⁶ Te núu na cáhán rō jiín táca hermano, te techūhu yíñúhún ró ndaha i.

²⁷ Te cáhán níhin rī jiín ró, chi súcuan cúní máá Jítóho yō, jeē na cáhu ró carta yáha núu tācá hermano.

²⁸ Te ññuhun ni rī jeē máá Jítóho yō Jesucristo na sáha ga yā jeē váha róhó. Súcuan na cóo. Amén.

CARTA UU JEE NI TEE APOSTOL SAN PABLO NUU ÑAYUU NUU TESALONICA

¹ Máá rí cúu Pablo jíin Silvano jíin Timoteo, te cátee rí carta yáha cuájeē nuū rohó ñáyuu cá candíje ñuu Tesalónica, jeē cáyihí ró ndaha Tátá yō Yaā Dios jíin Jítóho yō Jesucristo. ² Te cáñuhun ni rí jeē Tátá yō Yaā Dios jíin Jítóho yō Jesucristo, na sáha ga yā jeē váha róhó, te sáha ya jeē coo ndeyí coo sī ni rō jijnáhan ró.

Jeē sándaā yā cuēchi quivī ndíji Cristo

³ Cánúú jeē niní nacuatáhu rí nuū Yaā Dios jeē siquí rohó jijnáhan ró hermano. Chi súcuan íyó váha, chí yōhoyo váha cuahije ró jíin jnúhun jeē cá candíje ró yá, te yōhoyo cuanducuehē jeē cá cundáhu ni rō táca jnáhan ró. ⁴ Te jeē yúcuán cúu jeē cá cusihí teyí ni rí cánacani rí jnúhun ró núu táca grupo ñayuu cá candíje nuū Yaā Dios. Chí váha cá candíje ró, te váha cá jendeyí ni rō jeē cá jito xeēn ñayuu rohó jíin jéē cá ndoho ró táca gá jnúndóho. ⁵ Te jíin táca jéē yáha chíhi ya cuenta jeē cá cuu ró ñáyuu váha jeē quiví coo ró ñuu nuū ndácu ya jniñu. Chí siquí ñuu un cúu jeē cá ndoho ró. Te jeē súcuan chíhi ya cuenta siquí rō, yáha stéén nuū yō jeē váha Yaā cúu ya.

⁶ Te suni íyó váha jeē nastóho ya ñayuu castóho róhó. ⁷ Te quiví ndíji Jítóho yō Jesús, quiví un sáha Yaā Dios jeē ndétātu róhó jéē cá ndoho, te suni ruhū jijnáhan rí. Chí jíin yáñuhūn quiji Jesús ichi ándiví jíin táca ndajéhé yā jeē ndíso poder. ⁸ Te cuáha ya castigo nuū ñáyuu jeē tu ní cá jēhe i jnúhun cuni i ndese Yaā cúu Yaā Dios, te tu ní cá jetáhu i jnúhun máá Jítóho yō Jesucristo jeē jnáma ya i. ⁹ Te ñayuu ún chí ndoho i ní cáni, chí cujiyo i nuū máá Jítóho yō, te ma cúu quiví coo i nuū lúu ndasí cújéhu ya jíin poder yā. ¹⁰ Súcuan sáha ya quiví ndíji ya jeē lúu cujéhu ya sáha ñayuu cá candíje jeē yíhi ndaha ya. Te nahán naa ni i coto i nuū yā. Te suni súcuan róhó jijnáhan ró, chí ni

cá candíje ró jnúhun jeē ní canacani rí nuū rō.

¹¹ Te jeē yúcuán cúu jeē niní cá jicān tahú rí jehē rō, jeē na cúu ró ñáyuu váha jeē ní cana ya rohó. Te jíin fuerza yā na sáha ya jíin ró jeē siquí ró táca jniñu váha jeē ní catee ni rō sáha ró siquí jeē cá candíje ró. ¹² Te súcuan te cujéhu máá Jítóho yō Jesucristo sáha ró, te suni cujéhu máá ró jijnáhan ró sáha ya. Chí Yaā Dios yō jíin Jítóho yō Jesucristo, súcuan cúu jeē sáha ya jeē váha yóhó.

Jnúhun siquí maá té sáha xeēn cuēchi

2

¹ Vijna te cahān rí siquí jeē ndíji máá Jítóho yō Jesucristo jíin jéē ndutútú yó núu yā. Cá cahān ndahú rí jíin ró jijnáhan ró hermano, ² jeē ma cuáha ró jnúhun sacā nuu caní ni rō, ni ma cunéé ni rō núu cá cahān ñayuu jeē jé ni quee quiví ndíji máá Jítóho yō. Ma cá ndíje cuiti rō vésú núu cahān i jeē ni níhīn i ñn jnúhun siquí un núu Espíritu, chí ñn jnúhun jeē ni cá hān inga, chí núu cachi i jeē ruhú jijnáhan rí ni tají ñn carta jeē cahán súcuan. ³ Ma cuáha cuiti rō jnúhun jeē stahú ni ñn i róhó. Chí nde ná tu quiji quiví ún te xīhna gā ndunīhni ni cuehē ñayuu nuū yā, te quenda ndijin máá té sáha xeēn cuēchi, te tē jnáhnū ndetū cúu máá té ún. ⁴ Chí tē jito uhū Yaā Dios cúu de, te ndonda de contra siquí táca jéē casnání i yaā i jíin táca jeē cá chíñúhún i. Te xeēn gā sáha de, chí nde cucōo de ini templo Yaā Dios jeē iyó Jerusalén, te cahān de jeē maá de cúu Yaā Dios.

⁵ ¿A cá nahán ró jnúhun yáha? Chí súcuan ni cahān rí jíin ró ná ni iyo rí jíin ró. ⁶ Te je cá jini rō ndé vé cúu jeē jési jeē ná tu quenda ndijin tē ún, chí nde na quee quiví maá de. ⁷ Chí je jícu sáhi táca cuēchi xeēn ini ñayiví, te vijna chí íyó jéē jési nuū, náváha ma cá ndasí gá cuēchi, chí nde na cújiyo máá jéē jési nuū. ⁸ Te sáa te quenda ndijin maá té xeēn ún. Te máá Jítóho yō Jesús cahni ya tē un jíin táchī yuhu-ni ya, te jíin jéē ndíndēe yá ndíji ya te snáhnū ndetū yā de. ⁹ Te jeē quiji tē xeēn ún chí máá Satanás sáha. Te quiji de jíin cuéhé poder, te sáha de táca jniñu jéhu jeē stahú de, jeē nahán

naa ni ñayuu coto i. ¹⁰ Te jíin táca jniñu nées te stáhú ndasí de ñayuu jeē jnahnú ndetū, chi tu ní cúní i cuatáhú i jnūhun ndaā jeē cácu i núú. ¹¹ Te jeē yúcuan cuāha Yaā Dios jnūhun jeē cuatáhú i jnūhun jeē tú ndaā cuiti, te candíje i jnūhun stáhú un. ¹² Te súcuan te jeconde cuēchi siquī ndihi i jeē tu ní cácdíje i jnūhun ndaā, chi sa jniñu nées ni cacusī ni i jíin.

Ñayuu jeē ní nacāji ya jeē cācu i

¹³ Te cánuú jéē niní nacuatáhú rí jijnáhan ri nuū Yaā Dios jeē siquí rohó jéē cácuu ró hermano jeē maní Jítóho yō jíin. Chi nde ná ni jecōo ñayīví, te je ni nacāji Yaā Dios rohó jéē jnáma ya rohó. Chi sáha Espíritu yā jeē cáhīyo ndoo cáhīyo iī rō nuū yā te cácdíje ró jnūhun ndaā. ¹⁴ Chi jeē yúcuan ní cana ya rohó jíin jnūhun jeē jnáma ya yohó jeē ní canacani ri, návāha quīvicoo ró núú cujéhu luu ró jíin máá Jítóho yō Jesucristo.

¹⁵ Núu súcuan te cuiñi nihin ró hermano, te conahán váha ró jnūhun jeē ní cacutūhva ró núu rī, núu jeē ní cacahān rī chí jéē ní tee ri nuū carta. ¹⁶ Máá Jítóho yō Jesucristo jíin Tátá yō Yaā Dios ni cundáhú ni yā yohó, te ni sáha ya jeē coo sī ni yō ní cáni, jíin jéē ñúhun ni yō táca jéē váha jeē coo siquí jeē váha ni yā jíin yó. ¹⁷ Te na sáha ga yā jeē cóo ndeyí ni anuá rō jijnáhan ró, te na sáha ya jeē íje ró cáhān rō táca jnūhun váha ya, te sáha ró táca jniñu váha.

Jeē na cácan tahu i jehē de

3

¹ Te íyó inga jnūhun cánuú, hermano. Na cácan tahu rō jehē rī jijnáhan ri, návāha yachī cuitē núu jnūhun máá Jítóho yō, te cuatáhú váha ñayuu, nájnūhun ni cajetáhú máá ró. ² Te suni cacān tahu rō jeē na cácu ri nuū táca tée casáha nées jéē cátejnhān jíin rí. Chi tú ndihi tée cácdíje jnūhun ya. ³ Te máá Jítóho yō chi váha squícu ya jeē ni jéjnūhun ya, te sáha ya jeē íje ni táca ró jíin jnūhun ya, te coto ya rohó núu jeneé. ⁴ Te cácuáhnu ni rī sáha máá Jítóho yō, jeē cócuu ró jíin jniñu jeē ní candacu ri nuū rō, te suni cocuu ga rō jíin. ⁵ Te ñúhun ni rī jeē máá Jítóho yō steén gā yā ndese coo maní gā rō

jíin Yaā Dios nde jíin ini jíin ánuá rō, jíin jéē cuāndeyí ni rō nájnūhun ni sáha Cristo.

Jeē cánuú sájniñu yó

⁶ Te cándacu ri jniñu nuū rō hermano, chi súcuan ni ndacu máá Jítóho yō Jesucristo, jeē na cújiyo ró núu táca hermano cájica cúxí te tu cájica váha de nájnūhun ni castéén rī nuū rō. ⁷ Chi je cájini rō ndese cánuú ndacu ró rúhū jijnáhan ri, chi tu ní cájica cúxí rí ná ni cahīyo ri jíin ró. ⁸ Ni tu ní cáyeji rī staā ni ñn ró súcuan-ni, chi ni cachunaa rī. Chi sa ni canducú ndeyí rí ni casájniñu téyí rí nduú ñuú, návāha ma stáhān rī ni ñn ró. ⁹ Te vésú íyó derecho rī jeē cacán rī nuū rō nuú, te tu ní cájicān rī, chi súcuan ni casáha ri návāha cuu ri ñn ejemplo nuū rō ndese sáha ró jijnáhan ró. ¹⁰ Chi ná ni coyūcu rí jíin ró, te ni candacu ri jniñu yáha nuū rō: Núu ndé ñn ñayuu tu cúní i sájniñu i, te suni ma cáji i núu súcuan. ¹¹ Chi ni canihīn rī jnūhun jeē cájica cúxí sava ró, te tu casájniñu ró, chi yāha yúcuan-ni sáha ró. ¹² Te cándacu ri jniñu nuū rohó jéē casáha súcuan, te cástíhví ni rī rohó jeē na cóo nayúú ró te sájniñu ró, návāha nihīn rō jeē cáji rō siquí jniñu sáha máá ró. Chi súcuan ndacu máá Jítóho yō Jesucristo jniñu.

¹³ Hermano, ma ndínuu ni rō jijnáhan ró sáha ró táca jniñu váha. ¹⁴ Te núu ndé ñn i tu jétáhú i jnūhun jeē cahán rī nuū carta yáha, te condēhe váha ro ndé-ni i cúu, te ma quiñáhan ga rō jíin i, návāha na cúcanu i te nacani ni i. ¹⁵ Te nasūu jéē cóto uhū rō i, chi sa cahān rō jíin i nájnūhun jíin ñani rō jeē na sájniñu váha i.

Bendición jeē sándihí

¹⁶ Te ñúhun ni rī jeē máá Jítóho yō, Yaā jeē jéhe jnūhun ndeyí sī ni, niní na sáha ya jeē coo ndeyí coo sī ni rō siquí táca-ni, te coo ya jíin ró jijnáhan ró.

¹⁷ Ruhū Pablo, yāhá-ni cúu jeē tée ri jíin ndaha máá rí jeē cahán rī jeē sándeyí ni rō jijnáhan ró. Te súcuan jéhe ri firma nuū táca carta rī, návāha cuni rō jeē carta máá rí cúu. Súcuan cáa letra rī. ¹⁸ Te ñúhun ni rī jeē máá Jítóho yō Jesucristo, na sáha ga yā jeē váha ró jijnáhan ró. Súcuan na cóo. Amén.

CARTA HN JEE NI TEE SAN PABLO APOSTOL NUU TIMOTEO

¹ Máá rí cúu Pablo, apóstol Jesucristo, chi Yaā Dios jeē jnáma yóhó, jíin Jítóho yō Jesucristo jeē ñúhun ni yō coto yó, ni catají yá ruhū jeē nácani ri jnūhun ya. ² Te té ri carta yáha cuájeē nuū rō Timoteo, chi cúu ndije ró nájñuhun sēhe ri siquī jeē ni scándíje ri rohó. Te ñúhun ni rī jeē Tatá yō Yaā Dios jíin Jítóho yō Jesucristo, na sáha ga yā jeē váha róhó, te cundáhú ni yā rohó, te sáha ya jeē coo ndeyí coo siī ni rō.

Jeē ma candíje i tāca jnūhun stáhú

³ Ná ni quihin ri ichi jeē quihín rī Macedonia, te ni cahān ndahú rí jíin ró jeē quéndōo ró ñuu Efeso. Te suni súcuan cáhán rī jíin ró vijna, návāha cahān ñihin ró jíin sava ñayuu yúcuan jeē ma stéén i inga jnūhun jeē tú ndaā. ⁴ Te ma cuatáhú i tāca jnūhun jeē cúu máá cuento-ni, jíin jnūhun jeē cahán siquī ndese vēji yucūn tāca jíi yō. Chi tāca jéē yúcuan sáha jeē nahán cándajnūhún i siquī, te tu ndé jéjníñu, te tu sáha jeē íje i squícu i nuū Yaā Dios siquī jnūhun cáncandíje yó.

⁵ Te ndácu ri jniñu yáha chi cúní rī jeē na cundáhú ni i jnáhan i siquī jeē iyó ndoo iyó ndáā anuá i, te cáncandíje ndije i ya. ⁶ Te sava ñayuu chi ni cajica yátá i, te ni cascuíta i jnūhun ya, ni quívicoo i nuū tāca jnūhun jeē tu ndé jéjníñu. ⁷ Chi cáncuni i cuu i maestro ley yā, te ni tu cájecūhun ni i na jnūhun cúu jeē cácahān i, jíin na vé cúu jeē castéén ñihin i.

⁸ Te jíiní yō jeē iyó váha ley un, te núu jecūhun ni yō ndese jéjníñu. ⁹ Chi cánuú sáha yó cuenta jeē tu ní jécōo ni ñin ley jeē siquī ñayuu ndaā, chi sa suhva siquī ñayuu jeē tu cájetáhú, jeē níhni ni, jeē casáha jniñu néé, jeē casáha cuēchi, jeē tu cáchiñúhún Yaā Dios ni tu cáncandíje ley yā, jeē cájehni tatá jíin náná, jíin jéē cájehni ndīyí. ¹⁰ Te suni ni jecōo siquī ñayuu cájica jnéni, jíin téé casáha ndīyí jíin jnáhan yí, jíin ñayuu casacuíhná inga ñayuu, jíin ñayuu castáhú, jíin ñayuu cácahān ñihin jnūhun yáá. Te ni

jecōo siquī tāca gá ñayuu jeē casáha jniñu tu quíjnáhan jíin jnūhun ya jeē steén ndaā váha. ¹¹ Te jnūhun ya un cúu jnūhun yōhyo jéhnu jeē jnáma Yaā Dios yohó. Te yōhyo ndetū Yaā cúu ya. Te ni tejníñu ya ruhū nácani ri jnūhun ya.

Jeē nácuatáhú Pablo siquī jeē ní cundáhú ni yā de

¹² Te nácuatáhú rí nuū Jítóho yō Jesucristo, Yaā ni jēhe fuerza ini rī, chi ni quihin ya ruhū ni sáha ya jeē cuu squícu ri, te ni tejníñu ya ruhū nácani ri jnūhun ya. ¹³ Te súcuan ni sáha ya jíin rí vēsú ni cahān ndevāha ri siquī yā nde saá, te ni sáha ndevāha ri jíin ñayuu cáncandíje, te xeēn ni sáha ri. Te vēsú súcuan te ni cundáhú ni yā ruhū, chi ná tu candíje ri yā nde saá, te tu ní jécūhun ni rī na vé cúu jeē sáha ri. ¹⁴ Súcuan ni sáha Jítóho yō jeē váha ndasí jíin rí. Te ni sáha ya jeē candíje ri jíin jéē cundáhú ni rī jnáhan ri siquī jeē ni quíví ri ndaha Cristo Jesús.

¹⁵ Te ndaā ndije cúu jnūhun yáha, te jeē cánuú candíje ndíhi ñayuu cúu: jeē ní quiji Cristo Jesús ini ñayívi návāha jnama ya ñayuu iyó cuéchi. Te ruhū cúu téē jeē vihyá gā ni sáha cuéchi. ¹⁶ Te ni cundáhú ni Yaā Dios ruhū, návāha jíin rúhū jeē vihyá gā ni sáha cuéchi te stéén Jesucristo ndese yōhyo íne cáhnu ni yā. Te súcuan ni sáha ya jeē cúu ri ñin ejemplo nuū tāca ñayuu candíje ní cuáhān yō, návāha nihīn tahu i cotecu i ní cáni. ¹⁷ Núu súcuan te ní cáni na cáhán yíñúhún yó jeē yóhyo luu cújéhnu máá Yaā jeē cúu Rey siquī ndíhi, jeē técu ní cáni, jeē tu náá cuiti. Te tu cúu coto yó núu yā vijna, te máá ñin-ni ya iyó, te ndíchí yá. Amén.

¹⁸ Nájñuhun sēhe ri cúu ró Timoteo, te jniñu yáha téjníñu ri rohó, jéē na ndúcú ndeyí ró siquī jniñu váha. Te na cáncandíje váha ró, te na cóo ndaā anuá rō. Chi nde saá je ni cacahān táca hermano jíin jnūhun Yaā Dios jeē súcuan condiso jniñu ró. ¹⁹ Chi sava ñayuu tuá iyó ndáā anuá i nuū yā, te ni casnáā i jnūhun cáncandíje i. ²⁰ Himeneo jíin Alejandro cúu uū téē ni casáha súcuan. Te je ni siaá rī de nuū Satanás, jeē stóho ún de, návāha jíin jnúndóho ún te cutūhva de jeē ma cáhán ndevāha ga de siquī Yaā Dios.

*Siquī ndese cacān tahu yō***2**

¹ Núu súcuan te xīhna gā ndácu ri jeē cacán tahu rō jehē tāca ñáyuu. Te cahān ndahú ró jehē i, te cacān rō na-ni na vé jíni ñúhún i, te nacuatáhú ró nuū yā jeē siquí i. ² Te cacān tahu rō jehē tāca tée cácujuhnu jíin jéē ndácu jniñu, návāha sáha de jeē cuu coyūcu váha yó te tú na jnūndóho coo siquí yō, te cuu chiñúhún váha yó Yaā Dios te sáha yíñúhún yó jíin táca-ni. ³ Chi yāha cúu jeē váha jeē núnjahan ni Yaā Dios, Yaā jnáma yóhó. ⁴ Chi máa yá cuní yā jnama ya tāca ñáyuu te cuni i ndese íyó jnúhun ndaā yā. ⁵ Chi íyó ñn-ni Yaā Dios, te suni íyó ñn-ni Yaā jeē cahán jíin Yaā Dios jehē ñáyuu. Te Yaā un cúu máa Jesucristo jeē ní nduu tēe. ⁶ Te ni socō yā maá yá ni jihī yā jeē ní chunaa yā cuēchi ndihī yó. Te ná ni quiji máa quívī ún, te ni quejéé ní canacani jnúhun ún. ⁷ Te jeē siquí yúcuan ní jeni ya ruhū cúu ri apóstol jeē nácani ri jnúhun ya, návāha stéén rī nuū ñáyuu tēcá nación jeē tu jíin jnúhun ya, jeē na cándije i jnúhun ún te sáha i jniñu ndaā. Te siquí jeē candije ri Cristo te ndaā cúu jeē cahán rī.

⁸ Núu súcuan te cúní rī jeē ndihī-ni lugar na cacán tahu tāca tée. Te na cóo ndoo ánuá de jeē ma quití ni de ni ma tejnáhan de. ⁹ Te suni súcuan tēcá ñahan, na cási váha ña máa ña nájnūhun cánuú, návāha ma cóo jnúhun canu. Te ma cóndihvī ni ña jeē sáha luu ndasí ña xinī ña, chí jéē cuhun ña siquí oro chí perla chí sahma váha ga. ¹⁰ Chi sa suhva na quéndōo luu ánuá ña jíin jniñu váha sáha ña, nájnūhun cánuú sáha ñahan ndoo ánuá jeē cájejniñu nuū Yaā Dios. ¹¹ Te núu cáhīn ña jíin ñáyuu cascuáha jnúhun ya, te na cúní nahín ña te cuatáhú ña. ¹² Chi tu jéhe ri jnúhun jeē steén ñahan nuū ñáyuu ndutútú, ni jeē ndácu ña jniñu nuū tēe. Chi sa suhva na cúní nahín ña. ¹³ Chi xīhna gā Adán ni sáha ya, te sáa te ni sáha ya Eva. ¹⁴ Te tu ní stáhú jexeén Adán, chí sa suhva ni stáhú un ñasihí de, te ni sáha ña cuēchi. ¹⁵ Te jeē scácu tēcá ña sēhe te coo váha ña, te núu na quéndōo ña jíin jnúhun cándije ña ya, jíin jéē cundáhú ni ña jnáhan ña, jíin jéē cóo ndoo ánuá ña, jíin jéē sáha yíñúhún ña.

*Ndese cánuú coo tēe cándiso jniñu nuū ñáyuu cáncandije***3**

¹ Ndaā cúu jnúhun yáha: Núu ñn tēe cúní de condiso jniñu de condito de ñáyuu cáncandije, te váha jniñu ndúcú de sáha de. ² Núu súcuan te tēe ndiso jniñu nuū ñáyuu cáncandije, cánuú jeē ma cóo ni ñn jeē nihín ñáyuu cuēchi siquí de. Te na cóo ñn-ni ñasihí de, te cájí coo ni de, te ndito coo xinī de, te sáha yíñúhún de. Te cánuú jeē niní cuanúu de vehe nuū ñáyuu cájica, te níní stéén váha de jnúhun ya. ³ Te ma cúu de tēe nájini, te ma tejnáhan de, te ma ndíyo ni de xūhún. Chi sa suhva coo váha ni de, te coo vítá ni de, te ma cutóo ni de siquí xúhun. ⁴ Te cánuú jéē na ndácu váha de jniñu ini vehe de, te sáha de jeē squícu váha sēhe de te coo yíñúhún i nuū de. ⁵ Chi núu ñn tēe tu jíin de ndacu váha de jniñu ini vehe de, ¿te ndese cuu condiso jniñu de nuū ñáyuu cáncandije nuū Yaā Dios? ⁶ Núu súcuan te tēe ndiso jniñu nuū ñáyuu cáncandije, ma cúu de tēe jeē saá ní candije, chí núu súcuan te sanaa te sándúxí de máa de, te ñnuú-ni cuēchi jecondee siquí de jíin jéxeén. ⁷ Te cánuú cuu de tēe jeē suni nde ñáyuu tu cáncandije, cuajnúhún i de, návāha ma nihín i cuēchi siquí de, te ma cúndeyí jexeén jíin de.

Ndese cánuú coo tēe cájejniñu mēhñu ñáyuu cáncandije

⁸ Te suni súcuan tēe cájejniñu mēhñu ñáyuu cáncandije, cánuú jéē na cóo yíñúhún de, te na squícu de jíin jnúhun cáhán de. Te ma cúu de tēe nájini, te ni ma ndíyo ni de xūhún. ⁹ Te na cuíñi nihín de jíin jnúhun cáncandije yó jéē ní yisāhi ndé jenahán, te na cóo ndoo anuá de. ¹⁰ Te cánuú jéē xīhna gā coto ndee rō de, te núu ni jíin rō jeē tú na cuēchi de, yūcuán na te cuu cuajniñu de mēhñu ñáyuu cáncandije. ¹¹ Te suni súcuan ñasihí de jíjnáhan ña, cánuú coo yíñúhún ña, te ma sajnúhún ña, te cájí coo ni ña, te squícu váha ña tēcá-ni jniñu. ¹² Te tēe cájejniñu mēhñu ñáyuu cáncandije, na cóo ñn-ni ñasihí de, te na ndácu váha de jniñu nuū sēhe de jíin núu ñáyuu vehe de. ¹³ Chi tāca tée cájejniñu váha mēhñu ñáyuu cáncandije, chí váha quéndōo yíñúhún de, te

níhín de modo jeē cají gá nácani de jnūhun Cristo Jesús jeē cá candíje yó.

Jnūhun sāhi yá jeē cá candíje yó

¹⁴ Te vēsú ñūhun ni rī cuajeē yachī rī coto jnāhan yó, te tēe ri jnūhun yáha cuájeē nuū rō, ¹⁵ návāha núu cucuéeé rí, te je jíni rō ndese cánuú sáha vāha ñayuu cácuu sēhe Yaā Dios. Chi máá i cácuu ñayuu cá candíje nuū Yaā Dios, Yaā técu. Te máá i cásáha jeē iyó cutú jnūhun ndaā, chi cáhīn nīhin i jíin. ¹⁶ Te jendaá ndije chi jéhnū ndasí cúu jnūhun yáha jeē cá candíje yó, jeē ní yīsāhi ndé jenahán:

Yaā Dios ni steén yā maá yá, chi ni nduu ya tēe,
te Espírītu ni steén jeē iyó ndaā jniñū ni sáha ya,
te tācá ndajéhé andiví ní cajito jniñū ní sáha ya.
Te ni jíitē núu jnūhun ya nuū ñayuu tācá nacióon,
te ni cacandíje ñayuu ní ñáyiví núu yā,
te ni ndaa ya cuanuhun yā andiví.

Siquī ñáyuu cájica yátá nuū jnūhun cá candíje yó

4

¹ Te cájí stéén Espírītu Yaā Dios jeē quiví cuándihí te coo sava ñayuu caca yátá i nuū jnūhun cá candíje yó. Te cuatáhú i tāca jéē cá cahān jnūhun stáhú jíin jnūhun ní castéén tachī. ² Chi cuni nahín i jnūhun cástéén tēe cástáhú-ni, jeē tu cá cahān ndaā de. Chi tēe un ní cahije ndasí ni de jíin jnūhun stáhú, te tuá sáha jíin ánuá de jeē nácani ni de. ³ Te cahān de jeē cuēchi cúu jeē coo ñasihí tēe, te suni súcuan núu cají ñayuu sava ndeyu. Te ndeyu ún chi ni sáha Yaā Dios jeē cúu ñayuu cá candíje jeē jíin jnūhun ndaā, návāha cají i te nacuatáhú i nuū yā. ⁴ Chi ndihí jeē ni sáha Yaā Dios, iyó váha, te ma squexícó yō ni ñin, chi sa nacuatáhú yó te cají yō. ⁵ Chi jíin jéē cáhu yó jnūhun Yaā Dios jíin jéē nácuatáhú yó nuū yā, te iyó ndoo ndihí-ni.

Tēe jéjníñū vāha nuū Jesucristo

⁶ Te núu stéén rō jnūhun yáha núu tācá hermano, núu súcuan te cuu ró tēe jéjníñū vāha nuū Jesucristo, te ije ró jíin jnūhun vāha ya jeē candíje ró, chi ni cutūhva ró te ndíquín rō. ⁷ Te ma quiví nduu rō jíin

táca jnūhun jeē cúu cuento-ni jeē cájeni cáhā ni ñayuu. Chi níni na scuáha ró ndese chiñúhún váha ró Yaā Dios. ⁸ Chi jeē scuáha yó ejercicio jeē cóo ndacuī yiquí cúñu yō, jecu-ni níhín jniñū. Te jeē scuáha yó chiñúhún váha yó yá, suu yūcuan cúu jeē váha níhín jniñū siquī tācá-ni, jeē cúu vida yáha jíin vida quiji. ⁹ Te ndaā ndije cúu jnūhun yáha, te jeē cánuú candíje ndihí ñayuu cúu. ¹⁰ Te jeē siquí yáha cúu jeē sájniñū nīhin yó siquí jnūhun ya te ndóho yó jéē cá cahān ndevāha i nuū yō. Chi ñúhún ni yō jeē coto yó núu maá Yaā Dios, Yaā técu. Te máá yá cúu Yaā jnáma tāca ñayuu, te ñayuu cá candíje jnūhun cúndáhú ni yā i, máá i cúu jeē jnáma ya.

¹¹ Tāca jnūhun yáha cánuú jéē ndacu ró núu i te stéén rō. ¹² Ma cuáha ro jnūhun jeē cujéē ni ni ñin i nuū rō siquí jeē suchí ró. Chi sa coo ró ñin ejemplo nuū ñayuu cá candíje, jeē cúni i ndese vāha cáhān rō, ndese vāha sáha ró, ndese cúndáhú ni rō jnāhan ró, ndese cándíje ró, ndese iyó ndoo ánuá rō. ¹³ Te níni ndé ná tu jinū rī nuū rō, te condihvī ni rō jeē cáhu ró tutu iñ nuū hermano cándutútú, jíin jéē stihvī ni rō i, jíin jéē steén rō nuū i. ¹⁴ Ma cúhuun ni rō jíin táhū jeē ni jéhe Yaā Dios nuū rō jeē nácani ró jnūhun ya. Chi tāca tēe jéhnū cándiso jniñū nuū ñayuu cá candíje, ni casóo de ndaha de xinī rō, te ni sáha Yaā Dios jeē ní cacahān de jeē súcuan condiso jniñū ró.

¹⁵ Núu súcuan te cocuu ró jíin táca jniñū yáha, te condihvī ni rō jíin, návāha cuni tāca ñayuu jeē váha íje ró cuáhān rō jíin. ¹⁶ Coo cuidado rō jeē caca ndaā rō jíin jéē steén vāha ró jnūhun ya, te cuiñi nīhin ró jíin ndihí. Chi núu súcuan sáha ró te quendōo vāha ánuá maá ró jíin ñayuu chuhun ni jnūhun cáhān rō.

Ndese sáha vāha yó jíin ñáyuu cá candíje

5

¹ Ma cúxeēn rō nuū tāca tēe jéhnū, chi sa cahān vāha ró jíin de jeē ma stívi de, nájñūhun cáhān rō jíin tátá rō. Te tāca tēe suchí, suni cahān vāha ró jíin de nájñūhun jíin ñani rō. ² Te suni súcuan cahān rō jíin táca ñahan jéhnū, nájñūhun jíin náná rō. Te suni súcuan jíin táca ñahan súchí, nájñūhun

jín cuáha ró, te yíñúhún ndajnūhun ró jín ña.

³ Te ñayuu cácondíje na cuáha i jeē jíní ñúhún ñahan ni caquendōo ndáhú, te núu ni quendōo ndáhú ndije ña jeē tú na ñayuu condito ña. ⁴ Chi ñn ñahan ní quendōo ndáhú, núu íyó séhe ña chí séhe chání ña jeē jévāha, te na cóto máá i ña. Chi cánuú cutūhva i jeē xíhna gā nuū ñáyuu vehe i squícu i coto i. Te na nácoto i náná i tátá i siquī jeē ní cacondito ña i. Chi yāha cúu jniñu váha jeē nújnahan ni Yaā Dios. ⁵ Te ñn ñahan ní quendōo ndáhú ndije jeē máá ñn na ña, ñúhún ni ña jeē maá Yaā Dios condito ya ña, te tu jécuiñi ña jeē jicán tahu ña nduú ñuú. ⁶ Te sa suhva núu máni ndíhvī ni ña siquī tāca jéē cúsiñi ni maá-ni ña, yūcuán na te vésú técu ña, te nájñūhun je ni jihī ña. ⁷ Jniñu yáha ndacu ró núu ñáyuu, návāha ma cóo cuēchi siquī i. ⁸ Te núu ñn ñayuu tu ndíto i jñahan vehe i, te víhyá gā ñayuu ini vehe i, núu súcuan te sáha i jniñu jeē tu quíjnahan jín jñūhun cándíje yó, te cúu i ñn jeē neé gá vésú ñáyuu tu cácondíje.

⁹ Te ñahan viuda cuu quīvi síhvī ña nuū lista ñayuu jeē cáchindéé ñáhán ró jín xúhun, te núu je ni jñu ña unī xico cuiyā, te núu ni ñyo ñn-ni yī ña. ¹⁰ Te suni cánuú jéē cuajñúhún ñáyuu ña jeē váha jniñu ni sáha ña, núu jeē ni scuéhnu vāha ña sēhe ña, jín jéē ní jēhe núu ña vehe nuū ñáyuu cájica, jín jéē ní jejñiñu ña nuū hermano cácondíje, jín jéē ní chindéé ñáhán ña ñayuu cándoho jñūndóho, jín jéē ni sáha ña tāca gá jniñu váha.

¹¹ Te tācá ñahan viuda jeē iyó suchí gá, chi ma soó ró síhvī ña nuū lista. Chi sanaa te nducú ña jeē cúsiñi ni maá-ni ña, te ma cóndíhvī ni ña siquī Cristo, chi cuu ni ña condeca tucu ña tē. ¹² Te súcuan jecondee cuēchi siquī ña, chi tu ní squícu ña jeē ni jéjñūhun ña ná ni jecosō síhvī ña nuū lista. ¹³ Te suni caca cuu ña tācá-ni vehe te quee cúxí ña. Te nasūu máni jeē cáca cúxí ña, chi suni siquī jeē sajnúhún ña, te quīvi nduu ña cahān ña jñūhun jeē tu íyó váha jeē cahán ña. ¹⁴ Jeē yúcuán cúní rī jeē tācá ñahan viuda jeē iyó suchí, na nándāha ña, te scuéhnu ña sēhe, te coto vāha ña vehe ña, návāha ñayuu cácuu contra ma cúu cahān i siquī ña. ¹⁵ Chi sava

ñahan viuda je ni cajica yátá ña te sáha ña jniñu jeē cuní Satanás.

¹⁶ Te núu ñn tēe chí ñn ñahan cándíje, núu íyó ñahan viuda vehe i, te na cóto máá i ña. Te ma cóndee gasto ña siquī grupo ñayuu cácondíje, návāha cuu cuáha vāha i nuū ñahan viuda jeē tu ndé ñn coto ña.

¹⁷ Te tāca tēe jéhnú cándito ñayuu cácondíje, na jécunaā doble yāhu de, te núu cándíhvī ni de cástéén de cánacani vāha de jñūhun ya. ¹⁸ Chi cúu nájñūhun cáhán tutu ñi: Ma cánda stiquī caxīn tī trigo, núu ma cuáha ró jéē cáji tī. Te suni cáhán: Tēe jeē sájñiñu tátú, jíní ñúhún quiyāhu de, áchí.

¹⁹ Ma cuajñúhún ró te núu jéquin ñayuu cuēchi siquī ñn tēe jéhnú cándito ñayuu cácondíje te núu tu íyó úu chí úní testigo. ²⁰ Te núu cásaña ñayuu cuēchi, te cánuú cuxeēn rō nuū i, jító jínúu ndíhi ñayuu, návāha na cónso ñyo sava ga i. ²¹ Te cáhán ñhin ri jín ró, jító máá Yaā Dios jín Jítoho yō Jesucristo jín táca ndajéhé yā jeē ní nacāji ya: Squícu vāha ró jniñu yáha, te ma sáha ró cuenta ndese cúu ñn ñn i, chí inuú-ni sándaā rō siquī ndíhi-ni i. ²² Ma cáni yachī rō ñn tēe jeē condiso jniñu de nuū ñáyuu cácondíje, chí xíhna gā coto ndee rō de. Chi sanaa te stívi de, te cuēchi de suni condee siquī rō jín de. Te coto ró máá ró jeē ma quívi ró jín jniñu neé.

²³ Te siquī jeē núu-ni núu-ni chúhú chīji ró, te ma cóho ga rō máni ndute, chí suni coho ró jecu vino.

²⁴ Cuēchi sava ñayuu chi je íyó ndijin nde ná tu quīvi i nuū cúndaā cuēchi i. Te cuēchi sava ga i chí cúcuéé te natūu nahín. ²⁵ Te suni súcuan tācá jniñu váha, chí íyó ndijin. Te vésú ná tu natūu jniñu váha ún, te ma cúu quisāhi ní cáni, chí natūu nahín.

6

¹ Tāca ñáyuu cácuu mozo, na cóo yíñúhún váha i nuū patrón i, návāha ma cahán neé ñayuu siquī Yaā Dios jín siquī jñūhun ya jeē castéén yō. ² Te mozo jeē yíhi nuū patrón cácondíje, ma cáni ni i jeē cūhva-ni sáha yíñúhún i nuū de siquī jeē hermano cácondíje cácuu de. Chi sa cuajñiñu vāha ga i nuū de, chí tēe cándíje tēe manī i jín cúu tāca

tée un jéē sájniñu i nuū. Jnūhun yáha stéén rō te stíhvī ní rō i.

Siquī jeē chiñúhún váha yó yá te cusī ni yō jín cúhva jeē névāha-ni yó

³ Te núu ndé tée stéén de jnūhun tú ndaā jeē tu quiñáhan jín jnúhun vāha ndaā maá Jítoho yō Jesucristo, jín jnúhun ni steén Yaā Dios jeē cá candíje yó, ⁴ núu súcuan te máni tēe ndúxí tēe tu jécūhun cuítī ni cúu de. Chi cánéé xínī de, chi máni cúni de tejnáhan de siquī tāca jnúhun stéén de. Te tācá un sáha jeē cá cucuésún ni, jín jéē cá tejnáhan, jín jéē cá cahān ndevāha, jín jéē cá jeni néé ni siquī jnáhan, ⁵ jín jéē máni cá stáhān jnáhan. Súcuan cá sáha tēe jeē ní ndunéé xínī, jeē tu cá jini jnūhun ndaā. Te cá jeni ni de jeē nihín de cuehē xūhun siquī jnúhun cá candíje de stéén de. Na cújiyo ró núu ñayuu cá ndāa súcuan. ⁶ Te jendaá jeē yó hō vāha quéndōo yó te núu chíñúhún váha yó yá, te núu cúsiñ ni yō jín cúhva jeē névāha-ni yó. ⁷ Chi tú na vé ni cácu yó jín ñayivī yáha, ni tú na vé condiso yó quihín yō jín núu na cúu yō. ⁸ Te núu íyó jéē cá ji yō jeē cusúcún yó, te na cúsiñ ni yō jín yúcuan-ni. ⁹ Chi ñayuu jeē cuní cucúcá, chi yachī quívī i cuēchi jeē jito ndee jexeén i. Te quívī i jín cuéhē jniñu cánéé jniñu stívī jéē ndíyo ni i. Te tācá un sáha jeē tívī ñayuu te jnahnū ndetū i. ¹⁰ Chi jeē ndíyo ni yō xūhún, yúcuan sáha jeē quejéé táca jniñu néé. Te sava ñayuu jeē ndíyo ni xūhún, ni castóo i jnūhun cá candíje i, te ni canihín i cuehē ndasí jnúndóho.

Jeē na ndúcú ndéyí yó siquī jnúhun cá ndíje yó

¹¹ Te róhó chi tēe jéjníñu nuū Yaā Dios cúu ró, te cunu ró coto ró táca cuéchi yáha. Te condiquīn rō jniñu ndaā, te chiñúhún váha ró Yaā Dios, te candíje vāha ró, te cundáhú ni rō jnáhan ró, te cuandeyí ni rō, te coo vītá ni rō. ¹² Te nducú ndéyí ró siquī jnúhun cá ndíje yó yá. Te cuiñi nīhin ró jín jnúhun jeē ni nīhín tahu yō cotecu yō ní cáni. Chi jeē yúcuan cúu jeē ní cana ya rohó, te cáji ní cahān rō jeē vāha cá ndíje ró yá, jito jínúu cuehē ñayuu. ¹³ Te cáhān nīhin ri jín ró, jito maá Yaā Dios, Yaā jeē sáha jeē técu tācá-ni, jín Jesucristo, Yaā jeē cá ji ní cahān yā ni nacani ya jnūhun vāha nuū Poncio Pilato.

¹⁴ Squícu vāha ró jniñu ndácu ya nuū rō, te ma stívī ró sáha ró, návāha ma cahán ñayuu cuēchi siquī rō. Te súcuan sáha ró ní ndé quívī ndíji Jítoho yō Jesucristo. ¹⁵ Chi quiji ndijin yā maá quívī jeē ní jeni Yaā Dios. Te Yaā Dios chi maá ñn-ni ya cúu Yaā yó hō ndetū, te jnī ya ndihī poder. Te cúu ya Rey nuū tāca rey, jín Jítoho nuū tāca jítoho. ¹⁶ Te máñúhún-ni ya cúu jeē iyó ní cáni. Te ndéé yá ñn lugar nuū ndí ndaxín, nuū ma cúu quívī yó. Te ni ñn ñayuu ñayivī yáha tu ní jito cuítī i nuū yā, te ni ma cúu coto i nuū yā. Te ní cáni na cóo yíñúhún yó nuū yā, chi jnī maá yá poder ní cáni. Amén.

¹⁷ Te cahān rō jín ñayuu cucá ndajniñu ñayivī yáha, jéē ma cúndúxí i. Te ma ténuū i xūhún i, chi yachī naa ún. Chi sa suhva na ténuū i jeē coo vāha i sáha Yaā Dios, Yaā técu, chi maá yá jéhe cuehē yā tācá-ni jeē cúsiñ ni yō jín. ¹⁸ Te ndacu ró jniñu nuū i jeē na sáha vāha i, chi jeē sacúcá ndije i maá i cúu jeē sáha i tācá jniñu vāha. Te na cúu i ñayuu vāha ni jeē cuáha i jeē cúu jnáhan i. ¹⁹ Te súcuan caya i cuehē jniñu vāha jeē coo cúcá i nuū yā ní tiempo jeē quiji. Te nihín tahu i cotecu i ní cáni.

Jniñu sándihī ndácu Pablo nuū Timoteo

²⁰ Te róhó Timoteo, condito ró táca jniñu ní chihī ya ndaha ró. Te ma quívī nduu rō jín táca jnúhun cáhā-ni, cuenta ñayivī yáha, jín táca jnúhun stáhú jéē cá cahān i jeē jnúhun ndíchí ndāa cúu. ²¹ Chi sava ñayuu cá ndiquīn táca jnúhun yáha, ni cajica yátá i ni castóo i jnūhun cá candíje i ya.

Te ñúhun ni rī jeē Yaā Dios na sáha ga yā jeē vāha róhó. Súcuan na cóo. Amén.

CARTA UU JEE NI TEE SAN PABLO APOSTOL NUU TIMOTEO

¹ Máá rí cúu Pablo, apóstol Jesucristo, chi súcuan ni nujnahan ni Yaā Dios ni tají yá ruhū jeē nácani ri jnūhun jeē ni jéjnūhun ya jeē cótecu yō ní cáni siquī jeē yíhi yó ndaha Cristo Jesús. ² Te téé ri carta yáha cuájeē nuū rō Timoteo, chi cúu ro nájnūhun sēhe ri jeē maní rī jíin. Te ñūhun ni rī jeē Tatá yō Yaā Dios jíin Jítóho yō Jesucristo, na sáha ga yā jeē váha róhó, te cundáhú ni yā rohó, te sáha ya jeē coo ndeyí coo siī ni rō.

Jeē nácani de jnūhun Cristo

³ Níní tu náā ni rī cacān tahu rī jehē rō nuū Yaā Dios nduú ñuū, te nácuatáhú rí nuū yā jeē siquí rō. Chi nuū maá yá jejníñu ri, nájnūhun ni casáha tāca jíi rī, te íyó ndoo ánuá rī nuū yā. ⁴ Te núcūhun ni rī jeē ni ndáhyū rō ná ni quenda ri cuahān rī. Te cúu ni rī ndacoto jnáhan yó, návāha cusī ndasí ni rī. ⁵ Te núcūhun ni rī jeē váha ndije cándíje ró Cristo, nájnūhun ni cándíje náná jéhnú ró Loida, jíin náná rō Eunice xihna gā. Te cúcāhnu ni rī jeē suni súcuan cándíje máá ró vijna.

⁶ Te jeē yúcuan nástíhví ni rī rohó jéē na cóndíhví gā ni rō jíin táhū jeē ni jéhe Yaā Dios nuū rō jeē nácani ró jnūhun ya. Te tahu un ní nihīn rō ná ni tee ri ndaha ri xinī rō. ⁷ Chi Espíritu jeē ni jéhe Yaā Dios nuū yō, tu sáha jeē yūhu yó nacani yó jnūhun, chi sa sáha jeē iyó fuerza ini yō, jíin jéē cundáhú ni yō jnáhan yó, jíin jéē ndíto íyó xinī yō. ⁸ Núu súcuan te ma cúcanu rō nacani ndaā rō jnūhun máá Jítóho yō. Te suni ma cúcanu rō jeē siquí maá rí jeē íne ri vecāa siquī jnūhun ya. Chi sa cuāha ró jnūhun ndoho ró jíin rí siquī jeē cánacani yó jnūhun jnáma ya yohó, núu ndese ni jéhe Yaā Dios fuerza ini yō. ⁹ Chi ni jnama ya yohó, te ni cana ya yohó jéē coo ndoo ánuá yō cuajníñu yó núu yā. Te tu ní cána ya yohó síquī jeē váha ni sáha yó, chi siquī jeē ní tee ni maá yá jeē cundáhú ni yā yohó jéē yíhi yó ndaha Cristo Jesús. Chi nde ná tu jecōo ñayíví, te je cundáhú ni yā yohó. ¹⁰ Te vijna jeē ní

quenda ndijin Jesucristo, Yaā jnáma yóhó, te ni steén cají Yaā Dios jeē cundáhú ni yā yohó. Chi máá Cristo ni snáa yā poder cuehyí jéhní yóhó, chi jíin jnūhun jnáma ya yohó ni steén cají yá nuū yō jeē cótecu yō ní cáni chi ma jnahnú ndetū yō.

¹¹ Te ni jeni Yaā Dios ruhū jeē nácani ri jnūhun ún, te ni tají yá ruhū cúu ri apóstol jeē steén rī nuū ñayuu tācá naciōn jeē tu jíin jnūhun ya. ¹² Te siquī un cúu jeē ndóho ri tāca jnúndóho yáha íne ri vecāa. Te tu cúcanu rī, chi jíin rī ndese Yaā cúu Yaā candíje ri, te cúcāhnu ni rī jeē cúu coto ya jniñu jeē ní chihi ya ndaha ri nde vijna te nde quiví ndíji ya.

¹³ Te cuiñi níhin ró jíin táca jnūhun ya jeē steén ndaā, suu jnūhun jeē ní stéén rī nuū rō. Te caca ró jíin jnūhun cándíje yó, te cundáhú ni rō jnáhan ró siquī jeē yíhi ró ndaha Cristo Jesús. ¹⁴ Te condito ró táca jniñu váha jeē ní chihi ya ndaha ró, sáha poder maá Espíritu Santo jeē ndeé ini yō.

¹⁵ Je jíin rō jeē tāca ñayuu cáyūcu Asia ni castóo i ruhū. Te uū i cúu Figelo jíin Hermógenes. ¹⁶ Te jíicán tahu rī jeē cundáhú ni Jítóho yō ñayuu vehe Onesíforo, chi cuehē jíinu ni nanihīn ni rī ni sáha de, te tu ní cúcanu de siquī rī jeē ní ine ri vecāa. ¹⁷ Chi sa suhva ná ni quiji de ñuu Roma, te ni nanducú yúcún de ruhū nde ni nanihīn de ruhū. ¹⁸ Te jíicán tahu rī jeē maá Jítóho yō cundáhú ni yā de quiví ndíji ya. Te je jíin váha máá ró ndese yóhyo ni chindéé ñáhán de ruhū ná ni cahīyo ri ñuu Efeso.

Jeē cúu yó nájnūhun soldado vāha nuū Jesucristo

2

¹ Núu súcuan te róhó, séhē mání, na cóo fuerza ni rō siquī jeē yíhi ró ndaha Cristo Jesús te sáha ya jeē váha róhó. ² Te tāca jnūhun jeē ní jini ró ní cahān rī, jito jíinú ñayuu cuehē, jnūhun ún na nástéén rō nuū tēe cásquícu vāha, návāha suni cuu stéén tucu máá de nuū sáva ga i.

³ Te róhó na cuándeyí ni rō coto ró jnúndóho, chi cúu ró nájnūhun ñn soldado vāha nuū Jesucristo. ⁴ Ni ñn soldado jeē ín nuū guerra, tu sájnéñu de máá de jíin jniñu máá de, chi cánuú jeē sáha de mání máá jéē

ndácu tēe ní tejniñu de. ⁵ Te suni súcuan tēe cásiquí deporte, ma nihín de premio te núu tú condihví ni de cosíquí váha de máa modo chíjniñu. ⁶ Te tēe sájniñu nihin ñuhun, máa de cúu jeē nihín xīhna gā jeē cuáha itu. ⁷ Nacani ni rō síquī jeē cahán rī, te máa Jítóho yō sáha ya jeē jécūhun ni rō síquī ndíhi.

⁸ Te cocuhun ndasí ni rō Jesucristo, Yaā ní quiji yucūn rey David, te ni natecu yā mēhñu ndíyi, nájnūhun cahán jnūhun jnáma ya yohó jéē nácani rī. ⁹ Te jeē síquí jnūhun un ndóho rī jnūndóho, te nde ní cajihni i ruhū íne rī vecāa nájnūhun ñn tēe ní sáha cuēchi xeēn. Te jnūhun Yaā Dios chi ma cúu cuhni i jeē ma cuité núu. ¹⁰ Núu súcuan te jéndeýí ni rī jító rī táca jnūndóho yáha síquí jeē cundáhú ni rī ñayuu jeē ní nacāji ya, návāha suni cācu máa i jeē quívi i ndaha Cristo Jesús, te quihín i nuū cujéhu i ní cáni. ¹¹ Chi ndaā cahán jnūhun yáha:

Núu vésú na cúu yō jeē síquí yā, te suni cotecu yō jíin yá,

¹² te núu cuandeyí ni yō ndoho yó, te suni ndacu yó jniñu jíin yá.

Te núu ma cuajnúhún yó yā, te suni ma cuajnúhún yá yohó.

¹³ Te vésú tu squícu vāha yó, te máa yá chi máni squícu ya,

chi tu cúu sáfalta yā, chi squícu ya jeē ni cáhān yā.

Tēe sájniñu squícu vāha jíin jnūhun ya

¹⁴ Jnūhun yáha na nástíhví ni rō ñayuu, te cahān nihin ro jíin i, jító máa Jítóho yō, jeē ma téjñahan i síquí táca jnūhun sáa-ni. Chi tu ndé jéjniñu cuiti, chí sa stívi ñayuu jíni sōho. ¹⁵ Te nducú ndéýí ró jeē cuajnúhún Yaā Dios rohó, jéē cúu ró tēe sájniñu squícu vāha jíin jnūhun ya, návāha ma cúcanu rō nuū yā síquí ní ñn, chí vāha nacani ró jnūhun ndaā yā. ¹⁶ Te ma quívi nduu ró jíin táca jnūhun sáa-ni ñayívi yáha, chí suu sáha jeē ndúcuehē gā jniñu néé quívicoo ñayuu cácahān. ¹⁷ Te táca jnūhun cástéén i chí cúu nájnūhun ñn ndíhyi xeēn jeē sacáhú gá cuahān. Te Himeneo jíin Fileto cúu uū tēe jeē casáha súcuan. ¹⁸ Chi tēe un ní cajica yátá de nuū jnūhun ndaā, te cácahān de jeē jé ni cuu ni canatecu ndíyi. Te súcuan cásaca nuu de xinī sava ñayuu cácaandíje. ¹⁹ Te Yaā

Dios ni jeni ya ñayuu maá yá, te íyó cutú ndaā i jeē ma cáca yátá i, nájnūhun yósó núu tútu i: Je jíni Jítóho yō Yaā Dios táca ñayuu jeē yíhi ndaha máa yá. Te suni cáhān: Táca ñayuu jeē ndácunehen síhví Cristo, na cújiyo i nuū jniñu néé, áchí.

²⁰ Te ini ñn vehe cáhnu íyó cuéhē cohō, nasūu máni cohō oro cohō plata, chí suni cohō yujnu cohō ñuhun. Te íyó jéē fino te íyó jéē corriente. ²¹ Te núu ñn ñayuu sándoo i máa i jeē quénda i nuū táca jniñu néé, te cuu i nájnūhun ñn cohō fino. Te coo ndoo coo i i nuū Jítóho yō, te nihín jniñu i ndese cúní máa yá. Te coo tūhva i jeē sáha i táca jniñu váha.

²² Núu súcuan te cunu ró coto ró táca jéē tú vāha jeē cándiyo ni tēe suchí. Te condiquín rō jniñu ndaā, jíin jnūhun cándíje ró yá, jíin jnūhun cundáhú ni, jíin jnūhun coyūcu máni jíin jnáhan. Te súcuan sáha ró ndé jíin táca ñayuu ndoo ánuá jeē ndácunehen síhví máa Jítóho yō. ²³ Te ma quívi nduu ró jíin táca jnūhun cánéé íi jeē tu íyó cájí, chí je jíni ró jeē sáha jeē tejñahan ñayuu. ²⁴ Te mozo máa Jítóho yō, tú vāha jeē tejñahan de, chí sa suhva cánuú jéē coo vāha ni de jíin táca ñayuu. Te coo vāha ni de stéén de, te cuandeyí ni de jíin i. ²⁵ Te jíin jéē víta ni de te caní ichí de ñayuu nihni ni. Chí sanaa te nacani ni i sáha Yaā Dios, te jecūhun ni i ndese íyó jnūhun ndaā. ²⁶ Te nducájí ni i te cācu i nuū jexeén jeē ní jniñu ún i, chí ni cundeyí jíin i jeē sáha i jeē cuní máa.

Síquí ndese coo ñayuu sáha néé quívi cuándíhi

3

¹ Te suni na jécūhun ni rō jeē quívi cuándíhi te quee quívi coo jnūndóho. ² Chí coo ñayuu jeē chíñúhún máa, te ndiyo ni i xūhún, te sátéýí i máa i, te sándúxí i máa i. Te cahān neé i síquí Yaā Dios, te cuníhni ni i nuū tatá i nuū naná i, te ma nácuatáhú i, te ma chíñúhún i Yaā Dios. ³ Te ma cóo maní i jíin jnáhan i ni ma cundáhú ni i. Te sájniñún i, te ma cúu casi i táca jéē ndíyo néé ni i, te yōhyo xeēn coo i, te quívi ni i coto i táca jniñu váha. ⁴ Te suni nastúu i jnáhan i, te ma yūhú i sáha i cuēchi, te coo ndúxí ndasí i, te nducú i jeē cúsiñi ni máa-ni i, te ma nducú i quívi i

nuū Yaā Dios. ⁵ Te sáha-ni i jeē chiñúhún i ya, te casi i nuū poder yā jeē ma sáma modo i.

Ma quívi nduu rō jín ñáyuu casáha súcuan. ⁶ Chi sava tēe ún quívi de vehe te stáhú de tǎcá ñahan cánéé jéē iyó ndasí cuéchi. Te yachí quívicoo ña jín táca jnúhun tú ndaā jeē cúsi ni ña jín. ⁷ Te vésú niní scuáha ña na-ni jnúhun, te tu cúu cuiñi jecúhun ni ña jnúhun ndaā yā. ⁸ Te nájnúhun ni casáha tēe tásí Janes jín Jambres jenahán, jeē ní canducú de casi de nuū Moisés, suni súcuan sáha tēe ún, chi nducú de casi de nuū jnúhun ndaā. Chi coo nee jeē níjnūni de, chi ma candíje ndije de jnúhun cándíje yó. ⁹ Te ma quée jniñu sáha de, chi cuni táca ñáyuu jeē tēe cánéé xíní cácuu de, nájnúhun ni cajini ñáyuu jeē ni íyo néé xíní ndíndúú tēe jeē ní nducú casi nuū Moisés.

Jniñu sándiñi ndácu Pablo nuū Timoteo

¹⁰ Te róhó chi je ni cutúhva vāha rō ndese steén rī, ndese jica ndaā rī, ndese tēe ni rī sáha ri, ndese cándíje ri yā, ndese néé ri paciencia, ndese cúndáhú ni rī jnáhan ri, jín ndese jéndeýi ni rī. ¹¹ Chi ni cajito xeēn ñáyuu ruhū, te ni ndoho ri jnúndóho. Te jíní rō táca jéē ní ndoho ri ñuu Antioquía, ñuu Iconio, jín ñuu Listra. Te jíní rō ndese ni cajito xeēn i ruhū. Te máá Jítoho yō ni jnama ya ruhū nuū ndiñi ún. ¹² Chi ndaā cúu jeē táca ñáyuu jeē ndihví ni cuajniñu vāha nuū Cristo Jesús, ndoho i jeē coto xeēn ñáyuu i. ¹³ Te ñáyuu casáha jniñu néé jín ñáyuu castáhú, chi sa víhyá gā cocuu i jín jniñu néé, chi stáhú i ñáyuu, te suni candíje máá i jnúhun stáhú.

¹⁴ Te róhó chi sa cuiñi ñihin rō jín jéē ní cutúhva rō jín jéē ní cucáhnvāha ni rō. Chi jíní rō ndese ñáyuu cúu jeē ní castéén nuū rō. ¹⁵ Chi nde ná lulí rō, te je jíní rō ndese cáhán tutu i jeē steén nuū rō ndese candíje rō jeē ni jíñi Cristo Jesús jehē rō návāha cācu rō. ¹⁶ Te ní tutu i cúu jnúhun jeē ni cáhán Yaā Dios, te vāha níhín jniñu jeē steén nuū yō, jeē cáhán nuū yō, jeē náchuhun ichí yóhó, jín jéē scuéhnvāha yóhó jín jniñu ndaā, ¹⁷ návāha tēe cájejniñu nuū Yaā Dios, ije ni de te coo túhva vāha de sáha de tǎcá jniñu vāha.

4

¹ Te cáhán rī jín rō, jito Yaā Dios jín Jítoho yō Jesucristo, Yaā quiñi ndacu jniñu, te sándaā yā jniñu ñáyuu cátecu jín ñáyuu ní cajihí. ² Cáhán ñihin ri jeē na nácani rō jnúhun ya, te stáhví ni rō i candíje i. Te niní sáha rō súcuan núu núne i chí vésú tu núne i. Te sáha rō jéē na jécúhun ni i, te cáhán rō nuū i, te caní ichí vāha rō i, te jín cuéhē paciencia steén rō nuū i. ³ Chi quee tiempo jeē ma cuajnúhún cuiñi ñáyuu jnúhun ya jeē steén ndaā vāha, chi sa cuajnúhún i jnúhun cúsi ni maá i, te nducú i cuehē maestro jeē steén nuū i máni jnúhun jeē nújnahan ni i cuni nahín i. ⁴ Te cujiyo i nuū jnúhun ndaā, te condihví ni i táca jnúhun jeē máá cuento-ni cúu. ⁵ Te róhó chi niní coo ndito ni rō, te cuandeyí ni rō jín jnúndóho, te condihví ni rō nacani rō jnúhun jnáma ya yohó, te squícu vāha rō jín jniñu ya jeē sáha rō.

⁶ Te ruhū chi je ni socō rī máá rí jeē cúu rī, te je cuacuyajni quívi cuu rī. ⁷ Te je ni cundeyí rí jeē ní nducú ndéýi rí siquí jniñu vāha, te je ni jinu ni jica ri ñayívi yáha, te tu ní siáá rí jnúhun cándíje ri yā. ⁸ Te vijna je iyó túhva premio jeē nihín rí siquí jeē ní jica ndaā rí. Chi Jítoho yō cuáha ya un núu rí máá quívi sándaā yā jniñu, chi máá yá cúu juez ndaā. Te nasūu núu máá ñn ruhū cuáha ya, chi suni cuáha ya nuū táca ñáyuu jeē cúu ni i jeē ndíji ya chí maní i jín yá.

Jeē cána Pablo quiñi Timoteo nuū de

⁹ Nducú ndéýi rō quiñi yachí rō nuū rī. ¹⁰ Chi Demas ni stóo de ruhū, chi ndíyo ni de ndajniñu ñayívi yáha, te cuahán de ñuu Tesalónica. Te Crescente chi cuahán de Galacia, te Tito cuahán de Dalmacia. ¹¹ Te máá ñn na Lucas íne jín rí. Te jeē quíji rō, te condeca rō Marcos quiñi rō jín de, chí vāha cuajniñu de jeē chindéé ñáhán de ruhū jín jniñu ya. ¹² Tíquico ni tají rí de cuahán de ñuu Efeso. ¹³ Te jeē quíji rō, te condaha rō cotón jeē ni stóo ri vehe Carpo ñuu Troas. Te suni condaha rō táca libro, te jeē cánuú gá cúu táca tutu ní tee máá rí.

¹⁴ Alejandro, tēe cúu herrero, yóhyo xeēn ni sáha de jín rí. Te máá Jítoho yō cuáha ya yāhu de jeē súcuan ní sáha de. ¹⁵ Te

condito ró máá ró nuū de, chi yōhō ni cuu de contra siquī jnūhun cástéén yó.

¹⁶ Te ná ni ine ri jeē xihna ñúhún núū tāca tóhō, te tú ni ñn tēe ní índichi jiín rí, chi ndihí de ni castóo de ruhū. Te ñúhún ni rī jeē Yaā Dios cone cáhnu ni yā nuū de. ¹⁷ Te vēsú súcuan te máá Jítóho yō ni chindéé ñáhán yá ruhū, te ni jēhe ya fuerza ini rī, te súcuan ni sínu ri ni nacani ndihí ri jnūhun jnáma ya yohó, ni cajini nahín ñáyuu tācá nación tu jíni jnūhun ya. Súcuan ni jnama Jítóho yō ruhū nuū tāca tée xeēn. ¹⁸ Te jnama ga yā ruhū nuū tācá jniñu néé, te condito ya ruhū nde quiví ri andiví núū ndácu ya jniñu. Te na cáhán yō jeē yóhō luu cújéhnu ya ní cáni. Amén.

Saludo jiín bendición jeē sándihí

¹⁹ Te cahān rō jeē sándeyí ni Prisca jiín Aquila, jiín ñáyuu vehe Onesíforo, achí rí. ²⁰ Erasto ni quendōo de ñuu Corinto. Te ni quendōo Trófimo ñuu Mileto, te cúhú de. ²¹ Te condihvī ni rō quiiji ró nde ná tu quejéé vico míjin. Sándeyí ni rō, achí Eubulo jiín Pudente jiín Lino jiín Claudia jiín táca gá hermano.

²² Te ñúhún ni rī jeē maá Jítóho yō Jesucristo na cóo ya jiín ró, te Yaā Dios sáha ga yā jeē váha róhó jíjnáhan ró. Súcuan na cóo. Amén.

CARTA JEE NI TEE SAN PABLO APOSTOL NUU TITO

¹ Máá rí cúu Pablo, mozo Yaā Dios jín apóstol Jesucristo, chi ni tají Yaā Dios ruhū jeē scándije ri ñayuu ní nacāji ya, návāha jecūhun ni i jnūhun ndaā yā jeē candíje yó, ² te cocuhun ni i jeē cótecu i ní cáni. Chi nde ná tu jecōo ñayiví te ni jejnūhun Yaā Dios jeē cótecu yō, te iyó ndaā jnūhun ni cahān yā. ³ Te vijna jeē ní quee tiempo ni jeni ya, te stéén cají yá jnūhun ya nuū yō. Te ni tejníñu ya ruhū ni ndacu ya jniñu jeē nácani ri jnūhun ya ún. Chi Yaā jnáma yóhó cúu ya. ⁴ Te téé ri carta yáha cuájeē nuū rō Tito, chi nájnūhun sēhe ri cúu ndije rō síquī jeē ínuú-ni cándije yó yá. Te ñūhun ni rī jeē Tatá yō Yaā Dios jín Jítóho yō Jesucristo, Yaā jnáma yóhó, na sáha ga yā jeē váha róhó, te cundáhú ni yā rohó, te sáha ya jeē coo ndeyí coo sī ni rō.

Jniñu ya jeē ni sáha Tito nde isla Creta

⁵ Te ni stóo ri rohó ndé isla Creta, návāha sándaā rō síquī jniñu jeē cúmanī gā cundaā, te caní rō táca téé jéhnū condito ñayuu cáncandíje táca ñuu, nájnūhun ni ndacu ri jniñu nuū rō. ⁶ Te téé jéhnū un cánuú jeē ma cóo ni ñn jeē nihín ñayuu cuēchi síquī de. Te cánuú coo ñn-ni ñasihí de. Te sēhe de cánuú cuu i sūchi cáncandíje jeē ma nihín ñayuu cuēchi síquī i jeē tu sáha váha i chí jéé níhni ni i nuū de. ⁷ Chi téé cáncujéhnū cáncandíje, cánuú caca ndaā de chí cáncandíje jniñu de síquī jniñu Yaā Dios. Te ma satéyí de máá de, ma quití yachí ni de, ma cúu de téé nájini, ma cuajnáhan de, te ma ndíyo ni de xūhún. ⁸ Chi sa cánuú jéé niní cuāha núu de vehe nuū ñayuu cájica, te níní sáha de jniñu váha, te ndito coo xiní de, te coo de téé ndaā, te coo ndoo ánuá de, te casi de modo jeē cuní maá de. ⁹ Te cánuú cuiñi níhin de jín jnúhun ndaā jeē ni scuáha de, návāha cuu stíhví ni de ñayuu jín táca jnúhun ndaā váha, te suni cuu sáha de jeē jecūhun ni ñayuu cácuu contra, te casi i yuhu i.

¹⁰ Chi iyó cuéhē ñayuu níhni ni, te cástéén i inga modo jéni ni maá i jeē súcuan cácu ñayuu, te stáhú i ñayuu. Te jnáhan yó hebreo cúu jeē vihyá gā casáha súcuan. ¹¹ Te cánuú jéé casi rō yuhu táca téé ún, chí cástéén de jnūhun jeē tu iyó váha stéén de, chí cuní de nihín de xūhun síquī ún. Te súcuan sáca nuu de xiní ndíhi ñayuu táca vehe.

¹² Te ñn téé isla Creta jeē nácani jnūhun, ni cahān de síquī jnáhan ñuu de: Jnáhan yó ñayuu Creta, chí máni ñayuu stahú cácuu i, te nájnūhun quití xéén casáha i, te máni ndíhví ni i cají cuehē i, te cúxí i, áchí de. ¹³ Te ndaā cúu jnūhun ni cahān téé ún. Jeē yúcuan na cúxeēn rō nuū i, návāha ndaā váha na cándije i. ¹⁴ Te ma sáha i cuenta táca jnúhun ni catava jnáhan yó hebreo, jeē maá cuento-ni cúu, ni ma squícu i jniñu cáncacu téé ni quendacoo nuū jnúhun ndaā.

¹⁵ Te ñayuu jeē ní ndundoo jeē níjnūní, máni modo iyó ndoo iyó váha jéni ni i jító i táca-ni. Te ñayuu tu cándije jeē tu ní ndúndoo jeē níjnūní, máni jéni ni i ñn modo tú ndoo tú váha síquī táca jéé jító i. Chi nde jeē níjnūní i jín ánuá i iyó jnéhén. ¹⁶ Te vésú cácahān i jeē jiní i Yaā Dios, te jín jniñu casáha i te jiní yō jeē tú ndije i. Chi ñayuu ndevāha ñayuu níhni ni cácuu i, te tu cúu sáha i ni ñn jniñu váha.

Jnūhun ya jeē steén ndaā váha

2

¹ Te máá rō chí níní na cáhán rō táca jnúhun jeē quijnáhan jín jnúhun ya jeē steén ndaā váha. ² Te cahān rō jín táca téé jéhnū jeē na cóo cájī ni de, te sáha yíñuhún de, te ndito coo xiní de, te candíje níhin de jnūhun cundáhú ni yā de, te cundáhú ni de jnáhan de, te cuandeyí ni de. ³ Te suni súcuan táca ñahan jéhnū, na sáha yíñuhún ña, te ma sajnúhún ña, te ma nájini ña. Te na stéén ña táca jéé váha. ⁴ Te na stéén ña nuū táca ñahan súchí jéé coo maní ña jín yí ña jín séhe ña. ⁵ Te ndito coo xiní ña, te coo ndoo ánuá ña, te coto váha ña jniñu vehe ña, te coo váha ni ña, te cuatáhú ña nuū yí ña, návāha ma cahán neé ñayuu síquī jnúhun Yaā Dios.

⁶ Te suni súcuan stíhví ni rō táca téé suchí jeē ndito na cóo xiní de. ⁷ Te róhó, cuu rō

ñin ejemplo nuū de jeē sāha ró táca jniñu váha. Te jeē steén rō nuū de te ndaā steén rō te coo ndije ni rō. ⁸Te ndaā vāha steén rō, návāha ma cúu cahān ñayuu siquī. Te súcuan te cucanu ñayuu cácuu contra, chi ma cúu cahān i ni ñin cuēchi siquī rō.

⁹Te cahān rō jiín ñáyuu cácuu mozo jeē na cuatáhú i nuū patrón i, te na sāha i tācá jniñu jeē nújnahan ni de, te ma cahān maá i núu ndácu de jniñu nuū i. ¹⁰Te ma sacuíhná i ndajniñu de, chi na cúu i ñayuu ndaā ndije, návāha jiín táca jniñu jeē sāha i, te cuni tāca ñáyuu jeē yóhoyo luu cúu jnūhun jeē steén siquī Yaā Dios, Yaā jnáma yóhó.

¹¹Chi vijna je ni steén Yaā Dios ndese sāha ya jeē váha ñayuu, chi cúní yā jnama ya ndihí ñayuu ñayiví. ¹²Te jnūhun jeē váha ni yā jiín yó, suu steén nuū yō jeē na siáá yō jniñu néé jiín táca jéé ndiyo néé ni yō. Te ndito na cóo xiní yō ini ñayiví yáha, te caca ndaā yō, te chiñuhún váha yó Yaā Dios. ¹³Te suni steén nuū yō jeē cocuhun ni yō jeē quéndōo ndetū yō jeē quíji maá quíiví jéhnū jeē quénda ndijin Yaā Dios, Yaā kujéhnū ndasí, suu Jesucristo, Yaā jnáma yóhó. ¹⁴Chi ni socō yā maá yá jehē yō, návāha jnama ya yohó núu táca jniñu néé, te sándoo ndihí ya anuá yō jeē cuu yó ñáyuu maá yá, te condihvī ni yō sāha yó jniñu váha.

¹⁵Tāca jnūhun yáha cánuú steén rō, te stíhví ni rō i, te cahān rō nuū i, chi súcuan ndíso jniñu ró. Te ma cuáha ro jnūhun jeē sajeē ni ni ñin i nuū rō.

Ndese cánuú sāha ñayuu cácadíje

3

¹Te na nástíhví ni rō i jeē cuatáhú váha i nuū tēe cácujuhnu jiín tēe cándiso jniñu ñuu. Te na squícu i jniñu cándacu de, te coo ñamā ni i sāha i tācá jniñu váha. ²Te ma cahān neé i siquī ni ñin ñayuu, te coyūcu mání i jiín ñáyuu, te coo váha ni i, te coo vítá ni i jiín ndihí ñayuu.

³Chi maá yó suni ni cuu yó ñáyuu canéé jeē tu jécūhun ni nde saá, te ni cacunihni ni yō nuū Yaā Dios. Te ni cacandíje yó táca jnūhun tú ndaā, te ni cajejniñu sáa-ni yó núu tāca jéé ní ndiyo néé ni yō jiín na-ni jniñu ni cusī ni yō. Te ni cajica yó jiín jniñu néé jiín jnūhun cuésún ni. Chi ni cajito uhū

ñayuu yohó, te ni cajito uhū yō i. ⁴Yūcuán na te Yaā Dios, Yaā jnáma yóhó, ní steén yā jeē váha ni yā te cundáhú ni yā ndihí ñayuu ñayiví. ⁵Te ni jnama ya yohó, te tú na jniñu váha ní cásáha yó jéé jnáma ya yohó, chi sa siquī jeē ní cundáhú ni yā yohó. Chi ni nacate ya anuá yō, te súcuan ni nacacu jeé yó, te ni ndujeé yó ni sāha ya jiín maá Espiritu Santo. ⁶Te yóhoyo ni cunuú Espiritu Santo ini anuá yō, jeē ni sāha Yaā Dios jeē jiín Jesucristo, Yaā jnáma yóhó. ⁷Te súcuan te ni ndahva yā cuēchi yó siquī jeē váha ni yā, te nihín tahú yō cotecu yō ní cáni, nájnūhun ñūhun ni yō.

⁸Ndaā cúu jnūhun yáha, te cúní rī jeē niní cáhān nīhin ro táca jnūhun yáha, návāha ñayuu cácadíje Yaā Dios, na cóndihvī ni i cocuu i jiín jniñu váha. Chi iyó váha tāca jéé yáha, te níhín jniñu jeē quéndōo vāha ánuá ndihí ñayuu. ⁹Te ma quíiví nduu rō jiín táca jnūhun cánéé íi, jiín jnūhun siquī ndese vēji tāca jíi yō, jiín táca jnūhun sāha jeē cátejnhān i cácahān i jeē cánuú squícu yó ley Moisés. Chi máni jnūhun cáhá-ni jeē tu níhín jniñu cúu.

¹⁰Te núu iyó ñáyuu jeē sāha jeē ndusín ini ñayuu cácadíje, te cahān rō nuū i ñin uū jínu, te núu ma chúhun ni i, te quenehen ró i. ¹¹Chi jíni rō jeē ñin ñayuu sāha súcuan, stíiví ndasí i chi jíni i jeē tú vāha sāha i, te jeē yúcuan jécondee cuēchi siquī i.

Jeē cána Pablo quiji Tito nuū de

¹²Te jeē tají rí Artemas chí Tíquico cuajeē de, yūcuán na te nducú ndéyí ró quiji ró núu rī ñuu Nicópolis, chi je ni cundaā ni rī jeē yúcuan condee rī tiempo mījin. ¹³Te condihvī ni rō chindéé ñáhán ró Zenas, tēe cúu abogado, te suni súcuan Apolos. Chi cuāha ró jéé jíni ñūhún de jeē quíngoo ga de ichi nuū quihín de. Te coto ró jéé ma cúmaní ni ñin nuū de. ¹⁴Te ñayuu cáhīn jíni yó, cánuú cutūhva i sāha i tācá jniñu váha, te chindéé ñáhán i ñayuu cúmaní nuū, návāha ma cótecu saá-ni i.

Saludo jiín bendición jeē sándihí

¹⁵Tāca ñáyuu cáyūcu jíni rí yáha, cácahān i jeē sándeyí ni rō. Te cahān rō jeē achí rí jeē sándeyí ni ñayuu jiñā jeē maní yō jiín siquī jeē cácadíje yó. Te ñūhun ni rī jeē na sāha

ga Yaā Dios jeē váha róhó jíjnáhan ró. Súcuan
na cóo. Amén.

CARTA JEE NI TEE SAN PABLO APOSTOL NUU FILEMON

¹ Máá rí cúu Pablo, te íne ri vecāa jeē siquí jnúhun Cristo Jesús. Te jíin hermano yō Timoteo cátee ri carta yáha cuájeē nuū rō Filemón. Chi cúu ró tée jeē cáhīyo manī rī jíin, chi chindéé ñájnáhan ró jíin rí siquí jníñu Yaā Dios. ² Te suni cátee ri carta yáha nuū ñáyuu cácadíje cándutútú ini vehe ró, te suni nuū hermana yō Apia, jíin núu Arquipo, tē chindéé ñájnáhan jíin yó siquí jníñu cánducú ndeyí yó jíin. ³ Te cáñuhun ni rī jeē Tatá yō Yaā Dios jíin Jítoho yō Jesucristo, na sáha ga yā jeē váha rōhó jíjnáhan ró, te sáha ya jeē coo ndeyí coo sī ni rō.

Tēe cúndáhú ni te cándíje vāha cúu Filemón

⁴ Te jeē jíicán tahu rī nuū Yaā Dios te tu náa ni rī cacān tahu rī jehē rō, te níni nácuatáhú rí nuū yā jeē siquí rō. ⁵ Chi níhín rī jnúhun jeē váha cándíje ró jnúhun cúndáhú ni Jítoho yō Jesús rohó, te cúndáhú ni rō tāca ñáyuu yíhi ndaha Yaā Dios. ⁶ Te jíicán tahu rī jeē ñáyuu ni cacandíje siquí jeē candíje máá ró, na jécūhun vāha ga ni i siquí tāca jéē váha jeē sáha ya yohó jeē jíin Cristo Jesús. ⁷ Chi cúsi ndasí ni rī te íyó ndeyí ni rī, hermano, siquí jeē cundáhú ni rō ñáyuu cácadíje. Chi máá ró ni sáha jeē ní ndusi ni i.

Jeē jíicán Pablo ñn favor jehē Onésimo

⁸ Núu súcuan te cáhán ndahú rí jíin ró, vésú cuu ndacu ri nuū rō ndese cánuú sáha ró, chi cúu ri apóstol Cristo. ⁹ Te tuú chi sa cáhán ndahú rí jíin ró siquí jeē cáhīyo manī yō. Te cundáhú ni rō ruhū sáha ró jéē cuní ruhū Pablo, chi je jéhnu ri, te íne ri vecāa jeē siquí jnúhun Cristo Jesús. ¹⁰ Te cáhán ndahú rí jíin ró jehē mozo rō Onésimo jeē ní jeen ró te ni jinu. Te vijna te cúu i nájnūhun sēhe ri, chi ni scándíje ri i ini vecāa yāhá.

¹¹ Te nde saá chi tu ní cúu i mozo squícu nuū rō, chi ni jinu i. Te nde vijna chi vāha cuajníñu i nuū rō jíin núu rī. ¹² Te nátají rí i najeē i nuū rō. Núu súcuan te cahān vāha ró jíin i, te sáha ró cuenta jeē nájnūhun máá

rí ni najinū, chi yōhyo manī rī jíin i. ¹³ Te cusī ni rī núu jeē na cúu quendōo i jíin rí yāhá, návāha cuajníñu i nuū rī lugar máá ró níni jéē íne ri vecāa jeē siquí jnúhun vāha ya. ¹⁴ Te tu ní cúni rī sáha ri súcuan, chi nde cuāha máá ró jnúhun. Chi nasūu jéē safuerza rī rohó, chi jeē váha ni rō te sáha ró favor jíin rí, nájnūhun cúsi ni máá ró. ¹⁵ Chi sanaa te jeē siquí yáha cúu jeē ní jinu i ni cujiyo i nuū rō jecu-ni tiempo, suu návāha ví quendōo i jíin ró sáha Yaā Dios. ¹⁶ Te vijna tuá cúu i ñn mozo jeē ní jeen ró, chi ni nduu i ñn jeē váha ga, suu ñn hermano jeē maní rō jíin. Te ruhū chi yōhyo manī rī jíin i, te nagā ni cuu máá ró jeē ma cóo manī rō jíin i. Te nasūu jéē maní rō jíin ñn tēe súcuan-ni, chi siquí jeē cúu i ñn hermano jeē candíje nuū Jítoho yō.

¹⁷ Te núu sáha ró cuenta jeē ruhū cúu jnáhan ró cándíje, núu súcuan te cahān vāha ró jíin i jeē jinú i nuū rō, nájnūhun jeē ruhū cahān rō jíin. ¹⁸ Núu na-ni falta ni sáha i nuū rō, chí núu táu i nuū rō, te cacān rō chunaa máá rí. ¹⁹ Ruhū Pablo, jíin ndaha máá rí tée ri yāha jéē máá rí nachunaa. Súcuan cáhán rī vésú cuu cahān rī jeē sa máá ró taú nuū rī sáha ró jéē cúsi ni rī siquí jeē ni scándíje ri rohó te ni cācu ánuá rō. ²⁰ Núu súcuan, hermano, sáha ró favor yáha jíin rí siquí jeē candíje ró Jítoho yō. Sáha ró jéē ndúsi ni rī, siquí jeē cúu ró hermano candíje Cristo.

²¹ Te tée ri yáha núu rō, chi cúcáhnū vāha ni rī jeē cuatáhú ró, te nde vihyá gā sáha ró vésú jeē ni jíicán rī. ²² Te suni jíicán rī jeē sátūhva ró núu cóndee rī, chi níñuhun ni rī jeē quénda ri yāhá te jeē rī nuū rō sáha Yaā Dios siquí jeē cájicán tahu rō jehē rī.

Saludo jíin bendición jeē sándihí

²³ Epafras, tēe íne jíin rí vecāa jeē siquí jnúhun Cristo Jesús, cáhán de jeē sándeyí ni rō. ²⁴ Te suni súcuan cácahān Marcos, jíin Aristarco, jíin Demas, jíin Lucas, tēe cáchindéé ñájnáhan jíin rí siquí jníñu ya.

²⁵ Te níñuhun ni rī jeē Jítoho yō Jesucristo na sáha ga yā jeē váha rōhó jíjnáhan ró. Súcuan na cóo. Amén.

CARTA JEE CUAHAN NUU ÑAYUU HEBREO

Jeē ní tají Yaā Dios Sēhe ya ni nacani ya jnūhun

¹ Tijni jínu te tijni modo ni cahān Yaā Dios jíin táca jíi yō nde jenahán, chi ni tají yá tēe ni canacani jnūhun ya. ² Te vijna te tiempo cuándihí yáha ní tají yá maá Sēhe ya ni nacani ya jnūhun nuū yō. Te jíin Sēhe ya ni sáha ya ñayiví jíin táca gá, te ndivii jeē iyó ní chihi ya ndaha Sēhe ya. ³ Te Sēhe ya yōhyo luu cújéhnū ya, nájnūhun luu cújéhnū máá yá. Te ndihí ndese cúu máá yá, suni súcuan cúu Sēhe ya. Te jíin poder jnūhun ni cahān Sēhe ya te iyó cutú ndihí-ni. Te ni sándoo ya yohó táca cuéchi yó, te sáa te ni cucōo ya lado váha mesa maá Yaā cújéhnū nde andiví.

Jeē cújéhnū ga Sēhe Yaā Dios vēsú táca ndajéhé yā

⁴ Te ni ndujéhnū ndasí gá Sēhe ya vēsú táca ndajéhé andiví, chi ni nihín yā tahū jeē ndiso ya jniñu jéhnū ndasí gá vēsú jniñu cándiso ndajéhé. ⁵ Chi súcuan ni cahān Yaā Dios jíin Sēhe ya, te nasūu jíin ndajéhé yā: Máá ró cúu Sēhe ri, te vijna te ni sajéhnū ri rohó jéē cúu ri Tatá rō.

Te suni ni cahān yā jnūhun Sēhe ya, te nasūu jnūhun ndajéhé yā:

Máá rí cúu Tatá nuū Sēhe ri,
te máá i cúu Sēhe nuū rī.

⁶ Te suni ná ni tají yá Sēhe ya cújéhnū, ni quiji ini ñayiví yáha, te ni cahān yā: Ndihi ndajéhé rī na chíñuhún i Sēhe ri.

⁷ Te ni cahān tucu ya jnūhun ndajéhé yā: Nájnūhun quée tachī, súcuan cájica ndajéhé rī sáha ri, te táca un jéē cájejniñu nuū rī, nájnūhun yáñuhūn cácuu.

⁸ Te jnūhun Sēhe ya chi sa suhva cáhán yā: Máá ró cúu Yaā Dios, te ndacu ró jniñu ní cáni,
te jniñu ndácu ró, máni jniñu ndaā cúu.

⁹ Cúsiñi ni rō jíin jniñu váha, te jíto uhū rō jniñu néé.
Jeē yúcuan ruhū, Yaā Dios maá ró, ni sáha ri

jeē yóhyo ga cúsiñi ni rō vēsú táca gá jeē iyó andiví.

¹⁰ Te suni cáhán yā:

Máá ró cúu Jitoho, te nde xihna ñuhún ni sáha ró jéē ni jécōo ñayiví.

Te andiví chi suni jeē ni sáha ró cúu.

¹¹ Te táca un chi naa, te máá ró chi ní cáni iyó ró.

Te táca un chi cutúhú nájnūhun cutúhú ñn sahma,

¹² te nacaquin jnahnū rō te nasama ró jíjnáhan.

Te máá ró chi ma sáma cuiñi rō,
te quiñi cótecu rō ma ndihí cuiñi.

¹³ Te súcuan ni cahān tucu yā jíin Sēhe ya, te nasūu jíin ndajéhé yā:

Cucōo ró lado váha ri nuū cújéhnū ró,
te na sáha ri jeē quende rō poder táca jéē cájito uhū rohó.

Achí yá. ¹⁴ Te táca ndajéhé yā chi mozo-ni cácuu, te tájí yá cuangoo jeē chindéé ñáhan ñayuu jeē nihín tahū jeē jnama ya.

Jeē ma cúhuun ni yō jíin jnūhun jnáma ya yohó

2

¹ Núu súcuan te cánuú jéē váha ga chuhun ni yō táca jnūhun ya jeē ní cajini yó, chi núu tuú te sanaa te scuíta yó. ² Chi nde jenahán ní jejniñu ya ndajéhé yā ni castūhun jnūhun ya, te ni cajini ñayuu jeē iyó ndáa. Te ñayuu niñni ni jíin ñayuu tu ní cájendetū jnūhun ún, vetū-ni ni canihín i castigo. ³ Te núu súcuan ni cuu, te yóhó, ¿ndese cácu yó núu ma chúhun ni yō jnūhun cánuú gá jeē jnáma ya yohó? Chi xihna gá maá Jitoho yō ni nacani ya jnūhun yáha, te sáa te tēe jeē ní cajini nahín ni canacani ndaā tucu máá de nuū yō. ⁴ Te Yaā Dios suni ni chindéé ñáhan yá de jeē ní canacani de jnūhun ya. Chi ni sáha ya jíin de jeē ní casáha de sñn sñn jniñu jéhnū jeē nahán náa ni yō jíto yó poder yā. Te suni ni jēhe ya Espiritu Santo yā nuū ñn ñn yó, ndese ni nujnahan ni maá yá sáha yó.

Jeē ní nduu Jesús jnáhan ñayuu

⁵ Te Yaā Dios nasūu núu ndajéhé yā ni jēhe ya jnūhun jeē condiso jniñu siquí ñayiví jéē quiñi, chi sa suhva nuū Sēhe ya Cristo ni jēhe ya. Te siquí ñayiví un cúu jeē cahán rī

yāhá. ⁶ Chi suhva yósó núū tútu jeē ni cáhān David jíin yá:

¿Na vé cúu ñayuu jeē ñúhun ni ní i?

Te ndíhví ni ni síquī i, te máá ñáyuu cúu i.

⁷ Chi jecu-ni tiempo ni sáha ní jeē núu i nuū tācá ndajéhé ni.

Yūcuán na te sajéhnū ní i te squéndō yíñúhún ní i,

te cani ní i jeē ndacu i jniñu nuū tāca jéē ni sáha ní.

⁸ Te ndíhi jeē iyó chi sáha ní jéē cujéhnū i síquī.

Achí tutu. Te jeē ni sáha Yaā Dios jeē cujéhnū i síquī ndíhi, núu súcuan te ma quéndō ni ñn jeē ma cújéhnū i síquī. Te vēsú súcuan te vijna te ná tu coto yó jéē cujéhnū i síquī ndíhi jeē iyó. ⁹ Te jeē jíin yō vijna cúu Jesús, Yaā jeē ní nduu núu jecu-ni tiempo nuū tācá ndajéhé yā. Chi ni ndoho ya jeē ni jíhī yā jehē yō, te jeē yúcuan ní ndujéhnū luu tucu ya, te ndíhi cáhīyo yíñúhún núu yā. Chi jeē váha ni Yaā Dios jíin yó, jeē yúcuan ní jíhī Jesús jehē yō.

¹⁰ Te ndíhi jeē iyó chi cuenta Yaā Dios cúu, chi máá yá ni sáha. Te suni ndéca ya cuehé ndasí séhe ya jeē quihín i andíví núu luu cujéhnū i jíin yá. Te váha níhín jniñu jeē ni jéhe ya jnūndóho nuū Jesús, chi jeē ní ndoho ya súcuan te cuu condeca váha ya ñayuu ní jnama ya. ¹¹ Chi Jesús jeē ni sándoo ya i te máá i jeē ní candundoo i, chi ñn-ni Tátá i jíin yá. Te jeē yúcuan tu cúcanu Jesús jeē cahán yā hermano yā jíin i, vēsú ndasí núu i. ¹² Chi yósó núū tútu jeē ni cáhān yā jíin Tátá yā:

Cachi na jnúhun ní núū tācá hermano na, te mēñu núū cándutútú i cata ná ndese cújéhnū ní.

¹³ Te suni cáhān yā nájnūhun cácahān hermano yā:

Ruhū chi cándíje ri yā.

Te cáhān tucu yā:

Yāha íne ri jíin tāca gá séhe Yaā Dios jeē ni jéhe ya nuū rī.

Achí Jesús.

¹⁴ Te nájnūhun cácacu ñayuu jeē cúu i yiqui cúñu, suni súcuan ni cacu Jesús, návāha cuu yā jehē yō. Te súcuan ni snāā yā poder jexeén jeē squívi ñayuu nuū cuéchi te jíhī i.

¹⁵ Te ni cacu ya súcuan návāha cuu quenehen ya tāca ñáyuu chíji jnūhun jeē yuhú i

cuu i. Chi ní vida i ndóho i sáha ún. ¹⁶ Te jendaá tu ní quíji ya jeē chindéé ñáhán yā tācá ndajéhé yā, chi sa suhva jeē chindéé ñáhán yā ñayuu cácañíje jeē ní nduu yucūn Abraham. ¹⁷ Jeē yúcuan ní jíin ñúhún nduu inuú yá jíin tāca hermano yā, návāha cuu ya sutū cujéhnū jeē squícu váha ya tācá jniñu jehē i nuū Yaā Dios. Chi ni cundáhú ni yā i, te ni ndahva yā cuéchi i jeē ni sócō yā maá yá jehē i. ¹⁸ Chi suni máá yá ni ndoho ya jeē ní jito ndee jnūndóho ya, te jeē yúcuan cuu chindéé ñáhán yā ñayuu jeē jíto ndee jnūndóho i.

Cújéhnū ga Jesús vēsú Moisés

3

¹ Hermano, ni cana Yaā Dios rohó, te cácuu ró ñáyuu ndoo máá yá. Núu súcuan te na nácani váha ni rō síquī Cristo Jesús, Yaā cúu apóstol jeē ní tejniñu Yaā Dios, te suni cúu ya sutū cujéhnū síquī jnúhun cácañíje yó. ² Chi ni squícu váha ya nuū Yaā Dios, Yaā ní tee jniñu un síquī yā, nájnūhun ni squícu váha Moisés nuū ñáyuu jeē ni cáhān Yaā Dios jeē cácuu i ñayuu vehe ya. ³ Chi cújéhnū ndasí gá Jesús vēsú Moisés, nájnūhun cújéhnū ndasí gá tēe sáha vehe nasūu máá vehe. ⁴ Chi tācá vehe iyó tēe ni sáha. Te máá Yaā Dios cúu jeē ni sáha tāca jéē iyó. ⁵ Te Moisés ni squícu váha de jíin jniñu jeē ní cuu de mozo ni condito de ñayuu vehe Yaā Dios. Te ni castúhún de síquī tāca jnúhun jeē steén yā tiempo quíji. ⁶ Te Cristo chi sa cúu ya maá Séhe jeē ndácu jniñu nuū ñáyuu vehe Tátá yā, te váha squícu ya jeē ni jéjnūhun ya nuū i. Te suni máá yó cácuu ñayuu vehe ya, te núu na cuíñi níhin yó jíin jnúhun cándíje yó nde quívi sándíhí, te núu cúsiñi ni yō jeē ñúhun ni yō tāca jéē váha jeē coo.

Jnúhun jeē ndetātu ñáyuu Yaā Dios

⁷ Núu súcuan te na chúhun ni yō jeē cahán Espíritu Santo nuū tútu íi:

Vijna te núu cuni sōho ró jéē cahán Yaā Dios, ⁸ te ma cúnihni ni rō nájnūhun ni cacunihni ni ñayuu jenahán.

Chi tu ní cájendetū i nuū yā ná ni cajica i nuū ñúhun téhé.

⁹ Chi yúcuan ní casáha jíi rō jniñu jeē ni quíñi ni rī, achí yá,

vēsú ni cajito i tācá jniñu ni sáha ri uū xico cuiyā.

¹⁰ Jeē yúcuan ní quiṭi ni rī jín ñáyuu tiempo un.

Te ni cahān rī jeē máni jeē castóo i ichi ndaā, chi tu cācuni i condiquīn i jnūhun rī.

¹¹ Te jeē yúcuan ní quiṭi ni rī, te ni cahān teyí rī

jeē ma quívicoo cuiṭi i nuū ndetātú i sáha ri. Achí yá.

¹² Núu súcuan hermano, coto má conéé ánuá ni ñn ró jéē cáca yátá ró jeē tuá candíje ró Yaā Dios, Yaā técu. ¹³ Chi sa suhva tāca quiṭi na stíhvī jnáhan ni rō, níni gá iyó tiempo, návāha ma cúnihni ni ñn ró te stáhú róhó sáha ró cuéchi. ¹⁴ Te núu na cuiñi nīhin yó ndé quiṭi sándihī jín jnūhun jeē ní quejéé yó jín, yūcuán na te cuu yó jnáhan Cristo.

¹⁵ Chi cāhán tutu:

Vijna te núu cuni sōhó ró jéē cāhán Yaā Dios,

te ma cúnihni ni rō nájñūhun ni cunihni ni ñayuu jenahán.

Achí. ¹⁶ ¿Te ndé-ni cúu ñayuu jeē ní jini jnūhun ya te ni cunihni ní? Suu ndihī ñayuu jeē ni scácu Moisés jeē ní quendacoo Egipto. ¹⁷ ¿Te ndé-ni cúu ñayuu jeē ni quiṭi ni yā nuū uū xico cuiyā? Suu ñayuu jeē ní casáha cuéchi, te ni cajihī i nuū ñūhun téhé.

¹⁸ ¿Te ndé-ni i cúu jeē ni cāhān teyí yá jeē ma quívicoo cuiṭi i nuū ndetātú i sáha ya? Suu máá ñáyuu jeē tu ní cājendetū nuū yā.

¹⁹ Núu súcuan te jíní yō jeē tu ní cúu quiṭi i nuū ndetātú i, siquī jeē tu ní cācandíje i ya.

4

¹ Te níni íyó gá jnūhun jeē ni jéjnūhun ya jeē quívicoo ñayuu nuū ndetātú i sáha ya, te na cónso íyo yó jéē ma stívi yó, návāha tú coo jín sava ró jéē ma nihín rō quiṭi ró. ² Chi suni máá yó ni cajini sōho yó jnūhun jeē jnáma ya yohó, nájñūhun ñayuu jenahán un. Te nuū máá i tu ní jéjñiñu jnūhun ni cajini i ún, siquī jeē tu ní cācandíje i. ³ Te yóhó jéē cācandíje, máá yó cúu jeē quívicoo yó núu ndetātu yó. Te siquī ñáyuu tu cācandíje ni cahān yā suhva:

Jeē yúcuan ní quiṭi ni rī, te ni cahān teyí rī jeē ma quívicoo cuiṭi i nuū ndetātú i sáha ri.

Te súcuan ni cahān yā vēsú je íyó túhva nuū ndetātú i nde ná ni jecōo ñayīvi. ⁴ Chi súcuan yósó jnūhun nuū tútu i siquī quiṭi uxá:

Ni sínu Yaā Dios tāca jéē ni sáha ya, te ni ndetātu yá quiṭi uxá.

⁵ Te suni nuū tútu un yósó tucu:

Ma quiṭi cuiṭi i nuū ndetātú i sáha ri.

Achí yá. ⁶ Núu súcuan te sava ñayuu chi quiṭi nahín i nuū ndetātú i. Te ñayuu jenahán jéē ní cajini jnūhun jeē jnáma ya i, tu ní quiṭi i siquī jeē tu ní cājendetū i nuū yā. ⁷ Jeē yúcuan ní jeni tucu ya inga quiṭi jeē quívicoo ñayuu, te quiṭi un cúu vijna. Chi ná ni yāha cuehē tiempo jeē ni cāhān yā jín ñáyuu jenahán, te yósó núu tútu jeē ni sáha ya jeē suni ni cahān David suhva:

Vijna te núu cuni sōho ró jéē cāhán yā,

te ma cúnihni ni rō núu súcuan.

Achí tutu. ⁸ Te nde jenahán ní squívi Josué ñayuu Israel un ñuu nuū ndetātú i. Te tu ní cúu squívi de i nuū ndetātu ánuá i sáha ya.

Chi núu súcuan te ma cāhán gā Yaā Dios jín tāca ñáyuu jeē vijna cúu quiṭi jeē quívicoo i nuū ndetātú i. ⁹ Núu súcuan te íyó túhva nahín ñn nuū ndetātu ñáyuu Yaā Dios, nájñūhun ni ndetātu máá yá. ¹⁰ Chi ñayuu jeē quívicoo nuū ndetātú i jín yá, chí ndetātú i jeē ní casájñiñu i, nájñūhun ni ndetātú Yaā Dios nuū jñiñu ni sáha máá yá.

¹¹ Núu súcuan te na ndúcú ndéyí yó quiṭi yó núu ndetātu yó un, te ma sáha ni ñn yó cuéchi jeē ma cāndíje yó, nájñūhun ni casáha i nde saá.

¹² Chi jnūhun Yaā Dios ndíto técu te íyó poder. Chi cúu nájñūhun ñn espada jeē xeén ndíndúú lado, chí nástúu cājí ndese íyó jéē níjnūni yō jín ánuá yō, nájñūhun sáha espada jeē jéhnde te nástúu nuū ñujnáhan yiqui jín meque. Te jnūhun ya nástúu ndihī ndese jéni ni yō jín ndese cúní yō sáha yó.

¹³ Te tu íyó ni ñn jeē yísahí jeē tu jíní maá Yaā jeē náquihin cuenta, chí ndihī-ni jíní vāha ya, te ndihī-ni túu ndijin nuū yā.

Jesús cúu sutū cujéhu ga

¹⁴ Te cānevāha yó ñn sutū cujéhu ga, te je ni ndaa ya ni ndívi ya nuū iyó Yaā Dios. Te Jesús Sēhe Yaā Dios cúu ya. Jeē yúcuan na cuiñi nīhin yó jín jnūhun jeē ní candíje yó. ¹⁵ Chi névāha yó ñn sutū cujéhu jeē jito ndáhú yóhó jeē tu fuerza yō squícu vāha yó.

Chi nájñuhun ndóho yó jéē jíto ndee jexeén yohó, suni súcuan ni ndoho ya jeē ní jito ndee un yá, vésú tú cuítí cuēchi ya. ¹⁶ Núu súcuan te ma yūhu yó, chi na quívi yó yuhu mesa yā, cúu jeē cacān tahu yō. Chi manī yā jíin yó, te cúndáhú ni yā yohó, te síquī jeē váha ni yā te chindéé ñáhán yá yohó táca jínu jeē jíni ñúhún yó.

5

¹ Chi táca sūtū jeē ní cujéhnú jenahán, ni nacāji Yaā Dios de mēhñu ñáyuu, te ni jeni ya de jeē cuíñi de nuū yā jehē ñayuu, te socō de ndajñíñu jíin quítí nuū yā jeē síquí cuēchi i. ² Te cuu cahān vītá de jíin ñáyuu tu jécūhun ni jíin ñáyuu castívi, chi máá de suni tú na fuerza ini de squícu vāha de. ³ Jeē yúcuan cúu jeē suni cánuú sócō de quítí nuū yā jeē síquí cuēchi máá de, nasūu máá-ni jeē síquí cuēchi ñayuu.

⁴ Te ni ñin tēe tu cúu sájéhnú de máá de jeē cuu de sūtū cujéhnú, chi sa máá Yaā Dios cúu jeē nácāji ya de, nájñuhun ni nacāji ya Aarón nde jenahán. ⁵ Te suni súcuan Cristo, tu ní sájéhnú ya maá yá jeē cuu ya sūtū cujéhnú, chi sa Yaā Dios ni sáha, chi ni cahān yā jñuhun yáha:

Máá ró cúu Sēhe ri,
te vijna te ni sajéhnú ri rohó jéē cúu ri Tata rō.

⁶ Te suni cáhán tucu ya nuū tútu i:
Ní cáni cúu ró sūtū,
nájñuhun sūtū Melquisedec jenahán.

⁷ Te Cristo, ná ni condee ya ñayívi, te ni jicān tahu yā, te nde ni ndahyū yā te ni ndahyū cohó yá. Te ni cahān ndahú yá jíin Yaā Dios, Yaā jeē cúu jnama ya jeē ma cúu yā nuú. Te síquī jeē yíñuhún ní chiñuhún yá Yaā Dios, te ni chindéé ñájñáhan Yaā Dios jíin yá nuū jñúndóho ún. ⁸ Chi vésú Sēhe Yaā Dios cúu ya, te ni jendetū yā ni ndoho ya ini ñayívi, te súcuan ni jini yā ndese cúu jñuhun jendetū. ⁹ Te ná ni cuu ni squícu ndíhi ya jeē ní jendetū yā, te ni cucutú jñuhun jeē jnama ya táca ñáyuu jendetū nuū yā, te cotecu i ní cáni. ¹⁰ Chi ni jeni Yaā Dios yā jeē cúu ya sūtū cujéhnú nájñuhun sūtū Melquisedec.

Síquī jeē ma cáca yátá i

¹¹ Te íyó cuéhē jñuhun jeē castūhun rí síquī táca jéē yáha. Te yíi cúu jeē jécūhun ni

rō sáha ri, síquī jeē tu cácu ni rō chuhun ni rō. ¹² Te je ni cunahán cá candíje ró, te jíni ñúhún jeē cúu ró tēe stéén nuú. Te tuú chí sa cájini ñúhún tucu máá ró tēe stéén nuū rō táca jñuhun Yaā Dios jeē tú yíi cuítí. Chi sa ni canduu ró nájñuhun sūchi yíquín jéē jíni ñúhún caxin i, chi ná tu ije i caji i jeē ndáva. Súcuan cácu ró chí ná tu ije ró jíin jñuhun yíi gá. ¹³ Chi núu máni máá nájñuhun sūchi yíquín jéxin cácu ró, núu súcuan te tu cúu jecūhun vāha ni rō jñuhun ndaā. ¹⁴ Te ñayuu jeē jé ni ije, chí cáyeji i jeē ndáva, cúu jeē ní cutūhva vāha i te je cúu nácāji i jeē váha jíin jéē neé.

6

¹ Núu súcuan te na yáha yó núu táca jñuhun Cristo jeē tú-ni yíi, te na quíhín yō nuū jñuhun yíi gá, návāha na íje vāha ni yō jíin jñuhun ya. Te ma ndejéé tucu yó jíin jñuhun jeē ni scuáha yó xíhna gā, suu jñuhun jeē nácāni ni yō stóo yo cuéchi yó jéē cúu yō sáha, jíin jéē candíje yó Yaā Dios, ² jíin síquī jeē jéndute, jíin síquī jeē soó ndaha xíní ñáyuu, jíin síquī jeē nátecu ndíyi, jíin síquī jeē jnahnú ndetū ñayuu ní cáni. ³ Núu súcuan te na yáha yó núu táca jéē yáha te quívi yó núu jñuhun yíi gá, te núu cuāha Yaā Dios jñuhun.

⁴ Chi íyó ñáyuu jeē jé ni jecūhun ni i, te je ni jini i táca jéē jéhe Yaā Dios, te je ni quívi i nuū jñuhun stéén Espíritu Santo, ⁵ te suni je ni jini i jñuhun vāha Yaā Dios jíin ndese coo poder yā tiempo quiiji. ⁶ Te ñayuu un núu caca yátá i, te ma cúu ga ndejéé jeē i jeē nácāni ni i. Chi jeē cáca yátá i cúu nájñuhun jeē nácāni tucu i Sēhe Yaā Dios jicā cruz, te cájēhe i jñuhun canu yā cájito ñayuu. ⁷ Te ñayuu chí cácu i nájñuhun ñuhun jeē cúun vāha saū nuū te ndóyo vāha. Te núu cánecoo jeē váha caji tēe cásājñiñu, yūcuán na te cúsi ni Yaā Dios jíin. ⁸ Te núu máni íñu yóquin jíin yucū sajnéñu cánecoo nuū, núu súcuan te tu jéjñiñu cuítí, te squéndōo íi yā, te ñin quívi te cayū. Súcuan jnahnú ndetū ñayuu cájica yátá.

Jeē ñuhun ni yō táca jéē váha jeē coo

⁹ Te máá ró jijnáhan ró hermano, vésú cácahān rī súcuan jíin ró, te cácuahnu ni rī jeē cácu ró ñayuu cuíñi níhin, chí ñayuu

ni jnama ya cácuu ró. ¹⁰ Te Yaā ndaā cúu Yaā Dios, te tu náā ni yā jniñu cásáha ró. Chi siquī jeē cáhīyo manī rō jíin yá te ni cacundáhú ni rō hermano rō cá candíje, te ni cachindéé ñáhán ró i, te súcuan cásáha ró ndé vijna. ¹¹ Te cá cuni rī jeē niní súcuan sáha ga ná ñn ná ñn ró ndé quivī sándihí, chi jeē sáha ró súcuan te nihīn rō ndihí jeē cáñuhun ni rō. ¹² Te cá cuni rī jeē ma cúhuun ni rō, chi sa ndacu ró ñáyuu cá candíje jeē jíin paciencia cándetu i, te jeē yúcuan níhīn tahú i táca jéē ni jéjnūhun ya.

¹³ Chi quivī jeē ni jéjnūhun Yaā Dios nuū Abraham, te ni ndacunehen ya maá yá jeē ni jéjnūhun téyí yá, chi tuá na inga ndacunehen ya jeē cujéhnu ga vésú maá yá jeē cuu testigo yā. ¹⁴ Te ni cahān yā: Jendaá ndije jeē vāha ndasí sáha ri jíin ró, te sáha ri jeē nducuehē ndasí yúcūn rō, achí yá jíin Abraham. ¹⁵ Te jíin paciencia ni condetu de, te súcuan te ni nihīn de jeē ní jejnūhun ya. ¹⁶ Te núu cáhán teyí ñáyuu, te ndacunehen i síhví ñn jeē cujéhnu ga vésú maá i. Te núu íyó ñn jnūhun jeē tu cá candíje jnáhan, te núu ñn tēe cáhán teyí de jíin síhví Yaā Dios, yūcuán na te jécuiñí jeē cátejnáhan. ¹⁷ Te suni súcuan Yaā Dios, chi ni jejnūhun téyí yá nuū ñáyuu jeē cuāha ya tahū i. Chi ni cuni yā jeē cucáhnu vāha ni i jeē ma nácani yátá ni yā siquī jeē ni jéjnūhun ya nuū i. ¹⁸ Chi ma nácani yátá cuítí ni yā siquī jnúhun jeē ni cáhán yā uū jínu, ñn jeē ni jéjnūhun ya, te inga jeē ni cáhán teyí tucu ya siquī suni jnūhun ún. Chi tu stáhú cuítí yā. Te jeē yúcuan maá yó jeē ní tūhva yó yá, chi yōhyo íyó ndeyí ni yō, te cáñuhun teyí ni yō jeē squícu ya jeē ni cáhán yā. ¹⁹ Te siquī jeē súcuan ñūhun ni yō, te suu sáha jeē quéndōo níhīn ánuá yō jíin jnúhun ya, te quéndōo ndaā ni yō, nájnūhun quéndōo níhīn barco jeē jnái gancho yuū. Te sáha jeē cúu quiví yó andiví núu íi gā, nájnūhun cuarto íi gā jeē ni íyo ichi yátá sahma ni ndita caa ini vehe íi jenahán. ²⁰ Te ini yūcuán chi xīhna gā Jesús ni quiví, návāha nune ya ichi quivícoo yó. Te jeē yúcuan ní cáni cúu ya sutū cujéhnu nájnūhun sutū Melquisedec.

7

¹ Te máá Melquisedec ni cuu de rey ñuu Salem, te ni cuu de sutū nuū Yaā Dios, Yaā cujéhnu téyí. Te ni jejnahan de Abraham ná ni nandicó Abraham jeē ní cundeyí de ni cajejnáhan de jíin táca rey. Te ni jicān tahú de jehē Abraham. ² Te táca úxí ndajniñu jeē ní quende Abraham nuū táca rey un, ni jēhe de ñn ñn siquī un núu Melquisedec. Te síhví Melquisedec cuni cahān: rey jeē sáha jniñu ndaā. Te suni nání de rey Salem, te jnūhun Salem cuni cahān: jeē iyó ndeyí síh ni. Te jeē yúcuan suni nání de: rey jeē sáha jeē iyó ndeyí síh ni ñayuu. ³ Te tu cáhán tutu jnūhun tátá de ni náná de ni táca jíi de. Ni tu cáhán núu ni cacu de, ni núu ni jihí de. Chi cúu de nájnūhun Jesús, Sēhe Yaā Dios, chi ní cáni cúu de sutū.

⁴ Te condēhe jíjnáhan ró náa jéhnu ni cuu Melquisedec, chi jíi jéhnu yó Abraham ni jēhe de ñn ñn siquī táca jéē uxí nuū de siquī táca jéē ní quende de nuū rey un. ⁵ Te jíni yō jeē táca úxí ndajniñu ni canihīn ñayuu, ni cajēhe i ñn ñn siquī un ní caquihin tēe cácuu sutū yucūn Leví, nájnūhun cáhán ley Moisés. Te ni caquihin de nuū ñáyuu cácuu jnáhan de, chi ñn-ni yucūn Abraham cácuu de jíin i. ⁶ Te Melquisedec nasūu yúcūn Leví cúu de, te vésú súcuan te ni quihin de ñn ñn siquī táca jéē uxí nuū Abraham. Te suni ni jicān tahú de jehē Abraham, vésú cúu Abraham tēe jeē ni jéjnūhun ya nuū. ⁷ Te jíni vāha yó jéē tēe cujéhnu ga cúu jeē jicān tahú jehē tēe núu ga. ⁸ Te ñayiví yáha chi táca sūtū cáquihin de ñn ñn siquī táca jéē uxí nuū ñáyuu, vésú cácuu te tēe cájihí. Te Melquisedec suni ni quihin de, te máá de chi cáhán tutu íi jeē técu de. ⁹ Te suni cuu cahān yō jeē Leví, tēe jeē ní quihin ñn ñn siquī táca jéē uxí nuū ñáyuu, suni nájnūhun nuū maá de ni quihin Melquisedec ñn ñn siquī táca jéē uxí. Chi jeē ni jēhe Abraham nuū Melquisedec, suu cúu nájnūhun jeē suni ni jēhe de jeē siquí Leví jíin ndihí ga yucūn de jeē quíji. ¹⁰ Chi yucūn Abraham cúu Leví, te vésú ná tu cacu de quiví jeē ni jéjnahan Melquisedec Abraham, te nájnūhun jeē ni jēhe máá de cúu jeē ni jēhe Abraham.

Jeē cúu Jesús sutū nájnūhun Melquisedec

¹¹ Te yucūn Leví ni cane sutū Aarón jíin

táca gá sutū ní quiijicoo. Te ni castéén de ley yā nuū ñáyuu Israel jenahán. Te núu ní cúu sáha de jeē quendōo ndaā ñayuu jíin ley un núu, te tuá cánuú jeē núcuĩñĩ inga clase sutū lugar Aarón jíin yúcūn de. Te inga clase sutū cúu Cristo jeē cúu ya nájnūhun sutū Melquisedec. ¹² Te núu nucuĩñĩ inga clase sutū, te suni cánuú sáma ley siquĩ yucūn de. ¹³ Núu súcuan te ni sáma ley un, chi cáhán tutu iĩ jeē Jítóho yō Jesús cúu inga clase sutū ún, te ni cacu ya chíji inga yucūn. Te yucūn ní quiiji ya ún, tú ni ñn ní cúu sutū. ¹⁴ Chi jíni vāha yó jéē chíji yucūn Judá ni cacu Jítóho yō. Te yucūn ún chi tu ní cáhán cuĩti Moisés jeē cánecoo sutū.

¹⁵ Te cáji cúu jeē ní nucuĩñĩ Cristo jeē cúu ya inga clase sutū nájnūhun sutū Melquisedec. ¹⁶ Te tu cúu ya sutū jeē ní cacu chíji yucūn Leví nájnūhun cáhán ley jenahán. Chi cúu ya sutū siquĩ jeē ndíso ya poder cotecu yā ñí cáni te ma cúu cuĩti yā. ¹⁷ Chi súcuan ní cahān Yaā Dios jnūhun ya:

Ñí cáni cúu ró sūtū,
nájnūhun sutū Melquisedec.

¹⁸ Núu súcuan te jniñu jeē ní ndacu ley jenahán siquĩ sutū, chi ni naa vijna, chi tu ní níhín jniñu quendōo ñí cáni. ¹⁹ Chi ley Moisés tu ní sáha jeē quendōo ndaā ñayuu. Te ni nihīn yō ñn jnūhun vāha ga jeē ñūhun ni yō jeē ndáhva Cristo cuēchi yó, te súcuan ni cuyajni yó núu Yaā Dios.

²⁰ Te jíin jéē ni cáhán teyí Yaā Dios te cúu Jesús sutū. ²¹ Chi táca gá tēe ún, nasūu jíin jnūhun jeē ni cáhán teyí yá ní cúu de sutū. Te Jesús chi ni cahān teyí Yaā Dios jeē cuu ya sutū, chi súcuan cáhán tutu:

Ni cahān teyí máá Jítóho yō Yaā Dios, te ma nácani yátá ni yā:

Ñí cáni cúu ró sūtū,
nájnūhun sutū Melquisedec.

Achí yá. ²² Núu súcuan te jíin Jesús ni cucutū ñn contrato vāha ga vēsú ley jenahán. ²³ Te táca gá sutū ún, chi ni iyo cuehē de, chi siquĩ jeē cájihī de te tu ní cúu cuiñi de ñí cáni.

²⁴ Te Jesús chi cúu ya sutū jeē cuiñi ñí cáni, chi técu yā ñí cáni. ²⁵ Jeē yúcuan ndíso jniñu ya jnama ya ñayuu quíjicoo nuū Yaā Dios, cotecu i ñí cáni. Chi ñí cáni técu yā te cáhán yā jehē i jíin Yaā Dios.

²⁶ Núu súcuan te vāha ndasí sutū kujénu cúu Jesús, jeē nájnūhun jíni ñúhún yó. Chi sutū iĩ cúu ya, te tú na cuēchi ya, te íyó ndoo ya, te tu cúu ya jnáhan ñayuu casáha cuēchi, te cújénu teyí yá nde nuū sucún gá andiví. ²⁷ Te máá yá tu jíni ñúhún sáha ya nájnūhun ni casáha sutū cácujeñu jenahán, jeē ndiquiví ni casocō de quiti siquĩ cuēchi máá de xihna gā, te sáá te siquĩ cuēchi ñayuu. Chi ñn jínu-ni ni socō yā maá yá jehē yō, te ni cuu-ni. ²⁸ Chi ni jeni ley Moisés táca sūtū kujénu jeē tú na fuerza squícu vāha. Yūcuán na te cuéé gá te ni cahān teyí Yaā Dios. Te jíin jéē ni cáhán teyí yá, te ni jeni ya Sēhe ya jeē cúu ya sutū kujénu, te sutū ndaā sutū vāha cúu ya ñí cáni.

Jeē ndíso jniñu Cristo siquĩ ñn contrato jeé

8

¹ Núu súcuan te jnūhun cánuú gá jeē jé ni cahān rī cúu yāhá: Névāha yó ñn sutū kujénu nájnūhun ni cahān rī, te ndéé yá lado vāha mesa nuū ndácu jniñu máá Yaā kujénu nde andiví. ² Te vijna te cúu ya sutū nde andiví, jeē cúu ndije lugar iĩ jeē ni sáha máá Jítóho yō Yaā Dios, nasūu ñáyuu. Chi tu cáa nájnūhun vehe iĩ jenahán jeē ní casáha ñayuu. ³ Te táca sūtū kujénu ni jeconaa de jeē socó de ndajniñu jíin quiti nuū Yaā Dios. Núu súcuan te Jesucristo suni ni jini ñúhún jeē socó yā jeē cúu ya sutū. ⁴ Te núu ní iyo ga yā ini ñayiví, te ni ma quijnáhan jeē cúu ya sutū jíin táca gá sutū, chi níni casocō gā de quiti nájnūhun cáhán ley Moisés. ⁵ Te jniñu casáha de, tu quijnáhan jíin jéē iyó andiví. Chi cúu ñn muestra-ni jeē steén siquĩ andiví. Te cúu nájnūhun jeē ni cáhán Yaā Dios jíin Moisés quiví ní quejéé de sáha de vehe iĩ jenahán: Coto vāha ró jéé sáha ró táca ndajniñu nájnūhun jito jeē ni steén rī nuū rō nde xinī yúcu, achí Yaā Dios jíin de. ⁶ Te vijna te sáha Cristo jniñu jénu ndasí gá vēsú jeē casáha táca sūtū ún, chi ndíso jniñu ya siquĩ contrato jeé jéé yóhyo vāha ga, chi ndíso jnūhun jénu ga jeē ni jéjnūhun Yaā Dios.

⁷ Chi contrato ley xihna ñúhún, núu jeē ni sáha jeé queé vāha jniñu núu, te tuá cánuú jéé cóo contrato uū. ⁸ Chi ñayuu jenahán un

jeē tu ní cáquendōo ndaā, suhva ni cahān Yaā Dios jíin i, áchí tutu:

Quiji quivī jeē nasáha ri ñn contrato jeé jíin ñayuu Israel jíin ñayuu Judá, áchí Jítóho yō Yaā Dios.

⁹ Te ma cóo nájnūhun contrato jeē ni sáha ri jíin jíi i jenahán,

quivī jeē ní jñi ri ndaha de jíjnáhan de, te ni quenehen ri de ini nación Egipto.

Chi tu ní cásquicu vāha de jíin contrato ley rī.

Jeē yúcuan tuá ni táñúhún rí de, áchí Yaā Dios.

¹⁰ Núu súcuan te suhva coo contrato jeē nasáha ri jíin ñayuu Israel,

nde na quíji quivī yúcuan, áchí Jítóho yō Yaā Dios:

Sáha ri jeē jécūhun ley rī nuū jeē níjnūní i, te suni ini anuá i tee ri jnūhun ley rī.

Te cuu ri Yaā Dios maá i, te maá i cuu ñayuu maá rí.

¹¹ Te tuá jíni ñúhún stéén i nuū jnáhan i nuū ñáni i,

návāha cuni i ndese Yaā cúu Jítóho i.

Chi ndihí i cuni ndese Yaā cúu ri, nde ñayuu núu ga jíin ndé ñayuu cujéhu ga.

¹² Chi cone cáhnu ni rī nuū i jeē ní casáha i jniñu néé,

te ni ma núcūhun ga ni rī cuēchi ni casáha i. Achí Yaā Dios.

¹³ Te jeē ni cáhān yā jeē cuáha ya ñn contrato jeé cúu jeē ní cachí yā jeē tuá cuajniñu contrato xihna ñúhún. Te ñn jeē ní cutúhú jéē tuá jejniñu, chi jíni yō jeē je yajni naa.

Vehe iñ ñayiví yáha ní steén ndese cáa andiví

9

¹ Te ndaā chi contrato xihna ñúhún ní ndacu jniñu ndese chiñúhún i ya, jíin ndese coo ñn vehe iñ ini ñayiví yáha. ² Te ni cuvāha vehe iñ ún, te ni iyo uñ cuarto. Te cuarto xihna ñúhún jéē naní cuarto iñ, ni iñ candelero oro jíin mesa oro jíin pan iñ. ³ Te ni iyo sahma jeē ndíta caa jeē ndihyú inga cuarto jeē naní cuarto iñ ndasí gá. ⁴ Te ini un ní iyo ñn altar oro nuū cayú sūje cútú, jíin yéjnū jeē ñúhun contrato ley, te máni oro cúu ní síquī yejnú. Te ini yejnú un íne ñn tijehēn oro jeē ñúhun maná jeē ní cuun andiví. Te suni íne vara Aarón jeē ní

nane numa, jíin tabla yuū jeē yosó jnūhun contrato ley. ⁵ Te síquī yejnú un ní cahīn ndindúú figura ndajéhé querubín jeē steén jeē íne Yaā Dios. Te ni sáha cuandahū síquī tapa yejnú nuū ni cóso yuyú níñi jeē ndáhva cuēchi. Te tu núne yó cáhān gā yō síquī tāca yúcuan vijna.

⁶ Te ná ni jínu tācá un, te núu-ni núu-ni quívicoo sutū ini cuarto xihna ñúhún jéē casáha de jniñu jeē cúu de sutū. ⁷ Te ini cuarto uñ, chi tu cúu quívicoo na-ni sutū jíin inga ñayuu, chi máñúhún-ni sutū cujéhu ga cúu jeē quíví, te suni ñn-ni vuelta jeē cuiyá. Te suni ma cúu quíví de núu tú níñi quiti jeē socó de nuū Yaā Dios jeē síquī cuēchi máá de jíin síquī cuēchi ñayuu. ⁸ Te jíin yúcuan stéén Espíritu Santo nuū yō jeē ná ni iyo ga cuarto iñ xihna ñúhún ini ñayiví, te tu ní núne ichi jeē quíví ñayuu ini lugar iñ ndasí jeē cúu andiví. ⁹ Chi tāca yúcuan cúu jeē ní steén ndese cúu tiempo vijna. Chi jeē ní casocō i ndajniñu jíin quiti nuū Yaā Dios, chi tu ní cúu cuiti sáha jeē quéndōo ndoo ánuá ñayuu ní casocō ún. ¹⁰ Chi tācá un ní steén máni síquī yiqui cúñu yō, ndese caji yō, ndese coho yó, ndese ndundoo yó. Te ni jejniñu máá-ni nde ni quiji Cristo jíin ñn modo vāha ga.

¹¹ Chi vijna je ni quiji Cristo, te cúu ya sutū cujéhu ga jeē ndiso jniñu ya síquī tāca jéē váha jeē ní quiji vijna. Te cúu ya sutū ini lugar iñ nde andiví jéē cujéhu ga te vāha ga vésú cuarto iñ jenahán. Te nasūu jéē ní casáha ñayuu cúu, chi nasūu cuenta ñayiví yáha cúu. ¹² Te jeē ni quíví ya ini lugar iñ ndasí gá nde andiví, te nasūu jíin níñi ndixúhú ni níñi becerro, chi jíin níñi maá yá ni quíví ya, ni socō yā ñn jínu-ni jeē ní cáni. Te súcuan ni jnama ya yohó jéē cótecu yō ní cáni. ¹³ Chi nde jenahán te níñi síquī jíin níñi ndixúhú jíin yáa becerro jeē ní cáyū nuū altar, ni cacosō yuyú de síquī ñayuu jeē tu íyó ndoo ánuá i, te súcuan ni ndundoo i nuū yā. ¹⁴ Te núu ni nihīn jniñu níñi tācá quiti ún, te nagā ni cuu níñi maá Cristo. Chi Yaā ndoo cúu ya, te ni socō yā maá yá nuū Yaā Dios, ni sáha Espíritu jeē iyó ní cáni. Te níñi yā nácate ánuá yō nuū jniñu néé jéē cúu yō sáha. Te súcuan te cuu cuajniñu yó núu Yaā Dios, Yaā técu.

¹⁵ Jeē yúcuan cúu jeē ndíso jníñu ya siquī ñn contrato jeé. Chi ní jihī yā, te súcuan ní quende yā cuēchi ní casáha ñayuu ná ní Iyo i chíji contrato xihna ñúhún. Te ñayuu jeē cána Yaā Dios i quívicoo i ndaha ya, nihīn i tahū i jeē cóo ní cáni, nájnūhun ní jejnūhun ya. ¹⁶ Chi cúu nájnūhun núu sáha ñn tēe acta jeē cahán siquī tahū, te nde na cúu de te níhín jníñu. ¹⁷ Chi núu técu gā tēe ní sáha, te tu níhín jníñu. Te nde núu ní jihī de, te sáa te jéjníñu. ¹⁸ Te suni súcuan contrato xihna ñúhún, suni ní jini ñúhún cucutú jíin níñī quítī ní jíhī. Te contrato jeé chí ní cucutú jíin níñī Cristo jeē ní jíhī yā. ¹⁹ Chi ná ní cuu ní cachi Moisés tācá jniñu ndácu contrato ley un núu ndivii ñayuu, te ní quihin de níñī becerro jíin níñī ndixúhú jíin ndute, te jíin ixi cácuéhé jíin yúcū hisopo ní cosō yuyú de siquī libro ley jíin síquī ndivii ñayuu. ²⁰ Te ní cahán de: Yāha cúu níñī jeē cúcutú contrato ley jeē ní sáha Yaā Dios jíin yó, achí de. ²¹ Te suni níñī un ní cosō yuyú de nde maá vehe ñi jíin táca ndajníñu ní cajejníñu de jeē cáchiñúhún de ya. ²² Te je yajni ndihī ndajníñu, chí cahán ley un jeē jíni ñúhún ndundoo jíin níñī. Te núu ma cáti níñī te ma cóne cáhnu ní yā nuū cuéchi núu.

Jeē ní sócō Cristo maá yá jeē quénde yā cuēchi

²³ Núu súcuan te tācá ndajníñu un jéé cácuu muestra tāca jéé iyó andiví, ní jini ñúhún ndundoo jíin níñī quítī. Te tāca maá jéé iyó andiví, chí ní jini ñúhún ndundoo jíin níñī Cristo jeē yóhyo vāha ga. ²⁴ Te Cristo chí tu ní quívī ya ini lugar ñi jeē ní casáha ñayuu, chí ñn muestra-ni ní cuu un jéé steén ndese iyó lugar ñi ndije nde andiví. Chí maá andiví ní quívī ya, te vijna íne ya nuū Yaā Dios jeē cahán yā jehē yō. ²⁵ Te maá sūtū cujéhnu ga quívī de tāca cuíyā ini cuarto ñi gā jeē sócō de níñī quítī. Te Cristo tu ní sócō yā maá yá cuehē jínu, chí ñn jínu-ni. ²⁶ Chí núu jeē súcuan te cánuú jéé cuehē jínu ndoho ya nde ná ní jecōo ñayiví te nde vijna núu. Te tuú chí sa tiempo cuándihī yāhá ní quenda ndijin yā ñn jínu-ni jeē ní cáni, ní sócō yā maá yá jeē ní quende yā cuēchi. ²⁷ Te nájnūhun ní cundaā jeē cúu tāca ñayuu ñn jínu-ni, yūcuán na te sándaā Yaā Dios jniñu i, ²⁸ suni súcuan Cristo ní jihī yā ñn

jínu-ni jeē ní sócō yā maá yá jeē ní quende yā cuēchi cuehē ñayuu. Yūcuán na te ndiji ya inga jínu, te nasūu jéé sócō tucu ya maá yá jeē quénde yā cuēchi, chí sa suhva jeē jnáma ya ñayuu jeē cándetu i jeē ndíji ya.

10

¹ Chí ley Moisés ní cuu ñn muestra-ni tāca jéé vāha jeē ní quiji jíin Cristo, ñn jeē steén-ni ndese coo maá jéé vāha. Jeē yúcuan tu cúu cuítī sáha ley un jéé quéndōo ndaā ñayuu jeē quíjicoo i nuū Yaā Dios jeē cásocō i quítī nuū cuíyā nuū cuíyā. ² Chí núu ní cúu sáha ley un jéé quéndōo ndaā i, te jecuíñī jeē cásocō i quítī núu. Chí núu ní cúu, te ñn jínu-ni te je ní quendōo ndoo ánuá ñayuu cásocō ún, te ma yūhu gā anuá i jeē ní sáha i cuēchi núu. ³ Te tuú chí jeē cásocō i quítī ún táca cuíyā, sa sáha jeē núcūhun ní i cuēchi i. ⁴ Chí níñī stíquī jíin níñī ndixúhú, ma cúu cuítī quende cuēchi.

⁵ Jeē yúcuan ná ní quiji Cristo ini ñayiví, te ní cahán yā jíin Yaā Dios: Jeē jéhni i quítī jíin jéé jéhe i ofrenda nuū ní, chí tu ní nújnahan ní ní. Te ní sátūhva ní yiqui cúñu maá ná jeē sócō na.

⁶ Te tu ní cúsiñī ní ní jéé jéhmu i quítī te sócō i tí jeē ndúndoo cuēchi i núu.

⁷ Yūcuán na te ní cahán ná: Yāha véji ná jéé squícu ná jniñu jeē nújnahan ní ní, Tátā Yaā Dios.

Chí súcuan je yósó jnúhun na núu tútu. Achí Jesús. ⁸ Xihna gā ní cahán yā jeē tu ní nújnahan ní Yaā Dios te tu ní cúsiñī ní yā jeé jéhni i quítī te jéhe i ofrenda, jíin jéé jéhmu i tí te sócō i tí jeē ndúndoo cuēchi i núu, nájnūhun ndácu ley jenahán jniñu. ⁹ Te ní cahán gā yā: Yāha véji ná jéé squícu ná jniñu jeē nújnahan ní ní, Tátā Yaā Dios. Te jeē ní cahán yā súcuan, te ní sáha ya jeé jecuíñī jeé cásocō i quítī, chí ní sócō yā maá yá. ¹⁰ Te ní sáha Yaā Dios jeē iyó ndoo íyó íi yō nuū yā siquī jeē ní sáha Jesucristo jeē nújnahan ní Yaā Dios, suu jeē ní sócō yā yiqui cúñu yā ñn jínu-ni jeē ní cáni.

¹¹ Te tāca sūtū ún ndiquívī ní cahīin de ní cajejníñu de nuū yā, te cuehē jínu cájehni de suu quítī jeē sócō sócō de. Te tācá un chí ma cúu cuítī quende cuēchi. ¹² Te Cristo chí ñn jínu-ni jeē ní cáni ní sócō yā maá yá jeē

siquí cuéchi yó. Te sáa te ni cucōo ya lado váha Yaā Dios nuū cujéhu ya. ¹³ Te yūcuan ndétu ya vijna nde quiiji quivī jeē quénde yā poder tāca jéē jíto uhū nuū yā. ¹⁴ Chi jeē ni sócō yā maá yá ñn jínu-ni, te ni sáha ya jeē ní cáni quendōo ndaā ñayuu ni sándoo ya.

¹⁵ Te maá Espiritu Santo suni cáji cáhán yā siquī jnúhun yáha, chi xīhna gā cahán yā:
¹⁶ Suhva coo contrato jeē nasáha ri jíin i, nde na quiiji quivī yūcuan, áchí Jítóho yō Yaā Dios:

Sáha ri jeē jécūhun ley rī ini anuá i, te suni nuū jeē níjnūnī i tee ri jnúhun ley rī.

¹⁷ Yūcuán na te cáhán gā yā:

Ma núcūhun cuiṭi gā ni rī tāca cuéchi jíin jniñu neé ní casáha i.

Achí yá. ¹⁸ Núu sūcuan te núu je ni ine cáhnu ni yā nuū cuéchi yó, te tuá cánuú jéē socó gā yō jeē siquí cuéchi yó.

Jeē ní nune ichi quivī yó núu Yaā Dios

¹⁹ Jeē yūcuan hermano, ma ñn jeē cáni ni yō, chi cuu quivī yó lugar iñ ndasí ndé nuū iyó Yaā Dios, siquī jeē ní jeti niñi Jesucristo.

²⁰ Chi ni nune ya ñn ichi jéé jéé cótecu yō ní cáni sáha ya. Chi ná ni jihī yā te ni tahndē sahma ndíta caa jeē ndihyú lugar iñ ndasí gá ini vehe iñ. Te sūcuan ni steén Yaā Dios jeē núne quivī yó lugar iñ ndasí gá nuū iyó yá.

²¹ Te Jesús cúu sutū cujéhu ndasí jeē ndíto yóhó ñayuu cácuu sēhe Yaā Dios. ²² Núu sūcuan te na quivīcoo yó núu Yaā Dios, te na cóo ndije ndaā anuá yō, te na cándije níhin yó jéé iyó ndaā ndihī jnúhun ya. Chi jíin niñi Cristo ni ndundoo ánuá yō nuū tāca cuéchi ni casáha yó, nájnūhun ni ndundoo yó núu yā jeē ní jendute yó jíin ndute. ²³ Te na cuiñi níhin yó jíin jnúhun jeē cácahán yō jeē ñúhun ni yō jeē sáha ya jeē váha jíin yó. Te ma cáca yátá yó, chi vāha squícu maá Yaā Dios jeē ní jéjnūhun ya nuū yō. ²⁴ Te na nácani ni yō ndese stíhvī jnáhan ni yō jeē cundáhú gá ni yō jnáhan yó, jíin jéé sáha yó jniñu váha. ²⁵ Te níni na ndútútú yó chiñúhún yó yā, te ma cúhuun ni yō nájnūhun cásáha sava i, chi sa víhyá gā na stíhvī jnáhan ni yō, chi je cájini yō jeē cuácuyajni quivī ndíji ya.

²⁶ Te núu je ni jecūhun ni yō te ni jetáhú yó jnúhun ndaā, te núu máni sáha sáha-ni yó cuéchi, núu sūcuan te tuá na inga iyó jéé cúu siquí cuéchi yó. ²⁷ Chi sa quéndōo máni ga

jnúhun xeēn siquī yō jeē quiiji quivī juicio te quiiji yáñuhún xeēn jeē cayū ñayuu jeē cájito uhū i ya. ²⁸ Ñayuu squéhichī ley Moisés, te núu uū chí únī ñayuu cahán cuéchi siquī i, te cuu nahín i, te tuá na jnúhun cundáhú ni iyó. ²⁹ Te nagā ni cuu jeē ma ndóho xeēn gā ñayuu jeē squéhichī i maá Séhe Yaā Dios, chi nájnūhun jeē jeñú níhnu i siquī yā. Te sáha i jeē tu ndé jéjníñu niñi yā jeē ní jeti siquī contrato jeē ndúndoo i nuū yā nuú. Te sūcuan sáha ndevāha i nuū maá Espiritu Yaā Dios jeē sáha jeē váha yóhó. ³⁰ Chi je jíni yō jeē ni cáhán maá yá: Máa rí sáha jeē ndutahū i siquī cuéchi i, maá rí cuāha castigo i, áchí Jítóho yō. Te suni cáhán: Máa Jítóho yō sándaā yā siquī cuéchi ñayuu yā. ³¹ Núu sūcuan te xeēn ndasí cúu jeē quivī ñayuu ini ndaha Yaā Dios, Yaā técu, jeē ndútahū i siquī cuéchi i.

³² Te na núcūhun ni rō ndese ni cuu ichi yátá, nde náa sá ní quejéé ró caca ró jíin luz yā, te ni cajendeyí ni rō ni candoho ró tíjni jnúndóho xeēn. ³³ Chi sava ró ní cacahán neé i nuū rō te ni castóho i róhó ní cajito ñayuu. Te sava ga rō ni cajēhe ró jnúhun cuiñi ró jíin ñayuu ni candoho sūcuan. ³⁴ Chi ni cacundáhú ni rō ñayuu ní cahīn vecāa jeē siquí yā, te ni cacusiñi rō vésú ni caquende ñayuu ndajniñu ró. Chi ni casáha ró cuenta jeē ndé andiví cánevāha ró ñn tahū jeē váha ndasí gá jeē coo ní cáni. ³⁵ Núu sūcuan te ma siaá rō jnúhun jeē ní candije ndije ró jéé váha ni yā, chi cuehē ndasí táhū nihīn rō siquī ún. ³⁶ Chi cánuú jéé cuándeyí ni rō návāha sáha ró jéé nújnahan ni Yaā Dios, te nihīn rō jeē ní jéjnūhun ya. ³⁷ Chi cáhán tutu iñ:

ñn núnúu-ni te ndee Yaā ndiji, te ma cucuéé yá.

³⁸ Te ñayuu jeē ní ndahva rī cuéchi i, cotecu i jeē candíje i jeē sáha ri jehē i.

Te núu na cáca yátá i, te ma cúsiñi ni rī jíin i. Achí Yaā Dios. ³⁹ Te yóhó tu cácuu yó jnáhan ñayuu cájica yátá jeē jnahnú ndetū i. Chi sa cácaandíje yó jéé nihín tahū yō cotecu anuá yō.

Siquí jnúhun cándíje

11

¹ Te jeē candíje yó, suu cúu jeē cúndaā ndije ni yō jeē nihín yō tāca jéē ñúhun ni yō, jíin jéē jíiní vāha yó jéē iyó ndije tāca jéē tu cájito yó núu vijna. ² Te ñayuu jenahán chi ni jejnúhún yá i siquī jeē súcuan ni cacandíje ñihin i.

³ Siquī jeē candíje yó cúu jeē jécūhun ni yō jeē ni sáha Yaā Dios ñayivi jíin jnúhun ni cahān-ni ya. Te jíin poder Yaā Dios jeē tu jito yó núu, ni jecōo tāca jéē jito yó núu.

⁴ Ni candíje Abel jeē sáha ya jehē de, te jeē yúcuan ní socō de jeē vāha ga nuū Yaā Dios vésú Caín. Te jeē yúcuan ní jejnúhún yá jeē iyó ndāā de, chi ni jetáhú yá jeē ni sócō de quiti nuū yā. Te vésú ni jihī de, te cáhán gā ejemplo de jíin yó nde vijna, chi ni candíje ndaā de.

⁵ Ni candíje Enoc jeē sáha ya jehē de, te jeē yúcuan ní naquihin ya de cuahān de andiví, te tu ní jíhí de. Te tu ní cánanihīn ñayuu de, chi ni ndoñúhún-ni de ni sáha ya. Te áchí tutu jeē nde ná tu naquihin ya de te ni cusī ni yā jíin táca jéē ni sáha de. ⁶ Te núu tu cándíje yó jéē sáha ya jehē yō, te tú na modo cusī ni Yaā Dios jíin yó. Chi ñayuu jeē cuní quivicoo ndaha ya, cánuú jéē candíje ndaā i jeē iyó yá jíin jéē cuáha ya tahū nuū ñayuu jeē nducú i candíje i ya.

⁷ Te Noé ni candíje de jeē sáha Yaā Dios jehē de, ná ni castūhun yá nuū de jeē coo jnúndóho jeē ná tu coto de jeē coo. Te jeē yúcuan ní jendetū de ni sáha de barco cáhnu jeē naní arca, návāha cācu de jíin ní vehe de. Te jeē súcuan ni candíje de, te ni cane cuēchi siquī ñayuu jeē tu ní cándíje i ya. Te ni ndahva yā cuēchi de siquī jeē ní candíje de jeē sáha ya jehē de.

⁸ Te Abraham ni candíje de jeē sáha ya jehē de, te jeē yúcuan ní jetáhú de ná ni cahān yā jíin de jeē quihín de ñin lugar nuū cuáha ya cuu tahū de. Te ni quenda de cuahān de, vésú tu jíin de ndé nuū quihín de. ⁹ Ni candíje de jeē sáha ya jehē de, te jeē yúcuan ní condee tatú de nuū ñúhun jeē ni jéjnūhun ya jeē cuáha ya nuū de. Te ni condee de vehe ñi, te suni súcuan Isaac jíin Jacob, chi sēhe de ún suni ñnuú níhīn tahū i jíin de jeē ni jéjnūhun ya. ¹⁰ Chi ni ñuhun ni de condee de máá ñuu andiví jéē iyó cutú

cimiento, te máá Yaā Dios ni jequin yā ni sama ya ñuu ún.

¹¹ Te suni ni candíje máá Sara jeē sáha ya jehē ña, te jeē yúcuan ní nihīn ña fuerza jeē ní jecūhun sēhe ña. Chi nde ná ni yāha ndasí cuíyā ña, te ni cacu ñin sēhe yí ña, chi ni candíje ña jeē squícu Yaā Dios jeē ni jéjnūhun ya. ¹² Te súcuan ni cuu jeē ni táhū cuehē ñayuu ni sáha ñin-ni Abraham, vésú je jéhnú ndasí de. Te yucūn de ni nducuehē ndasí, nájnūhun quimi andiví, jíin ñiti yumar, jeē ma cúu cuiti cahu yó.

¹³ Te tāca tée cándíje un, ní cajihī de. Te vésú tu ní cájito de jeē ni jéjnūhun ya, te ni cajini vāha de jeē cóo, te ni cacusi ni de jeē cóto de inga tiempo. Te súcuan ni cacahān de jeē ñayuu ñuu jíca ñayuu tatú cácuu de ini ñayivi yáha. ¹⁴ Te tāca tée jeē cahán súcuan, chi stéén cají de jeē nducú de ñin ñuu jeē cúu andiví núu cúu ñuu maá de. ¹⁵ Chi núu jeē cánacani ni de siquī ñúu nuú ní quendacoo de, te iyó modo jeē nándicó cóo de te núu jeē cácuni de núu. ¹⁶ Te tuú chi ni cacuu ndasí ni de coyúcú de inga ñuu vāha ga jeē cúu ñuu andiví. Jeē yúcuan tu cúcanu Yaā Dios jeē naní yá Yaā Dios de jíináhan de, chi je ni sátūhva ya ñin ñuu nuú cóyúcú de.

¹⁷ Ni candíje Abraham jeē sáha ya jehē de, te jeē yúcuan ní jehēn de jíin Isaac jeē socó de i, ná ni jito ndee ya de. Te ni iyo tūhva de jeē socó de sēhe de un jéē mañúhún ni i nuū de, vésú ni nihīn de jnúhun jeē ni jéjnūhun ya suhva siquī i: ¹⁸ Isaac cúu tée jeē squejéé rí yucūn rō quihīn, achí jnúhun ni jejnūhun ya. ¹⁹ Te ni sáha de cuenta jeē cúu nastécu Yaā Dios i. Te nájnūhun súcuan ni cuu, chi cuu cahān yō jeē nájnūhun ni jihī i te ni natecu i nuū de, chi ni jesi-ni ya jeē ma cáhni de i.

²⁰ Ni candíje Isaac jeē sáha ya jehē de, te jeē yúcuan ní cahān de jeē vāha tahū nihīn sēhe de Jacob jíin Esaú tiempo quiji. ²¹ Te suni súcuan ni candíje Jacob, te jeē yúcuan, náa je yajni cuu de te ni cahān de jeē vāha tahū nihīn ndindúú sēhe yí José. Te yítuu de vara de, ni chiñúhún de Yaā Dios. ²² Te suni súcuan ni candíje José, te jeē yúcuan, náa cuacuyajni cuu de, te ni cahān de jeē tāca yucūn Israel, ñin quiví quendacoo i

nación Egipto. Te ni ndacu de jniñu jeē chindūji i yiqui de ñuu nuū quívicoo i.

²³ Te ná ni cacu Moisés, te tátá i náná i ni cacandíje de jeē sáha ya jehē de, te jeē yúcuan ní cacondito sáhi de i unī yoō. Chi ni cajito de jeē lúu cáa i, te tu ní cáyūhú de siquī acta jeē ni sáha rey jeē na cúu tāca súchi yí. ²⁴ Te suni súcuan ni candíje Moisés, te jeē yúcuan ná ni jehnu de te tuá ni jéhe de jnūhun cuu de sēhe ñahan cúu sēhe síhi rey Egipto. ²⁵ Chi sa ni cuu ni de ndoho de jíin táca jnáhan de ñayuu Yaā Dios, nasūu jéē cusī ni de jecu-ni tiempo jíin cuéchi. ²⁶ Chi ni sáha de cuenta jeē núu cahān neé ñayuu siquī de jeē siquī Cristo, te yúcuan sáha jeē cucá ndasí gá de ndihi jeē ndiso jnūhun Yaā Dios, vésú jeē nihín de ndihi ndajniñu cucá íyó nación Egipto. Chi ni ñuhun ni de jeē cuáha ya tahū de. ²⁷ Te jeē súcuan ni candíje de, jeē yúcuan ní quenda de nación Egipto cuahān de. Te tu ní yúhú de jeē quití ni rey nuū de. Chi ni ĩn nīhin de siquī jniñu sáha de, chi ni sáha de cuenta jeē je jíto de nuū Yaā jeē tu cúu coto yó núu vijna.

²⁸ Te jeē súcuan ni candíje de, te jeē yúcuan ní cahān de jeē na cáhni ñayuu londe pas-cua. Te ni ndacu de jniñu jeē na cóso yuyú i niñi tī yehyí i, návāha núu na quíji ndajéhé jeē cáhni yā tāca séhe nuū ñayuu Egipto, te ma cáhni yā sēhe nuū ñayuu Israel. ²⁹ Te siquī jeē ní cacandíje ñayuu Israel jeē sáha ya jehē i, te ni cayāha-ni i mēhñu Mar Rojo, chi ni nune ya te ni natūu-ni ñuhun íchi. Te suni súcuan ni cacuni tēe Egipto yāha de núu, te ni nandihyū-ni ndute siquī de ni cajihí de.

³⁰ Ni cacandíje soldado jeē sáha ya jehē de, te jeē yúcuan ní cotúu jeē ní condúu ndihyú ñuu Jericó, ná ni cajicó ndúu de uxā quiví. ³¹ Te Rahab, vésú ñahan tíjni ni ni cuu ña, te ni candíje ña jeē sáha ya jehē ña. Te ni chindéé ñahán ña tēe Israel jeē ní quijicoo ni condéhé yuhu ndese íyó ñuu ña. Te jeē yúcuan tu ní jíhi ña jíin ñayuu nīhni ni ñuu ña ún.

³² ¿Te ndé jnúhun ga cahān rī núu súcuan? Chi tuá na tiempo jeē nácani ga rī jnūhun Gedeón jíin Barac jíin Sansón jíin Jefte jíin David jíin Samuel jíin táca tēe ni canacani jnūhun ya nde jenahán. ³³ Ni cacandíje

de jeē sáha ya jehē de jíinahan de, te jeē yúcuan ní cacundeyí de ni canajni de táca ñuu náhnu, te vāha ni candacu de jniñu nuū, te ni chindéé ñahán yá de nájnūhun ni jejnūhun ya. Te nuū sava de ni jesi Yaā Dios yuhu ndícaha jeē tu ní cáyeji tī de. ³⁴ Te sava de tu ní cáyú de sáha ñuhūn jeē cayú xeēn. Te sava de ni cācu de jeē tu ní jíhi de jíin espada. Te sava de ni nanihín ni de náa tuá fuerza de núu, te ndacuī teyí ní ĩyo de nuū guerra, te ni cacundeyí de siquī soldado táca ñuu jicá jéē jíto uhū ún de. ³⁵ Te sava ñahan ni natecu sēhe ña jeē ni jíhi i.

Te sava ga ñayuu chi sa suhva ni candoho xeēn i nde ni cajihí i. Te tu ní cájēhe i jnūhun jeē siaá i jnūhun ya te cācu i, chi ni catee ni i jeē natecu i coyūcu váha ga i andiví. ³⁶ Te sava ga i ni casácatā ñayuu nuū i, te ni cacani ñayuu i, te nde ni caconuhnī cadena i ni cahīn i vecāa. ³⁷ Te ni cajēhe yuū xinī i, te ni cajehnde i jíin sierra, te ni cajito ndee i jíin jnúndóho, te ni cajehni i jíin espada. Ni cajica cuu i cháha chúcuan, te máa ñi lánchi máa ñi ndíxúhú ní cañuhun i. Ni candoho ndáhú i, ni cajito i jnúndóho, ni castóho ñayuu i. ³⁸ Vāha ndasí ñayuu ni cacuu i jeē tú cuiñi ñayuu ñayiví súcuan, te vésú súcuan te ni casáha ñayuu jeē ní cajica cuu i nuū ñuhun téhé jíin chíji yucu, ni cahīn i yaū cava jíin yáu ñuhun. ³⁹ Te táca ñayuu yāha, vésú ni jejnúhún yá i jeē ní cacandíje nīhin i jeē sáha ya jehē i, te tu ní cajito i nuū jeē ni jejnūhun ya. ⁴⁰ Chi ni sátūhva Yaā Dios ĩn jniñu váha ga, te suu cúu jeē sáha Cristo jíin yó, návāha ĩn cáhnu-ni nīhín yō tahū yō jíin i, te jeē yúcuan cúu jeē ná tu nīhín i ndihi tahū i.

Jeē na cócunuū yō nuū maá ĩn-ni Jesús

12

¹ Te íyó cuéhé ndasí ñayuu un jéē ní cacandíje nīhin i jeē sáha ya jehē i, te nájnūhun ni jicó ndúu i yóhó, cástéén gā i nuū yō nde vijna jeē suni súcuan na candíje yó. Núu súcuan te suni máa yó, na téjiyo yó táca jéē sajnéñu jíin cuéchi jeē ni cáan yó jíin. Te na cuándeyí ni yō cunu yó jíin carrera jeē ni jéhe ya jeē cunu yó. ² Te na cócunuū vāha yó Jesús, Yaā jeē ni scándíje yóhó te sáha ya jeē íje vāha yó jíin jnúhun ya nde jínu ije yó.

Chi máá yá ni jendeyí ni yā ni ndoho ya jicā cruz. Te vēsú jñūhun canu cúu jeē súcuan cuu yā, te tu ní sáha ya cuenta. Chi ni ñūhun ni yā jeē sa cusī ndasí ni yā ná ni cuu ni ndoho ya. Yūcuán na te ni cucōo ya lado váha mesa nuū ndácu Yaā Dios jniñu.

³ Te na nácani ni rō ndese ni jendeyí ni yā ni ndoho ya jeē ni sáha ndevāha ñayuu iyó cuéchi jíin yá. Te súcuan te ma cuíta ró ni ma ndínuu ni rō jíin jnúndóho. ⁴ Chi ni ná tu ndoho ró jéē ndé cuu rō jeē cánducú ndéyí ró snáā rō cuéchi. ⁵ Te sanaa te je ni canaa ni rō jñūhun cáhán tutu iī, jeē stihví ni Yaā Dios rohó jéē cácuu ró séhe ya:

Séhē, ma quití ni rō jeē snahnú Jitoho yō rohó,

te ni ma ndínuu ni rō núu cáhán yā nuū rō.

⁶ Chi Jitoho yō snahnú yā ñayuu jeē maní yā jíin,

te jéhe ya castigo tāca jéē náquihin ya cuu séhe ya.

Achí tutu. ⁷ Núu súcuan te na cuándeyí ni rō jeē snahnú Yaā Dios rohó, chí sáha ya jíin ró nájñūhun sáha tátá jíin séhe. Chí tú na séhe iyó jéē tu snahnú tátá i. ⁸ Te núu ma snahnú yā rohó, nájñūhun ndóho tāca séhe, núu súcuan te nájñūhun séhe ndáhú cácuu ró, nasūu séhe ndije ya. ⁹ Te tátá yō ñayívi yáha, suni ni snahnú de yóhó, te ni iyo yñúhún yó jíin de. Te nagā ni cuu jeē ma cuándetū yō nuū maá Tátá yō andiví jeē snahnú yā yohó, te cotecu yō ní cáni.

¹⁰ Te ndaā chí máá de ni casnáhnú de yóhó jecu-ni quiví, ndese ni cuu ni maá de. Te máá yá chí snahnú yā yohó ñn modo jeē quéndōo vāha ga yō, návāha coo ndoo yó nájñūhun iyó ndoo máá yá. ¹¹ Te ndaā chí tu cácusī ni yō maá hora jeē ndóho yó castigo, chí sa cúcuíhyá ni yō. Te cúcuéé gá te cuni yō jeē ní quéndōo ndaā yō te coo ndeyí sñi ni yō jeē ni snahnú yā yohó.

Siquí ñayuu jeē casquéhichí i jñūhun cáhán Yaā Dios

¹² Núu súcuan te ma cóo ró nájñūhun tēe ni cuíta íi ndaha te quísi i xiní yití, chí sa ndacuī na sáha ró máá ró nuū jnúndóho. ¹³ Te sáha ró ichi ndóo caca ndaā rō, návāha nduvāha rohó jéē tu fuerza ini, jeē cácuu ró nájñūhun tēe chácua jeē tu cúu caca vāha.

¹⁴ Te na cóndihvī ni rō jeē condee maní rō jíin táca ñáyuu, jíin jéē cóo ndoo coo iī rō nuū yā. Chí ma cúu coto ni ñn ñayuu nuū maá Jitoho yō te núu tu iyó ndoo i. ¹⁵ Te coto má cáca yátá ni ñn ró te scuíta ró jñūhun jeē sáha Yaā Dios jeē váha rohó, návāha tú cuu ró nájñūhun ñn yucū uvuá jeē stívi te sáha daño jíin cuéhē ñayuu. ¹⁶ Te ni ñn ró ma cáca jnení. Te ni ma cóo jéē ni rō nuū Yaā Dios, nájñūhun ni iyo Esaú. Chí máá ñn cohō ndeyu ni jicān de nuū ñáni de, ni sama de jíin derecho de jeē cúu de sūchi núu, te súcuan ni xicó de derecho de. ¹⁷ Te cájini rō jeē cucuéé gá te ni cuni de jeē na cáhán tátá de jeē váha tahū nihñn de, te tu ní cúu, chí tuá ni táñúhún Yaā Dios de. Chí tu ní níññn jniñu jeē ní nacani ni de, vēsú ni nducú ndéyí de te nde ndahyú de.

¹⁸ Te rohó jíjnáhan ró tu ní quíjicoo ró núu iyo cúu, nájñūhun iyo ni cuu máá yucu nuū ni jéhe ya ley yā nuū ñáyuu Israel. Chí ni cane yáñuhún yucu Sinaí, te nee lúchi jnúu jito, te quée tachí xeén. ¹⁹ Te ni jecu trompeta, te ni cahān Yaā Dios. Te ñayuu jeē ní cajini sōho jeē cahán yā, ni cacahān ndahú i jeē ma cahán gā yā jíin i. ²⁰ Chí tu ní cúndeyí i jíin jñūhun jeē ní ndacu ya jniñu nuū i, chí ni cahān yā: Vēsú ñn quití-ni núu quiví ti yucu yáha, jini ñúhún cuu tī jíin yúu chí jíin lanza, achí yá. ²¹ Te siquí jeē iyo ndasí cúu jeē cájito i ún, te ni cahān Moisés: Quísi i ruhū jeē yuhú rí, achí de.

²² Te vijna rohó jéē cácandíje, tu ní quíjicoo ró núu yúcu yúcuan. Chí sa suhva nuū maá yucu Sion jíin núu maá ñuu Yaā Dios, Yaā técu, ni quivícoo ró. Te ñuu un cúu Jerusalén jeē iyó andiví, nuū cáhíyo tútú cuéhē ndasí mil ndajéhé cáchiñúhún Yaā Dios. ²³ Te ni quivícoo ró núu cáyūcu tútú ñayuu cácandíje jeē cácuu séhe Yaā Dios, jeē iyó lista i andiví. Te ni quivícoo ró núu Yaā Dios, Yaā sándaā jniñu ndihi ñayuu, jíin núu cáhíyo ánuá ñayuu vāha jeē jé ni squéndōo ndaā yā i. ²⁴ Te suni nuū maá Jesús, Yaā ndíso jniñu siquí contrato jeē ní quivícoo ró. Te yahu ndasí gá jniñu sáha niññ yā jeē ni jéti jeē ndáhva cuéchi yó, nasūu níññ Abel jeē ni jicān cuéchi.

²⁵ Núu súcuan te coto má squéhichí rō jñūhun jeē cahán yā jíin ró jíjnáhan ró. Chí

ñayuu jeē tu ní cájetáhú ná ni cahān yā jín i ñayīví yáha, tu ní cáccacu i. Te xeēn gā ndoho yóhó te núu ma cuatáhú yó nuū yā jeē cahán yā nde ichi ándiví núu súcuan. ²⁶ Te nde saá ní quisí i ñayīví jéē ni cáhān yā. Te vijna chi cáhān yā: ñn na jínu quisí ri ñayīví, te nasūu máá-ni ñayīví, chi suni tāca jéē ín andiví, áchí yá. ²⁷ Te jnūhun yáha jéē cahán, ñn na jínu, chi cúní cahān jeē téjyo ya tāca jéē tu íyó cutú, suu jeē ní cuvāha, návāha na quéndōo jeē cóo cutú ní cáni. ²⁸ Núu súcuan te cuāha Yaā Dios ñn ñuu nuū yō jeē cóo cutú ní cáni. Te jeē yúcuan, na nácuatáhú yó nuū yā, te na chíñúhún yó yā, te na cóo yíñúhún yó, návāha cusí ni yā jín yó. ²⁹ Chi Yaā Dios máá yó cúu nájnūhun ñn ñuhūn jeē snáa ndíhi jeē neé.

Ndese sáha yó te cusí ni Yaā Dios

13

¹ Ma jécuiñí rō jijnáhan ró jéē cundáhú ni rō hermano rō cáccandíje. ² Conahán ró jeē cánuú cuáha núu ró vehe nuū ñayuu cájica. Chi íyó jínu jeē súcuan ni cajēhe núu ñayuu vehe, te tu ní cájini i jeē nuū máá ndajéhe andiví ní cajēhe núu i vehe.

³ Te conahán ró chindéé ñáhán ró ñayuu cáhīn vecāa, chi sáha ró cuenta jeē nájnūhun cáhīn cáhnu ró jín i vecāa. Te suni nacani ni rō jehē jnáhan ró jéē cándoho i sáha ñayuu, chi núu súcuan coo jín máá ró te suni ndoho ró.

⁴ Coo yíñúhún ró síquī jnúhun quíjnáhan ñayuu, te ma cosíquí ndéē jnáhan ró. Chi máá Yaā Dios sándaā yā cuēchi ñayuu tijni ni jín ñayuu casíquí ndéē jnáhan.

⁵ Te ma ndíyo ni rō xūhún, chi na cóo sí ni rō jín jéē cánevāha ró. Chi máá yá ni cahān: Ma siaá cuí ri rohó, ni ma stóo cuí ri rohó, áchí yá. ⁶ Núu súcuan te ma ñn jeē cáni ni yō, chi cuu cahān yō:

Máá Jítoho rī chindéé ñáhán yá ruhū,
te ma yūhu rí núu na vé cuní ñayuu sáha i
jín rí.

Achi yō.

⁷ Te na núcūhun ni rō tācá pastor rō, jeē ní castéén de jnūhun Yaā Dios nuū rō. Te sáha vāha ro cuenta ndese ni nihīn jníñu jeē ní casáha de, te na ndácu ró de jeē ní cacandíje de jeē sáha ya jehē de.

⁸ Te Jesucristo chi ñn-ni cáa ya ichi yátá jín vijna jín ní cáni. ⁹ Núu súcuan te ma cuáha ró jnúhun candíje ró táca jnúhun jeē sín cáhān jeē tu quíjnáhan jín jnúhun máá yá. Chi íyó vāha jeē na íje ánuá yō sáha jnūhun jeē vāha ni yā jín yó. Te tu jini ñúhún yó jnūhun jeē tajnúni síquī jeē yéji yō, chi tu níhín jníñu cuíti jín ñayuu cáhīn jín.

¹⁰ Te máá yó chi cánevāha yó ñn jeē ní sócō máá jéhē yō, cúu Cristo. Te tāca sūtū jeē cásocō gā de modo jeē cahán ley jehán, tú na vé nihín de nuū yā jeē ní sócō yā máá yá. ¹¹ Te sūtū cujéhu ga, ná ni sócō de níñi tācá quití ini cuarto íi gā jeē síquí cuéchi, te yíquí cúñu tí ni cajehmu de ichi yátá ñuu. ¹² Te suni súcuan ni ndoho máá Jesús ichi yátá ñuu, návāha jín níñi máá yá te sándoo ya ñayuu. ¹³ Núu súcuan te ma cóo inuú gá ni yō jín ñayuu tu cáccandíje, chí nájnūhun quihīn yō jín yá ichi yátá ñuu, te na ndóho yó jín yá jeē sácatā i. ¹⁴ Chi ñayīví yáha tu íyó ñuu nuū coo yó ní cáni, chí sa cánducú yó máá ñuu nuū cóyūcu yó quiví quíji. ¹⁵ Núu súcuan te jeē jín Jesucristo te níni na cáhān yō jeē yóhoyó cújéhu Yaā Dios, chí suu cúu nájnūhun ñn jeē sócō yō nuū yā, suu jeē nácuatáhú yó nuū yā. ¹⁶ Te ma náa ni rō sáha vāha ró núu jnáhan ró, te cuāha ró jéē cúmaní nuū i. Chi nájnūhun ñn jeē cásocō rō nuū Yaā Dios cúu tāca jéē yáha, te cúsi ni yā jín.

¹⁷ Te cuandíje ró núu tēe cácuu pastor rō, te cuandetū rō nuū de. Chi cándito de róhó jéē quéndōo vāha ánuá rō, chí cájini de jeē cánuú nacūaha de cuenta nuū yā. Te condíhvī ni rō sáha vāha ró, návāha cusí ni de síquī rō te ma cucuíhyá ni de síquī rō. Chí núu tu súcuan te ma cóo jeē vāha jín ró.

¹⁸ Te cacān tahu rō jehē rī jijnáhan rī. Chí vāha íyó ni anuá rī jeē tú na cuēchi rī. Chí cácuu rī caca yíñúhún rí jín táca jniñu. ¹⁹ Te suni cáhān ndahú rí jín ró jeē cacān tahu ndasí ró jehē máá rí, návāha cuāha ya jnūhun jeē yachí gā cuajeē tucu rí nuū rō.

Bendición jín saludo jeē sándíhí

²⁰ Te máá Yaā jeē jéhe jnūhun ndeyí sí ni nuū yō, ni nastécu yā Jítoho yō Jesucristo mēñu ndíyi. Te Jesús cúu pastor cujéhu jeē ndíto ñayuu cácuu nájnūhun lanchi ya. Chí jín níñi yā ni sácutú yá contrato jeé yá

jeē coo n̄í cáni. ²¹ Te ñúhun ni rī jeē Yaā Dios na sáha ya jeē ije ni rō jijnáhan ró, návāha cuu sáha ró táca jniñu váha ndese nújnahan ni yā. Te ñúhun ni rī jeē jíin fuerza Jesucristo jeē ndeé yá ini yō, na sáha Yaā Dios jeē cuu yó ñáyuu cúsiñ ni yā jíin. Te na cáhán yō jeē yóhoyo luu cújéhnu ya n̄í cáni. Amén.

²² Hermano jijnáhan ró, cáhán ndahú rí jíin ró jeē cone cáhnu ni rō jeē stihví ni rī rohó jíin jecu-ni jnūhun ni tee ri nuū carta yáha. ²³ Te cástūhun rí jeē hermano yō Timoteo, je ni quenda de vecāa. Te núu yachī quiji de yāhá, te cuajecoo ndindúú rí nuū rō coto jnáhan yó.

²⁴ Te cahān rō jíin táca tée cácuu pastor rō jíin táca hermano cácandíje jeē sándeyí ni de, áchí rí. Te ñayuu Italia suni cácahān i jeē sándeyí ni rō.

²⁵ Te ñúhun ni rī jeē na sáha ga Yaā Dios jeē váha rōhó jíináhan ró. Súcuan na cóo. Amén.

CARTA JEE NI TEE SANTIAGO NUU ÑAYUU CACANDIJE

¹ Máá rí cúu Santiago, mozo Yaā Dios jíin Jítóho yō Jesucristo. Te tēe rí carta yáha cuájeē nuū rohó ñáyuu cacandíje jeē cácuu ró ndihúxí uū yucūn Israel, te ni cajitē núu ró ñáñáñá. Sándeyí ni rō jijnáhan ró.

Yaā Dios sáha jeē jécūhun ni yō

² Ñánī mánī, na cúsi ndasí ni rō jijnáhan ró núu quiiji tijni tāca jnúndóho siquī rō. ³ Chi cájini rō jeē núu jíto ndee jnúndóho rohó núu cacandíje vāha ró, te yūcuan sáha jeē cútūhva ró cuándeyí ni rō. ⁴ Te na cuándeyí ni rō nde ije vāha ró jíin, návāha cuu sáha ró ndihí jniñu vāha, te ma cúmanī jeē squícu vāha ró núu yā.

⁵ Te núu ndé ñn ró cúmanī jecūhun ni rō caca ndíchí ró jíin jnúhun Yaā Dios, na cacán rō nuū yā, te sáha ya jeē jécūhun ni rō. Chi sáha ya ndihí jeē cájicān ñayuu, te tu cúxeēn yā nuū i jeē jicán i. ⁶ Te jeē jicán rō, te cánuú candíje ró jéē sáha ya jeē jicán rō, te ma cáni siquí ni rō. Chi ñayuu jéni siquí ni, cúu i nájnūhun ndute mar jeē ndónda jíso cóyo cuahān cháha chúcuan sáha tachī. ⁷ Ñayuu ún ma cáni ni i jeē sáha Jítóho yō jeē jicán i. ⁸ Chi ñayuu jeē jéni ñn jéni uū ni, chi máni násāma ni i jíin tāca jniñu cásáha i.

⁹ Tācá hermano ndahú, na cúsi ni de jeē sáha Yaā Dios jeē cujéhu de. ¹⁰ Te hermano cucá, na cúsi ni de núu ni ndundáhú de. Chi tāca tēe cucá, yachī naa jeē cucá de, nájnūhun náā ita yucū. ¹¹ Chi núu ni cane niāndii te cújihní, te íchí-ni yucū, te cóyo-ni ita, te náā-ni jeē lúu cáa. Te suni súcuan ndoho tāca tēe cucá níni sá jícu de jíin jniñu de.

Siquī jeē jíto ndee jnúndóho yóhó

¹² Yóhoyo ndetū tēe jeē jéndeyí ni de núu jíto ndee jnúndóho de. Chi núu je ni cundeyí de jíin, te nihín de premio jeē cujéhu de cotecu de ñá cáni. Chi súcuan ni jejnūhun Yaā Dios jeē cuáha ya nuū ñáyuu jeē maní jíin yá. ¹³ Núu ñn ñayuu jicán ini i jeē sáha i cuēchi, te ma cáni ni i jeē nuū Yaā Dios

vēji jeē jicán sáha i cuēchi. Chi ni ñn ma cúu cuíti sáha jeē quívi Yaā Dios cuēchi, te ni máá yá tu squívi ya ni ñn ñayuu nuū cuēchi. ¹⁴ Chi sa suhva jeē ndíyo néé ni maá i, suu sáha jeē jicán ini i sáha i cuēchi, te scánda ini i chi stáhú un i. ¹⁵ Te jeē ndíyo néé ni i, yūcuan quéjéé cuēchi. Te cuēchi ún, núu je ni cunihin, te sáha jeē jnahnú ndetū ñayuu. ¹⁶ Núu súcuan te ma stívi ró cani ni rō jijnáhan ró, ñánī mánī.

¹⁷ Tāca jéē cútahū yō jeē vāha jeē lúu íyó, chi vēji nde andívi núu maá Yaā Dios, Yaā ni sáha tāca jéē ndíndēe ín andívi. Te máá yá tu násāma cuíti ini yā nájnūhun násāma nduva jíin cuándahū. ¹⁸ Te ni sáha ya jeē cótecu yō ñá cáni, chi ni candíje yó jnúhun ndaā yā. Te ni nduu yó nájnūhun sēhe nuú yá nuū tāca gá sēhe ya jeē quiiji, chi súcuan ni nujnahan ni yā sáha ya.

Siquī ndese chiñúhún ndáā yō yā

¹⁹ Núu súcuan te tāca róhó ñánī mánī, ñama na chúsohó ró jnúhun ya, te sa suhva ma cahán yachī rō, ni ma quití yachī ni rō. ²⁰ Chi ñayuu cáquití ni, tu sáha i jniñu ndaā jeē cuní Yaā Dios. ²¹ Núu súcuan te na siáá rō tācá jniñu jnéhén jíin jniñu néé jéē ni cáyā jíin ró. Te na cóo vítá ni rō te cuatáhú ró jnúhun ya jeē ni quívi ini anuá rō. Chi jnúhun un ndíso poder jeē cácu anuá rō.

²² Te na squícu ró jéē steén jnúhun ún, te nasūu máá jéē cúni sōho ró súcuan-ni, chi núu súcuan te cástáhú ró maá ró, chi tu níhín jniñu núu tu squícu ró. ²³ Chi tēe jeē jíni sōho de jnúhun ya súcuan-ni, te tu squícu de, cúu de nájnūhun ñn tēe jeē jíto de nuū espejo ndese cáa nuū de. ²⁴ Te jíto vāha de nuū de, te cuahān-ni de, te náā ni de ndese cáa nuū de. ²⁵ Te núu ñn tēe tu náā ni de jnúhun jíni sōho de, chi sa suhva chúhun vāha ni de jeē cahán maá ley ndaā Jesús jeē ni sáha libre yohó, te núu cuiñi nihín de jíin, te squícu de jeē ndácu, yūcuán na te quéndōo ndetū de jíin jniñu vāha jeē sáha de.

²⁶ Te núu ndé ñn ró jéni ni rō jeē chiñúhún vāha ró Yaā Dios, te núu tu ndíto ró yáá ró, núu súcuan te stáhú ró maá ró, te tu ndé jéjníñu jeē chiñúhún ró yā. ²⁷ Ñayuu jeē chiñúhún ndoo chíñúhún ndáā i máá Tátá yō Yaā Dios, chi jniñu yáha sáha i: Chíndéé ñáhán i sūchi ní caquendōo ndáhú jíin ñahan

ní caquendōo ndáhú, núu na-ni jnūndóho íyó. Te tu sájnéhén i ánuá i jíin jniñu neé íyó ñáyíví.

Ma cúhichī ni yō coto yó ñayuu ndahú

2

¹ Ñánī mánī, cá candíje ró Jítóho yō Jesu-cristo jeē cujéhu luu ya. Núu súcuan te ma sáha ró cuenta ndese cúu ñn ñn ñayuu, chi inuú sáha ró jíin ndihī i. ² Chi íyó jínu quívi ñn tē ini vehe nuū cándutútú ró, te yáhi xehyu oro ndaha de, te ñúhun de sahma váha. Te suni íyó jínu quívi ñn tē ndáhú, te ñúhun de sahma tahndé. ³ Te tú váha núu sáha yíñuhún ró jíin tē ñúhun sahma váha, te cahán rō jíin de: Cucōo ní lugar váha yáhá. Te cahán rō jíin tē ndáhú: Yūcuán cuiñi ní, chí yáha cucōo ní nuū ñúhun, achi rō. ⁴ Chi núu cásáha ró súcuan, te tu jéni váha ní rō síquī jnáhan ró, chí sán sáha ró jíin tē cúca jíin tē ndáhú.

⁵ Ñánī mánī, chusóhó ró jnūhun cáhán rī: Yaā Dios ni nacāji ya ñayuu ndahú ini ñayívi yáha jéé cóo cúca i jíin jnūhun cá candíje i ya, te nihīn i tahū i ñuu nuū ndácu ya jniñu. Chi ni jejnūhun ya cuāha ya un núu ñayuu jeé maní jíin yá. ⁶ Te máá ró chi sa suhva cájēhe ró jnūhun canu ñayuu ndahú. ¿Te á násūu tē cúca cúu jeé castáhú róhó síquī jeé nihín de xūhun ró, te yachī jéquin de cuēchi síquī rō nuū tohó? ⁷ Te suni cácahán neé de síquī Cristo, te suu síhvī máá yá cúu jeé cánaní ró cristiano.

⁸ Váha cásáha ró te núu cásquícu ndije ró máá jnūhun jéhu ga jeé cahán ley, nájnūhun yósó núu tútu i: Cundáhú ní rō jnáhan ró nájnūhun cundáhú ní rō maá ró, achi. ⁹ Te núu sán sáha ró jíin ñayuu cúca jíin ñayuu ndahú, núu súcuan te cuēchi cásáha ró, te jécondee cuēchi síquī rō jeé stívi ró ley Yaā Dios. ¹⁰ Chi núu ñn ñayuu stívi i ñn-ni jniñu ndácu ley, te vésú na squícu i ndihī ga, te nájnūhun ní stívi i ndihī ley, te ndihī un jécondee cuēchi síquī i. ¹¹ Chi Yaā jeé ní cáhán jeé ma cósíquí ndéé jnáhan ró, suni ní cahán yá jeé ma cáhni rō ndīyi. Te vésú tu ní cásíquí ndéé jnáhan ró, te núu ní jehni rō ndīyi, núu súcuan te je ní stívi ndihī ró ley. ¹² Te táca jéé cahán rō jíin jéé sáha ró, chí sáha ró cuenta jeé sándaā yá

ndihī un jíin máá ley Jesús jeé ní sáha libre rohó. ¹³ Chi quívi sándaā yá jniñu, te ñayuu jeé tu ní cundáhú ní jnáhan, suni ma nihín i jnūhun cundáhú ní. Te ñayuu ní cundáhú ní jnáhan, cusí ni i jeé ní ndahva yá cuēchi i máá quívi sándaā yá jniñu.

Tu jéjniñu jeé candíje yó núu tu squícu yó

¹⁴ Ñánī mánī, núu cáhán ñn tē jeé candíje de jeé sáha ya jehē de, te núu tu sáha de jniñu váha, ¿te ndé jéjniñu jeé candíje de ún? ¿A cuu cácu ánuá de jíin jéé cahán-ni de jeé candíje de, te núu tu sáha de jniñu váha? ¹⁵ Te núu ñn hermano yó chí hermana yó, cúmanī sahma i jíin jéé cáji i táca quívi, ¹⁶ te núu ñn ró cáhán jíin i: Cuandeyí ní rō, te cusúcún váha ró te caji váha ró, achi rō jíin i, te núu tu ní jéhe ro jéé jíni ñúhún i cotecu i, ¿te ndé jéjniñu jeé cahán rō súcuan? ¹⁷ Te suni súcuan cúu jeé núu áchí ró jeé candíje ró jeé sáha ya jehē rō, te núu tu sáha ró jniñu váha, núu súcuan te tu ndé jéjniñu cuiñi jeé cahán-ni ró jéé candíje ró.

¹⁸ Te sanaa te cahán ñn ñayuu: Róhó chí cándíje ró jéé sáha ya jehē rō, te ruhū chí sáha rī jniñu váha. ¿Na jíin stéén rō jeé candíje ró jeé sáha ya jehē rō, te núu tú na jniñu váha sáha ró? Te ruhū chí sáha rī jniñu váha te súcuan stéén rī jeé candíje rī jeé sáha ya jehē rī. ¹⁹ Ndaā chí cándíje ró jeé íyó ñn-ni Yaā Dios. Te va íyó váha núu súcuan. Te tachī chí suni súcuan cá candíje, te cáquísi i jeé cáyūhú, chí tu cásáha jniñu váha. ²⁰ ¿Te naun tu jécūhun ní rō? ¿A tu jíni rō jeé núu tu sáha ró jniñu váha, te tu ndé jéjniñu cuiñi jeé cahán rō jeé candíje ró? ²¹ Te jíi yó Abraham, ní ndahva yá cuēchi de síquī jeé ní sáha de jniñu váha. Chi ní jetáhú de jeé ní cáhán yá jeé cahni de sēhe de Isaac socó de i nuū altar. ²² Te jécūhun ní rō jeé síquī jeé ní candíje de jeé sáha ya jeé ní jéjnūhun ya nuū de, jeé yúcuan ní jetáhú de jeé ní cáhán yá jeé socó de sēhe de. Te jeé ní jetáhú de, suu ní steén jeé candíje ndije de jeé sáha ya jeé ní jéjnūhun ya nuū de. ²³ Te súcuan ní cundaā jnūhun cáhán tutu i: Abraham ní candíje de jeé ní jéjnūhun ya nuū de, te jeé yúcuan ní ndahva yá cuēchi de, áchí tutu. Te ní conaní de amigo Yaā Dios.

²⁴ Núu súcuan te je ni cajini rō jeē ndáhva Yaā Dios cuēchi ñayuu jeē casáha i jniñu váha siquī jeē cácan díje i jeē sáha ya jehē i, te nasūu máá jéē cahán-ni i jeē candíje i. ²⁵ Te suni súcuan Rahab, vēsú ñahan tíjni ni ni cuu ña xihna gā, te ni ndahva yā cuēchi ña siquī jeē ni sáha ña jniñu váha. Chi ni jehē núu ña vehe nuū tāca mozo ni tají Josué, te ni chuhichí ña de inga ichi, návaha cācu de nuū téē cánducú cahni de. Te jeē yúcuan ní ndahva Yaā Dios cuēchi ña. ²⁶ Te ñin ñayuu núu tuá anuá i nuū yiqui cúñu i, te ndíyi cúu i. Te suni súcuan núu cándíje yó jeē sáha ya jehē yō, te núu tu sáha yó jniñu váha, te nájñuhun ndíyi cúu yó.

Jñuhun siquī yaá yó

3

¹ Ñánī mánī, ma cáni ni cuehē rō cuu ró maestro steén jñuhun ya. Chi cájini rō jeē yóhó jéē steén jñuhun, cuehē gā cuēchi ndenehen ya siquī yō. ² Chi ndíhi yó stívi cuehē jniñu. Te núu ñin téē cuu condito de yáá de jeē ma stívi de jíin ni ñin jeē cahán de, núu súcuan te yōhyo váha téē cúu de, te suni cuu condito de ní gá de jeē ma stívi de. ³ Chi cúu nájñuhun jeē chíhi yó freno yuhu caballo, te súcuan snáhnú yō ní tí jeē quihín tí jíin yó ndé nuū cuní yō. ⁴ Te suni súcuan tāca barco, vēsú náhnú ndasí, te vēsú níhin chúndahá táchī, te jíin ñin timón lulí-ni te cuu scuicó téē scáca, te quihín de jíin ndé nuū cuní de. ⁵ Te suni súcuan cúu yáá yó, chi vēsú lulí-ni, te cuehē teyí sáha yó jíin. Te suni jíin yō jeē ñin ñuhūn lulí cuu jñi jeē cayú ñin yucu cáhnú ndasí. ⁶ Te suni súcuan yáá yó, chi sáha nájñuhun ñin ñuhūn, chi scuíquín cuehē teyí jniñu néé. Te yáá yó cúu ñin parte lulí yiqui cúñu yō, te sáha jeē quívi ní yó cuēchi. Te infierno cúu jeē scuíquín jñuhun néé jíin yáá yó, te yáá yó scuíquín cuehē jniñu néé ní tiempo jeē iyó yó ini ñayívi. ⁷ Te ñayuu chi cuu snáhnú i tācá quiti jíin saa jíin cóo jíin quiti ñuhun nuū mar, te je ni snáhnú i cuehē tí. ⁸ Te ni ñin ñayuu ma cúu condito i yáá i. Chi ñin jeē neé jéē ma cúu condito i cúu. Te nájñuhun yuhu cóo jeē ñuhun chitú veneno jeē jéñi, súcuan cúu yáá yó. ⁹ Jíin yáá yó chíñuhún yó Tatá yō Yaā Dios, te suni jíin yáá yó cahán

ndevāha yo síquī ñáyuu jeē ni sáha ya ánuá i nájñuhun iyó máá yá. ¹⁰ ñin-ni yuhu cáne jñuhun chíñuhún yó yá jíin jñuhun cáhán ndevāha yó. Ñánī mánī, tu iyó váha cuiti jeē súcuan. ¹¹ ¿A ñin-ni tesōcó cáne ndute váha jíin ndute úvuá, chí naún? ¹² Ñánī mánī, ¿á cuu cuun ndehē oliva xiní yújnu higo, te á cuu cuun ndehē higo xiní yoyúcú uva, chí naún? Te suni súcuan ñin tesōcó ma cúu cane ndute úhvua jíin ndute váha.

Jñuhun ndíchí jéē véji nuū Yaā Dios

¹³ Te núu ndé ñin ró ndíchí te jécūhun váha ni, núu súcuan te jíin jéē jíca ndaā rō steén rō jeē súcuan cúu ró. Te na cóo suchí ni rō modo jeē jéhe jñuhun ndíchí yá. ¹⁴ Te núu cáccuésún teyí ni rō te ndúcú ró jéē cujéñu máá ró, núu súcuan te ma cuteyí ró cani ni rō jeē ndíchí ró. Chi suu cúu jeē stahú ró, te cúu ró contra siquī jñuhun ndaā. ¹⁵ Chi ñayuu cándāa súcuan, nasūu núu Yaā Dios véji jeē ndíchí i. Chi cuenta ñayívi, jíin cuenta anuá neé ñáyuu, jíin cuenta maá jéxeén cúu. ¹⁶ Chi nuū iyó ñáyuu cucuésún ni jíin ñáyuu nducú jéē cujéñu máá, suni yúcuan iyó jñuhun sáca núu jíin táca jniñu néé. ¹⁷ Te jñuhun ndíchí jeē véji nuū Yaā Dios, núu ni sáha jeē ní ndundíchí ñáyuu, yūcuán na te iyó ndoo ánuá i. Te suni yūcu maní i jíin jnáhan i, te víta ni i, te tú níhni ni i. Te cúndahú ni i jnáhan i, te sáha i jniñu váha. Te suni iyó ndáa i, te tu stahú i. ¹⁸ Te ñayuu cáyūcu mánī jíin jnáhan, jíin jñuhun maní casáha i tācá jniñu ndaā, te nanihín i jeē quéndōo ndaā i.

Jeē ma cutóo ni yō jeē iyó ini ñayívi

4

¹ ¿Te ndese quéjéé jéē cájejnáhan ró jíin jéē cátejnáhan ró? Quéjéé síquī jeē cándiyo néé ni rō, te yōhyo scánda ini anuá rō. ² Chi cándiyo ni rō, te tu cánevāha ró, te suu sáha jeē cájehni rō ndíyi. Cándiyo ni rō jeē névāha jnáhan ró, te tu níhín rō, te suu sáha jeē cátejnáhan ró te cájejnáhan ró. Te tu cánihín rō jeē cuní rō, chi tu cájicān rō nuū Yaā Dios. ³ Te núu cájicān rō, te tu cánihín rō, chi tu cájicān váha ró, chí máni jeē cusí ni maá ró cúu jeē cájicān rō nuū yā. ⁴ Ñayuu castóo Yaā Dios cácuu ró. ¿A tu cájini rō jeē núu

cútóó ni rō jeē iyó ini ñayíví, yūcuan cúu jeē cájito uhū rō Yaā Dios? Chi ñayuu jeē cutóó ni jeē iyó ñayíví, ndúu i ñayuu jíto uhū nuū Yaā Dios. ⁵ Te tu cáhán saá-ni jnūhun yáha jéē yosó núu tútu i: Máá Espíritu jeē ni jéhe Yaā Dios jeē ndeé ini yō, cúcuíñí ni yā jeē súcuan casáha yó, chi manī yā jíin yó, achí. ⁶ Te jeē váha ni Yaā Dios, te jéhe ya fuerza ini yō jeē ma sáha yó súcuan. Chi cáhán tutu i: Yaā Dios jési yā nuū ñáyuu casáha téyí máá, te vāha ni yā chindéé ñáhán yā ñayuu casáha suchí máá, áchí. ⁷ Núu súcuan te cuandetū rō nuū Yaā Dios. Te cuiñi nihin ró jéē ma cuátáhú ró jexeén, te cunu coto róhó jíjnáhan ró. ⁸ Manī gā coo ró jíin Yaā Dios, te víhyá gā steén yā jeē manī yā jíin ró. Róhó jéē casáha cuēchi, na sándoo ró máá ró, stóo ró cuēchi. Te róhó jéē cácuini rō coo manī rō jíin Yaā Dios níni jéē cácuini rō cutóó ni rō jeē iyó ini ñayíví, na sándoo ró ánuá rō jeē tuá coo ró súcuan. ⁹ Na jnáhuhū ni rō, te cucuíhyá ni rō, te na ndáhyú rō siquī jeē iyó cuēchi ró. Te vésú ni cajecū rō, te vijna na ndáhyú cohó ró. Te vésú ni cacusi ni rō, te vijna na ndúcuíhyá ni rō. ¹⁰ Na sásuchí ró maá ró nuū Yaā Dios, te sájéhnua ya rohó.

Ma cóndihví ni yō siquī cuēchi jnáhan yó

¹¹ Hermano jijnáhan ró, ma cahán neé ró siquī jnáhan ró. Chi tēe jeē cahán neé siquī jnáhan, chí jéē ndihví ni siquī cuēchi jnáhan, nájnūhun jeē siquī ley yā cahán neé de, chí tu squícu de ley jeē cundáhú ni yō jnáhan yó, te nájnūhun cáhán de jeē tu iyó ndáa ley yā. Te núu cáhán rō jeē tu iyó ndáa ley yā, núu súcuan te nasūu jéē squícu ró, chí sa jeē cahán rō siquī. ¹² Iyó ñn-ni Yaā jeē ni jéhe ley, te máá-ni ya cúu jeē sándaā siquī cuēchi. Te jnama ya ñayuu cácuandíje te snáhnú ndetū yā ñayuu tu cácuandíje. Núu súcuan ¿te na jniñu ndíso ró jéē sándaā rō siquī jnáhan ró?

Tú vāha jeē satéyí yó maá yó

¹³ Vijna te cáhán rī jíin róhó jéē cácahān: Vijna chí sájnē te quihīn yō ñuu yúcuán, te coyūcu yó ñn cuiyā, te cuaan yó xíco yó, te nihīn yō siquī, achí ró. ¹⁴ Te tu jíni cuiñi rō ndese coo sajnē. ¿Chi na vé va víhí cúu vida rō? Cúu nájnūhun ñn vicō nūhún jéē ñn núnúu-ni núcūhun, te yūcuán na te

ndéchí-ni cuahān. ¹⁵ Chi sa vāha ga na cáhán rō: Núu cúni maá Jítoho yō te cotecu yō te sáha yó jéē yáha chí jéē yúcuán, achi rō. ¹⁶ Te sa suhva máni cácutéyí ni rō cácahān rō. Te tú vāha jeē súcuan cácutéyí ni rō. ¹⁷ Te núu ñn ñayuu jíni i sáha i jniñu váha, te núu tu sáha i, te cuēchi cúu núu súcuan.

Jnūhun cáhán nuū tēe cúca

5

¹ Te cáhán rī jíin táca róhó tēe cúca, jéē na ndáhyú rō te ndahyū cohó ró siquī jnūndóho jeē quiñi nuū rō. ² Chi ndajniñu cúca cánevāha ró, je téhyú. Te sahma váha ró, je tēe tiquíxin. ³ Te oro jíin plata cánevāha ró, chí je cáne xehyu. Te xehyu un stéén jeē ní casáha ró jniñu stáhú jíin xūhun ró. Te yūcuan cúu jeē ndúnihin cuēchi siquī rō, nájnūhun ñn ñuhūn jeē snáa yiqui cúñu rō. Chi ni cacaya cuehē rō ndajniñu váha quiñi cuándihí yáha. ⁴ Te táca tēe ni cajehnde trigo rō, tu ní cáchunaa vāha ró yáhu de. Te vijna cácana jee de nuū Yaā Dios, Yaā cúu Jítoho nuū táca ndajéhe andíví, jeē súcuan ni casáha ró. Te jíni sōho ya jeē cácana jee tēe ni cajehnde ún. ⁵ Cátecu vāha ndasí ró ini ñayíví yáha, te casáha ró táca jéē cácusí ni maá ró. Te cájito yúcuán ró maá ró, te cúu ró nájnūhun quiñi néñu jeē ndétu quiñi cúu. ⁶ Te ni catee ró cuēchi siquī ñayuu ndaā, te nde ni cajehni rō i. Te tu ní cúu casi i jeē casáha ró.

Jeē na cóo paciencia ni yō te cacān tahu yō

⁷ Hermano, núu súcuan te coo paciencia ni rō condetu ró ndé quiñi ndíji máá Jítoho yō. Tēe sájniñu ñuhun, cánuú coo paciencia ni de condetu de nde quiñi saū néhen jíin saū néñu isa, te sáa te nihīn de nunī váha jeē jéhe itu. ⁸ Te suni súcuan coo paciencia ni rō, te ndeyí coo ni rō condetu ró, chí cuacuyajni ndee maá Jítoho yō. ⁹ Te ma cahán sōo ró siquī jeē sáha jnáhan ró, hermano, návāha ma jécondee cuēchi siquī rō. Chi máa Yaā jeē sándaā cuēchi, je yajni ndíji ya. ¹⁰ Nánī manī, conahan ró jijnáhan ró ndese ni casáha tēe ni canacani jnūhun máá Jítoho yō nde jenahán, chí ni cacuu de ñn ejemplo nuū yō. Chi vésú ni candoho de, te ni iyo paciencia ni de. ¹¹ Te cáhán yō

jeē ñáyuu cájendeyí ni jíin jnúndóho, ndetū cúu i sáha Yaā Dios. Chi ni cajini ró jnúhun ndese ni jendeyí ni Job jíin jnúndóho, te suni cájini rō jeē yóhyo vāha ga ni quendōo de ni sáha máá Jítóho yō ná ni yāha jnúndóho. Chi yóhyo cúndáhú ni yā yohó, te vāha ndasí ni yā jíin yó.

¹² Ñánī mánī, jeē cánuú gá cúu jeē ma cahán cāha ró síhví Yaā Dios jíin jnúhun cácahán teyí ró. Ma cahán rō verdad de Dios, Yaā ndeé andiví, ni ma cahán rō verdad de Dios, Yaā chíí ñayiví, te ni ìn ga jnúhun súcuan ma cahán teyí ró. Chi núu cahán rō jeē cuu, te súcuan-ni cahán rō. Te núu cahán rō jeē tuú, te súcuan-ni cahán rō, ma scáa gā rō cahán rō, návāha ma ndénehen Yaā Dios cuēchi siquī rō.

¹³ Te núu íyó ìn ró jéē ndóho jnúndóho, te na cácan tahu rō. Te núu íyó ìn ró jéē cúsiñ ni, te na cáta ró yaa jeē chíñúhún ró yá. ¹⁴ Te núu íyó ìn ró jéē cuhú, te na cána ró téé jéhnu cándito ñayuu cácañdije. Te na cácan tahu de jehē ñayuu cuhú. Te jíin síhví máá Jítóho yō na chíhi de aceite i. ¹⁵ Te núu cácañdije de jeē sáha Jítóho yō jeē cájicān tahu de, yūcuán na te jnama ya ñayuu cuhú. Chi nasávāha ya i, te núu ni sáha i cuēchi, te cone cáhnu ni yā nuū i. ¹⁶ Núu súcuan te nacani ndaā rō cuēchi ró núu jnáhan ró, te cacān tahu rō jehē jnáhan ró návāha nduvāha ró jíjnéhan ró. Chi núu ìn tēe ndaā ndíhví ni de jíicān tahu de, te yóhyo vāha níhín jníñu, chí sáha ya jeē jíicān de. ¹⁷ Chi Elías, tēe ni nacani jnúhun Yaā Dios jenahán, suni ìn tēe jeē nájnūhun íyó máá yó ni cuu de. Te ni jíicān tahu ndasí de jeē ma cúun saū, te tu ní cúun saū unī cuiyā iñū yoō. ¹⁸ Yūcuán na te ni jíicān tahu tucu de, te ni cuun saū, te ni canecoo tucu tāca jéē jéhe ñuhun.

¹⁹ Ñánī mánī, núu ìn ró ni stóo ichi ndaā, te núu ìnga rō nachuhichí ró jnáhan ró, ²⁰ núu súcuan te cuni rō jeē núu ni nachuhichí ró tēe ni quiví cuēchi, te je ni jnama ró de jeē jnañnú ndetū de núú, te súcuan íyó jnúhun cáhnu ni nuū cuehē cuēchi de.

CARTA HN JEE NI TEE SAN PEDRO APOSTOL NUU ÑAYUU CACANDIJE

¹ Máá rí cúu Pedro, apóstol jeē ní tají Jesucristo, te tée ri carta yáha cuájeē nuū rohó ñáyuu ní cajitē núu, te cáyūcu jíca ró ní Ponto, Galacia, Capadocia, Asia, jíin Bitinia. ² Te máá Tátá yō Yaā Dios ni nacāji ya rohó, chi súcuan ní tee ni yā nde ná tu jecōo ñayíví. Te jíin Espíritu Santo ni sáha ya jeē iyó ndoo íyó íi rō cájetáhú ró núu yā, te ni nacate ya anuá rō jíin níñi Jesucristo. Te ñúhun ni rī jeē na cáyá gā tāca jēē váha jeē sáha ya rohó, jíin jēē coo ndeyí coo sī ni rō jíin náhan ró.

Jeē ñúhun ni yō tāca jēē váha jeē cóo andíví

³ Na cáhán yō jeē yóhyo cújéhnú Yaā Dios, Yaā cúu Tátá maá Jítoho yō Jesucristo. Chi ni cundáhú ndasí ni yā yohó, te ni sáha ya jeē ní nacacu jeé yó, síquī jeē ní natecu Jesucristo mēñú ndíyi. Te jeē yúcuan níni cáñuhun ni yō tāca jēē váha jeē coo. ⁴ Chi nihīn rō tahū jeē ñúhun váha ini andíví jeē cúu ró jíin náhan ró. Te tahū un má náā cuíti, ni ma tíví cuíti, ni ma ndíhi cuíti. ⁵ Chi cácandíje ró jēē sáha Yaā Dios jehē rō, te jeē yúcuan ndíto ya rohó jíin poder yā, návāha jnama ya rohó quíví sándíhí, chi ni sándaā yā jeē súcuan coo.

⁶ Jeē yúcuan cácusī ndasí ni rō, vēsú cájito ró cuéhē ndinuū jnūndóho jecu-ni quíví. ⁷ Chi nájnūhun jeē stuhvá ñayuu oro jíin ñúhūn, jíto ndee i núu jeē váha cúu, suni súcuan cánuú coto ndee jnūndóho rohó núu cácandíje níhin ró chí tuú. Chi jeē cácandíje níhin ró, chí yahu ndasí gá cúu vēsú oro, ndajníñu jeē náā. Te yúcuan cúu jeē cua-jnúhún yá rohó, te sájéhnú ya rohó, te squéndōo yíñúhún yá rohó quíví quenda ndíjin Jesucristo.

⁸ Te vēsú tu ní cájito ró núu yā, te cáhīyo manī ndasí ró jíin yá. Te cácandíje níhin ró yá vēsú tu cájito ró núu yā vijna. Te yóhyo luu cácusī ndasí ni rō, chí nde tuá níhín cuíti yō jnūhun castūhun yó ndese cúsi ni

yō. ⁹ Te nihīn tahú rō jeē cācu ánuá rō, chí jeē yúcuan cúu jeē cácandíje ró.

¹⁰ Te tée ni canacani jnūhun Yaā Dios nde jenahán, ni cananducú yúcún de ni caca-jnūhun váha de síquī jnūhun ndese jnama ya yohó. Te ni cacachi de ndese sáha Yaā Dios jeē váha rohó jíin náhan ró. ¹¹ Chi nde ná tu coo, te ni steén Espíritu Cristo nuū de jíin náhan de ndese quíji jnūndóho síquī Cristo jíin ndese luu ndujéhnú tucu ya jeē yáha jnūndóho ún. Te ni cananducú yúcún de jeē na jécūhun ni de nde quíví quíji Cristo te ndese coo tāca jēē ní cáhán maá Espíritu jeē ndeé ini de. ¹² Te ni steén Yaā Dios nuū de jeē násūu máá de coto jniñu jeē ní canacani de ún, chí sa máá yó cúu jeē cóto. Te vijna je ni cajini sōho máá ró jnūhun ún, chí tāca tée nácani jnūhun jnama ya yohó, ni canacani de nuū rō, ni sáha poder Espíritu Santo jeē ní quíji ichi andíví. Te jnūhun ún chí nde maá ndajéhé Yaā Dios cácananducú návāha na jécūhun ni.

Cúni yā jeē coo ndoo ánuá yō

¹³ Jeē yúcuan ndito na cóo xinī rō jíin náhan ró, te cájí coo ni rō. Te cocuhun ndasí ni rō jeē nihīn rō tāca jēē váha jeē sáha Yaā Dios rohó quíví quenda ndíjin Jesucristo. ¹⁴ Te na cúu ró séhe jeē cájetáhú váha. Te ma sáha ga rō tācá jniñu jeē ní cacusi ni rō sáha ró nde ná tu jecūhun ni rō jnūhun Yaā Dios. ¹⁵ Chi sa suhva na cóo ndoo ánuá rō jíin táca jniñu casáha ró, chí Yaā ní cana rohó, Yaā iyó ndoo cúu ya. ¹⁶ Chi súcuan cáhán tutu íi: Na cóo ndoo ró jíin náhan ró, chí ruhū iyó ndoo ri, achí yá.

¹⁷ Te núu cácahán rō Tatá rō jíin Yaā Dios, núu súcuan te na cáca yíñúhún ró nuū yā tāca quíví jēē cájica ró ñayíví yáha. Chi máá yá sándaā síquī ndese ni casáha ññ yó, te tu sáha ya cuenta ndese cúu ññ yó, chí inuú sáha ya jíin ndíhi yó. ¹⁸ Chi ní jnama ya rohó núu tācá costumbre jeē ní cajequin jíi rō, jeē ní cajejníñu cāha ró núu. Te cajini váha ró jēē yahu cúu jeē ní jnama ya rohó. Chi tu ní chúnaa yā jíin ndajníñu jeē náā, nájnūhun oro jíin plata, ¹⁹ chí sa suhva jíin níñi Cristo jeē yáhu ndasí gá cúu. Chi ní socō yā máá yá nájnūhun ññ londe, quíti íyó váha íyó ndoo. ²⁰ Chi jeē yúcuan ní jeni Yaā Dios maá Cristo nde ná tu jecōo ñayíví, te

ni cane ndijin Cristo maá tiempo cuándihí yáha, návāha quendōo vāha ánuá rō jijnáhan rō. ²¹ Te jeē jín Cristo te cácanđije rō Yaā Dios. Chi ni sáha Yaā Dios jeē ní natecu yā mēhñu ndíyí jín jéē ní ndujéhnu ya. Te jeē yúcuan cácanđije rō Yaā Dios, te cáñuhun ni rō coto rō yá.

²² Te vijna chi je ni candundoo ánuá rō, chi ni cajetáhú rō jñuhun ndaā ni sáha Espíritu jín rō, návāha cundáhú ndije ni rō hermano cácanđije. Núu súcuan te na cúndáhú ndasí ni rō jnáhan rō nde jín ini jín ánuá rō. ²³ Chi je ni canacacu jeé rō, te nasūu chíji yucūn ñayuu jeē cúu. Chi sa jñuhun Yaā Dios jeē ndíto técu ní cáni ni sáha jeē ní nacacu rō. ²⁴ Chi súcuan cáhán tutu i:

Nájnūhun yucū cúu ndihí tāca ñáyuu, chi jecu-ni quiví técu i.

Te nájnūhun ita yucū cúu jeē cujéhnu i. Chi íchí-ni yucū, te ndáhvá-ni ita.

²⁵ Te jñuhun Jitoho yō Yaā Dios, sa quéndōo ní cáni.

Achí tutu. Te jñuhun un cúu máa jñuhun jnáma ya yohó jéē ní canacani ri nuū rō.

2

¹ Núu súcuan te na siáá rō tācá jniñu néé, tāca jéē stahú, jéē tú ndije, jeē cucuésún ni, jín jéē sajnúhún síquí jnáhan. ² Te nájnūhun sūchi yíquín sá ní cacu jeē jéxin te jéhnu, súcuan na cóndihvī ni rō scuáha rō jñuhun ndaā yā, návāha cuehnu rō jín te cácu ánuá rō. ³ Chi je cájini rō jeē yóhoyo vāha ni maá Jitoho yō.

Cristo cúu nájnūhun yuū yítuu vehe

⁴ Núu súcuan te manī gā coo rō jijnáhan rō jín Jitoho yō Cristo. Chi cácuu rō nájnūhun templo nuū ndeé Yaā Dios, chi ndeé yá ini anuá rō. Te Cristo cúu nájnūhun ñn yuū cánuú gá jeē yítuu yíquí templo, te sáha ya jeē cótecu rō ní cáni. Te ñayuu vésú ni casquéhichí i ya, te Yaā Dios chí je ni nacāji ya Cristo chí cánuú ndasí yá, nájnūhun nacāji yó ñn yuū vāha jeē quítuu yíquí vehe.

⁵ Te máa rō chí cácuu rō nájnūhun ñn ñn yuū jeē cúvāha templo Yaā Dios, te cotecu rō ní cáni. Te na cuáha rō jñuhun jeē sama ya rohó jijnáhan rō jéē cúvāha templo yā, cúu jeē ndeé Espíritu yā ini anuá rō nájnūhun ini

ñn templo. Te suni cúní Yaā Dios jeē cuu rō sūtū cáhīyo ndoo cájejniñu nuū yā. Chi síquí jeē ni sáha Jesucristo jehē rō, te na sócō rō maá rō jeē cuajniñu rō núu yā sáha rō táca jniñu vāha jeē nújnahan ni Yaā Dios. ⁶ Chi súcuan cáhán tutu i:

Vijna te nde ñuu rī Sion jéquin rī ñn yuū jeē cánuú gá jeē quítuu yíquí vehe, chi ni nacāji ri yā nájnūhun ñn yuū vāha jeē cánuú téyí.

Te ñayuu jeē candíje i ya, jnama nahín yá i. Achí Yaā Dios, achí tutu. ⁷ Te máa rō jeē cácanđije rō, chí yuū vāha jeē cánuú téyí cúu ya nuū rō. Te nuū ñáyuu tu cácanđije chí tuú, chí sa cúndaā jeē cahán tutu i:

Máa yūu jeē ní casquéhichí tēe cásama vehe, suu cúu yuū cánuú gá yítuu yíquí vehe.

⁸ Te suni cúndaā jñuhun jeē cahán tutu síquí ñayuu tu cácanđije:

Cúu ya nájnūhun ñn yuū jeē cácachihí i jehē i,

nájnūhun toto jeē cotúu i sáha.

Achí. Chi jeē cácachihí i jehē i cúu jeē casánihni ni i nuū jñuhun ya. Te je ni cundaā jeē jnahnú ndetū i síquí jeē cáacunihni ni i.

Jñuhun ñayuu maá Yaā Dios

⁹ Te máa rō cácuu ñayuu jeē ní nacāji Yaā Dios. Te suni cácuu rō sūtū cájejniñu nuū maá Yaā cúu Rey, te ñayuu cáhīyo ndoo, jín ñáyuu maá yá cácuu rō. Súcuan ni sáha Yaā Dios rohó návāha nacani rō jñuhun ndese yóhoyo jéhnu jniñu sáha ya, chí máa yá ni cana rohó ná ni coyūcu rō nájnūhun nuū néé. Te ni squívicoo ya rohó núu luz yā jeē yóhoyo vāha stéen yā ini anuá rō. ¹⁰ Chi nde saá te nasūu ñáyuu Yaā Dios cácuu rō, te vijna je ni nduu rō ñáyuu maá yá. Te nde saá chí ná tu cundáhú ni yā rohó, te vijna je cúndáhú ni yā rohó jijnáhan rō.

Jeē cuajniñu vāha yó núu Yaā Dios

¹¹ Nánī manī, ini ñayiví yáha cácuu rō nájnūhun ñayuu ñuu jicá jéē cájica cuu tátú. Núu súcuan te cáhán ndahú rí jín rō jéē ma sáha rō táca jniñu jeē ndíyo néé ni rō jín modo maá rō. Chi tācá un cájejniáhan jín rō, ndúcú jéē jnahnū ndetū anuá rō. ¹² Te ndaā na cáca rō méhñu ñáyuu tu jíní jñuhun Yaā Dios. Chi vésú cácahān i síquí rō, nájnūhun

cácahān i siquī ñáyuu casáha jniñu néé, te núu na cóto i jniñu váha casáha ró, te quivī sándaā Yaā Dios jniñu te cahān i jeē yóhyo cújéhu ya.

¹³ Jeē siquí maá Jítoho yō te cuatáhú ró nuū tāca tóhō cándiso jniñu nuū ñáyuu. Cuatáhú ró nuū maá rey, chi tēe cújéhu ga cúu de. ¹⁴ Te cuatáhú ró nuū tācá gobernador jeē ní jeni rey návāha stóho de ñayuu casáha jniñu néé te cuajnúhún de ñayuu casáha jniñu váha. ¹⁵ Chi cúní Yaā Dios jeē sáha ró jniñu váha, te jeē súcuan sáha ró te tāca ñáyuu canéé jéē tu cájecūhun ni, casi i yuhu i.

¹⁶ Te na cáca ndaā rō jeē cácuu ró ñáyuu ni nduu libre anuá, te nasūu jéē ní nduu libre rō jeē sáha ró jniñu néé. Chi sa cácuu ró mozo Yaā Dios, te cuajniñu váha ró núu yā. ¹⁷ Coó respeto rō nuū tāca ñáyuu. Cundáhú ni rō hermano cácañdije. Conso iyo ró núu Yaā Dios. Coó yíñuhún ró nuū maá rey.

Jeē na ndóho yó jéhē jnáhan yó nájnūhun ni ndoho Cristo

¹⁸ Róhó jéē cácuu mozo, cuatáhú ró nuū patrón rō, te coo respeto rō nuū de. Te nasūu máa-ni nuū téē váha ni jíin téē vītá ni, chi suni nuū téē xeēn ni. ¹⁹ Chi ñn jeē váha cúu núu jéndeýí ni ñn téē jeē stóho cāha ñáyuu de siquī jeē squícu de nuū Yaā Dios. ²⁰ Chi núu cástóho i róhó jéē casáha ró cuéchi, te ni ñn ma cuajnúhún róhó núu jéndeýí ni rō jíin jeē ndóho ró. Te núu cástóho i róhó jéē casáha ró jniñu váha, te núu jéndeýí ni rō jíin, yāha cúu jeē váha jeē nújnahan ni Yaā Dios. ²¹ Chi jeē yúcuan cúu jeē ní cana ya rohó jíjnáhan ró. Chi suni máa Cristo ni ndoho ya jeē siquí rō, te súcuan ni cuu ya ñn ejemplo nuū rō jeē na ndóho ró jéhē jnáhan ró, te súcuan condiquīn rō ichi ya. ²² Te máa yá tú cuiti na cuéchi ní sáha ya, ni tú cuiti na jnūhun stáhú ní cáhán yā. ²³ Ná ni cacahān neé i nuū yā, te tu ní nácahān neé yá. Te ná ni castóho i ya, te tu ní téjnáhan ya jíin i, chi sa ni chihi ya maá yá ndaha Yaā Dios, Yaā sándaā váha siquī ndíhi ún. ²⁴ Te ni condiso máa Cristo cuéchi yó jíin yiquí cúñu yā ná ni jihī yā jicā cruz, návāha quenda yó chíji cuéchi te caca ndaā yō. Chi ni tujī yā, te jeē yúcuan ní canduvāha ánuá rō. ²⁵ Chi ni casana ró

nájñūhun lanchi, te vijna je ni candicó ró ni ndívicoo ró núu Cristo, Yaā cúu pastor rō te ndíto váha ya anuá rō.

Ndese cánuú coyūcu váha yñ jíin ñasihí

3

¹ Suni súcuan róhó ñasihí jíjnáhan ró, cuatáhú ró nuū yñ ró, návāha núu cúu de téē tu cándije jnūhun ya, te cuu scándije ró de, jeē tuá níin jíin jéē cahán rō, chi máa jíin jéē casáha váha ró. ² Chi cuni de jeē cájica ndaā rō te cáhīyo respeto rō. ³ Te jeē casáha luu ró máa ró, chi nasūu máni máa ichi siquí rō sáha ró, jeē sáha luu ndasí ró xinī rō, chí jéē cúhun ró siquí oro chí sahma váha ga. ⁴ Chi sa nducú ró jeē quéndōo luu ánuá rō, te coo luu ró ñn modo jeē ma náa cuiti, suu jeē cóo vītá ni rō te coo nahín ni rō. Chi yāha cúu jeē yahu ndasí gá nuū Yaā Dios. ⁵ Chi ñahan ní cahīyo ndoo ánuá nde jenahán, suni súcuan ni casáha luu ña ánuá ña. Chi ni cañuhun ni ña Yaā Dios, te ni cajetáhú ña nuū yñ ña. ⁶ Te súcuan ni sáha Sara, chi ni jetáhú ña nuū yñ ña Abraham, te ni cahān yíñuhún ña jíin de. Te róhó jíjnáhan ró, núu sáha váha ró te núu ma yūhu ró ni ñn, yūcuán na te coo ró nájnūhun ni iyo Sara.

⁷ Te suni súcuan róhó yñ, na cóo vītá ni rō jíin ñasihí ró. Te yíñuhún coo ró jíin ña, siquī jeē núu ga fuerza ña vésú rohó, te suni siquī jeē inuú ní canihīn tahú rō cotecu rō ní cáni siquī jeē váha ni Yaā Dios. Te súcuan sáha ró návāha tú casi nuū jnūhun jíicán tahú rō.

Jnūhun ñayuu cándoho siquī jeē cájica ndaā

⁸ Núu súcuan te inuú na cáni ni rō jíjnáhan ró, te cucuíhyá ni rō jeē ndóho jnáhan ró, te cundáhú ni rō i nájnūhun ñani rō. Te na cóo manī rō te cani suchí ni rō. ⁹ Núu casáha néé ñáyuu jíin ró, te ma nasáha néé ró jíin i. Te núu cácahān neé i nuū rō, te ma nácahān neé ró núu i. Chi sa suhva cacān tahú rō jeē na quéndōo váha i. Chi Yaā Dios ni cana ya rohó jéē suni súcuan quéndōo váha ró.

¹⁰ Chi súcuan cáhán tutu iñ:

Ñayuu cácuni cotecu váha te cusñ ni tāca quívī,

na cóto i yuhu i jeē ma cáhán neé i, te na cóto i jeē ma cáhán i jnūhun stáhú.

¹¹ Na cújiyo i nuū jniñu néé, te na sáha i jniñu váha.

Na ndúcú i coyūcu mánī i, te na cóndihvī ni i jíin.

12 Chi máá Jítóho yō ndító ya ñayuu ndaā, te jíni nahín yá jeē cájicān tahú i.

Te ñayuu casáha jniñu néé, chi tu jétáhú yá i.

Achí tutu.

13 Te ni ñn ma sáha néé jíin ró te núu máni jniñu váha cándihvī ni ró sáha ró. 14 Te vēsú núu ndóho ró síquī jeē cájica ndaā rō, te yōhyo ndetū cácuu ró. Núu súcuan te ma yūhu ró coto ró i, ni ma cunéé ni rō. 15 Chi sa jíin ini jíin ánuá rō chiñúhún ró máá Jítóho yō Cristo. Te níni coo tūhva ró nastió cuñí vīta ró te cahān yíñúhún ró jíin ñayuu jeē castíchí rohó síquī tāca jéé cáñuhun ni rō. 16 Te caca ndaā rō jeē tú na cuēchi condee anuá rō, návāha ñayuu cácahān neé síquī rō, cucanu i jeē ni stáú yáhu i rōhó jéé cájica ndaā rō chi cácadíje ró Cristo. 17 Chi núu cúní Yaā Dios te vāha ga jeē ndóho ró síquī jeē casáha ró jniñu váha vēsú síquī núu sáha ró jniñu néé.

18 Chi máá Cristo suni ni ndoho ya, te ñn jínu-ni ni jihī yā jeē síquī cuéchi ndihī yó. Yaā vāha cúu ya, te ni ndoho ya jehē yohó ñáyuu ní casáha jniñu néé, návāha quívicoo yó núu Yaā Dios sáha ya. Chi ni jihī yíqui cúñu yā, te ánuá yā chi técu-ni ní cáni. 19 Te ná ni jihī yā te ni jehēn anuá yā ni nacani ya jnūhun nuū anuá ñayuu cáyindihyū. 20 Chi nde jenahán tu ní cájetáhú i, ná ni íyo paciencia ni Yaā Dios te ni condetu ya níni sáha Noé barco jeē naní arca. Te jíin arca un ní cācu jecu-ni ñayuu, chi unā-ni i ni cācu nuū ndúte. 21 Te nájnūhun ni cacācu i nuū ndúte, súcuan cúu jeē jéndute yó vijna te cácu ánuá yō. Te jeē jéndute yó, nasūu jéé ndúndoo yíqui cúñu yō, chi sa jeē jíicán yō nuū Yaā Dios jeē ndúndoo ánuá yō. Te súcuan te cācu yó, chi ni cundúú yó jíin Jesucristo nuū jnúhun ni natecu yā. 22 Te ni ndaa ya cuanuhun yā andiví, te ndéé yá ichi ndávāha Yaā Dios nuū cújéhu ya. Te tācá ndajéhé andiví, jíin jéé cándacu jniñu, jíin jéé cájni poder, cájendetū nuū yā.

Jeē na cuájniñu yó jíin táhū jeē ni jéhe ya nuū yō

4

1 Núu súcuan te nájnūhun ni ndoho Cristo jehē yō jíin yíqui cúñu yā, suni súcuan na táva ni maá ró ndoho ró. Chi ñayuu jeē ní ndoho jíin yíqui cúñu, tuá sáha i cuēchi.

2 Núu súcuan te ní tiempo jeē cuahán gā rō, na sáha ró jniñu jeē cuní Yaā Dios, te ma sáha ga rō jniñu jeē ndíyo néé ni ró jíin modo maá ró. 3 Chi nde ní véji ró, te ni casáha ró cuéhē cuēchi jeē cánujnahān ni ró síquī jeē tu ní cájini ró jnūhun Yaā Dios. Te tiempo un máni máá jéé neé ni casáha ró, te ni candiyo ni ró tāca jéé neé, ni canajini ró, ni casáha ró vico néé, ni cajihī ndasí ró nuū vico ró, te ni cachiñúhún ró ídolo jeē ni cáhān Yaā Dios jeē ma chíñúhún yó. 4 Te cáacunéé ni i jeē tuá cájica ró jíin i jeē sáha ró táca cuéchi xeēn jíin i. Te jeē yúcuan cúu jeē cácahān neé i síquī rō. 5 Te máá i chí ñn quiví te nacuāha i cuenta nuū maá Yaā jeē iyó tūhva ya sándaā yā jniñu ñayuu técu jíin ñáyuu ní cajihī. 6 Chi jeē yúcuan suni ni quiji jnūhun vāha ya nuū tāca ndíyí ná ni cotecu i. Te ni cundaā síquī cuéchi ni casáha i ñayívi yáha, nájnūhun cúndaā síquī ndihī ñayuu, návāha nacani ni i te cotecu anuá i ní cáni nájnūhun técu Yaā Dios.

7 Te je cuacuyajni quiví jeē náā tāca jéé iyó. Núu súcuan te ndito na cóo xinī rō jijnáhan ró, te condihvī ni ró cacān tahú rō. 8 Te jeē cánuú gá cúu jeē cundáhú ndasí ni ró jnáhan ró. Chi núu cundáhú ni yō jnáhan yó, te iyó jnúhun cáhnu ni nuū cuehē cuēchi. 9 Sáha vāha ró jíin ñáyuu jeē jinú i vehe ró, te ma cúxī ni rō. 10 Tāca ró cuajniñu ró núu jnáhan ró, núu ndese iyó máá táhū rō jeē ni jéhe Yaā Dios jeē cuajniñu ró núu yā. Te squícu vāha ró jíin táhū jeē sín sín ni jéhe ya nuū ñn ñn ró. 11 Núu tahū jeē nacani ró jnúhun cúu, te na cáhān ró nájnūhun jeē maá Yaā Dios cahān. Te núu tahū jeē chindéé ñáhán ró jnáhan ró cúu, te na sáha ró jíin fuerza jeē ni jéhe ya nuū rō, návāha jíin ndihī jeē casáha ró te cahān ñayuu jeē yóhyo cújéhu Yaā Dios síquī jeē ni sáha ya jíin Jesucristo. Te na cáhān yō jeē luu cújéhu Cristo te jniñ ya poder ní cáni. Amén.

Jeē ndóho yó síquī jeē cándíje yó Cristo

12 Ñánī mánī, núu vēji jnūndóho xeēn jeē coto ndee rohó, te ma cunéé ni rō canī ni rō jeē maá ró ni nihīn jnūndóho xeēn gā. 13 Chi sa cusī ni rō jeē cándoho ró jecu jnūndóho jeē ní ndoho Cristo, návāha suni cusī ndasí ni rō quivī quénda ndijin yā jeē kujénu luu ya. 14 Te yóhyo ndetū rō te núu cácahān neé i nuū rō siquī jeē cácañdije ró Cristo. Chi máá Espíritu Yaā Dios jeē kujénu ndasí, ndéé yá ini rō. Máá i chí cácahān neé i siquī yā, te máá ró chí cáchiñhún ró yā. 15 Te núu ndoho ró, te na ndóho ró siquī jeē cácañdije ró Cristo. Te ma ndóho ró siquī tāca cuéchi nájnūhun cándoho ñayuu jéni ndīyī, ñayuu sacuíhná, ñayuu sáha jniñu neé, jíin ñayuu quivī nduu nuū jniñu jnáhan jeē tu cánuú quivī nduu. 16 Te sa núu ñin ró ndóho siquī jeē candije ró Cristo, te ma cúcanu rō, chí sa nacuatáhú ró nuū Yaā Dios siquī jeē cúu ró cristiano.

17 Chi je ni jinū quivī jeē quejéé sándaā Yaā Dios cuéchi, te xīhna gā ñayuu cácuu sēhe ya sándaā yā cuéchi. Te núu xīhna gā cuéchi máá yó quejéé yá sándaā yā, núu súcuan te xeēn gā coo jeē ndénehen ya cuéchi siquī ñayuu jeē tu ní jétáhú jnúhun vāha ya. 18 Te núu yóhyo yí cácu ñayuu vāha, núu súcuan ¿te ndese cácu ñayuu casáha jniñu neé jíin táca cuéchi? 19 Núu súcuan te rōhó jéé cándoho siquī jeē súcuan cúní Yaā Dios, ma jécuiñī rō sáha ró jniñu vāha, te na chíhi ró máá ró ndaha máá Yaā jeē ni sáha rōhó, chí squícu ya jeē ni jéjnūhun ya.

Jeē jéhe de consejo ñayuu cácañdije

5

1 Vijna te na cáhán rī jíin táca rōhó téé jénu cándito ñayuu cácañdije, chí suni téé jénu ndíto ñayuu cácañdije cúu máá rí. Te cúu rí testigo jeē ní jito rí ndese ni ndoho Cristo. Te suni ndujénu rí jíin ró sáha Cristo quivī quénda ndijin yā. 2 Na cóto yúcún ró ñayuu jeē ndeé jniñu ró condito ró, jeē cácuu i nájnūhun lanchi Yaā Dios. Te na cúsi ni rō condito ró i, chí súcuan cúní Yaā Dios. Te nasūu siquī jeē sáfuerza yā rohó, ni nasūu siquī jeē nihín rō xūhún, chí sa siquī jeē cúní rō cuajniñu ró. 3 Te nasūu jéé ndacu nihin ró jniñu nuū ñayuu cándito ró, chí sa nducú ró cuu ró ñin ejemplo

nuū i jeē cácuu i lanchi ya. 4 Yūcuán na te quivī quénda ndijin maá Yaā cúu Pastor kujénu nuū rohó téé cácuu pastor lanchi ya, te cuāha ya premio nuū rō jijnáhan ró jéé yóhyo luu te ma náā cuiti.

5 Te suni rōhó táca téé suchí, na cuándetū rō nuū tāca téé jénu jíinā. Te ndíhi rōhó ñayuu cácañdije, cuándetū rō nuū jnáhan ró, te canī suchí ni rō. Chi suhva cáhán tutu: Yaā Dios jési yā nuū ñayuu casáha téyí máá, te vāha ni yā chíndéé ñáhán yá ñayuu casáha suchí máá.

Achí. 6 Núu súcuan te na cáni suchí ni rō, chí cáyihí ró ndaha Yaā Dios jeē jnái poder. Te sájénu ya rohó, na jíinú maá quivī. 7 Táca jéé cánacani ndasí ni rō siquī, chíhi ró ndaha máá yá te máá yá coto, chí ndíto ya rohó.

8 Te cáji na cóo xinī rō te ndito coo ni rō. Chí jexeén jeē jíto uhū rohó, jíca cuu ndúcú squivī rōhó jíináhan ró núu cuéchi. Te xeēn gā sáha vésú ndicaha jeē ñyo ndáhyú.

9 Te cuiñi nihin ró jéé ma cúndeyí jexeén jíin ró, te nihin candije ró jnúhun cúndáhú ni yā rohó. Chí cájini rō jeē suni súcuan cándoho hermano rō jeé cáyūcu ní cáhnu ñayiví. 10 Te núu ni jínu jeē ndoho ró jecu-ni tiempo, te Yaā Dios chí sáha ya jeē ije vāha ni rō jíin jnúhun ya, jíin jéé cuiñi nihin ró, te cuāha ya fuerza ini rō, te quendōo cutú ró ní cáni. Chí máá yá cúu jeé sáha táca jéé vāha yóhó, te ni cana ya yohó jéé kujénu luu yó jíin yá ní cáni, siquī jeé nduú yó jíin Jesucristo. 11 Te na cáhán yō jeé yóhyo luu cújénu ya te jnái ya poder ní cáni. Amén.

Saludo jeē sándihí

12 Jíní rī jeé Silvano cúu ñin hermano jeé squícu vāha. Te máá de cuajeé nuū rō jíin carta yáha jéé ní tee rí jecu jnúhun. Te jíin yáha stíhví ni rī rohó, te cáhán rī jíin ró jeé ndaá cúu jeé táca jéé vāha ni sáha Yaā Dios rohó, suu stéén nuū rō jeé cundáhú ndije ni yā rohó. Te na cuiñi nihin ró jíin jnúhun yáha.

13 Ñayuu cácañdije jeé cáyūcú ñuu Babilonia, jeé ní nacāji ya i nájnūhun ni nacāji ya rohó, cácahān i jeé sándeýí ni rō. Te Marcos, téé cúu nájnūhun sēhe rí, suni súcuan cáhán de. 14 Te núu na cáhán rō jíin jnáhan ró, te techūhu mánī rō ndaha i.

Te na cóo ndeyí coo sī ni ndihi ró jē
cáyihí ró ndaha Jesucristo. Súcuan na cóo.
Amén.

CARTA UU JEE NI TEE SAN PEDRO APOSTOL NUU ÑAYUU CACANDIJE

¹ Máá rí cúu Simón Pedro, te cúu ri mozo Jesucristo, te cúu ri apóstol jeē ní taji yá. Te tée ri carta yáha cuájeē nuū rō jijnáhan rō, jeē ni sáha Yaā Dios jeē inuú-ni jín rí jijnáhan ri ni canihín rō jnūhun luu váha jeē cácanđije yó yá. Chi Yaā ndaā cúu Yaā Dios, suu máá Jesucristo jeē jnáma yóhó. ² Te ñūhun ni rī jeē na sáha ga yā jeē váha ndasí rōhó jín jéē yóhyo coo ndeyí coo sī ni rō siquī jeē cájecūhun váha ni rō ndese Yaā cúu Yaā Dios jín Jítóho yō Jesús.

Siquī ndese cánuú coo ñayuu cácanđije

³ Te Yaā Dios, jín poder yā ni jēhe ya nuū yō tāca jéē sáha jeē cúu caca ndaā yō nuū yā jín jéē chiñúhún váha yó yá. Chi ni steén yā maá yá nuū yō, chi cúu ya Yaā jeē ní cana yóhó, siquī jeē yóhyo cújéhnua ya jín tāca jniñu jéhnua sáha ya. ⁴ Jeē yúcuan ní jejnūhun ya tāca jéē yóhyo jéhnua yóhyo váha sáha ya yóhó, návāha jín tāca ún te nduu rō nájñūhun iyó máá yá, te cācu rō nuū jniñu jeē cándiyo néé ni ñayuu casáha i ini ñayīvi yáha. ⁵ Núu súcuan te na ndúcú ndeyí rō jín jnūhun yáha. Te jeē cácanđije rō, te siquī ún na chísoó rō jeē caca ndaā rō. Te jeē cájica ndaā rō, te siquī ún chísoó rō jeē cóndihví ni rō jecūhun váha ni rō. ⁶ Te siquī ún chísoó rō jeē casí rō modo jeē cuní maá rō. Te siquī ún chísoó rō jnūhun cuandeyí ni rō, te siquī ún chísoó rō jeē chiñúhún váha rō Yaā Dios. ⁷ Te siquī ún chísoó rō jeē cóo maní rō jín jnáhan rō, te siquī ún chísoó rō jeē cundáhú ni rō jnáhan rō.

⁸ Chi núu cayā tācá jniñu yáha jín rō, te suu sáha jeē ma cótecu saá-ni rō, chi sa quee váha jniñu sáha rō, siquī jeē cájecūhun ni rō ndese Yaā cúu Jítóho yō Jesucristo. ⁹ Te ñayuu jeē tu casáha jniñu yáha, nájñūhun jeē cáhīyo cuáá i, chi tu jécūhun ni i jnūhun ya, te je ni naa ni i jeē ni sándoo ya i tāca cuéchi ni casáha i ichi yátá. ¹⁰ Jeē yúcuan na ndúcú ndeyí rō hermano, návāha coo seguro jeē ní cana ya rohó jín jéē ní nacāji ya rohó.

Chi núu sáha rō tāca jniñu yáha, te ma cáca yátá cuíti rō. ¹¹ Yūcuán na te nune váha ichi quiví rō ini ñuu maá Jítóho yō Jesucristo, Yaā jnáma yóhó, nuū ndácu ya jniñu ní cáni.

¹² Jeē yúcuan ma jécuiñí rī sáha ri jeē núcūhun ni rō tāca jnūhun yáha, vésú je cájini rō te cáhīn nīhin rō jín jnūhun ndaā jeē cácanđije rō. ¹³ Chi jéni ni rī jeē iyó váha stíhví ni rī rohó vijna técu gā rī, návāha nucūhun ni rō. ¹⁴ Chi máá Jítóho yō Jesucristo ni castūhun yá nuū rī jeē tuá cotecu nahán rí ñayīvi yáha. ¹⁵ Jeē yúcuan na ndúcú ndeyí gá rī stíhví ni rī rohó, návāha núu je ni jihí rī, te níni nucūhun ni rō tāca jnūhun yáha.

Jeē ní cajito de jeē cújéhnua Cristo

¹⁶ Ná ni castéén rī jnūhun máá Jítóho yō Jesucristo nuū rō, ndese ndiji ya jín poder yā, te tu ní cácahān rī ñn cuento-ni jeē ní catava ndichí ñáyuu. Chi ná ni cahīyo rī jín yá xiní yúcu, te ni cajito jín núu rī jeē tucu ni nduu ya jeē ní nduluu jéhnua ya. ¹⁷ Chi ni cajini rī jeē Tatá yō Yaā Dios ni cahān yíñúhún yá jín Jesús, te ni sajehnua ya Jesús. Chi ichi ándiví ní quiji jnūhun luu, ni cahān Yaā Dios: Yáha cúu Sēhe ri jeē maní ndasí rí jín, te cúsi ni rī jín, áchí yá. ¹⁸ Te ni cajini sōho rī jnūhun un jéē ni cáhān ichi ándiví, chi ni cahīn rī jín máá Jítóho yō xiní yúcu i ún.

¹⁹ Te súcuan cájini yō jeē iyó ndaā ndije tāca jnūhun ni catee tēe ni canacani jnūhun ya nde jenahán. Te váha jeē na chúhun ni rō jnūhun un jijnáhan rō, chi suu cúu nájñūhun ñn luz jeē cayú nuū néē, nde na cūndijin quiví ndíji ya, te steén yā ini anuá rō nájñūhun jeē ndíndéé lucero. ²⁰ Te xīhna gā na jécūhun ni rō jeē ni ñn jnūhun cáhān tutu i, nasūu jéē súcuan-ni ni cajeni ni tēe cúu. ²¹ Chi tāca tée ndoo jeē ní canacani jnūhun ya nde jenahán, tu ní cácahān cuíti de jnūhun jeē cúu ni maá de. Chi sa suhva ni canacani de jnūhun Yaā Dios jeē ni steén Espíritu Santo nuū de.

Siquī tēe cástéén jnūhun stáhú (Judas 4-13)

2

¹ Te mēhñu ñáyuu Israel ún suni ni cahīyo tēe ni canacani jnūhun stáhú. Te suni

súcuan coo tēe stéén jnūhun stáhú méhñu ró. Te squívi de jnūhun stáhú jéé tiví ñáyuu sáha. Te ni ma cuajnúhún de Jitoho yō jeē jnáma ya de, te súcuan sáha de jeē jnahnú ndetū yachī de. ² Te cuehē ñáyuu condiquīn i modo neé jéé castéén de. Te sáha de jeē cahán neé ñáyuu siquī jnúhun vāha ya jeē cúu ichi ndaā. ³ Te siquī jeē cándiyo ni de xūhún, te quende de xūhun ró siquī jnúhun stáhú stéén de nuū rō. Te tu quíxín jnūndóho jnahnú ndetū de, chi nde jenahán je ndétu jnūhun ndonda ya siquī cuéchi de.

⁴ Chi tu ní íne cáhnu ni Yaā Dios nuū tācá ndajéhé yā jeē ní casáha cuéchi, chi sa ni jnaa yā infierno cáyindihyū nuū néé, cánuhnī jín cadena. Te ní chindihyū yā nde quívi sándaā yā siquī. ⁵ Te suni tu ní íne cáhnu ni yā nuū ñáyuu jenahán, chi sa ni scúun ya saū xeén siquī ñáyuu ni casáha neé un. Te máa-ni Noé, tēe ni nacani jnūhun ndaā, ni scácu ya de jín úxā gā ñáyuu. ⁶ Te suni ni ndonda ya siquī cuéchi ñáyuu ñuu Sodoma jín ñuu Gomorra, te ni cayū ñuu i ni nduu máa yā na. Te súcuan cúu i ñn ejemplo nuū tāca gā ñáyuu sáha neé jéé quíji ga. ⁷ Te ni scácu ya Lot, chi tēe ndaā ni cuu de, te ni cucuíhyá ndasí ni de ni jito de jniñu neé ní casáha ñáyuu neé un. ⁸ Chi tēe váha un ní condee de méhñu ñáyuu ún, te ndiquívi ni nacani cuíhyá ni de jeē ní jini sōho de ni jito de tācá jniñu neé ní casáha i. ⁹ Núu súcuan te máa Jitoho yō chi jnáma ya ñáyuu cáchiñúhún núu yā, te núu vēji jnūndóho siquī i. Te chindihyū yā ñáyuu casáha neé, návāha ndoho i castigo quívi sándaā yā cuéchi i.

¹⁰ Te víhyá gā stóho ya tēe casáha jniñu jnéhén jéé ndíyo neé ni de, te cácuu jéé ni de siquī jniñu ndácu máa Jitoho yō. Nihni ndasí ni de, te cáchundeyí ni de sáha de jeē cácuu maá de, te tu cáyūhú de cahán ndevāha de siquī tāca jéé cácujuhnu nuū sucún. ¹¹ Te ni máa ndajéhé jeē cáhīn nuū Jitoho yō, vēsú cácujuhnu ga yā jín fuerza jín jniñu ndíso ya, te tu cácahān ndevāha ya siquī tāca jéé cácujuhnu ún.

¹² Te tēe ún chi cácuu de nájnūhun quiti yúcu jéé ni jéconā tī jín modo sáha tī, te cátahū tī návāha nihīn ñáyuu tī cahni i tī. Chi cácahān neé de siquī tāca jéé tu cájecūhun

ni de. Te cuu de nájnūhun jíhí tācá quiti ún. ¹³ Te jeē ní castóho de ñáyuu, suni súcuan nanihīn de ndoho de. Te cácusī ni de jín tāca jéé cácajni ni de, te casáha de tāca jniñu jeē cándiyo neé ni de. Te cácuu de tēe quini jeē casáha jniñu cúcanu ñáyuu. Te jeē cándutútú de jín ró vico ró, te níni cácusī ni de jín jniñu neé jniñu stáhú.

¹⁴ Te cándiyo ni de cájito de ñahan, te tu cájecuīñi de sáha de cuéchi. Te cástáhú de ñáyuu tahya ni. Chi ni cacāan de jín jnúhun ndíyo ni de tācá ndajniñu. Te tēe jnahnú ndetū cácuu de. ¹⁵ Te ni casana de, chi ni castóo de jnūhun jeē cúu ichi ndaā. Te ni candiquīn de modo Balaam, tēe ni nacani jnūhun nde jenahán, séhe Beor. Chi tēe un ní cusī ni de nihīn de xūhun síquī jnūhun neé jéé cahán de. ¹⁶ Te ñn burro ni cahán tī nájnūhun ñn ñáyuu, vēsú quiti ñihīn cúu tī. Te ni cahán tī nuū tēe ún, te súcuan ni jesi tī jeē ma quihín de cahán de tāca jnúhun neé stívi.

¹⁷ Te tāca tēe súcuan chi cácuu de nájnūhun tesōco íchi, nájnūhun vicō jeē stehí táchī. Te jnahnú ndetū de quívicoo de nuū néé nuū lúchi jnúu coyúcu de ní cáni. ¹⁸ Chi yōhyo cáсандúxi de máa de jín jnúhun cácahān saá-ni de. Te cánducú de squívi tucu de sava ñáyuu nuū jniñu neé jniñu ndíyo ni. Te súcuan cástáhú de ñáyuu jeē sa ní quenda i ni cácu i nuū ñáyuu casáha jniñu neé. ¹⁹ Te cácahān de jeē cáhīyo libre i sáha i ndese-ni cúní maá i, te ni máa de tu cáhīyo libre de, chi cácuu de mozo nuū cuéchi, chi máni jniñu jnéhén casáha de. Chi tācá jniñu jeé cúndeyí jín ñn tēe jeé sáha de, suu yūcuan ndúu de mozo nuū. ²⁰ Chi núu je ni cajini de ndese Yaā cúu máa Jitoho yō Jesucristo, Yaā jnáma yóhó, te núu súcuan ni quenda de ni cácu de nuū jniñu jnéhén íyó ini ñayívi, te yūcuán na te núu ndívicoo tucu de nuū jniñu un jéé cúndeyí tucu jín de, núu súcuan te neé gā quendō de jeé sándihí vēsú jeé xíhna ñúhún. ²¹ Chi vāha ga núu jeé tu ní cajini de jnūhun ichi ndaā nuú, vēsú jeé ní cajini de, te stóo tucu de jniñu ndoo jeé ní ndacu ya nuū de. ²² Chi cúnndaā jín de nájnūhun cáhān ñn jnūhun jenahán: Ina ni nacaji tī jeé ní ndujen tī. Te quini ní ndundoo, ni nacuchi tucu tī ndehyū, achí.

Siquī jeē ndíji Jítoho yō

3

¹ Ñánī mánī, yáha cúu carta uū jeē tée ri nuū rō. Te jíin ndindúú carta yáha cúní rī jeē nacani ni rō siquī ndíhi jeē váha ndaā jeē jéni ichí rí rohó. ² Te na núcūhun ni rō tāca jnúhun jeē ní canacani tēe ndoo Yaā Dios nde jenahán, jíin jniñu ní ndacu máá Jítoho yō, Yaā jnáma yóhó. Te suu cúu jeē ní castéén tēe cácuu apóstol nuū rō.

³ Te xīhna gā jnúhun yáha na jécūhun ni rō: Jeē nuū cuándíhi quivī te quijicoo tēe sácata siquī jnúhun ndaā yā, chi sáha de tācá jniñu néé jéé ndíyo ni maá de. ⁴ Te cahān de jíjnáhan de: ¿Najehē cúu jeē tu ndíji Cristo nájnūhun ni jejnūhun ya? Chi nde quivī ní cajihī jíi yō te nde vijna, tu ndé sáma cuiñi ndíhi jeē iyó ndé ná ni jecōo ñayīví, achi de. ⁵ Chi tu cácuu de jécūhun ni de jeē ndé jenahán ní cuvāha andiví jíin jnúhun ni cahān Yaā Dios. Te ni ndacu ya jniñu jeē na cuvāha ñayīví jíin ndute, te mēhñú ndute ni nane ñuhun íchi. ⁶ Te suni jíin ndute ni naa ñayīví jenahán, chi ni ndaa ndute jeē ní cuun saū xeén. ⁷ Te suni súcuan jíin jnúhun ni cahān Yaā Dios ni sátūhva ya jeē cayū andiví jíin ñayīví iyó vijna. Chi máá quivī juicio te cayū ndíhi, te jnahnū ndetū ñayuu ni casáha néé.

⁸ Te suni ma náā ni rō jnúhun yáha, ñánī mánī: Jeē nuū maá Jítoho yō chi ñn quivī cúu nájnūhun mil cuiyā, te mil cuiyā cúu nájnūhun ñn quivī-ni. ⁹ Chi nasūu jéé cucuéé máá Jítoho yō siquī jnúhun ni jejnūhun ya, nájnūhun cájeni ni sava ñayuu. Chi sa suhva iyó paciencia ni yā nuū yō, chi tu cúní yā jeē jnahnū ndetū ni ñn yó, chi sa cúní yā jeē ndíhi yó nacani ni yō stóo yó cuéchi yó.

¹⁰ Te quivī ndíji máá Jítoho yō, ñn sanaa-ni te quee, nájnūhun ñn sanaa-ni te quee ñacuñhá jecuáā. Te quivī ún chi ññin ndasí andiví, te naa-ni. Te ndíhi jeē iyó andiví chi naa sáha ñuhūn. Te ñayīví jíin táca jéé iyó ini, ndíhi cayū.

¹¹ Te núu súcuan naa tācá un, te cánuú ndasí jéé coo ndoo ánuá rō te chiñúhún váha ro yá jíjnáhan rō. ¹² Te condetu rō te condíhvī ni rō jeē na quée yachī quivī ndíji

Yaā Dios. Te quivī ún cayū andiví te naa-ni, te tāca jéé iyó chi ndute sáha yáñuhūn. ¹³ Te máá yó chi cándetu yó andiví jéé jíin ñayīví jéé, chi súcuan ni jejnūhun Yaā Dios. Te yūcuán chi máni jniñu ndaā jíin jniñu váha coo.

¹⁴ Núu súcuan, ñánī mánī, níni jéé cándetu rō jéé squícu tācá jniñu yáha, te na ndúcú ndéyí rō návāha quivī ndíji ya te nihīn yā rohó jéé cáyūcu mánī rō, te coo ndoo rō jéé tú na cuéchi rō. ¹⁵ Te na jécūhun ni rō jeē siquī jeē iyó paciencia ni maá Jítoho yō, jeē yúcuan cácu yó. Chi hermano yō Pablo jeē maní yō jíin, suni súcuan ni tee de nuū rō, chi súcuan ni steén Yaā Dios jnúhun ndíchi yá nuū de. ¹⁶ Te cáhán de siquī jnúhun yáha núu tāca carta jeē ní tee de. Te nuū carta de un iyó jecu jnúhun jeē yí jécūhun ni yō. Te ñayuu tu jécūhun ni jíin ñayuu tu íje jíin jnúhun cándíje, cánasama i modo steén jnúhun yí un, nájnūhun násama i jeē cahán sava ga tutu íi. Te súcuan sáha i jeē jnahnū ndetū maá i.

¹⁷ Te rōhó ñánī mánī, vijna te je ni cajini rō ndese coo tācá jniñu yáha. Núu súcuan te coto má condiquīn rō jnúhun stáhú cástéén ñayuu casáha néé. Chi núu tuú te snáā rō jnúhun cáhīn ññin rō jíin. ¹⁸ Chi sa na cóndíhvī gā ni rō cuni rō ndese Yaā cúu máá Jítoho yō Jesucristo, Yaā jnáma yóhó. Te na íje ga ni rō jíin jnúhun cúndáhú ni yā rohó. Te na cáhán yō jeé yóhoyó luu cújéhnu ya nde vijna jíin ní cáni. Súcuan na cóo. Amén.

CARTA ĤN JEE NI TEE SAN JUAN APOSTOL NUU ÑAYUU CACANDIJE

Jnūhun cotecu yō ñí cáni

¹ Jnūhun cátee ri cuajeē nuū rō jijnáhan ró cúu jnūhun máá Yaā jeē je íyó ndé ná tu jecōo táca jéē iyó. Te ni cajini sōho ri jeē ni cáhān yā, te ni cajito jínūū rī yā, chi ni cajito vāha ri nuū yā, te ni cajni ri yā. Te máá yá cúu Jnūhun cotecu yō ñí cáni. ² Chi Yaā yáha jéē sáha ya jeē cótecu yō, ni quenda ndijin yā. Te cácahān rī jnūhun ya, chi ni cajito ri yā. Te cácastūhun rí nuū rō jijnáhan ró síquī Yaā cúu Jnūhun cotecu yō ñí cáni, Yaā ni condee jín Tátá yō Yaā Dios, te ni quenda ndijin yā nuū rī jijnáhan ri. ³ Jeē ní cajito ri jín jéē ní cajini sōho ri, yūcuan cúu jeē cácastūhun rí nuū rō, návāha coo inuú ni rō jín yó jijnáhan yó. Te jendaá chi cáhīyo inuú ni yō jín máá Tátá yō Yaā Dios jín Séhe ya Jesucristo. ⁴ Te jnūhun yáha cátee ri cuajeē nuū rō, návāha cusī teyí ni rō jijnáhan ró.

Yaā Dios cúu luz

⁵ Te yāha cúu jnūhun ni steén Jesucristo nuū rī, te vijna cácastūhun rí nuū rō: Yaā Dios cúu luz, chi yōhyo ndaā yā, te tú cuiti na jniñu néé íyó jín yá. ⁶ Núu cácahān yō jeē cáhīyo inuú ni yō jín yá, te núu cájica yó návjñūhun nuū néē jeē sáha yó jniñu néé, núu súcuan te cástáhú yó, te nasūú jniñu ndaā casáha yó. ⁷ Te núu cájica yó jín luz yā jeē casáha yó jniñu ndaā, návjñūhun íyó máá yá jín luz yā jeē sáha ya jniñu ndaā, yūcuán na te cáhīyo inuú ni yō jín táca jnáhan yó. Te ñíñí máá Séhe ya Jesucristo sándoo yóhó núu ndíhi cuēchi yó.

⁸ Núu cácahān yō jeē tú na cuēchi yó, te cástáhú yó máá yó jeē jéni ni yō súcuan, te tu ñúhun jnūhun ndaā ini yō. ⁹ Te núu nacani ndaā yō cuēchi yó núu yā, te cone cáhnu ni yā nuū cuēchi yó, te sándoo ya yohó ndíhi jeē neé casáha yó. Chi jíní yō jeē Yaā vāha Yaā ndaā cúu ya. ¹⁰ Te núu cácahān yō jeē tú na cuēchi yó, te návjñūhun sáha yó jéē Yaā stahú cúu ya, te tu cándíje ndije yó jnúhun ya.

Cristo cúu Yaā cahán jehē yō

2

¹ Táca jnúhun yáha téé ri cuajeē nuū rohó jéē cácuu ró návjñūhun sēhe ri, návāha ma sáha ró cuēchi jijnáhan ró. Te núu ndé ĥn ró ní sáha cuēchi, te íyó máá Yaā cahán jehē yō nuū máá Tátá yō Yaā Dios. Jesucristo Yaā ndaā cúu ya. ² Te ni socō yā máá yá jeē ndahva yā cuēchi yó, te nasūu cuēchi máá-ni yó, chi suni cuēchi ñayuu ñí ñáyíví.

³ Núu squícu yó jniñu ndácu Yaā Dios nuū yō, jín yúcuán cúcáhnu ni yō jeē jíní ndije yó ndese Yaā cúu ya. ⁴ Te núu cáhān ĥn ñayuu: Ruhū chi jíní rī ndese Yaā cúu ya, te núu tu squícu i jniñu ndácu ya, núu súcuan te stáhú i, te tu cáhān i jnūhun ndaā. ⁵ Te sa ñayuu squícu jnūhun ya, je ni ije vāha ni i jeē maní i jín yá. Súcuan te cuni yō núu ndúú yó jín yá chí tuú. ⁶ Núu cáhān ĥn ñayuu jeē nduú i jín yá, cánuú jéē caca ndaā i návjñūhun ní jica Jesucristo.

Jniñu jéé ndácu ya nuū yō

⁷ Hermano, nasūú ĥn jniñu jéé ndácu ri nuū rō jeē cahán rī jeē na cúndáhú ni rō jnáhan ró. Chi jniñu jeē je cájini rō nde ná ni quejéé ró candíje ró cúu. Te jniñu yáha jeē ndácu ya, vēji nde jenahán, te suu cúu jnūhun ni cajini sōho ró ndé quíví ní quejéé ró candíje ró. ⁸ Te vēsú súcuan, te níní jniñu jéé cúu, te jniñu ndaā cúu nuū Cristo jín núu máá ró jijnáhan ró. Chi je cuayāha jniñu néé jéé iyó núu néé, te je steén máá luz ndaā ini anuá yō vijna.

⁹ Núu ĥn ñayuu cahán i jeē jica i jín luz yā, te núu jító uhū i jnáhan i, ñayuu ún chi jica ga i návjñūhun nuū néé jín cuēchi. ¹⁰ Te ñayuu jeē cundáhú ni jnáhan, chi jica i jín luz yā, cúu jeē sáha i jniñu vāha. Te ni ĥn ma cúu sáha jeē quíví i cuēchi. ¹¹ Te ñayuu jító uhū jnáhan, chi íyó i nuū néé, te jica i nuū néé. Te tu jíní i ndé chi quíhín i, chi nuū néé un ní jesi jeē tu jécūhun ni i.

¹² Róhó jéé cácuu sēhe, téé ri jnūhun yáha cuajeē nuū rō, chi jeē síquí Jesucristo te ni ine cáhnu ni Yaā Dios nuū cuēchi ró. ¹³ Róhó tátá jijnáhan ró, suni téé ri nuū rō, chi cájini rō ndese Yaā cúu Yaā iyó ndé xīhna ñúhún. Róhó téé suchí jijnáhan ró, suni téé ri nuū

rō, chi ni cacundeyí ró jeē tu ní cúu squívi jexeén rohó cuéchi.

Róhó jéē cácuu sēhe, tée ri jnūhun yáha cuájeē nuū rō, chi cájini rō ndese Yaā cúu máá Tátá yō Yaā Dios. ¹⁴ Róhó tátá jijnáhan ró, suni tée ri nuū rō, chi cájini rō Yaā iyó ndé xihna ñúhún. Róhó tée suchí jijnáhan ró, suni tée ri nuū rō, chi cáhīn nīhin ró, te cácandíje ró jnūhun Yaā Dios, te ni cacundeyí ró síquī jéxeén.

¹⁵ Ma cutóó ni rō síquī ñayívi, ni tāca jéē iyó ini ñayívi. Chi núu ndé ñayuu cutóó ni i síquī ñayívi, ñayuu ún tu iyó mánī i jín Tátá yō Yaā Dios. ¹⁶ Chi tāca jéē cúu cuenta ñayívi, nasūu ndé nuū Tátá yō Yaā Dios vēji, chi cuenta ñayívi cúu. Te yūcuan cúu tāca jéē cájini ni yō jeē cuní modo neé máá yó, jín jéē ndíyo ni yō jeē jito yó núu, jín jéē sandúxí yó máá yó síquī ndajniñu névaha yó. ¹⁷ Te cuandíhi ñayívi jín tāca jéē ndíyo neé ni yō. Te ñayuu casáha jeē cuní máá Yaā Dios, chi cotecu i ní cáni.

Jnūhun ndaā jín jnūhun stáhú

¹⁸ Róhó jéē cácuu nájñūhun sēhe ri, cáhán rī jín ró jeē cuandíhi quívi. Te je ni cajini jnūhun ró jéē quíji máá tée cuu contra síquī Cristo. Te nde vijna je ni canecoo cuehē tée jeē cácuu contra síquī Cristo. Te jeē yūcuan jín yō jeē cuandíhi quívi. ¹⁹ Mēhñu máá yó ni quendacoo de, te nasūu jnáhan yó cácandíje cácuu de. Chi núu jeē jnáhan yó cácuu de, te quendōo de jín yó nuú. Te ni quenda de cuango de, návaha cuni cají yó jéē násūu jnáhan yó cácuu ndíhi de.

²⁰ Te máá ró jijnáhan ró, chi Cristo ni jēhe ya Espíritu Santo, ndeé yá ini anuá rō, te jeē yūcuan cájini rō jnūhun ndaā. ²¹ Núu súcuan te tée ri yáha cuájeē nuū rō, síquī jeē cájini rō jnūhun ndaā, nasūu síquī jeē tu cájini rō. Te cájini rō jeē tú na jnūhun stáhú iyó nuū jnūhun ndaā.

²² ¿Ndé ñn cúu jeē cahán mánī jnūhun stáhú? Suu tée jeē cahán jeē Jesús, tu cúu ndíje ya Cristo, Yaā ní tají Yaā Dios. Yūcuan cúu tée jeē cúu contra síquī Cristo, chi tu jéjnúhún de máá Tátá yō Yaā Dios jín Séhe ya. ²³ Tāca ñayuu jeē tu jéjnúhún i Séhe ya, suni tu iyó máá Tátá jín i. Te ñayuu jeē jéjnúhún i Séhe ya, suni iyó máá Tátá jín i.

²⁴ Núu súcuan te chuhun vāha ni rō máá jnūhun ni cajini sōho ró ndé jeē xihna ñúhún. Te núu ñúhún vāha ni rō jnūhun ní cajini sōho ró ndé jeē xihna ñúhún, yūcuán na te suni ndúú ró jín máá Tátá yō jín Séhe ya. ²⁵ Te yáha cúu jnūhun jeē ni jéjnūhun Jesucristo nuū yō: jeē cótecu yō ní cáni sáha ya.

²⁶ Jnūhun yáha ní tee ri nuū rō jeē cástūhun rí síquī ñayuu cánducú stáhú róhó. ²⁷ Te máá ró jijnáhan ró, chi ni jēhe Jesucristo Espíritu Santo, ndeé yá ini anuá rō. Te jeē yūcuan tu jín ñúhún jéē steén ni ñn ñayuu nuū rō ndé vé cúu jendaá, chi máá Espíritu cúu jeē steén ndíhi nuū rō, te steén yā jnūhun ndaā, chi tu stáhú cuíti yā. Núu súcuan te caca ndúú ró jín Cristo, nájñūhun steén Espíritu nuū rō.

²⁸ Séhē jijnáhan ró, vijna te na cáca ndúú ró jín Cristo, návaha núu na quenda ndíjin yā, te ma yūhu yó, ni ma cúcanu yō nuū yā quívi ndíji ya. ²⁹ Chi je cájini rō jeē Yaā ndaā cúu Jesucristo, te suni na jécūhun ni rō jeē tāca ñayuu casáha jniñu ndaā, sēhe Yaā Dios cácuu i.

Jnūhun ñayuu cácuu sēhe Yaā Dios

3

¹ Nacā jeē yóhyo ni cundáhú ni Tátá yō Yaā Dios yohó, chi ni nihīn yō jnūhun cuu yó séhe ya, te suu cúu ndíje yó. Jeē yūcuan, ñayuu ñayívi tu cájini i jeē cúu yó séhe ya, chi tu jín i ndese Yaā cúu máá yá. ² Nánī mánī, vijna te cúu yó séhe Yaā Dios, te ná tu cuni yō ndese coo yó ní cáni. Te je jín yō jeē quívi quenda ndíjin Jesucristo, te nduu yó nájñūhun iyó máá yá, chi coto yó núu yā ndese iyó yá. ³ Te tāca ñayuu jeē súcuan ñúhún ni i, chi sándoo i ánuá i, nájñūhun iyó ndoo Jesucristo.

⁴ Te ñayuu casáha cuéchi, chi stívi i ley Yaā Dios. Chi núu sáha yó cuéchi, te stívi yó ley yā. ⁵ Te je cájini rō jeē ní quíji Jesucristo ini ñayívi návaha quende yā cuéchi yó. Te máá yá tú na cuéchi ya. ⁶ Te tāca ñayuu jeē ndúú i jín yá, tu cájica i jín cuéchi. Te tāca ñayuu cájica jín cuéchi, tu jín i ya, ni tu jécūhun ni i ndese Yaā cúu ya. ⁷ Séhē jijnáhan ró, coto ró jéē ma stáhú ni ñn i róhó. Chi na jécūhun ni rō jeē ñayuu casáha jniñu ndaā, máá i

cácuu ñayuu ndaā, nájnūhun íyó ndaā maá yá. ⁸ Te ñayuu casáha cuēchi, máá i cácuu sēhe jexeén. Chi jexeén cúu jeē sáha cuēchi vēji nde jeē xíhna ñúhún. Jeē yúcuan ní quiji Sēhe Yaā Dios, jeē snáa yā tācá jniñu néé sáha jexeén.

⁹ Ni ñn ñayuu jeē cúu sēhe Yaā Dios, tu jíca i jíin cuēchi, chi ni sáha Yaā Dios jeē ní nduu i nájnūhun íyó máá yá. Te ma cúu ga caca i jíin cuēchi, chi sēhe Yaā Dios cácuu i. ¹⁰ Súcuan cuni yō ndé ñn cúu sēhe Yaā Dios jíin sēhe jexeén: Tāca ñáyuu jeē tu sáha jniñu ndaā, jíin jéē tu cúndáhú ni jnáhan, nasūu sēhe Yaā Dios cúu i.

Jeē na cúndáhú ni yō jnáhan yó

¹¹ Yāha cúu jnūhun jeē ní cajini sōho ró ndé jeē xíhna ñúhún: jeē na cúndáhú ni yō jnáhan yó. ¹² Te ma sáha yó nájnūhun ni sáha Caín, jeē ní cuu de sēhe jexeén, te ni jehni de ñani de. ¿Te najehē ni jehni de ñani de? Siquí jeē ñani de ni sáha jniñu ndaā te máni jniñu néé ní sáha máá de.

¹³ Hermano jijnáhan ró, ma cunéé ni rō te núu ñayuu ñayívi cáquití ni i nuū rō. ¹⁴ Te máá yó chi siquí jeē cundáhú ni yō jnáhan yó, súcuan jíin yō jeē jé ni cácu yó jéé cótecu yō ñí cáni. Te ñayuu jeē tu cúndáhú ni jnáhan, íyó i jíin jnúhun jnahnū ndetū i. ¹⁵ Chi tāca ñáyuu quití ni nuū jnáhan, nájnūhun ñayuu jéni ndíyi cúu i. Te cájini rō jeē ñáyuu jéni ndíyi, ma nihín tahú i cotecu i ñí cáni. ¹⁶ Jeē ni jíhī Cristo jehē yō, yúcuan cúu jeē steén cají ndese cúu jnūhun cúndáhú ni. Te máá yó, chi suni súcuan jíin ñúhún cundáhú ni yō jnáhan yó vésú na cúu yō jehē i. ¹⁷ Te núu névāha yó jéé cótecu yō ñayívi, te núu jíin yō jeē cúmaní nuū jnáhan yó, te núu tú cundáhú ni yō i cuāha yó jéé jíin ñúhún i, núu súcuan ¿te á íyó máni yō jíin Yaā Dios, chi naún? ¹⁸ Séhē jijnáhan ró, ma cundáhú ni yō jíin máá jnúhun cáhán-ni yó, chi sa suhva na cúndáhú ndije ni yō nde jíin jniñu sáha yó.

Ndese cucáhnu ni yō jeē váha sáha yó núu Yaā Dios

¹⁹ Te súcuan cundaā ni yō jeē squícu yó jnúhun ndaā, te cucáhnu ni yō jeē váha sáha yó núu yā. ²⁰ Chi núu ánuá yō tú vāha sáha siquí jeē íyó cuēchi yó, te Yaā Dios chi

cújehnu ga yā vésú anuá yō, te jíin ndihi ya tācá un. ²¹ Núu súcuan ñání máni, núu vāha sáha ánuá yō siquí jeē tú na cuēchi yó, yúcuan na te cucáhnu ni yō jeē váha sáha yó núu Yaā Dios. ²² Te tāca jéé cacán yō nuū yā, te sáha ya jeē cahán yō, chi squícu yó jniñu ndácu ya te sáha yó jniñu jeē cúsi ni yā. ²³ Te yāha cúu jniñu ndácu ya: jeē na cándije yó jéé ni sáha Sēhe ya Jesucristo jehē yō, jíin jéé na cúndáhú ni yō jnáhan yó, nájnūhun ni ndacu ya jniñu nuū yō. ²⁴ Te tāca ñáyuu squícu jniñu ndácu Yaā Dios, ndúu i jíin yá, te ndéé yá ini anuá i. Te jíin máá Espíritu jeē ni jéhe ya jeē ndeé ini anuá yō, jíin yúcuan te jíin yō jeē ndeé Yaā Dios ini yō.

Jnūhun jeē véji nuū Espíritu jíin jnúhun cáhán contra Cristo

4

¹ Ñání máni, ma cándije ró táca téé jéé cácahán de jeē jíin Espíritu Yaā Dios cácanani de jnūhun. Chi sa suhva coto ndee rō de, núu nde nuū Yaā Dios vēji jnūhun cácahán de, chí tuú. Chi ini ñayívi je ni canecoo cuehē téé cácanani jnūhun stáhú, te cácahán de jeē ndé nuū Yaā Dios vēji. ² Te súcuan nacuni rō ndé-ni i cúu jeē jíin Espíritu Yaā Dios cahán: tāca ñáyuu jeē cácahán ndaā jeē ní quiji Jesucristo, ni nduu ya téé, máá i cúu jeē jíin Espíritu Yaā Dios cácahán. ³ Te tāca ñáyuu jeē tu cájehnúhún jeē súcuan ni nduu ya téé, máá i chí nasūu jíin Espíritu Yaā Dios cácahán i. Chi sa suhva cácuu i contra siquí Cristo. Te je ni cajini jnūhun ró jéé quíjicoo ñayuu súcuan, te vijna je cáhíyo i ini ñayívi.

⁴ Séhē jijnáhan ró, máá ró cácuu sēhe Yaā Dios, te je ni cacundeyí ró siquí téé cástáhú un. Chi jénu ga cúu poder maá Yaā jeē ndeé ini rō, vésú poder maá jéé ndeé jíin ñáyuu ñayívi jéé castáhú. ⁵ Máá i cácuu cuenta ñayívi, te jeē yúcuan cácahán i jnūhun cuenta ñayívi. Te ñayuu cácuu cuenta ñayívi, cájini nahín i jnūhun ún. ⁶ Te máá yó chí sēhe Yaā Dios cácuu yó. Te ñayuu jeē cájini i ndese Yaā cúu Yaā Dios, máá i cájini nahín i jnūhun cácahán yō. Te ñayuu jeē násūu sēhe Yaā Dios cácuu, máá i tu cájini nahín i jnūhun cácahán yō. Te súcuan nacuni yō ndé-ni cúu jeē cahán jnūhun ndaā jíin ndé-ni cúu jeē cahán jnūhun stáhú.

Máni jnūhun cundáhu ni iyó jín Yaā Dios

⁷ Nánī mánī, na cundáhu ni yō jnáhan yó, chi jnūhun cundáhu ni, nde nuū Yaā Dios vēji. Te tāca ñayuu cundáhu ni jnáhan, chi sēhe Yaā Dios cúu i, te jínī i ndese Yaā cúu Yaā Dios. ⁸ Te ñayuu jeē tu cundáhu ni jnáhan, tu jínī i ndese Yaā cúu Yaā Dios, chi máni jnūhun cundáhu ni iyó jín Yaā Dios. ⁹ Súcuan ni steén Yaā Dios ndese cundáhu ni yā yohó, chi ni tají yá Sēhe ya ni quiji ini ñayīví yáha, vēsú mañúhún-ni ya iyó, návāha cotecu yō ní cáni sáha ya. ¹⁰ Te yáha cúu jnūhun cundáhu ni: nasūu jéē xíhna maá yó ni íyo manī yō jín Yaā Dios, chi sa suhva maá yá cúu jeē ní cundáhu ni yā yohó. Te ni tají yá Sēhe ya ni quiji, návāha socō yā maá yá jeē quende yā cuēchi yó.

¹¹ Nánī mánī, núu súcuan ni cundáhu ni Yaā Dios yohó, te suni súcuan cánuú jeē cundáhu ni yō jnáhan yó. ¹² Ni ñayuu tu ní jító cuiti nuū Yaā Dios. Te núu cundáhu ni yō jnáhan yó, te ndéé Yaā Dios ini anuá yō, te je ni ije vāha ni yō jín jnúhun cundáhu ni. ¹³ Te máá Espíritu Santo jeē ni jéhe ya jeē ndeé ini yō, máá yá steén jeē nduú yó jín Yaā Dios, te ndéé Yaā Dios ini yō. ¹⁴ Te ni cajito ri te cácastūhun rí jeē maá Tátá yō ni tají yá Sēhe ya ni quiji návāha jnama ya ñayuu ñayīví. ¹⁵ Te núu ndé ñayuu jejnúhún i jeē Sēhe Yaā Dios cúu Jesús, te ndúu i jín Yaā Dios, te Yaā Dios ndeé yá ini i.

¹⁶ Te máá yó, je ni jini yō te ni candíje yó jéē cundáhu ni Yaā Dios yohó. Chi máni jnūhun cundáhu ni iyó jín Yaā Dios. Te ñayuu cundáhu ni jnáhan, ndúu i jín Yaā Dios, te ndéé yá ini anuá i. ¹⁷ Te súcuan cúu jeē ije vāha ni yō jín jnúhun cundáhu ni, návāha ma yūhu yó quiví sándaā yā jniñu yó. Chi nájnūhun cundáhu ni Cristo, suni súcuan cándaā máá yó ini ñayīví yáha. ¹⁸ Te núu manī yō jín yá, te tu yúhú yó nuū yā. Chi núu ni ije yó jín jnúhun manī yō jín yá, te tú na siquī yuhú yó nuū yā. Chi jnūhun yúhú un cúu jeē yuhú yó ndoho yó castigo. Jeē yúcuan ñayuu cáyūhú chi ná tu ije vāha i jín jnúhun manī i jín yá.

¹⁹ Te yohó chi manī ndasí yó jín Yaā Dios, chi xíhna gā maá yá ni cundáhu ni yā yohó. ²⁰ Te núu ñayuu cahán i jeē manī i jín Yaā Dios, te núu quítí ni i nuū jnáhan i, núu

súcuan te ñayuu stahú-ni cúu i. Chi núu ñayuu tu íyó mánī i jín jnáhan i jeē jító i nuū, te ni ma cúu coo manī i jín Yaā Dios jeē tu jító i nuū yā. ²¹ Chi je ni ndacu ya jniñu yáha nuū yō: Ñayuu jeē manī i jín Yaā Dios, suni na cóo manī i jín jnáhan i.

Jeē cundeyí yó siquī jeneé íyó ini ñayīví

5

¹ Tāca ñayuu jeē cácandíje i jeē Jesús cúu Cristo, Yaā ní tají Yaā Dios, máá i cácuu sēhe Yaā Dios. Te ñayuu manī jín Yaā cúu Tátá, suni cácundáhu ni i ñayuu cácuu sēhe ya. ² Súcuan jínī yō jeē cundáhu ni yō ñayuu cácuu sēhe ya, núu manī yō jín yá te squícu yó jniñu ndácu ya. ³ Chi jeē squícu yó jniñu ndácu Yaā Dios cúu jeē manī yō jín yá. Te jniñu ndácu ya chi tú vēyi. ⁴ Chi tāca ñayuu cúu sēhe Yaā Dios, cundeyí i siquī jeneé íyó ini ñayīví. Te jeē candíje yó jéē cundáhu ni yā yohó, yúcuan cúu fuerza jeē sáha jeē cundeyí yó. ⁵ Máá-ni ñayuu jeē candíje jeē Jesús cúu Sēhe Yaā Dios, máá i cúu jeē cundeyí siquī jeneé íyó ini ñayīví.

Jnūhun cáhán ndaā siquī Sēhe Yaā Dios

⁶ Te jeē ní quiji Jesucristo ini ñayīví, chi ni jendute ya jín ndute, te ni jeti niñī yā jeē ni jhī yā jehē yō. Te nasūu máá ñayuu ni jeē ní jendute ya jín ndute, chi suni ni jeti niñī yā. Te máá Espíritu Yaā Dios cahán ndaā siquī yā, chi nuū maá Espíritu vēji jnūhun ndaā. ⁷ Chi ini andíví íyó únī jeē cácahán ndaā siquī jnúhun yáha: máá Yaā cúu Tátá, jín Yaā cúu Jnūhun, jín Espíritu Santo. Te ndínúní yá, chi ñayuu ni cúu ya. ⁸ Te ini ñayīví suni íyó únī jeē steén ndaā: máá Espíritu, jín jéē ní jendute Jesús, jín jéē ní jeti niñī yā. Te ndínúní yáha, chi ñayuu ni stéén siquī yā. ⁹ Te cájetáhu yó jnūhun cácahán ndaā tēe, te jéhnu ga cúu jnūhun cáhán maá Yaā Dios. Te jnūhun ni cahán yā cúu jnūhun siquī Sēhe ya. ¹⁰ Ñayuu cácandíje jeē Sēhe Yaā Dios cúu Jesús, je ni cacundaā ni i jnūhun yáha jeē ni cáhán Yaā Dios. Te ñayuu jeē tu cácandíje jeē ni cáhán Yaā Dios, nájnūhun cásaáha i jeē Yaā stahú cúu ya, chi tu cácandíje i jnūhun ni cahán ndaā yā siquī Sēhe ya. ¹¹ Te jnūhun ndaā un cúu jeē ní sáha ya jeē cótecu yō ní cáni, te Sēhe ya ndíso jnūhun cotecu yō.

¹² Ñayuu jeē iyó Séhe ya jíin i, je ni nihīn tahú i cotecu i. Te ñayuu jeē tu íyó Séhe ya jíin i, ma nihín tahú i cotecu i.

Jnūhun consejo jeē sándhí

¹³ Jnūhun yáha tée ri nuū rohó ñáyuu cácan díje Séhe Yaā Dios, návāha cucáhnū ni rō jeē ni níhīn tahú rō cotecu rō ní cáni.

¹⁴ Te cucáhnū ni yō Yaā Dios, chi jíin yō jeē núu na vé jicán yō nuū yā jeē suni cúní maá yá, te jíin nahín yá jeē jicán yō. ¹⁵ Te núu jíin yō jeē jíin nahín yá jeē jicán yō, núu súcuan te suni jíin yō jeē sáha ya jeē jicán yō.

¹⁶ Núu ñn ñayuu jíin i jeē sáha jnáhan i cuéchi jeē násūu cuéchi jeē jnahnú ndetū i cúu, te na cácan tahú i nuū Yaā Dios, te cuāha ya jnūhun cotecu jnáhan i, te núu násūu cuéchi jeē sáha jeē jnahnú ndetū i cúu. Iyó cuéchi jeē jnahnú ndetū i sáha, te tu cáhan rī jeē cacán tahú rō jehē ñayuu sáha cuéchi súcuan. ¹⁷ Tācá jniñu néé cúu cuéchi, te íyó cuéchi jeē násūu jéē jnahnú ndetū i cúu.

¹⁸ Te jíin yō jeē tāca ñáyuu cácuu séhe Yaā Dios, tu jíca i jíin cuéchi. Chi Yaā cúu Séhe Yaā Dios, ndíto vāha ya i. Te tú na vé cúu sáha jexeén jíin i.

¹⁹ Te jíin yō jeē séhe Yaā Dios cácuu yó. Te ñayuu ní ñáyīvi yíhi i ndaha jexeén.

²⁰ Te suni jíin yō jeē ní quiji Séhe Yaā Dios, te ni sáha ya jeē jécūhun ni yō, návāha cuni yō ndese Yaā cúu máá Yaā ndaā. Te ndúú yó jíin Yaā ndaā, suu jíin máá Séhe ya Jesucristo. Máá yá cúu ndije Yaā ndaā, te máá yá sáha jeē cótecu yō ní cáni. ²¹ Séhē jijnáhan ró, na cújiyo ró núu tāca jéē násūu Yaā ndaā cúu. Súcuan na cóo. Amén.

CARTA UU JEE NI TEE SAN JUAN APOSTOL

Jnūhun ndaā jín jnúhun cúndáhú ni

¹ Máá ná cúu tēe jéhnú ndíso jníñu, te tēe ná carta yáha cuájeē nuū ni jēe cúu ní hermana ni nacāji Yaā Dios, jín núu séhe ní jínáhan i. Te manī na jín ní jijnáhan ní sáha jnūhun ndaā yā, te nasūu máá-ni ná, chi suni tāca ñayuu jini jnūhun ndaā. ² Te manī na jín ní jijnáhan ní síquī jeē cá candíje yó jnúhun ndaā yā jeē iyó ini anuá yō, te coo jín yó ñí cáni. ³ Te ñúhun ni na jēe Tatá yō Yaā Dios jín Séhe ya Jitoho yō Jesucristo, na sáha ga yā jeē váha níhín, te cundáhú ni yā nihín, te sáha ya jeē coo ndeyí coo sī ni ní, jín jnúhun ndaā jín jnúhun cúndáhú ni.

⁴ Yōhyo ni cusī ni ná, chi ni jini na jēe sava séhe ní cájica i jín jnúhun ndaā, nájnūhun ni ndacu máá Tatá yō Yaā Dios jniñu nuū yō. ⁵ Hermana, cáhan ndahú ná jín ní jeē na cúndáhú ni yō jnáhan yó. Te jnūhun tēe ná yáha cuájeē nuū ní, nasūú ñn jniñu jēe sá ndacu ya cúu, chi jniñu ní ndacu ya nuū yō nde ná ni quejéé yó candíje yó cúu. ⁶ Te jeē cundáhú ni yō jnáhan yó cúu jeē caca yó nájnūhun ni ndacu ya jniñu nuū yō. Te jniñu ní ndacu ya cúu jeē caca ní jín jnúhun cúndáhú ni, nájnūhun ni cajini sōho ní ndé ná ni quejéé ní candíje ní.

Siquī tēe cástáhú

⁷ Chi cuehē tēe cástáhú ni canecoo de ní ñáyiví, te tu cájejnúhún de jeē ní quiji Jesucristo ni nduu ya tēe. Te tēe tu cájejnúhún súcuan, cácuu de tēe stáhú, te cácuu de contra síquī Cristo. ⁸ Coto ní jēe ma snáa ni táhú síquī jniñu váha ni casáha ní, chi sa suhva jeē na níhín ni ndíhi tahū ní.

⁹ Núu ndé ñayuu jñí inga jnūhun, te tu quéndōo i jín jnúhun ni steén Cristo, núu súcuan te tu iyó Yaā Dios jín i. Te ñayuu quéndōo jín jnúhun ni steén Cristo, chi iyó Tatá yō jín i, te suni iyó Séhe ya jín i. ¹⁰ Te núu jinū ñn ñayuu vehe ní, te núu tu quíjnáhan jnūhun stéén i jín jnúhun yáha, te ma cuáha ní jnúhun condee i vehe ní, ni ma cahán ni jnúhun ndeyí ni jín i. ¹¹ Chi

ñayuu cahán jnūhun ndeyí ni jín i, chindéé ñájnáhan jín i síquī jniñu néé casáha i.

Jnūhun sandíhí

¹² Iyó cuehē gā jnūhun cahán na jín ní jijnáhan ní, te tu cúni na tee ná núu tútu jín tinta. Chi ñúhun ni na cuájeē ná coto jnáhan yó, te ndajnūhun yó, návāha cusī ndasí ni yō.

¹³ Tāca séhe cuhū ní, ñahan jeē suni ni nacāji ya, cácahán i jeē sá ndeyí ni ní. Súcuan na cóo. Amén.

CARTA UNI JEE NI TEE SAN JUAN APOSTOL

Jeē jejnūhún de tēe nání Gayo

¹ Máá rí cúu tēe jéhnū ndíso jníñu, te tēe rí carta yáha cuájeē nuū rō, amigo Gayo, chí manī rī jíin ró sáha jnūhun ndaā.

² Nánī mánī, jícan tahu rī jeē vāha na quíhín tācá jníñu sáha ró, jíin jéē na cóo vāha ró, nájnūhun íyó vāha ánuá rō jíin jnūhun ya. ³ Yōhyo ní cusī ní rī ná ní quecoo sava hermano te ní cacastūhún de nuū rī ndese vāha squícu ró táca jníñu ndaā, chí jíca ndaā rō. ⁴ Tuá na inga sáha jeē cúsi gā ní rī, chí máni jeē nihín rī jnūhun jeē cájica ndaā ñayuu cácuu nájnūhun sēhe rí siquī jeē ní scándíje rí i.

⁵ Nánī mánī, yōhyo vāha sáha ró jéē chindéé ñáhán ró tācá hermano, te víhyá gā núu tēe ñuu jíca cácuu de. ⁶ Chí tēe un ní canacani de jnūhun nuū ñayuu cácadíje yáhá, ndese cúndáhú ní rō de. Te jícan rī jeē chindéé ñáhán gá rō de, núu na vé jíni ñúhún de jeē caca ga de ichi nuū quíhín de, nájnūhun nújnahan ní Yaā Dios. ⁷ Chí tēe un ní quendacoo de cájica de siquī jníñu Jesucristo. Te tú na vé cáquihin de nuū ñayuu jeē tu jíni jnūhun Yaā Dios. ⁸ Jeē yúcuan cánuú coto yó de, chindéé ñáhán yó de jeē cánacani de jnūhun ndaā.

Siquī jeē tú vāha sáha Diótrefes

⁹ Je ní tee rí ñin carta nuū ñayuu cácadíje jíñā. Te Diótrefes, tu jétáhú de jnūhun cáhán rī, siquī jeē cuní de cujéhnū máá de nuū i. ¹⁰ Jeē yúcuan, núu na jéé rī te cahán rī nuū de siquī jníñu sáha de, chí yōhyo sájnūhún de te cáhán de jnūhun stáhú síquī rī jíjnahan rí. Te nasūu máá yúcuan-ní sáha de, chí suni tu jétáhú de tācá hermano jéngoo nuū de, te jési de jeē ma cuátáhú ñayuu nuū tācá hermano un. Te ñayuu cájetáhú nuū hermano un, quénehen de i nuū cándutútú ñayuu cácadíje.

¹¹ Nánī mánī, ma ndácu ró ñayuu casáha jníñu néé, chí sa suhva ñayuu casáha jníñu váha. Chí sēhe Yaā Dios cácuu ñayuu casáha

jníñu váha. Te ñayuu casáha jníñu néé, tu cájini i ndese Yaā cúu Yaā Dios.

Jeē cácahán i jeē vāha sáha Demetrio

¹² Táca ñayuu chí cácahán i jeē vāha sáha Demetrio. Te jníñu ndaā jeē sáha de, stéén jeē tēe ndaā cúu de. Te suni súcuan cácahán maá rí, te cájini rō jeē iyó ndaā jnūhun cáhán rī.

Jnūhun sandíhí

¹³ Iyó cuéhē gā jnūhun cahán rī jíin ró, te tu cúní rī tee rí jíin tinta jíin pluma. ¹⁴ Chí ñúhun ní rī cuajeē yachí rí coto jnáhan yó, te ndajnūhun yó.

¹⁵ Te ñúhun ní rī jeē na cóo ndeyí coo síi ní rō. Táca amigo yō yāha cácahán i jeē sándeyí ní rō. Te suni cahán rō jíin ñin ñin amigo jíñā jeē sándeyí ní i, áchí rí, te cocahán yō.

CARTA JEE NI TEE SAN JUDAS APOSTOL NUU ÑAYUU CACANDIJE

¹ Máá rí cúu Judas ñani Jacobo, te mozo Jesucristo cúu rí. Te tée rí carta yáha cuájeē nuū rohó ñáyuu jeē ní cana máá Tátá yō Yaā Dios, te ni sáha ya jeē iyó ndoo íyó lí rō nuū yā jeē cácuu ró ñáyuu manī yā jíin. Te Jesucristo ndíto vāha ya rohó jéē cáyihí ró ndaha ya. ² Te ñúhun ni rī jeē na cúndáhú gá ni yā rohó, te sáha ya jeē coo ndeyí coo sīi ni rō, te coo manī ndasí yá jíin ró, te na ndúcuehē gā tāca jéē yáha nuū rō.

*Siquī tēe cástéén jnūhun stáhú
(2 Pedro 2.1-17)*

³ Nánī mánī, yōhyo ní cuu ni rī tee rí nuū rō siquī jnūhun ni jnama ya rohó jíin rúhū jijnáhan yó. Te ni jini rī jeē cánuú gá tee rí carta jeē stihví ni rī rohó návāha nducú ndeyí ró jeē ma cási ñayuu nuū jnūhun cácandíje yó. Te jnūhun ún chi je ni jēhe ya ñin jínu-ni nuū tāca ñáyuu maá yá. ⁴ Chi sava tēe ni castáhú de rōhó ní quivícoo de mēhñu ró. Te tēe ún chi nde jenahán je cáhán tutu íi jeē jnahnú ndetū de siquī jniñu cásáha de. Cácuu de tēe ndevāha, chi cácahān de jeē vāha ni Yaā Dios, te jeē yúcuan vetū-ni sáha de jniñu néé, cácahān de. Te tu cájejnúhún ndije de Jitoho yō Jesucristo jíin Yaā Dios, jeē mañúhún-ni ya cujéhnu nuū yō.

⁵ Te vijna chi vēsú je cájini vāha ró, te cúní rī jeē na núcūhun ni rō ndese ni sáha máá Jítoho yō. Chi ni jnama ya ñayuu Israel jenahán, ni chindéé ñájnáhan ya i jeē ní jínu i iní ñuu tatú Egipto cuahān i. Te vēsú súcuan te cuéé gá te ni snáa yā sava i jeē tu ní cácandíje i. ⁶ Te suni nucūhun ni rō siquī ndajéhé yā jeē ní castóo jniñu ndíso, te ni castóo nuū ní ndeē andiví. Te Yaā Dios ni chindihyū yā jijnáhan, te cándetu nde quiiji quiví cáhnu jeē sándaā yā jniñu. Te cánuhnī jíin cadena, cáyūcu ní cáni nuū cunú núu néé. ⁷ Te suni ní stóho ya ñayuu ñuu Sodoma jíin ñuu Gomorra jíin sava ga ñuu jeē ní Iyo yajni, chi suni ni casáha néé i nájnūhun ni casáha tācá ndajéhé un ndé jenahán gá. Te

máa i ni cajica jnéni i te ni casáha i tāca cuéchi néé ndasí. Te ni canihín i castigo ñuhūn jeē cayú ní cáni, te súcuan cúu i ñin ejemplo nuū ndihí ñayuu.

⁸ Te tēe cástáhú jeē ní quivícoo mēhñu ró, vēsú cájini de jeē súcuan ni sáha ya, te cájeni cáhá ni de, te cásáha jnéhén de yiquí cúñu de, te cásquéhichí ni de tēe cándacu jniñu Jitoho yō, te cácahān ndevāha de siquī tāca jéē cácujeñnu nuū sucún. ⁹ Te nasūu súcuan ní sáha ndajéhé Miguel, vēsú ndajéhé cujéhnu ga cúu ya. Chi tu ní cáhán ndevāha ya ni tu ní ndácunehen ya cuéchi siquī jexeén ná ni casásáhán jnáhan ya jíin jéxeén un jeē siquí yiquí cúñu Moisés ná ni jihí de. Chi suhva-ni ni cahān yā: Máá Yaā Dios, Yaā cúu Jitoho, cuxeén yā nuū rō, ni achí Miguel. ¹⁰ Te tēe cástáhú yáha chi cácahān neé de siquī tāca jéē tu cájecūhun ni de. Te tāca modo cánevāha de siquī jeē sá cáa de, nájnūhun quiti yúcú jéē sá cáa tí, suu yúcuan sáha jeē jnahnú ndetū de.

¹¹ Nacā xeēn ndoho de núu súcuan, chi tu cájetáhú de Yaā Dios, nájnūhun jeē tu ní jétáhú Caín. Te siquī jeē cáconi de nihín de xūhún te cástéén de jnūhun stáhú, nájnūhun ni sáha Balaam. Te jnahnú ndetū de nájnūhun Coré, tēe ni jihí siquī jeē ní cunihni ni de. ¹² Tēe yáha núu cándutútú de jíin ró jeē cáyeji manī rō, te cásáha de jniñu cúcanu rō. Chi cáyeji cájhi sīi ni de, te tu cásáha de cuenta ndese caji ñinga ñayuu, chi máni máá de ndihví ni de caji vāha de. Te cácuu de nájnūhun vicó íchi jéē stechí táchi. Te suni cácuu de nájnūhun yujnu jeē tu jéhe ndehē maá tiempo. Te cácuu de nájnūhun yujnu jeē ní quenda nde jíin yoho, te tú cuiti gā na modo nane numa. ¹³ Te nájnūhun jeē jisó cóyo ndute mar te cáne tiñū, súcuan jícu de jíin jniñu néé jéē cúu jnūhun canu. Te cácuu de nájnūhun quimi jeē ní sana ichi. Te je íyó túhva nuū néé nuū lúchi jnúú coyūcú de ní cáni.

¹⁴ Te jeē ní yāha iñu yucūn Adán, te ni cacu Enoc, te ni nacaní de jnūhun jeē ni stéén Yaā Dios nuū de siquī tāca tēe yáha, áchí de: Máá Jítoho yō ni steén yā nuū rī jeē ñin quiví te quiiji ya jíin cuéhē mil ñayuu maá yá. ¹⁵ Te sándaā yā jniñu tāca ñáyuu, te snáhnú ndetū yā tāca ñáyuu casáha néé.

Chi máni jniñu néé cásáha i siquī jeē canéé máá i, te cácahān i cuehē jnūhun ndevāha siquī yā. Ni achi Enoc. ¹⁶ Tāca téé yáha máni cácahān sōó de, te cácahān de siquī ñayuu. Te máni jeē cúsiñ ni maá de cánducú de. Te cácahān de jeē téé téyí cácuu de, te cácahān yíñúhún de jíin ñayuu návāha nihīn de jecu nuū i.

Jeē stihví ni Judas ñayuu cácaandíje

¹⁷ Te máá ró jijnáhan ró ñánī mánī, na núcūhun ni rō jnūhun jeē jé ni canacani téé cácuu apóstol maá Jítóho yō Jesucristo.

¹⁸ Chi ni cacahān de: Nde nuū cuándihí quiivī te quiijicoo téé sácatā siquī jnúhun ndaā yā, te sáha de tācá jniñu néé jéé ndíyo ni maá de. Súcuan ni cacastūhún apóstol.

¹⁹ Téé un cúu jeē casásín ñayuu. Te máni cándihví ni de tāca jéé cutíndí ni maá de, chi tu ndéé Espíritu yā jíin de.

²⁰ Te máá ró ñánī mánī, na íje vāha ni rō jíin jnúhun ndoo ndasí jéé cácaandíje ró. Te cacān tahu rō jíin fuerza Espíritu Santo. ²¹ Te quendōo nihin ró jíin jnúhun jeē cundáhú ni Yaā Dios rohó. Te condetu ró quiivī jeē cótecu rō níí cáni sáha máá Jítóho yō Jesucristo siquī jeē cundáhú ni yā rohó.

²² Te sava ñayuu jeē cájeni siquí ni, nducú ró modo scandíje ró i. ²³ Te sava ga i chi nducú ndéyí ró jeē cácu i nuū cuéchi i, jeé nájñūhun stáa ró i nuū ñuhún. Te cundáhú ni rō i jnama ró i, te coto ró máá ró, te cuquini ni rō coto ró nde sahma i jeē ní cujnéhén jíin jniñu néé cásáha i.

Jnūhun cújéhnú Yaā Dios níí cáni

²⁴ Te Yaā Dios chi máñúhún-ni máá yá cúu Yaā ndichí, Yaā jnáma yóhó. Te iyó poder yā jeē coto ya rohó jéé ma quiiví ró cuéchi, jíin jéé sáha ya jeē cuíñi ró núū ndíndēe yá, te quiiví ún coo ndoo ró núū yā, te cusíñ ndasí ni rō sáha ya. ²⁵ Te na cáhán yō jeé yóhyo luu cújéhnú ya siquī jeē ni sáha ya jíin Jítóho yō Jesucristo. Te na cáhán yō jeé cujéhnú téyí yá, te ndácu ya jniñu jíin poder jeé ndíso ya nde jenahán ndasí jíin ndé vijna jíin ndé níí cáni. Súcuan na cóo. Amén.

JNIÑU QUIJI JEE NI JITO NDIJIN SAN JUAN

Jeē ni stéén Jesucristo tācá jniñu quiji

¹ Jnūhun yáha cúu jeē ní cachi Yaā Dios nuū Jesucristo ndese coo tācá jniñu quiji, návāha nacastūhun yá nuū ñáyuu cá candíje jeē cácuu i mozo yā. Te stéén yā nuū i tācá jniñu jeē yachī coo. Te ni tají yá ndajéhé yā ni quiji ya ni stéén ndijin yā jniñu un núu ruhū Juan jeē cúu ri mozo yā. ² Te máá rí cástūhun ndáā rī siquī tāca jéē ní jito ri ún, te nacani ndaā rī jnūhun Yaā Dios jíin jnúhun jeē ní cahān ndaā Jesucristo.

³ Yōhyo ndetū ñayuu cahu tutu yáha, te suni yōhyo ndetū ñayuu cuni nahín jeē cáhu ñayuu tāca jnúhun yáha jeē ní cachi Yaā Dios, te chuhun ni i. Chi je cuacuyajni quivī coo tācá jniñu yósó núu tutu yáha.

Jeē téé Juan carta nuū ndihúxá grupo ñayuu cá candíje

⁴ Máá rí cúu Juan, te téé ri jnūhun yáha cuájeē nuū rohó, ndihúxá grupo ñayuu cá candíje jeē cáyūcu Asia. Te ñúhun ni rī jeē maá Yaā Dios na sáha ga yā jeē váha rohó jíinahan ró, te sáha ya jeē coo ndeyí coo sī ni rō. Chi máá yá cúu Yaā iyó vijna, te ni iyo ya ní cáni, te coo ya ní cáni. Te ñúhun ni rī jeē suni súcuan sáha ndihúxá Espíritu jeē cáhīn ya yuhu mesa nuū ndácu Yaā Dios jniñu. ⁵ Te ñúhun ni rī jeē suni súcuan sáha Jesucristo, Yaā cahán ndaā tāca jnúhun. Te xīhna gā maá yá ni natecu mēhñu ndíyí. Te cújehnu ya nuū tāca rey jeē iyó ñayiví. Te máá yá cundáhú ni yā yohó, te ni nacate ya yohó núu cuéchi yó jíin níñi yā. ⁶ Te ni sáha ya jeē ní nduu yó rey jíin sūtū cájejniñu nuū Tatá yā Yaā Dios. Te na cahán yō jeē yóhyo luu cújehnu ya te jnī ya poder ní cáni. Amén.

⁷ Cuni sōho jíinahan ró, chi ndiji Cristo jíin vícō. Te ndivii ñayuu coto i nuū yā, te nde jíin ñáyuu jeē ní castújí i ya. Te tāca raza ñayuu ní cáhnu ñayiví ndahyū i jeē tu ní cá candíje i ya. Súcuan nahín coo.

⁸ Suhva cahán maá Jítoho yō, Yaā jnī ndihí poder: Máá rí cúu nájnūhun letra A

xīhna ñúhún jíin letra Z jeē sándihí na, chi máá rí ni squejéé ndihí te máá rí sínu, áchí máá Yaā iyó vijna, te ni iyo ya ní cáni, te coo ya ní cáni.

Jeē ní jito Juan jeē cújehnu luu Cristo

⁹ Máá rí cúu hermano rō Juan jíinahan ró. Te inuú-ni ndóho ri jnūndóho jíin ró siquī jeē cá candíje yó Jesucristo, te inuú-ni ndácu Yaā Dios jniñu nuū yō, te inuú-ni jéndeyí ni yō sáha Jesucristo. Te siquī jeē ní nacani ri jnūhun Yaā Dios jíin jéē ní cachi ndaā rī jnūhun Jesucristo, jeē yúcuán ní cajni i ruhū cuenta preso, te ni cachune i ruhū isla jeē naní Patmos. ¹⁰ Te in domingo ni jito ndijin rī jeē ni stéén maá Espíritu Santo nuū rī. Te ni jini sōho ri in jeē cána jee níhin ichi yátá rī nájnūhun jeē tiví trompeta. ¹¹ Te ni cahán jíin rí:

Máá rí cúu nájnūhun letra A xīhna ñúhún jíin letra Z jeē sándihí na, chi máá rí cúu Yaā iyó ndé xīhna ñúhún te coo ri ní cáni. Te na téé ró núu in tutu tāca jéē cóto ró, te tají ró quihīn nuū ndihúxá grupo ñayuu cá candíje jeē cáyūcu i ní cáhnu Asia, suu ini ñuu Efeso, jíin ñuu Esmirna, Pérgamo, Tiatira, Sardis, Filadelfia, jíin Laodicea. Achí.

¹² Yūcuán na te ni ndicó cóto ri jeē cóto ri ndé in cúu jeē cahán jíin rí. Te ná ni ndicó cóto ri te ni jito ri uxā candelero oro. ¹³ Te mēhñu ndihúxá candelero un índichi maá Yaā ní nduu téé. Te ñúhun ya in sahna cáni jeē jinú nde nuū jehé yā. Te núhni in cinturón oro jicā yā. ¹⁴ Te ixi xíní yā chi yaa nájnūhun ixi lánchi, nájnūhun yuhvā volcán. Te tinū ya ndíndēe nájnūhun yáñuhūn. ¹⁵ Te jehé yā xínú jito nájnūhun cāa cuaán jéē ní ndúhvā nuū horno. Te níhin ndasí cáhán yā, nájnūhun níhin cuehē yūte náhnu. ¹⁶ Te ndaváha ya jnī ya uxā quimi. Te yuhu ya quenda jeē cáa nájnūhun espada jeē xeén ndíndúú lado, te suu cúu jnūhun ya jeē niní sándaā yā siquī cuéchi. Te nuū yā cáa nájnūhun niāndii jeē nándii ndaxín.

¹⁷ Te ná ni jito ri yā te ni cotúú rí nuū jéhé yā nájnūhun jeē ní jíhī rī. Te ni soó yá ndaváha ya siquī rī, te ni cahán yā:

Ma yūhu ró. Máá rí cúu Yaā iyó ndé xīhna ñúhún te coo ri ní cáni. ¹⁸ Te Yaā técu cúu ri. Chi ni jíhī rī te ni natecu rī, te vijna chi técu rī ní cáni. Te máá rí

jn̄i poder siqūi cuéhyi jéhni ñayuu jín síqūi lugar nuū cáyūcu ánuá nd̄iyi. ¹⁹ Núu súcuan te tee ró núu tútu táca jéē ní jito ró, jeē cúu vijna jín jéē cóo ichi núú. ²⁰ Te yáha cúu jn̄uhun sāhi síqūi ndihúxá qūimi ní jito ró jn̄i ndaváha ri, jín síqūi ndihúxá candelero oro. Ndhúxá qūimi ún cúu nájn̄uhun ndihúxá jeē cácujuhnu nuū ndihúxá grupo ñayuu cácanđije. Te ndihúxá candelero cúu nájn̄uhun ndihúxá grupo ñayuu cácanđije.

Jn̄uhun cuahān nuū ndihúxá grupo ñayuu cacandije:

Jn̄uhun cuahān ñuu Efeso

2

¹ Tee ró jn̄uhun yáha na quíhín nuū jeē cujéhn̄u nuū ñayuu cácanđije ñuu Efeso: Súcuan cáhán ruhū, Yaā jeē jn̄i ndihúxá qūimi jín ndaváha ri, te jíca cuu ri mēhñú ndihúxá candelero oro. ² Je jíní rī tācá jniñu váha cásáha ró, jeē cándihv̄i ní rō síqūi jn̄uhun ri, jín jéē cájendeyí ní rō. Te jíní rī jeē tu cájēhe ró jn̄uhun qūivicoo ñayuu casáha néé méhñu ró. Te jíní rī jeē ní cajito ndee rō tēe cástáhú jeē cácahān de jeē cúu de apóstol, te ní cajini rō jeē tēe stáhú cácuu de. ³ Te ní cajendeyí ní rō ní candoho ró jn̄undóho, te tu ní ndín̄uu ní rō jeē cácuu ndasí ró jín jniñu ri. ⁴ Te vēsú súcuan te íyó jecu jeē cahán rī nuū rō, chí tuá cáhiyo manī váha ró jín rí nájn̄uhun ní iyo manī rō jín rí qūiv̄i jehé. ⁵ Núu súcuan te nucūhun ní rō ndese ní castóo ró jn̄uhun jeē ní iyo manī rō jín rí, te nacani ní rō, te na sáha ró nájn̄uhun ní casáha ró ndé qūiv̄i ún. Te núu ma nácani ní rō, te yachī jeē rī te stáa ri candelero rō nuū ín, cúu jeē ma cuíñi ga rō jín ñayuu cácanđije. ⁶ Te vēsú súcuan te íyó ñn̄ jeē váha cásáha ró, chí tu cánujnahan cuíti ní rō cájito ró jniñu néé cásáha ñayuu cándiqūn jn̄uhun jeē steén Nicolás. Te suni máa rí tu nújnahan cuíti ní rī jito ri. ⁷ Ñayuu iyó sóho na chúsóhó i jeē cahán maá Espíritu Santo jín táca grupo ñayuu cácanđije. Táca ñayuu jeē cúndeyí síqūi jeneé, cuāha ri jn̄uhun caji i ndehē jeē cúun xinī yújnu jeē sáha jeē cótecu i ní cáni. Te yujnu un ín nuū jardín Yaā Dios nde and̄iv̄i, áchí yá.

Jn̄uhun cuahān ñuu Esmirna

⁸ Te tee ró jn̄uhun yáha na quíhín nuū jeē cujéhn̄u nuū ñayuu cácanđije ñuu Esmirna: Súcuan cáhán ruhū, Yaā jeē iyó ndé xīhna ñuhún te coo ri ní cáni, te ní jihī rī te ní natecu rī. ⁹ Je jíní rī tācá jniñu váha cásáha ró, jín jn̄undóho cándoho ró, jín jéē cándoho ndáhú ró. Te vēsú súcuan te cúcá ró ndih̄i jeē ndíso jn̄uhun ri. Te jíní rī jeē cácahān neé ñayuu síqūi rō jijnáhan ró. Ñayuu un cácahān i jeē ñayuu hebreo, ñayuu maá Yaā Dios cácuu i, te tuú chí cástáhú-ni i, chí sa ñayuu ȳhi ndaha Satanás cácuu i. ¹⁰ Te ma yūhú cuíti rō táca jéē ndoho ró. Chí jexeén je yajni sáha jeē qūivicoo sava ró vecāa jeē cóto ndee rohó jijnáhan ró, te ndoho ró jn̄undóho uxī qūiv̄i. Te na cuíñi nihin ró ndé cuu rō, te cuāha ri premio jeē cótecu rō ní cáni. ¹¹ Ñayuu iyó sóho na chúsóhó i jeē cahán maá Espíritu Santo jín táca grupo ñayuu cácanđije. Táca ñayuu jeē cúndeyí síqūi jeneé, ma nihín i jn̄undóho jeē jnahnú ndetū i cuu i vuelta uū, achí yá.

Jn̄uhun cuahān ñuu Pérgamo

¹² Te tee ró jn̄uhun yáha na quíhín nuū jeē cujéhn̄u nuū ñayuu cácanđije ñuu Pérgamo: Súcuan cáhán ruhū, Yaā jeē névaha espada jeē xeén nd̄indúú lado, te suu cúu jn̄uhun ri jeē sándaā rī síqūi cuéchi. ¹³ Je jíní rī tācá jniñu váha cásáha ró, te jíní rī jeē cáyūcu ró méhñu ñayuu jeē ndácu Satanás jniñu nuū. Te vēsú súcuan te cáh̄in nihin ró jín jn̄uhun ri, te tu ní cánayūhu ró jeē cácanđije ró rúhū, ní qūiv̄i ní jíhī Antipas, tēe ní sqūicu váha ní nacani ndaā jn̄uhun ri. Chí ñuu rō cáyūcu ñayuu cájegniñu nuū Satanás, te ní cajehni i Antipas. ¹⁴ Te vēsú súcuan te íyó jecu jeē cahán rī nuū rō jijnáhan ró. Chí méhñu rohó ñayuu ñuu Pérgamo iyó sava ñayuu cándiqūn jn̄uhun ní steén Balaam. Chí tēe un ní steén de nuū Balac ndese sqūiv̄i de ñayuu Israel cuéchi jeē caji i jeē ní sócō nuū ídolo jín jéē cosíquí ndéē jnáhan i. ¹⁵ Te suni íyó sava ñayuu méhñu ró jeē cácanđije ga i jn̄uhun ní steén Nicolás, te jn̄uhun ún chí tu nújnahan cuíti ní rī. ¹⁶ Núu súcuan te nacani ní rō síqūi cuéchi ró. Chí núu tuú te yachī jeē rī jín espada jeē quéndá yuhu ri, te suu cúu jn̄uhun ri jeē sándaā rī síqūi cuéchi. Te jín yúcuan te stóho ri ñayuu jeē candije ga jn̄uhun néé

un. ¹⁷ Ñayuu iyó sóho na chúsóhó i jnūhun jeē cahán maá Espíritu Santo jín táca grupo ñayuu cácanđije. Táca ñáyuu jeē cúnđeyí síquī jeneé, scáji rī i maná jeē yísahí ichi ándiví. Te suni cuāha ri ñn yuū cuijín núū i, te nuū ún condee ñn síhví jée, te ni ñn ñayuu ma cūni síhví un, chi máá-ni i jeē nihín. Achí yá.

Jnūhun cuahān ñuu Tiatira

¹⁸ Te tee ró jnúhun yáha na quíhín nuū jeē cujéhnú nuū ñáyuu cácanđije ñuu Tiatira: Súcuān cáhán ruhū, maá Séhe Yaā Dios jeē ndíndēe tñūu rí nájnūhun yáñuhūn. Te jehē rī xíñú jító nájnūhun cāa cuaán jēe ni ndúhvā. ¹⁹ Je jíní rī tǎcǎ jniñu váha cásáha ró, chi cácanđáhú ni rō jnáhan ró, te cácanđije nīhin ró ruhū, te cájejnīñu ró núū rī, te cájendeyí ni rō. Te jíní rī jeē vihyá gā cásáha ró vijna vēsú nde quiví jehé. ²⁰ Te vēsú súcuān te iyó jecu jeē cahán rī nuū rō. Chi iyó ñn ñahan mēhñu ró jēe naní Jezabel, te cájehe ró jnúhun stéén ña nuū rō. Te áchí ña jeē nácani ña jnūhun Yaā Dios. Te tuú chi jín jnúhun stéén ña te stáhú ña ñayuu cácanđije jeē cácuu i mozo rī. Te sáha ña jeē casíquí ndēe jnáhan i, jín jēe cáyeji i jeē ni sócō nuū ídolo. ²¹ Te ni jēhe ri tiempo jeē na nácani ni ña, te tu cūni ña nacani ni ña stóo ña jeē casíquí ndēe ña. ²² Núu súcuān te na sáha ri jeē jécāva ña jín cuéhyí. Te táca ñáyuu casíquí ndēe jín ña, suni cuāha ri jnūndóho xeēn nuū i, te núu ma nácani ni i stóo i jniñu née nájnūhun sáha ña. ²³ Te sáha ri jeē cúū ñayuu jeē ni scándije ña. Te súcuān cuni táca grupo ñayuu cácanđije jeē maá rí cúu Yaā jíní ndihí ndese cáa jeē níjnūnī jín ánuá ñayuu. Te cuāha ri yáhu ñn ñn ró núu ndese ni casáha ró. ²⁴ Te sava ga rō jeē cáyūcú ñuu Tiatira, jeē tu ní cájetáhú jnūhun stéén ñahan ún, ni tu ní cájniñi ró jnúhun jeē cácahān i jeē jnūhun sáhi gá Satanás cúu, jín máá ró cahán rī jeē ma tée ga rī inga jniñu síquī rō. ²⁵ Chi máá-ni jeē na quéndōo nīhin ró jín jnúhun ndaā cácanđije ró, te quendōo nīhin ró jín ndé quiví ndíji ri. ²⁶ Táca ñáyuu jeē cúnđeyí síquī jeneé, jín jēe squícu váha jniñu cūni rī nde vijna te nde quiví sándihí, sáha ri jeē cujéhnú i ndacu i jniñu nuū tǎcǎ nacióñ, ²⁷ nájnūhun ni sáha Tátá rī jeē cujéhnú ri

ndácu ri jniñu. Te ndacu nīhin i jniñu nuū tǎcǎ nacióñ. Te nájnūhun cúun yúú i quísi tahú, súcuān squéhichí i ñayuu tu cájendetū nuū rī. ²⁸ Te sáha ri jeē coto i ruhū jeē luu cujéhnú ri quenda ndijin rī, nájnūhun jító i lucero jeē cáne cúnđijin. ²⁹ Ñayuu iyó sóho na chúsóhó i jnūhun jeē cahán maá Espíritu Santo jín táca grupo ñayuu cácanđije. Achí yá.

Jnūhun cuahān ñuu Sardis

3

¹ Te tee ró jnúhun yáha na quíhín nuū jeē cujéhnú nuū ñáyuu cácanđije ñuu Sardis: Súcuān cáhán ruhū, maá Yaā jeē névāha ndihúxá Espíritu Yaā Dios jín ndihúxá quími. Je jíní rī tǎcǎ jniñu cásáha ró, te cácahān ñayuu jeē cátecu rō, te nuū rī chi nájnūhun ndíyi cácuu ró. ² Na nátahū ni rō, te ndejéé nīhin ró jín jniñu jeē jecu na iyó te ndúcú naa. Chi je jíní rī jeē tu squícu váha váha ró núū Yaā Dios. ³ Te na núcūhun ni rō táca jnúhun jeē ní castéén nuū rō. Te cuatáhú ró jnúhun ún te nacani ni rō síquī cuéchi ró. Chi núu tú natahū ni rō, te cuajeē rī nuū rō ñn sanaa-ni nájnūhun jeē ñn sanaa-ni te quíji ñacuñná, te ma cūni rō na hora jinū rī nuū rō. ⁴ Te vēsú súcuān te iyó nahín jecu rō ñuu Sardis jeē tu ní cásáha ró cuéchi, jeē cúu nájnūhun jeē tu ní sájnehén ró sahma ró. Jeē yúcuān cujín yaa coo sahma ró caca ró jín rí, chi ñayuu váha cácuu ró. ⁵ Chi táca ñáyuu jeē cúnđeyí síquī jeneé, cuāha ri sahma cuijín yaa cuhun i. Te ma ndáhva rī síhví i nuū libro jeē yosó síhví ñáyuu cotecu ñí cáni. Te cuajnúhún rí i nuū Tátá rī jín núū tǎcǎ ndajéhé yā. ⁶ Ñayuu iyó sóho na chúsóhó i jnūhun jeē cahán maá Espíritu Santo jín táca grupo ñayuu cácanđije. Achí yá.

Jnūhun cuahān ñuu Filadelfia

⁷ Te tee ró jnúhun yáha na quíhín nuū jeē cujéhnú nuū ñáyuu cácanđije ñuu Filadelfia: Súcuān cáhán ruhū, Yaā ndoo Yaā ndaā, te névāha ri ndacáa rey David. Te máá rí nūne jeē quívi ñayuu nuū ndácu ri jniñu, te ni ñn ma cúu casí, te máá rí jési, te ni ñn ma cúu nune. ⁸ Je jíní rī tǎcǎ jniñu váha cásáha ró. Te ni nune ri nájnūhun ñn yéhyí quívicoo

ró, te ni ñn ma cúu casi. Chi vésú jecu-ni fuerza rō iyó, te ni cacandíje rō jnúhun ri, te tu cájesi rō yuhu ró jéē cácanđíje rō rúhū. ⁹ Te iyó sava ñayuu yíhi ndaha Satanás, te cácahān i jeē ñáyuu hebreo, jíin ñáyuu maá Yaā Dios cácuu i, te tuú chi cástáhú-ni i. Núu súcuan te sáha ri jeē jécóo i nuū rō te jecuiñī yití i nuū rō, te cuni i jeē maní rī jíin ró. ¹⁰ Te vāha ni casquícu rō jnúhun ní cahān rī jeē cuándeýí ni rō. Te jeē yúcuan jnama ri rohó quíivī jeē quíji ñn jnúndóho xeēn síquī ñáyuu ñí cáhnu ñayíiví, jéē cóto ndee ún i jíin náhan i. ¹¹ Te yachī ndiji ri. Núu súcuan te quendōo ñihin ró jíin jnúhun cácanđíje ró, návāha ni ñn ma quénde premio rō. ¹² Tāca ñáyuu jeē cúndeýí síquī jeneé, sáha ri jeē cuu i nájnūhun síhin yuū luu ini templo Yaā Dios maá rí. Te ma cújiyo i nuū ndeé yá un. Te tee ri síhví Yaā Dios maá rí jeneé i, jíin síhví jéé máá rí, jíin síhví ñuu Yaā Dios maá rí. Te ñuu un cúu Jerusalén jeé, te cuun quiji ichi ándiví ndé nuū Yaā Dios maá rí. ¹³ Ñayuu iyó sóho na chúsóhó i jnúhun jeē cahán maá Espíritu Santo jíin táca grupo ñayuu cácanđíje. Achí yá.

Jnúhun cuahān ñuu Laodicea

¹⁴ Te tee ró jnúhun yáha na quíhín nuū jeē cujéhnu nuū ñáyuu cácanđíje ñuu Laodicea: Súcuan cáhán ruhū, maá Yaā cúu jnúhun ndaā, Yaā cúu testigo vāha jeē cahán ndaā. Te máá rí ni sáha ndíhi jeē ni cáhān Yaā Dios jeē na jécóo. ¹⁵ Je jíin rī tēcá jniñu cásáha ró. Te cácuu ró nájnūhun jeē tú mījin ni tú jihní, cúu jeē jecu-ni cácanđíje ró jnúhun ri, te ni tu cájito uhū rō ni tu cándíhvī ni rō síquī. Te nacā jeē váha núu jeē mījin ró chí jéé jihní ró nuū. ¹⁶ Te tuú chi máá yívixī-ni ró, chí ni tu cájito uhū rō ni tu cándíhvī ni rō síquī. Te jeē yúcuan squéhichī rī rohó nájnūhun ñn jeē tésíhi rí jeē séyūhu rí jeē tu nújnahan ni rī. ¹⁷ Te cácahān rō jeē cucá ró, te quéndōo vāha ró, te tu cúmanī ni ñn nuū rō. Te tu cásáha ró cuenta jeē cuécá íi cándoho ró, te ndáhú ndasí ró, te cácuáá ró, te máá ñí lí rō. Te tāca jéé yáha cúní cahān jeē tu cácanđíje vāha ró. ¹⁸ Núu súcuan te cáhán rī jíin ró jeē nuū rī cuaan ró oro jeē ni ndúhvā nuū ñuhún te ni nduu máá nene, te suu cúu jeē sáha ri jeē coo cúcá ndije ró ndíhi jeē ndíso jnúhun ri. Te nuū rī cuaan ró

sahma cuijín cuhun ró, návāha tú cucanu rō jeē maá ñí lí rō, cúu jeē quéndōo ndaā rō sáha ri. Te cuaan ró tájnā nuū rī, quíiví tinūu ró, návāha ndundijin tinūu ró, cúu jeē jecūhun ni rō jnúhun ri. ¹⁹ Tāca ñáyuu jeē cundáhú ni rī, chí cáhán rī nuū i te stóho rī i, návāha na chúhun ni i. Núu súcuan te na cóndíhvī ni rō jíin náhan ró, te nacani ni rō jeē stóo ró cuéchi ró. ²⁰ Cuni sóho, chí ín ri yehyí ánuá rō te cáhán rī. Te núu ndé-ni rohó cuni sóho te nune ró yéhyí ánuá rō, te quíiví ri caji rī staā jíin ró, te suni caji maá ró jíin rí. Te suu cúu jeē cóndee rī anuá rō. ²¹ Tāca ñáyuu jeē cúndeýí síquī jeneé, cuāha ri jnúhun conene i jíin rí nuū mesa nuū ndácu ri jniñu. Chí máá rí suni ni snāā rī poder jeneé, te ni cucōo ri jíin Tátá rī nuū mesa nuū ndácu ya jniñu. ²² Ñayuu iyó sóho na chúsóhó i jnúhun jeē cahán maá Espíritu Santo jíin táca grupo ñayuu cácanđíje. Achí yá.

Tāca jéé cáyūcú andiví cáchiñúhún núu yā

4

¹ Yūcuán na te ni ndacoto ri, te ni jito ri jeē nune ñn yéhyí andiví, te máá Yaā jeē ni cáhān jíin rí jeē xíhna ñúhún, ni cahān tucu jíin rí nájnūhun jeē tívī trompeta. Te ni cahān:

Caa quiji ró yáha, te na stéén rī nuū rō tēcá jniñu jeē cóo ichi núu gā, achí yá.

² Te máá Espíritu Santo ni scóto-ni ya ruhū. Te ni jito ri jeē andiví ín ñn mesa nuū ndácu jniñu, te néne máá yá nuū mesa un. ³ Te máá yá jeē néne yúcuan cáa ya nájnūhun ndíndéé ñn yuū quíyí ndíí chí ñn yuū cuehé ndíí. Te ñn ticō vēhnde ní jicó ndúu yuhu mesa yā, te ndíndéé nájnūhun ñn yuū cuí ndíí. ⁴ Te xiin mesa yā ni jito ri jeē ní jicó ndúu ocō cuñ gā mesa nuū ndácu jniñu. Te nuū mesa un néne ocō cuñ tēe jéhnu cándiso jniñu. Te cáñuhun de sahma cuijín yaa, te xinī de cáñuhun corona oro. ⁵ Te nde nuū mesa nuū ndácu ya jniñu ndíndéé taja te ñhin te cáhán taja. Te ichi núu mesa yā ín ndíhuxá Espíritu Yaā Dios, jeē cáa nájnūhun uxā yití náhnu jeē cayú ñuhún. ⁶ Te ichi núu mesa yā ún suni iyó nájnūhun ñn mar jeē jíto quíyí nájnūhun vidrio.

Te xiin mesa yā un ní jicó ndúū cuūn jeē técu. Te iyó cuéhē tñūū nñí cáhnu ichi núū jíin ichi yátá un. ⁷ Te ñin jeē técu un cáa nájnūhun ndicaha. Te inga cáa nájnūhun stiquī. Te jeē uní chi néé nuū téé. Te jeē cuūn chi cáa nájnūhun yaha chócó jéé jicó núū tachí. ⁸ Te ndicúún jeē técu un iyó íñū ndijēn jeē ñin ñin. Te máni máá tñūū cúu nñí cáhnu nde jíin nñí chíji ndijēn. Te nduú ñuú tu jécuiñī cuiti jeē cahán:

Yaā ñi Yaā ndoo ndasí
cúu máá Jítoho yō Yaā Dios, Yaā jñí ndihi
poder,
Yaā iyó vijna, te ni ñyo yá nñí cáni, te coo ya
nñí cáni.

Achí.

⁹ Chi máni jeē cácahān ndicúún un jéé cújéhnu ndasí máá Yaā jeē néne nuū mesa, Yaā jeē técu nñí cáni cuiti. Te yíñúhún cácahān un jíin yá, te nácuatáhú núū yā.

¹⁰ Te táca jínu jeē casáha súcuan, te ndihócó cuūn tēe jéhnu cándiso jñíñu, cájecuiñī yití de nuū Yaā jeē técu nñí cáni cuiti, cáchiñúhún de ya. Te cástáa de corona de, cájequin de ichi núú jehé mesa yā. Te cácahān de:

¹¹ Jítoho ná te Yaā Dios na cúu ní.
Te vāha ndasí Yaā cúu ní jéé cácahān i jeē luu
cújéhnu ní,
te cáhíyo yíñúhún i nuū ní, te jñí ní ndihi
poder.

Chi máá ní ni sáha ndihi jeē iyó,
te siquī jeē súcuan ni cuu ni máá ní te ni
jecōo ndihi.

Achí de jíjnáhan de.

Jeē ní nune Londe Yaā Dios tutu

5

¹ Yūcuán na te ni jito ri jeē Yaā néne mesa jeē ndácu jñíñu, ndaváha ya jñí ya ñin tutu cáni jeē ní tuu. Te yósó jnúhun ndíndúú lado tutu ún, te ndíhyú jíin úxā sello. ² Te ni jito ri ñin ndajéhé yā jeē ndíso poder, te ni cahān jee:

¿Ndé ñin cúu tēe vāha ndasí jeē cóndiso jñíñu cahnde sello te nune tutu yáha? achí ndajéhé yā.

³ Te ni andiví ni ñayiví ni jeē iyó chíji ñayiví, tu ní ñyo ni ñin jeē cóndiso jñíñu nune tutu ún, ni jeē cóto nuū. ⁴ Te ni ndahyū ndasí rí, chí tu ní ñyo ni ñin jeē cóndiso

jñíñu nune te cahu tutu ún, ni jeē cóto nuū. ⁵ Yūcuán na te ni cahān ñin tēe jéhnu un jíin rí:

Ma ndahyú rō, chí iyó ñin Yaā ndíso jñíñu jeē cahnde yā ndihúxá sello ndihyú tutu, te nune ya. Te máá yá chí iyó cuéhē poder yā, nájnūhun jeē iyó cuéhē fuerza ñin ndicaha. Te ni cacu ya chíji yucūn Judá, jeē cúu yucūn rey David. Te ni snāā yā poder táca jéneé.

⁶ Yūcuán na te ni jito ri Yaā jeē cúu Londe Yaā Dios jeē ní cajehni i te ni natecu. Te Londe un íin ya nuū íin mesa Yaā Dios, mēhñū ndicúún jeē técu, jíin tēe jéhnu cándiso jñíñu. Te iyó úxā ndiqui jíin úxā tñūú Londe ún. Te tñūú un cúu ndihúxá Espiritu Yaā Dios jeē ní tají yá ni jengoo nñí cáhnu ñayiví. ⁷ Te Londe un ní jequihin ya tutu jeē jñí ndaváha Yaā jeē néne nuū mesa. ⁸ Te ná ni quihin ya tutu ún, te ndicúún jeē técu jíin ndihócó cuūn tēe jéhnu cándiso jñíñu, ni cajecuiñī yití núū yā. Te ná ñin ná ñin tēe jéhnu un cándaha yaa jeē naní arpa, jíin cóhō cūu oro jeē ñúhun chitú súje cutú. Te sūje cutú un cúu máá táca jnúhun jeē cájicān tahu ñayuu yáhi ndaha Yaā Dios.

⁹ Te ni cajita de ñin yaa jeé, te suhva cáhān: Vāha ndasí Yaā cúu ní jéé quihin ní tutu te cahnde ni sello jeē ndihyú.

Chi ni cajehni i níhín, te jíin níñi ni ní nacuaan ní ñayuu

mēhñu táca raza, táca yuhu, táca ñuu, táca nación, návāha cuu i ñayuu Yaā Dios.

¹⁰ Te ni sáha ní jéé cuu i rey jíin sūtū nuū Yaā Dios,

te ndacu i jñíñu ini ñayiví.

Achí de cájita de.

¹¹ Te ni jito ga rí, te ni jini sōho ri jeē cácahān cuehē ndajéhé yā jeē ní cajicó ndúū xiin mesa yā, jíin xiin ndicúún jeē técu, jíin xiin tēe jéhnu cándiso jñíñu. Te iyó cuéhē ndasí millón ndajéhé un. ¹² Te suhva ni cacahān jee ya:

Vāha ndasí Yaā cúu Londe jeē ní cajehni i.

Te jeē yúcuan jñí ya poder, te yōhoyo cúca yá, te yōhoyo ndíchí yá, te ndíso ya cuehē fuerza, te cáhíyo yíñúhún ndihi nuū yā, te luu

cújéhnu ya,
te cácahān i jeē vāha ndasí Yaā cúu ya.

Achí.

¹³ Te suni ni jini sōho ri jeē cácahān ndihī jeē ni sāha Yaā Dios jeē iyó ini andiví jíin ini ñayiví jíin chíji ñayiví jíin ini mar. Te ndivii un ní cacahān:

Cúsiñ ni yō cahán yō jeē yóhyo vāha Yaā cúu máá Yaā néne mesa nuū ndácu ya jniñu,

jíin Yaā cúu Londe Yaā Dios.

Te na cóo yíñúhún yó núu yā, chí cújéhu luu ya,

te jniñi ya poder niñi cáni cuiti.

Achí.

¹⁴ Te ni cacahān ndicúún jeē técu:

Súcuan na cóo, áchí.

Te ndihócó cuñ tēe jéhu cándiso jniñu ni cajecuiñi yití de, te ni cachiñúhún de nuū Yaā jeē técu niñi cáni cuiti.

Siquí ndihúxá sello

6

¹ Yūcuán na te ni jito ri jeē Yaā cúu Londe Yaā Dios, ni jehnde yā ñn jeē uxá sello un. Te ni jini sōho ri jeē cahán ñn jnáhan ndicúún jeē técu ún, nájnūhun cáhán taja:

Nehen te cuni rō.

² Te ni ndacoto ri, te ni jito ri ñn caballo cuijín. Te jeē yosó síquī tī un ndáhá ñn arco jeē stáva nduva. Te ni jecūhun ñn corona xinī. Te ni quenda ni jéjnáhan, te ni cundeyí síquī ndihī.

³ Yūcuán na te Londe un ní jehnde yā sello uū. Te ni jini sōho ri jeē cahán inga jnáhan ndicúún jeē técu:

Nehen te cuni rō.

⁴ Te ni quenda ñn caballo cuehé, te jeē yosó síquī tī ndiso jniñu jeē snáá jnūhun cáyūcu máni ñayuu ñayiví, te quejéé i cahni jnáhan i. Te ni nihīn ún ñn espada cáhnu.

⁵ Yūcuán na te Londe un ní jehnde yā sello unī. Te ni jini sōho ri jeē cahán inga jnáhan ndicúún jeē técu:

Nehen te cuni rō.

Te ni ndacoto ri, te ni jito ri ñn caballo jnuú. Te jeē yosó síquī tī ndáhá ñn balanza jeē chícuāha, chí coo jnamā xeēn. ⁶ Te méhñú ndicúún jeē técu un ní jini sōho ri ñn jeē cahán:

Máá ñn kilo-ni trigo nihīn i jíin yáhu i jeē sájniñu i ñn quiví. Te núu cebada, te unī-ni kilo nihīn i jíin yáhu i jeē sájniñu i ñn quiví.

Te aceite jíin vino chí ma sāha ró jeē cúmanī. Achí.

⁷ Yūcuán na te Londe un ní jehnde yā sello cuñ. Te ni jini sōho ri jeē cahán tucu inga jnáhan ndicúún jeē técu:

Nehen te cuni rō.

⁸ Te ni ndacoto ri, te ni jito ri ñn caballo cuaán yaa, te jeē yosó síquī tī cúu máá cuéhyí jéhu ñayuu. Te ichi yátá un ndíquín máá jnūhun jeē quiví ñayuu lugar nuū cáyūcu ánuá ndiyí. Te ndindúú un cándiso jniñu jeē ndóna síquī ñn jeē ndicúún parte ñayiví, te cuu sāha jeē cúu ñayuu jíin guerra, jíin jnamā, jíin cuéhyí xeēn, jíin táca quití xeēn jeē iyó ñayiví.

⁹ Yūcuán na te Londe un ní jehnde yā sello uhūn. Te chíji altar cáhnu ni jito ri anuá ñayuu jeē ní cacandíje jnūhun Yaā Dios te ni canacani ndaā i jnūhun ya, te síquī yūcuan ní cajehni ñayuu i. ¹⁰ Te ni cacana jee ánuá un:

Jitoho ná Yaā Dios, máá ní cúu Yaā ndoo te vāha squícu ní jéé ni jéjnūhun ní. ¿Te nasaa ga tiempo coo te sándaā ni jéhē ná, te nacūaha ní jéé ndútahū ñayuu ñayiví jéé ní cajehni sáñá? áchí.

¹¹ Yūcuán na te ni jēhe ya sahma cuijín cūhun i jíjnáhan i, te ni cahán yā jíin i jeē na ndétátú i jecu gā tiempo. Chí íyó gá hermano i jeē cájejniñu nuū yā, jeē suni jini ñúhún cuu i návāha jíinu número i, áchí yá.

¹² Yūcuán na te Londe un ní jehnde yā sello iñū. Te ni jito ri jeē ni jnáa ndasí. Te ni cujnuú níandii nájnūhun ñn sahma jnuú. Te niñi yóo ni nduu nájnūhun niñi.

¹³ Te quimi andiví ní níngoyo nuū ñūhun nájnūhun níngoyo ndehē yihí yujnu higo sāha tachí níhin. ¹⁴ Te andiví ní cujiyo cuahān nájnūhun jeē nátuu ñn tutu cáhnu. Te táca yucu jíin táca isla ni cujiyo cuangoo inga lado. ¹⁵ Te táca rey ñayiví, jíin jéé cácujeñu, jíin jéé cucá, jíin táca capitán, jíin jéé cándiso poder, jíin mozo jeē ní cajeen ñayuu, jíin tēe casájniñu cuenta maá, ní cachisāhi máá ini yaū cava jíin méhñu cava chíji yucu. ¹⁶ Te ni cacahān i jíin yucu jíin cava:

Ndicó cáva síquī rī, na quísāhi rí návāha tú coto máá Yaā néne mesa ndácu jniñu, jíin Yaā cúu Londe jeē cuáha ya castigo xeēn ruhū. ¹⁷ Chí ni quee maá quiví cáhnu jeē

cuáha ya castigo, ¿te ndé ñn canda condichi nuū yā? achí i jijnáhan i.

Ñayuu tāca yúcūn Israel jeē ni jécondee sello jneē

7

¹ Te ná ni cuu jniñu yáha, te ni jito ri cuūn ndajéhé yā jeē cáhīn ndicúún lado ñayiví. Te cájesi yā nuū ndicúún tachī, návāha ma quée nuū ñúhun ni nuū mar ni nuū ní ñn yujnu. ² Te suni ni jito ri inga ndajéhé yā, vēji ichi núū cáne niāndii. Te ndáhá yá sello Yaā Dios, Yaā técu. Te ni cahān jee ya jiín ndicúún ndajéhé un jéē ndíso jniñu jeē sáha daño nuū ñúhun íchi jiín núū mar:

³ Ma sáha ró daño nuū ñúhun ni nuū tāca yujnu ni nuū mar, chi nde na tēe yó sello jneē tāca ñayuu cájejniñu nuū Yaā Dios yō.

⁴ Te ni jini sōho ri jeē achí jéē iyó ciento uū xico cuūn mil ñayuu jeē ni jécondee sello jneē. Te ñayuu un cácuu tāca yúcūn ñayuu Israel. ⁵ Te íyó úxī uū mil ñayuu cácuu yucūn Judá jeē ni jécondee sello, jiín úxī uū mil yucūn Rubén, jiín úxī uū mil yucūn Gad, ⁶ jiín úxī uū mil yucūn Aser, jiín úxī uū mil yucūn Neftalí, jiín úxī uū mil yucūn Manasés, ⁷ jiín úxī uū mil yucūn Simeón, jiín úxī uū mil yucūn Leví, jiín úxī uū mil yucūn Isacar, ⁸ jiín úxī uū mil yucūn Zabulón, jiín úxī uū mil yucūn José, jiín úxī uū mil yucūn Benjamín. Ndihi yucūn yáha cúu jeē ni jécondee sello.

Ñayuu cuehē jeē cáñuhun sahma cuijín

⁹ Te ná ni cuu jniñu yáha te ni ndacoto ri, te ni jito ri cuehē ndasí ñayuu. Te cúu i ñayuu tāca nación jiín tāca raza jiín tāca yuhu jiín tāca ñuu. Te cáhīn i nuū mesa nuū ndácu Yaā Dios jniñu jiín núū maá Yaā cúu Londe. Te siquī jeē cuehé ndasí i, te ni ñn ma cúu cahu nasaa i cúu. Te cáñuhun i sahma cuijín, te cándahá i ñuu. ¹⁰ Te ni cacana jee i:

Yaā Dios maá yó cúu jeē ní jnama yóhó, Yaā jeē néne nuū mesa jeē ndácu jniñu, jiín Yaā cúu Londe Yaā Dios.

Achí i jijnáhan i. ¹¹ Te ndihi ndajéhé ni cajicó ndúu yā cáhīn ya xiin mesa Yaā Dios, jiín xiin tēe jéhnun cándiso jniñu, jiín xiin ndicúún jeē técu. Te ni cajecuiñi yití yá ni

cachiñúhún yá Yaā Dios ichi núū mesa yā.

¹² Te ni cacahān yā:

Amén. Cúsī ni yō cahán yō jeē yóhyo vāha Yaā cúu Yaā Dios maá yó.

Te luu cújéhnun ya te ndíchí yá.

Te na nácuatáhú yó nuū yā, te na cóo yíñúhún yó núū yā.

Chi jniñi ya poder, te ndíso ya cuehē fuerza jeē ní cáni cuiiti. Amén.

Achí tāca ndajéhé yā.

¹³ Yūcuán na te ni cahān ñn tēe jéhnun un jiín rí:

¿Ndé ñayuu cúu yáha jéē cáñuhun sahma cuijín, te ndé chi véjicoo i?

¹⁴ Te ni cahān rí jiín de:

Máá ní cúu jeē jini, Tátā.

Te ni cahān de jiín rí:

Yáha cácuu ñayuu jeē ní cayāha i jeē ní cajito i jnūndóho xeēn. Te ni canacate i sahma i jiín níñi maá Londe, te ni nduyaa vāha, cúu jeē ní ndundoo ánuá i ni sáha ya. ¹⁵ Jeē yúcuan cúu jeē cáhīn i nuū mesa nuū ndácu Yaā Dios jniñu, te cájejniñu i ini templo yā nduú ñuu. Te Yaā jeē néne nuū mesa, coto ya i jeē quéndōo vāha i nuū yā.

¹⁶ Te ma cúu gā i sōco, te ma jichí gā i ndute. Te ma cayú gā i nuū niāndii, ni ma ndóho ga i jeē jihní. ¹⁷ Chi máá Yaā cúu Londe jeē néne nuū mesa jeē ndácu jniñu, coto ya i nájñuhun jeē cúu i lanchi ya. Te condeca ya i quihīn yā jiín i nuū cáne ndute jeē cótecu i sáha. Te Yaā Dios nacuaa yā ndute núu i jijnáhan i, te ma ndahyú gā i. Achí tēe jéhnun ún.

Siquī sello uxā jiín cohō cūu oro

8

¹ Te Londe un ní jehnde yā sello uxā jeē ndihyú tutu ún, te nayúu-ni ni iyo ini andiví nájñuhun sava hora. ² Te ni jito ri ndihúxá ndajéhé jeē cáhīn nuū Yaā Dios. Te ni cajēhe uxā trompeta nuū ndajéhé un. ³ Yūcuán na te ni quee inga ndajéhé, ndáhá yá ñn cohō cūu oro, te ni jecuiñi yā nuū altar. Te ni jēhe cuehē sūje cutú núu yā, návāha socō yā jiín jnúhun cájicān tahu ndihi ñayuu cácandije Yaā Dios. Te ni socō yā nuū altar oro jeē índichi ichi núu mesa nuū ndácu Yaā Dios jniñu. ⁴ Te nuū cohō cūu jniñi ndajéhé un ní cane ñuhmā sūje cutú,

ni caa nuū Yaā Dios nde jín jnúhun cájicān tahuñayuu cáccandíje Yaā Dios. ⁵ Yūcuán na te ni quihin ndajéhé un cóhō cūú un. Te ni scutú yá tícuā ñuhūn jeē cayú nuū altar. Te ni jete yā nde ini ñayíví. Te ni sáha jeē ni cáhān taja, te ni ñihin, te ni ndindéé taja, te ni jnāa.

Jnúhun síquī trompeta

⁶ Yūcuán na te ndihúxá ndajéhé jeē cándāhá ndihúxá trompeta, ni casátūhva ya jeē tiví yā.

⁷ Te ndajéhé ñin ni tiví yā trompeta. Te ni cuun ñíñí ini ñayíví jín ñuhūn jeē ni sácā núu jín ñíñí. Te ni cayū ñin jeē uní parte ñayíví, jín ñin jeē uní parte yujnu, jín ñin jeē uní parte ite cuí.

⁸ Te ndajéhé uū ni tiví yā trompeta. Te ñin nájnūhun ñin yucu cáhnu jeē cayú ñuhūn ni ñingava cuahān nuū mar. Te ñin jeē uní parte mar ni nduu ñíñí. ⁹ Te ni jihí ñin jeē uní parte quíñí ñuhūn nuū mar. Te ni naa cuehē barco, chi ñin ñin jeē tāca úní ni naa.

¹⁰ Te ndajéhé uní ni tiví yā trompeta. Te ni ñingava ñin quíñí cáhnu ichi ándiví, te cáyú nájnūhun cáyú ñin yití cáhnu. Te ni ñingava síquī ñin ñin jeē tāca úní yūte jín núu cáne ndute. ¹¹ Te quíñí un nání quíñí uvuā. Te ñin jeē uní parte ndute ni cuu uvuā. Te ni cajihí cuehē ñayuu ni sáha jeē ní cuu uvuā ndute ún.

¹² Te ndajéhé cuūn ni tiví yā trompeta. Te ñin jeē uní parte niándii jín yóo jín quíñí ni tiví. Te ni ndunee ñin jeē uní parte í, te tuá ni cúndijin ñin jeē uní parte nduu jín ñuu.

¹³ Te ni ndacoto ri, te ni jini sōho ri jeē cána jee ñin ndajéhé yā jeē ndáva cuahān sava andiví:

Nacā xeēn gā ndoho ñayuu cáyucú ini ñayíví, chi je yajni cuecu uní gā trompeta jeē tiví uní gā ndajéhé, achí yá.

9

¹ Te ndajéhé uhūn ni tiví yā trompeta. Te ni jito ri jeē ichi ándiví ní ñingava ñin quíñí nde ini ñayíví. Te nuū quíñí un ní jēhe ndacáa jeē núne túhnchi cúnú ndasí.

² Yūcuán na te ni nune un túhnchi, te ni cane ñuhmā ni caa nájnūhun ñuhmā ñin ijnū cáhnu. Te ñuhmā un ní sáha jeē ní cunee niándii jín ní núu tachí. ³ Te nuū ñuhmā un

ní canecoo tíca ndicuéhyí, ni jitē núu ti ní cáhnu ñayíví. Te ni jēhe ya jnúhun jeē sáha ti nájnūhun cásahta tisuhma xeēn jeē iyó ini ñayíví. ⁴ Te ni ndacu ya jniñu nuū tí jeē ma sáha ti daño ite jín yúcū cuí jín yujnu, chi máni ñayuu jeē tu ndéé sello Yaā Dios jneē i cúu jeē tuu tí. ⁵ Te tu ní jēhe ya jnúhun jeē cáhni tí ñayuu, chi máni jeē stóho tí i uhūn yoō. Te sáha tí jeē jetú i nájnūhun jeē jetú ñayuu jeē túu tisuhma i. ⁶ Te quíñí ún nducú ndasí ñayuu modo cuu i, te ma ñihin i modo. Te vésú cuní i cuu i, te tú na modo cuu i.

⁷ Te tíca ndicuéhyí un cáa tí nájnūhun caballo jeē cáhíyo túhva quingoo nuū cuájñahan. Te xiní tí ñuhūn nájnūhun corona oro. Te nēe tí nuū té. ⁸ Te iyó ixi tí jeē cáa nájnūhun ixi xíní ñahan. Te jnúhun tí cáa nájnūhun jnúhun ndicaha. ⁹ Te ní tí ndihyú nájnūhun sahma cáa. Te ñihin ndijēn tí nájnūhun ñihin jeē cuángoo cuehē caballo nuū guerra cáñuhun tí carreta. ¹⁰ Te suhmā tí ndíso iñu nájnūhun tisuhma. Te jín súhmā tí cuu stóho tí ñayuu uhūn yoō. ¹¹ Te iyó ñin jeē cujéñnu nuū tí, te suu cúu ndajéhé jexeén jeē ndíto túhnchi cúnú ndasí un. Te ndajéhé un yuhu hebreo naní Abadón, te yuhu griego naní Apolión, jeē cuní cahān maá jēe snāa.

¹² Je ni yāha ñin jnúndóho, te iyó úu gā jnúndóho jeē quíji.

¹³ Te ndajéhé iñu ni tiví yā trompeta. Te ni jini sōho ri ñin jnúhun jeē ni cáhān nde mēhñú ndicúún yiquí altar oro jeē íin nuū Yaā Dios. ¹⁴ Te ni cahān un jín ndajéhé iñu jeē ndahá trompeta:

Nandají ró ndicúún ndajéhé jeē nuhní yuhu yúte cáhnu jeē naní Eufrates, achí.

¹⁵ Te ni nandají ndicúún ndajéhé un, návaha cahni ñin jeē uní parte ñayuu ñayíví. Chi je cáhíyo túhva ndajéhé un jeē síquí maá hora jín quíñí jín yóo jín cuíyā jeē cóo súcuan. ¹⁶ Te ni jini sōho ri jeē achí jēe iyó úu ciento millón soldado jeē cáyoso caballo.

¹⁷ Te ni steén gā yā nuū rí, te ni jito ndijin rí tācá caballo. Te tēe cáyoso síquí tí cáñuhun de camisa cáa jeē cuehé, jeē ndeé, jín jēe cuaán. Te xiní caballo un cándāa nájnūhun xiní ndícaha. Te yuhu tí quenda ñuhūn jín ñuhmā jín azufre. ¹⁸ Te jín úní jeē quenda yuhu caballo un, te ni jihí ñin jeē

uní parte ñayuu, suu jíin ñúhūn jíin ñúhmā jíin azufre. ¹⁹ Chi yuhu ti jíin súhmā tī iyó fuerza jeē cáhni tī ñayuu. Chi suhmā tī cándāa nájñūhun coō, te iyó xínī, te jíin yúcuān stóho ti ñayuu.

²⁰ Te sava ga ñayuu jeē tu ní jíhí jíin táca jnūndóho yáha, tu ní nácani ni i stóo i ídolo jeē ní casáha i. Te tu ní stóo i jeē cáchiñúhún i táca táchī jíin ídolo jeē ní cuvāha jíin oro jíin plata jíin cáa cuaán jíin yūu jíin yujnu. Te táca un chi tu cúu coto, ni tu cúu cuni sōho, ni tu cúu caca. ²¹ Te ni tu ní canacani ni i stóo i jeē jéhni i ndīyí, jíin jéé satásí i, jíin jéé jíca jnéni i, jíin jéé sacuíhná i.

Ndajéhe jeē ndahá libro lulí

10

¹ Te ni jito ri inga ndajéhe yā jeē ndíso poder, ni cuun ya ichi ándiví. Te ñúsúcún yá vicō, te xínī yā ñúhūn ticō vēhndé. Te nuū yā ndíndēe nájñūhun niāndii, te síhin ya cáa nájñūhun uū síhin jeē cáa ná cáa ñuhūn. ² Te ndahá yá ñn libro lulí jéé núne. Te ni jeni ya jehē váha ya nuū mar, te jehē jecó yá nuū ñúhūn íchi. ³ Te ni cana jee téyí yá, nájñūhun jeē ndahyú ndicaha. Te ná ni cana jee ya, te ni cacahān uxā taja. ⁴ Te ná ni cacahān uxā taja, te je iyó túhva ri jeē téé ri jñūhun un núú. Te ni jini sōho ri ñn jñūhun ichi ándiví jeē ni cáhān jíin rí:

Chuvāha ró táca jñūhun jeē ní cacahān uxā taja ún, te ma steén rō, ni ma téé ró, áchí.

⁵ Yūcuán na te ndajéhe jeē ní jito ri jeē íin nuū mar jíin núú ñúhūn, ni ndonehen ya ndaha váha ya ichi ándiví. ⁶ Te ni ndacunehen ya síhví máá Yaā jeē técu ní cáni, Yaā ni sáha ándiví jíin ñáyiví jíin mar jíin táca ndihi jeē iyó ini. Te jíin síhví yá un ní cahān teyí ndajéhe:

Ma cucuéé gá jeē jínu ñayiví. ⁷ Chi núu na quéjéé ndajéhe uxā tiví yā trompeta, yūcuán na te squícu-ni Yaā Dios jñūhun sāhi yá, nájñūhun ni castūhun yá nuū táca mozo yā, téé ni canacani jñūhun ya nde jenahán, áchí ndajéhe.

⁸ Yūcuán na te máá jéé ní jini sōho ri jeē ni cáhān ichi ándiví, ni cahān tucu jíin rí:

Cuáhán te quihin ró libro lulí jéé núne jeē ndahá ndajéhe jeē íin nuū mar jíin núú ñúhūn, áchí.

⁹ Te ni jehēn rī nuū ndajéhe un, te ni jicān rī jeē na cuáha ya libro lulí un núú rī. Te ni cahān yā:

Quihin te caji rō. Chi vixí sáha ini yuhu ró nájñūhun ndūxi, te chīji ró chi cuhiyá sáha, áchí yá.

¹⁰ Yūcuán na te ni quihin ri libro lulí jeē ndahá ndajéhe yā, te ni yeji rī. Te vixí ni sáha ini yuhu ri nájñūhun ndūxi. Te ná ni cuu ni yeji rī, te ni jitē iyá ni rī. ¹¹ Te ni cacahān jíin rí:

Cánuú jéé nacani tucu ró jñūhun Yaā Dios, ndese coo síquī ñayuu cuehē ñuu jíin cuéhē nación jeē síin síin yuhu, jíin síquī cuehē rey cándacu jniñu, áchí jíin rí.

Siquí uū testigo yā

11

¹ Yūcuán na te ni cajēhe ñn yujnu nuū rī, jeē cúu ñn cūhva jeē chícuāha. Te ni cacahān jíin rí:

Ndocuñī te chicuāha ró templo cáhnu Yaā Dios jíin altar, te cahu ró nasaa ñayuu cúu jeē cáchiñúhún núú yā yūcuán. ² Te ma chícuāha ró patio yatā templo. Chi je ni jēhe ya nuū ñáyuu táca ñuu jicá. Te coyūcú i ini ñuu íi yāhá, te uū xico uū yoō cueñū i síquī ñuu. ³ Te tají rí uū testigo rī jeē nácani jñūhun ri mil uū ciento uní xico quiví. Te cuhun de sahma ndáyí jéé cácuquíhá ni de síquī cuéchi ñayuu, áchí yá.

⁴ Te ndíndúú testigo un cúu nájñūhun ndíndúú yujnu olivo jíin ndíndúú candelero jeē íin nuū Yaā Dios, Yaā chíí ñayiví. ⁵ Te na-ni ñayuu núu nducú sáha ndevāha jíin ndíndúú testigo un, te quenda ñuhūn yuhu ndíndúú de, te cayū ndihi ñayuu cájito uhū i de. Te súcuān cuu táca ñáyuu jeē nducú sáha ndevāha jíin de. ⁶ Te iyó poder ndíndúú testigo un jéé cási de jeē ma cúun saū ní tiempo jeē nácani de jñūhun ya. Te suni iyó poder de sáha de jeē nduu niñī táca ndute. Te cuu stíví de ñayiví jíin ndínuū jñūndóho, núu nasaa jínu cácuāni de. ⁷ Te ná ni jínu ni canacani de jñūhun ya, yūcuán na te quenda quití xéén jeē néne tūhnchi ún. Te cuajnáhan jíin ndíndúú de, te cundeyí

jíin de, te cahni de. ⁸ Te nd̄yí ún cava nuū yáhu ñuu cáhnu nuū ní cajehni i máá Jítoho yō jicā cruz. Te ñuu un cácahān yatá i jeē ñuu Sodoma jíin Egipto cúu, siquī jeē xeēn cuēchi íyó ñuu ún. ⁹ Te ñayuu tācá ñuu, tāca yúcūn, tācá yuhu, tācá nación, chi coto i jeē cáva nd̄indúú nd̄yí un únī quiṽi yosáva, te ma cuáha i jnūhun jeē quíndūji. ¹⁰ Te ñayuu ní cáhnu ñayṽi cusī ndasí ni i jeē ní cajihī de, te sáha i vico, te cuáha i regalo nuū jnāhan i. Chi nd̄indúú tée ni canacani jnūhun ya ún, ní casáha de jeē ní candoho ndasí ñayuu ñayṽi. ¹¹ Te jeē yáha unī quiṽi yosáva ún, te Yaā Dios sáha ya jeē nastáa tachī de, te ndonda-ni de. Te yūhú ndasí ñayuu coto i jeē ní canatecu de. ¹² Yūcuán na te cuni sōho de jeē cána jee ichi ándiví:

Caa ró quiijicoo ró ndé yāhá, áchí.

Te ndaa de mēhñu vícō quingoo de andiví, cuni ñayuu cájito uhū i de. ¹³ Te máá hora un jnáa ndasí, te ndicó cáva naa ñn jeē uxí parte ñuu ún. Te jíin ñujnáa ún cuu uxā mil ñayuu. Te tāca gá ñayuu jeē ndóo, yūhú ndasí i, te cahān i jeē cujéhnū Yaā Dios jeē ndeé andiví.

¹⁴ Súcuan yāha jnūndóho uū, te yachī coo jnūndóho unī.

Siquī trompeta uxā

¹⁵ Te ndajéhé uxā ni tiví yā trompeta. Te ni jini sōho ri ni cacahān jee ichi ándiví. Te súcuan ni cacahān:

Tācá nación ñayṽi je ni nuquihi ndaha máá

Jítoho yō Yaā Dios

jíin Cristo jeē ní tají yá.

Te ndacu ya jniñu ní cáni cuiṽi.

Achí.

¹⁶ Yūcuán na te ndihócó cuūn tēe jéhnū cándiso jniñu jeē cánene de mesa de ichi núú Yaā Dios, ni cajecuiñi yití de, ni cachiñúhún de ya. ¹⁷ Te ni cacahān de:

Na cútahū na núú ní, Tátā Yaā Dios,

chi máá ní jniñi ndihí poder,

te cúu ní Yaā iyó vijna, te ni íyo ní ní cáni, te coo ní ní cáni.

Te ni najniñi ní ndiví jeē iyó,

te jíin poder ni ní quejéé ní ndácu ní jniñu nuū.

¹⁸ Ñayuu tācá nación ni caquití ni i siquī ní.

Te vijna chi ni quee quiṽi jeē cuáha ní castigo i,

jíin jéé sándaā ní jniñu tāca ndíyi.

Te cuáha ni táhū nuū tāca mozo ni jéé ní canacani jnūhun ní,

jíin núú tāca ñayuu cájejniñu nuū ní, jíin ñayuu cáchiñúhún núú ní,

cúu ñayuu cácujehnū jíin jéé tuú.

Te vijna te snáhnú ndetū ni ñayuu castiví ñayṽi.

Achí de jíjnāhan de.

¹⁹ Yūcuán na te ni nune templo Yaā Dios jeē iyó andiví. Te ni cajito ñayuu jeē yúcuan íne yejnū jeē ñúhun contrato yā. Te ni ndindéé taja, te níhin, te cáhán taja, te ni jnāa, te ni cuun xeēn ñiñí.

Jnūhun ñahan jíin cóo cáhnu

12

¹ Yūcuán na te ini andiví ní cane ñn jeē nahán náa ni yō jíto yó: ñn ñahan jeē ñúhun ña niāndii nájnūhun sahma, te ín jehē ña siquī yoó, te ñúhun ñn corona xinī ña jeē ndeé uxí uū quiṽi. ² Te ñúhun sēhe ña. Te ni ndahyū cohó ña jeē ndóho ña jéhnū chīji ña jeē scácu ña i. ³ Yūcuán na te ini andiví ní cane tucu inga jeē náa ni yō jíto yó: ñn cóo cuehé cáhnu ndasí. Te íyó úxā xinī tī jíin úxí ndiqui tī. Te ndihúxá xinī tī ñúhun corona. ⁴ Te jíin súhmā tī ni stáa tī ñn jeē uní parte quiṽi jeē iyó andiví, te ni síngoo tī ini ñayṽi. Te ni ine tī nuū ñahan jeē scácu sēhe ún, ndétu tī cocó tī sēhe ña jeē jé yajni cacu i. ⁵ Te ni scácu ña ñn sēhe yí, te sūchi un ní jeconā jeē ndácu níhin i jniñu nuū ndivíi nación. Yūcuán na te ni ndoñúhún sēhe yí ña ún, ni ndaa i cuahān i nde nuū ín mesa Yaā Dios nuū ndácu ya jniñu. ⁶ Te ñahan un ní jinu ña cuahān ña nde nuū ñúhun téhé núú iyó ñn lugar jeē ní sátúhva Yaā Dios. Te yūcuán condee ña níhin ña jeē cáji ña mil uū ciento uní xico quiṽi.

⁷ Yūcuán na te ni cajejnáhan ini andiví. Chi ndajéhé jéhnū ga jeē naní Miguel jíin táca ndajéhé jeē cácuu mozo nuū yā, ni cajejnáhan jíin cóo cáhnu. Te cóo un jíin táca ndajéhé maá, ni cajejnáhan jíin yá. ⁸ Te tu ní cácuñeyí tī, te tuá ní cúu coyūcu tī andiví. ⁹ Súcuan ni cuu jeē ní quenehen ya cóo cáhnu un jéé iyó ndé jenahán ndasí. Te nání tī jexeén jíin Satanás, te máá tī cúu jeē stahú ndihí ñayuu ñayṽi. Te ni scáne ya tī nde ini ñayṽi jíin táca ndajéhé tī.

¹⁰ Yūcuán na te ni jini sōho ri ñn jnūhun jeē cahán jee ichi ándiví:

Je ni quee quiví jeē jínu jnama ya yohó, jíin jéē steén ndijin yā jeē jnñi ya poder, jíin jéē ndácu ya jniñu, jíin jéē ndíso jniñu máá Cristo jeē ní tají yá. Chi je ni quenehen ya maá jéē cahán cuēchi síquī tācá hermano yō. Chi nduú ñuú ni cahán cuēchi síquī i nuū Yaā Dios maá yó. ¹¹ Te ni cacundeyí i síquī Satanás un, ní sáha jnūhun jeē ni jíhī Yaā cúu Londe, jíin jéē ní cacahán ndaā i jnūhun Yaā Dios, jíin jéē tu ní cundáhú ni i máá i, chi ni jēhe i jnūhun candíje i vēsú núu cuu i jeē síquí yā. ¹² Núu súcuan te na cúsi ndasí ni tāca róhó jéē cáyūcú andiví. Te nacá xeēn ndoho tāca róhó jéē cáyūcú ini ñayiví jíin núu mar. Chi ni cuun jexeén ni jinū nuū rō jijnáhan ró. Te quití xeēn ni, chi jíin jeē tuá coo cuehē gā tiempo jeē stahú ñayuu. Achí.

¹³ Te ni jini coō cáhnu ún jéē ni scáne ya maá cuáhán ini ñayiví, te ni jinu ti jíin ñahan ní scácu sēhe yí, jeē xeēn sáha ti jíin ña núu. ¹⁴ Te ni cajēhe uū ndijēn yaha chócó cáhnu nuū ñahan ún, návāha ndava ña quihīn ña lugar ña nuū ñūhun téhé, te cācu ña nuū coō ún. Te yūcuán condee ña unī cuiyā yosáva, te nihīn ña jeē cáji ña. ¹⁵ Te yuhu cóo un ní cane ndute nájnūhun ñn yūte cáhnu, cuahán yatā ña návāha jneni ña. ¹⁶ Te máá ñūhun chi ni chindéé ñáhán ñahan ún, chi ni nune-ni, te ni nungoo yūte jeē ní cane yuhu cóo ún. ¹⁷ Yūcuán na te xeēn ni quití ni coō cáhnu ni jito ti ña. Te cuahán ti cuajnáhan ti jíin táca gá sēhe ña, suu ñayuu casquícu jniñu ndácu Yaā Dios te cácandíje vāha i jnūhun Jesucristo.

Jnūhun síquī uū quití xéén

13

¹ Te ni indichi rī yumár. Te ni jito ri jeē ní cane ñn quití xéén ini mar. Te íyó úxā xinī tī jíin úxī ndiquí ti. Te ndihúxí ndiquí ti ñūhun corona. Te ndihúxá xinī tī ndeé ñn síhví néé jéē quití ni Yaā Dios sáha. ² Te quití xéén jeē ní jito ri ún, cáa ti nájnūhun cuiñí, te ndaha ti cáa nájnūhun ndaha oso, te yuhu ti cáa nájnūhun yuhu ndícaha. Te nuū quití un ní jēhe coō cáhnu poder maá jíin mesa nuū ndácu máá jniñu. Te ni sáha jeē cujéhnu

ndasí quití ún. ³ Te ni jito ri jeē ni tújī ñn xinī tī, jeē jé yajni cuu tī nuú. Te ni nduvāha ti jeē ni tújī tī. Te nahán ní naa ni ñayuu ní cáhnu ñayiví ní jito i, te ni cajetáhú i nuū tī. ⁴ Te ni cachiñúhún i coō cáhnu síquī jeē ni sáha ti jeē cujéhnu ndasí quití xéén un, te suni ni cachiñúhún i quití xéén un. Te ni cacahán i:

Tú ni ñn jeē cujéhnu nájnūhun quití yáha, te tú ni ñn cundeyí cuajnáhan jíin tī, áhí i jíjnáhan i.

⁵ Te tu ní jési ya jeē cahán tī jeē quití téyí cúu ti, jíin jéē cahán ndevāha ti síquī yā. Te ni nihīn jniñu ti jeē ndácu ti jniñu uū xico uū yoō. ⁶ Te ni quejéé tī ni cahán ndevāha ti síquī Yaā Dios, jíin síquī síhví yá, jíin síquī nuū ndeé yá, jíin síquī tāca jéé iyó andiví.

⁷ Te tu ní jési ya jeē cuajnáhan ti jíin ñayuu maá Yaā Dios, te cundeyí tī jíin i. Te suni ni nihīn jniñu ti jeē ndácu ti jniñu nuū ñayuu tāca yúcūn, tācá ñuu, tācá yuhu, tācá nación.

⁸ Te ñayuu ní cáhnu ñayiví jéē tu yósó síhví i nuū tútu, ni cachiñúhún i quití xéén un. Te Yaā cúu Londe jeē ní cajehni i, máá yá névāha tutu un jéé yosó síhví ñayuu cotecu ní cáni, te je yósó síhví i nde quiví ni jécōo ñayiví.

⁹ Ñayuu iyó sóho na chúsóhó váha i jnūhun cahán rī yāhá. ¹⁰ Tāca ñayuu jeē sáha jeē quiví jnáhan vecāa, suni vecāa cone máá i. Te tāca ñayuu jeē jéhni jnáhan jíin espada, suni jíin espada cuu maá i. Núu súcuan te ñayuu maá Yaā Dios chi jíni ñūhún cuandeyí ni i jíin jnúndóho te ma jécuiñí i candíje i jnūhun cúndáhú ni yā i.

¹¹ Yūcuán na te ni jito ri inga quití xéén jeē ní cane chíji ñūhun. Te íyó uū ndiquí ti jeē cáa nájnūhun ndiquí lánchi. Te nájnūhun tachí coō cáhnu, súcuan tachí cahán tī. ¹² Te nájnūhun ndácu quití xéén xīhna ñūhún jniñu, suni súcuan ndácu quití uū ún jniñu, ín ti nuū quití xīhna ñūhún. Te quití uū sáha ti jeē chiñúhún táca ñayuu ní cáhnu ñayiví nuū quití xīhna ñūhún, quití ní tújī jeē jé yajni cuu tī te ni nduvāha ti. ¹³ Te quití uū suni sáha tācá jniñu jéhnu jeē nahán náa ni yō jíto yó. Chi ni scúun ti ñūhún ichi ándiví ní quiji ini ñayiví, ní cajito ñayuu. ¹⁴ Te ni stahú tī ñayuu ñayiví jíin táca jniñu jéhnu jeē ni nihīn tī poder jeē sáha ti, jíto jínūu quití xīhna ñūhún. Te ni ndacu ti

jniñu jeē na sāha ñayuu imagen quitī xihna ñúhún, quitī ní tújī jíin espada, jeē jé yajni cuu tī te ni nduvāha tī. ¹⁵ Te quitī uū ni nihīn tī poder jeē chutáchí tī xijnī imagen quitī xihna ñúhún, návāha cuu cahān, te cahni tāca ñáyuu jeē tu cájetáhú i chiñúhún i máá. ¹⁶ Te tāca ñáyuu kujéhu jíin ñáyuu tu cújéhu, tāca ñáyuu cucá jíin ñáyuu ndahú, tāca ñáyuu sájniñu cuenta maá jíin mozo jeē ní cajeen ñayuu, ni sāha tī jeē ní jécondee ñn jnunī ndavāha i chí jnéē i. ¹⁷ Te ni ñn ñayuu ma cúu cuaan i xícó i te núu tu ndíso i jnunī jeē cúu síhví tī chí jnúnī número jeē cúu síhví tī. ¹⁸ Jnūhun ndíchí cúu jeē cahān rī yāhá: Tāca ñáyuu jécūhun vāha ni cuu tava i cuenta número quitī xéén un, chí número un cúu síhví ñn tēe. Te número un cúu iñū ciento unī xico iñū.

Yaa jeē cájita 144,000 ñayuu

14

¹ Yūcuán na te ni ndacoto ri, te ni jito ri jeē ín máá Yaā cúu Londe xinī yucu Sión. Te cáhīn ciento uū xico cuñ mil ñayuu jíin yá. Te jneē i ndéé síhví máá yá jíin síhví Tátá yā Yaā Dios. ² Te ni jini sōho ri jeē ñhīn ndasí ichi ándiví, nájñūhun jeē jíca cuehē yūte chí jeē cahān nihīn taja. Te jeē ñhīn un sāha nájñūhun jeē cátee cuehē ñayuu yaa jeē naní arpa. ³ Te cáhīn i ichi núu mesa nuū ndácu Yaā Dios jniñu, jíin núu ndicúún jeē técu, jíin núu ndihócó cuñ tēe jéhu cándiso jniñu. Te ni cajita i ñn yaa jeé. Te ni ñn ñayuu tu cúu cutūhva i yaa ún, chí máni máá ciento uū xico cuñ mil ñayuu jeē ní jnama ya i ini ñayiví. ⁴ Te tāca tēe yāha cácuu jeē tu ní casáha cuēchi jíin ñahan casáha néé, chí tēe ndoo ánuá cácuu de. Te cándiquīn de Londe ndé-ni cúu-ni nuū cuahán yā. Chi ni jnama ya de ini ñayiví, te máá de cácuu tēe jeē xihna gā ni cacandíje nuū Yaā Dios jíin núu Yaā cúu Londe. ⁵ Te tú cuiti na jñūhun stáhú cácahān de, chí tēe ndoo ánuá cácuu de, cáhīn de nuū mesa Yaā Dios.

Jñūhun jeē ní cacahān ndinúni ndajéhé yā

⁶ Yūcuán na te ni jito ri inga ndajéhé yā jeē ndáva cuahān sava ándiví. Te ndíso ya jñūhun jeē jnama Yaā Dios ñayuu cotecu i ní cáni. Te ni nacani ya jñūhun un núu tāca ñáyuu ní cáhnu ñayiví, nuū ñáyuu tāca

nación, tāca yúcūn, tāca yuhu, tāca ñuu. ⁷ Te ni cahān jee ya:

Conso iyo ró núu Yaā Dios, te na cáhán rō jeē yóhyo cújéhu ya, chí je ni quee quiví jeē sándaā yā siquī rō ndese ni casáha ró. Te na chíñúhún ró yā, chí máá yá ni sāha ándiví jíin ñayiví jíin mar jíin táca núu cáne ndute, áchí ndajéhé yā.

⁸ Yūcuán na te ndíquín inga ndajéhé yā vēji, te ni cahān yā:

Je ni naa iñ ñuu teyí Babilonia. Chi ni sāha jeē ñáyuu tāca nación casíquí ndéē i Yaā Dios jeē ní castóo i ya te cándiquīn i ídolo jíin táca jniñu néé, áchí ndajéhé uū.

⁹ Yūcuán na te ndíquín inga ndajéhé unī vēji, te ni cahān jee ya:

Xeēn coo siquī ñayuu cáchiñúhún quitī xéén jíin imagen tī, te jéhe i jñūhun condee jnunī tī jneē i chí ndaha i. ¹⁰ Chi nihīn i castigo xeēn siquī cuéchi ni casáha i, chí quitī ni Yaā Dios nuū i, te tuá cone cáhnu ni yā. Te ndoho i nuū cayú ñuhūn jíin azufre, coto tāca ndajéhé Yaā Dios jíin Yaā cúu Londe. ¹¹ Te ñuhmā nuū cándoho i cánda ní cáni cuiti. Te nduú ñuú tu ndétátú ñayuu cándoho ún jeē ní cachiñúhún quitī xéén jíin imagen tī, jíin jéē ni jécondee jnunī síhví tī. ¹² Jeē yúcuan ñáyuu maá Yaā Dios jeē casquícu i jniñu ndácu ya te cácañdije vāha i Jesús, cánuú jéē cuáñdeyí ni i. Achí ndajéhé unī.

¹³ Yūcuán na te ni jini sōho ri ñn jñūhun ichi ándiví jéē ni cáhán jíin rí:

Tee ró jñūhun jeē cahān rī jíin ró yāhá: Nacā jeē ndetū tāca ñáyuu cácañdije Jítoho yō jeē cájihī vijna jíin ndé ní cuahān yō. Jendaá chí ndetátú i jeē ní casáha i jniñu vāha, te jniñu i un má náā chí sāha jeē quendō vāha i ní cáni, áchí Espíritu.

Jeē ní nastútú yá ñayuu ñayiví

¹⁴ Yūcuán na te ni ndacoto ri, te ni jito ri ñn vicó cujín. Te nuū vicó un néne Yaā ní nduu tēe. Te xinī yā ñūhun corona oro, te ndáhá yá ñn hoz xeēn. ¹⁵ Te ni quenda inga ndajéhé yā ini templo, te ni cana jee, te cáhán jíin Yaā néne nuū vicó un:

Cahnde ni jíin hoz ní, te nastútú ní ñayuu ñayiví. Chi je ni quee quiví jeē nastútú ní i nájñūhun táhndé trigo jeē jé ni cuaan, áchí.

16 Yūcuán na te Yaā néne nuū vicó ni nastútú yá ñayuu váha ini ñayiví, nájnūhun táhndé trigo jiín hoz.

17 Yūcuán na te ni quenda inga ndajéhé yá ini templo jeē iyó andiví, te suni ndáhá yá ñin hoz xeēn. 18 Te nde nuū altar ni quenda tucu inga ndajéhé, te ndíso jniñu ya siquī ñuhūn altar. Te ni cana jee ya, te cáhán yá jiín ndajéhé jeē ndahá hoz xeēn:

Cahnde rō jiín hoz xeēn rō, te nastútú ró ñayuu casáha néé ini ñayiví, nájnūhun jeē cájhnde i chutū ndehē uva jeē jé ni jichi, áhí.

19 Te ndajéhé un ní jehnde yá jiín hoz yá, te ni nastútú yá ñayuu casáha néé ini ñayiví, nájnūhun ndútútú ndéhē uva. Te ni jnaa ya i nuū nihín i castigo xeēn Yaā Dios, nájnūhun jnáa i ndehē uva nuū taxín. 20 Te ni jéhe ya castigo i yatā ñúū, te ni jica niñí i nájnūhun ndūxi uva. Te ni ndaa ni jinū cūhva jeē sucún yuhu caballo, te ni jica cuahān nde unī ciento kilómetro.

Ndihúxá ndajéhé jiín ndihúxá jnūndóho jeē sándihí

15

1 Te ni jito ri inga jniñu jéhnū ichi ándiví jeē náa ni yō jito yó. Chi cáhīn uxā ndajéhé yá jeē cuāha ndihúxá jnūndóho sandihí na. Te jeē jinu ndihúxá jnūndóho yáha, te jinu jeē cuāha Yaā Dios castigo xeēn siquī cuéchi.

2 Te suni ni jito ri ñin jeē cáa nájnūhun mar, te cáa nájnūhun vidrio jeē ndíndēe nájnūhun ñuhūn. Te yumar un cáhīn ñayuu ni cacundeyí siquī quití xéén jiín imagen tí, jiín jéé tu ní cáquihin i jnunī número jeē cúu síhví tí. Te cándahá i yaa jeē naní arpa jeē ni jéhe Yaā Dios nuū i. 3 Te cájita i yaa jeē ní tava Moisés, tēe cúu mozo Yaā Dios, jiín yaa maá Yaā cúu Londe. Te súcuan cáhán yaa ún:

Yóhō náa ni na cájito ná ndihí jniñu jéhnū teyí jéé sáha ní,
Tátā Yaā Dios, chi jnái ní ndihí poder.
Te máni jniñu ndaā jniñu váha sáha ní,
jeē cúu ní Rey nuū táca nación.

4 Tú ni ñin i íyó jéé ma cónso íyo i nuū ní, Tátā Yaā Dios.
Te ndihí i cahān nahín i jeē yóhō cújéhnū ní.
Chi máñuhún ni maá ní cúu Yaā ndoo Yaā íi.

Te quijicoo ñayuu táca nación, chiñuhún i nihín,
chi je ni cajini i jeē ndaā váha sáha ní táca jniñu.

Achí i cájita i.

5 Yūcuán na te ni ndacoto ri, te ni jito ri jeē ini andiví núne cuarto íi ini templo nuū íne tabla yuū jeē yosó ley yá. 6 Te ini templo un ní quendacoo ndihúxá ndajéhé jeē cándiso jniñu siquī ndihúxá jnūndóho. Te cáñuhun ya sahma fino iyó ndoo te xíñú. Te núhni cinturón oro jicā yá. 7 Te ñin jnáhan ndicúún jeē técu ni jéhe ñin ñin cohō oro nuū ndihúxá ndajéhé un. Te ini cohō un ñuhun chitú castigo xeēn jeē ni jéhe Yaā Dios, Yaā técu ní cáni. 8 Te ni chitú ndí ñuhmā ini templo, te suu ni steén jeē yóhō cújéhnū Yaā Dios jiín poder jnái ya. Te ni ñin tu ní cúu quiví ini templo, chi nde na ndíhi ndihúxá jnūndóho jeē cuāha ndihúxá ndajéhé yá.

Siquī ndihúxá cohō jeē ñuhun castigo

16

1 Yūcuán na te ini templo ni jini sōho ri ñin jnūhun cáhán jee jiín ndihúxá ndajéhé yá:

Cuangoo te cati ró siquī ñayiví ndihúxá cohō jeē ñuhun castigo xeēn jeē ni jéhe Yaā Dios, achí.

2 Te cuahān ndajéhé ñin, te ni jeti ya cohō yá siquī ñayiví. Te táca ñayuu jeē ndeé jnunī quití xéén un jín jéé cáchiñuhún imagen tí, ni canecoo ndíhyi xeēn jeē jetú ndasí.

3 Te ndajéhé uū ni jeti ya cohō yá nuū mar, te ndute mar ni nduu nájnūhun niñí ndíyi. Te ni cajihí táca quití jeē ñuhun ini mar.

4 Te ndajéhé unī ni jeti ya cohō yá ini táca yúte jín táca núu cáne ndute, te ni nduu niñí. 5 Te ni jini ri jeē cahán ndajéhé jeē ndíso jniñu siquī ndúte:

Tátā Yaā Dios, maá ní cúu Yaā ndoo Yaā íi, Yaā iyó vijna, te ni íyo ní ní cáni. Te ndaā sáha ní jeē súcuan ni ndonda ní siquī cuéchi i. 6 Chi ni casáha i jeē ní jeti niñí ñayuu ndoo ní jín ñayuu ní canacani jnūhun ní. Te vijna chi ni sáha ní jéé cájhi i niñí, chi ñayuu casáha jniñu néé cácuu i, jeē cánuú ndoho i súcuan.

7 Te ni jini sōho ri jeē cahán inga nde nuū altar:

Tátā Yaā Dios, máá ní cúu jeē jnī ndihí poder. Te jniñu váha jniñu ndaā ni sáha ní jéē ní ndonda ní síquī cuéchi i. Achí.

⁸ Te ndajéhé cuūn ni jeti ya cohō yā síquī níandii, te ni jēhe Yaā Dios jnūhun jeē ndujíhni ndasí níandii návāha cayū ñayuu.

⁹ Te xeēn ndasí ní cayū tāca ñayuu. Te vēsú súcuan te tu ní cánacani ni i stóo i cuéchi i, ni tu ní cacahān i jeē cujéhnū Yaā Dios. Chí sa suhva ni cacahān ndevāha i síquī yā jeē ni jēhe ya tācá castigo yáha nuū i.

¹⁰ Te ndajéhé uhūn ni jeti ya cohō yā nuū mesa nuū ndácu quiiti xéén jniñu. Te ni cunee ní cáhnu nuū ndácu ti jniñu. Te cánacayīhi ñayuu yuhu i jeē cájetū ndasí i.

¹¹ Te vēsú súcuan te tu ní cánacani ni i stóo i jniñu néé cásáha i. Chí sa ni cacahān ndevāha i síquī Yaā Dios andiví síquī jeē cájetū ndasí i jíin ndíhyi xeēn cándoho i.

¹² Te ndajéhé iñū ni jeti ya cohō yā síquī yúte cáhnu jeē naní Eufrates. Te ni ichi ndihí ndute yúte ún, návāha nune ñn ichi jeē quíjicoo tāca rey ichi núu cáne niāndii.

¹³ Te ni jito ri jeē ini yuhu coō cáhnu jíin ini yuhu quiiti xéén jíin ini yuhu máá téé nácani jnūhun stáhú ní canecoo unī tachī jeē cáa nájñūhun sáhvá. ¹⁴ Te tachī ún chí ndajéhé jexeén cácuu, te cásáha jniñu jéhnū jeē náā ni ñayuu cájito i. Te ni quenda-coo tachī un jéē nastútú táca rey ní cáhnu ñayīvi, jéē cuajnáhan de síquī Yaā Dios quiiví jeē ndíji ya. Te máá yá cúu jeē jnī ndihí poder. ¹⁵ Cuni sōho jíinánhan ró, chí sanaa ni rō te ndiji ri, nájñūhun jeē ñn sanaa-ni te quiiti ñacuīhná. Te nacā jeē ndetū ñayuu jeē ndito ni i, te ndíto yúcún i sahma i, návāha ma cáca vichí lí i, cúu jeē tú na cuéchi coo síquī i jeē cucanu i nuū tāca ñayuu, achí yá. ¹⁶ Te ni canastútú táchī un táca rey, ni candutútú ñn lugar jeē yuhu hebreo naní Armagedón.

¹⁷ Te ndajéhé uxā ni jeti ya cohō yā nuū tachí. Te ini templo andiví jíin núu mesa nuū ndácu ya jniñu, ni cane ñn jnūhun jeē ni cáhān jee:

Je ni jíinu, achí.

¹⁸ Yūcuán na te ni ndindéé taja, te níñin, te cáhān taja, te ni jnáa ndasí. Chí nde ní cáni jeē iyó ñayuu ñayīvi, tu ní jnáa níñin ndasí nájñūhun jeē ní jnáa ni jito ri. ¹⁹ Te

máá ñuu cujéhnū Jerusalén, ni cusín ni nduu unī parte, te ní cáhnu ñayīvi ni naa tācá ñuu. Te ñuu teyí Babilonia, chí ni sáha nahín yá jeē ní ndutahū i castigo xeēn, chí ni quiiti ndasí ni yā síquī cuéchi i. ²⁰ Te ni naa tāca isla, te suni yucu tuá gā. ²¹ Te ichi ándiví ní cuun níñi náhnu síquī ñayuu, jeē véyi nde uū xico kilo. Te ní cacahān ndevāha ñayuu síquī Yaā Dios jeē ní cuun ndasí níñi, chí ñn jñūdóho xeēn ni cuu.

Jeē ndonda ya síquī ñuu neé Babilonia

17

¹ Yūcuán na te ni quiiti ñn jnáhan ndihúxá ndajéhé jeē ní candāhá ndihúxá cohō ún, te ni cahān yā jíin rí:

Nehen, te na stéén rī nuū rō ndese coo castigo síquī maá ñahan jnéni jeē cúu ñuu cujéhnū íne nuū iyó cuéhē ndute. ² Chí tāca rey ñayīvi nájñūhun ni casíquí ndéé de jíin ñahan ún, cúu jeē ní castóo de Yaā Dios te cándiquín de jnūhun néé ní steén ña. Te ni sáha ña jeē ñayuu ní cáhnu ñayīvi, nájñūhun nájñi i te casíquí ndéé i Yaā Dios cúu jeē ní castóo i ya te cásáha ndasí i cuéchi. Achí ndajéhé yā.

³ Te ni sáha ga Espíritu Santo jeē ní jito ndijin rī, te ndajéhé yā un cuáhān yā jíin rí nde nuū ñūhun téhé. Te ni jito ri ñn ñahan, yósó ña ñn quiiti xéén cacuéhé. Te ní cáhnu ti ndeé jnūhun néé jéé quiiti ni Yaā Dios sáha. Te iyó úxā xiní ti jíin úxī ndiqui ti. ⁴ Te ñahan un ñūhun ña sahma ndihí jíin sahma cuehé, te suni ñūhun ña síquī oro jíin yūu luu jíin perla jeē ndeé yahu. Te ndáhá ña ñn cohō oro jeē ñūhun chitú jíin jniñu néé ndasí jíin jniñu jnehén jéé jíca jnéni ña. ⁵ Te jneé ña ndeé ñn síhví jéé cúu ñn jnūhun sáhi, te suhva cáhān: Yāha cúu ñuu teyí Babilonia, jeē cúu nájñūhun náná tāca jéé cájica jnéni jíin jéé casáha néé ndasí ini ñayīvi, achí. ⁶ Yūcuán na te ni jini rī jeē ñahan un nájñi ña jeē nájñūhun ni jihí ña níñi ñayuu maá Yaā Dios jíin níñi ñayuu ni cajihí síquī jeē ní canacani ndaā i jnūhun Jesús. Te nahán ní naa ni rī ni jito ri ña.

⁷ Yūcuán na te ni cahān ndajéhé un jíin rí:

¿Naun náā ni rō jito ró? Na cástūhun rí nuū rō ndese cúni cahān jnūhun sáhi síquī ñahan un jíin quiiti xéén yósó ña, jeē iyó úxā xiní

tī jín úxī ndiqui tī. ⁸ Quiti xéén jeē ní jito ró, chí ni cotecu tī, te vijna chí tuá tī. Te ndenda tucu tī ini tūhnchi cúnú, te yūcuán na te quihīn tī nuū jnahnú ndetū tī. Te ñayuu cáyūcu ní cáhnu ñayīví, naa ni i coto i nuū quiti un jéé ní cotecu tī te ni jihī tī, te natecu tucu tī. Te cácuu i ñayuu jeē tu yósó síhví i nuū tútu jeē yosó síhví ñayuu cotecu ní cáni jeē ní jécósó síhví i nde quivī ní jécóo ñayīví.

⁹ Tāca ñayuu jécūhun vāha ni, cuu tava i cuenta ndese cúu: Ndi húxá xinī tī cácuu nájnūhun uxā yucu nuū néne ñahan ún. ¹⁰ Te ndihúxá xinī tī suni cácuu nájnūhun uxā rey. Te uhūn rey un je ni naa jeē ndácu de jniñu, te ñn de ndácu jniñu vijna, te inga de chí ná tu quiji de. Te núu na quiji de te jecu-ni tiempo coo de. ¹¹ Te quiti xéén jeē ní cotecu te tuá iyó tí vijna, máá tí cuu rey unā. Te ñn jnáhan ndihúxá rey un cúu tī. Te suni quihīn tī nuū jnahnú ndetū tī.

¹² Te ndihúxí ndiqui jeē ní jito ró cúu nájnūhun uxī rey, te ná tu ndacu de jniñu jínáhan de. Te máá de jín quiti xéén un, chí nihīn jniñu de cuu de rey jecu-ni tiempo. ¹³ Te ndihúxí rey un chí squijnáhan de jnūhun, te nacuāha de poder de jín jniñu ndíso de nuū quiti xéén un návāha ndacu tī jniñu. ¹⁴ Te cuajnáhan de jín Yaā cúu Londe. Te Yaā cúu Londe quende yā poder de jínáhan de. Chí máá yá cúu Jitoho nuū tāca jítoho, te máá yá cúu Rey nuū tāca rey. Te ñayuu cáhīn jín yá, chí ni nacāji Yaā Dios i te ni cana ya i, te cásquicu vāha i. Achí ndajéhé un.

¹⁵ Te ni cahān gā yā:

Cuehē ndute jeē ní jito ró núu néne ñahan jíca jnéni, suu cúu ñayuu cuehē tācá ñuu, tācá yuhu, tācá nación. ¹⁶ Te ndihúxí ndiqui jeē ní jito ró jéé névāha quiti xéén un, suu cácuu rey jeē coto uhū de ñahan jíca jnéni un. Te sáha de jeē quendōo ndáhú ña te quendōo vichí lí ña. Te caji de cūñu ña te cahmu de ña nuū ñuhún. ¹⁷ Chí Yaā Dios scānda ya ini de jeē na sáha de jniñu cúní yā. Te squijnáhan de jnūhun jeē nacuāha de jniñu ndíso de nuū quiti xéén un, ndacu tī jniñu nde na squicu tāca jnūhun ni cahān Yaā Dios. ¹⁸ Te ñahan jeē ní jito ró cúu

máá ñuu teyí jéé cujéhnu nuū tāca rey ñayīví. Achí ndajéhé un.

Siqui jeē naa ñuu Babilonia

18

¹ Yūcuán na te ni jito ri jeē ní cuun inga ndajéhé yā ni quiji ichi ándiví. Te cújéhnu ndasí yá. Te jeē ndíndēe yá te ni ndíndēe núu ñayīví. ² Te ni cana jee ya:

Je ni naa iñ ñuu teyí Babilonia. Te ni nduu vehe tāca táchī, nuū ñūhun ndinuū tachī neé, jín táca téji, quiti quini jeē tu nújahan ni yō. ³ Chí ñuu un cúu nájnūhun ñn ñahan ndevāha, te ni sáha ña jeē ñayuu tācá nación, nájnūhun nájini i te cásiquí ndéé i Yaā Dios, cúu jeē ní castóo i ya te cásáha ndasí i cuéchi. Te tāca rey ñayīví, nájnūhun ni casíquí ndéé de jín ñahan ún jeē ní cajetáhú de jnūhun neé ní steén ña. Te ñayuu ní ñayīví jéé cájeen cáxícó, ní cacucúca i jín cuéhē jeneé jeē ní nevāha ña.

⁴ Yūcuán na te ni jini sōho ri inga jnūhun jeē ni cahān ichi ándiví:

Máá ró jeē cácuu ró ñayuu maá rí, quendacoo ró ini ñuu jiñā, návāha ma quívi nduu ró jín táca cuéchi jeē sáha ña, te návāha ma ndóho ró jnúndóho xeēn jeē ndoho ña. ⁵ Chí ni cayā cuehē ndasí cuéchi ña, nájnūhun ñn montón cáhnu ndasí jéé ní cusúcún ndé andiví. Te vijna te nduxeēn Yaā Dios siquí cuéchi ña. ⁶ Stóho ró ña nájnūhun ni sáha ña jeē ní ndoho sava ga ñayuu. Te nachunaa ró nuū ña doble jnúndóho jeē ni jéhe ña nuū inga ñayuu. Te sáha ró jeē nandicó cóo doble siquí ña vésú jeē ni sáha ña siquí inga ñayuu. ⁷ Te yōhyo ni satéyí ña máá ña, te cúca ndasí ní cotecu ña. Te suni jín cúhva yúcuán nacuāha ró jéé ndóho xeēn ndasí ña. Chí jéni ni ña: Yāha néne ri ndácu ri jniñu, te tu cúu ri ñahan viuda, te ma quíji cuiti jnúndóho ndoho ri, achí ña. ⁸ Jeē yúcuán cúu jeē ñn quivī-ni te quiji cuehē jnúndóho siquí ña. Chí cuu ndīyí, te cucuíhyá ndasí ni ña, te coo jnamā, te cayū ña nuū ñuhún. Chí yōhyo íyó poder maá Jítoho yō Yaā Dios, Yaā ní ndonda siquí cuéchi ña, áchí.

⁹ Te tāca rey ñayīví jéé ní casíquí ndéé de jín ña te ni cotecu cúca ndasí de jín ña, ndahyū de te ndahyū cohó de coto de jeē cánda ñuhmā cayú ña. ¹⁰ Te cuiñi jíca de

chi yūhú de coto de jeē súcuan ndoho ña castigo. Te cahān de jíjnáhan de:

Nacā jeē xeēn ndóho ró, ñuu cujéhnu Babilonia, chi yá-ni ñuu teyí ní cuu ró núú. Te vijna chi ñn núnúu-ni te ni quee castigo jeē nāā rō, achi de jíjnáhan de.

¹¹ Te tāca tée ñayīví jēē cájeen cáxīcō ñuu ún, ndahyū de te ndahyū cohó de jehē. Chi tuá ndé ñn cuaan ndajníñu cáxīcō de. ¹² Te ndajníñu cáxīcō de un cúu oro, plata, yuū luu jíin perla jeē ndeé yahu, jíin sahma fino jíin sahma seda jeē ndihí jíin jēē cuehé. Te suni tācá yujnu jeē asīn jéen xicō, jíin tāca ndajníñu luu jeē ni sāha jíin marfil jíin yujnu lúu jeē ndeé yahu jíin cáa cuaan jíin cáa hierro jíin yūū cuijín luu. ¹³ Te suni cáxīcō de canela jíin tāca jíhyo asīn jíin súje cutú jíin súje uvuā jíin tāca perfume jíin vino jíin aceite jíin harina fina jíin trigo. Te suni cáxīcō de quití ndíso jíin lanchi jíin caballo jíin carreta, te nde ñayuu cáxīcō de jeē sájniñu sáa-ni i. ¹⁴ Te cahān de jíin ñuu ún:

Ni cujiyo ndihí ndajníñu cúcá jeē ní nu-jnahan ndasí ni rō. Te tāca jēē lúu jeē váha jeē ní cotecu cucá ró, chi ni naa ndihí, te ma nánihīn cuiṭi gā rō, achi de jíjnáhan de.

¹⁵ Te tāca tée ni cajeen ni caxīco ní cacucúca jēē siquī ndajníñu ñuu ún, chi cuiñi jíca de jeē yūhú de coto de castigo coo ñuu ún. Te ndahyū de te ndahyū cohó de.

¹⁶ Te cahān de jíjnáhan de:

Nacā jeē xeēn ndóho ñuu teyí yáha. Chi ni cuu nájnūhun ñn ñahan jeē ni ñūhun sahma fino, sahma ndihí jíin jēē cuehé. Te ni ñuhun ña siquī oro jíin yūū luu jíin perla jeē ndeé yahu. ¹⁷ Te vijna te ñn núnúu-ni te ni naa ndihí tācá ndajníñu váha ún, achi de jíjnáhan de.

Te cuiñi jíca tāca tée cáscaca barco, jíin ñayuu cuángoo nuū barco, jíin tée cásajniñu ini barco, jíin tāca gá tēē cásajniñu nuū mar.

¹⁸ Chi coto de ñuhmā jeē cayú ñuu ún, te cana jee de jíjnáhan de:

¿Ndé íne ga ñuu teyí jēē cujéhnu nájnūhun ni íyo ñuu yáha? achi de.

¹⁹ Te cosō de ticachā ñuhun xinī de jeē cácuuihyá ni de. Te ndahyū de te ndahyū cohó de. Te cana jee de jíjnáhan de:

Nacā jeē xeēn ndóho ñuu teyí yáha. Chi jíin ndajníñu cúcá jeē ni íyo ñuu un ní cacucúca tāca ñayuu cánevāha barco cájica nuū mar. Te vijna te ñn núnúu-ni te ni naa ndihí-ni, achi de.

²⁰ Te na cúsiñ ni tāca róhó jēē cáyūcú andiví, siquī jeē ní naa ñuu ún. Te na cúsiñ ni rohó, tāca tée apóstol, jíin tée canacani jnūhun Yaā Dios, jíin ñayuu maá Yaā Dios. Chi ni sāha néé ñuu un siquī rō jíjnáhan ró, te jeē yúcuan ní ndonda Yaā Dios siquī, achi de.

²¹ Yūcuán na te ñn ndajéhé ndíso poder, ni quihin ya ñn yuū cáhnu nájnūhun ñn yōso cáhnu, te ni scāne ya ini mar. Te ni cahān yā:

Nájnūhun ni naa yōso yáha, suni súcuan naa Babilonia, ñuu cujéhnu téyí. Te ma núcoo cuiṭi gā jeē cóto yó núú. ²² Te ni cahān yā jíin ñuu ún: Ini calle rō ma cúni sōho cuiṭi gā ñayuu jeē scáta i yaa arpa jíin flauta jíin trompeta. Te suni ma cóo cuiṭi gā ñayuu casáha tācá ndajníñu. Te suni ma cúni sōho ga i jeē nñhīn tācá molino rō. ²³ Te ni ñn lámpara ma sāha ga jeē cúndijin nuū rō. Te ni ma cúni sōho ga i vico jeē cácusīñ ni ñahan tēē nándāha mēhñu ró. Te ñayuu ní cajeen ni caxīcō nuū rō, ni cacujéhnu ndasí i ini ñayīví. Te ni stahú ró ñayuu tācá nación jíin jniñu tasí jíin jniñu mágica. Achí ndajéhé un.

²⁴ Te ñuu un ní nihīn castigo xeēn, chi siquī ñuu un ndeé cuēchi jeē ní jeti niñī tāca tēē ní canacani jnūhun Yaā Dios, jíin tāca ñayuu maá yá, jíin tāca gá ñayuu ní cajehni i ní cáhnu ñayīví.

19

¹ Te ná ni cuu tāca jēē yáha, te ni jini sōho ri jeē cahān jee cuehē ndasí ñayuu ini andiví:

Yōhyo cújéhnu Yaā Dios. Chi Yaā Dios maá yó cúu jeē ní jnama yóhó.

Te máa yá cujéhnu ndasí, te máa yá jnñi ndihí poder.

² Te ndaā te vāha sándaā yā tācá jniñu, chi ni ndonda ya siquī cuēchi ñuu neé cújéhnu ún.

Chi ni stívī un ñayuu ní cáhnu ñayīví jíin jnūhun cásiquí ndeé Yaā Dios.

Te ni sāha ya jeē ní ndutahū ñuu un siquī jeē ní jehni tāca mozo yā.

Achí i jíjnáhan i.

³ Te ni cacahān tucu i:

Yōhyo cújéhnū ya. Chi n̄í cáni canda ñuhmā ñuu un jēē cayú, achí.

⁴ Te ndihóco cuūn tēe jéhnū cándiso jniñū, jíin ndicúun jeē técu, ni cajecuiñī yití de, te ni cachiñúhún de Yaā Dios, Yaā néne nuū mesa ndácu jniñū. Te ni cacahān:

Amén. Súcuan na cóo. Yōhyo cújéhnū ya.

⁵ Te nde nuū mesa nuū ndácu ya jniñū ni cahān ñn jnūhun:

Róhó jēē cájéniñū nuū Yaā Dios, jíin róhó jēē cándiso ñyo nuū yā, jeē cácujeñū jíin jēē tu cácujeñū, na cáhán rō jeē yóhyo vāha Yaā cúu ya. Achí.

Vico jeē nándāha Yaā cúu Londe

⁶ Te ni jini sōho ri jeē cácahān ñayuu cuehē ndasí, te ñhin nájnūhun ñhin cuehē yūte, te nájnūhun jeē cahán ñhin taja. Te ni cacahān:

Yōhyo cújéhnū ya. Chi Jitoho yō Yaā Dios,

Yaā jn̄í ndihí poder, vijna te ndácu ñhin ya jniñū.

⁷ Te na cúsiñi ni yō, te siñi ndasí na cóo ni yō, te na cáhán yō jeē yóhyo cújéhnū ya.

Chi ni quee quivī jeē nándāha máa Yaā cúu Londe.

Te je íyó túhva ñahan nándāha jíin yá, te suu cúu ñayuu maá Yaā Dios.

⁸ Te ni ñihñi ña jnūhun cūhun ña sahma fino jeē ndóo ndasí te xíñú.

Achí i jíjnáhan i. Te sahma fino un cúu taca jniñū ndaā jeē casáha ñayuu maá Yaā Dios.

⁹ Te ni cahān ndajéhé yā jíin rí:

Tee ró jnúhun yáha: Nacā jeē ndetū taca ñayuu jeē ní cana ya quingoo vico nándāha Yaā cúu Londe.

Te ni cahān gā ndajéhé un jíin rí:

Taca jnúhun yáha cúu jnūhun ndaā ni cahān Yaā Dios, achí yá.

¹⁰ Te ni jecuiñī yití rí nuū jehé ndajéhé un jēē chiñúhún rí yā nuú. Te ni cahān yā jíin rí:

Ma sáha ró súcuan. Chi ruhū suni mozo Yaā Dios cúu rí, nájnūhun máa ró jíin taca hermano rō jeē cácañdije vāha jnūhun Jesús. Sa suhva nuū maá Yaā Dios chiñúhún ró. Achí yá.

Chi jnūhun siquī Jesús cúu jeē cácahān ndaā ñayuu cánacani jnūhun Yaā Dios.

Yaā yosó síquī caballo cuijín

¹¹ Yūcuán na te ni jito ri jeē núne andiví. Te ni cane ñn caballo cuijín, te Yaā yosó síquī tī naní yá Yaā ndaā, Yaā squícu, chi squícu ya jeē ni jéjnūhun ya. Te ndaā sándaā yā jniñū te ndaā ndóna ya siquī taca jéneé.

¹² Te tinūu yá ndíndee nájnūhun yáñuhūn. Te xinī yā ñuhun cuehē corona. Te yósó ñn síhvī yá jeē maá-ni ya cúu jeē jiní. ¹³ Te ñuhun ya ñn sahma jeē ni ñúndaji nuū ñiñí,

te naní yá Jnūhun Yaā Dios. ¹⁴ Te taca ndajéhé yā jeē iyó andiví, cáyosō caballo cuijín, cándiquin yatā yā. Te cáñuhun sahma fino cuijín íyó ndoo. ¹⁵ Te ini yuhu máa

Yaā jeē yosó síquī caballo, quenda jeē cáa nájnūhun ñn espada xeēn. Te espada un cúu jnūhun ya jeē stóho ya ñayuu taca nación. Te ñhin ndacu ya jniñū nuū i. Te sándaā yā

siquī cuéchi i nájnūhun jeē jeñú siquī ndehē uva cájexñ. Te cuāha ya castigo xeēn ndoho i jeē quití ni yā siquī cuéchi i. Chi máa yá

jn̄í ndihí poder. ¹⁶ Te sahma ya jíin síhin ya yosó jnúhun yáha: Rey nuū taca rey jíin Jitoho nuū taca Jitoho, achí.

¹⁷ Yūcuán na te ni jito ri ñn ndajéhé yā jeē ñn nuū níandii. Te ni cana jee ya xinī taca quití ndáva nuū tachí:

Ndutútú ró quiijicoo ró cuxíni ró ñn vico cáhnu sáha Yaā Dios. ¹⁸ Te caji rō cūñu taca rey jíin capitán jíin tée téyí, jíin cūñu taca caballo jíin tée ni cayosō siquī tī. Te suni caji

rō cūñu taca gá ñayuu, cúu ñayuu casájniñū cuenta maá jíin mozo jeē ní cajeen ñayuu, cúu ñayuu cácujeñū jíin ñayuu tu cácujeñū. Achí ndajéhé yā.

¹⁹ Yūcuán na te ni jito ri maá quití xéén jíin taca rey ñayiví jíin cuéhē soldado de. Te ni candutútú de jeē cuajnáhan de jíin

máa Yaā yosó caballo jíin taca ndajéhé yā. ²⁰ Te ni jniñi ya quití xéén cuahān tī preso jíin tée ni nacani jnūhun stáhú jeē ní sáha taca

jniñū jéhnū jeē ní jito jínúú quití xéén. Chi jíin jniñū jéhnū un cúu jeē ní stáhú de taca ñayuu jeē ní cajēhe jnūhun condiso jnuní

quití xéén, jíin jēé ní cachiñúhún imagen tī. Te quití xéén un jíin tée ni nacani jnūhun stáhú un, cátecu ndíndúú te ni scáne ya nuū

laguna ñuhūn jeē cayú jíin azufre. ²¹ Te jíin espada jeē cáne yuhu Yaā yosó caballo ni cajihí taca soldado quití xéén un. Te taca

quití xéén un. Te taca

quití xéén un. Te taca

quití ndáva nuū tachí ni candutú chíji ti ni cayeji tī cūñu de jíjnáhan de.

Siquī mil cuiyā

20

¹ Te ni jito ri jeē ní cuun ñn ndajéhé yā ichi ándiví. Te ndáhá yá ndacáa jeē núne tūhnchi cúnú ndasí. Te suni ndáhá yá ñn cadena cáhnu. ² Te ni jñi ya maá cóo cáhnu jeē iyó ndé jenahán ndasí, te nání tí jexeén jíin Satanás. Te ni jihni yā jeē conuhnī mil cuiyā. ³ Te ni scáne ya ini tūhnchi cúnú ndasí. Te ni jesi vāha ya, te ni sácutú yá yuyáú, návāha ma stahú gá un ñáyuu tǎcá nación, chí nde na jínu mil cuiyā. Te jeē yáha mil cuiyā ún, yūcuán na te cánuú jéē ndajī caca cuu jecu na tiempo.

⁴ Te ni jito ri tǎca mesa nuū ndácu jniñu, te yūcuan cáyūcu tǎca ñáyuu jeē ní canihīn jniñu i sándaā i jniñu. Te suni ni jito ri anuá tǎca ñáyuu jeē ní cajehnde xinī i siquī jeē ní canacani i jñūhun Jesús jíin jñūhun Yaā Dios. Te tu ní cáchiñúhún i quití xéén jíin imagen tī, ni tu ní cájēhe i jñūhun jeē cóndee jñunī tī jneē i chí ndaha i. Te ni jito ri jeē ní natecu i te ni candacu i jniñu jíin Cristo mil cuiyā. ⁵ Yáha cúu ndíyí jeē nátecu xīhna gā. Te tǎca gá ndíyí, tu ní cánatecu i, chí nde jeē jínu mil cuiyā. ⁶ Te nacā jeē ndetū tǎca ñáyuu ndoo ánuá jeē nátecu xīhna gā. Chi ma cúu cuítí i vuelta uū. Te cuu i sutū nuū Yaā Dios jíin núu Cristo, te ndacu i jniñu jíin yá mil cuiyā.

⁷ Te jeē jínu mil cuiyā ún, te ndajī Satanás te quenda nuū yíndihyū. ⁸ Te stáhú tucu ñáyuu tǎcá nación ñí cáhnu ñáyiví. Te stáhú ñáyuu ñuu Gog jíin Magog. Te sáha jeē ndutútú tǎca soldado ñuu un jéē cuajnáhan de. Te coo cuehē ndasí de nájnūhun ñíí yumar. ⁹ Te cuítē núu de quingoo de ñí cáhnu ñáyiví. Te cuicó ndúu de ñuu nuū cáyūcu ñáyuu maá Yaā Dios, ñuu jeē maní yá jíin. Te Yaā Dios chí scúun ya ñuhūn ichi ándiví, te cayū ndíhi de. ¹⁰ Te jexeén jeē ní stáhú tǎca ñáyuu ún, chí scáne ya quihīn nuū laguna ñuhūn jeē cayú jíin azufre. Te yūcuán chí xīhna gā ni scáne ya quití xéén jíin téé ni nacani jñūhun stáhú. Te yūcuán ndoho nduú ñuu ñí cáni cuítí.

Jeē sándaā yá jniñu nuū mesa cuijín

¹¹ Yūcuán na te ni jito ri ñn mesa cuijín cáhnu, te néne máá Yaā ndácu jniñu. Te ñáyiví jíin ándiví ni ndoñúhún cuáhān jeē ní jito ya nuū, chí tuá ni cúu quendōo nuū yā. ¹² Te ni jito ri tǎca ndíyí, jeē ní cujéhnū jíin jéē tu ní cujéhnū, cáhīn nuū Yaā Dios. Te ni sáha ya jeē núne tǎca libro, te suni ni nune inga libro jeē yosó síhví ñáyuu cotecu ñí cáni. Te ni sándaā yá siquī tǎca ndíyí ún, núu ndese jniñu ni casáha i jíin ndese yosó núu tǎca libro un. ¹³ Te tǎca ndíyí jeē ní cajihī nuū mar, ni nanecoo. Te suni ni nanecoo tǎca ndíyí jeē ní cajihī i, jeē íne i máá lugar nuū cáyūcu ánuá ndíyí. Te ni sándaā yá siquī, núu ndese ni casáha ñn ñn i. ¹⁴ Yūcuán na te cuehyí jéhní ñáyuu jíin lugar nuū cáyūcu ánuá ndíyí, ni snáā yā ni scáne ya cuangoo nuū laguna ñuhūn. Te jeē ndóho ñáyuu nuū laguna ñuhūn, yūcuan cúu jeē cúu i vuelta uū. ¹⁵ Te yūcuan ní scáne ya tǎca ñáyuu ni casáha jniñu néé jéē tu yosó síhví i nuū libro jeē yosó síhví ñáyuu cotecu ñí cáni.

Ándiví jéé jíin ñáyiví jéé

21

¹ Yūcuán na te ni jito ri ándiví jéé jíin ñáyiví jéé. Chí ándiví jíin ñáyiví xīhna ñúhún ni naa. Te suni tuá mar. ² Te ruhū Juan, ni jito ri ñuu i jeē cúu Jerusalén jeé. Te ñuu un ní cuun vēji ichi ándiví núu néne Yaā Dios. Te ñuu ún luu cáa nájnūhun ñn ñahan jeē ní sātūhva ña ni cucutú ña jeē nándāha ña jíin yí ña. ³ Te ni jini sōho ri ñn jñūhun jeē ní cáhān jee ichi ándiví:

Condéhé, chí vijna te ndéé Yaā Dios mēhñu ñáyuu. Te condee yā jíin i jíjnáhan i, te cuu i ñáyuu maá yá. Te máá yá condee yā jíin i jeē cúu ya Yaā Dios i. ⁴ Te nacuaa yā ndute tñúú i jíjnáhan i. Te ma cúu gā ñáyuu, ni ma ndahyú gā i, ni ma cucuíhyá gā ni i, ni ma jetú gā i. Chí je ni yáha tǎca jñúndóho jeē ni íyo, áchí.

⁵ Yūcuán na te ni cahān maá Yaā néne nuū mesa:

Condéhé, chí nasáha jeé rí tǎca jéé iyó, áchí yá.

Te suni ni cahān yā:

Teé ró jñūhun yáha. Chí tǎca jñūhun yáha cúu jñūhun jeē jíiní ndije ró jéé ndaā cúu.

⁶ Te ni cahān gā yā:

Je ni jīnu. Máá rí cúu nájñūhun letra A xīhna ñúhún jín letra Z jeē sándíhí na, chi máá rí ni squejéé ndíhi te máá rí sínu. Te tāca ñáyuu cájichī, súcuan-ni cuāha ri coho i ndute cáne jeē cótecu i ní cáni. ⁷ Tāca ñáyuu jeē cúndeyí síquī jéneé, nihīn i ndíhi jeē yáha cuu tahū i. Te cuu ri Yaā Dios i, te cuu i sēhe ri. ⁸ Te tāca ñáyuu jeē cáyūhú ndoho síquī jñūhun ri, jín ñáyuu tu cácan díje, jín ñáyuu casáha jñíñu néé, jín ñáyuu cájehni ndíyí, jín ñáyuu cájica jñení, jín ñáyuu casáha tásí, jín ñáyuu cáchiñúhún ídolo, jín táca ñáyuu castáhú, ñayuu ún chi quívicoo i laguna ñuhūn jeē cayú jín azufre. Te yūcuan cúu jeē cúu i vuelta uū.

Jerusalén jeé

⁹ Yūcuán na te ni quiji ññ jñáhan ndihúxá ndajéhé jeé ní candāhá ndihúxá cohō jeé ni ñúhūn chitú ndihúxá jñūndóho sandíhí. Te ni cahān yā jín rí:

Nehen, te na stéén rī nuū rō ñahan jeé nándāha ña cuu ña ñasihí Yaā cúu Londe, áhí yá.

¹⁰ Te ni sáha ga Espíritu Santo jeé ní jito ndijin rī, te ndajéhé un ní jeca ya ruhū cuahān yā jín rí xīnī ññ yucu cáhnu súcún. Te ni steén yā nuū rī maá ñuu iī cujéñnu jeé cúu Jerusalén, te ni cuun vēji nde andíví núu néne Yaā Dios. ¹¹ Te ndíndēé ndasí ñuu un nájñūhun ndíndēé Yaā Dios. Te xíñú nájñūhun xíñú ññ yuū luu jeé ndeé yahu ndasí, nájñūhun yuū cuijín jeé quiyí nájñūhun vidrio. ¹² Te yuhu ñúū un ní jicó ndúū ññ jeé cáhnu súcún ndíhyú ñuu ún. Te íyó úxī uū yehyí. Te tāca yéhyí un íñ ññ ndajéhé yā. Te tāca yéhyí un yósó síhví ndihúxí uū yucūn Israel. ¹³ Te lado nuū cáne niāndii iyó únī yehyí. Te lado norte suni íyó únī yehyí. Te lado sur suni íyó únī yehyí. Te lado nuū quée niāndii suni íyó únī yehyí. ¹⁴ Te íyó úxī uū yuū náhnu jeé cúu cimientu maá jéé ndihyú ñuu ún. Te tāca yūū un yósó síhví ndihúxí uū apóstol maá Yaā cúu Londe.

¹⁵ Te ndajéhé jeé ni cáhān jín rí, ndáhá yá ññ yujnu oro jeé chícuāha yá ñuu un jín táca yéhyí jín máá jéé ndihyú ñuu ún. ¹⁶ Te ñuu ún chi ññ cūhva-ni cúu ndicúún lado. Chi jeé cáni jín jéé jité, ñnuú-ni cúu. Te ndajéhé un ní chicuāha yá ñuu un jín yujnu

ún. Te née uū mil uū ciento kilómetro jeé ññ ññ lado. Te ñnuú-ni cūhva jeé cáni, jeé súcún, jín jéé jité. ¹⁷ Te suni ni chicuāha yá maá jéé ndihyú ñuu ún, te née unī xico cuūn metro jeé súcún. Te yūcuan cúu cūhva jeñníñu ñayuu, jeé suni jéñníñu ndajéhé un.

¹⁸ Te máá jéé ndihyú ñuu un ní cuvāha jín yūū cuijín quiyí. Te ñuu ún chi máá nene oro cúu, te cáa nájñūhun vidrio quiyí. ¹⁹ Te tāca yūū jeé cúu cimientu maá jéé ndihyú ñuu ún, ní cucutú jín ndínuū yuū luu jeé ndeé yahu. Yuū ññ cúu yuū cuijín quiyí. Te jeé uú cúu yuū ndeé ndí. Te jeé uní cúu yuū pinto. Te jeé cuún cúu yuū cuí ndí. ²⁰ Te jeé uhún cúu yuū pinto jeé ñúhūn raya. Te jeé íñú cúu yuū cuehé pinto. Te jeé uxá cúu yuū cuaán quiyí. Te jeé uná cúu yuū cuí ndeé. Te jeé ññ cúu yuū cuaán ndí. Te jeé uxí cúu yuū cuí cuijín. Te jeé uxí ññ cúu yuū cuehé cuaán. Te jeé uxí uū cúu yuū ndihí ndí. ²¹ Te ndihúxí uū yehyí un cácuu uxí uū perla jeé ndeé yahu. Te ññ ññ yéhyí cúu ññ ññ perla. Te máá nene oro cúu calle cáhnu ñuu ún, te quiyí nájñūhun vidrio.

²² Te tú na templo ni jito ri ini ñuu ún, chi ní cáhnu ñuu un ndeé máá Jítoho yō, Yaā jñí ndíhi poder, jín Yaā cúu Londe. ²³ Te ñuu ún tu jíni ñúhūn cundijin jín luz niāndii jín yóō. Chi jeé ndíndēé máá Yaā Dios cúu jeé cundijin ñuu ún. Te luz ñuu un cúu máá Yaā cúu Londe. ²⁴ Te ñayuu táca nación ñayíví jéé ní jnama ya, caca i jeé cundijin luz ñuu un núū i. Te tāca rey ñayíví quijicoo de ñuu ún, quindeca de táca ndajníñu jeé ndeé yahu jín jéé cujéñnu de sáha. ²⁵ Te tāca yéhyí ñuu ún ma cóndihyū cuítí nduú, chi tú na jecuāa coo. ²⁶ Te ini ñuu ún quijicoo ñayuu táca nación, quindeca i táca ndajníñu jeé ndeé yahu jín jéé cujéñnu i sáha. ²⁷ Te ma quívicoo cuítí ni ññ jeé jnehén. Ni ma quívicoo ñayuu casáha jñíñu néé jín jéé castáhú. Chi quívicoo máni máá ñáyuu jeé yósó síhví i nuū libro jeé yósó síhví ñáyuu cótecu ní cáni, jeé névāha Yaā cúu Londe.

22

¹ Yūcuán na te ndajéhé yā ni steén yā nuū rī ññ yūte íyó ndoo. Te ndute un sáha jeé cótecu yō ní cáni. Te xíñú nájñūhun vidrio,

te cáne nuū mesa nuū ndácu Yaā Dios jniñu jíin Yaā cúu Londe. ² Te jíca yūte ún sava mēhñu calle cáhnu ñuu ún. Te ndindúú lado yuyúte un yáhi yujnu jeē cótecu yō níí cáni sáha. Te yujnu un jéhe ndehē uxī uū jínu jeē ñn cuiyā, chí tāca yóo cúun ndehē. Te ndaha yúcú i cúu tajná jeē ndúvāha ñayuu tācá nación. ³ Te tācá-ni jeē ni cáhān yā jeē násūu jēe váha cúu, ma cóo ini ñuu ún. Te ini ñuu ún cuiñi máa mesa nuū ndácu Yaā Dios jniñu jíin Yaā cúu Londe. Te ñayuu cácañdije jeē cácuu i mozo yā, chiñúhún i ya. ⁴ Te coto i nuū yā, te condee síhví yá jneē i. ⁵ Te ma cóo ga jecuáa ñuu ún. Te ñayuu cáyūcu yúcuan tuá jíni ñúhún i jeē cúndijin lámpara nuū i, ni jeē cúndijin niāndii. Chí jeē ndíndēe máa Jítoho yō Yaā Dios cúu jeē cúndijin nuū i. Te ndacu i jniñu níí cáni cuiñi.

Jeē cuácuyajni ndiji Cristo

⁶ Yūcuán na te ni cahān ndajéhé un jíin rí:

Tāca jnúhun yáha cúu jnúhun jeē jíni ndije ró jēe ndaā cúu. Te Jítoho yō Yaā Dios, máa yá sáha jíin tée cáncani jnúhun ya jeē jíin Espíritu yā cáncani de. Te suu máa yá ni tají yá ndajéhé yā návāha stéén nuū ñáyuu cácuu mozo yā tācá jniñu jeē yachī coo.

⁷ Ndiji yachī rí, achí yá.

Te nacā jeē ndetū ñayuu chusóhó jnúhun Yaā Dios jeē yosó núu tútu yáha.

⁸ Te ruhū Juan, ni jíni sōho rí tāca jnúhun yáha, te ni jito rí tācá jniñu yáha. Te ná ni jíni sōho rí ni jito rí, yūcuán na te ni jecuiñi yití rí nuū jehé maá ndajéhé jeē ni stéén tācá jniñu yáha núu rí, jeē chiñúhún rí yā nuú. ⁹ Te ni cahān ndajéhé un jíin rí:

Ma sáha ró súcuan. Chí ruhū suni mozo Yaā Dios cúu rí, nájnūhun máa ró jíin táca hermano rō jeē cáncani jnúhun ya, jíin ndíhi ñayuu cájetáhú jnúhun yósó nuū tútu yáha. Sa suhva nuū maá Yaā Dios chiñúhún ró. Achí yá.

¹⁰ Te ni cahān gā ndajéhé un jíin rí:

Ma chísāhi ró táca jnúhun Yaā Dios jeē yosó núu tútu yáha, chí je cuacuyajni tiempo jeē cúndaā ndíhi. ¹¹ Te ñayuu casáha jniñu néé, na sáha ga máa i jniñu néé. Te ñayuu jnehén ánuá, na quéndōo máa i súcuan. Te sa ñayuu casáha jniñu ndaā, na sáha ga i jniñu ndaā. Te ñayuu cáhiyo

ndoo ánuá, na cáca ndoo ga i súcuan. Achí ndajéhé un.

¹² Jendaá jeē ndiji yachī rí, achí Jesús. Te quiji rí jíin táhū cuāha rí nuū ñn ñn ñayuu, núu ndese jniñu ni casáha i. ¹³ Máa rí cúu nájnūhun letra A xīhna ñúhún jíin letra Z jeē sándíhi na, chí íyó rí nde xīhna ñúhún te coo rí níí cáni.

¹⁴ Nacā jeē ndetū ñayuu jeē jéhe i jnúhun ndundoo ánuá i nájnūhun ndúndoo sahma. Chí cuu caji i ndehē yujnu jeē sáha jeē cótecu i níí cáni, te cuu quívicoo i yéhyí ñuu íi ún. ¹⁵ Te ichi fuera ñuu ún cuiñi ñayuu tu cácañdije, jíin ñáyuu casáha tásí, jíin ñáyuu cájica jnéni, jíin ñáyuu cájehni ndíyí, jíin ñáyuu cáchiñúhún ídolo, jíin ñáyuu cácusí ni stahú jnáhan.

¹⁶ Máa rúhū Jesús, ni tají rí ndajéhé rí návāha castūhun yá tāca jnúhun yáha nuū tāca grupo ñayuu cácañdije. Te máa rí ni sáha jeē ni íyo rey David, te ni quiji rí nuū yucún David. Te cúu rí nájnūhun lucero ndíndēe cáne cúndijin. Achí yá.

¹⁷ Te máa Espíritu Santo jíin máa ñahan jeē nándaaha jíin Yaā cúu Londe, cácahān:

Nehen, quívicoo ró ndaha ya, achí.

Te tāca ñáyuu jeē jíni sōho, suni na cáhān i:

Nehen, quívicoo ró ndaha ya.

Te tāca ñáyuu cájichí jeē cácuu i coho i, na quívicoo i ndaha ya, te súcuan-ni na cóho i ndute jeē cótecu i níí cáni sáha.

¹⁸ Te tāca ñáyuu jíni sōho jnúhun Yaā Dios jeē yosó núu tútu yáha, cáhān níhin rí jíin i: Núu ndé ñáyuu chisóo i nuū jnúhun cáhān tutu yáha, te Yaā Dios chisóo yá jnúndóho cáhān tutu yáha, ndoho i. ¹⁹ Te núu ndé ñáyuu quende i jecu jnúhun cáhān tutu yáha, te Yaā Dios quende yā tahū i jeē yosó núu libro jeē yosó síhví ñayuu cotecu níí cáni, te ma níhín i tahū i ini ñuu íi ún. Te tutu yáha cúu jeē cahān síquī tācá un.

²⁰ Te Yaā jeē ni cáhān táca jnúhun yáha, suhva cáhān yā:

Jendaá jeē ndiji yachī rí, achí yá.

Amén. Súcuan na cóo. Jítoho ná Jesús, jíicán tahú na jēe ndíji yachī ní.

²¹ Te ñúhún ni rí jeē Jítoho yō Jesucristo na sáha ga yā jeē váha róhó jíjnāhan ró. Amén.